

24/5

Mahaveera Charitram

"Gunachandra Sori"

87.1097

134 H

इइ सिरिचन्दकुलीणऽभयदेवसूरिपट्टहसिरिपसणचंदसूरिवियेण सिरिसुमइ-

वायगविणेयगणिसिरिणुणचन्दनिम्मियं कप्पडवाणिज्जभिजण-

गोवद्धणसुतजज्जणागपुत्तसिट्ठवीरगहकारियं

सिरिवीराजिणचारियं सम्मत्तं.

10:16

इति श्रेष्ठि-देवचन्द लालभाई-जैनपुस्तकोद्धारे ग्रंथांकः ७५ ॥

Shreshthi Devachand Lalbhai Jain Pustakoddhara Series, No. 75.

Śrī MAHĀVĪRA CHARITAM

(PRĀKRITAM)

BY

Śrī GUṆACHANDRA SŪRI

Copies 1250]

Price Rs. 4-0-0.

[A. D. 1929,

[All rights reserved by the Trustees of the Fund,]

Printed by Ramchandra Yesu Shedge, at the Nirmanya-sagar Press, 26-28, Kolbhat Lane, Bombay.

Published by Jivachand Sakarchand Zaveri, on behalf of Seth Devachand Lalbhai Jain Pustakodddhara
Fund. No. 121-123, Javeri Bazar, Bombay.

श्रीमहावीरचरित्रस्योपोद्घातः ।

श्रमणस्य भगवतो महावीरस्य चरित्रमिदमुपदाक्रियमाणं सज्जनेभ्योऽस्ति, यद्यपि भगवतश्चरित्राणि नैकानि श्रीहेमचन्द्राचार्यैर्भेमि-
चन्द्राचार्योदिमिविहितानि सुन्दरतराणि मुद्रितपूर्वाणि च परं न किमप्येतावन्माणं ग्रहं चातः किमपि, यत एतच्चरित्रं वैकभीयायां द्वादशस-
ताब्द्यामेकोनचत्वारिंशदधिकेषु समानां व्यतीतेषु विद्वब्धं द्वादशसहस्रमानं च, रचयितारश्चास्य चान्द्रकुलीनाः श्रीभक्तो गुणचन्द्राः
सुमतिवाचकविनेयाः, एतच्च प्रस्तुतचरित्रग्रान्तभागावलोकनात् स्पष्टमवसीयते, यत आहुस्तत्र ते—

सिरिसुमह्वायगाणं विणयेलेसेण । गणिणा गुणचदेणं रइयं सिरिवीरचरियमिणं ॥ ५७ ॥

गणिनश्चेमे चान्द्रकुलीनश्रीवर्धमान-जिनेश्चरबुद्धिसागर-जिनचन्द्र-अभयदेवसूरिशिष्यश्रीप्रसन्नचन्द्राचार्यवचनेन
उक्तं ग्रन्थकृद्भिरत्रैव ग्रान्त्यभागे—

साहाइ तस्स चंदे कुलंमि निप्पडिमपसमकुलभवणं । आसि सिरिवद्धमाणो मुणिनाहो संजमनिहिच्च ॥ ४८ ॥

बहलकलकालतमपसरपूरियासेसविसमसमभागो । दीवेणंव मुणीणं पयासिओ जेण मुत्तिपहो ॥ ४९ ॥

मुणिवइणो तस्स हरअट्ठहासियजसपसाहियासस्स । आसि दुवे वरसीसा जयपयडा सूरससिणोच्च ॥ ५० ॥

भवजलहिवीइसंभतमवियसंताणतारणसमत्थो । बोहित्थोच्च महत्थो सिरिसूरिजिणेसरो पढमो ॥ ५१ ॥

गुस्साराओ धवलाउ सुविहिया (निम्मला पु.) साहुसंतई जाया । हिमवंताओ गंगच्च निग्गया सयलजणपुजा ॥ ५२ ॥

अन्नो य पुन्निमयंदुंदुरो बुद्धिसागरो स्री । निम्नाविषयववागणछंदसत्थो पसत्थमई ॥ ५३ ॥
 एंगंतवायविलसिरपरवाइकुंगमंगसीहाणं । तेसिं सीसो जिणचंदसूरिनामो समुप्पन्नो ॥ ५४ ॥
 संवेगंगरंगसाला न केवलं कव्वविरयणा जेण । भव्वजणविह्यकरी विहिया संजमपवितीवि ॥ ५५ ॥
 ससमयपरसमयन्नू विसुद्धसिद्धतंदेसणकुसलो । सयलमहिवल्यवितो अन्नोऽभयदेवसूररिति ॥ ५६ ॥
 जेणालंकारधरा सलक्खणा वरपया पसन्ना य । नव्वंग (सिद्धंत पु.) वित्तिरयणेण भारई कामिणिव्व कया ॥ ५७ ॥
 तेसिं अत्थि विणेओ समत्थसत्थत्थबोहकुसलमई । स्री पसन्नचंदो चंदो इव जणमणणंदो ॥ ५८ ॥
 तव्वयणेणं सिरिसुमइवायगगणं विणयेलेसेण । गणिणा गुणचंदेणं रइयं सिरिवीरचरियमिमं ॥ ५९ ॥

अत्र नहि खरतरगच्छप्रादुर्भावस्य गन्धोऽपि, एवमेव च न श्रीजिनेश्वरसूरिशिष्यश्रीजिनचन्द्रकृतायां संवेगंगरंगालायां न च श्रीअभय-
 देवसूरिकृतायां शास्त्रतौ न च श्रीअल्लदेवोपाध्यायकृते सुसुन्दरीचरिते यावत् अशीत्यधिके समासहस्रे जवालिपुरि चतुर्मासीस्थिताभ्यां
 श्रीमज्जिनेश्वरबुद्धिसागरसूरिभ्यां विहितयोरष्टकवृत्तिबुद्धिसागरव्याकरणयोरपि न खरतरगच्छप्रादुर्भावगन्धोऽपि, एवं यदि श्रीजिनेश्वरसूरिमिस्त-
 सट्टेद्वैश्वान्यैः सूरिभिर्न स्वीकृता तदा खरतरोसत्तिस्तर्हि तत्परम्पराया बहिर्वर्तिभिः प्रलपितेन किम् ? खरतरगच्छप्ररूपणमूलभूतो जिनवल्लभ
 एव प्रश्नोत्तैकषष्टिशतके स्वस्य कूर्चपुरीयजिनेश्वरशिष्यतामाह, किंच-पुण्यपत्तन्त्या या कोट्याचार्याया विशेषावश्यकवृत्तिपुस्तिका सापि
 स्पष्टमेव निगदति यदुत न श्रीजिनेश्वरसूरः खरतारिखंदं न च जिनवल्लभस्तत्परंपरागत इति, यतः सा एकादशशतकीयसप्तत्रिंशद्वर्षेषु लि-
 खिता, लेखकश्चास्या जिनवल्लभस्यान्तेवासी नेमिकुमारः, स स्पष्टमाख्याति यदुत कूर्चपुरीयजिनेश्वरशिष्यजिनवल्लभार्थं पुस्तकमिदमलेखीति,


अन्यच्च विशेषवश्यकमाष्यप्रतेः ग्रान्तेऽपि नेमिकुमार इत्यभेवाह, तथा च न तत्र जिनेश्वरसूरेः खरतरबिरुदं जिनवल्लभस्य तत्पररानि-
र्गता च, पाश्चात्यैः खरतरैर्महतामभिधानेन प्रतिष्ठामभिलाषुकैः कल्पित एवैषः वृत्तान्तः, अत एवोपदेशसप्ततिकारैः 'येभ्यः प्रतिष्ठामापन्नो,
गच्छः खरतराभिधः' इति वाक्येन स्वाधानां प्रलापो ध्वनितः सत्य एव लक्ष्यते ।

किंच—या खरतरगच्छमूलभूतेन जिनवल्लभेन श्रीवीरस्य भगवतो गर्भापहारः षष्ठकल्याणकतया मतः सोऽपि नैभिर्गणिभिर्मतः,
अत एव च श्रीमद्भिरत्र चतुर्थप्रस्तावस्योपसंहारे पत्रे १४१ 'गन्मावयारजम्मणदिक्खाकल्लाणकहणणडिबद्धो—चउत्थओ एस पत्था-
वो' इत्युक्त्वा गर्भापहारस्य कल्याणकता निराकृता, यद्यपि श्रीमद्भिर्हरिभद्रसूरिभिर्यात्रापञ्चाशके श्रीमद्भिरभयदेवसूरिभिः स्वाध्यात्मपूर्वज-
तया स्वीकृतैश्च तद्वृत्तौ 'हत्थुत्तरजोएणं चउरो' इत्येतत्सूत्रेण तद्विवरणेन च स्पष्टतया षट्कल्याणकवादिनां जिनवल्लभादीनां यदृच्छावादिता
दर्शितैव तथापि केचन स्वगच्छाग्रहन्त आहुः यदुत सर्वजिनकल्याणकानां समतां दर्शयितुं तैस्तथोक्तं, यद्यपि केचनपि षष्ठकल्याण-
कस्यानुक्ततया न तत् श्रद्धातुं शक्यमागमरसिकैः, परमत्र तैरपि तथा वक्तुं न शक्यं, यतो वीरचरित्रे अत्र अन्यत्र च कुत्रापि विहाय
जिनवल्लभं तदनुसारिणं च न कोऽप्यागमश्रद्धालुराह कल्याणकषट्कं, तथा च यथा श्रीमलयगिरिभिः जिनवल्लभस्य संहननानां शक्तिवा-
चकतां सिद्धान्तानभिहितमपि सिद्धान्ताभिहितां मन्वानस्योत्सूत्रादिता श्रीजीवाभिगमप्रज्ञापनादिवृत्तौ स्पष्टमभिहिता तथैवात्रापि तस्य
तथात्वं ध्वन्यमानं न व्याहन्यते इत्यलं चसूर्या गच्छकदाग्रहरसिकैः ।

चरित्रे चात्र स्त्रीबालसुबोधा प्राकृतैर्वादिता भाषा, तथाच प्राकृतवाणीविलासिनामप्राकृतानामतीवाद्रास्पदमिदं, विशेषतस्तत्र तन्ना-
नेकविषयगतान् प्रबन्धान् दिदृक्षूणां । प्रस्तावाश्चात्र श्रीमद्भिः कृता अष्ट, प्रतिप्रस्तावं चात्राधिकारा इमे

प्रस्तावः	विषयः	पत्रं	प्रस्तावः	विषयः	पत्रं
१	श्रीवीरस्य सम्यक्त्वलाभः	२	५	चण्डकौशिकप्रतिबोधनावसानं वृत्तं	१८२
२	मरीचिः षट्परिवाजकभवाश्च	२८	६	गोशालकाय तेजोलेशयोपायकथनान्तं वृत्तं	२२३
३	प्रियमित्रान्ता भवाः	७०	७	केवलज्ञानोत्पत्त्यवसानं वृत्तं	३५०
४	श्रीवीरस्य च्यवनगर्भजन्मदीक्षाः	१४१	८	निर्वाणान्तं वृत्तं ग्रन्थकृतशस्त्रिश्च	३६०

चरित्रं चैतत् श्रीमतां प्रसन्नचन्द्रसूरीणां वंचनेन श्रीमद्भिर्विहितं, परं विधापनायाभ्यर्थिताः श्रीमन्तः श्रीमद्भ्यां छात्रावली (छात्राल-
वास्तव्याभ्यां श्रेष्ठिभ्यां शिष्टवीरनामभ्यां, तयोः पिता जज्जनागः कर्पटवाणिज्यात् छात्रावल्यामागतः, तत्र च कर्पटवाणिज्ये जज्जनागपित्रा
श्रीमद्वायडगच्छीयजीवेवसूरितच्छिष्यश्रीजिनदत्ताभ्यामधिगतसम्यक्त्वेन नन्दीश्वरचैल्यं विहितं श्रीमता गोवर्धनेश्रेष्ठिना, तत्तुहन्मवृक्षश्रायं



स्यष्टं चेदं ग्रन्थप्रशस्तौ, तथाहि—

एयस्स विरयणमी निब्बंधो जेसि गाढमुण्णन्नो । ते पुण मूलाओ चिय साहिज्जेते निसामेहो ॥ ६० ॥
सियजसजोण्हाधवलियनायकुलनहयले मयकुव्व । पुव्वमेहेसि महेसीपणओ सिरिजीवदेवपहू ॥ ६१ ॥
तस्स सुसिस्सो सिद्धंतसिद्धसुविसिद्धसंजमामिओ । गुणरयणरोहणगिरी पयडो जिनदत्तस्सुरीत्ति ॥ ६२ ॥
गंभीरिमाए पसमेण बुद्धिविभवेण दक्खिणत्तेण । सुंदरनएण जेसिं कोऽवि न तुछो जए जाओ ॥ ६३ ॥
तेहिंतो पडिबुद्धो 'वायड'कुलभवणजयपडायनिमो । कप्पडवाणिज्जपुरे सेढी गोवद्धणो आसि ॥ ६४ ॥
नंदीसरावलोयणमणण भव्वाण दंसणत्थं च । कारावियं सुतुंगं बावन्नजिणालयं जेण ॥ ६५ ॥
धम्मधरणीए गिहिणीए तस्स सोढित्ति नामधेयाए । अगणियगुणगणनिलया पुत्ता चत्तारि उण्णन्ना ॥ ६६ ॥
पढमो अम्मयनामो बीओ सिद्धोत्ति जज्जणागो य । तइओ चउत्थओ पुण विक्खाओ नन्नओ नाम ॥ ६७ ॥
नयविणयसच्चधम्मत्थसीलकलिहं जेहिं दिट्ठहिं । नूणं जुहिड्डिलाईवि सद्धिज्जेति सप्पुरिसा ॥ ६८ ॥
अहं संथारयदिव्वलं पवज्जितं भावसारमंतंमि । गोवद्धणंमि सग्गं गयंमि तह पढमपुत्तदुगे ॥ ६९ ॥
सो सेढी जज्जणागो छत्तावल्लीए वासमकरिंसु । सव्वकणिडो नन्नयसेढी पुण मूलाणेवि ॥ ७० ॥
तेसिं च भइणिणुत्तो नियपुत्ताओवि गाढपडिबंधो । आसि जसणागनामो सेढी सुविसिद्धगुणनिलओ ॥ ७१ ॥
अहं नन्नयस्स पुत्ता पयडा सावित्तिकुच्छिसंभूया । दोन्नि चिय उण्णन्ना गोवाइओ कवड्डी य ॥ ७२ ॥

संतुंजयपुहसमत्यतित्यजता पयद्विया जेण । पढमं चिय तस्स कवड्डिसेद्धिणो को समो होज्ज ? ॥ ७३ ॥
 पुरिसत्यकरणनिरयस्स जज्जणागस्स विस्सुयजसस्स । अत्थि जिणधम्मनिरया कलत्तमिह सुंदरी नाम ॥ ७४ ॥
 जाओ तीसे सुंदरविचित्तक्खणविराइयसरीरो । जेहो सिहो पुत्तो बीओ पुण वीरनामोत्ति ॥ ७५ ॥
 को तेसि दाणविन्नाणबुद्धिसुविमुद्धधम्मगेहाण । निउणोऽवि गुणलवंपि हु होज्ज समत्थो पवित्थरिउं ? ॥ ७६ ॥
 नागो इव पिंडिज्जइ बंभंडकरंडए अमायंतो । जस्स जसोहो सारयनिसिच्छणमयलच्छणच्छाओ ॥ ७७ ॥
 जिणबिंबुपसत्थतित्यजत्ताइधम्मकरणेण । धम्मियजणाण मज्जे जेहि य पत्ता पढमेरहा ॥ ७८ ॥
 अन्नाणतण्हसमणी सुयनाणपवा पयद्विया जेहिं । सयलागमपोत्थयलेहणेण निक्खंपि भव्वाण ॥ ७९ ॥
 तेहिं तित्थाहिंवपरमभत्तिसव्वस्समुव्वहेतेहिं । वीरजिणचरियमेयं कारवियं मुद्धबोहकरं ॥ ८० ॥
 जमजुत्तमेत्थ भणियं नियमइदुब्बल्लओ मए किंपि । तं साहंतु गुणट्ठा ओच्छाइयमच्छा विउसा ॥ ८१ ॥
 छत्तावल्लिपुरीए मुणिअथेसरगिहंमि रइयमिमं । लिहियं च लेहणं माहवनामेण गुणनिहिणा ॥ ८२ ॥
 नंदसिद्धिरुदंसखे(१३९)वेक्कंते विक्कमाओ कालंमि । जेहस्स सुद्धतइयातिहिंमि सोमे समत्तमिमं ॥ ८३ ॥
 विदुब्बं चैतच्चरित्रं छात्रावल्यां श्रीमद्भिः स्थितिं दधद्भिः, मानं चास्य द्वादश सहस्राणि श्लोकानां ॥ चरित्रे चात्र विचक्षणानां विलोक-
 नाहोणि बहूनि स्थानानि, विशेषेण चेमानि-
 १ पत्तो मगहाविसए, तहिं दिट्ठा कोडिपुरिसवोज्जा महासिला—मोत्तुणं कोडिसिलं, पत्ते ५९, अत्र कोटीशिलेति शिला कात्तीति
 प्रश्ने निश्चितं तस्मा मगधविषये स्थानमिति

२ जिणवरो नाउं । चालइ मेरुं चलणंगुलीइ १२० । इह चावधेयं सिद्धान्तश्रद्धारहितैः, यतो न श्रीमद्भिर्हमचन्द्रैः केवलमेतत् मेरुचालनं प्रत्यपादि, किन्तु तत्प्राक्कालीनैरपि श्रीगुणचन्द्रगणिभिः, श्रीमहानिशीथरुतीयाध्ययने श्रीपद्मचरित्रेऽपि च एवमेवाख्यातं स्पष्टतया

३ सिरिवद्धमाणचरियंमि—गम्भावयारजम्मणदिक्खक्खणकहणपडिबद्धो—चउत्थओ एस पत्थावो १४१, अनेन वचसा खा-
धानां जिनवल्लभादीनां षट्कल्याणकवादिनां श्रीमज्जिनेश्वराभयेदवसूयोः परंपराया बहिर्वर्तिता स्पष्टीभवति

४ ताहे तिलेयनाहो शुब्बंतो देवनरनरिंदहिं—कप्पोत्ति तहवि साहइ २५१, अनेन वचसा भगवतः प्रथमदेशनाक्षणे नैव देवनराणां सम्राव इति न समंतं गणिभिः, 'पुब्बि देवाणं धम्मं आइक्खइ' इत्यादिवाक्यं तु देवपर्षत्प्राधान्येनेति ख्यापितं श्रीमद्भिः

५ तामलित्तिदसम्भुरवीभयचंपाउज्जेणीगयपुरकंपिल्लनंदिपुरमहुरापुरेसु महानगरेसु भव्वसत्तज्जणं पडिबोहिता २६१, अनेन वचसा निरस्तास्ते मूलतो ये निजगदुरवन्त्यादीनां देशानां श्रीसंप्रतिनृपात् प्रागनार्यतां, यतः स्पष्टतयाऽत्र श्रीवीरस्य केवलत्वे उज्जयिनीदशार्णभद्रा-
दिषु विहारो दर्शितः, तेषां भ्रममूलं कौशाम्ब्या अटव्याः स्थाने कौशाम्ब्या नगर्यां ग्रहः, अस्ति च गोदावर्या उपकंठं कौशाम्ब्यटवी यत्र श्रीकृष्णस्य प्रेतता पाण्डुमथुरां गच्छतः, एवं च सौराष्ट्रकलिंगादीनां न व्याहन्येत श्रीवीरकालेऽप्यार्यता

६ अन्नया सेट्ठिणी नरिंदपत्ती य पंचवण्णसुराहिक्कुसुमदहिहक्खयसुगंधिगंधवूववासपडिपुण्णपडलकरपरियरियाओ गयाओ जिणालयं, विरइया अणेगविच्छित्तिमणहरा सव्वण्णुर्विबाण पूया ३२७, अनेन स्त्रीणां जिनविम्बानां पूजाया निषेधकस्य जिनदत्तस्य शास-
नतत्त्वापलापिता ध्वनिता

७ कप्पसमत्तीए विहरिया मुणिणो ३२९, इत्युत्तया मासकल्पविहारसोत्सूत्रतावादिनो जिनदत्तस्य सूत्रोत्तीर्णवादिता व्यक्तीकृता

६ गुरुसाराजो धवलउ सुबिहया साहुसंतई जाया ३४०, इत्येवं श्रीजिनेश्वरसूरः सुबिहितनसुद्धजो वर्णितः, तथाच तेभ्यः
सुतरोत्पत्तिं वानुदुका दूरं निरस्ताः, यद्यपि कैश्चिदपास्य भवभियं न्यस्तमत्र 'खरयया' इति पदं न च तत् प्रब्रज्वादेशेषु, न च यथार्थं,
तदनुयायिभिर्यव्यकरणसंवेगंगशालादिवृत्तिसुरमुन्दरीचरित्रादिषु तदुल्लेखस्याकृतेः, न च मात्रागणोऽपि लकारादारब्धो यथायथं समाप्नोति
इत्यलमतिविस्तरेण । चरित्रस्यास्य मुद्रणमारब्धपूर्वं श्रेष्ठि देवचंद लालभाइ जैनपुस्तकोद्धारसंस्थाया, परं समाप्तस्वरसरे श्रीराजनगरे
श्रेष्ठिसुवाभाइ रवचंद इत्यनेन स्थापिताया विद्याशालासंस्थायाः कार्यवाहकैः श्रेष्ठिशिवाभाइ मोहनभाइ (३) जीवनभाइ
इत्येभिः आगमाराधनोत्सवागतनान्येन च द्रव्येण साहाय्यं चिकीर्षुभिः पंचविंशतिशतिका दत्ता द्रम्माणां संस्थायै एतस्यै, तेनानया
संस्थया यथायथं समाप्य प्राकाश्यं नीतं चरित्रमेतत् । शोधने विहितेऽपि श्रमे स्वलितं यत् शोधयन्तु धीमन्तः सज्जनास्तदित्यर्थयेत
आनन्दसागरः १९८५ कार्तिकशुक्ला ३ गुरुवासरे राजनगरात्

श्रीवीरचरित्रस्य विषयानुक्रमः



१ प्रस्तावः

प्रस्तावना

महावप्रजयन्तीशत्रुमर्दनवर्णनं

नयसारवर्णनं

अटवीमध्ये साधुभ्यो दानं

धर्मदेशना सम्यक्त्वं च

सौधर्मे देवत्वं धर्मकार्यं च

२ प्रस्तावः

विनीतावर्णनं

श्रीऋषभप्रभुवर्णनं

समवसरणवर्णनं

वामासुतमरीचिदीक्षा

२ अंगारवधकट्टष्टान्तः

३ पारिव्रज्यं

३ मरीचिदेशनादि

४ इन्द्रचक्रिकृतमवग्रहदानं

मरीचेः कुलमदः

अष्टापदे चैतं तद्रुणाश्च

कपिलदीक्षा मरीचिकालः आसुरि-

दीक्षा अव्यक्तादि

७ सूरसेनपरिव्राजकचरित्रं अग्निद्योतदीक्षा

९ सनत्कुमारे देवः श्वेतांबिकायां भारद्वाजः

१० माहेन्द्रे देवः संसारः

११ परिवाडुवृत्तं भोगदेवः श्यावरदीक्षा

१३ ब्रह्मदेवः

१४ ३ प्रस्तावः

१५ विश्वभूतेर्मधुक्रीडा

१७ देव्याग्रहः कूटपुरुषाः रणयात्रा विश्वज-

१९ न्दिक्रीडा विश्वभूतेरपमानं संवेगश्च

२० संभूत्याचार्यवर्णनं देशना विश्वभूतिदीक्षा

परिजनाकन्दः बोधश्च

२३ विश्वभूतेस्तपः गोनुन्नस्य पातः विद्वानं ३१

२५ महाशुके देवः

रिपुमर्दनः अचलः युगावती पुत्री रानी च

२५ सप्त स्वप्नाः त्रिपुष्टुजन्म ३३

प्रेक्षणकं अथग्रीवदूतापमानं सिंहवधः ५०

युद्धं प्रतिवासुदेववधः अंतःपुरविलापः

अंगादिदेशसाधनं कोटीशिलोत्पादनं ६०

पोतनपुरे श्रेयांसजिनागमः धर्मकथा

सम्यक्त्वं ६२

गायकमुनिः देव्यपमानं सप्तभनरकगमनं ६३

धर्मघोषसूरिदेशना अचलदीक्षामोक्षौ ६३

प्रियमित्रचक्री अनार्यदेशसाधनं चक्रिकृद्धिः

वैराग्यं प्रोष्ठिलाचार्यदेशना दीक्षा शुक्रदेवः ७१

४ प्रस्तावः

तन्दनजन्म प्रोष्ठिलाचार्याः देशना ७२

तृपो नरसिंहः चम्पकमाला देवी मन्त्रिवर्गः

सुतचिन्ता घोरशिवागमः मन्त्रसाधनं

घोरशिवमूर्च्छा श्रीभवनपुरं अवन्ति-

सेनो राजा वीरसेनविजयसेनौ राज्यं

स्वेचयुद्धं गगनवह्मभे विजयराजसुतो

जयशेखरः वैर्यमिततेजाः वीरसेनरा-

जत्यापहारः विजयसेनकृतो राज्यक्रमः

सोमदत्तगृहे स्थानं प्रस्थानं योग्याचार्यो

महाकालनामा प्रव्रज्या, अष्टशतेन होमः

क्षत्रियैः, वैताल्यगमनं चंपकमालया

ध्वजस्वप्नः घोरशिवस्य राज्यं नर-

विक्रमाभिधानं हर्षपुराधिपदेवसेनदु-

हितुर्वरणं कालमेघमल्लजयः शीलवत्यौ

पितृशिक्षा पुरप्रवेशः युवतिविभ्रमा

जयकुञ्जरवशीकरणं कुमारस्य प्रवासः

पाटलगृहे वासः शीलवत्या अपहारः

जयवर्धने राज्यं नद्या नरविक्रमापहारः

सामन्तभद्रः देशना सुतौ गोकु-

लिकृतृहे सुतसंयोगः शीलदाल्यौ शी-

लवत्या योगः मालाकाराय चौडराज्य-

दानं जयन्त्यां गुरोर्गमनं देशना पित्रा

योगः राज्यभिक्षेकः शिक्षा साधु-

नृपयोः १०९

नन्दननृपस्य दीक्षा विंशतिस्थानकारा-

धनं प्राणते देवः १११

देवानन्दकुक्षावतारः स्वप्नानामुपलभश्च १११

इन्द्रस्तुतिः गर्भापहारः देवानन्दकंदः ११२

त्रिशलाकुक्षौ संक्रमः स्वप्ना वृद्धिमनोरथाः ११४

निष्पन्दत्वं शोकः अभिग्रहः ११५

श्रीवीरस्य जन्मनि दिक्कुमारीभद्रः ११७

अभिक्षेकसासथी मेरुचालनं अभिक्षेकः १२३

नृपकृतो महः

वर्धमाननामकरणं सुरपिशाचसर्परूपा-

भ्यामभीतिः लेखशालानयनं

यशोदाभिधानकरणं

यशोदया श्रीवीरस्य विवाहः, प्रियदर्शना-

जन्म

मातापित्रोः स्वर्गमनं, नन्दिवर्धनस्य रा-

ज्याभिषेकः

संवत्सरदानं नन्दिवर्धनकृता महानसशा-

ला लोकान्तिकागमनं च

दीक्षाभिषेकः चन्द्रप्रभा शिविका दीक्षा-

महोत्सवः

५ प्रस्तावः

सोमब्राह्मणाय वक्षार्धदानम्

१२५

कूर्मोद्गमने गोपोपसर्गः शक्रकृता निर्भ-

र्त्सना दूहजंताश्रमे गमनं वर्षायाः

पक्षे गते निर्गमः अभिग्रहपंचकं १४८

वर्धमानग्रामस्यास्थिग्रामत्वे हेतुः वृषस्या-

प्रतिजागरणाद् द्वेषः मारिः चैत्यम् १५२

शूलपाणिकृता उपसर्गः तत्प्रतिबोधः

स्वप्नदशकं इन्द्रशर्मोक्तं तत्फलं (१) १५६

अच्छंदकस्य कुटिलता शक्रशिक्षादि १५८

सुवर्णवालुकायां वक्षार्धस्य पातः, नन्दि-

वर्धनाय लक्ष्णेण दानं तस्य १५९

कनकखलाश्रमः (गोभट्टो विप्रः वना-

रसीप्रस्थानं विद्यासिद्धाकृष्टा रसवती

युवतिश्च शीलराक्ष्यं जालन्धरे चन्द्र-

लेखाचन्द्रक्रान्ते ईशानचंद्रः रक्षाव-

लयं गंगायां प्रवेशः नासिककाकू

जालन्धरे गमनं ईशानचन्द्ररक्षा यो-

गिनीशान्तिः परस्त्रीनियमः भृशे शा-

गमनं भार्याभरणश्रवणं धर्मभोगस्य

देशना दीक्षा मंडूकीविराधना क्रोधः

ज्योतिष्कः तापसः चंडकौशिकः

बोधः

उत्तरवाचाला श्रेतां विकायां गृहे शि-

नृपकृता स्तुतिः

सुरमिपुरं सुदंष्ट्रसुरोपसर्गः कंबलशंखौ

मथुरा जिनदासः साधुदासी गंगोत्तरः

स्थूणाके गमनं पुण्यबोधः १८२

६ प्रस्तावः

राजगृहनालन्दायां तन्तुवाभाजुगलालायां

वर्षावासः (२)

१८३

उत्तरापथे सिलिन्ध्रे केशवशिवापुत्रो मं-
खः पूर्वप्रियोपलब्धये पट्टिकाकृतिः मं-
खलीमुभद्रयोर्मखत्वं गोशालजन्म,
श्रीवीरेण मीलनं कोलाके सिध्यत्वं प्रा-
गृहीताया नियतेः स्थालीस्फोटे दाल्ढ्यं
ब्राह्मणग्रामे उपनन्दगृहदहः चंपायां
वर्षावासः (३) कालके पात्रालके च ताडनं
कुमारे मुनिचन्द्राः चौराके सोमाजय-
न्तीभ्यां मोचनं पृष्ठचम्पायां वर्षावासः (४)
कुतांगले दरिद्राः श्रावस्यां मनुष्यमांसं
हरिद्रुमेऽग्निः मंगलाग्रामे वासुदेवगृहे
आर्वते बलदेवगृहे च स्थानं चौराके
मंडपदहः कलंबुकायां कालमेघह-
स्तिनौ म्लेच्छदेशे गमनं पूर्णकलशे स्ते-

नवधः भदिलायां वर्षावासः (५) कद-
लीसमागमे जंबूखंडे चास्तारिकामके
तंबाके नन्दिषेणाः कूपिके विजयाप्र-
गलभाभ्यां मोचनं वैशालीप्रस्थानं (६)
गोशालो बाधितः अयस्कारघातः २९८
विभेलकयक्षस्योत्थानपर्याणिका २९२
शालिशीर्षे कटपूतनोपसर्गः लोकावधिः २९३
आलम्बिकायां वर्षारान्नः (७) २९३
गोशालमीलनं २९३
कुण्डागे मधुमश्रनगृहे गोशालचेष्टा मर्दन-
ग्रामे बलदेवगृहे च २९३
सालाग्रामे सालजोपसर्गणजे २९४
लोहागले जितशयुकृतः सत्कारः २९४

पुरिभतालै वगुराश्रेष्ठिकृता पूजा, धर्मवेष-
सूर्युकं पूजाफलं दानं च २९७
तुन्नागपथे श्रीभूमौ च गोशालस्य ताडनं
राजगृहेऽष्टमो वर्षावासः (८) २९८
लाढावज्रभूमिशुद्धभूमिपूषतर्गाः वृक्षभूले
वर्षावासः (९) २९८
सिद्धार्थकर्मश्राभयोरन्तराले तिलप्रभादे २९८
वैश्यावसनस्योत्थानपर्याणिका तेजोलेश्या
तन्निवारणं तदुपायप्रशोत्तरे २२३
कर्मरसिद्धार्थपुरोरन्तराले तिलनिश्चयात्
प्रवृत्तिपरिहारो नियतिवाददाल्ढ्यं च
श्रावस्यां तेजोलेश्या पार्श्वन्तेवारि-
संगमः २२४

७ प्रस्तावः

वैद्याभ्यां शंससत्कारः गंडकिकायां नावि-

कोपसर्गः ऋतुषट्स्याविकारिता २१९

वाणिज्यग्रामे आनन्दगाथापतिः अव-

धिमान् २१९

श्रावस्यां वर्षारत्रः (१०) सानुषष्टिके

प्रतिमाः २२६

दृढभूमौ पेढाले संगमोपसर्गः, संगम-

कस्य सौधमोन्निर्वासनं २३१

आलंभिकायां विद्युत्कुमारेन्द्रस्तुतिः श्वेतां-

विकायां हरिस्सहस्तुतिः श्रावस्यां स्क-

न्द्रप्रतिमासत्कारः कौशाभ्यां चन्द्र-

सूर्यवतारः वाराणस्यामिन्द्रपूजा रा-

जगृहे ईशानार्चा मिथिलयां जनक-

स्तुतिः धरणेन्द्रवन्दना २३३

राजगृहे वर्षारत्रः (११) भूतानन्दस्तुतिः

जीर्णश्रेष्ठिभावना केवलदेशना २३४

चमरेन्द्रोत्पातः सुसुमारै

भोगपुरे माहेन्द्रोपसर्गः सनत्कुमारेन्द्र-

नतिः नन्दीग्रामे नन्दिस्तुतिः ४४१

चम्पापातः धारणीमरणं चन्दना कुल्मा-

षाभिग्रहः २४७

षाण्मासिकः कीलकोपसर्गः मध्यमापापायां

कीलकनिर्गमः २५०

तपःसंकलना केवलज्ञानं च ३५१

८ प्रस्तावः

समवसरणरचनं धर्मदेशना २५३

गणधराणां प्रतिबोधः दीक्षा चन्द्रवत्प्रा

दीक्षा संघस्थापना २५९

ऋषभदत्तस्य देवानन्दयात्रा दीक्षा २६०

क्षत्रियकुण्डे समवसरणं पर्यदेशं नन्दि-

वर्धनकृता स्तुतिः जगालिदीक्षा (भा-

त्रादिवचनप्रतिवचनानि) महः २६१

जमालेर्निहृत्वं प्रियदर्शनाया बोधः ज-

मालेर्गेतिः २६९

कौशाम्ब्यां सुरप्रियलब्धवरे नृपस्य क्रोधः

चण्डप्रद्योतकृता भृगावत्याः प्रार्थना दी-

लरक्षार्थं छलं भृगावत्या दीक्षा या वा

सा सोदाहरणं आनन्ददीपानां दीपि-

ज्यग्रामादिषु बोधः कोशाभ्यां चन्द्र-

सूर्यवतरणं कैवल्यं २७३

आश्चर्यदशकं आनन्दश्रवणः गोशालक-	सुदंष्ट्रजीवकर्षकस्य दीक्षा तन्मोचनं च	सामयिके कामदेवकथा	३२३
कृत उपसर्गः सर्वानुभूतिः सहस्रारे सु-	तामलित्यादिषु विहारः प्रसन्नचन्द्रादी-	देशवकाशिके सागरदत्तकथा	३२५
नक्षत्रोऽच्युते	नां बोधश्च	पोषधोषवासे जिनदासकथा	३२७
गोशालकदाहः अयंपुत्रः शिष्येभ्यो निहं-	राजगृहे समवसरणं	अतिथिसंविभागे साधुरक्षितकथा	३२९
रणदेशः सप्तमदिने सम्यक्त्वं आदेशः	प्रथमाणुव्रते हरिवर्मकथा	सेडुकद्विजवृत्तं	३३४
सिंहानीतौषधेन नीरोगत्वं श्रीवीरस्य	द्वितीयाणुव्रते सत्यश्रेष्ठिकथा	गागलिप्रवज्यादि	३३४
गोशालकस्य भवाः	तृतीयाणुव्रते वसुदत्तकथा	अष्टापदयात्रा तापसानां बोधादि	३३५
राजगृहे धर्मदेशना मेघकुमारस्य दीक्षा	तुर्याणुव्रते सुरेन्द्रदत्तकथा (शुभंकर-	मिथिलायां दुष्प्रपामाश्रुणोक्तिः	३३७
भग्नमनस्कत्वं पूर्वभवौ	कथा)	आयुर्वर्धने विज्ञप्तिः	३३८
नन्दिषेणस्य दीक्षा, देवेन कृतो निषेधः	पंचमाणुव्रते वासवदत्तकथा	निर्वाणमहः गौतमकेवलं	३३९
जिनेनापि, वेश्यागृहे स्थानं दशकदश-	द्विष्रते जिनपालितकथा	परम्परा ग्रन्थकारकाणामितिहा च	३४१
कबोधः दीक्षा देवत्वं	भोगोपभोगमाने रविपालकथा	इति श्रीमहावीरचरित्रस्य विषयानुक्रमः	
	अनर्थदण्डविरतौ कोरट्टकथा		३२२

शेठ-देवचन्द-लालभाई-जैन-पुस्तकोद्धारसंस्थायाः क्रेयग्रंथाः


अंक.	मूल्य.	अंक.	मूल्य.	अंक.	मूल्य.
३०	आनन्दकाव्यम० मौक्तिक ४ श्रुं ०-१२-०	६०	विंशतिस्थानचरित्रं पद्यबद्धं १-०-०	६८	नवपदप्रकरणं लघुवृत्तिः १-०-०
३२	" " ५ मुं ०-१०-०	६१	कल्पसूत्रसुबोधिका २-०-०	६९	पंचवस्तुग्रंथः सटीकः ३-०-०
४३	" " ६ हुं ०-१२-०	६२	सुबोधा सामाचारी ०-८-०	७०	आनन्दकाव्यम० मौक्तिक ८ श्रुं.
४८	आद्यप्रतिक्रमणसूत्रवृत्तिः २-०-०	६३	श्रीपालचरित्रं प्राकृते साव- चूर्णिकं १-४-०		१-८-०
५१	सेनप्रश्नानि (प्रश्नोत्तररत्नाकरः) १-०-०	६४	प्रवचनसारोद्धारः सटीकः उ- त्तरार्ध, ४-०-०	७१	आचारप्रदीपः १-८-०
५३	आवश्यकदिप्पनं. १-१२-०	६५	(द्रव्य) लोकप्रकाशः भाग १ लो २-०-०	७२	विचाररत्नाकरः ३-०-०
५४	जम्बूद्वीपप्रज्ञप्तिः सटीकादुत्तरार्ध. २-०-०	६६	आनन्दकाव्य म० मौक्तिक ७ मुं. १-८-०	७३	नवपदप्रकरणं बृहद्वृत्तिः ४-०-०
५६	श्रीपालचरित्रं संस्कृते. ०-१४-०	६७	तत्त्वार्थधिगमसूत्रं भाष्यटीका- युक्तं पूर्वार्ध ६-०-०	७४	(क्षेत्र) लोकप्रकाश भाग. २ जी २-८-०
५७	सूक्तमुक्तावली. २-०-०	६९	तंदुलवैयालीयपयन्नो सटीक. १-८-०	७५	महावीरचरित्रम् ४-०-०
५८	प्रवचनसारोद्धारः सटीकः पूर्वार्ध. ३-०-०			७६	प्रियङ्करनृपकथादि १-०-०

श्रीआगमोदय-समिति संस्थायाः क्रेयग्रंथाः

ग्रंथाः १०

॥ १० ॥

अंक.	नाम.	किंमत.	अंक.	नाम.	किंमत.
३४	विशेषा० गाथा विषयक्रमः	०-५-०	४८	विशेषा० भाषांतर भाग २ जो	३-०-०
३५	विचारसारप्रकरणं	०-८-०	५०	जीवसमासः	१-८-०
३६	गच्छाचारपयज्ञो	०-६-०	५१	शोभनस्तुतिः (संस्कृत) प्रेसमां	८-०-०
३७	धर्मबिन्दुप्रकरणं	०-१२-०	५२	स्तुतिचतुर्विंशतिका सचित्रा शोभनमुनिशता	६-०-०
३८	विशेषा० भाषांतर भाग १ लो	२-०-०	५३	चतुर्विंशतिका सचित्रा वज्रमहिमुरिकृत	६-०-०
३९	जैनफिलोसोफी (अंग्रेजी)	१-०-०	५४	भक्तामरकाव्यसंग्रह भाग २ जो	३-८-०
४०	योग	०-१४-०	५५	नद्यादिसप्तसूत्रीगाथाऽपकारादियुतो विषयानुक्रमः	२-०-०
४१	कर्म	०-१२-०	५६	आवश्यकमलयगिरिकृतटीका भाग १ लो	४-०-०
४३	अनुयोगद्वारसूत्रं	२-८-०	५७	श्रीचतुर्विंशतिजिनानन्दस्तुतयः सविवरणाः सचित्राः	६-०-०
४४	नंदीसूत्रं	२-४-०	५८	लीवडीभंडारना हस्तलिखितपुस्तकांशं सूचीपत्र	१-४-०
४५	भक्तामरकाव्यसंग्रह भाग १ लो	३-०-०	५९	जैनधर्मवरत्नोत्तर	प्रेसमां
४६	दशपयज्ञा छायायुक्त	२-०-०		लोकप्रकाश गुजरातीभाषांतर भाग १ लो	प्रेसमां
४७	पंचसंग्रहः (स्वयम्भूतियुतः)	२-८-०		आवश्यकमलयगिरिकृतटीका भाग २ जो	प्रेसमां
				प्राप्तिस्थान सुरत गोपीपुरा.	



श्री देवचन्द लालभाई जेठो

जन्म १९०९ चैत्रमान्दे

निर्याणम् १९६२ दि. १३-१-६२

कार्तिकयुक्तेकादश्यां (देवदीपावली सोमवासरे) पोषद्विजयतीथायाम् (गुरुसंक्रान्त्यंशमासरे)
सूर्यपुरे. मुम्बयाम्.

The Late Sheth Devchand Lalbhai Javeri.

Born 22nd Nov. 1852 A. D. Surat, Died 13th January 1906 A. D. Bombay

7-27 :- Copies 5000.

N. S. P.

॥ नमो वीतरगाय ॥

॥ श्रीमहावीरचरित्रम् ॥

॥ श्रीमद्गुणचन्द्रसूरिवर्यनिर्मितं ॥



पयडियसमत्थपरमत्थवित्थरं भवचक्ककयसोक्खं । विण्णुरइ जस्स रविमंडलं व नाणं निहयदोसं ॥ १ ॥
जस्स य सोहइ पणमंतसक्कसंकंतनयणकमलवणं । कमविमलसरं तललीणसीणमयरं नंहसुजलं ॥ २ ॥
संगमथपणइणीहिं कडक्खविक्खेक्खोभदक्खाहिं । जस्स मणागंपि मणो न चालियं नियपइण्णओ ॥ ३ ॥
नरत्तिरियदेवविहिओवसगरिउवग्गविजयजायजसो । ओहामियऽण्णवीरो सो जयइ जिणो महावीरो ॥ ४ ॥
पणमह सिरिरिसहजिणिंदचंदमुद्दामकामवलदलणं । गिहिसाहुधम्मपासायमूलपीढाइयं जेण ॥ ५ ॥
अजियाइणो जिणिंदा सुरिंदसंदोहनभियकमकमला । धम्ममहिधरणधीरा सेसव्व जयंति सेसायि ॥ ६ ॥
सो जयइ जिणो पासो जस्स सिरि सहइ फणिफणकड्ढो । पायडियसत्तजीवाइत्तत्तसंखं व दावित्तो ॥ ७ ॥
कविसेवियपयकमला सुत्तीहि पसाहिया महाभोगा । गोवग्गजणियसोक्खा सरस्सई जयइ सरियव्व ॥ ८ ॥

दंसियसमगसगापवगसग्गाण गोयभाईणं । गुणवंताण गुरूणं शुणामि पयपकयं निचं ॥ ९ ॥
 इय संथवणिज्जण्यपणाममाहप्पनिह्लियविग्घो । भव्वाण सोक्खसमूलं धम्ममुवएसं पयपेमि ॥ १० ॥
 जलहजलगलियरणं व दुल्लहं पाविऊण मणुयत्तं । पुरिसत्थज्जणकज्जे उज्जमियवं वुहज्जेणं ॥ ११ ॥
 तत्थ पुरिसत्थमत्थयच्चूडामणिविब्भमो परं धम्मो । सो पुण पइदिणसच्चरियसवणओ हवइ भव्वाणं ॥ १२ ॥
 तस्स य धम्मस्स जिणो पणायगो संपयं महावीरो । चरियंपि उ तस्सेव य सुणिज्जमाणं तओ जुत्तं ॥ १३ ॥
 तं पुण निस्सेसागमसमुहसवणासमत्थसत्ताणं । निउणेणावि न गुरुणा समग्गमवि तीरण् वोत्तुं ॥ १४ ॥
 ता जह भुवणेक्कगुरू निप्पडिमपभावघरियधम्मधुरो । भिच्छत्ततिभिमुसुमूरणेक्कमिहिरो महावीरो ॥ १५ ॥
 अच्चंतमणंतमणोरपरभववारिरासिमणवरयं । पुवं परियट्ठिय तिरियतियसपुरिसाइभावणं ॥ १६ ॥
 ओसण्णिणी इमीए पढमं चिय गामचित्तगभवमि । नीसेससोक्खमूलं सम्मत्तमणुत्तमं पत्तो ॥ १७ ॥
 तत्तो पाविय देवत्तमुत्तमं भरहचक्कवट्ठिस्स । मिरिइत्ति सुओ होउं काउं जिणदेसियं दिक्खं ॥ १८ ॥
 दुस्सहपरिसहनिम्ममहियमाणसो पयडिउं तिदंडियं । भिच्छत्तविलुत्तमई कविलस्स कुदेसणं काउं ॥ १९ ॥
 तद्दोसेणं अघराण वड्डुं कोडकोडिसंसारं । छब्भवगहणे पुणरवि पारिद्वज्जं पवज्जित्ता ॥ २० ॥
 दीहं संसारं हिंदिऊण रायगिगहंमि रायसुओ । होऊण विस्समई घोरं संजममणुचरित्ता ॥ २१ ॥

मरणे नियाणबधं निवृत्तिय सुरसुहं च भोत्तणं । पोयणपुरे तिविद्धु परिपालिय वासुदेवत्तं ॥ २२ ॥
 मूयाए पिथमिच्चो चक्कित्तं संजमं च अणुचरिउं । छत्तगाए नंदण नरनाहत्तं च पव्वज्जं ॥ २३ ॥
 परिपालिय वीसइकारणेहिं तित्थाहिवत्तमज्जिणिउं । पाणयकप्पा चविउं कुंडग्गामंमि नयरंमि ॥ २४ ॥
 सिद्धत्थरायपुत्तो होउं जंतूणमुद्धरणहेउं । सबविरेइ पवज्जिय दुव्विसहपरीसहे सहिउं ॥ २५ ॥
 केवललच्छिं लहिउं संपत्तो मोक्खसोक्खमक्खंडं । अट्टहिं पत्थावेहिं सिद्धताओ तह केहेमि ॥ २६ ॥

द्वादशभिः कुलकम् ॥ अहवा-

कत्थ सुवणेक्कपहुणो चरियं अम्हारिसो कहिं कुकई ? । साहसमिममसमुयहिपवाहतरणाभिलासोव्व ॥ २७ ॥
 तहवि हु गुरुज्जणवयणोवरोहओ मुद्धलोयसुहवोहं । विरेणमि चरियमेयं खमियव्वं एत्थ सूरीहिं ॥ २८ ॥
 एत्थ य पत्थुयचरिए नाणाविहसंविहाणागाइन्ने । अमयजलकुल्लतुल्ले महल्लकल्लाणवल्लीणं ॥ २९ ॥

कत्थवि जइवि हु किंपिप्पसंगओ किंपि तुहुवयणाओ । सत्थंतराणुसरणाओ किंपि किर भणइ अउव्वं ॥ ३० ॥
 चरिएयरंति तहवि हु न संकियव्वं कहिंपि कुसलेहिं । उवकहपसुहं एत्तो पज्जत्तं बहुपसंगेणं ॥ ३१ ॥ विशेषकम्

अत्थि समत्थावरविदेहालंकारकण्णपहुमणिमउडविडंकिविहरयणकंतिविच्छुरियचरणजिगनाहिविहरणप-
 संतडिंबडमरं अमरागारसमुत्तुंगसिंगसमुवहसियहिमगिरिवरं वरेवरुलियकणयकलहोयपमुहमहागरसोहियवसुंधराभोगं

भोगोवभोगलालसज्जणजणियपरितोसं सुरभूमिसोहगमडप्फरुसं महावण्यं नाम विजयखेत्तं, तत्थ य विसालसा-
लवलयखाइयापरिविखत्ता नाणाविहविहारवापीकूवमहासरसरियपरिसराभिरामा सुविभत्तत्तियचउक्कचचउप्पह-
पसोहिया पासायसयमालालंकिया सुइनेवत्थमहिच्छच्छेयजणसंकुला पागसासणपुरिच्च दीसंतनाणाविहरयणा कम-
लासणमुत्तिच्च सबओमुही विंझगिरिमेहलच्च पुञ्जागनागसोहिया जहत्थाभिहाणा जयंती नाम नयरी

कुलसेलुपुंगथणत्थलीए नहनइजलेहहाराए । धरणीरमणीए मुहे जा सोहइ चित्तेहव्व ॥ ३२ ॥

सत्तमुणिमेत्तगद्वियमणेगमुणिसंकुला सुरपुरिपि । एगबुहं भूरिविबुहा हसइ व जा तूरसिएहिं ॥ ३३ ॥

जीए य कमलसंडाण भित्तविरहसंकोथपीडाणाणि मुणिवराण करवालुप्पाडणं वालुकुंजरेसुं कलहसदो रंहंगभि-
हुणाण पियविरहवेयणा तंतुवायसालसु वसणुब्भवो, न कयाइ लोएसु, तहिं च-सायरपणमंतमहतसामंतमउलिमा-
लामणिमसिणियपायवीढो पयंडमुयदंडमंडलियकोडडनियत्तित्तक्खलुरुप्पखंडियसयसत्तुमुडमंडियसमरंगणो, दणुब्भ-
डसुहडपरिमुडदंडनाहसहस्साणुसरिजमाणमग्गो मगणगणवंछाइरित्तपूरियमणोरहो, रहोव्व सुसिलिट्ठलट्ठसुचक्कक-
यसचरणो रणरसियपुरिसोव्व कयवहुक्कयपरिगहो गहगणोव्व कविमुहगुरुवयणाणुगओ गओव्व अणवयदाणवरिसो
रिसिच्च निग्गहियछवग्गपयारो पाथारोव्व पुव्वपुहइपालपवत्तियनयनयरीए हिमगिरिच्च डिंडीरपिंडपंडुराकित्तिसुरस-
रियाए जलहिच्च अणेगगणगणरयणरासीए

विपक्खदप्पखंडणो नरिंदवंसमंडणो, अजायभंगसासणो कुनीइलोयनासणो ।

असेससोक्खकारणं करेइ लोयपालणं, नरिंदसत्तुमहणो म(ज)णमि चित्तनंदणो ॥ ३४ ॥

जंमि य नराहिंवे पवलवलसालिभुयपरिहारोविधरणिभारे रायनीइमेत्तं मंतिणो सोहा हरिकरिरहजोहसामग्गी
आडंबरं असिचक्कचावसरकुंतप्पमुहपहरणपरिग्गहो सेवगा पणयावेक्खा सजीयनिर्वेक्खंगरक्खपरिक्खेवपरिकप्पणा ।
तस्स य रण्णो विसिद्धाचारपरिपालणपरायणो धम्मसत्थसवणवियाणिग्रहेज्जोवादेयवत्थुसरूवो गंभीरिमाइगुणग-
णावासो पयइसरलो पयइविणीओ पयइपियंवओ पयइपरोवयारपरो पुहइप्पइट्ठाणनाममि गामे नयसारो नाम गाम-
चित्तगो अहेसि । जो य तहाविहसाहुसेवाचिरहेऽवि अलसो अक्खपचित्तीए परम्मुहो परपीडाए सयण्हो गुणगणो-
वज्जणाए अचक्खू परछिइपलोयणाए । एवंविहगुणो य सो सविसेसगुणक्करिससाहणनिमित्तं भणिओ गुरुअणेण,
जहा-धणरिद्धी दूरं वड्डियावि दुच्चिणयपवणपडिहणिया । एक्कपएच्चिय पुत्तय ! पणस्सए दीवयसिहव्व ॥ ३५ ॥

णीहारहारधवलोवि वच्छ ! सेसो गुणाण संघाओ । विणएण विणा वयणं व नयणरहिंयं न सोहेइ ॥ ३६ ॥

अचंतपिओऽवि परोवयारकारीवि भुयणपयडोऽवि । वज्जिजइ पुरिसो विणयवज्जिओ गुरुभुयंगोव्व ॥ ३७ ॥

इय दुच्चिणयत्तणदोसनिवहमवलोकण बुद्धीए । पुत्त ! रमेज्जसु विणए समत्थक्खणकुलभवणे ॥ ३८ ॥

तहाहि—विणएणं हुंति गुणा गुणेहिं लोगोऽणुरागमुवहइ । अणुरत्तसयल्लोयस्स हुंति सवाओ रिद्धीओ ॥ ३९ ॥

रिद्धीहिं संगओ गयचरोव अणवरयदाणवरिसेण । मग्गणगणपणईणं उवयारं कुणइ लीलाए ॥ ४० ॥

उवयरणेणं तेसिं लब्भइ आचंदकालिया किन्ती । तीएऽविहु लद्धाए किं नो लद्धं तिहुयणेऽवि ? ॥ ४१ ॥

एसच्चिय जेण थिरा जुगविगमेऽविहु न वच्चइ विणासं । उप्पत्तिपलयकलियं सेसं पुण थेवदियहथिरं ॥ ४२ ॥

इय गुरुजणसिक्खं गिण्हिज्जण तह कहवि संपयदो(सो) । वीसासट्ठाणं नरवइस्स परमं जहा जाओ ॥ ४३ ॥

अन्नया य सत्तुमद्दणनराहिवेण भवणसंदणाइनिमित्तं पवरदारूहिं पओयणंमि संपत्ते आणत्तो एसो-भइ ! गच्छसु तुमं पभूयं सगडसमूहं किंकरनरनियरं च गहाय दारुनिमित्तं महाडवीएत्ति, तओ सिरसा सासणं से पडि-
च्छिय विसिट्ठसंवलगसमेओ समग्गसामगीसणाहो पट्ठिओ गामचिंतगो, पत्तो य अणवरयगमणेण महाडवीए,
जा य केरिसी?—गयणयलाणुलिहंतमहंतचित्तरुवराभोगावरद्धदिसावगासा अणवरयझरंतगिरिनिज्झइकारमणहरा
जहिच्छविसरंतरुविरुयारिछहरिहरिणसदूलभीसणा महप्पुरिसवच्छत्थलिव सिरिवच्छालंकिया मिगरायकंधव
केसरविसरविराइया उवसनगरभूमिव मायंगकुलसंकुला सुहडावलिव धरियवाणासणा । तहिं च निउत्तपुरिसेहिं
सरला य दीहरा य विसाला सुंदरा य सुजायवट्ठखंधवद्धा य तरुणो समारद्धा छिंदिं, एवं च छिंदताण जाओ मज्झणह-
समओ, संपत्ता भोयणवेला, पगुणीभूओ भोयणकराणय गामचिंतगो, उवणीया किंकरगणेण विचिच्छखडखज्जणहाणा
रसवई, जइ पुण सत्थपरिब्भट्ठो वा मग्गं अयाणमाणो वा एत्थ तडियकण्णडियसमणप्पसुहो अतिही छुहाभिभूओ एज्ज

ता तस्स दाऊण सयं भुंजामिति संपघारिऊण गामचित्तगेण थेंवं भूमिभागं गंतूण तक्खणमवलोक्यं दिसावल्यं, एत्थंतरे सत्थपरिब्भट्ठा संता परिसंता खुहापिवासाभिभूया मज्झंदिणदिणयरतावविगलंतसेयसलिलधरा तरुवरनि-
वडणकड्यडारावनिसामणसंभावियसत्थावासा समागया तं पएसं तवस्सिणो, दिट्ठा य तेण ससंभमं, गओ तदभिमुहं,
गाढकरुणारसाउरिज्जमाणमाणसेण पणमिऊण पुच्छिया अणेण—भयवं! किमेवं विजणविहारमायरहं?, साहूहिं भणि-
यं—भइ! सत्थेण(समं)पढमं अम्हे पत्थिया, भोगणकाले जाव असणपाणट्ठा गामं पविट्ठा ताव गओ सत्थो, अम्हेऽवि-
तुरंता सत्थाणुमगलगा इंता निग्गया एत्थ महाडवीए, गामचित्तगेण भणियं—अहो निक्करुणया अहो दुट्ठसीलया अहो
नरकनिवासलसत्तणं अहो वीसत्थवाइत्तणं अहो पावाभीरुत्तणं अहो आजम्मा नियकुलकलंककरणं तेसिं सत्थियाणं,
अविय—सत्तपयमेत्तसंथववसेऽवि सुयणाण वहुए नेहो । आजम्मदंसणेऽविहु निहयचित्ताण न खलाणं ॥ ४४ ॥

सत्थाणुसरणकालेऽवि वारिया किं न पावबुद्धीहिं । एए महाणुभावा पढमं चिय साहुणो तेहिं? ॥ ४५ ॥

जइ एएसिं सीहाइएहिं कीरेज एत्थ विदवणं । ता नूणमेव तेसिं नरगेऽविहु होज्ज संवासो ॥ ४६ ॥

अहवा पावाण कहाए होउ नियधम्मदूसणकरीए । आगच्छह आवासं कुणह पसायं ममेयाणिं ॥ ४७ ॥

इय भणिए ते मुणिणो जुगमेत्तनिहित्तचक्खुणो धीरा । तस्सावासमि गया पच्चक्खा धम्मनिहिणो व्व ॥ ४८ ॥

पुणवससाहुदंसणसिणेहसंजायतिव्वसद्धेणं । विउलेहिं असणपाणेहिं तेणऽवि पडिलाहिया विहिणा ॥ ४९ ॥

गहियभत्तपाणेहि य पडिनियत्तिऊण जीवोवरोहरहिए थंडिलमि पडिक्कंता ईरियावहिया आलोइयं भत्तपाणं कयं चितिवंदणं विहिओ तक्कालोचिओ सज्जाओ, सुहज्जाणेण खणंतरं गमिऊण समुज्झय रागदोसं मुणिणो परिजिमियत्ति, गामचिंतगोऽपि कयत्थमप्पणं मन्नतो भोत्तूण समागओ तेसिं सगासे भणिउं पवत्तो—भयवं ! आगच्छह तुम्हे जेण नगरगामिणिं वत्तिणिं उवदसेमि, तओ पत्थिया साहुणो तेण सद्धिं, तेसिं च मज्झे एगो मुणी धम्मकहालद्धिसंनो, तेण य णायं—जहा एस धम्मजोगोत्ति, ता अवस्सं सद्धम्मे निजुजियव्वो होइत्तिचिंत्तिऊण भणिओ सो गामचिंतगो—भो महायस ! कुमगणरिब्भमणपीडियाणं तण्हाखुहाभिभूयाणं अम्हाणं तहाविहपडि-वत्तीए असणपाणदाणेण य परमोवयारी तंऽसि ता किंपि अणुसासिउं समीहामो, गामचिंतएण भणियं—भयवं ! किमेवमासंकह ? नियसिस्सनिव्विसेसं सिक्खवेहित्ति, तओ साहुणा पारद्धा धम्मदेसणा, जहा—

धणुसिक्खाविरहियणुरिसिखित्तसरजणियराहवेहं व । तुडिजोगा मणुयत्तं लद्धूणं कुसलबुद्धिमया ॥ ५० ॥

सग्गापवग्गफलसाहगस्स धम्मस्स पायवस्सेव । मूलं सम्मत्तमहो जाणेयव्वं पयत्तेणं ॥ ५१ ॥

भिच्छत्तंपकपडलावलुत्तसन्नाणनयणपसराणं । सिरसूलमूलमेसा जणाण सम्मत्तवत्तावि ॥ ५२ ॥

जुत्ताजुत्तं केणवि करुणापरबुद्धिणोवइद्वपि । दुस्सुमिणंपिव सोउं नेव वंछति तुच्छमई ॥ ५३ ॥

दढमूढगुरुपरुवणवसेण कम्मं च तं पकुवंति । जेण निमज्जति अहो कूवक्खणणुज्जयनरो व्व ॥ ५४ ॥

जं मिच्छतोदयओ अगुरुं पि गुरुं अदेवमवि देवं । धत्तुरिओव्व गेणहइ लेहुं व सुवण्णबुद्धीए ॥ ५५ ॥
 तेणं चिय पाणिगणो गणणाइकंतवेलमणुभवइ । तं किंपि दुक्खनिवहं जं जाणइ केवली सम्मं ॥ ५६ ॥
 इय भो देवाणुप्पिय ! मिच्छत्तं सयलदोसकुलभयणं । नीसेसदुग्गदुग्गइसंसगकरं लेहुं चयसु ॥ ५७ ॥
 सम्मत्तं पुण नीसेसदोसविरहियमसेससुहफलं । जीवाण तिब्बजरमरणदुक्खवुच्छेयणसमत्थं ॥ ५८ ॥
 जं मोहणिज्जपवलत्तविगमओ गुरुवसा सयं वावि । उल्लसई कल्लायवल्लीजलकुल्लतुल्लं व ॥ ५९ ॥
 तत्तो अट्टारसदोसवज्जिए जिणवरंमि पडिवत्ती । देवोत्ति समुप्पज्जइ निरवज्जा वज्जघडियव्व ॥ ६० ॥
 सयमवि धम्मपरेसुं सिद्धंतवियारेणेक्कसलेसुं । धम्मोवएसनिएसु होज्ज साहूसु गुरुबुद्धी ॥ ६१ ॥
 ता जिणवयणायणणविण्णायसमत्थतत्तरयणस्स । विरमइ य मई लोइयधम्माउ कुवस्सयाउव्व ॥ ६२ ॥
 अवगणइ गोपयं पिव दुग्गइदुहमयरभीसणावत्तं । कम्मजलुणीलाउलमरइरउहं भवसमुहं ॥ ६३ ॥
 तहा—सम्मत्तुत्तमसन्नाहिविहियरक्खो खणेण विक्खिवइ । सुहडोव्व तित्थियभडुब्भंडपि मिच्छत्तसंगमं ॥ ६४ ॥
 पासायस्स व पीढं पुरस्स दारं व मूलमिव तरुणो । बारसविहधम्मस्सवि आइ किंत्तिंति सम्मत्तं ॥ ६५ ॥
 इय भो एवं लक्खिय निरेक्खो लोइएसु मग्गेसु । सहहणनाणसारं सरहसमणुसरसु सम्मत्तं ॥ ६६ ॥
 ताहे भत्तिभरोणयभालयलमिलंतमउलकरकमलो । सोचा सो गुरुवयणं भत्तीए भणिउमाढत्तो ॥ ६७ ॥

तहा—सम्मत्तुत्तमसन्नाहिविहियरक्खो खणेण विक्खिवइ । सुहडोव्व तित्थियभडुब्भंडपि मिच्छत्तसंगमं ॥ ६४ ॥

भयवं ! किमेवमुवइसह पावनिरयाण बुद्धिरहियाणं । पच्चक्खपसूणं पिव अम्हाणं दढमजोग्गाणं ॥ ६८ ॥
गुरुणा भणियं मा वयसु एरिसं जेण जोग्गया तुज्झ । जाणिज्झइ संपन्ना संपइ पच्चक्खलिंगोहिं ॥ ६९ ॥
कहमण्णहेमंविहमहाडवीनिवडिया तए अम्हे । दिट्ठा पइपब्भट्ठा गाढस्समसुट्ठिय(सिट्ठिल)सव्वंगा ? ॥ ७० ॥
कह तत्थवि दंसणमेत्तओऽवि चिरदिट्ठवल्हजणे व्व । पुल्लयपडलणुमेओ उप्पण्णो तुह पमोयभरो ? ॥ ७१ ॥
कह वा भोयणसमओवणीयनियभोयणेण दाणमई । जाया अम्हाणुवरिं खुहापिवासाभिभूयाणं ? ॥ ७२ ॥
एवंविहपरिणामो उप्पज्झइ नेव पुण्णरहियाणं । एवंविहा य अतिही न य चक्खुपहं पवजंति ॥ ७३ ॥
रथणनिहाणं किं रोमंदिरे किं मरुमि कप्पतरू । कत्थवि थंलमि जलकमलसंभवो हवइ कइयावि ? ॥ ७४ ॥
ता एवंविहविघडंतवत्थुसंघडणलिंगसद्धया । कहमिव तुज्झ न सद्धम्मजोगया भद्दमुह ! होज्जा ? ॥ ७५ ॥
जेणेरिस सामग्गी निरवगहपुण्णपगरिसवसेण । सिवलच्छिपेच्छियाणं निच्छयओ घडइ मणुयाणं ॥ ७६ ॥
किंच—आरियखेतुप्पत्ती कुलमकलंकं नरत्तसंपत्ती । निरुवहयरूवलाहो रोगोरगदूरविगमो य ॥ ७७ ॥
आउयमवि पडिपुण्णं कलाकलावंमि कोसलं विमलं । साहूहिं समं जोगो एत्तिथमेत्तं तए पत्तं ॥ ७८ ॥
एत्तो एगयरं पिहु पण्णं व सकम्मपवणपडिहणिया । संसारंमि भमंता अणंतसत्ता ण संपत्ता ॥ ७९ ॥
तुमए पुण सव्वमिमं उवलद्धं पुण्णपगरिसवसेणं । ता एत्तो निरुवममोक्खसोक्खफलदाणदुल्लियं ॥ ८० ॥

सिहिणो सिंहं व सारं फणिवइफणरयणचक्कवालं व । एकं अपत्तुपुं गिणहसु जिणेदसियं धम्मं ॥ ८१ ॥ युग्मम्
 इय भणिए सो चित्तोउमारद्धो तिव्वजायसंवेगो । कह नियकज्जपसाहणपरम्मुहाणं गुणनिहीणं ॥ ८२ ॥
 केवलकरुणारससाधराण समगणियरायरोराणं । जाओ मइ पडिबंधो गुरुण खणदंसणे वावि ? ॥ ८३ ॥ युग्मम्
 निप्पुण्णेषु जणेषु चक्खुं पियि खिवंति नेरिसा समणा । ता सव्वहेसि वयणं जुत्तं मह संपयं काउं ॥ ८४ ॥
 विस्संभरतलविलुलंतमउलिमह पणमिऊण गुरुचलणे । आणंदसंदिरसूनयणो सो भणिउमाढत्तो ॥ ८५ ॥
 निक्कारणेक्कवच्छल ! भयवं नीसेससत्तताणपरा । आरोहेसु ममिणिं ह सम्मत्तं भवविरत्तस्स ॥ ८६ ॥
 ताहे गुरुणा जिणभणियनीईओ नायजोगयगुणेण । चित्तुच्छाहप्पमुहपहाणसउणोवलंभमि ॥ ८७ ॥
 अरिहं देवो गुरुणो य साहुणो जिणमयं मयं तुज्झ । इय एवं आरोवियमाजम्मं तस्स सम्मत्तं ॥ ८८ ॥
 भणिओ य वच्छ ! निव्वाणलच्छिवीयं मए इमं दिण्णं । संकाइदोसविरहेण सव्वहा ता जएज्ज इहं ॥ ८९ ॥
 धन्नाउसि तुमं भइय ! दुहसयरुदंमि भवससुदंमि । जेण तए जिणधम्मो तरणतरंडोवमो पत्तो ॥ ९० ॥
 एयस्स पभावणं पालिजंतस्स सव्वकालं पियि । जीवेहिं अणंतेहिं दुक्खाण जलंजली दिण्णो ॥ ९१ ॥
 पयइए खणविणस्सरसंसारुभवसुहस्स कजेणं । एयंमि मा पमायं काहिसि तं भइ ! कइयावि ॥ ९२ ॥
 अह सो नमिउं चरणे गुरुण भवभीयपाणिगणसरणे । हरिसभरवंधुरगिरं उदाहरित्था वयणमेयं ॥ ९३ ॥

धेवोवयारिणोऽविहु लोधा पूयं करीति सविसेसं । एवंविहोवयारीण तुम्ह किं संपयं करिमो ? ॥ ९४ ॥
तहवि नियत्तह भयवं ! गिण्हह धणरणभवणसंसारं । अहवा किमेत्तिणं ? जीयंप्पिहु तुम्ह आयत्तं ॥ ९५ ॥
गुरुणोववूहिओ सो ससरिरेऽवि हु ममत्तरहिण्ण । सम्मं कयं महायस ! तयत्ति एवं जओ भणियं ॥ ९६ ॥
सम्मत्तदायगाणं दुप्पडियारं भवेसु बहुएसुं । सव्वगुणमेलियाहिंवि उवयारसहस्सकोडीहिं ॥ ९७ ॥
परमत्थेण महायस ! दिण्णं तुमए समत्थमम्हाणं । एयंमि धम्मकम्ममि निच्चमब्भुज्जमत्तेण ॥ ९८ ॥
इय गुरुणा सिक्खविउं जिणिंदधम्मस्स सव्वपरमत्थं । भणिओ सो अणुजाणसु एत्तो अम्हे गमणकज्जे ॥ ९९ ॥
दूसहगुरुदंसणविरहवेयणावाउलीकयसरीरो । दूरपहं अणुगच्छिय दंसिय मगं नियत्तो सो ॥ १०० ॥
भावेत्तो गुरुवयणं चित्तो भवभयं महाघोरं । सम्मत्तभावियमई निययावासमि संपत्तो ॥ १०१ ॥

तथो काऊणमणंतरकरणीयं भरिऊणं सगडाणि विसिट्टकट्टाणं नीसेसभिच्चजणसमेओ नियत्तो नियगामाभिमुहं,
पत्तो य कालक्कमेण, पेसियाणि दारूणि नारिंदस्स । तओ पइदिणं अब्भस्संतो जिणधम्मं पज्जुवासंतो सुणिजणं
परिचित्तितो जीवाजीवाइणो नव पयत्थे रक्खंतो पाणिणं बहु माणंतो साहम्मियजणं सव्वायेरेण पभावैत्तो जिण-
सासणं कालं गमेइ । अणण्या य मरणपज्जवसाणयाए जीवलोयस्स खणभंगुरत्तणओ सव्वभावाणं तहाविहुमुक्कम-
णकारणं पाविऊण सोसम्मं परिपालियाविरयसम्मदंसणभावो कयपज्जंताराहणाविहाणो सुसरंतो पंचनमोक्कारं

पंचत्तमुवगओत्ति ।

उववण्णो सोहम्मे पलियाउसुरो तओ सुदिट्ठीओ । अंतोसुहुत्तमेत्तेण पत्तपज्जत्तभायो य ॥ १०२ ॥
जय जय नंदा ! भदत्ति वाहरंतेण किंकरजणेणं । हरिसभरनिम्भरेणं कारियतक्कालकायवो ॥ १०३ ॥
उत्तुंगथोरथणवट्टलट्टरेहतमोत्तियसरीहिं । छणमयलंछणसच्छहवयणाहिं कुवल्यच्छीहिं ॥ १०४ ॥
निम्मलक्कवोलतललिहियचित्तविच्छित्तिपत्तवल्लीहिं । करकिसलयपरिघोलिरचामीयरचारुवलयार्हिं ॥ १०५ ॥
सुरसुंदरीहिं सद्धिं कीलंतो तेसु तेसु ठाणेषुं । रइसागरावगाढो कालं वोलेइ लीलाए ॥ १०६ ॥ तीहिंविसे
कळाणगेसु पंचसु चवणप्पमुहेसु जिणवरिंदाणं । नंदीसरदीवाइसु परिचत्तासेसवावारो ॥ १०७ ॥
भवजलहितरंडमिमं तिटुक्खतत्ताणममयेयंति । मणवंछियत्थपूरणचिंतामणिपच्चलमिमंति ॥ १०८ ॥

अम्हारिसाणमविरइपराण इय विहियगाढबहुमाणो । हरिसभरनिम्भरंगो कुणइ य अट्ठाहियामहिमं ॥ १०९ ॥ तीहिंविसे
हिमवंतमहाहिमवंतपमुहुक्कुलपव्वएसु अणवरयं । दिव्वविमाणारूढो सिद्धाययाणि पेच्छइ य ॥ ११० ॥
सुणइ य पच्चक्खं चिय विहरंतउरिहतवयणकमलाओ । संसारुव्वेयकरं भत्तीए धम्मसव्वस्सं ॥ १११ ॥
दुक्करतवचरणकिसंग(सारए)संगवज्जिए मुणिणो । मणवयणकायगुत्ते भत्तीए पज्जुवासइ य ॥ ११२ ॥
इय पवरसिद्धिमंदिरसोआणपंपरासरिच्छंमि । सिरिधीरनाहजिणवरचरियंमि गुणोलिनिलयंमि ॥ ११३ ॥

अचंतुत्तमसम्मत्तलाभनामो समस्थिओ एसो । भव्वजणचिच्चसंतोसकारओ पढमपत्थावो ।
सम्मत्तलाभनिरुवणो पढमो पत्थावो ।

अह बिइओ पत्थावो

एवं लाभो बोहीएँ परमसिवसाहिबीयभूयाए । भणिओ एत्तो सम्मं मिरीइवत्तव्वयं सुणह ॥ १ ॥
एत्थेव समत्थसमुद्ददीववलओवगूढपज्जते । मेरुविराइयमज्जे जंबूदीविमि दीवस्मि ॥ २ ॥
आरोविद्यधणुगुणसच्छंहमि तह दाहिणद्धमरहमि । गंगासिंधूण महानईण बहुमज्झयारमि ॥ ३ ॥
अत्थि पसत्थविविहतरुसंडमंडियपरिसरा परंतपरुढपंडुच्छुताडनीवारविराइया नाणामणिरयणइयधर-
णिवीढा अमरावइव नासच्चाहिट्ठिया अहिणवपुरिव्व नवकुलालंक्रिया जणयतणयव्व कुसलवलालसा विलासिणिव्व
दीहरच्छोवसोहिद्या रामएवसेणव्व अदिट्ठिविहीसणदोसा पायालयुरिव्व अहीणजणाणुगया सुरिंदवयणोवरोहहरिसि-
यवेसमणजक्खविणिम्मिया बारसजोयणदीहा नवजोयणविच्छिण्णा समुत्तुंगकणयापारपरिक्खत्ता पवरभवणसा-
लासहस्साभिरामा धणकणयरयणपरिपूरिया विणीया नाम नयरी ॥

जत्थ वम्महो इव अखंडरुवलावणजोव्वणगुणविब्भमो रेहइ पउरजणो, अकित्तिमंडणाओ सुरसुंदरीओ-
वि परिहवति नियरुवेण तरुणीओ, जहिं च स्रोसु चैव सुव्वइ मगणसहो दोसियाणं दोसाभिलासो तरुवराणं गया-

परावत्तो रयणेसु वहरसदो ॥ तं च रक्खेइ खंचियचलियासणागयाखंडलकरकलियकणयकलसविहियरज्जाभिसेओ
तक्कालसंगहियउगगभोगरायन्नखत्तिचउव्विहपहाणपरियरो सुरवइविइण्णकणयकडयतुडियमणिमउडपमुहदिव्वालं-
कारालंक्खिसरीरो सिरिउसभनराहिवो ॥

कसिणासाढचउत्थीए चत्तसव्वत्थसिद्धिवासो जो । उत्तरसाढानक्खत्तजोगभिंदुमि संकंते ॥ ४ ॥

कुलगरनाभिस्स गिहे चोइसगयपमुहसुमिणकयसूओ । मरुदेवीए गब्भे पाउब्भूओ महाभूइ ॥ ५ ॥

पुव्वज्जियपुण्णसमूहचलियसिंहासणेण सक्केण । भत्तीए जस्स पणया जणणी गब्भावयारंमि ॥ ६ ॥

चेत्तवहुलुट्टमीए उत्तरसाढासु अद्धरात्तंमि । भुवणजणजणियतोसो जाओ जो पुण्णचंदोव्व ॥ ७ ॥

जस्स य जम्मणकम्मं तक्खणचलियासणा उ अकरिंसु । निवयहिगारणुरूवं छप्पणदिसाकुमारीओ ॥ ८ ॥

वत्तीससुरिंदेहिं नीसेसामरसमूहसहिएहिं । मेरुंमि जम्मज्जणमहूसवो निम्मिओ जस्स ॥ ९ ॥

जस्सोरुवसभल्लणंदंसणसंजायहरिसपुलएण । सिरिनाभिगरिंदेणं उसभोत्ति पइट्ठियं नामं ॥ १० ॥

सुरायपाणितलसंठिओब्बुलट्ठिं करे धरंतेण । जेण जहत्थभिहाणं निम्मियमिक्खलगुवंसस्स ॥ ११ ॥

लेहप्पमुहा वावत्तरी कला जेण देसिया पढमं । बहुभेयं कासवलोहचित्तवडवत्थसिण्यं च ॥ १२ ॥

कम्मं च खेत्तवाणिज्जपमुहमाई निंदसियं जेण । अविपक्ककणविभंक्खणदुक्खियजणजलणपयणं च ॥ १३ ॥

दुन्नयपसत्यजणसिक्खणत्थमुवदासिया जए जेणं । सिट्ठजणक्खणट्ठा सामाइ चउविहा नीई ॥ १४ ॥
 दारपरिग्गहसमए जस्स सुरिंणेण परमरिद्धीए । पुंखणगविहिसणाहो विवाहमहूसवो विहिओ ॥ १५ ॥
 वागरणछंदकहक्कवमग्गजोइसपमोक्खवहुविज्जा । लद्धा जेणुवइट्ठा पढमं चिय सुद्धबुद्धीए ॥ १६ ॥
 नियनियक्कम्मनिसेवण नियमेणं गुरुजणस्स नमणं च । जायकुलाण ववत्था जेण समत्था कया भुयणे ॥ १७ ॥
 किं बहुणा-जुत्ताजुत्तवत्थुविण्णणसुण्णहियएसु । नीई अज्जवि विफुरइ जस्स कित्तिव्व सव्वगया ॥ १८ ॥
 तस्स य गयतुरयपमुहरज्जंगपरिवुडस्स संसएसु य ववत्थासु य कुलायारेसु य परोप्परविसंवाएसु य सयल-
 जणपुच्छणिज्जस्स नंदाए देवीए सुमंगलाए य समं विसयसुहमणुहवंतस्स वंचंति वासरा, अण्णया य सुमंगलाए
 देवीए भरहो वंभी य मिहुणगं जायं, तहा सुनंदाएऽवि देवीए बाहुवली सुंदरी य जुवल्यं जायं, एवं वंचंतमि काले
 पुणोऽवि सुमंगला देवी अण्णणि एग्गणपन्नासं पुत्तजुयलगाणि पसूया, ते य भरहप्पमुहा कुमार वहुंति सरीरेण
 नीसेसकलाकलावकोसलेण य, एवं च निंदसिय सयलकला कुलव्वत्थाए सुहल्लेयवावारो उत्तमन्नरिसरो तेयासी-
 पुव्वलक्खाइं जाव परिपालिऊण गिहत्थपज्जायं अवल्लेइऊण परल्लेयमगाणुरूवधम्मवाचारविरहिंयं भवंपक्कनिमज्जमाणं
 (जणं) मणे अच्चंत्तरुणासाल्लिद्धबुद्धी तक्कालचलियासणागयसारस्सयपमुहल्लेगंतियतियससमहियमुच्छाहियचित्तिवित्ती
 विणिचित्तभोगपिवासो भरहपमुहुपुत्तसयसंविभत्तपरिचित्तवसुंधराभारो आसंवच्छरुणयवारिधारविसाभिणिंदियदी-

णमगगजणो चेतस्स बहुलुट्ठीए उत्तरासाढनक्खत्ते पच्छिमपहरावसेसे दिवसे कच्छमहाकच्छपमुहाणं नियनियपुण-
 (च)निहित्तरज्जवावडाणं चउहिं सहस्सेहिं मंडलेसराणं परिउडो देवदाणवुक्खित्तविचित्तोवसोहियसुंदसणाभि-
 हाणसिबिकाधिरूढो परमविमूर्ध्ए समगकाणणलच्छिलीलावणंमि उज्जाणे कयकट्टुक्खित्तवक्कम्मो परिचत्तसंघसं-
 गिरयणाभरणो सधमेव चाउमुट्ठियं लेयं काऊण कयसिद्धनमोक्कारो पडिवणणसव्वसावज्जजोगविरती वत्तीससुरेसरेहिं
 चउव्विहदेवनिकायसहिएहिं सन्भावसाराहिं महत्थाहिं पसत्थाहिं गिराहिं शुव्वमाणो पंचिंदियदित्तुरयदमणो
 समणो जाओत्ति ॥

सुरायनिसिद्धिसिद्धसंसावलंवि वहमाणो । कच्छमहाकच्छपमोक्खभिवुलोएण परियरिओ ॥ १९ ॥
 परिचत्तसव्वसावज्जजोगसणो तिगुत्तिगुत्तो य । अप्पडिवद्धो गामाणुगाममह विहरिओ भयवं ॥ २० ॥ जुम्मं ।
 धणकणयसमिद्धसमुद्धरा य मणुया मुणंति नो तइया । का भिक्खा के तग्गाहिणोत्ति भिक्खं भमंतंमि ॥ २१ ॥
 परमेसरंमि ताहे नियपहुपणएण कणगकरितुरए । इत्थी महत्थवत्थे पणया मणुया पणामेति ॥ २२ ॥ जुम्मं ।
 भिक्खं अपावमाणा कच्छमहाकच्छपभिइणो सुणिणो । पइदियहमणसणेणं संजायसरीरसंतावा ॥ २३ ॥
 तेलोक्कनायगे भोणमस्सिए ते उवायमलभंता । परिसडियपंडुपत्ताइभोइणो काणणंमि ठिया ॥ २४ ॥ जुम्मं
 भयवंपि निप्पकंपो सुरसेलो इव विसिट्ठसंघयणो । पइदिणमदीणचित्तो एयागी विहरइ महंमि ॥ २५ ॥

कच्छमहाकच्छमुया नमिचिनी रायलच्छिमिच्छता । चिंतामणिव्व सव्वाथरेण सेवति भयवंतं ॥ २६ ॥
तब्भत्तिरंजियमणेण नागराएण दिग्गवरविज्जा । विज्जाहरायत्तं पाविय विगया जहाभिमयं ॥ २७ ॥
भयवंपि गामनगरागरेसु भिक्षवं अपावमाणोऽवि । विहरंतो किमियतण्ण कुरुदेसे गथपुरंसि गओ ॥ २८ ॥
जिणंदसणसुसरियपुव्वजम्मसंजायतिव्वसद्धेण । सेजंसकुमारोणं सिरिबाहुवल्लिस्स पउत्तेणं ॥ २९ ॥
तक्कालागयपुरिसोवणीयपंडुच्छुगंडयरसेणं । संवच्छरपज्जेते भयवं पाराविओ तत्थ ॥ ३० ॥ जुम्मं ।
पडिया य कणयधारा तियसीहं समाहयाइं तूराइं । मिलिओ य पउरलोओ तेणवि कहिओ सवुत्ततो ॥ ३१ ॥
भयवंपि पारणयं काऊण वहलीयंडवडल्लुवण्णभूमिपग्गेसु देसेसु विहरमाणो तव्वासिमणुयाणं भोणमल्लिणोऽवि
समाहप्पेण भद्दगभावं जणंतो विविहतवचरणपरायणो असंक्किलिट्ठयाए तक्कालियलोयस्स अत्तहाविवहेयणीयकम्मओ
य निरुवसगं संजममणुपालितो समइक्कते एंगमि वाससहस्से विणीयनयरीपचासण्णमि पुरिसत्तालंमि नयरंमि
संपत्तो, तस्स उत्तरपुरत्थिमे दिसीभाए सगडमुहं नाम उज्जाणं, तंमि नगोहपायवस्स हेट्ठा संठियस्स अट्टमेणं भत्तेणं
पुव्वणहदेसकाले फग्गुणवहुल्लेक्कारसीए उत्तरासाढानक्खत्ते भगवओ तिहुयणेक्कवंधवस्स ज्ञाणंतरियाए वट्टमाणस्स
दिव्वं अणंतं लोयालोयगयभावाभात्रसहावत्थुसत्थपरमत्थनिब्भासणसभत्थं केवलनाणं सलुण्णणं ॥ अह जिणना-
हनाणुण्णायमाहप्पपरिकंपियसीहासणप्पलोयणपउत्तावहिमुणिप्रनाणवइयरा पहयपडहण्णमुहंगंभीरतूरया संखोभि-

यसुरलोथा सरभसपणचिरसुरसुंदरीमुयलयालोलंतरयणवलयरणज्झणारवनिम्भरभरियभुवणंतरा आंगंतूणं वत्तीसं
ससुरा सुरिंदा समवसरणं विरइंति । केरिसं चिय ?—

अइसुरभिसिसिरमारुयपडिहयत्तणुरेणुतक्कणुक्करं । दुसिणघणसारंगंधाभिरामसलिलोवसंतरयं ॥ ३२ ॥
आजाणुमेत्तविक्खत्तकुसुमेरंहंतरयणमहिवीढं । डज्झंतधूवधूमंधयारघणसंक्रियसिंहिं ॥ ३३ ॥
मणिचामीयरनिद्धत्तरुण्णपायारवलयतियकलियं । सब्वत्तोमुहमणिरयणरइयसिंहासणसणाहं ॥ ३४ ॥
डिंडीरपिंडपंडुरछत्तत्तरुद्धरविकराभोयं । पवणुवेल्लियकंकल्लिपल्लुल्लिहियनहविवरं ॥ ३५ ॥
गयणट्टियसुरकरपहयगहिरवज्जंतंदुडुहिसमूहं । दिसिसुहपसरियनिम्भलभामंडलखंडियतमोहं ॥ ३६ ॥
सरयनिसायरकरनियरागारधुव्वंतचामरुणीलं । इय एवंविहमुद्दामदोसहरणं समोसरणं ॥ ३७ ॥ छहिं कुल्यं ।
तंमि य भुवणेक्कपहू पवरे सीहासणे तियसपणओ । पुव्वासुहो निसीयइ तित्थस्स नमोत्ति भणिज्जणं ॥ ३८ ॥
हरिसभरनिम्भरुब्भणपुलयपडलोवसोहियसरीरा । सट्ठाणेषु निलीयंति तक्खणं चउविहा देवा ॥ ३९ ॥
पूरिज्जइ अंवरमित्तंततियसाण पंचवणेहिं । उद्धूयचिंधेहिं विमाणलक्खमालासहस्सेहिं ॥ ४० ॥

एत्थंतरे जिणपउत्तिपरिन्नाणनिमित्तं पुव्वनिउत्ता केवलनाणुणपत्तिनिवेयणत्थं तथा पहरणसालापउब्भूयप-
भूयजक्खसमहिट्ठियनिस्सामन्नफुरंतफारपहाभरनिकित्तियपयंडतमंकडुहुगमरचक्करयणवइयरसंसणत्थं च भरहरनरिंदस्स

पुरओ जुगवं चिय समागया बद्धवेगा पुरिसा । तओ भरहो इहलोयतुच्छमुहमेत्तसंपायणपचलत्तं निच्छिऊण चक्ररय-
णस्स उभयलोगमुहजणगत्तं पुण परमेसरस्स पवरकरेणुगाबंधाधिरोधियसुयविरहविहुरमरुदेवासमेओ नीसेसकुमारानि-
यरपरियरिओ समग्गबलवाहणो हरिसभरनिब्भंगो भग्गवओ केवलमहिमं काउं संपत्थिओ । अंतरेण मरुदेवीए
भग्गवओ छत्ताइछत्तपमुहं विभूइसमुदयं पेच्छंतीए तहाविहभवियव्यवसेण सुहज्झाणपरायणाए अंतगडकेवलत्तं
जायं । भरहवेत्ते पढमसिद्धोत्ति परिचित्तिऊण देवदाणवेहिं कया तीसे महिमा, खित्तं खीरोयसायरे से सरिं, भरहो
य परमपमोयमुव्वहतो तित्थयरं तिपयाहिणीकाऊण बहुप्पयारं थोऊण सदेवमणुयासुराए समाए आसीणो । सामि-
णावि सजलजलहरारावंगंभीराए आजोयणप्पमाणखेत्तपडिण्णफलणपचलाए पइजणमेक्ककालं संसयसयवुच्छेयजण-
णीए वाणीए पारद्धा धम्मदेसणा ॥ कहं ?

भो भो महाणुभावा ! दुलहं लहिऊण माणुसं जम्मं । उप्पत्तिपलयकलियं वियाणिउं भवसरूयं च ॥ ४१ ॥

कीसायासनिवंधणसयणसरीरेसु मोहवामूढा । धम्मोवज्जणरहिया निरत्थयं गमह नियजीयं ? ॥ ४२ ॥

सुमरह किं न निरंतरमणंतसो तिव्वसुदुव्वसंतत्ता । विवसाएसु ववसिया जं भे चउसुंपि विगईसुं ॥ ४३ ॥

तथाहि-नरए परमाहम्मियपहरणच्छिज्जंतअंगपचंगा । तिरियत्ते वहंवंधणदहणंकणवाहणाभिहया ॥ ४४ ॥

देवत्तेऽवि य ईसाविसायपेसत्तावसंतत्ता । मणुयत्ते पुण दोगच्चवाहिविहुरा चिरं दुत्था ॥ ४५ ॥

इय चउगइदुहनिवहं अणुसुमरिय मोक्खसोक्खकंखिछा । निरवज्जं पव्वज्जं पवज्जिउं उज्जमह धम्मो ॥ ४६ ॥
 एवमाइ भगवओ धम्मदेसणं का(सो)ऊण भरहो सावगो जाओ, बंभी य पव्वइया, भरहपुत्तो पुव्वभववद्ध-
 गणहरनामगोत्तो उसमसेणो नास, सो य जायसंवेगो पव्वइओ, सुंदरी पुण साविगा जाया, एस चउव्विहो समण-
 संघो पढमसमोसरणे भगवओ पाउब्भूओत्ति । ते य कच्छमहाकच्छवज्जा तावसा सुणिऊण जिणनाहेकवलनाणमहिमं
 भवणवइवाणमंतरवेमाणियजोइसियदेवगणपरिवुडं भगवंतं दट्ठुण पव्वइया । एत्थंतरे जायभववेरग्गा पडलगगतणं
 व रायसुहं उज्झिऊण भरहस्स पंच पुत्ताणं सत्त नत्तुयाणं सयाइं समकालमेव तंमि चेव समोसरणे पव्वज्जं पववणाइं ।

अह गामंचित्तगजिओ सोहम्मो पालिऊण देवत्तं । पलिओवमपज्जते भरहनरिंदस्स भज्जाए ॥ ४७ ॥

वम्माए गब्भंमि पाउब्भूओ सुसुमिणकयसूओ । पुव्वभवसाहुंदसणपावियधम्ममाणुभावेण ॥ ४८ ॥

अद्धट्ठमदियसाहिय नव मासे वसिय गब्भवासंमि । उववन्नो कयपुन्नो पवित्तनक्खत्तसुमुत्ते ॥ ४९ ॥

दसदिसिमुहेसु पसरत्तसुत्तमं निहयतिमिरसंभारं । जाओ सूरौव्व तओ मिरियजालं विमुवंतो? ॥ ५० ॥

परमब्भयभूयं जम्मवइयरं चक्खिणा निसुणिऊण । तस्स जहत्थं ताहे मिरिइत्ति पइट्ठियं नामं ॥ ५१ ॥

करकिसलयसोहिछो कंकिछितरुव्व जणमणाणंदो । देहोवचएण तओ कुमारभावं समणपत्तो ॥ ५२ ॥

अन्नया य सो मिरिई कुमारो भगवओ आइतित्थगरस्स असोगणुण्णुट्ठिपमुहं च पाडिहरविभूइं चउव्विहदेवनि-

काएण कीरमार्णिं दद्वण तीयाणागयपडुपणवत्थुसत्थवित्थरगयसदहसदोहदहणपसमणेक्कपीजसधाराजुगारिणिं
धम्मदेसणं निसामिज्जणं य करिक्कलहक्कन्नतालतरलमवल्लोइज्जण जीविणं उव्वेल्लिमहल्लविसवल्लीसरित्थं निच्छि-
ज्जण कुवल्लयच्छिसंजोगसमुब्भममुहं अयंउत्तडिदंउभंगुरं जाणिज्जण पणइज्जणपेक्कमणवंधं परुडगादसद्धमपरिणामो
महाविमूर्हए पियामहस्स पासो पव्वइओत्ति ।

तओ सम्ममहिगयसमणधम्मो पंचण्यारायाससायरणपरायणो पंचसमिइसमिओ तिगुत्तिगुत्तो पंचमहव्वयर-
वखणवद्धलक्खो ससरीरेऽवि निरवेक्खो रयणवणिओ इव परिचत्तलोहायरो सायरो इव मयरहिओ दिगयरो इव दो-
सुम्मूलणकरो नागराओव्व दूरुद्धूदसमावल्लो मंदरो इव निम्महिज्जणल्ली सुहलो इव निहयविसमकरणो गासा-
गरनगरेसु अप्पडिवद्धो थेराण पासो सामाइयाइं एक्कारसंगाइं समुत्ताइं सअत्थाइं थिरपरिचियाइं करेसाणो सासिणा
सद्धिं विहरइत्ति ।

इओ य-भरहराया समुण्णन्नचक्करयणो चाउरंगवल्लिओ पुव्वदिसाए गागहतित्थं दाहिणेण वरदासं पच्छि-
मेण पहासं उत्तरेण य चुल्लहिमवंतपरिसरं जाव साहिज्जण छक्खंडंभरहं सट्टीए वारासहस्सोहिं वत्तीसन्नरवइसहस्सपरि-
यरिओ अइगओ विणीयरायहाणिं, कओ से वारस वासाइं महारायाहिसेओ, विसज्जिया अ रण्णा नियत्तिगट्टणेसु
दूरदेसागया नरवइणो ।

अन्नया य भरहो अट्टाणउइए चुलभाउयाणं दूयं पेसेइ, भणावेइ य जहा-मम सेवं पडियज्जह अहवा रज्जाइं परिहरह जुञ्जसज्जा वा हवह उवायंतरं वा परिकप्पहत्ति, एवं च राइवयणं सम्ममवधारिऊण गओ दूओ, नित्ते-इओ तेसिं भरहनरिंदाएसो, तं च समायन्निऊण कोवावत्तनेत्तेहिं लीलाजड्डिताडियधरणिवट्टेहिं भणियं तेहिं-रे दूया-हम ! को भरहो ? को वा एसिसवत्तव्वे तस्साहिगारो ? जेण तस्स अम्हाणं च ताएणं दिण्णं रज्जं तम्हा ताओ चव जं आणवेही तं करिस्सामोत्ति, रोसेण कंठे घेत्तुण निद्धाडिओ दूओ अवद्दारेणं । एत्थंतरे गामाणुगामेण विहरमाणो भयवं आइतित्थयरो अट्टावयंमि नगवरे समोसरिओ, आगओ चउव्विहदेवनिकाओ, तेऽवि अट्टाणउइपि लुभारा तुरियं समोसरणमागया, सहरिसं च सामी वंदिऊण निसन्ना सदुणो, पत्थावे य भरहाएसं कहिऊण पुहुं तेहिं-ताय ! कहेसु किं जुञ्जामो उयाहु रज्जाइं चयामोत्ति, ताहे सामी तेसिं जोगयसुन्नलब्भ भोगनिवित्तिनिमित्तं असम्भावपट्टावणाए इंगालदाहगदिट्ठत्तं कहिउमाढत्तो-

जह एगो किर पुरिसो भायणमेगं तु भरिउ सलिलस्स । इंगालाण निमित्तं काले गिरहे वणंगि गओ ॥ ५३ ॥
तत्थेगत्थ बहूइं खायरपमुहाइं सारकट्टाइं । सो भेलिऊण जलणं पज्जलइ तस्समीवगओ ॥ ५४ ॥
इञ्जंतकट्ठसिंहिताविउत्ति संछिन्नदारुसमिओत्ति । गज्जंदिणदिणयरपीडिओत्ति तण्हाउरो सुत्तो ॥ ५५ ॥
तं पुव्वाणीयं जलमसेसमापियइ तत्थ सुयिणंमि । गिंसुम्भवदिणयरकिरणनिहुरमरुथरसहोव्व ॥ ५६ ॥

तद्विदुः असमिधतणहो गेहे गंतूण सयलकलसजलं । निद्विज्जण निलीयइ पोक्खरिणीवाविकूवेसु ॥ ५७ ॥
 धीए तस्सलिलंमिवि गंगाइमहानईसु ओगाढो । ताओऽविहु सोसई पलएव्व पयंडमत्तंदो ॥ ५८ ॥
 तत्तो जलहजलं पिय अंजलिसलिलं व पियइ नो तहवि । तस्स उवसमइ तण्हा अवि अहिययरं पवइइ ॥ ५९ ॥
 ताहे अपावमाणो कहिं पि सलिलं समत्थमुणेऽपि । अवलोइउं पवत्तो सो संतत्तो पयत्तेण ॥ ६० ॥
 अह एगत्य पएसे अइउंडो पूइयव्वो य (पूइथोव) सलिलोव्व(य) । तेणं दिट्ठो कूवो चिरेण परितुट्ठचित्तेण ॥ ६१ ॥
 पविसिउमसमत्थो दीहरज्जुणा वंधिज्जण तणपूलं । सो खिवइ तत्थ तण्हासमत्थदुक्खस्स पसमट्ठा ॥ ६२ ॥
 तो तक्कट्ठियपूलयपरंतगलंतविदुसंदोहं । उट्ठं विथारियसुहो आसायंतो गमइ कालं ॥ ६३ ॥
 जह तस्स वाविदीहियसायरसलिलोहिं अहयतणहस्स । नो किं पि होज्ज तेसिं तणगलगेहिं विदूहिं ॥ ६४ ॥
 एवं देवाणुपिया ! तुम्हाणं पुव्वकालियभवेसु । उवमुत्तपवरंपचप्पयारसहाइविसयाणं ॥ ६५ ॥
 पुणरवि सन्वाणुत्तरसत्थविमाणपत्तसोक्खाण । तेत्तीसं अयराइ निव्विग्घमणंतरभवमि ॥ ६६ ॥
 जइ भो महाणुभावा ! तित्ती भोगे पडुच नो जाया । ता किं इमिणा होही भुत्तेणं तुच्छरज्जेण ? ॥ ६७ ॥
 तो असुइसंभवेसुं तुच्छेसुं माणुसेसु भोएसु । अइथोव्वकालिएसुं पज्जते दुहवियांगेसुं ॥ ६८ ॥
 सुहमदुरेसुं आवइसहस्सहेज्जसु निंदणिज्जेसु । साहुजणवज्जिएसुं सुहुत्तमवि मा कुणह संगं ॥ ६९ ॥

तक्खणकयवेयालियपवरज्झयेण बोहिऊणेवं । ते जिणवरेण सम्मं मुणिदिकखं गाहिया सब्बे ॥ ७० ॥
तो सुचरियसामन्ना विणिहयनीसेसघाइकम्मसा । भुवणजणपणयचरणा जाया सब्बेवि केवलियो ॥ ७१ ॥
विहरंति जिणेण समं गामाणनगरमंडियं वसुहं । अह दूयं भरहवई पुण पेसइ बाहुबलियोऽवि ॥ ७२ ॥
तेणवि दूयं निब्भच्छिऊण भरहेण सह समारद्धो । दिट्ठीवायाइओ संगामो जाव पव्वइओ ॥ ७३ ॥
तत्थेवुस्सग्गठिओ कह लहुभाईण वंदणं काहं ? । बंभीमुंदरिपेसण ओयरणं कुणसु हत्थीओ ॥ ७४ ॥
वुत्ते चिंतानाणं जिणस्स पासंमि गमणमह तस्स । भरहोऽवि हयविपक्खं भुंजइ रज्जं सनगरीए ॥ ७५ ॥

इओ य-तस्स मिरियस्स दसविहचक्खवालसामायारीनिरयस्स सिद्धन्तपसिद्धसंजमकरणपरायणस्स संसारा-
सारयं परिभावितस्स अट्टारसविहं बंभचेरमणुपालेतस्स बोलीणाइं बहूइं वरिसाइं, एगया य गिम्हमासे विण्णु-
तेसु जलणजालाकरालेसु रविकरेसु धम्ममाणलोहागरनिज्जा(ज्झा)मयसरिसेसु वायतेसु खरसमीरणेसु विरहिणीजणहिय-
यव्व तत्तंमि महियलंमि अण्हाणवसविसग्गपमाणबहलमलाविलसरीरत्तणेण पव्वहंतसेयसल्लुधिपलाउलत्तणेण य
बाढं किलंतस्स दढचारित्तावरणीयकम्मदोसेण महलहिययस्स परिचत्तकुमित्तस्सवि गुल्लुलवासे ठियस्सावि लट्ठुमा-
इनिट्ठुतवकिसियसरीरगस्सवि सयावि सुत्तत्थे विपरिमाविरस्स एक्कारसंगाइं तण्हाभिहयस्स पयंडगिंसत्तत्त-
सव्वगत्तस्स पल्लत्थं संजमओ झडत्ति चित्तं मिरियस्स ।

अइगाढो मोहभडो जमेरिसाणवि मणो विकपेइ । अघडंतघडणपडुयाण किं व सज्झं न कम्ममाणं ? ॥ ७६ ॥
अन्नं च-तावच्चिय धम्ममई तावच्चिय निंदियत्थपरिहारो । जावज्जवि मोहमहापिसायपासमि नो पडइ ॥ ७७ ॥
एत्तो चिय मोक्खमहानिहाणमुक्खणिगमुज्झयं समणं । धाडिति विसहरा इव बावीस परीसहा सहसा ॥ ७८ ॥

अह मिरिइणा चित्तिर्यं-न सब्बहा समत्थोऽम्हि सम्मभियाणिं समणत्तणमणुट्ठिं, ता किं करेमि ? कमुवाय-
मणुसरामि ? किं देसंतरं वच्चामि ? कस्स वा साहेमि ? होउ वा विकप्पिएणं, पव्वजापरिच्चाएणं नियभवणगमणं
संपयं मे पत्तकालंति, अहवा-चउजलहेमहलामंडलाए महिमहिलाए अहिवइस्स पयंडमुयदंडदलियदुइंतवइरिव
गस्स सयलपणमंतमहिवालमउलिकिरणावलिकब्बुरियवलथ(चलण)स्स छन्नवइगामकोडिनाहस्स अप्पडिहयसा-
सणस्स भरहचक्कवइणो पुत्तो होऊण सयमेव परिच्चंतं मंदिरमणुसरंतो कहं न लज्जामि ?, कहं वा तत्थगयं निह-
यपइणं मं जाणिऊण न लज्जाए हेट्टमुहा ठाइस्संति जणणिजणया ? कहं वा तुसारहारगोखीरकुंदेदुधवलस्स
इक्खागुलुलस्स पढमकलंको न भविस्सामि ? के वा परिच्चत्तुत्तमंगीकयधम्मस्स न करिस्संति हीलं सहसंवड्डियावि
बंधुणो ? कस्स कस्स वा महापावकारिणो निंदंसणं न भविस्सामि ?, ता सब्बहा न जुत्तं गिहगमणं, किं तु सब्ब-
प्पयारेहिवि परिसुद्धं नियमणस्सेव नियमणं मे काउं जुज्जइ, तं पुण सेलसियलोट्टोदोलंगंडसेलंपिव जुगंतसमय-
समीरणुद्धयसिंधुसमुच्छलियमहल्लकल्लोलपडलं पिव पयंडमंतंडमंडलपगलंतपहाजालं पिव दढमुक्ककाणगयमहाडुया-

सणं पिव न मणांगपि सक्केमि संठविउं, अयं च जइधम्मो अचंतमप्पमत्तचित्तमहासत्तनिव्वहणिज्जो, अहं पुण दुइतग-
दमो इव ससुद्धुरखंधसिंधुरमहल्लयणोवसरणं कायरो इव दुग्गसंगासभीमसवडं मुहुब्भडभिडंतसुहडभिउडिफडाडोवं
दुस्सहपरीसहचमूपराजियमाणसो न सक्केमि अट्टारससीलंगसहस्साभिरामं सव्वहा जहुत्तं समणधम्ममणुचरिउं ।

अविय—

सुरसेल्लुल्लभारो एसो अहि(अहयं तु)भग्गपरिणामो । आजम्मं वोढव्वो कह तं एवंविहेण मए ? ॥ ७९ ॥
एसोऽवि भवविरक्ख(क्क)णपडयपभावो पियामहो जइवि । करकलियामल्यं पिव जाणइ मम विहडियं चित्तं ८०
तहविहु संसारुव्वेयविरत्तओ कहमहं महाघोरं । काउं सुणीण धम्मं तरामि एयाणुवित्तीए ? ॥ ८१ ॥
कीरइ अणुवित्तीविहु सद्धम्मगुरूण थोवदिणसज्जे । कज्जे आजम्मं पुण कायव्वो संजमो कह णु ? ॥ ८२ ॥
इओ य-(असुह)गिहत्यभावं संजममकलंकमवि न सक्केमि । काउं किल्लिद्विचित्तो कमुवायं संपवज्जामि ? ॥ ८३ ॥
एवं च तस्स किंकायव्वयाअ मूढस्स अचित्तीयमहिमयाए कम्मयाणं अपारसंसारसागरपरिब्भमाणुकूलसी-
ल्याए जीवस्स अवस्सं भवियव्वयाए तहाविहभावस्स इओ तओ उभयमग्गाणुसारिणमुवायं मग्गमाणस्स सह-
सच्चिय सयमेव एयारिसी बुद्धी पाउब्भूया, जहा—किर भागवंतो मुणिणो मणवयणकायदंडत्तरहिद्या असुभवाचारप-
रिच्चाएणं सया संलीणसरीरा अहं पुण न एवंविहगुणजुत्तो, जओ पराजिओ इंदिएहिं अहिभूओ य उस्सिखलेहिं

मणवयणकायदेहिं, तम्हा एरिसस्स मम हवउ सचरियपयडणपरं तिदंडं चिंधं, जइ पुण एयं अणवरयं पेच्छमाणस्स सदुचरियपच्छायावेण विसिट्ठपरिवालणुज्जमो होज्जा १, तथा मुणिणो सिरंकेसावणयणेण सव्विंदियनिगंहेण य मुंडिया भवंति, मम पुण इंदियनिगहरहियस्स किं निरत्थयं मत्थयलुंचणेण १, अओ खुरमुंडणं मुणिवेसविसरिसत्त-
परुवणपरं सिहाधरणं च संपज्जउत्ति २, तथा समणा भयवंतो तिविहं तिविहेण पक्कखायसुहुमवायरपमुहभे-
यपाणाइवाया संजममणुणालेंति, मज्झं पुण अतहाविहजोगयाजुत्तस्स थूलपाणाइवायवेरमणं जुत्तंति ३, परिचत्तस-
मग्गकिंचणा मुणिणो, अहं पुण न एयंविहो ता नियमग्गाविसरणनिमित्तं सुवणणपवित्तगाइमेत्तं मम किंचणमवि
हवउ ४, तथा जिणवरुदिट्ठसमग्गसीलजलपक्खालियकम्ममलसेयत्तणेण निचं सुंदरगन्धाभिरामा (मुणिवरा) अहं
पुण निम्मलत्तणेण दुगुंछियगंधो ता वाहिं पि तस्सावणयणनिमित्तं गंधचंदणाइपरिग्गहो मम समुचिओत्ति ५,
तथा ववगयमोहा निक्कारणविमुक्कोवाहणपरिभोगा य तवस्सिणो, अहं पुण महामोहाभिभूतो सरीरक्खापरो अओ
छत्तयधरणं उवाहणापरिभोगो य मम संपज्जउत्ति ६, तथा परिजुन्नसुद्धकुत्थियथेवसुक्खियत्थपरिग्गहा महणुभावा
मुणिणो, अहं पुण गाढकसायकलुसियबुद्धिपसरो तम्हा धाउरसरत्ताणि वत्थाणि मए परिहियव्वाणि ७, तथा
सावज्जजोगभीरुणो जइणो मणसावि न पत्थंति बहुजीवाउलं जलारंभं, अहं तु संसाराणुसारिबुद्धो तम्हा
परिमिण्णं सलिलेण पाणणहाणाइं वावारमणुचरिस्साभिन्ति ८ ॥

एवं सबुद्धिपरिक्रिप्येण जहविसरिसेण वेसेण । मुणिधम्ममग्गचत्तो पारिव्वज्जं पवत्तेइ ॥ ८४ ॥
 गामागरनगराइसु सिरिरिसहजिणेण सह परिब्भमइ । सुस्सवणपक्खवायं निच्चं हियएण वहमाणो ॥ ८५ ॥
 अहं तं करयलगहियच्छत्तयं दीहलंबिरिसिहंडं । पासविमुक्कतिदंडं पवित्तमाईहिं परियरियं ॥ ८६ ॥
 गेरुयरसरत्तसुयविराइयं संझसूरविवं व । चंदणचच्चियेदेहं उवाहणारोवियकमं च ॥ ८७ ॥
 असरिसरूवं नीसेससमणसंधस्स मज्झयारंमि । दहुं कोऊहलिओ बहुजणो पुच्छए धम्मं ॥ ८८ ॥
 मिरिईवि सम्ममहिगयसुत्तत्थो तत्तदेसणसमत्थो । साहेइ वित्थरेणं मुणिधम्मविहिं जणस्स पुणो ॥ ८९ ॥
 जह एत्थं आजम्मं वायरसुहुमेसु सब्बजीवेसु । संघट्टणविद्ववणाइ वज्जणिज्जं पयत्तेणं ॥ ९० ॥
 कोहेण व लोभेण व हासेण भएण वावि माऽ(ना)सच्चं । जीवोवघायजणं भासेयच्चं विणासेऽवि ॥ ९१ ॥
 गामे वा नयरे वा थोवं वा भूरि वा न घेत्तच्चं । सच्चित्तमचित्तं वा सब्बमदत्तंपि तिविहेण ॥ ९२ ॥
 देवनरतिरियरमणीसु पवरलायणसुंदरंगीसु । पच्चक्खभुयंगीसु व खणंपि नो अभिरमेयच्चं ॥ ९३ ॥
 धम्मोवयारि मोत्तुं वत्थपडिग्गहपमोक्खसुवगरणं । सेसमहिगरणरूवं परिहरियच्चं पयत्तेण ॥ ९४ ॥
 संथारगमेक्कं वज्जिऊग नेवोवहाणतूलीओ । फासस्साणुगुणाओ कइयावि य पत्थणिज्जाओ ॥ ९५ ॥
 असरविरसन्नपाणेहिं पीडिएणावि महरदित्तरसे । नो भोयणंमि चित्तं निवेसियच्चं मणांगंपि ॥ ९६ ॥

रम्भसु बडलमालइकुवलयगंधेषु तदियरेसुपि । घाणिंदियगोयरमइगएसु तुलेण होयवं ॥ ९७ ॥
 रूवेसु सुंदरेसुं नयणमणाणंदणेसु दिट्ठेसु । तच्चइरित्तेसुं वा तोसपओसा न कायवा ॥ ९८ ॥
 सदेसु वेणुवीणाकिन्नरकंदुभवेसु विविहेसु । खरमज्जारभवेसुपि सुणिएसु समेण होयवं ॥ ९९ ॥
 तज्जणतालणहीलणकरणपसत्तेऽवि बालिसज्जाणिं । चिररूढगाढपणएव रूसियवं न थेवंपि ॥ १०० ॥
 जयपयडेहिवि नीसेसलोयविम्हयकरेहिवि गुणेहिं । जुत्तेण मणांगपिवि माणो न मणंमि ठवियवो ॥ १०१ ॥
 विस्सासविणासणकारिणित्ति सुहगइदुधारपरिहोत्ति । दुहनंदियत्ति माया परिहरियवा कुमज्जव ॥ १०२ ॥
 थेवंपि कज्जछिइं पाविय पावस्स छलणसीलस्स । लोहस्स पिसायस्स व अवगासो नेव दायवो ॥ १०३ ॥
 सच्छायं तिव्वफलं मइसउणं पवरसीलतरुसंडं । भंजंतो दुट्ठमणो बंधेयवो वणकरिव ॥ १०४ ॥
 निस्संबंधं सावज्जजोगये जंतुदुक्खजणगे तु । सच्चेऽवि भासियवे जीहावि पडिक्खलेयवा ॥ १०५ ॥
 तत्तायगोलओ इव पमत्तचित्तंगविविहवावारो । किं नेव विह्वेज्जा ? ता देहो संठेयवो ॥ १०६ ॥
 सत्तरसभेयभिन्नो जइधम्मो नूणमप्यमत्तेणं । जं कायव्वो निच्चं तेणेसो दुक्करो होइ ॥ १०७ ॥
 गिम्हुणहपीडिएणवि न छत्तयं न उवाहणाओऽवि । परिमुत्तवा हेओ सव्वोऽवि सरीसक्कारो ॥ १०८ ॥
 नो सिरलोयप्पमुहं कट्ठाणुट्ठाणमवि विमोत्तवं । रत्ताइवणवत्थपि पत्थणिज्जं कयाइ नवि ॥ १०९ ॥

इय जइधम्मो सधो कायव्वविही निवेइओ तुम्ह । अक्खंडं सिवसोक्खं जइ वंछह ता तयं कुणह ॥ ११० ॥
 एवमायन्निज्जण जणो पहिट्ठमाणो भणिउमाढत्तो—भयवं ! जइ एवंविहो चरणधम्मो ता कीस तुम्हे छत्तप्प-
 सुहसुवगरणं गिणहह ? सिरलोयाइयं च न सम्ममायरहत्ति, मिरिइणा भणियं—भो भो महाणुभावा ! मा एवमासं-
 कह, जहा एसो अण्णहा भासइ अण्णहा करेइत्ति, अहं हि संसाराणुसारिबुद्धी पराजिओ मोहमहामेछ्छणं पडिक्ख-
 लिओ उस्सिखलकसायखेहिं सुसियपसमघणो दुदंतिदियचोरोहिं सायरमवल्लोइओ दुग्गइदुक्खरक्खसीए, ता मम
 दोसगुणविभावणं उज्झिऊणं नीओवणीयं पिव महामणिं खचरसमणियं पिव परमविज्जं मायंगदेसियं पिव समी-
 हियपुरपथाणं रोगविहुरवेज्जोवइदुं व परमोसहं अंगीकरेह सव्वहा तुम्हे सुणिधम्मंति ।

एवमाइन्निज्जण संजायभववेरगा निउणबुद्धिपरिभावियपरमत्था तणं व परिचत्तपुत्तकलत्तमित्तवित्ता जिण-
 धम्मनिवेसियथिरचित्ता समणदिक्खागहणत्थं पाउब्भवन्ति अणेगउगभोगराइण्णपसुहा जणा, मिरिइंइवि ते
 सिस्सभावेणोवट्ठिए णाऊण भगवओ भुवणपईवस्स संसारतरुगहणदहणदावानलस्स अट्ठप्पयारपवरपाडिहेरपयडप्प-
 भावस्स उसभसामिणो समप्पेइ । एवं च पइदिणं सद्धम्मदेसणाए पडिबोहेमाणो नियदुचरिअं निरंतरं निंदमाणो
 सुस्समणपक्खवायं वहमाणो सुत्तत्थाइं मणे परिभावेमाणो सुहसीलयाए सबुद्धिपरिकप्पियपरिव्यायगवेसं धरेमाणो
 गामागराईसु सामिणा सद्धिं विहरमाणो कालं गमेइत्ति ।

अह अन्नया कयाई भयवं गामागरेसु विहरिऊण अट्टावयंमि समोसरिओ, भरहचक्कवट्ठीवि भाउणो पवइए निसामिऊण संजायतिव्वसोगो जइ पुण भोगे दिज्जमाणे अज्जवि गेण्हंतित्ति संचित्तऊण भगवंतं उअमसामिं सवि-
णयं वंदिऊण भाउगे भोगेहिं निमंतेइ, इहलोइयसुह निरेक्खाहिं भणिओ तेहिं—

भो महायस !—सयमेव परिचत्ते दुहनिवहुपत्तिकारुण्णूए । उरनिहयसल्लतुल्ले कहमिय भोगे अणुसराभो ? १११

अच्छंतु पेम्मनिब्भतरुणीसंबंधंधुरा भोगा । तेसिं न संकहंपिचि सोउं संपइ समीहामो ॥ ११२ ॥

एवं भोगेसु पडिसिद्धेसु भरहो परिचत्तसंगाण एएसिं आहारदाणेणावि ताव धम्ममायराभित्ति विकप्पिऊण पवरलक्खणभोगणभरिएहिं पंचहिं सगडसएहिं असणदाणत्थमुवट्ठिओ, पुणरवि निवारिओ तेहिं—अहो महायस !
न कप्पइ आहाकम्मं आहडं च असणपाणं परिभोचुं सुणीणं, तओ गिहनिमित्तसंसिद्धभोगेण निमंतेइ, सोऽवि रायपिंडो न कप्पइत्तिकऊण निसिद्धो साह्हिं, हा सव्वपगारेहिं परिचत्तो अहमियाणिं एएहिंति दढं चित्तसंताव-
मुवगओ भरहचक्कवट्ठी, तं च सोगविहुरं नाऊण वियाणमाणेणावि सक्केण तस्स परितोसनिमित्तं पुच्छओ भयवं सप्पमेयभोगहं, पुट्ठेण य भगवया भणियं—मुरिंद ! पंचविहो उगगहो, तंजहा—देविंदोगहो रायावगगहो गिहियइअ-
वगगहो सागारियावगगहो साहम्मियावगगहो, तत्थ देविंदोवदाहिणसेत्ताहिवइ तुमं, अहो सक्क ! तुहाणुजाणावणेण कप्पइ समणाण तहिं विहरित्तेए, राया पुण छसखंडभरहाहिवइ जहा संपयं भरहो, तस्साणुणाए

मुणीहिं तद्देसे वसियधं, गिहवईय मंडलेसरो, सोऽवि समंडलनायगत्तणेण अणुणवणजोगो, तदणुमए चेव टाइयधं, सागारिओ पुण सेज्जायरो, सेज्जा य सनिमित्तकयतहाविहगेहसालापमुहो भवणविसेसो, तद्दणेण तरइ संसारसायरंति सेज्जातरो गुणनिष्फन्नमो । कंहं पुण सेज्जाए तरइत्ति ? , भन्नइ—

तत्थ ठिया मुणिवसहा सज्जायज्झाणझोसियसरीरा । जं धम्मदेसणाईहिं भवलोयं उवयरंति ॥ ११३ ॥

जं वा अपुव्वसत्थं पढंति तह संजमे पयदंति । छट्ठमाइयतवो दुक्करमवि जं पवज्जंति ॥ ११४ ॥

अन्नत्तोऽविहु जं वत्थपत्तभत्ताइणा न सीयंति । परमत्थेणं सबत्थ तत्थ सेज्जा भवे हेऊ ॥ ११५ ॥

इय-सेज्जादाणेण महल्लुक्खकल्लोसंकुलमगाहं । संसारसायरं गोपयं व दाया लहुं तरइ ॥ ११६ ॥

इहरा सेज्जाऽभावे न जीवरक्खावि निव्वहइ सम्मं । किं पुण समगसद्धम्मपालणं होज्ज निव्विग्घं ? ॥ ११७ ॥

साहम्मियावगहो पुण सिद्धंतपसिद्धनाएण परोप्परं समणाण एगखेत्ते निवसिउकामाणमवगंतवो । एवं च पंचविहावगहपरूवणमायन्निऊण पंचगपणिवायपुरस्सरं सक्को भणिउमाढत्तो-भयवं ! जे इमे अज्जण्णभिइ दाहिं णखेत्ते समणा निगंथा विहरंति एएसि णं अहं ओगहमणुजाणामि, भगवया भणियं-जुत्तमेयं, एयं च आयन्निऊण भरहोऽवि जायपरितोसो भणइ-भयवं ! अहंपि भारहे वासे साहुणो विहरमाणे अणुमण्णेत्ति । तंपि तहाऽऽनीयगसणं

अणुघ्नयगुणव्ययसिक्खावयगुणसंगयाणं सावगाणं सक्कवयणाओ भरहेण दावियं, तहा एवंपि निज्जरा होउत्ति सण्णमा-
णेण सावगाणं पइदिणं भोयणदाणं कयं, भयवंपि अन्नत्थ विहरिओ ।

तेऽवि सावगा परिचत्तासेसघवावारा भरहणीयजिण्णुइगन्धे वेदे परावत्तयंता छट्ठे मासे परिण्णानिनिमित्तं का-
गिणीरयणेण उत्तरासंगनाएण आलिहियतिरेहा निरवज्जवित्तीए कालं गमैति । अन्नया य भयवं पडिबोहिऊण तेसु तेसु
ठाणेसु भव्वज्जणं पुणरवि अट्ठावयमागओ, देवेहिं कयं विसालसालत्तयविहारं छत्ताइच्छत्तरमणिज्जं आजानुमेत्तभूमि-
निहित्तरुत्तभमरं पंचप्पयारपुण्णुजोवयारं गयणं गणोयंरततिथसविमाणमालासहस्साभिरामं मंदमंदमुद्धयवेजयंती-
सयसोहिंयं पवरमणिमयमहप्पमाणासोगतरुविराइयं पंचवन्नरयणविणिस्मियसिंघासणं समवसरणं, तत्थ य निसन्नो
तइलोक्कपियामहो भयवं पढमज्जिणो, निविट्ठा कमेण गणहरपमुहा साहुवग्गा, आसीणा अणेगसुरकोडिपरिबुडा
वत्तीसंपि सुरिंदा, विण्णायजिणागमवुत्तंतो समागओ सब्बविभूइए भरहो, परमभत्तीए पणमिय भयवं आसीणो
उचियभूमिभाए ।

अह सो तहाविहं भवणच्छरियं नीसेसतिहुयणसिरिविरइयंपिव सब्बभुदयगेहंपि व समवसरणसोहं भगवओ
परमिस्सरियं च पासिऊण हरिसुफुल्लोयणो पुच्छिउमयं पवत्तो-त्ताय ! जारिसा तुम्हे भवणगुरुणो एवंविहपूयाप-
यरिसपत्ता किमेत्थ भरहे अण्णेऽवि एरिसा भविस्संति न वा ? भगवया भणियं-भविस्संति, भरहेण भणियं-केरिसा ? ,

ताहे तेवीस जिणे अजियाई वीरनाहपज्जते । समबुद्धिबलायारे तिहुयणजणपणययपउमे ॥ ११८ ॥
 तह तेसिं च अण्णोऽण्णमंतरं सयलकालकलणेणं । वण्णं पमाणमाउं गोत्तं तह जणणि जणगा य ॥ ११९ ॥
 जम्मणनयरे य तहा कुमारज्जाइ सब्वपरियागं । सिद्धिगईपज्जंतं भयवं भरहस्स सोहेइ ॥ १२० ॥
 पुणरवि पुच्छइ भरहो मम सारिच्छा कईह होहिंति ? । सगराई एकारस चक्करे कहइ सव्वन्नू ॥ १२१ ॥
 अण्णुट्ठोऽविहु भयवं पुणोऽवि वागरइ भरहनाहस्स । नव वासुदेवबलदेवजुवलए भाविणो भरहे ॥ १२२ ॥
 पुणरवि भणिओ भरहाहिवेण तहलोक्कमंदिरपईवो । अवलोइऊण परिसं खयरामरनियरपरियरियं ॥ १२३ ॥
 छट्ठमाइतवकिसियसाहुसुधम्मकारिगिहिकलियं । भयवं ! किमेत्थ कोऽवि हुपाविस्सइ तित्थयरलामं ? ॥ १२४ ॥
 तह चक्कवट्ठिलिंछं चोइसवरयणगुणमहघवियं । अहवावि वासुदेवत्तणंपि पावेज्ज भरहंमि ? ॥ १२५ ॥
 ताहे कलियकुलिंगं मिरिइ एंगंतसंठियं भयवं । दावइ जह एस जिणो चरिमो होही तुह सुओत्ति ॥ १२६ ॥
 एसोच्चिय गामागरनगरसमिद्धस्स भारहद्धस्स । सामी तिविहुनामो पढमो तह वासुदेवाणं ॥ १२७ ॥
 एसो महाविदेहे पियमित्तो नाम चक्कवट्ठीवि । मूयाए नयरीए भविस्सई परमरिद्धिजुओ ॥ १२८ ॥
 एवं च आयन्निऊण भरहनरिंदो पटिहुमणो पणमिऊण भयवंतस्स चरणसरोरुहं तक्खणमेव अणेगसुहसेणाव-
 इनिवहपरिखुओ पय्हो नियसुयस्स मिरियस्स वंदणणिमित्तं, तंदंतरे चारणलद्धिसंपन्ने ओहिंनाणधरे मणपज्जवनाणिणो

विगिहृतवकरणनिरए सूरामिमुहायावणापरायणे वीरासणाइदुक्काकायकिलेसकारए भंगियसुयपढणेक्कमाणसे यमहासु-
णिणो परमभत्तीए ठाणे ठाणे विणयपणमतमउलिमंडलं वंदंतो अणिमिसदिट्ठीए पेच्छमाणो य पत्तो जत्थ सो एक्कदे-
सविमुक्कवेणुतिंदडो पंडुरंडरियनिवारियरविकरपसरो नियमइपरिकणियपवित्तिगाइउवगरणविसरिसरुवदंसणको-
उहलाउलियागयलोयधम्मकहणवक्खित्तचित्तो मिरिई निवसइत्ति, तं च दूराओ चिय निस्सामणभत्तिभरनिस्सरं-
तुव्व रोमंचच्छेण अंतरे अस्सायंतं व सिणेहसवस्ससुगिरंतो पढमदंसणन्नाभियमत्थयनिवडंतकुसुमनिभेण अग्घं व
वियरंतो विमलकरयलंगुलिमुद्दारयणकिरणजालेण दिसामुहपसरिएण मंगलदीवनिवहं व वोहिंतो पयाहिणादाणेण
तिगरणभत्तिपगरिसं व साहेंतो भूमितलविलुलुत्तमंगं पणमिऊण पमोयभरनिभरगिरं भणिउमाढत्तो, कहं?—

वच्छ ! तुमं चिय नीसेसपवरलक्खणनिहाणभूओऽसि । सुकयत्थाणं मज्झे तुज्झ परं पढमिया रेहा ॥ १२९ ॥
तिहुयणभुवणस्सुवरिं इक्खागूणं न होइ कह वंसो ? । जत्थ विमला विरायइ विजयपडाइव तुह कित्ती ॥ १३०
तुह भाविरिद्धिमायन्निरुण रंजिज्जए न कस्स मणं ? । कह वा नो वंदिज्जइ तुह पयपउमंकिया पुहइ ! ॥ १३१
कीरंतु नाम दुक्कतवोविहाणाइं भव्वलोएणं । जं तेसि फलं तं पुण तुमएच्चिय पावियं सव्वं ॥ १३२ ॥
जओ-सिट्ठोऽसि तुमं ताएण भारहे कुंडगामनयरंमि । सिद्धत्थपत्थिवसुओ किर चरिमो एत्थ तित्थयरो १३३
पुणरवि दसारवग्गे आइमो तं तिविहुनामेण । पोयणपुरंमि नयरे तिवंडभरहस्स सामिति ॥ १३४ ॥

मूयाए नयरीए महाविदेहमि तह य चक्कयई । वत्तीससहस्समहानरिंदसंदोहनयचरणो ॥ १३५ ॥
 पारिव्वज्जं जम्मं च तुज्झ नो पणिवयामि किंपि अहं । जं होहिसि तित्थरो चरिमो तं तेण वंदामि ॥ १३६ ॥
 एवं थोऊण बहं गिराहिं अब्भहियभावग्ग्भाहिं । जयकुंजरमारूढो विणीयनगरिं गओ भरहो ॥ १३७ ॥
 मिरिईवि इमं सोउं हरिसुग्गयपुल्लयजालपीणंगो । गरुयकुलजम्मसहजायमूरि गंभीरिमं मोचुं ॥ १३८ ॥
 जिणवयणत्थविभावणसंपन्नविवेयमवि परिचइउं । देहुगयनिरवगह लज्जापसरं पि पडिखलितं ॥ १३९ ॥
 दुव्वारवेगपफुरियफारमुम्मायमेक्कमासज्ज । दणुब्भडमप्फोडिय तिवइं मल्लो व रंगमि ॥ १४० ॥

पच्चासन्नमहासुणिसमक्खमह लोयमज्झयारंमि । आणंदसंदिरच्छो फुडक्खरं भणिउमादत्तो ॥ १४१ ॥ चउहिं कलावयं ।
 जइ पट्टम वासुदेवो महाविदेहमि चक्कवट्ठीवि । चरमो तित्थरोऽविहु अहं भविस्सामि भरंहमि ॥ १४२ ॥
 ता तिहुयणेऽवि नूणं अण्णो नो पुण्णवं ममाहिंतो । कस्सऽण्णस्स व एरिस फलदायी होज्ज सुकयतरू ॥ १४३ ॥
 तथा—अज्जो तित्थयराणं पढमो जणगो य चक्किवंसस्स । अहयं च दसाराणं अहो कुलं उत्तिमं मज्झ ॥ १४४ ॥
 एयं नियकुलचंगिमउक्कित्तणपच्चएण संजणियं । नीयागोयं कम्मं मिरिइपरिस्वियाणेण दढं ॥ १४५ ॥

भयवं च जयपियामहो विहरिऊण तेसु तेसु गामागरपुरमंडबदोणसुहपमुहेसु ठाणेसु किंचूणं पुव्वसयसहस्स
 केवल्लिपरियाणं पाउणित्ता आउयकम्मस्स सावसेसयं नाऊण अट्ठावयपव्वयमारूढो, तथो महामासवहुलतेरसीए अभि-

ईनक्षत्तुबागए चंदे पुवणहसमयंमि सुसमदूसमाए एगूणनउइपक्खेसु सेसेसु कयचउहसमतवोक्कम्मो दसहिं मुणि-
सहस्सेहिं सद्धिं परिचत्तचउविहारो कयपाओवगमणो पज्जंकासणसंठिओ वेयणियाउयनामगोयक्कम्माणं अंतं
करित्ता सिधमयलमणुत्तरं पत्तोत्ति ।

अह वत्तीसंपि सुरिंदा दुस्सहदुक्खविदुरेण भरहनरिंदेण समेया वाहणव्वाहाउल्लोयणजुयला पणमिऊण भग-
वंतं नंदणवणाओ सरसगोसीसकसणागरुपमुहसोक्खकट्ठाइं आणाविति ।

तओ—पुव्वेण जिणस्स कए वद्दायारं चियं रयाविति । दक्खिणदिसाए तंसं इक्खागुकुलुब्भवनिमित्तं ॥ १४६ ॥

अवरेण उ चउरंसं वित्थरवंतं विसिद्धकट्ठेहिं । अवसेसाण मुणीणं सरीसकारकज्जेणं ॥ १४७ ॥

ताहे खीरोदय(जल)ण्हवणसुइसुराहिचंदणविलित्तं । आरोवेत्ति सरीरं वियाए सक्का जिणिंदस्स ॥ १४८ ॥

भवणवइपसुहदेवा ण्हवियविलित्ताइं सेससाहूणं । आरोवेत्ति दुहत्ता देहाइं नियनियचियासु ॥ १४९ ॥

तत्तो अग्गिकुमारा जहक्कमं तासु सक्कवयेणं । वयणेहिं निराणंदा मुयंति जालउलं जलणं ॥ १५० ॥

एवं सरीरसकारमायेणं सुरेसरा काउं । नियनियठणेसु गया विच्छायमुहा विगयसोहा ॥ १५१ ॥

भरहनरिंदो पुण महासोगाभिभूओ सगिहभागओ, तत्थ य ददवज्जपडणाइरित्तोसोगसंभारज्जरियसरीरो मनु-
प्रियगलसरणी संकंदणपोक्कमुक्कारा(वा)णुसारोयणारावविहियसोगपमोक्खो अट्ठावयसेलसिहरंमि सवयणमयं महंतं

श्रुमं रयावेह, बाहुबलिपसुहाण य नवणउईए भाउगाणं अण्णाणि नवनउइ श्रूमाणि निवत्तावेइ, तहा भगवओ नि-
 व्वाणलामप्पएसे तिगाउयउस्सेहं जेयणायामं सिंहनिसा(सेज्जा)इयं सव्वरयणविणिम्मियनियनियवणप्पमाणोवेवेय-
 चउवीसजिणपडिमाहिट्टियं सुविमत्तसालिभंजियाभिरामतोरणावद्धबंधुरासिलाणवंदणमालं दुवारदेसोभयपासपइट्टिय-
 लट्ठपुंडरीयपिहाणपुण्णकणयकलसं सरसपंचप्पयारपुण्णजोवयारकलियं कालागुरुकुंदुरुक्कप्परपसुहवत्थुसिद्धधूधूमं-
 धयारियदिसाहोयं अणेगतियसंगणाजणुत्तालकरतालपुरस्सरदिज्जमाणरासयं भत्तिभरनिब्भरगायंतकिंनरनियरं दूरदेसा
 गयविज्जाहरचारणमुणिजणविचित्तथुइथोत्तखवहुंतहलबोलं पइट्टियलोहमयजंतदुवारपालं जिणभवणं कारावेइ ।
 जं च—संसारोयहिनिवंडतत्तसंतताणजाणवत्तं व । रेहइ पवणुदुयधवलधयवडाडोवरमणिजं ॥ १५३ ॥

इक्खागुल्लुब्भभवूवकित्तिक्कूडं व संठियं पयडं । सोहइ महीए केलाससेलसमसीसियाएव्व ॥ १५३ ॥

पवणपणोल्लिरजलहरपडलाउलसिहरपरिसराभोगं । परिभमिरभरनियरं विरायए कुसुयमउलं व ॥ १५४ ॥

मन्ने पवणपणोल्लिरएयमहद्वयपलोयेणेण जणे । पवयसिरनिवडिरगयणसरियकित्तीफुडं जाया ॥ १५५ ॥

भरहनरिंदनिवेसियजिणमंदिरदंसणाणुसारेणं । सेसजणोऽवि पयट्ठो जिणविंबाईण कारवणे ॥ १५६ ॥

जुत्तं च एयं, जेण—

एयं खु दुग्गइदुवार(पिहाण)फलिहोवमं जिणा विति । नीसेसत्तसंतताणतागदाणेक्कहेउं च ॥ १५७ ॥

एकौ(त्तो)च्चिय तक्कालियमुणिगणहरकेवलीहिं न निसिद्धं । चेइहरामात्रे जं तित्थुच्छेओ भवे पच्छा ॥ १५८ ॥
 तथा—जिणसंतर्बिबंदसणविन्नायजहत्यवत्थुपरमत्थो । पडिवज्जइ जइ किरियं कोइ संसारभयभीओ ॥ १५९ ॥
 मुणिणोऽवि धंदणत्थं इओ तओ इति नियविहारेणं । तेऽवि य करंति सट्ठम्मदेमणं समयनीईए ॥ १६० ॥
 पडिबुज्झंति य भव्वा गिणहंति जिणिंदधम्ममकलंकं । एवं च तित्थवुद्धी होइ कया सब्बकालेपि ॥ १६१ ॥
 किं बहुणा!—जिणभवणाइनिवेसणसमुच्चियपुण्णपगरिसवसेणं । सग्गापयवगलच्छी निवसइ भव्वाण करकमले १६२
 इय सो भरहनरिंदो निवेसिज्जणं जिणिंदवरभवणं । उवमुंजइ नियज्जं विसयसमिद्धं बहुं कालं ॥ १६३ ॥
 अह अन्नया पविट्ठो आयंसघरंमि विमलफलहमए । नियरूवपेच्छणकए सब्बालंकारियसरीरो ॥ १६४ ॥
 विविहपयारं पेच्छंतयस्स अह अंगुलीयगं गलियं । करकिसलयाउ ताहे वीभच्छा अंगुली जाया ॥ १६५ ॥
 ववगयसोहं तं पासिज्जण सब्बंगसंगि याभरणं । मुक्कं साहावियरूवदंसणत्थं महीवइणा ॥ १६६ ॥
 अत्थमियसयलतारं व नहयलं लुणियसस्समिव छेतं । ववगयकमलं व सरं तरं व संलिन्नसाहगं ॥ १६७ ॥
 दट्ठं च कट्ठधडियं व निप्पहं विगयरूवलयन्नं । चम्मावणद्धनिविडिट्ठिंपजरागारमह देहं ॥ १६८ ॥
 तो चित्तिउं पवत्तो मुनिउणबुद्धीए जायसंवगे । वेरग्गावडियमई सरीरासारयं भरहो ॥ १६९ ॥
 एवंविहनिंदियदेहकारणा कह मए महापावं । कयमंचतरउदं अहो विमूढेण चिरकालं ? ॥ १७० ॥

कह वा विसयामिसमोहिण जणनाहदेसिओ धम्मो । निप्पुणण न मए सिवफलओ सम्मभयारिओ ? १७१
 किं चिंतामणिमह कप्पतरुवरं कामधेणुमह यावि । कोऽवि सयन्नो कहमवि लद्धूण परम्मुहो होज्जा ? १७२ ॥
 ते बाहुबलिपमोक्खा धण्णा मह भाउणो महाभागा । जेहिं असारसरीरेण साहिओ सुंदरो मोक्खो ॥ १७३ ॥
 एमाइसुहज्जवसाणजलण(जाले)जलाविउं झत्ति । निहट्ठो तणरासिब मोहपसरो भरहवइणा ॥ १७४ ॥
 उप्पाडियं च केवलनाणं निप्पचवायसुहहेउं । देविसमप्पियलिंगो गेहाओ निगओ ताहे ॥ १७५ ॥
 दसहि सहस्सेहिं नरेसराण तक्कालगहियदिक्खाणं । परियरिओ भयं भरहकेवली विहरिओ वसुहं ॥ १७६ ॥
 अह पुव्वसयसहस्सं केवलपज्जायपालणं काउं । एक्कसमयेण निव्वाणमुवगओ भरहसुणिवसहो ॥ १७७ ॥
 इओ य सो मिरिई परिव्वायगो सामिमि निव्वाणमुवगएऽवि साहहिं समं गामागरनगराइसु अप्पडिबद्धो

विहरइ, अपुव्वठाणेसु य धम्मदेसणं कुणइ, जो य कोवि पडिबुज्जइ पव्वज्जागहणं च समीहेइ तं साहूणं समण्येइत्ति ।
 एवं च तस्स विहरमाणस्स अन्नया कयाइ सरीरेलण्णया महती पाउब्भूया, तव्वसेण य सो न तरइ अप्पणो निमित्तम-
 सणपाणंपि आहरिउं, न खमइ सरीरचेट्ठपि अणुट्ठिउं, न पव्वइ वइमेत्तमवि भासिउंति, ते य सगासट्ठिया पेळंति
 साहुणो तं तहट्ठियं तहावि असंजउत्ति कलिऊण न पुच्छंति सरीरवत्तं, न समण्येति भत्तपाणं, न दंसेति वेज्जस्स, न
 उवयरंति ओसहाणं, किं बहुणा ? न संकहंपि करिंति तस्स, मिरिईवि जातसंकिलेसो चित्तेह-अहो निहया

अहो निरप्यणाचिता अहो सकज्जपसाहणपरायणा अहो लोचववहारपरम्मुहा अहो नियउदरभरणरसिया इमे सा-
हुणो जं उवयारिण्यपि चिरपरिचियपि एगगुरुदिचिस्त्रयपि पासपरिवत्तिणपि समाणधम्मपडिवद्धपि अणवरयगुणग-
हणपरायणपि ममं सिणिद्धचवखुक्खवेत्तेणवि णाणुगिण्हति, अहवा न सम्ममणुचितियमेयं मए, जओ एए,
महाणुभावा सरीरस्सवि पडियारमकुणंता कं मम अस्संजयस्स उवयारे वद्धुं?, केवलं जइ अंहपि इमाओ रोग-
महण्णवाओ पारं पावेमि ता निच्छियं पव्वजागहणुज्जुयं कमवि सयमेव पवावयामि, न एगागीहिं तीरिज्जंति
सोढुमावयाओ, अह कंहंपि भवियव्वयाए वसेण खओवसमओ वेयणीयस्सं चिरकालभवियवत्तणओ पारिवज्ज-
पासंडवसस्स तहाविहोसहसामग्गीउवहारओ ववगयरेगो सो समत्थसरीरो संपन्नो, विहरिओ य अण्णत्थ ।

अण्णया य धम्मदेसणं कुणमाणस्स तस्स कविलो नाम रायपुत्तो सगासमहोणो, तेणावि पंचमहव्वयरक्ख-
णपहाणो पसमाइगुणाहिद्धिओ पंचिंदियनिग्गहविसुद्धो निस्सेयसफलदायी परूविओ से सुस्समणधम्मो, कविलेण
य वुत्तं-भयवं ! अण्णहा तुम्हं वज्जनैवत्थमुवहह, इमं च अण्णहा पणवेह, किमेत्थ तत्तं?, मिरिइणा भणियं-
मह ! एसो सुसाहुधम्मो तुह निवेइओ, इमं पुण जहुत्तसाहुधम्मामसमत्थयाए पवलपावकम्मयाए दुग्गइगमणसी-
लयाए य सबुद्धिसिप्पपरिकप्पियं कुलिंगं मए अब्भुवगयं, तात ! एयं पारगच्छियं, अओ पडिवज्जसु निस्सं-

१ यद्यपि चतुर्णां धातिनामेव ध्योपपन्नमस्तथापि अत्र प्रागुदितस्य वेदनीयस्य ध्यः नवस्य चेदयनिरोध इति ध्योपपन्नमता ज्ञेया, न तु मिश्रीभावताऽत्र ।

सयं समणधम्मं, कविलेण बुत्तं-भयवं ! तुम्ह संति ए एत्थ तहावि अत्थि किंपि णिज्जराठाणं नवा ?, मिरिइणा भणियं-भइ ! समणधम्मो ताव अत्थि, इहावि मणांगति, एवं च तेण अजहट्टियवत्थुदेसणओ निचिट्ठो सागरोव-मकोडाकोडिमेत्तो संसारोत्ति । नणु किं एत्तिभेत्तविवरीयकहणेऽवि एवं संभवइ ?, किमिह चोळं?, जेण--

विवरीयजिणागमपयमेत्त(स्स)परूवणेऽवि मिच्छत्तं । अप्पत्थभोयेणेण व दुहजणं रोगमज्जिणइ ॥ १७८ ॥

एत्तोच्चिय मूलुत्तरगुणगणविरहेऽवि लिंगधारीवि । सुवइ सब्वन्नमयं जहट्टियं पन्नवेमाणो ॥ १७९ ॥

किं एत्तोऽवि हु ए(पा)वं जं सरणगए णु भवभएण जणे । उम्मग्गदेसणातिक्खखग्गघाएण विहवइ ॥ १८० ॥
गरुंयपि कयं पावं न तहा जीवस्स दुक्खमावहइ । जह जिणवरवयणपसूयसमयविवरीयपरिकहणं ॥ १८१ ॥
अलं वितथेरेण । पत्थुयं भण्णइ--

सो कविलो सन्निवायाभिभूओ इव परमोसहं महागहपरिणहिओ इव तहाविहं मंतकिरियं पुव्वबुग्गाहिओ इव सम्मपरिकहणं महापबलमिच्छत्तणओ न पडिवणो मणांगपि समणधम्मं, तओ मिरिइणा चिंतियं--न ताव परिणिणहइ एस जइधम्मं, ममावि छत्तगाइपरियरूवहणे गामंतरगमणे सरीरेलण्णे अचंतिगपओयणे एणेण सहाइणा कज्जमत्थि, तम्हा पद्दावेमि एयंति चिंतिऊण कविलो गाहिओ नियदिक्खं, सिक्खविओ किंपि बज्जं कट्ठाणुट्ठाणं, एवं च सो नियंसियकासायवत्थजुयलो पाणिपरिणहियतिदंडो पवित्तिगापमुहोवगरणपरियरिओ

गामाणुगामं पियरं च देवयं च सामियं च परमोद्यगारिणं च रयणनिहाणदेसगं च जीवियदायारं च गिरिइं पञ्जवासंतो परिभमइत्ति, एवं च काले बोलंतंमि गिरिइं चउरासीइं पुव्वसयसहस्ताइं सघाउयं पालइत्ता अणालो-
इयपडिक्कतनियदुच्चरिओ कालं काऊण बंमलोए कप्पे दससागरोवमाऊ देवो जाओत्ति ।

सोऽवि कविलो अपढियसत्थपरमतथो बज्जोवगरणधरणमेत्तरसिसो जहादिट्ठकट्ठाणुट्ठाणपत्तपरमकट्ठो एगगी परिथडइ । सुणिविलक्खणागारदंसणेण पुव्वकमेण समल्लियइ य से समीवे धम्मसवणत्थं बहू जणो, सोऽवि अ-
वियक्खणत्तणओ समणसत्थेसु तहाविहधम्मदेसणमवियाणमाणो 'युक्तायुक्तपरिज्ञानशून्यचित्तस्य देहिनः । अलब्ध-
मच्यताहेतुमौनं सर्वार्थसाधनम् ॥ १ ॥' इति परिचित्तो गाढपरिग्गहियमोणव्वओ दिणगमणियं करेइ । अन्नया
य आसुरिरायपुत्तपमुहं सिस्सगणं पव्वाविऊण जथादिट्ठं वज्झाणुट्ठाणं दंसिऊण य चिरकालं कयबालतथो मरिऊण
बंमलोए कप्पे देवो उयवज्जइ । ताहिं च—

असुयं अदिट्ठपुव्वं सुरलच्छि पेच्छिऊण तारिच्छं । अणुचित्तिउं पयत्तो अइविम्हियमाणसो कविलो ॥ १८२ ॥
किं मन्ने होज्ज मए दारुणरूवं तवं समायरिउं (यं) ? किं मयलंछणसच्छहमणुच्चरियमणुत्तमं सीलं ? ॥ १८३ ॥
किं वा दुक्करतवनियमनिरयचित्तेसु साहुपत्तेसु । होज्ज निहित्तं वित्तं नियमुयजुगल्लियं पुब्बिं ? ॥ १८४ ॥
किं वा साहसमवलंबिऊण खित्तं हवेज्ज नियदेहं । पज्जलियतिव्वजालासहस्सज्जडिलंमि जलणंमि ॥ १८५ ॥

एमाइविविहंससयसंकिचित्तो खणं विगमिऊणं । सम्मं वियाणणद्धा ओहिण्णणं पउजेइ ॥ १८६ ॥
 पारिष्वज्जपवन्नं अह देहं नियइ तं विगयजीयं । तेऽवि ससिस्से गंथत्थवाहिरे मुद्धबुद्धीए ॥ १८७ ॥
 ताहे नियदंसणपक्खवायओ चत्तदेवकायव्वो । ओयरिओ आयासे सिस्साणं तत्थ(त्त)कहणद्धा ॥ १८८ ॥
 वरपंचवणमंडलमज्झगओऽदिस्समाणरूवो य । आसुरिपमुहे सिस्से भासइ संबोहिऊणेवं ॥ १८९ ॥
 अवत्ताओ वत्तं पभवइ इचाइ तत्तसंदोहं । तो सट्ठितंतगंथं तं सोचा आसुरी कुणइ ॥ १९० ॥
 अब्वोच्छत्ती य तओ जाया सीसप्पसीसवग्गस्स । एवं सति वित्थरियं सच्चत्थ तिदंडिपासंडं ॥ १९१ ॥
 कविलोऽपि हरिसियमणो ठाणाओ तओ गओ सुरावासं । तत्थ य अणणसरिसे पंचविहे मुंजए भोए ॥ १९२ ॥
 अह सो भिरिई आउयखयंमि चइऊण वंभलोगाओ । दूरदिसागयेनेगमपणियाउलविवणिमग्गंमि ॥ १९३ ॥
 परिसरेसट्ठियसाहुवग्गपारद्धधम्मकम्मंमि । नीसेसगामतिलए कोह्लागे संनिवेसंमि ॥ १९४ ॥ जुम्मं ।
 छक्कम्मनिरियचित्तो वेयत्थवियारकुसलबुद्धी य । जाओ जयपयडजसो नामेणं कोसिओ विप्पो ॥ १९५ ॥
 सो विसयपत्तमणो दविणज्जणकयविचित्तवावारो । पाणवहपमुहुगुरुपावठाणनिरवेक्खचित्तो य ॥ १९६ ॥
 मिच्छत्तनिहयबुद्धी तिदंडिदक्खं निसेविउं अंते । असीई उ पुव्वलक्खे सव्वाउं पालिऊण मओ ॥ १९७ ॥

अह सकयकम्मज्जणिण्णं सुरतिरिपामोक्खविहिट्ठाणंमि । उववज्जिऊण बहुसो पमुव विवसो दुहाभिहओ १९८
भमिऊण चिरं कालं भवंमि धूणायसंनिवेसंमि । माहणिमाहणपुत्तो जाओ सो पुस्समित्तोत्ति ॥ १९९ ॥ जुम्मं ।
तत्थवि चिरकालं निवसिऊण निविन्नकामभोगो सो । परिवायगदिक्खं पडिवज्जेउण धम्मबुद्धीए ॥ २०० ॥
काऊण तवं विविहं पालिय नियसमयसिद्धधम्मविहिं । सव्वाउयं च धरिउं वावत्तरिण्वलक्खाइं ॥ २०१ ॥
मरिऊण पुस्समित्तो तत्तो सोहम्मदेवलोणंमि । दिव्वाभरणविभूसियदेहो देवो समुप्पन्नो ॥ २०२ ॥
कालक्रमेण तत्तो चइऊणं चेइयंमि य निवेसे । अग्गिज्जोओनामा(स)वंभणो(अह)समुप्पन्नो ॥ २०३ ॥
सो य चउसहिं पुव्वलक्खाइं परिपालिऊण आउयं गहिऊण परिवायगदिक्खं मरिऊण ईसाण देवलोगे
मज्झिमाऊ तियसो होऊण चिरं कालं भोगे भुंजिऊण आउक्खए नुओ संतो मंदिराभिहाणसंनिवेसे सोमिलस्स
वंभणस्स सिवभद्दाए भारियाए पुत्तत्तेण उववन्नोत्ति, कयं च से अग्गिभूइत्ति नामं, सो य पत्तो तारुन्नं, अन्नया
य तत्थ संनिवेसे परिब्भममाणो समागओ सूरसेणो णाम परिवायगो, सो कुसलो सद्वित्तसिद्धते वियक्खणोधम्मकहाव-
क्ख्खाने छेओ परचित्तपरिणाने, तं चागयं सोऊण समागओ बहुजणो, आरद्धो य तेण नियदरिणतत्परूवणापवंचो,
आणंदियहियओ गओ य सट्ठाणं जणो, जाया पसिद्धी, बीयदिवसे अग्गिभूइं अण्णो य लोओ आगओ तस्स सयासं,
कया उचियपडिवत्ती, उवविट्ठो संनिहियपदेसे, कहिओ य तेण महया पगारेण नियदरिणभाभिप्पाओ, हरिसिया

सवे, एतथंतरे एगेण मणुसेण पुच्छिओ सो परिवायगो, जहा भयवं ! मयलंछणे इव जणनयणाणंदे सुत्ताकलावेव सह-
रिसहरिणच्छिसिहिण(हण्डि)संवासोचिए नंदणवणे इव विविहविलासजोगे जलहिंमि व लावणपुण्णे रसायलेव भुं-
गंसंगसमुचिए भग्गवम्महसोहग्गे किमेरिसंमि तारुणे अणुट्ठियं तुमए पव्वजागहणंति ? , न खलु मुणालंतुरज्जु परि-
खमइ मत्तसिंधुरखंधणक्खिखेवं न यावि सहइ सहयारमंजरी जरढढंकरिक्खेवचरणभारं न य पभवइ धाराकराल-
करवालसिद्धेहलीलं कमलदलं, न सब्वहा तुह एरिसी सररीसिरी काउमरिहइ निट्टुरजणजोगं तवचरणंति, केवलं
दोयवमेत्थ पणइणीविरहेण वा धणभंगेण वा सयणविप्पियंदसेणेण वा अण्णेण वा केणइ कारणेण, वाढं कोऊहलं
मे, साहेह सब्वहा जइ न दूरमकहणिज्जंति । परिव्वायेगेण भणियं—भइ ! तुम्हारिसाणवि किं किंपि अकहणि-
ज्जमत्थि ? , सुणसु जइ अत्थि कोऊहलं, अहं किर पुवं कोसंबीए नथरीए असंखदविणभायणं अणेगाणं दीणाण
दुत्थिपाण विदेसियाण भयंताण य सत्ताणं ताणदाणपरायणो आसि, अण्णया य रयणीए मे पसुत्तस्स सहसा
समुच्छलिओ तुमुलो रवो, तओ संभंतोऽहं समुट्ठिओ सयणीआओ जाव पेच्छामि आइद्धिनिसियखग्गे दढावव-
द्धपरियरे चावचक्कुतपमुहाउहहत्ये हण हणत्ति भणंते धराणियलगंथपि सयं निहित्तमिव अत्थसंचयं गिण्हमाणे
तहट्ठियाउ चेव तुरंगमंदुराओ अण्णायत्ताओ करेमाणे संसुहट्ठियं परियणं विविहृप्पयारोहिं विदेवमाणे कंसं दोसं
घरवक्खारं च अवहरेमाणे जमसुहडे इव कलिकालमित्ते इव पावपियामहे इव भीसणे निक्किवे भिल्लपुरिसे, ते य

दद्रूण मरणभयविदुरेण सिग्धं अवक्कमिज्जुण मए वाहरिया आरक्खिया, त य जाव मत्ता इव मुच्छिया इव गयचे-
यणा इव बहु बोद्धावियावि हुंकारमेत्तमवि न दित्ति ताव नायं मए नूणमेण, ओसोवणिमंतण वा ओसहपजोगेण
वा एएहिं चोरेहिं निहयचेयणा कया भविस्संति, कहमणहा एवं निदा विह्वेजा?, होउ वा ताव सजीवियं
रक्खामित्तिपरिभाविज्जुण सणियं सणियं निट्ठुक्को एगत्य वणगहणे, भिछावि भयणसिलायंभाइयं मोत्तूण सेसं
वराडमेत्तंपि गहाय गया, कमेण पहाया रयणी, उट्ठिओ जणो, जाया पुरे वत्ता, आगओ लोओ अहं च, अवलोइयं
गेहं जाव तत्थ एगदिणभोयणमेत्तंपि नत्थि, सीणविभवत्तणओ कलंतराइपउत्तंपि दविणजायं न पावेमि, जओ
नत्थि कोऽपि निव्वाहो तओ चित्तियं मए-

नीसेसजणपहाणत्तणेण ठाज्जुण एत्थ नयरंमि । संपइ कण्णडिओ इव कह निवसंतो न लज्जामि ? ॥ २०४ ॥
दीणाण दुत्थियाण य दाउं भोयणविहिं कुणंतस्स । इण्हि तु निओदरभरणमेत्तनिरयस्स का सोहा ? ॥ २०५ ॥
कह वा तुरगारूढो भुन्विं भमिज्जुण पुरिसपरियरिओ । वच्चिस्सं एगागी इण्हि तु पयण्णयाणेण ? ॥ २०६ ॥
कह वा सहपंसुकालियबंधवलोयस्स वंछियत्थस्स । अविपूरितो जीयं निरत्थयं उव्वहिस्साभि ? ॥ २०७ ॥
दुव्वहगव्वुदुरवइरिविसरदुन्विस्सहदुव्वयणजायं । पब्भट्ठलट्ठविभवो पच्चक्खं कह सुणिस्साभि ? ॥ २०८ ॥
ता मोत्तूण इमं ठाणं देसंतरं वच्चाभित्ति चित्तिज्जुण चलिओऽहमुत्तरावहाभिमुहं, कालंतरेण पत्तो एगंमि सन्नि-

वेसे, भिक्खापरिभ्रमणेण कथा पाणवित्ती, बुत्थो तत्थेव किंचिकालं, अण्णदिवसे य दिट्ठो मए एणो तिंदडो,
वंदिऊण सद्वायेण उव्वविट्ठो से समीवे, बुच्छिअोऽहं जहा मए तहा तेणवि नियवइयरं, निवइअो य मए संखेवेण,
तिंदंडिणा भणियं-पुत्त ! परिचयसु सोयसंतावं, अणुसरसु धीरत्तणं, सबसाहारणो हि एस वइयरो, किं च-

किं वयणिज्जं जं निंदिए जणे नो थिरत्तणं कुणइ ? । पुरियुत्तमंपि लच्छी लइइ महिलच्च दुवीला ॥२०९॥

नो सुइकुलं न रूवं नो विण्णाणं न विक्रमं न वलं । बालच्च गयविवेया अवेक्खए किंपि पुयमाणा ॥२१०॥

अहवा जलनिहिकल्लोलसंगसंगचंचलत्ताए । कोत्थुहमणिसहजम्मणवहियदढनिद्रुत्ताए ॥ २११ ॥

मयलंछणसमसी(सा)सियमइलाणुस्सरणवद्धसीलाए । सुरगइतुरंगसंगइदूरुज्झियवरविवेयाए ॥ २१२ ॥

दुस्सहविसमेत्ती(व)सदाविथपजंतदुहविवेयाए । कंबुसिणेहसमुच्छूढगाढकुडिलत्तबुद्धीए ॥ २१३ ॥

तह पारियायपणयपभावजडजायपक्खवायाए । निचं लवणोयहिवाससुक्कमधुरत्तभावाए ॥ २१४ ॥

एयाए सचरियं कंहं हवेज्जा महाणुभावाए ? । न हि विसरिससंसग्गी चिसिट्ठुणसाहणं कुणइ ॥ २१५ ॥

ता चयसु सोगमहुणा पोरुससुवहसु कुणसु करणिज्जं । न हि विण्णायसरूवे गुणंपति कहिंपि सणुरिक्षा २१६

किं भइ ! तुमं एगो इमीए मुक्को ? जमेवमइगरुयं । संतावं वहसि न पत्तकालमहुणा समायरसि ॥ २१७ ॥

भणियं चमए भयवं ! किं पुण एत्तोऽवि पत्तकालं मे ? । तेण कहिंयं ! महायस ! निच्छअओ सवहा धम्मो ॥२१८॥

एयविउत्ताण जओ विहडंति समुद्धुरावि रिद्धीओ । एएण संपउत्ताण हुंति दूरं पलीणावि ॥ २१९ ॥
 एयं च मए आयन्निऊण संजायभवविरागेणं । एसा तिदंडिदिकखा पडिवन्ना दुकुलनिम्महणी ॥ २२० ॥
 ता भइ ! तए वेरग्गकारणं जं पुरा अहं पुद्धो । तं एयं तुह सिद्धं एत्तोच्चिय कुणसु धम्ममइ ॥ २२१ ॥
 एत्थंतरंमि एयं सोच्चा ओभिन्नवहलरोमंचो । पुणरुत्तनिवेशियपारिवज्जदिकखाभिमुहुद्धो ॥ २२२ ॥
 सो अग्गिभूहनामो मिरीइजीवो तिदंडिणं नमिउं । भालयलनिमियपाणी पयंपिउं एवमाढत्तो ॥ २२३ ॥
 भयवं ! जाए वेरग्गकारणे तारिसंमि तुम्हेहिं । जं दिकखापडिवत्ती विहिया तं सम्ममायरिं ॥ २२४ ॥
 एयस्स निसामणओ ममावि घरवासवासणा विगया । छिन्नो मायासोहो विवेयरयणपि विण्णुरिं ॥ २२५ ॥
 ता नियदिकखादाणेणऽणुग्गहं कुणसु संपयं मज्झ । इय वुत्ते तेणं सो पव्वजं गाहिओ सहसा ॥ २२६ ॥
 काऊण तवं तो सो धरिउं छयणण पुव्वलक्खाइं । सव्वाउयं तदंते सणंकुमारे सुरो जाओ ॥ २२७ ॥
 कालक्कमेण चविउं सेयविथाए पुरीए पवराए । वंभणकुले पसूओ भारद्वाओत्ति नामेण ॥ २२८ ॥
 तत्थवि सकम्मजणिणए सुहदुक्खे भुंजिऊण थेत्ते । पुव्वक्कमेण पुणरवि पारिवज्जं पव्वजेइ ॥ २२९ ॥
 काऊण य वालतवं कुदेसणापावधूलिपडलेणं । अवगुंडिऊण वाढं रम्मन्ताणं व बहुकालं ॥ २३० ॥
 सव्वाउयमणुपालिय चउयालीसं तु पुव्वलक्खाइं । पंचत्तगओ संतो तियसो होऊण माहिंदे ॥ २३१ ॥

निम्मलमणिरयणमउहजालउज्जोविण्णि विमाणंमि । नियपरियणपरियरिओ कीलइ सच्छंदलीलाए ॥ २३२ ॥
 आउक्खएण तत्तो चविउं सो मणुयतिरियजोणीसु । नरयकुदेवसुंप्पिय पुणरुत्तं परिभमेऊण ॥ २३३ ॥
 रायग्गिहंमि नयरे दियवरकविलस्स कंतिमइयाए । गिहिणीए गब्भस्मी पुत्तत्तेणं समुण्णओ ॥ २३४ ॥
 जाओ समुचिअसमए नामंपि य थावरोत्ति से विहियं । सत्तेण य गत्तेण य कुमारभावं च वोक्कतो ॥ २३५ ॥
 अणवरयमरणजरजम्मवाहिदुहनिवहपीडियं लोयं । दट्ठण काउकामोवि धम्ममइमोहमूढो सो ॥ २३६ ॥
 नो वच्चइ दुक्करतवविहाणनिरयाण जिणमुणिंदाणं । पासंमि कयावि हु नेव अन्नतित्थियजणस्सावि २३७ जुम्मं ।
 एवं अच्छतो सो पेच्छइ एगं तिंदडिणं समणं । चिविडियनासावंसं भग्गोट्टुउडं दलियदसणं ॥ २३८ ॥
 कुमुयं व चंदंसणवसेण कमलं व दिणयरुगमओ । सालत्तयतरुणचरणताडणाओ असोगुव्व ॥ २३९ ॥
 तं पासिऊण वियसंतनयणनलिणो परं पमोयभरं । अइदुल्लहवल्लहसंगमे व सो पाविओ झत्ति ॥ २४० ॥
 पइजम्भपरिन्वायगदिकखागहणुब्भवंतुनेहाओ । तत्तपरिपुच्छणट्ठा तस्स सगासं समल्लीणो ॥ २४१ ॥
 नमिउं चरणे सच्चायरेण सो पुच्छिओ य धम्मविहिं । जोगोत्ति कलिय तेणवि तिंदडिणा साहिओ तस्स २४२
 अन्नं च इमं सिट्ठं जहाऽहमिह दुक्खिओ ठिओ पुट्ठिं । विसयपिवासाणडिओ कुसलेण तहा न ठायघं ॥ २४३ ॥
 अह थावरेण भणियं भयवं ! कहं तं ठिओ इह दुहत्तो ? । विसयपिवासानडिओ कहेहि कोऊहलं मज्झ ॥ २४४ ॥

भणियं च तेण भइय ! सुणसु पुरा विसयसल्लपड्हित्थं । अन्नाणमीणमीमं विसोत्तियाळोककळोलं ॥ २४५ ॥
 निछज्जिमज्जयेलाविलासमवसत्तुत्तरावत्तं । पावविक्रपणपंकं निस्संखपंचंसंखउलं ॥ २४६ ॥

अभिमाणघोरघोसं पयंडकदप्पवाडवग्गिसिंहं । दोसघणपडलकिन्नं तारुणमहन्नवं पच्चो ॥ २४७ ॥ तीहिं व्रितेतयं ।

तद्वसेण य परिचत्तसिंहसंवासो दूरुज्झियसयणवंधवो परमताचसो इय विसद्वकंदोदुन्नयणापु पवरपओहरासु
 महाभोगसालिणीसु समुल्लसंतकळोलबाहुविलासासु हंसगाणुसरियपयकमलासु सालसकुलकल्लावागु गरसीच सुंदरासु
 विलासिणीसु कयाभिरई समानो एगया अणंगसेणाभिहाणाए वेसाए सभं दुत्थो वहुं कालं, तदणुरागवसेण य
 पवरभूसणदाणेण अणवरयमहामोहदोगुल्लसमण्णेण तंबोलफुल्लविल्वणोवणयेण य निद्विवियं पिथपियामहपमुहपुरि-
 सज्जियं दविणजायं, जाओऽहं निद्वणचंगो, सुणिओ दाइगाए, तओ निष्पीलियालत्तयं व पयत्तपीययाग्गीवसगं व
 मुत्तावसेस भोयणं व तेहिं तेहिं अवमाणकारणेहिं परिचत्तो स्मि तीए, तयणंतरं निग्गओऽहं वेसाघराओ, गओ
 नियगेहे, दिट्ठं च तमणेगच्छिइसयसंकुलं पब्भट्ठपुवसोहं मसाणं व भयजणगंति, तओ महाविसायाभिभूओ पयट्ठो
 देसियालिए, गच्छंतेण य पइदिणं एगत्य सुन्नसन्निवेसे दिट्ठं भूमिनिवडियं रक्खावलयं, गहिउं मए विहाड्डियाओ
 निविडजउज ड्डियाओ रक्खागंठिओ, दिट्ठं च एगस्स मज्झनिहितं लिहियपवरक्खरं भुज्जखंडं, वाइयं च कोऊहलेण,
 परिभाविओ य तल्लिहियगामनामदिसाभागल्लणसमओ रयणकोडिप्पमाणनिहाणवइयरो, हरिसियमणेण संगो-

विथं च तं सच्चपथारेण, पट्टिओ तयणुसारेणं, पत्तो अकालखेवेण मुज्जलिहियंमि गामे, निरुविओ निहाणपपप्सो,
 अवलोइयाइं लिंगाइं, जाव सच्चाणिवि लिहियाणुसारेण मिलति, तओ मे पाउब्भूओ परमप्पमोओ, पसत्थनिसाए य
 दिसाबलिपक्खेवपुरस्सरं खणिउमाढत्तो णिहाणपएसं जाव य हत्थप्पमाणमेत्तं तं न खणामि ताव समुट्ठिया उच्च-
 डफडाडोवभीसणा तडिसिहातरललंत्तजीहयुयला सुहमारुयसंवलियजलणफुल्लिगुगारदारुणा पुच्छच्छटाताडिय-
 धरणिवट्ठा दीवथसीहा फुरंतरत्तदित्तनेत्ता महाभुयंगा, तेहि य संदंसेहि व तडतडत्ति तोडियं मह सरीरं, निविट्ठो
 महाविसावेगेण निवडिओऽहं भूमीए, विइक्कता रयणी, ममाणुकंपाएच समुग्गओ भयवं दिणयरो, अवलोइओऽहं
 गामजणेण, विण्णायविसविगारेण य दयाए पडियारिओ, तहाविहोसहमंतकिरियाए जायं च पणुगं सरीरं, पुट्ठोऽहं
 गामजणेण रयणिवइयरं, कहिओ य मए तस्स जहट्ठियनिहाणवुत्ततो, तओ तत्थेव वीसमिऊण कइवय चासराइ
 पुणरवि पत्थिओ एगदिसाए, अण्णया य गच्छंतस्स मिलिओ एगो पुरिसो, समाणसीलयाए य जाया मज्झ तेण
 समं मेत्ती, पत्थावेण य तेण एगंते सब्भावेण निवेइओ मम विवरप्पयेसजक्खिणीसाहणकप्पो, अब्भत्थिओ य
 सच्चायेरेण जहा-जइ तुमं सहाइभवसि ता विवरं पविसामो, भोगगाढोलुयाए पडिवण्णमेयं मए, तओ अखं-
 डपयाणएहिं गया वलयासुहं नाम विवरं, विरइया से दुवारपूया, तत्थियाओ जोइणीओ, सुमुहुत्तनक्खत्तंसि गहाय
 बाढं पत्थयणं परिकलियहत्थपईवा पविट्ठा तत्थ, उचनीयटाणाणि चोलिंता सणियं सणियं गया दूरंत्तं, दिट्ठा य

झडति एगत्य विज्जुपुंजभासुरा पवरकणगसिंहासणनिविट्ठा एषा जम्बुकन्नगा, अविद्य—
गंडयललंतुल्लकुंडलकिरणोलिविच्छुरियवयणा । नाणामणि(मय)भूषणसरिसिरियरेहंतदेहलया ॥ २४८ ॥
आमलयथूलमोत्तियनवसरहारारवद्वधणवट्ठा । पण्णुल्लमणहर(हरा)वम्महतरुतरुणसाहव ॥ २४९ ॥
पायालसिरिच्च रहव देवरमणिच्च जणियमणमोहा । ललियकरकलियलीलासरोरुहा मुंदरावयवा ॥ २५० ॥
भुवणच्छेरयभूयं रूचं दहुं अदिट्ठपुंघं से । मयरद्धपसरचिहुरा अम्हे तप्पासमट्ठीणा ॥ २५१ ॥
सावि अम्हे आगच्छते पेच्छिऊण सन्निहियपज्जलंतपयंडजालाकराले झडति कुंडे पविट्ठा, अम्हे पुण महा-
भोगगराहया इव विहाणवयणा चित्तिउं पवत्ता—किं पच्छाहुत्तं नियत्ताभो उयाहु तत्थेय तंदंगसंगसंलग्गलायन्न-
पुत्रे जलणकुंडे पयंगो इव अत्ताणं खिवाभो?, केवलं दारुणो दहणो खणद्धेणवि दहइ देहं, संसइओ य तीणं सद्धिं
मीलणो, जीवता पुणोऽवि भद्दाइ पेच्छिस्सामो, ताव सहसच्चिय एगनिंकुंजाओ कुंजरोच्च गरुयंगभारो अंगमारधरह-
रियधरणितलो धरणितलताडणसमुच्छलंतपडिसइयसहस्सवहिरियदिसाभोगो दिसाभोगपसरंतकज्जलावलगुलि-
यालिवलयकालप्पभाजालो करधरियमहंततरसिरकवालो कालरत्तिजणगो इव दुप्पेच्छो वयणेण व भूमवत्तिं मुय-
माणो फारफुंफाररउइकसिणमुयंगवद्वकेसभारो समयओ तं पएसं झडति खेत्तवालो, तओ तेण अचंतरोसारुणच्छेण
पेच्छिऊण भणिया अम्हे—रे एरिसाहमा ! विणट्ठसीलसमायारा कायरडियमेत्तवित्तिसियसरीरा किं नियचित्तावहुंभं

न मुणह ? जं एत्थ आगया, ता एण्हमणुभवह दुव्विणयफलंति भणिऊण पवणपणुणछिणपणं व भएण कंपमाणा सहसच्चिय चरणे धरिऊण बालच्छगलगव अम्हे महया वेगेण उल्लालिया तओ पएसाओ, निवडिया य वलयामुह- विवरदुवारमूले, तओ समागयमहानिद्दवेगा इव गमिऊण जामिणिं समुगयंमि दिणयरे उम्मीलियनयणकमला परिचिंतिउं पवत्ता—अहो को एसप्पएसो ? केणेहाणीया ? कहं वा धरणीए पसुत्ता ? कत्थ वा तं विवरं ? कहिं वा सा कण्णगा ? ।

सुमिणं माया वेयं विभीसिया व ? महविब्भमो वावि ? । एवं चिर संसइया होऊणं मुणियपरमत्था ॥ २५२ ॥
 ठाणाउ तओ चलिया पत्ता बेण्णायडंमि नयरंमि । तत्थवि विज्जासिद्धो दिट्ठो सिचसुंदरो नाम ॥ २५३ ॥
 तो बहुविहप्पयारं विणएणाराहियो पयत्तेणं । तुट्ठेण तेण दिण्णो मज्झं कच्चाइणीमंतो ॥ २५४ ॥
 कहिओ य साहणविही तओ मए चंडिगाए गेहंमि । गुरुणा जहोवइट्ठो पारद्धो जाव होमविही ॥ २५५ ॥
 साहसरहियत्तणओ तणगकंपेवि भयविसिट्ठस्स । धिट्ठत्तणओचिय मंतसाहणं मम कुणंतस्स ॥ २५६ ॥
 उत्तालुत्तालकरालकालवेयालंचंडपरियरिओ । एगो महापिसाओ सहसच्चिय उट्ठिओ भीमो ॥ २५७ ॥ जुम्मं ।
 ताहे तारिसविगरालंदसणुप्पणमरणभयविहुरो । विस्सुमरियमंतपओ पहाविओऽहं सगिहहुत्तं ॥ २५८ ॥
 तेणावि धिट्ठुस्सिक्खिओत्ति भणिऊण विगयसंकेण । अइलंबपाणिणा करिसिऊण नीओ सिवाए पुरो ॥ २५९ ॥

ताहे सुष्टीएँ हओ तहा जहा चिविडिया भमं नासा । अन्नेऽवि अगदंता भग्ना निव्यभगस्व्येण ॥ २६० ॥
ता भो महायस ! तएजं पुट्टोऽहं सबइयरं पुवं । सो एस जइ न पत्तिजसीह ता पेच्छ मज्झ मुहं ॥ २६१ ॥
अह थावरेण भणियं भयवं ! पच्चक्खदिस्समाणेऽवि । भोगपिवासादोसे को मइमं नेव पत्तिवइ ? ॥ २६२ ॥
जुत्तं तुम्हेहिं कयं अहं पि काउं इमं समीहामि । ता अणुणिणहह संपइ पारिवज्जण्ययाणेणं ॥ २६३ ॥
दिण्णा य तेण दिक्खा जाओ सो धम्मकरणनिरयमणो । दढतवियदुस्सहतवो मिच्छत्तविलुत्तभोहेणं ॥ २६४ ॥
चोत्तीसपुव्वलक्खे सद्वाउं पालिऊण पज्जंते । मरिऊण वंमलोए उववण्णो भासुरो तियसो ॥ २६५ ॥
नियबुद्धिसिप्पिकप्पियतिदंदिंसणपरूढनेहेणं । पारिवज्जगहणं लुब्भयगहणाइ संपत्तं ॥ २६६ ॥
सकुलपंससावइयरनिबद्धददनीयगोयकम्मणेणं । माहणपमुहे नीए कुलंमि जम्मं च मिरियस्स ॥ २६७ ॥
दट्ठूण जिणवरागमविवरीयपरूवणं कुलपंसं । दूरं परिवज्जह भो वियक्खणा ! सब्बकालं पि ॥ २६८ ॥
इय वद्धमाणचरिए महल्लकल्लाणवल्लिपरियरिए । मिच्छत्तंपसुमइलियजणमणमल्लालणजलंमि ॥ २६९ ॥
भरहसुयपढमपयडियतिदंदिपासंडसंसाणाज्भो । भवजणविम्हयकरो सम्मत्तो वीयपत्थावो ॥ २७० ॥

॥ इति गुणचंदसूरिरइए सिरिमहावीरचरिए वीयपत्थावो सम्मत्तो ॥

(ततीयपत्थावो)

तिहंङिभवसमेया भणिथा वत्तव्वया य मिरिस्स । एत्तो य जहाविच्चं साहिज्जइ विस्सभूइस्स ॥ १ ॥
 इहेय जंबुदीवे दीवे भारहवाससिरसेहरोवमे पइदिणभवंतविहमहूसवे नीसेसनयरविकखाए रायगिहे नयर
 पढमो सौंडीरचक्कस्स वल्लहो गुणिवगस्स सम्मओ पयइलोयस्स पाणप्पिओ पणइजणस्स भुयदंडलीलारोवियभूमि-
 भारो विसुद्धुद्धिपगरिसवीमंसियधम्मवियारो विस्सनंदी नाम नराहिवो, मयणलेहा नाम से भारिया, विसाहनंदी
 कुमारो, तहा परुढगाढपेम्माणुबंधो सरोरमेत्तविभिण्णो विसाहभूती जुवराया, तस्स रुवाइगुणरयणरोहणधारिणी
 धारिणी नाम देवी । इओ य सो मिरिइजीवो बंभलोगाओ जुओ संतो चउग्गइयं संसारकंतारमणुपरियट्टिऊण अण-
 तरभवजणियतहाविहकुसलकम्माणुभावेण समुप्पण्णो तीसे गब्भंमि पुत्तत्ताएत्ति, अणण्या पसूओ विसिट्ठे वासरे,
 कयं विस्सभूइत्ति से नामं, कमेण परिचत्तवालभावो गाहिओ सो पिउणा कलाकलावकोसल्लं, तारुणमणुप्पत्तो परि-
 णाविओ बत्तीसं सुरमणीविब्भमाओ पवरारायकुलसमुब्भववालियाओ, ताहि य समं बहुप्पयारं कीलंतो कालं
 गमेइत्ति । अणण्या य सयलतइलोयदरिसियवियारो तरुवराणंपि विहियलावण्णो मुणीणंपि कयचित्तचमद्धारो स-
 मागओ महुमासो, जत्थ य—

पोढपुरंधिथोरथणमंडलपडिहयगमणवेणओ । पिययमविरहविट्ठुतरुणीयणदीहरसासतरलिओ ॥ २ ॥

चंद्रगनीवकुसुमकमलायस्त्रुवल्यगंधबंधुरो । दाहिणपवणुदिसिहिं पवियंभइ नावइ गंधसिंधुरो ॥ ३ ॥
अण्णं च—चंचलचरणचलणपरिवोलिरमंजुलकणयनेउरं । करयलणझांतमणिंकंकणकलरयपसरमणहरं ॥ ४ ॥
कणिरनियंबविबकांचिगुणकिंकिणिधालयलालयं । सहइ वरंगणण चाउद्दिसिं चच्चरि चारुणीययं ॥ ५ ॥
एवंविहं महुसमयं दट्ठुं विस्समूहं कुमारो समग्गविमूहं चालुकरनरभडचेडपरिकिन्नो अंतउतरुणीजणपरिय-
रिओ गओ गुप्फकरंडयं नाम उज्जाणं, जत्थ तरुवराभोगे गायंतिव अमंदमयरंदविंदुपाणपरच्चसभमिरभमरगुजिएहिं
पणच्चंतिव खरपवणुवेल्लिरमहल्लपल्लवमुएहिं हसंतिव डिंडीरपिंडपंडुरपरिप्फुडकेयइदीहरदलेहिं । जम्भि य—

जंबुजंबीरखज्जरसाहिंजणा, सज्जनालियरिफ्फणिसप्पला अज्जुणा ।

खइरसिरिखंडकण्णरूपूतला, पीलुनिंबवलिवउयवडपिप्पला ॥ ६ ॥

कयलिनोमालियामाहवीसालयासल्लइसग्ननवनीविहितालया ।

वउलंबसालिताविच्छयाकच्छिया, सव्वकालंपि रेहंति जलमुत्थिया ॥ ७ ॥

जं च—कहिंचि सहयारतरुभंजरीमंडियं, कहिंचि वेइल्लफुल्लतंगंधहुयं ।

कहिंचि कंकल्लिनवपल्लवालंकियं, नाइतरुणीकमालत्तयालंकियं ॥ ८ ॥

कहिंचि नवपाडलापुण्णनियराउलं, कहिंचि विरुदंतभमरावलीसंकुलं ।

कहिंचि वरमालईमउलमालच्चियं, नाइनियविहवदंसेणेण रोमंचियं ॥ ९ ॥

अण्णं च—कारंडहंसबगचक्कवायभारुडकीरकुरेहिं । जीवंजीवकविजलजलवायसखंडरीडेहिं ॥ १० ॥

हारीयंपंचवणयपारेवयपमुहविविहपक्खीहिं । सुसिणिद्धबंधवेहि व सेविज्जइ जं सयाकालं ॥ ११ ॥

जत्थ य वम्महदुस्सहसराभिधाएहिं जज्जरंगीओ । बालमुणालुप्पलसत्थरेसु सिसिरेसु रमणीओ ॥ १२ ॥

विणयंति विरहिणीओ दिणाइं करपिहियसवणजुयलाओ । परहुयतारवारसियसवणमुच्छागममएणं ॥ १३ ॥ जुम्मं ।

रेहंति जत्थ चंपयतरुणो नवकुसुमनियरसेहरिया । आरुढमयणजलणव्व पहियनिवहाण दहणत्थं ॥ १४ ॥

खरपवणुद्धुयमयरंदपिंजरं पेच्छिऊण रविबिंबं । मज्झणहेऽवि हु संझं संकंति रहंगमिहुणाइं ॥ १५ ॥

जत्थऽक्खमयणदमणा तरुणो मुणिणो य सुमणसोवेया । सुहलवलीलालसिया भुयगीओ विलासिणीओ य ॥ १६ ॥

तत्थ एवंविहंमि उज्जाणे सो विस्सभूई कुमारो पवरतरुणीजणसमेओ अणिमिसाए दिट्ठीए पेच्छमाणो वण-
लंछि कोऊहलाउलियपरियणदेसिजमाणमग्गो काणणंतरेसु परिब्भममाणो सायरं पसीयह कुमार ! पेच्छह इओ
मंजरिज्जइ सहयारावली इओ फुल्लंति मल्लियाओ इओ पल्लविज्जंति बालकंकिल्लिणो इओ कोरइज्जंति कुरूवयनि-
उरुंवा इओ कुसुमिज्जंति कणिथारनियरा इओ मउरिज्जंति पुट्ठागाइसाहिणोत्ति, एवं उज्जाणपालेण निंदसिजमाण-
तरुणो वणकीलाए दिणाइं गमेइत्ति । अंतरा य सुणेइ राइनीइसत्थाइं विमरिसेइ गूढत्थपयाइं अभिणयावेइ वि-

सिद्धकविजणविरइयाइं नाड्याइं भरहविज्जाविथक्खणेहिं हावभावहत्थयाइपत्थावणपहुणहिं नाडजणुरिहिं नि-
सामेइ य वेणुवीणाणुणयं गायणजणाओ बहुचोलणप्पयारमणहरं पंचमणेयं, तथा एयंतदेसट्ठिओ विसुणेइ हूरेण
सोवालंभयणाइं । कहे ?—

तीसे संकेयं संसिज्जण पडिजुवइमणुसरतेणं । नाह ! ताए जाजीवं दिन्नो लहुयत्तणकल्लो ॥ १७ ॥
सुहय ! तुह विरहुदुस्सहसिहिपसमत्थं ममाहरंतीए । तीसे सरसीयुं निट्ठियाइं नवनलिणिनाळाइं ॥ १८ ॥
परिसरसहयारुग्गयनवमंजरिखंडणेण पइदियहं । तीसे ताण निमित्तं थट्ठा मज्झंगुलीण गढा ॥ १९ ॥
पचासण्णे कयविविहकल्लवे नीलकंठकल्लयंटे । परिसंता मज्झ मुया पइक्खणं उट्ठवंतीए ॥ २० ॥
एइ पिउ एइ एसो सो हवसु तं खणं धीरा । थक्का मेणिंहे जीहा गुणरत्तं वाहरंतीए ॥ २१ ॥
इय एरिसा अवत्था वट्ठइ तुह पणयिणीए दुविसहा । जइ जीवंतिं वल्लसि कुमार ! ता तं लहुं सरसुं ॥ २२ ॥

तथा कयाइ गोत्तखलियपरिकुवियकामिणीपसायणप्पवणवथणप्पवंचविरयणेण कयाइ सुयसारियासंलवचि-
णोएण कयाइ परोप्परसवत्तिकामिणीकयकल्लकोलाहलनिसामणेण कयाइ णाणाविहदूरेदोमोवणीयापुत्तल्लसं दोह-
दोहल्लगदाणेण कयाइ समयवणसिंहडितंडवावलोयेण विविहं कीलइ । अणया य कुमारस्स काभिणीहिं समं
दुरोदरेण रमतस्स समागओ मज्झंदिणसमओ ।

तओ अंतेउरसमेओ चलओ जलकीलानिमित्तं, पत्तो काणणसरसीए, तयणंतरं च-
 सरसीतडविडविसरावमुक्कझपुच्छलंतसलिलभरं । झिल्लइ महल्लकल्लोलेपल्लणुवेल्लिरो कुमरो ॥ २३ ॥
 मड्डाए तरुणीओ रणंतमणिमेहल्लकल्लावाओ । खिप्पंति पराप्परपेछरीउ भयतरलियच्छीओ ॥ २४ ॥
 करकलियकणयसिंणयसलिलपहारेहिं पोढरमणीओ । विहवइ कुमारो कोवभरियदरपाडलाटीओ ॥ २५ ॥
 पियकरफुंसुल्लासिरनियंवतडतुट्टमेहलगुणाहिं । निवडंतकिंकिणीहिं पलाइयं झत्ति बालाहिं ॥ २६ ॥
 धोरघणघ(धा)मसमजलवट्टियपूराए झत्ति सरसीए । कमलाइं वयणलायणणनिज्जियाइं व लुहुंति ॥ २७ ॥
 इय विविहसलिलकालाहिं कालिउं जुवइसत्थपरियरिओ । ओयरिओ सरसीओ गओ कुमारो निवभासं ॥ २८ ॥
 एत्थंतरे अत्थमिओ गयणचूडामणी दिणनाहो, मडलिया कमलसंडा समं माणिणीमन्नुणा, विण्णउत्ताइं
 चक्कवायमिहुणाइं सह मिहुणदिणविरहेण, पवट्टियाणंदा इओ तओ परिब्भमिउं पयित्ता कोसिया समं पंगुलिविल-
 याहिं, निलीणाइं नियट्ठाणेषु सउणिकुलइं समं सुणिज्जेण, तहा निसायरसेणं व भीसणं पसरिययंधवारं, गयर-
 ङ्खओच्च विण्णुरिओ सच्चओ पढमप्पओसपईचनिवहा, एवं पयट्टे संझासमए कुमारो काऊण पओसकिचं तेहिं को-
 ऊहलनम्मालावंकभणियगीयाइविणोएहिं विगमिऊण खणंतरं पसुत्तो सुहसेजाए, कमेण य पभाया रयणी,
 समुग्गओ सहस्संसुमाली, उट्ठिओ कुमारो सयणीयाओ, कयपाभाइयकायधो पुच्चविहीए दोगुंदुग्ग विलारिणीप-
 ज्झगओ विलसइत्ति । एवं च तत्थ सायंदिणमभिरममाणस्स सरंति वासरा ।

अत्रया य विस्सनंदिणो महारायस्स अगमहिंसीए दासचेडीओ पुण्फकण्डगुज्जाओ पुण्फकण्डगुज्जाओ, दिट्ठो ताहिं विस्सभइकुमारो अंतेउरसमेओ बहुप्पयारं तहा विलसंतो, तं च दट्ठण समुण्णणगाढामरिसाहिं ईसी-
सल्लभिजमाणमाणसाहिं सिग्घमेव पडिनियत्तिऊण कहिओ रायग्गमहिंसीए कुमारस्स काणणकीलावइयारो, खणं-
तरे य दीहं नीससिऊण पुणो भणियं ताहिं—देवि ! किं तुज्झ जीविणं ? किं वा रज्जवित्थरणं ? किं वा विभवेणं ?
जइ तुम्ह पुत्तो विसाहनंदी पुण्फकण्डगुज्जाणे न कील्लजा, एवं च आयच्चिऊण अवियारसणीयत्तणओ इत्थीसहा-
वस्स अदूरंदसित्तणओ महप्पसरस्स अभीरुत्तणओ नियकुलकलंकुग्गमस्स पक्कओ महापरिकोओ देवीण, परिचत्तं
भोयणं उज्झिओ सरीरसकारो पेसियो नियनियठाणसु सहीवग्गो, कइवयदासचेडीपरिवुडा य पविट्ठा कोवघरंमि,
रयणिसमए य समागयेण विस्सनंदिनरिदिण देविं अपेच्छमाणेण पुट्ठो कंचुगिप्पसुहो परियणो, कहियं च एगेण—
देव ! असुगंमि गेहे मिलाणवयणकमला केणवि कारणेण देवी गयत्ति, तओ राया तमायच्चिऊण संसंभयं तत्थेव
गओ, दिट्ठा य कोवेण मिससिंसी उट्ठसासरोगाउरव्व दीहं नीससंती देवी, दिज्झासणे आसीणो नराहिंओ
भणिउमाढत्तो य-देवि ! किमेरिंसी अवत्था ? किमत्थ कारणं ?, साहेसु परमत्थं, न ताव सुमरेमि थोवंपि निय-
दुच्चरियं, न थावि ममाणुवित्तिपरायणो परियणोऽपि मणांपि अवरज्झइ तुज्झ, नेव य विविहरयणाभरणसंभारेहिं
खूणमत्थि, ता किं निरत्थओ एस कोवाडंबरोत्ति ?, देवीए भणियं—महाराय ! संबं चिय नत्थि केणावि पगाणेण

खूणं, केवलं किमेण निरत्थएण सयलजणसामणणेण?, रायणा भणियं—किं पुण अनिरत्थयं सयलजणासामणणं च?, देवीए भणियं—महाराय! पुण्फकरंडगुज्जाणे परिभोगो, राइणा जंपियं—किं तेण तुज्झ?, देवीए वुत्तं-तेण मे पओयणं विसाहनंदिकुमारस्स रमणत्थंति, राइणा भणियं—देवि! मा कुप्पसु, मुंचसु असदज्झवसायं परिहरसु इत्थीजणसुलभं चावलं समिक्खेसु नियकुलक्कभं, किं तुमए दिट्ठो कोऽवि अम्हाणं कुले सुओ वा एगंमि पुण्फकरंड-गुज्जाणट्टिए पुंघिपि पविसमाणो?, ता कं पुंघपुरिसागयं ववत्थं चूरमि, सब्बा अणं किंपि पत्थेसु, देवीए भ-णियं—महाराय! गच्छ निययमंदिरं, उज्जाणलाभाभावे केत्तियमेत्ता अणपयत्थपत्थणा? ।

रज्जेणं रट्ठेणं धणेण सयेण बंधवजणेणं । ससरीरपालणेणवि न कज्जं किंपि मह एत्तो ॥ २९ ॥

जीवंतीविहु नरनाह! नाहमेयं तुहप्पसाएणं । जइ पुत्तं कीलंतं पेच्छामि तदाऽफलं जीयं ॥ ३० ॥

नरनाह! तुह समक्खंपि नेस पुज्जइ मणोरहो जइ मे । पच्छा दूरे सेसं भोगेणभेत्तेऽवि संदेहो ॥ ३१ ॥

वज्जघडिओऽसि मन्ने जमेगपुत्तंपि परिभवदुहत्तं । दट्ठूण सुहं चिट्ठसि अहह महानिणुतावोऽसि ॥ ३२ ॥

इय सलिलेहि व बहुविहवयेणहिं णरिंदमाणसं तीए । तडमिव महानईए दुहाकयं नेहनिविडंपि ॥ ३३ ॥

रत्ता भणियं सुंदरि! मा संतप्पसु केसु करणिज्जं । अच्छउ सेसं दूरे जीयंपिह तुज्झ आयत्तं ॥ ३४ ॥

एवं बहु संठविरूण गओ नरिंदो अत्थाणमंडवंमि, आइया मंतिणो, साहिओ तेसिं रहंमि समग्गो देवीको-

ववइयरो सकुलकमववत्था य, मंतीहिं भणियं-देव ! वीसत्था होइ, अम्हे गंतूण देविं पख्वेसो, अणुद्वाया य राइणा गया देवीए सगासं, भणिया य अणेगप्पगोरेहिं, न य कहंणि संवुज्झइ, तओ विलक्खवयणा सगागया राइणो सगासे, भणिउं पवत्ता य-देव ! निच्छयं देवी गाढजणियकोवा मरणंणि अभुवगमेज्जा, ता सवहा जहा तहा अणुणयणजोग्गा, रत्ता भणियं—भो किमेवं वाहरह ? किं तुब्भे न जाणह अम्ह कुलकमं ?—जमेगंभि समगणे उज्जाणे अन्नो न पविसइ, वसंतमासपविट्ठो य मासगसो चिट्ठइत्ति, मंतीहिं भणियं—देव ! जाणेसो, केवलं दुच्चि-महो इत्थीसहागहो, राइणा सविसायं भणियं—

एगत्तो मज्जाया पल्हत्थिज्जइ कुलकमपरूढा । अन्नत्तो मरइ पिया आवडियं संकडभियाणि ॥ ३५ ॥

संपज्जइ धुवमेणिह अपत्तकालेऽविय विहियसेणं । दढनेहंवंधवधुरंधवजणचित्तविच्छओ ॥ ३६ ॥

महिलायत्तो राया जुत्ताजुत्तं न पेच्छए किंपि । इय अवजसो दिसासुं अखलियपसरो चिरं ममिही ॥ ३७ ॥

ता मंतिणो उवायं तमियाणि कुणह कंणि परिसुद्धं । जह सा जीवइ देवी सकुलववत्था य निघट्टइ ॥ ३८ ॥

एवमायन्निऊण जं देवो आणवेइत्ति भणिऊण टिया एगंते मंतिणो, सुनिऊणबुद्धोए य सम्मं निच्छिऊण कज्जत्तं साहियं नरिंदस्स, जहा-देव ! एयं पत्तकालं किल पंचंतराया देसमुस्सिखलो विदेवइ य, एतदत्थसंवद्धा लेहारिया कीरंति, ते य तुम्हाण लेहे समण्येति, तत्थावधारणाणंतरं पयाणयं च दवाविजइ, तहा कए खुब्भइ सागं-

तवगो, कुमारोऽवि विन्नायवइयरो फुफ्फकरंडगुज्जाणं मोत्तण एइत्ति, एयं च उभयमवि सुपडिविहियं भवइ, एव-
मायन्निऊण अब्भुवगयं राइणा, उट्टिया मंतिणो, साहिओ देवीए एगंतट्टियाए एस वइयरो, सहरिसाए कयं तीए
भोयणं, पमुक्को कोवाडंबरो, बीयदिवसे य लिहियकवडलेहहत्था उडूलियजंथा गाढपरिस्समकिलंता उवट्टाविया
मंतीहिं अपुव्वपुरिसा, नीया य रायसमीवे, खित्ता तेहिं लेहा, वाइया सयमेव राइणा, विन्नाओ तदत्थो, कवडको-
वप्फडाडोवपुव्वं च भणिया नियपुरिसा—रेरे पुरिसा ! ताडेह सन्नाहभेरिं, नयरदूरे पइट्टह गुडुरं आयट्टह दिव्वा-
उहाइं समप्पह जयहत्थि जेण करेमि पत्थाणंति वुत्ते तहत्ति निव्वत्तियं पुरिसेहिं, इओ य भेरीसइसवणओ संयुद्ध
सामंतमंडलं पगुणीकया मयगलंतगंडत्थला कुंजरघडा, संबूढा सुहडसत्था, चउदिसिं पियट्टाइं तुरयघट्टाइं, मिलिया
सेणाहिचइणो, किं बहुणा ?—हलहलियं सयलं भूमंडलं, ठिओ पत्थाणंमि णरिंदो, एत्थंतरे अविन्नायपरमत्थो पत्था-
णट्टियमुवलब्भ नराहिवं निगओ पुफ्फकरंडगुज्जाणाओ विस्सभूइं कुमारो समागओ रायसमीवे निव्वडिओ चलणेणु
पुट्टो वइयरं, साहिउमारद्धो य नरिंदेण, जहा—वच्छ ! अत्थि पचंतसीमालो पुरिससीहो नाम मंडलाहिवो, सो य
पुव्वं पणयभावं आणावत्तित्तणं पडिवज्जिऊण य संपइ दरिसियतिव्ववियारो निहयसीमागामजणो अम्ह मंडलमइका-
मइ, ता पुत्त ! महंतो एस मे परिभवो । अविय—

सपियपियामहपमुहजियं महिं पेच्छिऊण हीरंतं । कह सकलंकं जीयं निरत्थयं संपइ वहामो ? ॥ ३९ ॥

तवगो, कुमारोऽवि विन्नायवइयरो फुफ्फकरंडगुज्जाणं मोत्तण एइत्ति, एयं च उभयमवि सुपडिविहियं भवइ, एव-
मायन्निऊण अब्भुवगयं राइणा, उट्टिया मंतिणो, साहिओ देवीए एगंतट्टियाए एस वइयरो, सहरिसाए कयं तीए
भोयणं, पमुक्को कोवाडंबरो, बीयदिवसे य लिहियकवडलेहहत्था उडूलियजंघा गाढपरिस्समकिलंता उवट्टाविया
मंतीहिं अपुव्वपुरिसा, नीया य रायसमीवे, खित्ता तेहिं लेहा, वाइया सयमेव राइणा, विन्नाओ तदत्थो, कवडको-
वप्फडाडोवपुव्वं च भणिया नियपुरिसा—रेरे पुरिसा ! ताडेह सन्नाहभेरिं, नयरदूरे पइट्टह गुडुरं आयट्टह दिव्वा-
उहाइं समप्पह जयहत्थि जेण करेमि पत्थाणंति वुत्ते तहत्ति निव्वत्तियं पुरिसेहिं, इओ य भेरीसइसवणओ संयुद्ध
सामंतमंडलं पगुणीकया मयगलंतगंडत्थला कुंजरघडा, संबूढा सुहडसत्था, चउदिसिं पियट्टाइं तुरयघट्टाइं, मिलिया
सेणाहिचइणो, किं बहुणा ?—हलहलियं सयलं भूमंडलं, ठिओ पत्थाणंमि णरिंदो, एत्थंतरे अविन्नायपरमत्थो पत्था-
णट्टियमुवलब्भ नराहिवं निगओ पुफ्फकरंडगुज्जाणाओ विस्सभूइं कुमारो समागओ रायसमीवे निव्वडिओ चलणेणु
पुट्टो वइयरं, साहिउमारद्धो य नरिंदेण, जहा—वच्छ ! अत्थि पचंतसीमालो पुरिससीहो नाम मंडलाहिवो, सो य
पुव्वं पणयभावं आणावत्तित्तणं पडिवज्जिऊण य संपइ दरिसियतिव्ववियारो निहयसीमागामजणो अम्ह मंडलमइका-
मइ, ता पुत्त ! महंतो एस मे परिभवो । अविय—

सपियपियामहपमुहजियं महिं पेच्छिऊण हीरंतं । कह सकलंकं जीयं निरत्थयं संपइ वहामो ? ॥ ३९ ॥

इय भणिण् गाढोवरोहेण दिण्णो आएसो राइणा कुमारस्स, पणामपुब्बयं पडिच्छिऊण दवावियं तेण पयाणयं,
चलियं चाउरंगं सेन्नं, कंहं चियं ?—

गंडत्थलपगलंतुगदाणधारंधयारियदियंता । चलकन्नतालवाडियमयंगंधायट्ठियदुरेहा ॥ ४६ ॥

अइधोरघोसगलगज्जिविहियखीरोयमहणसंकासा । उज्जलताराभरणा गयणाभोगव भांसता ॥ ४७ ॥

कयलीवणकयसोहा गेरुरसलत्तियडकुंभयडा । जंगमया कुलसेलव पत्थिया हत्थिणो सिग्घं ॥ ४८ ॥

चलिया य पवणवेगा खरखुरसिहखणियखोणिणो तुरया । फेणुगिगरणमिसेणं जसं व कुमारस्स वियरंता ॥ ४९ ॥

करकलियकुंतकोदंडसेल्लमल्लयसुत्तिवखकरवाला । सन्नद्धवद्धकवया पयंडभुयदंडवलकलिया ॥ ५० ॥

नियसौंडीरिमवसओ रिउसेन्नं जरतणं व विगणिंता । सपहुप्पसायपरवसहियया जीएऽवि निरेवखा ॥ ५१ ॥

पइखणविमुक्कहक्कारपुक्कारुकरिसतुट्टसन्नाहा । गेहनियत्तियदइया चलिया दण्णुम्भडा सुहडा ॥ ५२ ॥

बडुविहमहरणभरिया रहनिवहा घणघणारवरउद्दा । सवपहेसु पयट्ठा पवणुडुयधयवडाडोवा ॥ ५३ ॥

इय चातुरंगसेन्नं नरवइवयणेण वड्डियाणंदं । मुणिदाणजायपुन्नं व कुमारपासं समल्लीणं ॥ ५४ ॥

तथो भंजंतो गिरिसिहरावद्धमहल्लभिल्लपल्लीओ निच्चच्छंतो जणवयविहवणवद्धलक्खं चरडपक्खं अवलोयंतो
नगनगरगामारामरमणीयं महीमंडलं पडिच्छंतो मग्गे सामंतसमप्पियं विविहालंकारकरितुरयपसुहं पाहुडं पत्तो

श्रीगुणचंद
महावीरच०
३ प्रस्तावः

॥ ३४ ॥

विज्झगिरिसमीपं, एगत्य निवेसिओ खंधावारो, तओ य पहाणवियक्खणपरियणानुगओ चलिओ कोउहतेण विज्झ-
गिरिभवलोहउं । अंतरे य—

उत्तंगमत्तकुंजरकुलाहं पेच्छइ जहिच्छचाराहं । रेवातलुहमहल्लसहइकवलणपराहं ॥ ५५ ॥
निसुणइ पेम्मभरालसजुवईपरिकिन्नकिन्नरावद्धं । करकलियतालकलरवसंचलियं पंचमुगारं ॥ ५६ ॥

निज्झरक्षंकारवायणणघणघोससंकियमणाणं । तंढवमस्सिक्खियपंडियाण पेक्खइ सिंहलीणं ॥ ५७ ॥
तयणंतं च पुरओ पयदो समाणो गायंतं व पवणगुजियसरेणं हसंतं व विप्पुुरियफारफुल्लिगुगारेहिं पणचं-
तं व समीरपसरियमहल्लजालाकलोवेहिं विलुलियकेसपासं व गयणंमणलवमाणधूमपढटेण नियइ दारुणं दावानलं,
तं च अइलंघिऊण कमेण पहाणपुरिसं व तुंगायां सुवंसपडिन्नदं च, नरेसरं व वररयणकोसं जणाणुगयपायच्छायं च,
काऊरिसं व दुट्टसत्ताहिट्टियं निहुरसरूवं च, माहियाहियं व दुल्लंघणिजं पओहरोवसोहियं च, आरुढो विंझगिरिं ।
तओ चिरं काणणेसु निज्झरेसु विवरेसु दुरारोहसिहरेसु कयलीलीलाहरेसु देवोवभोगुब्भडगंधेसु सिलावट्टेसु निवि-
हमणोहरप्पएसेसु विहरिऊण परिस्संतो उवविट्ठो एगंमि माहवीलयाहरे । एत्थंतरे पढियमेगण चारणेण—

विंझो साराणुगओ निचं चिय नम्मयाए परियरिओ । सारंगजणियसोहो गयकुलकलहो दयावासो ॥ १ ॥
उच्छूढलसमाभारो विबुहपिओ मयणसुंदरसरीरो । एवंविहो तुमं पिव कुमार! किं अब्भहियमेत्थ? ॥ २ ॥ मयमा-

विन्ध्यो-
गमनं.

॥ ३४ ॥

यन्निऊण परितुट्ठो कुमारो, भणियं च-अहो साहु सिलेससारं पढियमेएण, ता देह एयस्स दीणारलक्खंगं, जं देवो आणवेइत्ति भणिऊण पडिबन्नं भंडागारिएण, खणंतरेण गओ नियआवासं । कयं पयाणयं, कमेण य पत्तो पंचत-
देसं, तहिं च पेच्छइ पमुइयपक्कीलियं गोमहिसिपुकरहरासहपउरं धणधणसमिद्धं सुद्धगामागरनगरं नियजण-
जाणवयं, विम्हियजेण य आहूया विसयमहत्तरा सिट्ठिणो य, तंवलदाणाइबहुमाणपुरस्सरं पुच्छिया य लोयसु-
त्थासुत्थवत्तं, तेहिं भणियं-देव ! तुम्ह भुयंपंजरंतरनिलीणाणं अम्हाणं को सयन्नो मणसावि असुत्थयं काउं समीहेज्जा ?,
न हि जीवियसावेक्खो पंचाणणंगंधकसरकुरलिं तोड्ढेज्जा भुयगरायफणफलगमंणिं वा गिणहेज्जत्ति, केवलं गृत्ति-
यमेव असुत्थं—

जमेत्थ दावियसुद्धायांरेहिं पणतरुणीगणेहिं, नयणचावपमुक्ककडक्खियमगणेहिं । दिसिदिसिनिद्दयपह-
णिवि पइदिणु पंथियहुं, हीरइ हियउं हयासहि पहि पेक्खंतियहिं ॥ १ ॥ विसयदोसहुसंचयकहणपरायणहं,
धम्ममग्गु देसंतह पइदिणु सुणिजणहं । भोगुवभोगु जहिच्छइ गिहिं निवसंतएहिं, अम्हेहिं करणु न लब्भहिं
भवभयसंकिरियहिं ॥ २ ॥

इय निसुणिऊण कुमरेण दरवियसियक्खोलं हसिऊण सुचिरं पंसंसिऊण य तवयणविन्नासं दवावियतंवल्लो वि-
सज्जिया सिट्ठिणो विसयप्पहाणा य, तयणंतरं दूयवयेण भणाविओ पुरिससिंधो, जहा-कुमारो तुह दंसणुसुओ

वट्टइत्ति, एयमायन्निऊण य पुरिसांसिंघनरवइणा कुमारस्स आणयणनिमित्तं पेसिया नियपहाणपुरिसा, तदणुरेहेण समागओ कुमारो, पेवेसिओ नगरंमि परमचिभूईए पुरिससीहेण, काराविओ भोयणं, समप्पिया करितुरयसंदणा, उवणीयमणंपि पभूयं दविणजायं, विन्नत्तो य भालतलघडियकरसंपुडेण तेण-कुमार ! गाढमणुग्गाहिओहि तुमए जं नियचरणकमलेहिं पविचीकयं मह भवणं, ता कइवयदिणाइं पडिवालेह एत्थेव, पुणोऽवि दुलहं तुम्हेहिं सह दंसणांति भणिए बुत्तो कुमारेण-भो नरिंद ! अपुवो तुह पेम्मपवंचसारो पियालावो अणणविणयववहारो अच्छेयभूया प-डिवत्ती मणसावि अचिंतणिज्जं सज्जणत्तणं, ता एरिस तुह गुणगणेण गाढमागरिसियं मम सणद्धेणवि चित्तं, जइ पुण कइवय वासराणि तुमए सिद्धिं वसामि नूणं न प्हू परवसस्स नियचित्तस्स हवामि, सचं च इमं पढिज्जइ-“अत एव हि नेच्छन्ति, साधवः सत्समागमम् । यद्वियोगासिखनस्य, मनसो नास्ति भैषजम् ॥ १ ॥” ताऽणुजाणेसि मं गमणाएत्ति बुत्ते दुस्सहतव्विओगसोगदमियमणोऽपुधरं हयगयरहसमग्गसामग्गीए अणुगच्छिऊण कुमारं वल्लिओ पुरिससीहो, कुमारोऽवि अक्खंडपयाणगेहिं चलिओ रायगिहनगराभिमुहं । इओ य विस्समंदिणा नरिंदेण सो नियपुत्तो विसाहनंदी भणिओ-

वच्छ ! जहिच्छं वणलच्छिपेच्छणं कुण मयच्छिमज्झगओ । परिसंकं सक्कस्सवि अवहतो एत्थ उज्जाणे ॥ १ ॥
एवमायन्निऊण विसाहनंदी कुमारो वड्डियाणंदसंदोहो पमुक्कनीससावांरंतरो अंतोउरसमेओ विचित्तकीलाहिं

उज्जाणे संठिओ कीलइत्ति । सो य विस्समूई अणवरयमागच्छतो संपत्तो रायगिहे, नियनियठाणे पेसियसामंतसे-
णावइपमुहपरियरो गाढाणुरागेण य चिरंदसणुक्कंठिओ पुव्वण्णवाहेण पुण्णकरंडुज्जाणे पविमिउमाढत्तो, भणिओ य
दुवारदेसट्ठिएण पडिहारेण—कुमार ! न जुत्तं तुम्ह एत्थ पविसिउं, जेण विसाहनंदी अंतउरसहिओ इह पविट्ठो
कीलइ, विस्समूइकुमारेण भणियं—भद्द ! कइया पविट्ठो ? तेण भणियं—तुम्ह गमणाणंतरमेव, एवमायन्निऊण समु-
प्पन्नतिवकोवभरारुणनयणो णिडालतडधडियमिउडिमासुरियवयणो तक्कालुच्छलियसेयविंदुजलजडिलियसरीरो कु-
मारो एवं चित्तिउमारद्धो—

पच्चंतकुद्धनरवइवइयरववएसओ धुवं पुंविं । उज्जाणाओ इमाओ नियबुद्धीए नीणिओ रत्ता ॥ १ ॥

जेण संयं चिय दिट्ठो सो देसो सुत्थगामपुरगोट्ठो । परचक्कचोरअभिमरभयरहिओ धणकणसमिद्धो ॥ २ ॥

ता नूनं नियपुत्तस्स कीलणट्ठं इमंमि उज्जाणे । अवजसपरिहरणत्थं कवडमिमं विरइयं सव्वं ॥ ३ ॥

बाढं अजुत्तमेयं आयरियं निच्छियं नरिदेण । न हि विस्सासपरव्वसहिययंमि जणे घडइ माया ॥ ४ ॥

एवं खणं निग्गभिऊण तेण समुप्पन्नसमहिगकोवाइरेण तज्जिया विसाहनंदिपुरिसा—रे रेदुरायारा ! मए अप-
रिच्चेऽवि उज्जाणे केण तुम्हे पवेसिया ? को वा तुम्ह पुरिसायारो ? कहं वा अविण्णायपरक्कमा एत्थ सच्छंदमभिरमह ?
मए निहयाणं कत्तो वा तुम्ह परिचाणंति भणिऊण दुविसहाभिमाणपरव्वसयाए नियवलंदसणत्थं पहाओ निट्ठसु-

द्विपहारेण फलभरणयसाहो पकिटो कविदृषायवो, तदभिधाण य कुलसेलताडियं व थरहरियं मेइणीचट्टं तुट्ट-
निविडबंघणाइं निवडियाइं सयलफलाइं दंसियाणि य विसाहनंदिपुरिसाणं, सगधं भणिया य-रे रे पुरिसाहमा !
जह एयाणि पाडियाणि तहा पाडेमि तुम्ह मुंडाणि, अवणेमि दुव्णिणयसीलयं, विहाडेमि उज्जाणरभणकोज्जलं,
केवलं लजेमि तायस्स वीहेमि नियकुलकलंकस्स विचिकिच्छेमि लोयाववायस्सत्ति भणिऊण उवसंततिव्यकोहावेणो
सवेगमग्गमुवगओ एवं चित्तिउमाढत्तो-

विसयपरव्वसहियया हीलं किं किं जणा न पेच्छंति । कत्थ व न दुक्करंमिवि ववसाण् संपयट्ठंति ? ॥ १ ॥
को वा न आययावत्तवट्ठिया तिक्खदुक्खरिंछेली । दंभोलिनिव्विसेसा अत्तक्किया निवडइ मिरंमि ॥ २ ॥
तुच्छोवि विबुहज्जानिंदियोऽवि को वा विमुक्कमज्जाओ । न करेज्जा दुव्विणयं विसयपसत्ताण सत्ताणं ॥ ३ ॥
विसयाणं पुण निव्विग्घकारणं निच्छयं मयच्छीओ । विहिणा पावेण विणिम्मियाउ नणु केण कज्जेणं ? ॥ ४ ॥
नूणं न दुग्गदुग्गइपडणदुहाइं कयावि सुमिणेऽवि । पेच्छेज्जा मणुयजणो जइ जुवइपरमुहो होज्जा ॥ ५ ॥
पासव्व करिवराणं हरिणाण व वागुरा विसमबंधो । पंजरमिव विहगाणं पईवकलियव्व सलभाणं ॥ ६ ॥
भीणाणं जालेपिव जणाण सेच्छापथारसुहियाणं । अहह विसमं महंतं महिलाजंतं कयं विहिणा ॥ ७ ॥
अविय-नवमालइपरिमलमंसलोवि नवसुरहिक्कुमुमवरगंधो । किं कुणइ तेमि जेसिं मणंमि नो वसइ हरिणच्छी ॥ ८ ॥

अइरेगुहीविषवम्महोऽवि निम्महियसयल्लोओऽवि । जुवईविरत्तचित्तं नो चालइ मलयपवणोऽवि ॥ ९ ॥
 सरयनिसायरकिरणुज्जलावि नो कोमुई मणागंपि । दावेज्ज विचारं पंचवाणवल्लणधीराणं ॥ १० ॥
 जोव्वणतिमिरच्छाइयविवेयनयणो पुरा गिहे वसिओ । अहह कंहं दुट्ठमई निरत्थयं एत्थियं काळं ? ॥ ११ ॥
 अहवा किमइकंतत्थसोयणेणं निरत्थएणं मे । अज्जवि किंपि न नट्टं करेमि सद्धम्मकम्ममहं ॥ १२ ॥
 एवं च गरुथसंवेगावन्नमाणसो सव्वहा पवट्ठमाणविसयविरागो निच्छियसंसारसारत्तो गओ संभूसुरिस पापो, जो
 य करिसो ?—

अइपसत्थगुणरयणसायरो, तेयरासिना वइ दिवायरो । सोमयाए संपुन्नचंदओ, जो विसुद्धसुहवेल्लिकंओ ॥ १ ॥
 मेरुसेलसिहरव्व निचलो, संघकज्जभरवहणपचलो । सुरनरिंदपणिवयसासणो, दुट्ठकामतमपडलणासणो ॥ २ ॥
 तवऽग्गिदट्ठपावओ विसुद्धभावभावओ, सया तिगुत्तिगुत्तओ पसत्थेलसजुत्तओ ।
 पयंडंडवज्जिओ जिणंदमगरंजिओ, पणट्ठमाणकोहओ विणीयमायमोहओ ॥ ३ ॥
 जणाण बोहकारओ कुतित्थिदप्पदारओ, अणुवकप्परुक्खओ पणट्ठसत्तुपक्खओ ।
 सुणिंदविंदवदिओ असेसलयनंदिओ, अणेगल्लिन्नसंसओ पणट्ठसव्वदोसओ ॥ ४ ॥
 तस्स एवंविहस्स गुरुणो पलोयणेण समत्थतित्थंदसणपुयपावं पिवऽप्पाणं मणमाणो सञ्चारयेण पणभिज्ज

चरणकमलं उवविद्वो सन्निहितभूमिभागे, गुरुणाऽपि पारद्धा महामहणापरिग्रयपंचयणरवाणुकारिणा सरेण धम्मदे-
सणा । जहा—

संसाररुदरगे सहस्रसेहिं व चित्तस्वेहिं । सो नत्थि किर पाप्मसो जीवेहिं न नचियं जत्थ ॥ १ ॥
चउगइजलपडलालभयणवेऽणेगसो करेतेहिं । दुहिणहिं मज्जणुम्मज्जणाइं कुम्मेहि व कहेपि ॥ २ ॥
आरियखेत्तुणत्ती नो पाविज्जइ पभूयकालेऽवि । तीएवि दु पत्ताए कहेचि कम्मकसओवसमा ॥ ३ ॥
धम्मत्थकामसाहणकारणमेगितियं न मणुयत्तं । पावंति पावविहया सममाणा विविहजोणीसु ॥ ४ ॥
लद्धेऽवि तत्थ जरकाससासकंहूपमोक्खदुक्खेहिं । निहयाण धम्मकम्मज्जमोऽवि दूरेण वंचज्जा ॥ ५ ॥
नीरोगत्ते पत्तेऽवि रुहदारिहिविहुयसरीरा । उदरभरणत्थयालचित्ता वोलेति नियजीवं ॥ ६ ॥
इस्सरिएऽविहु वहुदविणवद्धारुक्खविहवावारा । लोभेण भोगणंपिहु काउं न तरेति वेलाए ॥ ७ ॥
संतोसेणवि मिच्छत्तंपकपसरेण मइलमइविमवा । सव्वणुमयं सम्मं भुयंति नेवावबुद्धंति ॥ ८ ॥
सव्वणुधम्मवोहे जाएऽवि हु कम्मपरिणइवसेणं । नीसेसगुणावासो गुरूवि न कहेपि संपडइ ॥ ९ ॥
लद्धेऽवि गुंमि समत्थवत्थुवित्थारफयडणपइवे । सिद्धिपुररमपयवी न पयदुइ तहवि चिरइमइ ॥ १० ॥
तीएवि तिमखवहुदुक्खलक्खनिरिवेक्खकारणं पावो । पसरंतो न पमाओ खलितं तीरेइ वणकस्सि ॥ ११ ॥

इय उत्तरोत्तरमहप्पवंधहउप्पसाहणिज्जंमि । मोक्खसुहे धण्णणं केसिंपि मणो समुल्लसइ ॥ १२ ॥
 अन्नोसिं एवंविहसमगसाभगिगंसंभवेऽवि मई । उप्पज्जइ संसारियसुहेसु विरसावसाणेसु ॥ १३ ॥
 को वाऽविहु सल्लहेज्जा को वा नांयपि तेसिं गिण्हेज्जा । जे भोगामिसगिद्धा रंमंति इह सारमेयव ॥ १४ ॥
 अविय-जोव्वणपडलच्छाइयविवियनयणा मुणंति तरुणीण । केसेसुं कुडिलत्तं न उणो तासिं चिय मणंमि ॥ १५ ॥
 बहुहारावुद्दामं उब्भडनासं सुदीहरच्छं च । पवियंभियसत्तिलयं नियंति वयणं न उण नरयं ॥ १६ ॥
 परिणाहसालिवित्तं सि थि(थ)णेसुं न धम्मबुद्धिसु नियंति । पेहंति तणुयसुग्रं साणंदा न उण निथयाउं ॥ १७ ॥
 सुरमणुयगईपरिहं पि सुंदरं सुयजुयं पसंसंति । जंघोरुजुयं अइअसुइयं पि उयमिति रंभाए ॥ १८ ॥
 इय भो देवाणुप्पिय ! विप्पियहेउं पि जुवइज्जणदेहं । मणमोहणावम्महचुण्णपुण्णचिच्चा अभिलसंति ॥ १९ ॥
 तेच्चिय पमाणमवलंविज्जण भोगेसु को पयट्टेज्जा ? । कुपहपवण्णो किं होज्ज कोइ कुसलाणुसरणिज्जो ? ॥ २० ॥
 नवजोव्वणोऽवि निप्पडिसरूयकलिओऽवि लच्छिनिलओऽवि । पवरबिलासीवि तुमं भइ ! धुवं धम्मजोगोऽसि २१
 तेणवंधविहपवरोवएसरयणाइं तुज्झ दिजंति । न कयवि पुण्णरहिआ चिंतामणिलाभमरिहंति ॥ २२ ॥
 इय भणियंमि गुरूहिं समहिगलंजायधम्मपरिणामो । भत्तिभरनिब्भंगो कुमरो भणिउं समाढत्तो ॥ २३ ॥
 भयवं ! सव्वमसेसं कहियं तुमेहि सिवसुहकण्णं । ता समं पव्वजं निरवजं देहभइ इण्हि ॥ २४ ॥

एवं च भणिए सो गुरुणा समुज्झियरयणाभरणो अंगीकयगुरुचरणसरणो सिद्धंतमणिग्रविहाणेण गाहिओ जिणिंददिक्खं सिक्खविओ पइदिणं कायव्वकलावं जाणाविओ सिवमुहनिवंधणं संजपधणं पाढिओ सामाइयप-
मुहं सुत्तंति । इओ य कुमारपव्वज्जासवणवज्जासणिताडणुणणपरमसोगो अंतउरसमओ समं जुवराएण समारगओ विस्सनंदी, सविणयं सूरिं वंदिऊण पणमिओ अणेण विस्समूहं साह, भणिओ य सोपालं सपणयं च एसो-पुत्त ! किं जुत्तमेयं पवरकुलुप्पन्नाणं तुम्हारिसाणं ? अनिवेइऊण नियवुत्तं जमेवविहं दुक्करं साहुक्करियं पडिवण्णोऽसि, ता वच्छ ! साहेसु को तुज्झ चित्तनिव्वेयहेऊ ? किं वा अह दूसणं पडिवण्णो ? केण वा तुम्ह वयणं पडिक्खलियं ? कि-
मेवं एक्कपएचिय अदक्खिणत्तणमब्भुवगओऽसि ? हवउ वा सेसजपणेण, तुमं विणा कस्सेयाणिं अम्हे सकजं सा-
हिमो ? विसमावयानिवडियाणं को वा आलंबणं ? ता सब्बहा अज्जवि परिचयसु पव्वजं पडिवज्जसु रजं कीलेसु जहिच्छं पुप्फकरंडगुज्जाणे मा पूरेसु सत्तुमणोरेहे मा अणाहीकेरेसु बालकमालिणीवणं व सस्मिरीयं बहुज्जणं मा उवे-
क्खेसु पुव्वपुरिसरक्खियं नियजणवयं मा पडिवज्जसु गाढगंठिनिट्टुरहियत्तणंति ।

तो विस्समूहसुणिणा पसमपहाणं पयपियं एयं । भो सुंचह संतावं कुणह जहावंचलियं कज्जं ॥ १ ॥
नो किंचिवि वयणिज्जं इहइत्थि सब्बेऽवि नियक्खजेसु । उज्जमह सेसचाणेण जेण लोगेऽवि पयडमिमं ॥ २ ॥
सयणाइसिणेहविमोहिएहिं कीरंति जाइं पावाइं । दुग्गइययाण ताइं कडुयविवागं फलं देति ॥ ३ ॥

न य बहुमुवयरिओऽविह विहुरे थेवपि कुणइ साहारं । सयणजणो मोत्तणं एकं जिणदेसियं धम्मं ॥ ४ ॥
 इय भणिए नियदुच्चरियपेहणुप्पणगाढसंतावो । काऊण पायपडणं जहाऽङ्गं पडिगओ राया ॥ ५ ॥
 विस्सभूई सम्ममहिगयसाहुधम्मो गुरुचरणसुस्ससापरो दूरुज्झियसुहिसयणसंथवो जीवियमरणनिरिवेक्खो
 पंचिदियदित्तसत्तुविजयपरो बहुं कालं गुरुकुलं पज्जुवासेइ । अण्णया य सम्मं समहिगयसुत्तथो विसेसेण विहियम-
 णपरिकम्मो जोगोत्ति कलिऊण गुरुणाऽणुण्णाओ समानो एगल्लविहारित्तणं पडिवज्जिऊण लुट्ठमाइ निदुरं तवो-
 कम्मं कुणमाणो सम्मं परीसहचमूं अहियासेज्जमाणो वीयरगोव्व गामनगरागराइसु अभमाएंतो पइक्खणं वीराम-
 णुकुडयासणाइं कुणमाणो पइदिणं सूराम्भिसुहं आयावित्तो नियजीवियब्भहियं पाणिगणं रक्खित्तो वायालीसदो-
 सविमुद्धविरसाहारहणेण संजमसरीरमणुपालेतो गामाणुगामं विहरेतो समागओ सुरिंदपुरिविब्भमाए महुराए नय-
 रीए, ठिओ थिपसुपंडगविवज्जिए उक्किट्तवनिरयसुणिजणसंगए एंगंतेदेसे, तहिं च निवसंतो एगथा परमसंवेग-
 गयमाणसो नियजीवियनियमणत्थं चिंतिउमारद्धो । जहा—

एसोऽभिकंखइ सुहाइं जिओ दुहाइं, दूरेण मोत्तुमभिवंछइ तुच्छबुद्धी ।
 एवं न जाणइ जहा न कहिंपि धम्मसंबंधसिद्धिविरहेण भवंति ताइं ॥ १ ॥
 भोगे समीहइ करेइ रइं कहासु, देसिस्थिपत्थिवसुभोयणसंगयासु ।

सीउण्हदंसमसगाइ परीसहे य, सम्मं तितिक्खइ न मूढमई पमाया ॥ २ ॥
सत्तू वरं निसियधारकरालकलकंतिच्छडालकरवालकरो सुकुद्धो ।
घायथमुज्जयमई वरमुग्गभोगभोगीसरो छसिउमुहुमरो रुणच्छो ॥ ३ ॥
उण्हमारुयपईवियदीहजालामालाउलो य जलणो वरसंगलगो ।
नीसेसदोसनिलओ न खणंपि नूणं, जुत्तो न गंतुमहमो हि इमो पमाओ ॥ ४ ॥
एए हि सत्तुपमुहा मणुयाण दित्ति, तिव्वावि एग्गभवगोयसव भज्जु ।
एसो पईभवमुदुस्सहतिकखदुक्खलक्खक्खणी तदहिगं परियज्जणिज्जो ॥ ५ ॥
वज्जणमेयस्स पुणो आहारचागओ घडइ सम्मं । ता सवहेव जुत्तं भम काउं उग्गतवचरणं ॥ ६ ॥

इइ संपहारिऊण य समारद्धं तेण मासखमणं, कओ विसेसेसुज्जमो समाढत्तो पइदिणं आणण्यवंधो निरुद्धो
मणप्पसरो, एवं च कमेण पडिपुण्णे मासक्खमणे पडिलेहियभंडावगरणो अतुरियं अक्खलं जुगमेत्तनिहित्तचक्खुपसरो
सुत्तत्थपोरिसिपज्जंतकाले चलिओ भिक्खानिभिच्चं उचावयगिहेसु गोयरचरियाए, परिसममाणो उग्गमउप्पायणादोस
सम्मं निरुक्खमाणो लामालाभेसुवि अरत्तदुद्धो पगिट्ठतवाणुद्वाणकरिसियसरीरत्तणेण य तणंपिव पवणेणावि पंकपमाणो
परिसोसियमंससोणियत्तणेण य पयडसिराजालावणद्धउट्ठिंपजरो धवलपाडियमयलंछणो इव कलावसेसो तं रायम-

गगनोगाढो जत्थ सो विसाहनंदीकुमारो पिउच्छाए रण्णो अगमहिंसीए धूयापरिणयणत्थं पुब्बमावासिओ चिट्ठस्सि ।
 अहं तं सुणिं दट्ठण जायपच्चभिण्णाणेहिं पुरिसेहिं भणिओ विसाहनंदी कुमारो, जहा-सामी ! मुणह तुम्हे एवं पवइ-
 यगं ? , सो भणइ-सम्मं न जाणामि, तेहिं भणियं-कुमार ! एसो सो विस्सभूइ कुमारो जो पुंघिं पवइओ, तं लक्खिऊण
 जाओ तस्स पुब्बामरिसेण कोवोत्ति, एत्थंतरे सो तवस्सी तंमि पएसे वच्चमाणो इरियासमिइवक्खित्तचित्तत्तणेण अत-
 क्रियमेव पणोल्लिओ अहिणवपसूयाए गावीए, पडिओ य निसट्ठो धरणीए, ताहे तस्मिं विसाहनंदिपमुहुपुरिसेहिं दट्ठण
 तं तहानिवडियं संजायगाढहरिसेहिं कओ सिंहनाओ अण्णोडिया तिवइ दिवाओ तालाओ पारद्धो कलयलो, भ-
 णियं च महया सहेण-भो भो कत्थ गयं तभियाणिं कविट्ठफलपाणवलं जेण गोभेत्तेण विनिवाडिओऽसि ? , इमं च
 निसामिऊण वलियंकंधरो विस्सभूइ जाव विण्णारियल्लोयणो अमरिसेण पलोएइ ताव दिट्ठा विसाहनंदिमुपहा पच्च-
 भिण्णाया य, तयणंतरं च पलीणो से उवसमपरिणामो ववगओ विवेओ समुच्छलिओ महाकोवो समुल्लसियं वीरियं,
 धाविऊण य सा गहिया सिंगेसु गावी पडाइयच्च भमाडिया सीसोवरिं पक्खित्ताय धरणीए, अणिया य ते, जहा-रे रे
 दुरायारा ! दुरुम्मकुपरक्कमा हीणा सन्नसो य विरहिया मं उवहसह, न मुणह जहा दुच्चलस्तऽवि पंचाणणस्स सिगा-
 लसहस्सेहिवि न लंघिज्जइ परक्कमो, सुलुहुयस्सवि विहंगरायस्स न तीरइ सोढुं भुयंगमेहिं चडुलचंचुप्पहारो, तहा-
 जइविहु निट्ठुरतवक्कम्मकिसियकाओ वियाणिओऽहमिह । तहवि न रे ! तुम्हाणं लक्खेणवि अत्थि मम गणणा ॥ १ ॥

रे पिसियपोसिया विउसदूसिया किं परेण भणिएण ? । अच्छिपडियावि तुम्हे न कुणह मे किंपि परियावं ॥ २ ॥
निब्भच्छिज्जण एवं साहिकखेवं सुत्तिकखयणेहिं । गंतूण य नियठाणं साहू चित्तउमाडत्तो ॥ ३ ॥
अज्जवि न मणांगंपिवि पुट्ठाणुसयं चयंति मइ एण् । पव्वज्जोवगयंमिवि निकारणवइरिणो पाया ॥ ४ ॥
अहवा एयाणं वालिसाणं किं एत्थ दूसणं ? जेण । पुट्ठायरियाण मुहासुट्ठाण एसो दसावारो ॥ ५ ॥
ता तह करेमि संपइ परभवपत्तो जहा य सुमिणेवि । एवंविहअवमाणट्ठाणं नो कर्हिपि पेंच्छामि ॥ ६ ॥
इय कयसंकप्पो सो अविभावियसमयसत्थपरमत्थो । अविचिंत्तित्तरोत्तरसंसारवडणदुहुनिवत्तो ॥ ७ ॥
भत्तं पच्चक्खाउं नियाणवंधं च काउसुजुत्तो । पच्चासण्णसुणीणवि समक्खमेवं पजंपइ ॥ ८ ॥
जइ ताव ममं दुक्कतवस्स छट्ठमाइरूवस्स । सज्झायझाणसहिथस्सिमस्स सव्वायरकयस्स ॥ ९ ॥
वायालीसेसणदोसरहियसुहुंछुभोयणस्सऽविय । सुत्तत्थतत्तचित्तण[पर]गुरूजणविणयाणुचरणस्स ॥ १० ॥
पंचमहव्वयधरणस्स वावि फलमउलमत्थि नणु किंपि । अतुलियबलकल्लोऽहं ता होज्जा अणजम्ममि ॥ ११ ॥
एवं च नियमिज्जणं ठिओ सुद्धसिलायले, निसामियनियाणवंधा य समागया इयरसमीववत्तिणो तवस्सिणो,
भणिओ य सबहुमाणं तेहिं-भो महाणुभाव ! सयंचिय सुणियजुत्ताजुत्तस्स नत्थि जइवि तुह किंपि कहणिजं त-
हावि एवं निवेइज्जइ-जेण न लेहकीलियानिमित्तेण कोऽवि कुणइ देवउलपलीवणं, न वा कोडिप्पमाणयणरा-

सिणा किणिज्जइ कागिणी नेव य गोसीसचंदणागरुपमुहसारदारूणि दहिऊण कीरंति इंगाला, न य एवंविहजिहलं-
कसुचिरचरियविविहतवेहिं किंपागफलं पिव पज्जंतदारुणो काउं जुज्जइ नियाणवंधो, आणं च—

किं पवणगुंजिएहिं कंपिज्जइ मंदरो रउद्दहिं । दुज्जणवयणेहिं मणो किं वा पक्खुहइ साहूणं ? ॥ १ ॥

चिरकालुब्बूढं किं मज्जायमइक्कसंति जलनिहिणो । हरिणंकदिणयरा किं तिमिरप्पसरेहिं रुज्झंति ॥ २ ॥

निम्मलगुणरयणमहानिहाण ! तुम्हारिसावि सप्पुरिसा । ववसंति एरिसं जइ धम्मसिरी ता कमल्लियउ ? ॥ ३ ॥

कत्थ ववच्चउ विणओ ? वोढुं को वा खमो खममियाणिं ? भग्गनिवासो गच्छउ कत्थ वराओ विवेओऽवि ? ॥ ४ ॥

एमाइविविहवयणेहिं भासिओ जा न देइ पडिवयणं । नियनियठाणेसु गया ताव सुणिंदा निराणंदा ॥ ५ ॥

विस्समूहवि अविचलियणियाणवंधज्झवसाओ अणालोइयपडिक्कतो कालमासे कालं किंचा उक्कोसट्ठितीओ
महासुक्के देवलोगे देवो समुप्पण्णो, तत्तो उच्चट्ठित्ता जहा वासुदेवो होही जहा य से पिया पयावइत्ति भविही तदा
एत्तो कहिज्जइ ।

इहेव जंबुदीवे दीवे भारहे वासे पोयणपुरंमि नयरे जहत्थाभिहाणो रिउपडिसत्तू नाम राया, तस्स य रायल
अंतैउरपहाणा भदा नाम अगमहिंसी, तीसे चउमहासुमिणपिसुणियावयारो अयलो नाम पुत्तो, अवंतमहावलो
विस्सुओ य, एगया य तीसे देवीए पाउब्भूओ गब्भो, जाया य कालेण सव्वलक्खणपडिपुण्णसरीरा कण्णगा,

कयं च उचियसमए मिगावइत्ति से नामं, कमेण य निरुवमारुद्धजोव्वणगुणा एवं सोहिउं पवत्ता—

कसिणसुसिणिद्धकुंचिरचिहुरचओ तीए उत्तमंगमि । वयणेंदुविच्चमागयविट्ठणसोहं समुव्वहइ ॥ १ ॥

भालतलेऽवि लुलंती अतिकुडिला चिहुरवल्ली तीसे । रेहइ वम्महरणो विजयपसत्थिव्व आलिहिया ॥ २ ॥

सरलेहिं लोयणेहिं तीए कयोलेहिं चंदकंतेहिं । अहरेण पउमराणेण रयणट्टाणं व सहइ मुहं ॥ ३ ॥

संखो इव रेहावल्यलंछियं कंठकंदलं विमलं । संठियविचित्तमणिलट्ठुगंठियं सोहए तीए ॥ ४ ॥

कंदप्पनरिंदनिवासविच्चमे तीए थोरथणवट्ठे । हारो पडिहारतुलं आलंवइ लंघमाणो सो ॥ ५ ॥

रंभाभिरामपीवरमूरुजुयं कणयकमलकंतिळं । थंभजुयलं व छज्जइ विसयमहासोक्खभवणस्स ॥ ६ ॥

बहलालत्तयरसपिंजरं व मणिकुट्टिममि संकतं । कमलोवहारसोहं चलणजुयं दावए तीसे ॥ ७ ॥

एवंविहा य वरजोगत्तिकाज्ज सा सव्वालंकारविभूसियसरीरा भद्दाए पेसिया पिडणो पायवंदणत्थं, गया चेडीचक्कवालपरिवुडा निवडिया नरिंदचलणेषु पेच्छिया संभमभरियच्छिणा सव्वायरं रण्णा पणयालावपुरस्सरं च आरोविज्जण तमुच्छंगे रूवेण जोव्वणगुणेण थ बाढमक्खित्तचित्तो विचिंतिउमाढत्तो—अहो सुरसुंदरीरूवाइसयपराभव-करं रूवं अहो सव्वावयवसुंदरं लायणं अहो सरयचंदंचदिमानिम्मलं कंतिपडलं, अहो वेणुवीणाविजङ्गी वाणी, सव्वहा भुयणच्छेरयभूथमिमीए किंपि विलसियं, नूणं पुद्दं एरिसं न निम्मियं खत्तियकुले कन्नागारयणं परमेसरेण

विहिणा, तेणं चिय मयरद्धएण परिग्गहिया रई तिसूलपाणिणाऽवि परिणीया पव्वयसुथा महुमहेणवि मंइरुम्महिय-
 खीरजलहिसमुद्धिया जलमाणसी पणइणी कया पुरंदरेणावि पुलोममुणिकन्नया उव्वूढत्ति, अहो अहं नगो सज्झं
 जस्स अंतउरे रयणायरेव्व एरिसं कण्णगारयणं समुप्पण्णंति ।

अह कोमलुच्छुचावोऽवि वम्महो पंचकुसुम विसिहोऽवि । वज्झयणुलोहनिट्टुरसहस्सवाणो व विष्कुरिओ ॥ १ ॥
 जत्तो जत्तो सा ववलयरुहले लोयणे परिक्खवइ । तत्तो तत्तो सोऽविहु निसियं सरधोरणिं सुगइ ॥ २ ॥

अत्थाणजणोऽविहु वम्महेण संताविओ हु पासेण । रिउपडिसत्तू राया तदेगच्चित्तो विसेसेण ॥ ३ ॥

एवं च मयणसरण्णहारविट्ठुरियमाणसो सो नरिंदो परिमाविउं पवत्तो—अहो एसा इयाणिं वरजोग्गा वट्टइ
 ता किं कायव्वं ? किमेरिसरूवाइसया कण्णगा परस्स दाऊण सगिहाओ निस्सारिज्जइ ?, सव्वहा न जुत्त-
 मेयं, जइविहु जणो अविसेसेण कण्णगाणं अण्णप्पयाणेण पउत्तो तहावि गट्टुरिकापवाहो एसो नालंवनट्ठाणं सुट्ठु-
 द्दीणंति कयनिच्छओ अणवेक्खिउं गरुयमाचंदकालियं लोयाववायं अविमंसिऊण चिरप्परूढं नायमग्गमनिग्गहि-
 ऊण मयणवेयणं अप्पणा चेव तं परिणेतकामो कहकहवि आगारसंवरं काऊण धूयमंतउरं विसेजेइ, वीथदिधे
 वाहराविऊण सेट्ठिसत्थवाहपमुहं नयरमहाजणं सामंतसेणावहवग्गं च सुहासणत्थं सवहुमाणं गणइ—भो भो
 पहाणलोया ! तुम्हे कुलव्वत्थाणं जुत्ताजुत्ताणं नयाणं संसयत्थाणं लोयधामववहाराणं पस्सगा निच्छप्रकारगा य,

अम्हाणंपि सव्यथेसु पुरावि पुच्छणिज्जा, ता संपयं सोहेहजमेथ विसण् रयणमुपज्जइ तस्स को रामी ? अविण्णा-
यपरमथेहिं तेहिं भणियं—देव ! किमेत्थ पुच्छणिज्जं ? तुम्हेच्चिय सामिणोत्तियुत्ते तिकमुत्ते ण्यमेव वयणं भणवि-
ज्जण नरवइणा उवट्ठाविया साऽवि य कन्नया, भणिया य ते—अहो धूया एता मम अंतरे रयणभूया पालभूया
अओ तुम्हाणुण्णाओ अहमेयं सयं परिणउं वंछामि, अणइक्कमणिज्जं खु तुम्ह वयणं अट्ठांमि, एवं भणिण् लब्धव-
सवलंतकंधरा अवरोप्परसुहमवलोयमाणा ओहयमणसंकप्पा अपरिभाविथवयणविसहस्राणवित्तीयीडा यया विविभिपट्ठा-
णेसु पुरज्जणपमुदखा, सा कणया अवरवासरे चारिज्जमाणेणऽधि भद्दाण् देवीण् भडिभल्लिअयानेणऽनि दुअभाउत्तरणि-
उवहसिज्जमाणेणवि नम्मसचिवेहिं सोवालंभं चज्जिज्जमाणेणवि गंतीहिं दुहविज्जणमणुसागिज्जमाणेणवि वत्तामुत्तं च-
णुसरियाविज्जेण करेणुवइ(ण)व्व अणिचारियपसरेण गंधववियाहेण परिणीया सा परिदेव, उनिव भयसत्तिगीण, तीसे
सद्धिं विसयसुहमणुमुंजइत्ति । सा य भद्दा देवी दट्ठूण तारिसं जणनिंदणिज्जं उयथलोयवियद्धं निम्वउववसेसु ज्जाह-
सणिज्जं रण्णो वइयरं संजायगाढचित्तसंतावा अयलेण पुत्तेण सयं महया रिद्धियिथेरं पट्ठाणज्जमसेवा मया इनिव-
णावहं, तत्थ य पसत्थभूमिभागे निवेशिया नयरी निम्मियाइं धवलहराइं उवियाइं सुरागाराइं कारावियाइं पाया-
रगोउराइंति, सा य पुरी मंहतीए ईसरीए कारियति माहेसरित्ति गुणनिष्फणननेण देसंतरेसु पत्तिद्धिं मया ।
तत्थ य अयलो कुमारो भद्दादेविं मोत्तूण पिउपासमागओ, एवं च काले वचंतंमि लोगेणं तस्स राइणो सञ्ज्या-

क्रामित्तेणे पयावइत्ति नासं कयं । अण्णया य सो विस्समूहं महासुक्खेवल्लोयाओ चविऊण उववणो गिगावइत्ति,
 देवीए गब्भंमि पुत्तत्ताए, तओ सा रयणंमि सुहपपुत्ता सत्त महासुमिणे पासित्ता णं पडिबुद्धा, पहिद्वहियया य गया
 रणो सगासे, निवेइओ सुविणवुत्ततो, रत्ता भणियं-देवि ! निच्छियं भुवणविक्खायजसो सयलसामंतमउलिंउल-
 मसिणियकमकमलो पयावपडिहयपडिवक्खो कुलकेऊ तुह पुत्तो भविस्सइ । जेण-

एवंविह सुमिणाइं देवि ! पुण्णेहिं कहवि दीसंति । हरिसभरनिब्भरंगी अभिनंदसु ता तुममिमाइं ॥ १ ॥

इइ जंपिऊण रण्णा वाहरिया सुमिणपाढगा कुसला । ते य नरिंदाएसं तहत्ति पडिवज्जिउं सहसा ॥ २ ॥

ण्हाया कयवलिकम्मा परिहिइयसुविमुद्धसुंदरदुगुहा । सिरनिहिइयक्खयकुसुमा निडालकयरोयणातिलया ॥ ३ ॥

करकलियनिमित्तागमपोत्थयसत्था समत्थनयनिउणा । पजायाणयविजा समागया झत्ति निवभवणं ॥ ४ ॥

सीहासणेसु सब्वायेरेण उववेसिया नरिंदेणं । फलफुल्लदाणपुव्वं सुमिणत्थं पुच्छिया ताहे ॥ ५ ॥

तेहि य निमित्तसत्थाइं वित्थरेणं सबुद्धिविहवेणं । परिचित्तिऊण तह निच्छयं च काऊण अण्णोडण्णं ॥ ६ ॥

भणिओ पयावइत्तिवो जहेरिसाणं विसिट्ठसुमिणाणं । अणुभावेणं नूणं पयडो नीसेसमुवणंमि ॥ ७ ॥

तिक्खंडभरहसामी अप्पडिहयसासणो य तुह पुत्तो । होही अप्पडिमवलो इह पढमो वायुदेवोत्ति ॥ ८ ॥

आयन्निऊण एवं पहिद्वचित्तेण ते नरिंदेण । दाऊण धणं विविहं विसज्जिया नियनियगिहेसु ॥ ९ ॥

सा य भिगावई देवी पुणोऽवि नरदिण कहिए सुमिणपाढगसिद्धे सुमिणद्धे पहिद्धहियया सुहंसुहेणं गळभमुवहइ,
अणण्या य पडिपुण्णांमि समए पसत्थंमि वासरे सुकुमारयाडलपाणिपल्लव तमालदलसालमरीरं सयलपुसिसणवरल-
कखणचिराइयं तिपिट्ठकरंडगांडवराभिरामं दारयं पसूया । विण्णायमुयजम्भो पहिद्धो पयावई, कराविओ सुरमं-
दिरसु महसवो, तथा—

दिजंतऽनिचारियकणयदाननंदिजमाणमग्गणयं । पम्मुक्कपुप्फपुजोवयाररेहंतरायपहं ॥ १ ॥
मंगलकलयलमुहुलुम्मिलंतमहिलाजणाभिरमणिज्जं । पारद्धसंतिकम्मं जायं नयरं च तं सट्ठया ॥ २ ॥
अवरवासरे य तस्स दारयस्स परमविभूइए तिपिट्ठकरंडगंदसननिञ्जियाभिहाणीगण पद्धिं तिचिदुत्ति
नामं कुलथेरीजणेणं, अह सो तिचिदू पंचघाईपरिविखत्तो महारायणं व हत्थाओ हत्थं संचरसो अणेगचेडचाहुकर-
परिगओ कुमारभावमणुप्पत्तो,

ताहे पिउणा जोगोत्ति जाणिउं सोहणे तिहिमुत्ते । उवणीओ सो विहिणा लेहायरियस्स पढणत्थं ॥ १ ॥
सयलो कलाकलावो अकालखेवेण गुरुसयासाओ । नियबुद्धिपरिसेणं सविसेसो तेण गहिओत्ति ॥ २ ॥
अह सुणिथसव्वनायव्ववित्थरो गुरुपए पणमिऊण । तदणुणाओ कुमरो गओ सगेहंमि परितुट्ठो ॥ ३ ॥
अयलेण भाउणा सह खणमविय विओगमसहमाणो सो । पवरुज्जाणाईसुं निस्संको कीलइ जहिच्छं ॥ ४ ॥

कोमलकायस्सवि तस्स भुयवलं पेक्खिऊण जायभया । पमिलाणवयणकमला सहस्समल्लवि कंयंति ॥ ५ ॥
 लीलाएविहु पयंपकयाइं सो जत्थ जत्थ भेल्लइ । वज्जाहयव्व धरणी तहिं तहिं थरहरइ वाढं ॥ ६ ॥
 परिहासेणवि जे तेण पाडिया कहवि सुट्ठिघाएणं । ते नूनं जइ परगेहिणीए पुत्तेहिं जीवंति ॥ ७ ॥
 खिवइ य जत्तो दिट्ठि तत्तो चिय सायरं विणयपणया । अहमहमिगाए धावंति किंकरा सुक्कवाचारा ॥ ८ ॥
 जस्साएसं वियरइ थेवंपि अणायरेणऽवि कुमारो । सो लद्धनिहाणो इव मन्नइ कयकिचमप्याणं ॥ ९ ॥
 सो भणइ जत्थ ठाणे तत्थ ससप्पंति सेसवाचारा । तस्सेव परक्कमवणणेण लोयस्स पुणरुत्तं ॥ १० ॥
 इय पुव्वभवज्जियसुकयकम्मवसवट्टमाणसोक्खस्स । अयलसमेयस्स सरंति वासरा अह तिविट्ठुस्स ॥ ११ ॥
 इओ य-रायणिहे नयरे भारहद्धवमुंधराहिवमणिमउडकोडिलीढपायवीढो पयलकालमायंडमंडलुहुामरपयावकंतदि-
 सिचक्को निधिसंकभुयदंडमंडवनिलीणरायलच्छिविलाससुंदरो समरसीमनिहयमत्तमायंगकुंभत्थलगलियगुत्ताहलविरइ-
 यचउक्को महागोपुरपरिहसन्निहवाहुवद्धवीरवलओ निसियधारुक्कडचक्कनिकंतियवइरिग्गीवो आमग्गीवो नाय राया
 पडिवासुदेवो पवरं पंचप्पयारमणिज्जं विसयसिरिमणुहवइ । एवं च बोलंतंभि काले सो विसाहंंदी कुमारो भिरं
 रज्जमणुपालिऊण मओ समाणो नरयतिरिएसु भमिऊण उववण्णो एगंभि गिरिकंदरे सिंहत्तणेणं, पसुकवालधवो
 य इओ तओ हिंडंतो उवहवेइ तस्स रण्णो पहाणसालिलेत्तनिवासिकरिसगज्जे, ते य तेण उवइविज्जमाणा आ-

सुतत्र चित्तलिहियच्च लेवघडियच्च रज्जनद्धव्व । महरामयनिण्णंदिथव्व विमुक्कऽअवावारा ॥ ५ ॥

अणमिसनयणनिवेसा जणपरिसा तक्खणेण सा जाया । अइतुट्ठ तिविट्ठुकुमार रायलोएण सह झत्ति ॥ ६ ॥

एत्थंतरे खीरोयनिम्महणज्जेतुट्ठियविसुमारोव कंप्पियविबुहसत्थो कयंतोव्व अणिवारियागमणो पविट्ठो सो चंड-
वेगाहिहाणो दूओ, तं च दट्ठण ससंभममुट्ठिया, सामिदूओत्ति कलिऊण कया महती पडिवत्ती, पुट्ठो य आसग्गीव-
नरिंदस्स सरारारोगवत्तं, सिरसा पडिच्छियं सासणं, संवरियपेच्छणगवावारो नियनियगेहेसु गओ जणो, रंगमंग-
करणेण य बाढं अमरिसिओ तिविट्ठुकुमारो, पुच्छिओ अणेण एगो पुरिसो-अरे ! को एस ? किं वा एयागमणेण अब्भु-
ट्ठिओ ताओ ? कहं वा पविसमाणो दुवारेच्चिय न रुद्धो पडिहारेण ? तेण भणियं-कुमार ! एसो खु रायाहिरायस्स पहा-
णदूओ, अओ सामिच्च दट्ठवोत्ति राइणा अब्भुट्ठिओ, अओच्चिय पडिहारेणवि न खलिओ, एयाणुवित्तीए चेव सुहेणेत्थ
निवसिज्जइ, पभुचिच्चाणुवत्तित्तणं हि सेवणधम्मो, कुमारेण भणियं-जाणियच्चं कोऽवि कस्सवि पभू सेवगो वा, होउ
ताव किं एएण ? अनिवडियपुरिसायाणं विफलो अनुक्करिसो निरत्थओ तुंडमंडवो अणुचिओ मुयवलावलो अजुत्तो
नेवत्थफडाडोवो, ता एयं एत्थ पत्तकालं-अरे ! साहेजसु तुमं मम जया एसो सनयराभिमुहं वच्चेज्ज, जेण करेमि
एयस्स पाहुन्नयं, जं कुमारो आणावेइत्तिभणिऊण अब्भुवगयं पुरिसेण, सो य दूओ गुणदोसे राइणा समं भासिऊण
साहियनरिंदपओयणो परिगहियविविहपाहुडो कयसक्कारसम्माणो चलिओ सनयराभिमुहं, अंतरा य गच्छतो

विन्नायगमणवइयेणं पडिरुद्धो तिविहुकुमारेण अयलपरिगएणं, भणिओ य—

रे इयाहम ! अइदुट्ठ धिट्ठ पाविट्ठ कत्थ वच्चिहिसि । पेच्छणयरंगभंगं तइया काउं मम समक्खं ? ॥ १ ॥
निब्भग्ग ! गरुयराउलसेवणओऽविहु पभूयकोलेणं । पत्थावापत्थावं न मुणसि किं सिक्खिओ तंसि ? ॥ २ ॥
नियज्जण ! वयणविन्नासपसुहगुणवित्थरेण उवहससि । सक्कगुरुंणि विदूकुह अन्नेव वियट्ठिमा तुज्झ ? ॥ ३ ॥
ता पाव ! पावसु फलं सदुक्खेद्वियतरुस्स दुविसहं । सुमरेसु य इट्ठदेवं माऽक्यधम्मो धुवं मरसु ॥ ४ ॥
इय भणिज्जण तिविदू निट्ठसुट्ठिप्पहारमुगिरिउं । जा हणइ नेव दूयं अयलेणं जंणियं ताव ॥ ५ ॥
भो भो कुमार ! विरमसु गोहच्चंपिव विमुंच एयवहं । दूया रंडा भंडा कयावराहावि अहणणिज्जा ॥ ६ ॥
तोहे भणिया पुरिसा ! रे रे सिग्गं इमस्स पावस्स । मोत्तूण जीवियव्वं सेसं अवहरह वत्थाइं ॥ ७ ॥
पुरिसेहिं तओ कुमारस्स वयणओ लट्ठिसुट्ठिपभिइहिं । गहिज्जण तं समत्थं धणाइयं अवहंडं तस्स ॥ ८ ॥
भयभरविट्ठरत्तणओ नियंसियं वत्थमविय से गलियं । भूमीए निवडणेणं धूलीए धूसरियमंगं ॥ ९ ॥
अह खमणगोव सुणिउव्व पंडरंगोव्व तक्खणं जाओ । सो चंडवेगदूओ नियजीवियरक्खणट्ठाए ॥ १० ॥
सेसो पुण परिवारो जीवियकंखी य पहरणे मोत्तुं । सयलदिसासु पलाणो दंसणमेत्तेऽवि कुमारस्स ॥ ११ ॥
एवं च लुंचविलुंचियं काउं दूयं वलिया कुमारा, जाणिया य वत्ता पयावइणा, तओ भीउविग्गो चित्तिउमाट्ठो—

अहो असोहणं कथं कुमारोहिं, एयंमि पडिकूलिए परमत्थेण आसगीवो पडिकूलिओ, अजहावलमारमो मूलं विणा-
सस्स, न य कुमारवरद्धे मम निदोसत्तणं वयणसएणवि कोऽवि पडिवज्जिही, पडिवज्जिएवि पयडो खलु एस वव-
हारो जं भिच्चवराहे सामिणो दंडो, ता विसममावडियं, अहवा अलं चितिएण, उवाओ चेव उवेयस्स साहगोत्ति-
निच्छिऊण आणाविओ दूओ, सविसेसं कथा पडिवत्ती, समणियाइं महामोछाइं पाहुडाइं, कओ य चउगुणो
दाणक्खेवो, भणिओ य एसो-अहो महायस! बालभावमुलभनिविदेयत्तणेण जोवणवसविसंदुलचिट्ठियत्तणेण राय-
कुलजम्मसहयदुल्लियत्तणेण य जइवि बाढं अवरद्धं कुमारोहिं तुम्ह तहायि सब्बहा न कायवो चित्तसंतावो, न वो-
दवो अमरिसो, मम निव्विसेसोऽसि तुमं, डिंभदुन्विलसियाणि न करिंति चित्तपीडं कहवि जणगत्थणीयस्स, अहं
जणगो चेव एएसिं, उत्तरोत्तरगुणपगरिसारोहणं पुण तुमए इमेसिं कायव्वं, ता कुणसु पसायं परिहरसु अवमाणं,
दूएण भणियं—महाराय! किमेवमाउलो भवसि?, किं कोऽवि नियडिंभेसु दुव्विणयमासंकेइ?, पेमपरवसहियएसु
वा एगमवि अवराहं न मरिसेति?, राइणा भणियं—एवमेव, जाणामि तुज्झ चित्तविचिं लक्खेमि पडिवन्नभरधवल-
त्तणं, केवलं तहा कायव्वं जहा देवो कुमारवइयरं न निसामेइ, इइ भणिए पडिवज्जिऊणं चलिओ चंडवेगो, कमेण
गच्छंतो यत्तो आसग्गीवनरिंदसमीव,

अह पुवागयनरकहियकुमारवइयरनिसामणा रुसिओ । आवद्धभिउडिभीमो रत्तच्छो पेच्छिओ राया ॥ १ ॥

नायं च जहा पुद्वागएहिं सिद्धो स वइयरो रत्नो । ताहे कयप्पणामो उवविद्धो सो नियट्ठाने ॥ २ ॥
 पुट्ठो य तओ रत्ना कहिओ नीसेसवइयरो तेण । जह कुमरोहिं पइओ अयाणमाणेहि निरवेक्खं ॥ ३ ॥
 जइविहु देवउवरद्धं बालत्तणओ सुएहिं मम किंपि । तइवि पयावइनिवइ अहिगं सोगं समुव्वहइ ॥ ४ ॥
 चूडामणिव्व सीसेण सासणं तुम्ह धरइ विणयनओ । निभिच्च(ब्भंत)भिच्चभावं सविसेसं दंसइ सयावि ॥ ५ ॥
 न सुणिज्जइ जुवईणं मंजीरवो कयावि तस्स गिहे । मागहलोएणं तुह गुणनिवहं संथुणंतेण ॥ ६ ॥
 किं बहुणा ? महिचइणो मए सुदिट्ठा कया समग्गावि । किं तु नियसामिभत्तीए तुलइ नो कोऽवितेण समं ॥ ७ ॥

अह आसग्गीवनरिंदेण सुमरियं नेमिच्चिगवयणं परिकंपिओ मणेणं, चितियं च-अहो निव्वड्डियं ताव एगं नेमिच्चि-
 गवयणं, बीयंपि जइ इत्थमेव हवेज्ज ता निच्छियं अकुसलंति परिभाविऊण आहूओ अवरो दूओ, भणिओ य जहा-
 गच्छसु रे पयावइस्स सगासे, भणसु य तं मम वयणेण-जेण सालिच्छेत्तेसु करिजमाणेसु सबलवाहनो गंतूण केसरि
 परिकखलहत्ति, जं देवो आणवेइत्ति भणिऊण निग्गओ दूओ, कमेण पत्तो पयावइस्स भवणं, सक्कारिओ रण्णा, पुट्ठो
 य आगमणपयोयणं, साहियं च तेण सीहरक्खणरूवं नरिंदसासणं, अब्भुवगयं च पयावइणा, सट्ठाने य पेसिऊण
 दयं एवं उवालद्धा कुमार—

पुत्ता ! अकाल एव हि तुमहेहिं पवोहिओ धुवं मच्चू । आसग्गीवनरिंदस्स धरिसिओ जमिह सो दूओ ॥ १ ॥

तेणेव अंघडे चिय दारुणरूपा इमा ममावडिया । आणा कयंतविब्भमपंचाणारक्खणाणुगया ॥ २ ॥

कुमारेहिं भणियं-ताय ! कहं मच्चू पवोहिओ ? , रत्ना भणियं-पुत्ता ! सुणेह, आसग्गीवनरिंदस्स सालिखत्तस्स केसरी कारिसगज्जणं विद्दवइ, सो य पइवरिसं वारोचारेण जहक्कमं सव्वनरिंदेहिं रक्खिज्जइ, संपयं पुण धारिसियदूकुविण्ण आसग्गीवेण अपत्थावेच्चिय अहं समाइट्ठोऽहि, ता एयं मच्चुए पडिबोहणंति, तेसिं कहिऊण समाढत्तं पयाणयं, एत्थं-तरे विन्नत्तं कुमारेहिं-ताय ! अम्हे वच्चाओ, रत्ना भणियं-पुत्तया ! वालया तुम्हे, न जाणह अज्जवि कज्जाकज्जं, ता विर-मह इमाओ अज्झवसायाओ, अहं सयमेव वच्चिस्सामि, तेहिं भणियं-मवहा मोक्कलह, गंतवमवस्समम्हेहिं, महंतमेयं कोऊहलं, केरिसो सो केसरिन्ति ? , राइणा भणियं-अरे पुत्ता ! हरिणं कयं डलनिक्कलं के कुले समुत्पत्ती कुवेरसमइरोगो धण-संचओ अविगलं आणाईसरियं कलाकलावंसि विमलंमि विमलं कुसलत्तणं समत्थमुत्थत्थेसु पवीणआ नीसेसेसु पहरणेसु परमो परिस्समो य नीरूवमं वीरियं अप्पडिमा रूवलच्छी, एएसिमेगयरं पि उम्मगपवत्तणसमत्थं, किं पुण एगत्य समवाओ ? , एयाणि य सच्चाणि वि तुम्ह संति, ता एहिं हीरमाणाणं तुम्हाणं को पडिक्खलणकारी ? , जम्हा बद्धमच्छरा वेरिणो उस्सिस्सला खला अविभावणिज्जागमाओ आवयाओ अच्चंतं पमत्तचित्ता य तुम्हे, न जाणिज्जइ केरिसो विवागो हवइ ? , अओ सुयह गाढगहंति, तेहिं भणियं-ताय ! हवउ किं पि, निच्छयं गंतवमम्हेहिं, तओ निवारिज्जमाणावि चलिथा कुमारा पहाणराइणा समेया कइवयकारितुरग्रहपरियणपरियरिया, पत्ता य तेसु सालिच्छे-

तेसु जत्थ सो केसरी निवसइ, पुट्टा य तेहिं करिसगा-अरे किह अन्ने राइणो पुंघिं सीहं रक्खयाइया ? , तेहिं भणियं-
 कुमार ! पयंडगुडाडोवभासुरेहिं पवरकुंजरेहिं पवणाइरेगेवेगसुंदरंगेहिं जच्चतुरंगेहिं उंडुङ्गडीवसेल्लभल्लिनारायकुंतपसु-
 हपहरणहत्थेहिं सुहडसत्थेहिं विरइऊण तिउणपायारपरिक्खेवं अंचंतमप्पमत्तचित्ता मरणमहाभयवेवंतसव्वसरीरा केस-
 रिगुहामुहनिहियानिमेसनयणा रक्खंसु नराहिवा, तहा रक्खमाणानवि पइक्खणं सीहनायवससमुच्छलंतपडिसदायन्न-
 णेण अवगणियतिकखंकुसपहारा करडितडपणट्ठमयजला विहडंति करिघडा गाढखलितखलिज्जमाणाइं विदिसो
 दिसिं फट्ठंति तुरयघट्टाइं विमुक्कपोरिसाभिमाणानि इट्ठदेवयमणुसरमाणानि सव्वओ पलायंति पायक्काणि, कुमारेण
 भणियं—अहो महापरक्कमो अहो अनन्नविप्फुरियं वीरियं अहो ओहामियसयलसुहडदप्पमाहणं अहो भुवणच्छ-
 रियं चरियं तस्स केसरिणो जं तिरियमेत्तस्सवि एवं परिसंकिज्जइ, अरे केत्तियं पुण कालं एवंविहपरिकिलेसेण एस
 पडिक्खलिज्जइ ?, तेहिं भणियं-कुमार ! जाव सयलं पि करिसणं ण सगिहे पविसइ, कुमारेण भणियं—ओ करिसगा !
 को वासारत्तडुव्विसहसीयवायाभिहओ नियसुहिसयणपमुहपहाणलोयरहिओ चिक्खल्लोलंमि मेइणितले मेहमालाउले
 दिसिबलए अणवरयं निवडंतीसु दिसिबहूत्तामणिहारविब्भमासु सुणीणपि कयमयणवियारासु तंडवियसिंहडिभंड-
 लीसु विरहिणीहियनिहिंतंगारासु वारिधारासु एत्तियं कालं पडिवालेहि ?, ता दंसेह तं पएसं जत्थ सो निवसइत्ति,
 जं कुमारो आणावेइत्ति भणिऊण दूरट्टिइहिं चेव कहिया सा केसरिगुहा, तओ पुणो पुच्छिया कुमारेण अरे ! केत्तिओ

तस्स परिवारो?, तेहिं भणियं-कुमार! नियसरीरेमत्तो, कुमारेण भणियं—जइ एवं ता

निरत्थयं धी धी वित्थरंति किं पत्थिवा विगयलजा । नियभुयबलवलेवं गिज्जतं मागहजणेण? ॥ १ ॥

बहुसुहड्कोडिसंबुडहरिकरिसमदलियमहिवट्ठा । असहायं केसरिणं जमिमे न सरंति भयविहुरा ॥ २ ॥

एसो जयंमि धन्नो जणणी एयस्स चव पुत्तमई । जस्स गलगज्जिणवि गरुयावि सुयंति नियजीयं ॥ ३ ॥

जस्सऽनिवारियपसरं पोरिसमेवंविहं परिण्फुरइ । एगागिणोऽवि स कहं न लहइ पंचाणणपसिद्धिं? ॥ ४ ॥

इय सुचिरं तं पसंसिज्जण गरुयकोऊहलाज्जिमाणमाणसो नियत्तियसेसपरियरो रहवरारूढो चलिओ गुहा-
भिमुहं कुमारो, कमेण य स पत्तो गुहादेसं, एत्थत्तरे दंसणकोउगेण मिलिओ बहुलोगो, ठिओ उभयपाससु,
कओ महंतो कोलाहलो, अह कलयलायन्नणजायनिहाविगमो जंभाविदारियरउद्वयणो परिमुत्तकुरगरुहिरपाडु-
गारदाढाकडप्पेण संझारुणससिकलं व विडंबमाणो पडिधुणियकडारकेसरो सदुब्भडकंधरो उच्चिरिमहल्लंगूलवेछि-
ताडियधरणिताडाराववहिरियदियंतरो पढमपाउसमेहोव गजंतो उट्ठिओ केसरी, लीलाए मंदं मंदं कुमारदुत्तमव-
लेइउं पवत्तो य, तिविद्धूवि निरुवयंतो फलभरेण य सस्सं निमुणंतो केयारक्खिगाजणारासए कौंतो तस्सालावं
पेच्छंतो काणणरस्मयं ताव गओ जाव निवडिओ चक्खुगोयरे स सारंगाहिओ, तं च दद्वूण चित्तियं कुमारेण—अहो
एस महाणुभावो महीए चरणेहिं परिसक्कइ, अहं पुण पवरतुरयसंगगाहिं विचित्तपहरणपडिहत्थं रणज्झणिरकिंकिणी-

जालसंपरिखितं संदणं अधिरूढो, ता विसरिसं जुज्झं, न जुत्तमेयं उत्तमाणंति भावितो कुवियकयंतजीहाकरालं
 अयसिकुसुमपपासं करवालं गहिऊण दाहिणकरेण वामेण य पडिपुण्णचंदमंडलविब्भमं फुरंतफारतारगगिरायं फूरणं
 च ओयरिऊण रहाओ ठिओ भूमीए, ताहे पुणोऽवि चित्तेइ-एस वराओ वयणंतरनिगूढदाढाकरपेरंतकुठकुडिलनह-
 मेत्ताउहो अहं तु तिवखगखगफलहत्यो, एयमवि न जुत्तिजुत्तंति विभाविऊण खगं फलहगं च परिचयइ, एत्थं-
 तरंमि दट्ठूण तारिसं वइससं तिविट्ठुस्स उप्पन्नगाढकोवो सीहो चित्तेउमाढत्तो—

कह मत्तमहामायंगतुरयरहजोहवूहरयेणं । रक्खिज्जंतोऽहमहो महायेणं महीवइहिं ॥ १ ॥

कह मज्झ दंसणपहे कीणासस्स व न कोइ निवडंतो । सुट्ठुवि पगिट्ठबलदप्पिओऽवि रणकम्मरसिओऽवि ? ॥ २ ॥

कह एण्ह दुद्धमुहो तत्थवि गवणीयकोमलसरीरो । तत्थविय तुरगकरिवरपक्कलपाइक्कपम्मुको ? ॥ ३ ॥

तत्थवि य अवन्नाए ओथरिऊण रहाओ पवराओ । अड्ढवियडुं लीलाए भासमाणो महिंमि ठिओ ॥ ४ ॥

तत्थेव य समुयबलावेलेवमुक्कप्पहरणाडोवो । मसंगंव मं गणंतो एसो पविसइ मम गुहाए ॥ ५ ॥

किं वा जीयंतहिं नो दीसइ किं सुणिज्जए नेव । जं एरिसावि दावेंति संपयं मज्झ अवमाणं ? ॥ ६ ॥

जइवि हुं कुजरसिरदारणोचिया मज्झ कुडिलनहविसिहा । तहविहु इमस्स दंसेमि गाढदुब्बियगसाहिफलं ॥ ७ ॥

इय चित्तिऊण गलगज्जियरेण फोडितोव वंमंडमंडोयरं, पुच्छच्छडाच्छोडणेण दलितोव मेइणीतलं, पिडिय-

वयणदाढामऊहनिवहेण भरतोव्व गयणंतरालं रत्तनयणपहासरेण अयंढनिवडंतविज्जुदंहुडामरं व करंतो दिसिचक्क-
वालं वेगागमणवसविंसंदुल्लुलंतकेसरभारेण अंतरे अमायंतं व कोवनिवहं उगिरंतो सज्जियदीहरकमुल्लासवसवि-
सेसखाभोयरत्तणेण अंतरा तुट्टिऊणं व अमकाएण गसिउकामो एगहेलाए भुवणजणकवलणकए कयंतुव्व भासमाणो
झडत्ति पत्तो तिविहुकुमारस्स सुणालकोमलकरकमलगोथरं, तथो तिविहुणा एगेण करेण हेट्टिलोट्टुपुडं अवरेणुत्तरोट्टं
अणायरेण गहिऊण जिणणपडं व परिसडियपंडुत्तं व भुज्जतरुत्तयं व दुहा तडयडत्ति फालिऊण परिमुक्कोत्ति, एत्थं-
तरे उक्किट्टसीहनओ जयजयरवो य कओ लोएणं, अन्नं च—

गंधव्वजक्खरक्खसविज्जाहरकिन्नरोहिं गयणंमि । विक्कमंदंसणसंजायहरिसपण्णुल्लनयणेहिं ॥ १ ॥

पहयाइं पडहकाहलमुयंगंदुहिपमोक्खतूराइं । कओ य जयजयरवो अहो सुजुज्झंति भणिऊण ॥ २ ॥

तियसंगणाहिं वियसियकुवल्लयदलदामदीहरच्छीहिं । मुक्का य कुमुमवुट्ठी दसद्ववन्ना भसलमुहला ॥ ३ ॥

मणिमडडकणयंकुंडलकडिसुत्तयतुडियहारपमुहाइं । पवराभरणाइं लहुं सुरेहिं दिन्नाइं कुमरस्स ॥ ४ ॥

तथा—गिज्जंतुद्दामगुण विविहविलासुल्लसंतगोवज्जणं । नच्चंतरुणिसत्थं जायं रणंपि सुपसत्थं ॥ ५ ॥

सो य सीहो तथा दुहाकओऽवि गख्याभिमाणेण परव्वससरीरो फुरफुरंतो विचिंतैइ—एवं नाम अहं निराउहेण
एगागिणा कुमारमेत्तेण अजुज्झेणं लीलाए विणिहओ, अहो मम काउरिसत्तणं अहो असामत्यं अहो निस्सारसरी-

रत्तणं अहो दइवविपरंमुहया, सन्वहा निरत्थयमुवूढो सारंगरायसहो एत्तियं कालं, दुहु दुहु एरिसजीविणंति, एवं च तस्स फुरुफुरायमाणस्स सुणियतदभिप्पाएण कुमारसारहिणा भणियं महुरसरेण—

भो भो लीलानिदलियमत्तमायंगुंगवसमूह ! । सारंगराय ! निप्पडिमसत्तिवित्तासियविपक्ख ! ॥ १ ॥

अविलंघियसज्जियकमनियबलपरिभूयनरवइसहस्स ! । सप्पुरिस ! कीस एवं निरत्थयं अमरिसं वहसि ? ॥ २ ॥

मा सुणसु जहा एएण बालरूवेण विणिहओऽहमिह । जं एसो नियकुलनहयलेक्कचंदो जणाणंदो ॥ ३ ॥

वररायलक्खणधरो समग्गवीरगणी गुणावासो । निट्ठरभुयंदंडवलो तिविहुनामो वरकुमारो ॥ ४ ॥

भावी भरहद्धवसुंधराएं सामित्तणेण परिकहिओ । पढमं चिय सुमिणयपाढएहिं किर वासुदेवोत्ति ॥ ५ ॥

तं भिगसीहो भइय ! एसो पुण नरसमूहसीहोत्ति । सीहे सीहेण हए का अपसिद्धी ? किमवमाणं ? ॥ ६ ॥

अह सो केसरी इमाणि सारहिवयणाणि महुमिव अमयंपिव सवणपुडएहिं सम्मं पाऊण उवसंतचित्तो मरिऊण नरगे नेरइओ उववन्नो । सो य किर सारही एस काले भगवओ महावीरस्स पत्तित्थयरत्तस्स पढमो गणहरो गोयमनामो भविस्सइ । तिविहुकुमारोऽवि तं सीहचम्मं गहाय पट्टिओ सनयराभिमुहं, गच्छंतेण य भणिया करि-
सगा, जहा-रे इमं केसरिचम्मं गेणिहऊण समप्येज्जह घोडयगीवराइणो, भणेज्जह य तं जहा-वीसत्थो निब्भओ भुंजेसु सालिभोयणं, जायं संपइ अणाबाहंति । पडिवन्नं च करिसगेहिं, तिविहूवि गओ सनयरंति, पयावइ पण-

मिऊण कहिओ सथलवुत्ततो, जाओ पुरे पमोओ । ते य करिसगा गया आसगीवसयासे, निवेइओ पयावइसुय-
विणासियसीहवइयरो, एवमायन्निऊण य खुमिओ मणंमि राया, चित्तिउमाढत्तो-अहो पडिपुन्नं नेमिन्तिगाइहुं संपइ
संविहाणगहुगं, ता निच्छयं पयावइसुआओ मम भयं, किं पुण कायवं?, निवडइ इयाणिं जमरायस्स दंडो, विहडइ
सुदढगुणरज्जुनिगडियावि रायलच्छी, विलोदंति दाणमाणवसीकयावि सेवणा, विवरंसुहे विहिंमि किं किं न वा
होइ?, केवलं अज्जवि न मोत्तन्वा बुद्धिपुरिसयारा, जेण एएहिं भाविणोऽवि अणत्था उवहणिज्जंति गलियाओवि
संपयाओ पुणरवि पाउब्भवंति, तम्हा न जुत्तमुवेक्खणं, जावज्जवि लहुओ वाही ताव चिगिच्छणिज्जो, नहि लहु-
ओत्ति जलणफुल्लिओ न डहइ केलासगिरिरुयंपि दासरासिं, न वा परिब्भविज्जमाणोवि दिट्ठिविसमुयंगपोयणो न
विणासं पयच्छेज्जा, ता इमं पत्तकालं-ते पयावइसुए उवलोभपुच्चयमिह आणावेऊण विस्संभिऊण य दाणसम्माणा-
ईहिं विणासाविज्जंतित्ति संपहारिऊण य तेसिं आणयणनिमित्तं वाहरिओ दूओ, भणिओ य-अरे पयावइ एवं भणि-
ज्जासि-नुमं हि असमत्थो सेवाए, ता सिग्घं कुमारे पेसेहि जेण तेसिं इयरा सामंतभुत्ती दिज्जइ, जइ पुण न पेसेसि
ता जुज्झसज्जो होज्जाहित्ति, जं सामी आणावेइत्ति पडिवज्जिऊण निगओ नयराओ दूओ, कमेण य पत्तो पोयण-
पुरं, दिट्ठो राया, कयसक्कारो उवविट्ठो आसणे, पुच्छिओ य पयावइणा आगमणकारणं, तेण भणिंयं-राया आस-
गीवो आणवेइ-नुमं जराज्जारियसरीरो अच्चंतं परिणयवओ आएसदाणाणुचिओ य ता पेसेसु नियसुए जेण ते

सहस्रेण पूष्टि, वरकरिगनगरागामदाणेण य करोमि गरुयदेसाहिवे, एवमायन्निऊण चिंतियं पयावइणा—अतु-
लबलो आसगीवो दुराराहणिज्जो असमिक्खित्तिक्खदंडनिवाडणदुविसहो य, अदिट्ठपरभया य मम कुमार, विसे-
सेण तिबिद्वुत्ति विभाविऊण भणिओऽणेण दूओ—भइ! कुमार न मुणंति सेवाविहिं न जाणंति वत्तवविसं न लक्खंति
उचियाणुचियं न खमंति नारिदाएसमणुट्ठिउं, ता अहं सयमेव सबलवाहणो सामिसालं ओलगिस्सामि, तेण भणिअं न
एस आपसो पमुस्स, किं वा तुज्झ इमिणा सुणीणं पि दुक्करेण सेवाधम्मेण ? उवभुंजसु निरंतरमंते उरमज्झगओ जहि-
च्छियं विसयसोक्खं, कुमारोचि तत्थ गया सपहुपसाएण जइ पाउणंति रायलच्छि ता किमिव अक्कलाणं तुह हवे-
ज्जा ?, जओ देवो आसगीवो सीहवइयरनिसामणेण परमंसंतुट्ठहियओ काराविउं इच्छइ महामंडलोवभोगं आरोविउं
समीहइ समुच्चपीलुखंधे काराविउं वंछइ पाणिगहणंति, राइणा विचिंतियं—अहो एस दूओ इंदवारणीक्कलंपि
वाहिं रमणीयं अब्भितरदुहविवागं उभयरूवं भासइ, ता सबहा दुहावहमेयं, सम्मं परिआलोयणिज्जं, अइरहसकध-
कज्जाइं पज्जंतदारुणाइं हवंतीति निच्छिऊण पेसिओ दूओ निययआवासे, ठिओ सयमेगंते, वाहराविया विससत्थनि-
णयकरणत्तिक्खबुद्धिणो मंतिणो, सुहासणासीणा य भणिआ—अहो आसगीवो मम एवमाणवेइ-कुमार सिग्घं
पेसेहिति, ता साहेह किमिह करणिज्जं ?, मंतीहिं भणिअं—देव ! उदामपरक्कमो गूढमंतप्यारो य आसगीवो, तुम्हे

१ परमसंतुष्टः परं असंतुष्टः २ मण्डलं-देशः खनं च ३ पीलुः-स्वर्णं वृक्षश्च ४ पाणिप्रहणं-विवाहः करबन्धश्च

पुण तस्सेव सेवगा अणवरयं आणानिहसवत्तिणो अप्पवला य, ता को तेण सह विरोहो?, ससत्तीए अण्णुरुक्ककोव-
करणं हि निदाणं विणासस्स, राइणा भणियं-जइ एवं ता पेसिजंतु कुमार, गंतीहिं भणियं-देव! असंजायबला
सेवाविहिअणभिन्ना य कहं पेसिजंति?,

अन्नं च-जइविहु अइविसमत्थप्पसाहणे होज्ज कहवि लच्छीवि। तहविहु भुयंगभीमे विलमि न खिवेज्ज कोऽवि करं ॥ १ ॥

अमुणियगम्मागम्मप्यथारमविगलियक्कलुसदोसं च। नरवइचित्तं सलिलं व कुणइ निन्नसु नूण रइं ॥ २ ॥

कप्पासकणिक्काणं व सा णो परक्कजसाहिगा सेवा। उभयत्थविणासणकारिणी उ सेवा नरिंदाणं ॥ ३ ॥

जह भणियविहाणपरमुहाण पुरिसाण सिट्ठिलिच्चाणं। दुस्साहियव्व विज्जा विणासमच्चिरा कुणइ सेवा ॥ ४ ॥

इय देव! नत्थि कुमराण जोगया काऽवि सामिसेवाए। ता संठवेह दूयं सिणेहवग्गूहिं वग्गूहिं ॥ ५ ॥

इइ वुत्ते पयावइणा आहूओ नरिंददूओ, भणिओ य सामवयणेहिं, जहा-भइ! गच्छ तुमं साहेसु आसग्गी-
वस्स, अणुचिया तुम्ह सेवाए कुमार, पयावइ सयमेव ओलग्गिहत्ति, दूएण भणियं-भो पयावइ! किमेवं पित्त-
पलाविओ इव पुणरुत्तं वाहरसि?, कुमारे पेसेसु, जुञ्जसओ वा हवसु, एस देवस्स आएसोत्ति भणिज्जण निग्गओ
दूओ, अंतरे य दुव्वयणायन्नणेण रुट्ठेण तिविट्ठुणा कुमारेण निट्ठुलट्ठुमुट्ठिप्पहारेहिं हणिज्जण कंठे घेत्तूण य अवहारेण
निट्ठाडिओ, पत्तो य केमेण आसग्गीवनरिंदमदिं, निवइओ निस्सेसो पयावइवइयरो, तमायन्निज्जण परिकुविओ

राया, खुभिया य सहा, कहं ?—

अणवरयविणिंतुद्दामसेयविदुब्भंडं सुहं सुहडो । परिमुसह कोऽवि कोलुगमेण अहियं दुरालोयं ॥ १ ॥
नवकुवलयमालाविब्भमंमि निम्मलपहंमि करवाले । निवडइ य भमरिंछोलिसच्छहा कस्सविय दिट्ठी ॥ २ ॥
परपक्खक्खोभकरिं कोवसिहाडंवेरेण भयजणणिं । पच्चक्खं नियसत्तिं व कोऽवि सत्तिं करे धरइ ॥ ३ ॥
कस्सवि निडालवद्धं रेहुक्कडभिउडिभंगदुप्पेच्छं । खयसमयसमुगयरारुभंडलं सहइ गयणं व ॥ ४ ॥
केणावि कुलिसनिट्ठुसुट्ठिपहारेण ताडिया धरणी । अविणीयधारणेणं कयावराहव कंपेइ ॥ ५ ॥
संभावियरणरसनिस्सरंतरोमंचपीवरकरस्स । चिरपरिहियाइं कस्सवि विहडंति य कणयकडयाइं ॥ ६ ॥
कोऽविदु मच्छरसंभारतरिलियं वयणभासणसयणहं । कट्ठेण दसणदट्ठोदुसंपुडेणं खलइ जीहं ॥ ७ ॥
इय जाया कोवभरुल्लसंतदेहाण विविहकिरियाओ । संगमसंगमुक्कंठियाण सुहडाण तवेलं ॥ ८ ॥
एत्थंतरे भणियं आसग्गीवेण—अरे उवेक्खियाणं दुरायाराणं एस चिय गई, को तस्स दोसो?, अन्नहा—
नियधूयापरियणायराहकालेऽवि जइ तमहं निगिण्हंतो ता किं एवं पसरं ल्हंतो, तहा—जो नियधूयं कामेइ
सो नियसामिपि दुहइ किमजुत्तं ? । किं वा एएण?, इयाजिंमि विणिधाएमि एयं महापावकारिणं, ता रे तालेइ
पत्थाणविजयढक्कं, पगुणीकरावेह कुंजरसाहजं, संजत्तावेह तुरयघट्टाइं, जोत्तावेह संदणगणं, वाहरावेह समगं

नरवहवर्गति, वयणाणंतरमेव कथं पगुणं सयलं किंकरजेण, एत्थंतरे गओ राया मज्जनधरं, परमविभू-
ईए कथं मज्जनं, नियसियाइं कासकुमुमंदुराइं अंनराइं, बद्धाइं केसेसु सुरहिकुमुमाइं, कओ सवंगिओ चंदणर-
सेणगरागो, विहिओ पुरोहिण असिवोवसमनिमित्तं सत्तिकम्मविही, खित्ता दोवक्खयासिरे, पइठिओ पुरओ मंगल-
कलसो, दंसियं घयपुणभायणं, लिहिया अट्टमंगलया, उयणीओ य आधोरेण सिंमारियसरीरो सिंदूरपूरारुणकुंभ-
त्यलो गंडयलगलंतमयजलो वइरिदलणदुद्धरो जयकुंजरो, तंमि आरुढो आसग्गीवो, धरियं फारफेणपुंजुज्जलं नियप-
रिमंडलविजियपडिपुणचंदमंडलं लंवतमुत्ताहलकलावावचूल्यं सियायवत्तं, ठिया य उभयपासेसु चामरग्गाहिणीओ,
वज्जियाइं दिसिं कुंजरगलगज्जिगंभीराइं भंभासुगुंदमदलढक्कापसूहतुराइं, ठिओ पत्थाणंमि पत्थियोत्ति । एत्थंतरे—

चलंतकणचामरा पयंडदप्पदुद्धरा, गलंतगंडमंडला तमालनीलसामला ।

अलंधणिज्जविक्रमा महागिरिदविन्भमा, रणंतबद्धंधटया महागयाणपट्टिया ॥ १ ॥

पलंबपुच्छसोहिया असेससिक्खगाहिया, सुवेयतुट्टसामिणो समीरवेगगामिणो ।

विसिट्टलक्खणंक्रिया परेण नो निरिक्खिया, दिण्णिंदवाइविन्भमा पयट्टिया तुरंगमा ॥ २ ॥

विचित्तचित्तवंधुरा महाउहोहनिन्भरा, जओवलंभपच्छा रणंतकिंकिणीकुला ।

निलीणभूरसत्थया पगिट्टेकउमत्थया, दुसज्झवेरिमइणा पवाहिया पसंदणा ॥ ३ ॥

सरासिचक्रधारिणो विपक्वसूरदारिणो, ससामिभित्तिमंतया अईव जुत्तिजुत्तया ।
जएक्कलभललसा अर्चितणिज्जसाहसा, सरीरबद्धकंडा पयट्ठिया महाभडा ॥ ४ ॥

अह लाडचोडमरहट्टकच्छकालिंगपमुहनरवइणो । आणामेत्तेणं चिय समुब्धिआसेसनियकज्जा ॥ ५ ॥
सन्नद्धबद्धकवया बहुपहरणसालिणो जयपसिद्धा । आसग्गीवसयासं पत्ता सयलेणवि बलेणं ॥ ६ ॥

एवं च समगसंवाहगे जाए दवावियं रणा पयाणयं, चलिओ खंधावारो, गच्छंताण य सहसच्चिय समुच्छलियं
खरसमीरणंदोलणेणं, निवडियं छत्तं भग्गो दंडो गयणंगणाओ फारफुल्लिगदारुणा पडिया उक्का, दिवसेच्चिय उल्लसिया
तारया, जायं रुहिरवरिसं, निरब्भमि चैव अंबरे फुरिया सोयामणी, अविण्णायसरूवो तडत्ति विहडिओ जयकुंजरो, नि-
न्निमित्तं चिय जलणजालाकलवेण कवलियाइं जचतुरंगमपुच्छाइं, परिगलिया सयमेव भग्गदंडा जयपडाया, जायाथ
पलीणमयजला हत्थिमंडली, अणवरयेणुवरिसदुरालोयं विच्छाइभूयं दिसाचक्कं, अंमुण्णवाहो सुक्को देवयापडिभाहिं,
परोप्परं हसियाइं चित्तकम्मरूवाइं, उट्टुमुहेहिं दीणस्सरं परुन्नं सारमेएहिं, एवमाईणि उप्पन्नाणि बहूणि असिवाइंति ।
ताहे असिवनिरिक्खणंसंजायमहाभया कुसलमइणो । आसग्गीवणरिंदं भणन्ति विणओणया सच्चिया ॥ ७ ॥
देव ! हिमं व विलिज्जइ पयावमेत्तेण तुम्ह पडिवक्खो । किमकंडविट्ठुरकरो पारद्धो समरसंवाहो ? ॥ ८ ॥
तुह तुरयखरखुरुधुरयपडलेणं पणट्टकरपसरो । सूरौवि अंतरिज्जइ को अन्नो जो परिण्णुरइ ? ॥ ९ ॥

ता सुग्रह विजयजत्तं नयराभिमुहं लहुं नियत्तेह । असिबोवसमनिमित्तं कीरंतु य होमजागाई ॥ ४ ॥
नहु एरिस असिबेहिं कोसल्लं किंपि देव ! पेच्छामो । पूरिज्जंति किमेवं सत्तूण मणोरहा धणियं ? ॥ ५ ॥
एवमाइन्निज्जण भणियं रत्ता—भो भो किमेव वाउलत्तणं तुब्भे निन्निमित्तं पडिवन्ना ? किं न सुणह मम भुय-
दंडपरक्कमं ? न वा सुमरह चिरपभूयसमरसम्महविदवियपडिवक्खसंपत्तविजयं ? न वा पेच्छह अपरिकलियसखं भरिय-
निणुन्नयमहि विभागं महोदहिसलिलपि व चाउहिंसं पसरियं चाउरंगं बलं ? किमिव अट्ठणो चिय भायह, किं वा
सनयराभिमुहं मं नियत्तावेह ? न हि पारद्धवत्थुपरिचाइणो सलहिज्जंति पुरिसा, न य तहाविहसंदिद्धकइवयअमं-
गलभेत्तणवि खुब्भंति वीरा, जओ—

गहगणचरियं सुमिणाण दंसणं देवयाण माहण्यं । सुणखररसियणमुहा सउणा य तहा जणपसिद्धा ॥ १ ॥
उक्कानिवडणरुहिराइवरिसपमुहाइं दुन्निमित्ताइं । सव्वाइं धुणक्खरसंनिभाइं को तेसि भाएज्जा ? ॥ २ ॥
ता धीरा होह, निवाडेमि नीसेसदुन्निमित्तसत्थं मत्थए पयावइस्स, इति भणिज्जण विमुमारियनिमित्तियवयणो
अवस्संभविष्वव्याए विणासस्स पडिक्कूलाए देवविलसियस्स वारिज्जमाणोऽवि पुराणपुरिसेहिं पडिखल्लिज्जमाणोऽवि
कुसउणेहिं सोवरोहं नियत्तिज्जमाणोऽवि अंतउरज्जेण छत्तभंगं सुणाविज्जमाणोऽवि निमित्तपाढगेहिं सयलवलसमेओ
गंतुं पयट्ठो, कमेण य पत्तो सदेससीमासंवत्तिणं रहावत्तपव्वयदेसं, तहिं च खंधावारनिवसं कारावेज्जण वाहराविओ

दूओ, भणिओ य-अरे गच्छसु पयावइस्स सगासे, भणसु य तं-एस आगओ आसग्गीवो राया जुज्झसज्जो वट्ठइ, सिग्घं संसुहो एहि, कुमारपेसणेण संमाणं वा करेहि, मा अकालेच्चिय कुलक्खयं जणेसुत्ति, जं देवो आणवेइत्ति पडिच्छिऊण से सासनं नीहरिओ दूओ, कमेण य गओ पयावइस्स मूलं, कहिओ णरिंदाएसो, रुद्धो तिविट्ठुकुमारो, भणिउमाढत्तो य—

रे दूय ! तुमभवज्झो निब्भयचित्तो ममोवरोहेण । घोडयगीवं गंतुं फुडक्खरं भणसु वयणमिमं ॥ १ ॥

मा होहिसि विगयमओ बहुपरिवारोत्ति चिंतिउं अचिरा । सीहोव्व मइसिलिंबं एस तिविट्ठू तुमं हणिही ॥ २ ॥

अज्जवि पयावइनिवो नियनामत्थं फुडं सुमरमाणो । रक्खइ तं जइ परिहरसि निट्ठुरत्तं वहसि पणयं ॥ ३ ॥

अहउभिणिविट्ठमईणं सुट्ठु भणियंपि दोसमावहइ । ता किं निरत्थएणं सिक्खादाणेण एएण ? ॥ ४ ॥

दूएण तओ भणियं अज्जवि दुस्सिक्खया दढं तुम्हे । न सुणह देवस्स बलं तेणेवमसंकमुल्लवह ॥ ५ ॥

अह पयावइणा भणियं-भइ ! वच्च नियनरिंदसगासं, साहेसु य जहान-एस आगओ पयावइत्ति, एवमाइन्निऊण निग्गओ दूओ, राइणावि काराविओ सेन्नसंवाहो, तओ पक्खरिज्जंतदप्पियवगंततुरंगमं गुडिजंतगयघडं समरपरि-हत्थुच्छंहत्तफारफारक्कक्कं चंडगंडीवगुणज्झणकारसुहलुच्छलत्तयणुद्धरं रहारुढपवरवीरं नाणाउहहत्थसमुत्थंतसुहड-सत्थं चलियं चाउरंगं बलं, तेण य परिवुडो पयंडगुडाडोवभासुरकुंजरकंधराधिरुद्धो नीहरिओ पुराओ पयावइ, एत्थ-

तरे नीलचलंतमंहतालज्ज्याणुसारमिलियसामंतपरियएण पबलनीलीनीलयदुल्लनियसणेण करयलफुरंतहलसुसल-
पहरणेण संगामसंगमुक्कखिरेण अयलकुमारेण अणुगम्ममाणमगो आमलगथूलमुत्ताहलहारेण गयणाभोगोव नहसुरस-
रिपवाहेण सोहंतवियडवच्छत्थलो तरुणतरणिकिरणसन्निगास सिचयजुयलेण चडवानलजालाफलावेण जलरासिच्च
रेहंतदेहो सवणकयकणयकुंडलकंतिपसरेण तक्कालसंगमूयरायसिरिसरागतिरिच्छच्छिविच्छोहेहिं व भासमाणवयणो
पुरो पइट्टियरणलट्टिनिविट्टुकणयकविलारुलकंतिपडलच्छलेण कोवं व उगिरंतो तिविट्टुकमारो, सिग्धं गंतूण मि-
लिओ पयावइनरिंदस्स, भणिउमाढत्तो य-ताय ! नियत्तह तुम्हे, देह ममाएसं, किन्तियमेत्तो एसो घोडयगीवो ?
अवणेमि तुम्ह पसाएण एयस्स धिट्टुसौंडीरयं, न य बहुसहाओत्ति संकण्जं, जओ भोयणमेत्तसहायिणो इमे,
परमत्थेण एगागी चेव एसो, रायणा भणियं-पुत्त ! लीलाविहाडियसमुक्कडेसरिकिसोरस्स अविगणियपडिवक्ख-
लक्खस्स किं असज्झं तुह परक्कमस्स ? केवलं दूरट्टिया कोऊहलेपेच्छगा एत्थ अम्हे, कुमारेण वुत्तं-एवं होउ,
अह विसिट्टुसउणोवलंभवहुंतपरितोसाणं अणवरयपयाणगेहिं वच्चंताणं तेसिं तस्स रहावत्तपव्वयस्स समीवे संप-
त्ताणं अवरोप्परासन्नंदसणवसेण जाए हलबोले परिकण्णियपक्खरंगुंडाडोवाइं उट्टियाइं तुरङ्गहत्थिसाहणाइं उडुयध-
यचिंधाइं, संपलग्गाइं उभयवलाइं, तओ-ताडियसरतूरुट्टुजणं भयथरहरंतकायरगणं, उदामबंदिसदपटणुच्छहतसु-
हडं वरधूलिधूसारियरहधयवडं ॥ १ ॥ खरखुरूपकप्परियतुरयपक्खरियनियतुरयघट्टुलोटावियकुंतणं । आसवारकर-

कखयतिक्खकरवालविदारियसूरसिरं गुंडियगुरुकरडिघडफोडिग्रतुरयघट्टं अन्नोन्नमिलणजायनिविडसंघट्टं ॥ २ ॥
 सरलसेल्लकल्लोलकील्लिजंतकुंभपलायंतगयं सुन्नपुन्नहिंडंतचंडचंडुलहयं । तिसूलभल्लिसेल्लभिन्नवेळंतनरं, उत्तालनिचडियल-
 त्तलत्तधरं ॥ ३ ॥ दंतिदंतसंघट्टयट्टानलकणं, उद्धबाहुनचंतकवधपवन्धघणं । विष्णुरंतकुंतगवायघुम्मियरहियं, सारि-
 मज्झजुज्झंतजोहघायदुविसहं ॥ ४ ॥ कुंभिकुंभवायसमुच्छलियरुहिरण्यवहं भूमिवट्टनिचेट्टपडियसमुत्तुंगमांथगरुद्धपहं ।
 महल्लच्छमल्लमल्लुकमुक्कफकारभीसणं, संगामरसियसुहल्लोयतोसणं ॥ ५ ॥ काऊण(दंडपडण)विचित्तसमवावारं ॥
 धाणुकडुकधाणुक्याहं, फारकियमडफारकियाहं । कुंतयरभिडियसमवगियाहं, खग्गाउहउक्खयखगियाहं ॥ १ ॥
 पडिखलियतुरंगतुरंगमेहिं, मेळतसेल्लमड्डुगमेहिं । मयगलगिलंतमयगिणणगंड, अब्भिमट्टपरोपरवद्धसुड ॥ २ ॥

पाउब्भवंतअइघोरोस खणि खणि विमुक्कभीसणनिघोस ।
 चाउदिसि सुहड समोत्थरेवि पहरंति समरि नियपाण देवि ॥ ३ ॥
 नाणाउहहत्थनरिंदवग्ग अवरोप्परजुज्झितसंपलग ।
 गयजीविय निवडहिं दंडनाह, पवंहतरुहिरपहजुय अगाह ॥ ४ ॥
 सेसारुणच्छुरणवद्धकच्छु, मह दंसह आसगीदु हत्थु ।
 इय जंपिरु रिउ पडिसत्तुराओ, एत्थंतरि पडिपहरंतु आउ ॥ ५ ॥
 तो वंगकलिंगनगराहिवेहिं, जुगवं चिय मुक्कमहाउहेहिं ।

पडिखलियउ पयावइ जुल्लमाणु, साहुव जाओ परिचत्तुमाणु ॥ ६ ॥
आसग्गीवह सेव्वाण अइवहुसंखेण हरिकरिसंदणहुद्वरेण ।
निम्महिइय परक्कसु पहणिय उज्जसु कयउ पयावइ तक्खणेण ॥ ७ ॥
मुणिवि तं निज्जियं जायकोवुग्गमो, भिउडिभीमाणणो पायडो नं जमो ।
अयलु पयलंतहलुसलदिवाउहो, सिग्घवेगेण सत्तूण ठिओ संसुहो ॥ ८ ॥
तथणु चिरलद्धजयवायगव्वुद्धुरा, ते नरिंदा समुवूढढमच्छरा ।
सेल्लनारायसरनिरयमेलंतया, अयलपासंमि वंचति वगंतया ॥ ९ ॥
हरिसभरतडयडुत्तुककडगुणो, सोयते पेच्छिउं बाढमबुभियमणो ।
जंपए रे लुहुं चयह चक्खुण्हं, कीस वच्चह विणा कारणं जमणिहं ? ॥ १० ॥
किं न भो नियह मह लंगलं सियसिंहं, कुवियकीणासजीवं व अइदुस्सहं ।
वइरिवच्छत्थलीविलिहणुड्डामरं, जस्स कंतीहिं अरुणिज्जए अंबरं ॥ ११ ॥
किं न वा सुसलमलिवलयकसिणण्हं, धरणिमणिसारपरमाणुनिम्मियमुहं ।
जयह तुब्भे जमेवं रणे उज्जया, तेहि वुत्तं अरे तुज्झ का चंगया ? ॥ १२ ॥

जेण दीसंति तुह सन्निहा हालिया, धरइ लीलाएँ मुसलं पि किल महिलिया ।

एवमुच्छाचिरं वहरिसत्थं बलो, सरइ वेगेण करकलियसियलंगलो ॥ १३ ॥

केऽवि मुट्ठिप्पहारेण ताडइ भडे, अवरि मुसलेण चूरइ सहावुब्भडे ।

हलसिहग्गेण केसिं पि उरु दारए, अन्नि चलणप्पहारेण मुसुमूरए ॥ १४ ॥

एक्कघाएण पाडइ महाकुंजरे, तणयपूलं व गयणे खिवइ रहवरे ।

मुयइ करुणाय परिचत्तसयलाउहे, ठाइ निग्गयपयावोऽवि नो से मुहे ॥ १५ ॥

इय निट्ठुरगत्तेण निरुवमसत्तेण निट्ठुरेण बलदेवेण बलु वलु विरियहं ।

तक्खणि विद्धंसिओ भडमउ नासिउ सयलदिसामुह पसरियहं ॥ १६ ॥

एवं चिय पइदिवसं दोणहवि सेन्नाण जुद्धमाणाणं । विविहप्पयारभीमं एयं जायं समरठाणं ॥ १७ ॥

एगत्थ पडियनरवइ पियंगणा करुणरुन्नरवभीमं । अन्नत्थ बंदितज्जणसवडुहचलियपडिमुहडं ॥ १८ ॥

एगत्थ दंतिदसग्गभिन्नसूरासिलेहहयरहियं । अणत्थ भीयकायरनियमुहखित्तंगुलीवल्यं ॥ १९ ॥

एगत्तो ऊसियकरमाहूयऽण्णोणवीरवरपुरिसं, अन्नत्थोमिंठविट्ठमिंठपरिभमियगयनिवहं ॥ २० ॥

एगत्थुत्तालिमिलंतघोरवेयालविहियहलबोलं, अन्नत्थ सिवागणखज्जमाणगयजीवनरनिवहं ॥ २१ ॥

एगत्तो दंसणतिक्खचक्खिज्जंतमहिगयज्जणोहं, अन्नत्तो भडतोसियमागहगिज्जंतवरचारियं ॥ २२ ॥
इय चिहियविविहभीसणकिरिएहिं उभयसेन्नसुहडेहिं । समरंगणं सुराणवि जायं अचंतभयजणंगं ॥ २३ ॥
किं च-रणट्टाणनिवडियकणसीसकरचरणजंवतणुखंडं । विहिणो घरं व नज्जइ जयजणघटणुज्जयमइस्स ॥ २४ ॥
एवं च बहूहं वासराइं महासम्मइण निवाडियाणेगसुहत्थिसु तिक्खनारायनिब्भिन्नकुंभिंभुंमत्थलेसु, चुरियचारु-
तुंगसिंजरहवरेसु सुसुमूरियनरवइसहस्सेसु जायंतेसु आओहणेसु पेच्छिऊण बहुजणक्खयं तिविट्ठणा भणाविओ
दुयवयेण आसग्गीधो, जहा—किमणेण निरत्थएणं निदोसपरियणक्खएणं?, तुमं च अहं च परोपरवद्धवेरा, ता
अंगीकरेह नियमुयबलं, सम्मं ठवेहि चित्तावट्टुभं विमुंच कायरत्तं परिचय परपुरिसायारं दोवेहि सहत्थकोसहं मेछेहि
सरीरसोकुमलं पगुणो भवाहि असहाओ मए एगागिणा सह जुज्झिउंति, सम्ममवघारिऊण गओ दूओ, निवेइओ
आसग्गीवस्स कुमारसंदेसगो, पडिवन्नो य राइणा, जाए बीयदिवसे विचित्तपहरणपडिहत्थं जोत्तियपवरतुरं
सारहिमेत्तपरियत्तपरिथरं संदणमारुहिऊण ओइण्णा रणभूमीए आसग्गीवतिविट्ठणो, ठियाइं उभयपासेसु सपहुपरक्क-
मावलोयणकोऊहलाइं दोन्निवि बलाइं, संदखंदचंडिकोहडिपमुहदेवउवजाइयसयदाणपरायणाइं निलीणाइं उच्चपएसेसु
अंतेउराइं, पेक्खणुक्खिरा य गयणंगणमोगाढा सुरकिंनरकिंपुरिसविजाहरा, लवंतमुक्कजडाडोवो पाणिपरिगहिय-
छत्तगो संगामदंसणव्वूढगाढहरिसो पइखणअट्टट्टहासे सुयमाणो देवसमूहं च सोवओगं कुणमाणो विंथंभिओ अंतरे

नारयमुणी । एत्थंतरे आसग्गीवेण भणिओ त्तिविट्ठु—

गिरिगुहनिवाससि(खि)न्ने रोगजराज्जरंगए सीहे । निहए करुणाठाणे अहो तुमं बलमयं वहसि ॥ १ ॥
किमहं तं न समत्थो चिणासिउं पढममेव लीलाए । किं तु मयमारणे अवयसो सिया तेण नो हणिओ ॥ २ ॥
जइ कहवि दुद्धवयणोत्ति कलिय नो सिक्खविंति तं कुसला । किं एत्तिएणऽवि मुहा परंमुहो सुंदर ! नयस्स ॥ ३ ॥
सच्चं चिय न कयंतो कुद्धो विद्वइ करचवेडाए । किं तु दुबुद्धी दाउं परस्स हत्थेण मोरइ ॥ ४ ॥
जं चिय किंचि पखुं बाहुबलं तुज्झ नरजणब्भहिंयं । पक्खुब्भेओव पिवीलियाण तंपि हु वहट्टाए ॥ ५ ॥
थेरस्स पयावइपत्थिवस्स पुत्तच्छलेण तं भद्द ! । नूणं विणासपिसुणो समुग्गओ धूमकेउव ॥ ६ ॥
तोहे त्तिविट्ठुणा सो भणिओ वुहूत्तणस्स तुह पढमो । पाओ पाउब्भूओ दुव्वयणुल्लावरूवो किं ? ॥ ७ ॥
किं वा सन्निहिक्कयंतसंगसंजायनिट्ठुसहावो । निम्मरं थेर ! समुल्लेवसि वन्नसि समाहण्यं ॥ १ ॥
रणकसवट्ठयनिवडियपवरसोडीरिमासुवणस्स । अचुक्करिसो सोहइ नरस्स वन्निज्जमाणोऽवि ॥ ९ ॥
ता संघरेसु वयणं खणमेक्कं अंतरे परिभमंतु । तुज्झ महच्चिय चाणाऽरिपक्खमहणा महावेगा ॥ १० ॥
आसग्गीवेण पुणो भणिओ डिंभोत्ति मज्झ नो घायं । दाउं खमंति हत्था तोहे पहरसु तुमं पढमं ॥ ११ ॥
त्तिविट्ठुणा भणिंयं—भो घोडयग्गीव ! पुरा मम तायस्स तुमं सामिसदमुवहंतो ता तयणुवित्तीए चैव अणइयम-

एगत्तो दंसणतिकखचक्काछिज्जंतमहिगयजणोहं, अन्नत्तो भडत्तोसियमागहगिज्जंतवरचरियं ॥ २२ ॥

इय विहियविविहभीसणकिरिएहिं उभयसेन्नसुहेडेहिं । समरंगणं सुराणवि जायं अचंतभयजणगं ॥ २३ ॥

किं च-रणट्टाणनिवडियकणसीसकरचरणजंघतणुखंडं । विहिणो घरं व नज्जइ जयजणयडुज्जयमइस्स ॥ २४ ॥

एवं च बहूदं वासराहं महासम्मदेण निवाडियाणेगसुहत्थिसु तियखनारायनिब्भिन्नकुंभिकुंभत्थलेसु, नुरियचारु-
तुंगसिगरहवरेसु सुसुमूरियनरवइसहस्ससु जायंतसु आओहणेषु पेच्छिऊण बहुजणकखयं तिविद्रुणा भणाविओ
दूययणेण आसग्गीवो, जहा—किमणेण निरत्थएणं निहोसपरियणक्खएणं?, तुमं च अहं च परोप्परवद्धेवरा, ता
अंगीकरेह नियमुयबलं, सम्मं ठवेहि चित्तावट्टुमं विमुच कायत्तं परिचय परपुरिसायारं दावेहि सहत्थकोसहं मेछेहि
सरीरसोक्कुमलं पगुणो भवाहि असहाओ मए एगागिणा सह जुज्झिउंति, सम्ममवधारिऊण गओ दओ, निवेइओ
आसग्गीवस्स कुमारसंदेसगो, पडिवन्नो य राइणा, जाए बीयदिवसे विचित्तपहरणपडिहत्थं जोत्तियपवरतुरयं
सारहेमत्तपरियत्तपरियरं संदणमारुहिऊण ओइण्णा रणभूमीए आसग्गीवतिविट्ठणो, ठियाहं उभयपांससु सपहुपरक्क-
मावलोयणकोऊहलाहं दोन्निवि बलाहं, रुंदखदचंडिकोहंडिपमुहेदवउवजाइयसयदाणपरायणाहं निलीणाहं उच्चपएसेसु
अंतोउराहं, पेक्खणुक्कखिरा य गयणंगणमोगाढा सुरकिंनरकिंपुरिसविजाहरा, लंभंतमुक्कजडाडेवो पाणिपरिगहिय-
छत्तगो संगामदंसणुव्वूढगाढहरिसो पइखणअट्टट्टहासे सुयमाणो देवसमूहं च सोवओगं कुणमाणो विंथंभियो अंतरे

नारयमुणी । एत्थंतरे आसग्गीवेण भणिओ तिविट्ठु—

गिरिगुहनिवाससि(खि)न्ने रोगजरज्जरंगए सीहे । निहए करुणाठाणे अहो तुमं बलमयं वहसि ॥ १ ॥
किमहं तं न समत्थो विणासिउं पढममेव लीलाए । किं तु मयमारणे अवयसो सिया तेण नो हणिथो ॥ २ ॥

जइ कहवि दुद्धवयणोत्ति कलिय नो सिक्खविंति तं कुसला । किं एत्तिएणऽवि मुहा परंमुहो सुंदर ! नयस्स ॥ ३ ॥

सच्चं चिय न कयंतो कुद्धो विहवइ करचवेडाए । किं तु दुबुद्धी दाउं परस्स हत्थेण मोरेइ ॥ ४ ॥

जं चिय किंचि परूढं बाहुबलं तुज्झ नरजणब्भहिंयं । पक्खुब्भेओव पिवीलियाण तंपि हु वहट्ठाए ॥ ५ ॥

थेरस्स पयावइपत्थिवस्स पुत्तच्छलेण तं भद्द ! । नूणं विणासपिसुणो समुग्गओ धूमकेउव्व ॥ ६ ॥

तोहे तिविट्ठुणा सो भणिओ बुहुत्तणस्स तुह पढमो । पाओ पाउब्भूओ दुव्वयणुल्लावरूवो किं ? ॥ ७ ॥

किं वा सन्निहिक्कयंतसंगसंजायनिट्ठुरसहावो । निम्मेरं थेर ! समुल्लयेसि वन्नसि समाहणं ॥ १ ॥

रणकसवट्ठयनिवडियपवरसोडीरिमासुवणस्स । अत्तुक्करिसो सोहइ नरस्स वन्निज्जमाणोऽवि ॥ ९ ॥

ता संवरेसु वयणं खणमेक्कं अंतरे परिभमंतु । तुज्झ महच्चिय वाणाऽरिपक्खमहणा महावेगा ॥ १० ॥

आसग्गीवेण पुणो भणिओ डिंभोत्ति मज्झ नो घायं । दाउं खमंति हत्था तोहे पहरसु तुमं पढमं ॥ ११ ॥

तिविट्ठुणा भणिंयं—भो घोडयग्गीव ! पुरा मम तायस्स तुमं सामिसइमुव्वहंतो ता तयणुविचीए चैव अणइक्कमं

णिज्जवधणोऽसि अओ अवहिओ होहि एसा निवडइ कयंतदिट्ठिव दुविसहा विसिहपरंरत्ति भणिऊण आयन्नमा-
कडिय कोयंडं रणज्झणाविद्या पंडचा, मुक्का सलोहा मम्मावेहिगा खलालिव्व निट्ठरा सरघोरणी, तओ आसग्गीवेण
धणुवेयकुसलयाए अद्धमगमपत्तेच्चिय खंडिया तिकखलुरुणेहिं, पुणरवि कुमारेण भिचोव्व सपक्खो निरवेक्खगामी
खित्तो नारायनिवहो, सोऽवि निष्णुणजणमणोरहोव्व पडिखलिओ आसग्गीवेण, किं बहुणा ?—

जं जं सत्थं किंपिवि खिवइ नरिंदस्स संसुहं कुमरो । तं तं आसग्गीओ दक्खत्तणओ पडिक्खलइ ॥ १ ॥

आसग्गीवोऽवि पयंडकोवओ सुयइ पहरणं जमिह । वेज्जोव्व रोगजायं कुमरोऽवि तयं पडिहणेइ ॥ २ ॥

अह भरहबाहुबलिणोव्व गाढममरिसभरेण पहरंता । खयसमए राहुसणिच्छरव्व रेहंति ते दोऽन्नि ॥ ३ ॥

एवं परोप्परं जुज्झिराण तेसिं पणिट्ठदप्पाणं । सचराचरावि धरणी धरहरिया पयभरक्कंता ॥ ४ ॥

एत्थंतरंमि अणवरयखिवणओ पहरणुच्चओ सव्वो । आसग्गीवनरिंदस्स निट्ठिओ सुकयरासिच्च ॥ ५ ॥

ताहे किंकायव्वयवाउलचित्तेण खेयविहुरेण । अविभगपसररिउदप्पंदसणुव्वढकोवेणं ॥ ६ ॥

आवयधणं व दढपणयचित्तमित्तं व पियकलत्तं व । विसमावडिएणं नरवरेण संसुभरियं चक्कं ॥ ७ ॥

अह जलणुब्भडपसरंतकिरणमालासहसपल्लविधं । जुगविगमुगगथमायंडचंडमंडलयदुण्णेच्छं ॥ ८ ॥

रुद्धजमारुणनयणं व मिलियनीससविज्जुपडलं व । आसग्गीवस्स झडत्ति चक्करयणं करे चडियं ॥ ९ ॥

तयणंतरं च पहरिसतडत्तितुदुंतवम्मबंधेण । तेण विमुक्कं वहणट्टयाए सिग्घं तिविट्ठस्स ॥ १० ॥

गंतुं कवाडवियेडे वच्छयेले तं जेवेण कुमरस्स । चिरदंसणुस्सुयं वड्हं व तुंवेण संलग्गं ॥ ११ ॥

एत्थंतरंमि दढचक्कतुंबसंघट्टघायवियलंगो । मुच्छानिम्मिलियच्छो पडिओ धरणीयले कुमरो ॥ १२ ॥

आसग्गीवबलेणं ताहे संपन्नबहुपमोएणं । जयजयसहुम्मिस्सो पकओ कोलाहलो सहसा ॥ १३ ॥

तथा—जाव य उग्गीरियविविहपहरणा नावडंति सत्तुभडा । ताव तिविट्ठुकुमारेण तक्खणं विगयमुच्छेणं ॥ १४ ॥

ओ धोडयगीव ! गओऽसि नासमहुणत्ति संलवंतेणं । तं चिय तस्साभिमुहं मुक्कं चक्कं झलहलंतं ॥ १५ ॥

तो तं तालफलंपिच तडत्ति छेत्तूण तिकखधाराए । आसग्गीवस्स सिरं करे ठियं पुण तिविट्ठस्स ॥ १६ ॥

अह निहयंमि आसग्गीवे हरिसवसविसप्पमाणसमुच्चरोमंचेहिं सहसच्चिय जयजयवं करंतेहिं सुरासुराहे सरसपा-
रियायतरुमंजरीनियरसंवलिआ सोरभभरंगंधलुद्धमिलंतभसलजालमुहला अणवरयविणिंतामंदमग्रंदविंदुसंदोहविच्छु-
रियसयलदिआ कमलकुवलयमालइपमुहा मुक्का पंचवन्नकुसुमुट्टी, उग्घोसियं च महया सहेण जहा—ओ भो पत्थिवा !
परिचयह कोवकंडुं मुयह दुव्वहदुविणयपणयं परिहरह आसग्गीवपक्खवायं उज्झह असज्झाचारं पणमह सवायरेण
तिविट्ठं, एसो खु एत्थ भरहखेत्ते समग्गबलवंतपुरिसप्पहाणो पुव्वभवसमुबज्जियमुकयंसंभारवसविसप्पमाणमहल्लक-
ल्लाणनिहाणो उप्पन्नो पढमो वायुदेवोत्ति । एवं च आयन्निरुण संभंतविलोयणेहिं दूरपरिमुक्कपहरणपबंधोहिं अहमह-

मिगाए पडिक्खलंतमणिकिरीडकोडिमसिणियकमनहनिवहेहिं भालयलवडियकरसंपुडेहिं पंचगणिवायपुरस्सरं
पणमिओ पत्थिवसहस्सेहिं तिविद्धुं । विन्नचो य—

देव ! परायत्तेहिं जुत्ताजुत्तं अयाणमाणेहिं । अम्हेहिं जमवरद्धं तमियाणिं खमह नीसेसं ॥ १ ॥
कुणह पसायं नियचरणनल्लिणसेवापयाणओ अम्हं । मोत्तण तुमं एकं अन्नो नो विज्जए नाहो ? ॥ २ ॥
एयमायन्निज्जण तिविट्ठणा भणियं—भो भो नरेसरा ! किमेवं जंपह ? को तुम्ह दोसो ? परायत्तचित्ताणं एस-
च्चिय गई, ता मुयह पडिभयं, पसंतडिबडमराइं मुंजह नियनियरज्जाइं, मम छत्तच्छायापरिगहिद्याण पुरंदरोडवि न
पहवेइ तुम्हाणंति । एत्थंतरे तिविट्ठुसेवोवगयनरवइवगावलयणसंपन्नासग्गीवविणासनिच्छयं समागयं तं पएसमं-
तेउरं, दिट्ठो छिन्नगलनाडिनिस्सरंतरुहरिपंकविलुत्तगतो रत्तचंदणकयंगराओव्व उवरि परिब्भमंतपिसियासिपक्खि-
निवारियरविकरपसरो धरियमहप्पमाणछत्तोवमं व सन्निहिनिवडियपहाणपुरिसवग्गो अत्थाणगओव्व आसग्गीवनरिंदो ।
अह अदिट्ठुण्वं अचंततिकवदुक्खावहं तारिसमवत्थंतरं से पासिज्जण अक्कंदिउमारद्धमेवमंतेउरं—

हा हा कयंत ! निक्करुण ! किं तए पाव एवमायरियं ? । जं एवंविहपुहइपहूडवि एसो हयास हओ ॥ १ ॥
किं एत्तियाहिं निहयाहिं तुज्झ तित्ती न सुहडकोडीहिं । उप्पन्ना निणुन्नय ! जमेस रायावि संहरिओ ॥ २ ॥
हे चक्क ! निक्किव ! कहं सपहुविणासाजसो तए विहिओ ? । तुम्भेहिडवि किं जक्खा ! उवेक्खियं निग्घिणा एयं ? ॥ ३ ॥

हे काल ! बद्धवरवंसजाय तुज्झवि गुणेण किं तेण ? । हा हा रक्खामणिणो वीसत्थविणासगा तुब्भे ॥ ४ ॥
 धी धी पुरोहियाहम ! चिरकालं तप्पियं तए जलणं । निछज्ज ! कहसु संपइ असिवं किं जं पडिक्खलियं ? ॥ ५ ॥
 हे अंगरक्खवग्मा ! तुब्भेऽविहु कीस संपइ पलाणा ? । हा हा एगए चिय सव्वपि परंसुहं जायं ॥ ६ ॥
 हा पाणनाह ! संपइ पडिहयपडिवक्खसुहलक्खंमि । तुमए सग्गोवगए तडक्किही कस्स जयढक्का ? ॥ ७ ॥
 हा रायलच्छि ! वेहव्वदूसिए कीस जीवसि इयाणिं ? । इहराणुहवसि दुक्खं दूमिज्जंती कुनाहेहिं ॥ ८ ॥
 इय विलचिरीहिं निहयताडियथणवट्टुट्टहराहिं । वेहव्वदुक्खभरमज्जिरीहिं पल्लहत्थवलयहिं ॥ ९ ॥
 अणवरयघोरगल्लियंसुवाहं रुन्नं तहा मयच्छीहिं । जह तद्देसगएणं रुन्नं पक्खीणवि गणेणं ॥ १० ॥
 तोहेऽणुजीविणा परियणेण पम्मुक्कपोक्करुत्तेण । आसग्गीवसरीरं खित्तं जालाउले जलणे ॥ ११ ॥
 एत्थंतरे अंतोउरीजणवेहव्वदुक्खमसहमाणोव्व पयंडरणकम्मदंसणभयभीओव्व तिकखासिखंडियहरुंढावलयणु-
 चट्टरहतुरंगोव्व समीरणुद्धुररुहरिरीयारासारसंसित्तोव्व आलोहियमंडलो झडत्ति चक्खुगोयरमइकंतो सहस्स-
 किरणो, गवल्लुगुलियालिवलयकज्जलत्तिमिरपडलपडकयावगुठणा फुरंततारनयणा अणवरयनिवडंतउक्काफुलिं-
 गुरगारच्छलेण मणोहरित्तपरिपीयसुहजणरुहरिगंडूसं व सुयंती महारक्खसिक्ख भयजणणी यससिया रयणी, डिओ
 नियनियट्ठाणेषु जणो, कमेण य जाए पहायसमए भणिया तिविट्ठुणा नियपुरिसा-भो भो गच्छह संगमभूमिं,

निरुध्वह पहारपरव्वसे जोहनिवहे करेह ओसहघायवंधाइणा परिताणं परिमगह दुट्ठुरंगमपल्हत्थिए पत्थिवेत्ति-
सम्मं निउज्जिऊण(अंतोउरेण)समं समगनरवइवगपरियरिओ समेओ पोयणपुरं, तओ नयरलोएण कयं वेजयंती,
सहस्साभिरासं ठाणठाणनिवद्धमंचारूढविलासिणीनट्टरमणिज्जं पमुक्कमुरभिपुण्णकुंजोवयारकलियरायमगं पइयपडु-
पडहपमुहजयतूरनियरं नयरं पविट्ठो महया विभूहए तिविट्ठू, जहोचियठाणेषु ठिओ सेसो परिवारो । तओ कइवय
वासराइं तत्थ ठाऊण पुणोऽवि समगबलकलिओ चक्कच्छत्तधनुमणिमालागयांसंखरयणपरिगओ निगओ दिसि-
विजयनिमित्तं तिविट्ठू, कमेण पसाहिंयं भारहद्धखेत्तं, अपणयपुव्वा नामिया पत्थिवा, गाहिया सेवावित्तिं, गहियाइं
तेहिंतो करितुरयरयणपमुहाइं पहाणपाहुडाइं, एवं च नीसेसमंडलाहिंयसहस्साणुगम्ममाणमगो पेच्छंतो अपुव्वा-
पुव्वनयराइं ठाविंतो अंगवंगकलिंगाइसु अन्नन्ननरिंदे पत्तो मगहाविसए, तहिं च दिट्ठा कोडिपुरिसवोज्झा महा-
सिला, सा य मुयबलावलेवओ लीलाए वाममुयदंडेण उक्खिविऊण छत्तंगं व धरिया सीसोवरिं, अतुलियबलावलोय-
णहरिसुप्फुल्लोयणेहिं य कओ नरवइहिं जयजयारवो, पढियं च मागहगणेहिं, कंहं?—

देव ! मणालागारो तुज्झ करो कलियरुंदकोडिसिलो । सिरिधरियधरणिवट्टस्स वइह सेसस्स समसीसिं ॥ १ ॥
तुह एवंविहलीलाइएण चित्तं न कंपए कस्स । जइ सव्वहावि पत्थरविणिम्मिओ होज्ज सो न जणो ? ॥ २ ॥
इय मागेहिं णेगप्पयारवयणेहिं संशुणिज्जंतो । मोत्तुणं कोडिसिलं चलिओ राया सपुरहुत्तं ॥ ३ ॥

गच्छन्तो य पत्तो दंडगारन्नपरिसरं, तर्हि च खंधावारनिवेशं काऊण ठिओ कहवय वासराइं, एगया य रयणी-
 मञ्जनिब्भरपसुत्ते सेवगजणे अणुरत्तविरत्तपरिवारचारमुवलंभिउं करकलियचक्को कयवेसपरियत्तो अणुवलक्खिज्जमाणो
 जामकरिघडारूढेहिं अंगरक्खेहिं नीहरिओ एगगी वासुदेवो निययगुड्डुराओ, अमुणियपयप्पयारो य इओ तओ
 परिब्भमंतो जाव खंधावारनिवेशमइक्कमिऊण गच्छइ ताव निसामेइ थेवदेसतरियं मंदं मंदं कोलाहलं, तं
 च निसामिऊणुप्पन्नकोऊहलो पधाविओ तयमिसुहं, कमेण पत्तो एगं बहलतरुवरसंछन्नं काणणं, तर्हि च पत्तस्स
 उवसंतो सो कोलाहलो, तओ किं विभीसिया एसा ? महविब्भमो वा ममेत्ति जाव चित्तेइ ताव काणणब्भंतराओ
 समुट्ठिओ सदुक्खनरघणियसहो, तदणुमाणेण य पुणो पट्ठिओ तिविट्ठू, अह वच्छत्थलविप्फुरंतकोत्थुभमणिमऊहवि-
 ङ्गंसियंघयारे जाए तत्थ पएसे थेवंतरगएण हरिणा दिट्ठो रुक्खेण समं विविहबंधणबद्धो पुरिसो, (पुच्छिओ सो
 उचिचारयेण) भो को तुमं ? केण वा इममवत्थंतरं पाविओसिन्ति ? तेण जंपियं-महाणुभाग ! निविडबंधणत्तणओ
 न सक्कमि परिकहिउं, ता अवणेहि बंधे जेण साहेमिन्ति कहिए तिविट्ठुणा चक्केण निकंतिया बंधा, जाओ वीसत्थो,
 भण्णिउं पवत्तो य-अहो निक्कारणपरमबंधुव्व निसामेहि मम वित्तंतं, अहं रयणसेहरो नाम विज्जाहरो रुवलावन्नसुं-
 दराइमुणावहिभूयाए सिंहलरायधूयाए विजयवईनामाए पुब्बं चिय बहुप्पयारपत्थणाहिं दिन्नाए परिणयणत्थं
 संपयं समगसामग्गीसणाहो जाव तत्थ पट्ठिओ ताव एत्थप्पएसे संपत्तो समाणो वाउवेगाभिहाणेण वेरिणा वि-

ज्जाहरेण सव्वस्समवहरिऊण दुक्खेण मरउत्ति विभावितेण एवं गाढं बंधिऊण चत्तोऽहि, तिविट्ठुणा भणियं-तुमं विज्जाहरो होऊण केण कारणेण भूमिगोयरधूयं उव्वोढुमिच्छसि?, तेण जंपियं-महाभाग! अपुव्वं किंपि से खवं असरिसं च लायन्नंति, तिविट्ठुणा चित्तियं-जइ सच्चं चिय एवविहगुणोववेया सा ता मम जोगा परिणंउत्ति विभाविऊण भणियो एसो-अहो तुमए उव्वोढावि एसा तेण वेरिणा हीरिही, ता किं निरत्थएण तदुवल्लभेण?, विज्जाहरेण जंपियं-सच्चमेयं जइ तुमह सत्ती अत्थि ता तुब्भे परिणह, परिचत्ता मए इयाणि, पडिक्खं तिविट्ठुणा, कयप्पणाभोगो सद्धानं विज्जाहरो, हरिणावि सिंहलेसरं अणगप्पयारोहं पत्थिऊण परिणीया सा विजयवई धूया, आगओ य निययपुरं, पडिच्छिओ महारायाभिसओ, जाया वत्तीसं सहस्सा जुवईणं-

अहं निचपयद्विसट्ठगीयझंकारमिस्समुखवे । नडचेडचाडुकारयकिंकरननियपरियरिण ॥ १ ॥
सुविभत्तचित्तिच्छित्तिसुदरे मंदिरे निवसमाणो । अइपडिहयपडिक्खं तिखंडभरहं च रक्खंतो ॥ २ ॥
भयवसनमतसामंतमंडलो तरुणिसत्थमज्झगओ । आखंडलेव्व भुंजइ विसए पंचणयारेऽवि ॥ ३ ॥
नवरं विजयवईए नामंपिहु नेव गिणहइ तिविट्ठु । ईसाविसायवसओ सा य पओसं समुव्वहइ ॥ ४ ॥
एवं बोलंतमि काले अन्नया नियमाहणनिहयदुब्बिक्खलइदुक्खनिवहो समागओ भयवं सेयसत्तिथयो, विरइयं देवेहिं विसालसालवल्लयपरिविखत्तं विचित्तमणिमयसिंहासणाभिरामं भवभयत्तसत्तंताणेक्कसरणं समोसरणं, तओ

सायर्मिलंतसुरिंदसदेहथुणिज्जमाणो उवविट्ठो सिंहासणे जिणो, एत्थंतरे जिणागमणनिउत्तपुरिसेहिं वद्दाविओ तिविट्ठो,
 कहिओ जिणागमणवइयरो, तओ हरिसभरसमुल्लसंतरोमंचेण य दवाविं पीइदाणं सट्ठुवालसकलहोयकोडीओ तोसिं
 पुरिसाणं, समगबलवाहणो अचलेण समेओ य गओ वासुदेवो वंदणवडियाए, छत्ताइच्छत्तपसुहं जिणाइसयपवलोइऊण
 परिचत्तसयलरायचिंधो दूराओ चिय पयचारेण गंतूण तिपयाहिणापयाणपुब्बयं जयगुरुं नमंसिऊण एवं थोउं पवत्तो—

जय संसारमहोयहिपडंतजणजाणवत्त ! जयनाह ! । परमसिवमोक्खकारण ! रणवज्जिय ! विजियमयमाण ! ॥ १ ॥

निम्महिमोहमाहप्प ! दुट्ठकंदप्पदप्पनिहलण ! । मायाविसवळिविणासपरसु जय जय जयप्पवर ! ॥ २ ॥

जय संजमसिरिवल्लह कोहमहाजलणसजलजवाह ! । जय निम्मलकेवलकलियसयलनीयाइयपयत्थ ! ॥ ३ ॥

जय विणहुकुलंबरपुण्णचंद ! सुररायनमियपयकमल ! । निप्पडिमपसमवरपुरपायार ! गुणोहसाहार ! ॥ ४ ॥

जय करुणामयसारणिसरिच्छ ! निच्छन्नकम्मदुममूल ! । दुहसेलदलणंदंभोलिसरिसनामगहण ! देव ! ॥ ५ ॥

नाह ! तुह पायंपकयमंदमयनिवहकंतिमयरंदं । फुल्लंथयं व वण्णो सयाऽवित्तहो समल्लियइ ॥ ६ ॥

को तुह जिणवर ! वयणं अमयं व समत्थदोसहरणखमं । पाऊण कुतित्थियवक्कलुससलीलं समीहेइ ॥ ७ ॥

जइविट्ठु दूरमसारो संसारो तहवि देव ! तुम्हेहिं । चिहंतेहिं सुणिज्जइ सारो निब्बुइपुरीओऽवि ॥ ८ ॥

आसग्गीयाइनरिंदविजयलाभाइ(भेऽवि)नेरिसो नाह ! । जाओ ममणमोओ जह दंसणमेत्तओ तुज्झ ॥ ९ ॥

ता पसिय भुवणबंधव ! जइवि तुमं सव्वा विगयरगो । नियचरणंदसणगुगहेण मम तहवि सेयंस ! ॥ १० ॥
एवं च सुचिरं श्रेष्ठो सो त्विदुनरिदो निविदो समुचियद्वाणे, भगवयावि आजोयणमित्तणुसारिणीए वाणीए
समारद्धा धम्मदेसणा, जहा—भो भो देवाणुप्पिया ! कहकहवि चिरं संसारवंतारमणुपरियट्टमाणेहिं तुम्हेहिं पा-
विओ एस मणुयजम्मो, जायं अविकलपंचिदिअत्तणं, संपत्ता निक्कलंकुलारोगाइया सामग्गी, समुल्लसिया सद्धम्म-
बुद्धी, ता दुगुच्छह मिच्छत्ताविरइसंगं समीहह संसत्तनाणचरित्तवित्तं पेच्छह पमायपरपाणिगणदुहविवागं अणुचिं-
तह खणदिट्टनट्टसरूवयं सव्वभावाणं विमंसह पुणो दुल्लहत्तणं आरियखेत्ताइलाभस्स, अन्नं च—

तुच्छेहियसुहलवमेत्तलालसा कीस वसह निस्संका ? । किं तुम्ह कयंतेणं निब्भयपत्तं सयं लिहियं ? ॥ १ ॥

किं वा केणवि अजरामरत्तणं तुम्ह दावियं ? अहवा । मरणाइदुक्खरहिं ठाणं वा कत्थविय दिहुं ? ॥ २ ॥

अहवा सासयभावत्तकारणं किं रसायणं लद्धं ? । जेणुसुगत्तठाणेऽवि गाढमंदायरा होह ॥ ३ ॥

भो भो देवाणुप्पिया ! सद्धम्मोवज्जणे समुज्जमह । परिहरह पावमित्तेहिं संगतिं दुक्खसयज्जणिं ॥ ४ ॥

पडिवज्जह निरवज्जं पवज्जं देसविरइमहवावि । निमुणह पसिद्धसिद्धतदेसंगं मोहनिग्गहणिं ॥ ५ ॥

अत्तसमं पाणिगणं रक्खह पालेह सीलमकलंकं । साहम्मिणुसु रज्जह वज्जह विसणुसु य पयिरे ॥ ६ ॥

निग्गुणजणं उवेक्खह अचुक्करिसं सयावि परिहरह । अणत्तपुव्वगुणगणमब्भस्सह नासह कसाइ ॥ ७ ॥

संतोसं च निसेवह परपरिवायं कयावि माऽऽयह । ईसरिए मा म(जह मा र)जह पावकजेसुं ॥ ८ ॥

दाणाईसु पयट्टह सेवह सुविसुद्धबुद्धिणा गुरुणो । परउवयारे गिज्झह मा मुज्झह बुज्झह सतत्तं ॥ ९ ॥

एवं च भगवओ धम्मकहमायन्निज्जण हरिसुण्णुल्लोयेणेहिं केहिंवि परिचत्तपुत्तकठत्तोहिं पडिवन्ना सवविई, के-
हिंवि परिगहिंयं सम्महंसणं, अन्नेहिं अंगीकया देसविई, अन्ने य छिन्नसंसया जाया बहवे पाणिणो, हलहरनारा-
येणेहिंवि अणाचक्खणिज्जं पमोयभरमुवहत्तेहिं पडिवन्नं सम्मत्तरयणं । अह समइक्कताए पोरिसीए वंदिऊण जयगुरुं
गया निययावासं । भयवांपि अन्नत्थ विहरिओ । एवं च वच्चंतमि काले अचं सुहसागरावगाढस्स तिविहुइराइणो
एगया समागया परिभूयकिन्नरकंठा गायणा, तेहि य पदंसियं गीयकोसलं, हरियं हियं तिविहुइस्स,
अन्नं च-गीउगगारो तेसिं जस्स मणांगपि विसइ सवणंमि । उज्झयनियवावारो चित्तलिहिउच्च सो सुणइ ॥ १ ॥

अच्छउ दूरे एयं तिरियाविहु तेसि गेयवसणेणं । निम्मीलियच्छिगो उच्छहंति नो भोयणाईसु ॥ २ ॥
एवंविहसुस्सरयागुणेण हरिस्स ते सयावि पासवत्तिणो परमप्पसायठाणं जाया ।

अन्नया य सुसेज्जानिसन्नस्स वामुदेवस्स रयणीसमए समारद्धंतेहिं गेयं, जणिओ वाढं चित्तस्स अक्खेवो, निहाणभो-
णकाले य निरूविओ वामुदेवेण सेज्जावालो, जहा-भइ ! जया मम निदा एइ तथा इमेगायणा तुमं विसजेज्जासि, ओ
देवो आणेवइ तं करिस्सामित्ति पडिवज्जियं सेज्जावालेणं, खणंतरेण य आगया राइणो निदा, तेऽपि अविज्जियसि ततोय

गाइउमारद्धा, नवरं पच्छिमरयणिसमए पबुद्धेण राइणा ते तथा गायते निसामिऊण, पुच्छिओ सिज्जावालो-अरे ! कीस एए न विसज्जिया ? , तेण भणियं-देव ! अइसवणसुहत्तेणं मए खणंतरं पडिवालिया, एयमायन्निऊण जायगाढकरोवो आगारसंवरं काऊण तुण्हक्को ठिओ तिविहु, उमगए य कमलसंडपडिबोहेण मायंडमंडले उट्टिऊण सयणीयाओ कयपा-भाइयकायवो निसण्णो अत्थानमंडवे राया, ठिया य नियनियट्ठणसु सामंतमित्तिसुहडाइणो, एत्थंतरंमि सुमरिओ रा-इणा रयणिवइयरो, आहूओ सेज्जावालो, भणिया य नियपुरिसा-अरे गीयस्स (रत्तत्तेणेण ममाणाभंगस्सयस्स) तत्त-उयतंवरसं खिवेह सवणेसुत्ति, एयमायन्निऊण नीओ सो तेहिं एगंतदेसे, कढियतउयतंबयरसेण भरिया कन्ना, महावेयणा-भिमूओ गओ य सो झत्ति पंचत्तं । तिविट्ठणावि गाढामरिसवसेण निबद्धं निविडं दुहविवाग्भेयणिज्जं कम्मं । सावि सिंह-लेसरसुया ठाणे अत्तणो पराभवं पेच्छंती हरिणा वयणमेत्तेणवि अविगणिज्जंती सुचिरमप्पाणं झूरिऊण मया तिरिएसु य उववन्ना, सेसं उवरि भन्निही । तिविट्ठवि कालंतरेण विविहसोक्खमणुंजमाणो रज्जे रट्ठे (य) सुच्छाणु-बंधसुवहतो नियभुयबलेण सेसपुरिसवग्गमवमन्नतो विविहपाणाइयायकिरियाए महारभमहापरिगहेहिं अइकूरञ्जवसा-णेण य परिगलियसम्मत्तरयणो नारागाउयं (निकाइऊण) चुलसीईवाससयसहस्साइं सव्वाउयं पालिऊण कालमासे कालं किंचा उववन्नो सत्तममहीए तमतमाभिहाणाए अप्पइट्ठाणंमि नरयावासे लभ्खपमाणे पंचधणूसियसरीरो नारगो । अइगाढपावकम्माहिं पुव्वभवसंचिएहिं गरुएहिं निहओ विसहतो दुक्खाइं परमतिकखाइं चाउद्विसिनिदुर-

वज्रसूलतिक्खखगभिज्जमाणंगो अइदीणकरुणसहं पइक्खणं विलवमाणो य ।

किं पुब्बभवमि मए कयंति जेणेरिसंमि ठाणंमि । निचंधयारतमसे उववन्नो कुच्छणिज्जंमि ? ॥ १ ॥

एवं विचिंतयंतो खणे खणे घोरेयणाभिहओ । पज्जलियगेहमज्झप्पविट्ठपंगुध विलवेइ ॥ २ ॥

अयलोऽवि कयत्तप्पारलोइयकायवो गाढसोगाभिभूओ सुसाणं व भवणं मन्नमाणो अदिट्ठपुच्चयं पिव पियज्जं च अवगणितो विसं विसयं मन्नमाणो बंधुणो बंधणं परिकप्पेमाणो पवरतरुसंडमंडिए नंदणवणे कमलकुवलयकल्लं रंधुरासु सरसीसु सिंगारागारचारुवेसासु अंतोउरीसु खणंपि चक्खुमक्खिवंतो कत्थवि रइं अलभमाणो अचंतं संभां रासारयं भावेंतो सेयंसतित्थयरुवइट्ठधम्मवयणाइं चिंतितो वइरिभवणं व गिहावासं परिचइउकामो सयणोवरोहेण कइवयवासराइं ठाऊण गओ धम्मवोसायरियसमीवे, वंदिओ परमाए भत्तीए, सूरिणाऽवि दिव्वमाणेण गाऊण तइसां भिण्णायं समारद्धा धम्मदेसणा, जहा—

खणसंजोगविओगं खणपरियंदतविविहसुहुदुक्खं । नडनच्चियव्व संसारविलसियं चित्तरुवधरं ॥ १ ॥

दट्ठण को पमायइ जिणिंदधम्ममि सोक्खहेउम्मि ? । अचंतवल्लहे वा मयंमि को सोयमुवइ ? ॥ २ ॥

जइ एगस्सेव भवेज्ज एत्थ वल्लहजणेण सह विगमो । ता परिभवोत्ति काउं सोगोऽवि जणेण कीरेज्जा ॥ ३ ॥

जात्र य समग्गभरहाहियावि भरहाइणो कयंतेणं । विज्झविया दीचा इव पवणेण पयंडवेणेण ॥ ४ ॥

ता कीस कुसलमइणो अट्टाणे चिय कुणंति संतावं ? । नाए वत्थुसरूवे खिज्जंति न जेण सण्णुरिसा ॥५॥ तीहिं विसेसयं ।
नियजीवियस्सवि जया धरणोवाओ न तीए काउं । तत्थऽण्णजीविधवे चलंमि कह कीरइ थिरत्तं ? ॥ ६ ॥
इयरजणस्स व सोगो काउं न उ जुज्जए तुह कहंपि ।
किं गिरितरूणि(ण) मंतरमणिलेण चलंति जइं दोवि (अणिलेण गिरितरूणि चलिज्ज नवि मंदरो उ गिरी) ॥७॥
एसो खु सुद्धबुद्धिस्स विब्भमो जं पियस्स मरणंमि । अक्कदणेण सिरकुट्टणेण अवणिज्जइं सोगो ॥ ८ ॥
उत्तममइण पुण भवविरूवयाऽऽलोयेणेण निवेओ । उण्णजइ तत्तो चिय विसेसधम्मज्जमो होइ ॥ ९ ॥
इय चयसु सोगपसरं सरेसु संसारदारुकरवत्तं । पव्वज्जं निरवज्जं चिच्चा रज्जं च रट्ठं च ॥ १० ॥
एयं च समायन्निज्जण ववगयसमगसोगसंतावो हलहरो भणिउमाढत्तो-भयवं ! सयं तुमहेहिं करुणापरहि-
यएहिं ममोवइट्ठं, ता पसिय इयाणिं देह पव्वज्जं निरवज्जंति वुत्ते पद्दाविओ सो गुरुणा, सिक्खविओ समणधम्मं,
देसिया दसविहचक्कवालसामायारी, अब्भुवगया य तेण सम्मं । अह गामांगरेसु अप्पड्डिवद्धो विहरिज्ज किंपि कालं
दुक्करतवचरणेहिं सोसिज्जण सरीरं कम्मनिवहं च पत्तो सो सासयसोक्खं मोक्खंति ॥
तिविट्ठूवि तेत्तीसं सागरोवमाइं अप्पइट्ठाणे अणुहविज्जण दुक्खं चुओ समणो उववन्नो सीहत्ताए एगंमि गिरिकंदरे,
तओ—उम्मुक्कवालभावो विगयासंको समगरणंमि । परिभवइ कूरचित्तो जमोव अनिवारिण्णसरो ॥ १ ॥

दारइ गइदकुंभत्थलाइं अइतिकखनक्खनिवहेण । सारंगकुलं अचलं तासइ गलगज्जिमेत्तेण ॥ २ ॥
 हिंसइ विविहजीवे इय एवं जीविऊण चिरकालं । मरिऊण पुणो जाओ नेरइओ नरयपुढवीए ॥ ३ ॥
 छिंदणंभिंदणसामलिसूलोरोवणपराइं दुक्खाइं । रोमुद्धोसकराइं सुमरणमेत्तेणवि जणणं ॥ ४ ॥
 आमरणंतं सोढुं भमिओ विविहासु तिरियजोणीसु । अह एगत्य भवंमी कम्मखओधसमभावेणं ॥ ५ ॥
 लद्धूण माणुस्सत्तं काउं छट्टट्टमाइ तवचरणं । भोगफलमज्जिऊणं उववन्नो देवलोगंमि ॥ ६ ॥
 तओ आउक्खएणं नुओ समाणो रिद्धित्थिमियसमिद्धे निरंतरमुण्यज्जमाणजिणचक्खट्ठिवलेदववासुदेवपहाणपुरि-
 ससरिए हिए एगवीस(परियरिए एगस)रूवकालपरिकलिए अवरविदेहे खेत्ते मूयाए रायहाणीए धणंजयस्स रा-
 इणो सयलंतेउरपहाणाए धारिणीए देवीए चउइसमहासुमिणसूइओ सो तिविहुजीवो कुञ्जिसि पुत्तत्तेण उवव-
 न्नोत्ति । समुचियसमए य कयं से पियमित्तोत्ति नामं । वहिओ य देहोवचएणं विण्णाणयगरिसेण य, अणण्या य
 सो धणंजयराया सरयनिसायसरिसवयणं तरुणतरणिपडिबुद्धपुंडरियलोकं मणिबडमंडियकुंडलुल्लिहियपीणगंड-
 मंडलं अकुडिउंगुंगनासावंसं बालप्यवालपाडोदुसपुडं कुंदमउलमालासिणिद्धसुसिलिद्धदंतपंतिं पसत्थेहावलयरेहं-
 तंकंठकंदलं मंसलसुविसालवच्छत्थलं महानयरगोपुरपयंडवाहुदंडं संगयपासोवसोहियसुण्यमाणमज्झभागं वियसिय-
 सयवत्तसरिच्छातुच्छनाभिं जच्चतुरयवट्ठियकडिभागं सुरिंदवारणकरकरणिजंघाजुयलं सुपइट्ठियलट्ठसुकुमालरत्तलं

चलंतं कुमारं पेच्छिऊण जायपरमसंतोसो पवररायकुलपसूयाओ कण्णगाओ परिणाविऊण पसत्थवासरे रत्ते अभिसिंचिउं तओ तहाविहाण य सूरीणं पासे पव्वज्जं पडिवज्जइ । पियमिच्चस्सवि अप्पडिहयसासणं रत्तं करितस्स कालक्कमेण समुप्पन्नाइं चउइस रयणाइं, ताणि य इमाणि—

सेणावइ गाहावइ पुरोहि य तुरय वहुइ गयित्थी । चक्कं छत्तं चम्मं मणि कागणि खग दंडो य ॥ १ ॥

एवं सो पियमित्तो समुप्पन्नचक्काइरणो अणेगनरनाहनिवहरियरिओ चक्करयणंदसिज्जमाणमगो विजयज-
त्ताए मागहतित्थाभिमुहं संपत्थिओ, कमेण य तस्सादूरदेसं पत्तो समाणो खंधावारनिवसं काऊण मागहतित्थाहि-
वस्स देवस्स साहणत्थं अट्टमभत्तं तवोकम्मं पडिवज्जइ, तस्स पज्जेते य हयरहजोहपुरिखुडो जोत्तियपवरतुरंगं चाउ-
रघंटं रहमारुढो चक्काणुमगेण केत्तिथपि भूमिभागं गंतूण कुवियकयंतभूविब्भमं अणेगरयणकिणजालकब्बुरियदि-
सावलथं वामपाणिणा सज्जीकयजीवं कोदंडं गिण्हऊण तहा वज्जसारतुंडं विविहरयणविरहयपखदेसं मणिविणि-
म्मियचक्कवट्टिनामचिंधं दाहिणकरेण सरं आयन्नमाकट्टिऊण मागहतित्थाहिवस्स सम्मुहं मुयइ, सोऽवि सरो दुवा-
लस जोयणाइं गंतूण मागहदेवस्स सहाए निसन्नस्स तस्स पुरओ निवडिओ, तं च सो ददूण निदुरनिडालवट्टनि-
विट्ठभिउडिभीसणवयणो गाढकोवभरारणनयणो भणिउमाढत्तो—

रे रे कस्स कयंतेण सुमरियं? कस्स वल्लहं न जियं? । को मज्झ कोवदीवयसिंहं व वंछइ पयंगोव १ ॥ १ ॥

किं केणइ भुयबलदप्पिण देवेण अहव मणुएणं । जक्खेण रक्खसेण व एसो खित्तो सरो होही ? ॥ २ ॥

इयं खणमेगं परिचिंतिऊण गिणहइ सरं सहत्थेणं । पेच्छइ य चक्कवट्टिस्स नामयं मणिविणिम्मवियं ॥ ३ ॥

एवं च ववगयसंसओ उवसभियकोवविगारो विविहमहामोलुचित्तमणिरयणाभरणनामं कियसरसणाहो पियमित्त-
चक्कवट्ठिणो सगासमुवंगंतूण मत्थए अंजलिं काऊण य विजएणं वद्धावेइ, भणइ थ-जहाऽहं इयाणिं तुम्ह आणा-
निइसवत्ती किंकरनिव्विसेसो, ता पडिच्छह इमं पीइदाणंति भणिऊण आभरणाइं सरं च समण्णइ, चक्कवट्ठीवि तं
सक्कारिऊण सम्माणिऊण य सट्ठणे विसज्जेइ, रहं पि परावत्तिऊण खंधावारसुवागच्छइ, भोयणाइ काऊण य किंकर-
पुरिसेहिं मागहदेवस्स अट्ठाहियामहिमं कारावेइ । तस्स य पज्जंते चक्काणुमगेण खगचावनारायकणकण्णिस्सु-
ललडलिभिं डिमालपमुहपहरणहत्थसुहडसत्थाणुजायमगो हत्थिरयणमारूढो नरिंदो कालपीथरत्तपंडुरवणणोगेगचिंध-
सहस्सेहिं छायमाणोच्च अंबरतलं हयहेसियगयगुलगुलाइयरहघणधणाइयरवेहिं बहिरयंतोच्च जीवलोयं वरदामति-
त्थाभिमुहं वच्चइ । कमेण य तहिं पत्तो समणो पुब्बविहीए वरदामदेवस्स अट्ठमभत्तं रयणपहरणं अट्ठाहियामहिमं च
करेइ । एवं पहासतित्थाहिवस्सऽवि, नवरं पभासतित्थदेवो मालं मउडं मुत्ताजालं कडगतुडियाणि य चक्कवट्टिस्स
पीइदाणं पयच्छइति । तओ पुणोऽत्रि जक्ख सहस्सपरिवुडेण अंतरिक्खगएण चक्करयेण दंसिज्जमाणमगो चक्कवट्ठी
सिंधुमहानईए दाहिणिछेणं कूलेणं सिंधूदेविभवणाभिमुहं गओ, तत्थवि अट्ठमभत्तं पगिणहइ तस्स पज्जंते य सिंधु-

देवीए सुहासणत्थाए चलयं सीहासणं, ओहिनाणमुणियचक्कवट्टिसमागमा य नाणामणिकणगरयणभत्तिचित्ताणि
दोन्नि भद्दासणाइं कडगाणि तुडिगाणि वत्थाणि पगहिऊण चक्कवट्टिसगासमागया पंजलिउडा विणएण सम-
प्पेइ, रायाऽवि तं सक्कारिय सम्माणिय सट्ठाणे विसज्जेइ । तओ पुणरवि चक्करयणं वेयहूपव्वयाभिमुहं गंतुमारद्धं,
रायाऽवि सबलवाहणो तदणुसारेण य(गच्छइ)क्रमेण य पत्तो वेयहूपव्वयस्स नियंबदेसं, तत्थ य खंधावारं निवे-
सावेइ, वेयड्डुगिरिकुमारदेवोऽवि पुव्वनाएण चलियासणो विविहालंकारहत्थो सेवं पडिच्छइ । कइवयदिगाणंतरं च
तिमिसगुहासमीवमुवागयस्स चक्किणो अट्टमभत्ततवचलियासणो कयमालयदेवो भालयलविठुलंतकरकमलो झडत्ति
चक्खुगोयरमागओ, थीरयणजोगं रयणालंकारं अन्नाणि य विविहाणि भूसणाइं पणापेइ, आणानिहेसं च बहुम-
न्निऊण गए तंमि राया विजयसेणं सेणावइं रयणभूयं सहाविऊण एवं वागेइ-भो विजयसेण ! गच्छाहि तुमं
सिंधुमहानईए पच्चत्थिमिल्लदेसं नगनगरागइपरिक्खित्तं सिग्घं साहिऊण एहित्ति, जं देवो आणवेइत्ति विणएण
सासणं पडिच्छिऊण सेणाहिवो विहियतक्कालोचियमज्जणाइवावारो महापरक्कमो तेयंसी मेच्छभासाविसारओ
विस्सुयजसो पवरकुंजरखंधाधिरूढो सन्नद्धबद्धक्कवओ उष्पीलियसरासणधणुपट्टो अणेगगणनायगंदडनायगपरिउडो
धरियधवलायवत्तो चलंतविमलचामरो पहयतूररववहिरियदियंतरो सिंधुमहानईतोरमुवागच्छइ ।

ताहे स चम्मरयणं सिंधुमहानइजलंमि वित्थरइ । बारसजोयणमेत्तं नावारूवेण तरणट्ठा ॥ १ ॥

तो तंमि समारूढो हरिकरिपाइक्कचक्करियरिओ । वीसत्थो पवणवसुल्लसंतसुमहल्लकल्लोलं ॥ २ ॥
 गोपयमिव सिंदधुनइं लंघित्ता मेच्छजाइए सवे । अणानिहसे संठवेइ रयणाइं गिण्हेइ ॥ ३ ॥
 सामी ! तुम्हे सरणं गई य एमाइ जंपमाणे ते । ठविउं सट्ठाणेसुं विणियत्तइ विजयसेणो तो ॥ ४ ॥
 पियमित्तचक्कवट्टिस्स पायपंकयजुयं पणमिऊण । रयणाइं समप्पइ सो मिलक्खुविजयं च वज्जरइ ॥ ५ ॥
 पुणरवि रण्णा भणिओ सेणाहिर्वई जहा तुमं भद् ! । गच्छसु तिमिसगुहाए कवाडउग्घाडणत्थाए ॥ ६ ॥
 ताहे तहत्ति सम्मं पडिसुणिऊणं समग्गवल्लकलिओ । गंतुं गुहासमीवे अट्टमभत्तं तवो कुणइ ॥ ७ ॥
 अह तिवसुत्तो पहणइ निविडेणं तिद्वदंडरयणेणं । ते तिमिसगुहाकवाडे महप्पमाणे वइरघडिइ ॥ ८ ॥
 दंडाभिधायपरिपेळियाइं कुंचारवं करेताइं । कुकलत्तकहियगुज्झं व ताइं विहडंति वेगेण ॥ ९ ॥
 तयणंतरं च वलिउं साहइ सो चक्कवट्ठिणो वत्तं । सोऽवि य गयमारूढो समग्गसेणाए संजुत्तो ॥ १० ॥
 चउरंगुलप्पमाणं रोगासिवनासणं मणिं घेतुं । चक्काणुमगल्लगो तिमिसगुहं विसइ भयराइओ (महराया) ॥ ११ ॥
 तत्तो तिमिसगुहंतं धयरविंद्रसणहुमइगरुए । मंडलगे सो विलिहइ कागिरियेण भित्तीसु ॥ १२ ॥
 ताहे मंडलगमऊहजालउज्जोयहणियतिमिराओ । नीहरइ सुहेण समं सेणाए सो गुहाहिंतो ॥ १३ ॥
 इओ य वेयहुपरभागवत्तिणो विलाया महापरक्कमा अपरिभूयसामत्था कणगरययधणधन्नसमिद्धा विगणिगुणेसु

निवसन्ता बहूनि गंधर्वनगररुहिरवसिन्धूमिकंपपमुहाइं उज्ज्याइयसयाइं पेच्छंति, तते णं ते ताणि पेच्छिऊण उच्चि-
ग्गा निराणंदा ओहयमणसंकप्पा विणि(दीण)यं पिव अण्णाणं सन्नंता जाव चिट्ठंति ताव सहसच्चिय उक्किट्ठिस्सी-
हनायकलयवेण समुद्धमहणसंकं समुण्णायमाणो निसियकरवालसेल्लभल्लिकुंतपहरणकरेहिं सूरहेिं अणुगम्ममाणो
पत्तो तेहिं देसं पियमित्तनरवई, तं च आगयं निसामिऊण ते मिलेच्छा पयंडकोवारुणच्छा परोप्परं मंतंति-भो भो
एस कोइ कयंतचोइओ अम्ह विसयं उवहविडकामो वट्टइ, ता तहा करमो जहा एस अंतरा चैव विणस्सइत्ति,
एवं संपहारित्ता पीडियदुब्भेयकवया विचित्तपहरणहत्था समुद्धयमगरनरवसहसहूलगरुलाइचिंथा पोरुसाभिमाण-
मुव्वहंता अहमहमिगाए गंतूण चक्किणो अगसेन्नेण संपलग्गा जुज्झिउं, तओ य अगसेणं हयपरक्कमं निवडियसु-
हंडं पडिभगरहवरं खंडियजच्चतुरंगवगं पडिखलियनरवइजणं तोहिं कयं पेच्छिऊण विजयसेणो सेणाहिचई जाय-
कोवो कमलामेलगनामं आसरयणं आरुहिऊण कुवलयदलसामलं सवत्थ अप्पडिहयं नरवइहत्थाओ खगगरयणं
च गहिऊण ते विलाए चाउदिसिंपि पसरिए पडिखलइ । किं बहुणा ?—

तिसिंख दिणयेरेणं मुयगसमूहोव पक्खिराएणं । सेणाहिंवेण निहया भीया ते अइयया सणिहं ॥ १ ॥

धेत्तूणं धरसारं पुत्तकलत्ताइयं च मरणभया । अइदूरमवक्कंता सिग्घं विसमेसु ठाणेषु ॥ २ ॥

ताहे सिंधुनई कूले परिचत्तसव्वावारा । उत्ताणा निव्वसणा अट्टमभत्तं पणिणहंति ॥ ३ ॥

सत्तुबलहणणेहं पुर्विपिय पाडिहेरणपरे । सुमरंति एगचित्ता कुलदेवे मेहसुहनामे ॥ ४ ॥
अट्टमभत्तस्संते तत्तो चल्यासणा सुरा एंति । गयणंगमोइन्ना भणंति किं सुमरिया अम्हे ? ॥ ५ ॥
सिद्धं च चिलाएहिं जह अम्हे रिउबलेण पडिहणिया । ता तुम्हे सुसुमूह रिउपक्खं अम्ह रक्खट्ठा ॥ ६ ॥
देवेहिं तओ मणियं एसो पियमित्तनाम वरचक्की । काउमिमस्स विणासं अहो न सक्कोऽवि सक्केइ ॥ ७ ॥
ता भो अणभिमवणिल्लो एस, केवलं तुम्ह पक्खवायमणुसरंता किंपि उवसग्गेमोत्ति निवेइऊण तेसिं अंति-
याओ ते मेहसुहा अवक्कमंति, नरवइखंधावारस्स उवारिं मेहनिवहं विउवंति, तओ जुगसुसलसुट्ठिपमाणधाराहिं
निरंतरं वारिनिवहं सत्तरत्तं जाव मुयंति । पियमित्तचक्कवट्ठीऽवि तं तहाविहं पिच्छऊण दिवचम्मरयणं परासुसइ,
तंपिय खिप्पमेव दुवालस जोयणाइं तिरियं पवित्थरइ, तत्थ सो समत्थोऽवि खंधावारो समारुइ, पुणोऽवि नरिंदो
नवनवइसइस्सकंचणसलागपरिमंडियं महरिहं विविहमत्तिचित्तं डिंडीरपिट्ठपंडुरं छत्तरयणं खंधावारस्स उवारिं वारस
जोयणाइं समहियाइं वित्थारेइ, मणिरयणं च किरणजालं मुयंतं सरयरविसरिच्छं छत्तमज्झभागे ठवेइ, गाहावइवि
चम्मरयणेगेइंसंमि तदिवसपइन्ननिष्फणपूयाणं सबघण्णाणं अणेगकुंभसहस्साइं उवट्ठवेइ, एवं च सो राया तव-
प्ययमेहिं अणुविग्गे चम्मरयणमारूढो छत्तरयणच्छन्नोवरिमविभागो मणिरयणकओल्लोओ गाहावइउवट्ठवियवन्न-
निचओ निममवणओव सुहेण अच्छेइ । किं बहुणा ?

नवि से छुहा न वाही नैव भयं नैव विज्जए दुक्खं । विजयाहिवस्स रण्णो खंधावारस्सवि तेहव ॥ १ ॥
अह पियमित्तनरिंदो संपत्ते सत्तरत्तपज्जते । चित्तेइ को णु एसो जो मं विहवइ सलिलेणं ? ॥ २ ॥
एत्थंतरंमि आवद्धपरियरा विविहपहरणसमेया । सोलस जक्खसहस्सा मेहमुहाणं गया पासे ॥ ३ ॥
भणिग्या य तेहिं रे रे अप्पत्थियपत्थिया धुवं तुम्हे । जं चक्खवट्ठिणोऽविहु उवसगं एवमायरह ॥ ४ ॥
ता मुंचह चक्खुपहं अहवा जुद्धत्थमभिमुहा होह । इइ भणिए मेहमुहा गया चिलायाण पासंमि ॥ ५ ॥
साहंति सबवइयरमसमत्थत्तं च अत्तसत्तीए । नरवइसेवाकज्जे पेसंति य ते चिलाएऽवि ॥ ६ ॥
अह मुक्ककेसहत्था पहरणरहिया नियंसिओल्लपडा । भयवसविंसंतुलंगा गंतूण नमंति ते मेच्छा ॥ ७ ॥
कणगं विचित्तरयणे अन्नपि विसिट्ठवत्थुमण्णिंति । पडिवज्जिय तस्सेवं नियावराहं च खासंति ॥ ८ ॥
एवं च पवज्जियसेवा मिलेच्छा सम्माणिऊण चक्किणा विसज्जिया सट्ठणेषु, सेणावईवि सिंधुमहानईए बीअखंड-
साहणत्थं पेसिओ पुव्वविहीए, तं च साहिऊण पच्छाऽऽणए तंमि पियमित्तो राया चक्काणुमग्गेण पट्ठिओ वेयड्ढा-
भिमुहं, कमेण य पत्तो पव्वयनियवदेसं । तओ मणसीकरेइ उत्तरदाहिणसेठिविजाहरे, तेऽव्विय भयखुभियचित्ता
नाणाविहकणगरयणपमुहपहाणवत्थुसमग्घणपुव्वयं नरवइणो सिरसा सासणं पडिच्छंति । सेणावईऽवि पुव्वकमेण गंगा-
महानईपुव्वखंडं साहिऊण पासमल्लियइ ॥

पुव्वक्कमेण पुणरवि खंडुगुहं लंघिऊण नरनाहो । चउरंगबलसमेओ गंगापच्चत्थिमे कूले ॥ १ ॥
 खंधावारनिसेसं काऊणं पवरयणपडिपुण्णो । अट्टमभत्तपुरस्सरमह गिण्हइ नव महानिहिणो ॥ २ ॥
 मणवंछियत्थकरणेक्कपच्चला वइरनिम्मियकवाडा । बहुपुन्नपावणिज्जा इमेहिं नांमेहिं ते नेया ॥ ३ ॥
 नेसय्य पंडुए पिंगले य तह सव्वरयण महपउमे । काले य महाकाले माणवग महानिही संखे ॥ ४ ॥
 एएसिं चिय चक्की निहीणमनिहीणपोरिसारंभो । सक्कारपुव्वयं कारवेइ अट्टाहियामहिमं ॥ ५ ॥
 गंगापुरत्थिमिछं सेणावइणा दुइज्जमवि खंडं । गाहावइ तत्थ ठिओ भुंजंतो विविहविसयसुहं ॥ ६ ॥
 एवं च सो पियमित्तचक्कवट्ठी पसाहियछवखंडो निज्जियपडिवचखचक्को अप्पणो आणाए ठवेंतो नराहिवे दंसंतो
 नियपरक्कमं सम्माणंतो सेवगज्जं विरयंतो दीणाणाहाण अणवरयदाणं बत्तीसनरवइसहस्साणुगम्भमाणो पडिनियत्तो
 मूयानयरीए, पडिच्छिओ दुवालसवारिसिओ महारायाभिसेओ । एवं च कयकायवो बत्तीसाए बत्तीसवद्धनाडयस-
 हस्साणं सोलसण्हं जवखसहस्साणं तिण्हं तिसट्ठीणं सूयसयाणं अट्टारसण्हं क्षेणिप्पसेणीणं चउरासीए तुरगसयस-
 हस्साणं चउरासीए पवरकुंजरसयसहस्साणं छणउइए मणुसकोडीए वावत्तरीए पुरवरसहस्साणं वत्तीसाए जण-
 वयसहस्साणं छन्नउइए गामकोडीणं नवणउइए दोणमुहसहस्साणं चउवीसाए कब्बडसहस्साणं अडयालीसाए
 पट्टणसहस्साणं चउवीसाए मंडवसहस्साणं वीसाए आगरसहस्साणं सोलसण्हं खेडसयाणं चउदसण्हं संवाहसह-

स्साणं अन्नेसिं च राईसरसेट्टिसेणावइपमुहाणं जणाणं आणिससरियसारं सामित्तमणुपालितो दिव्वं विसयसुहुमणु-
मुजंतो य कालं बोलेइ ।

एगथा य पसंतचित्तो भवणोवरिभूमिगाए ओलोयणगओ जाव दिसावलयमवलोएइ ताव सहसच्चिय पेच्छइ
गयणं गणे समुत्थियं थेववित्थारं मेहखंडं, तं च-कज्जलभसलगवलोइलकालिंदीजलसामलं फुरंतविज्जदंडुडामरं
धंतकलहोयधवलगोपंतिमणहरं समुल्लसंताखंडलगंडीवाडंवरमणिज्जं मंदमंदमुक्काविंदुसंदोहसुंदरं गंभीरगज्जिरवतं-
डवियसिंहडिगणं खणमगं दिसामुहेसु पसरिऊण सहसच्चिय समुच्छलियपवलपवणप्पणोलिज्जमाणं सव्वहा पणट्ट-
मवलोइऊण वित्तेइ-अहो केरिसी वत्थुपरिणई? जं तारिसं घणपडलमचंतनयणाभिरामं खणमेत्तमुन्नइ पाविऊण संपयं
सव्वुच्छेयमावन्नं, एयाणुमाणेणं चिय सव्ववत्थूणं एसा गई, खणविगमयम्मं य एत्थ किं पडिबंघटाणं?, का वा रई?
को वा उत्तरोत्तरकायव्वविहाणुज्जमो? कहं वा खणमेत्तेपि वज्जवत्थूसु विस्सासो, अच्छंतु वा वज्जवत्थुणो, जं
इमं सयलमणोरहमंदिरं सरीरं जस्स किर निमित्तं कीरइ कर्तुरयरहजोहजुइपुरागरपमुहरज्जंगोवज्जणसमुज्जमो
तंपि उप्पायधम्मत्तणेण पक्कखदिट्ठविणइमेहमालं व धुवं विणस्सरसीलं, अओ कुसला कहमेयस्स निस्सार-
पोगलचओवचयरूवस्स अट्ठिमिजवसाकीहरमंसमुक्काइविलीणकारणसमुब्भवस्स विविहरोगनिवहरिगहियस्स पइ-
दिवसण्हाणविलेवणभोगणपमुहोवयारपरिपालणिज्जस्स सीयतावायंकाइदोसरक्खणिज्जस्स परमदुगुच्छणिज्जगंधस्स

असुइपडिपुण्णकलसस्सेव बाहिरमेत्तरमणीयस्स दुज्जणचेट्ठियस्सेव अविथारयुंदरस्स महानरिंदस्सेव विसिट्ठविस-
याणुरागिस्स दुद्धपाणपरव्वसमज्जारस्सेव अणवेक्खियपयंजमदंडाभिघायस्स विविहप्पयारेहिं उवलालणत्थं गि-
ण्हंति रत्नं करेति निरेक्खचित्ता पाववावारं सथावि रक्खणत्थं विविहपहरणहत्थं धरेति सुहडसत्थं अणवरयंस-
तावकरं कोहलोहाइवेरिनियरं निच्चं पचासन्नाट्ठियं अणवेक्खिज्जण जोयणसहस्संतरियं संकंति सत्तुनिवहं सक-
ज्जमत्ताणुरागिणं पि निक्खवडपेम्मं मण्णंति परियणं अवस्संभावनिहणं पि धुवं लक्खंति धणं, ता अहो तेसिं पम-
त्तचित्ता अहो निव्वियया अहो महामोहमहिमया अहो इहलौयपडिबंधपरव्वसया अहो आगामिदुक्खनिरेव-
क्खया अहो दुहविवागावलोयणपडिक्कूला, इइ चिंतयंतस्स पढियमेगेण कालनिवेयएण वेयालिएण—

विच्छायं पच्छिमासागयमिममहुणा सूरविंबं मिलता, रोवंति द्वाडलिजालुब्भडरवमिसओ पुंडरीयाण संडा । कंदंते
चक्कवाया गुरुविरहमहादुक्खसंतत्तगत्ता, धी संसारो (संसारो धी) असारो जमिह फुडमहो सासयं नत्थि किंपि ॥१॥

राइणाडवि एवमायन्निज्जण चिंतियं अहो अणिचयाए संबद्धं साहु पढियं एएण, जुत्तो संपयं मम धम्मज्जमो काउत्ति
निच्छिज्जण पसुत्तो रयणीए । ततो खणे खणे भवनिग्गुणत्तं पेहमाणस्स पाणिवहपमुहाइ दुक्कियाइ गरिहतस्स संसारुब्बयं
वहमाणस्स सुहिसंबद्धं बंधणं व गणेंतस्स भोगे भुयंगेव परिकप्पितस्स मायंदजालं व जीवलोयविलसियमवलोकयंतस्स
विसालसेज्जाएवि तल्लुवेळिं करेंतस्स कहकहवि बोलीणा रयणी, समुग्गओ दिवायरो । एत्थंतरे पढियं भागहेण—

पडिहयपडिवक्खं चक्कादिनेक्कसोक्खं, मिउकरमणिज्जं सज्जणांससणिज्जं ।

तुममिव रविबिंबं पुच्चसेलावलंबं, उदयमिममियाणिं जाइ दोसेक्कहाणिं ॥ १ ॥

इमं च उदयसहसुंदरं सिलोगमायन्निज्जण संभावियापुब्बलाभो नरवई समुट्टिऊण सयणिज्जाओ कयणाभाइयकायवो निसन्नो सीहासणे । एत्थंतरे समागया उज्जाणवाल्या, कयप्पणामा विन्नविउमाढत्ता य—देव ! वद्धाविज्जह तुब्भे जेण समागया भगवंतो बहुसीसगणसमेया पोट्टिलाभिहाणसूरिणो, समोसरिया य तुम्ह उज्जाणत्ति । एवमायन्निऊण निब्भरं पमोयभरमुच्चहतो दाविऊण तेसिं चिंताइरित्तं पारिओसियं पवरवारणखंधाधिरूढो सब्वपरियणस-हिओ महाविमूईए गओ चक्की उज्जाणे, वंदिया सब्वायेणं सूरिणो, उवविट्ठो य जहासन्निहियधरणीए, जोडियकरसंपुडेण साहिओ गुरुणो मेहविगमदंसणुब्भूओ सद्धम्मससुज्जमसंमुहो नियचित्तपरिणामोत्ति, गुरुणा भणियं-भो महाराय ! कुसलाणुसारिणी तुज्झ बुद्धी, संपन्नो कम्मविवरो करकमलं निलीणा मोक्खलच्छी, जस्स तुह एवं-विहा वासणा, ता महाराय ! तिविहा पुरिसा भवंति, तंजहा—उत्तिमा मज्झिमा जहन्ना य । तत्थ—

उत्तमपुरिसा भवभंगुरत्तणं जाणिऊण णियमईए । परिचत्तगिहकलत्ता परलोयहिंयं पवज्जति ॥ १ ॥

गरुयं रोगायकं तहाविहंपि अ विओगदुक्खं च । दट्ठूण मज्झिमा पुण कहमवि लगंति जिणधम्मो ॥ २ ॥

जे उ जहन्ना ते सव्वहावि विविहावईनिमग्गावि । दुक्खसयपीडियाविट्ठु न मुत्तिमग्गंमि लगंति ॥ ३ ॥

करुणोयहिणा गुरुणा भणिज्जमाणावि विविहवयणेहिं । अच्छउ काउं धम्मं सहहिउंपि धि न सकंति ॥ ४ ॥
 इय मज्झिमा जहन्ना य हुंति धम्माहिगारिणो न तहा । जह मुणियभवसरूवा सभावओ उत्तिमा पुरिसा ॥ ५ ॥
 ता भो महायस ! तुमं जोगो सव्वणुभणियधम्मस्स । संपइ करेसु सहलं एयायरणेण नियजीयं ॥ ६ ॥
 नहि विन्नायसरूवे चिंतामणिपमुहदिव्वरणंमि । अगहणिच्छा जायइ क(इ)यावि (वि)सुद्धिबुद्धीण ॥ ७ ॥
 अन्नं च-जलवतरलं जीयं सुरिंदकोदंडविब्भमं पेमं । गयकणतालचवलं पुण्णंपि सरीरलायणं ॥ ८ ॥

मारुयपणुणणपण्णं व भंगुरं सुंदरंपि तारुणं । आवयलक्खनिमित्तं वित्तंपि कहंपि पविट्ठं ॥ ९ ॥
 एएसिं ऐकंकेपि नूण वेरग्गकारणं गरुयं । सुहबुद्धीणं जायइ किं पुण सव्वेसि समवाओ ? ॥ १० ॥

अच्छरियमिमं जे एरिसेहिं संवेगभावहेऊहिं । निच्चं विज्जेतेहिवि न भोक्खमग्गे पयट्ठति ॥ ११ ॥

किं बहुणा कुणसु तुमं संपइ सद्धम्मकम्मपडिवत्तिं । बहुविग्घो सेयत्थो कालविलंबो न ता जुत्तो ॥ १२ ॥

एवं सोच्चा चक्खवट्ठिणा भावसारं चलणेसु निवडिऊण भणिओ गुरु-अवितहमेयं, इयाणिं समीहामि अगाराओ
 अणगारियं पडिवज्जिउं, गुरुणा भणियं-भइ ! मा पडिबधं करेसु, जुत्तमेयं तुम्हारिसाणं मुणियपरमत्थाणंति बुत्ते
 वंदिऊण गुरुं गओ नयरीए चक्खवट्ठी । समाहूया नायरयमंति सामंतसेणावइपमुहपहाणपुरिसा, भणिया य-भो भो
 इयाणिं जाया अह गिहपरिचायबुद्धी, काउं वंछामो निगंथपावयणपडिवत्तिं, ता खमियवं तुब्भेहिं जं मए गुरा

निथोइया आणानिहसे, काराविद्या सेवाविहिं, पीडिया समहिगकरगहणेणत्ति, तेहिं भणियं-देव !
वज्जोवलेहिं घडियं हिययं अम्हारिसाण निब्भंतं । जं एरिसाइं वयणाइं तुम्ह सोउं न विहडेइ ॥ १ ॥
जणणीजणगा जेणं पढमं उवगारिणो परं जाया । परमुत्तरुत्तरगुणेषु नूनं अम्हे तए ठविया ॥ २ ॥
ता कह इयाणिं तुह चरणकमलसेवाविवज्जिया गेहे । निग्घणचित्ता अम्हे निवसंता नेव लज्जामो ॥ ३ ॥
जह तुम्हे तह को वा अवराहपयं तित्तिविखही अम्ह । जह इहलोए तह परभवेऽवि ता नाह ! तं सरणं ॥ ४ ॥
एवं भणिए राइणा वुत्तं-जइ एवं ता निययगेहेसु गंतूण सट्टाणे पुत्ते ठविऊण य कयसयलकायद्या पवरसिविगा-
धिरूढा ममंतियं पाउब्भवह, तहत्ति पडिवज्जिऊण गया ते सगिहेसु, कयं तक्कालोचियं किच्चं, राइणावि
अभिसित्तो नियज्जे पुत्तो, समप्पिया करितुरगाइणो, कयमज्जणालंकारपरिग्गहो य चारुसिविगाधिरूढो तेहिं सवेहिं-
वि पवज्जागहणाभिलासीहिं परिवुडो दिज्जंतेसु अणिवारियप्पसरं कणगाइदाणेषु वज्जंतेसु चउविहत्तरेसु नचंतेसु तरुणि-
सत्थेसु थुणंतेसु मागहनिवहेसु गओ उज्जाणं, ओयरिओ सिविगाओ, तिपयाहिणीकाऊण वंदिओ सूरी परिचत्ता-
भरणस्स य दिन्ना से गुरुहिं पवज्जा, अंगीकया य तेण भावसारं । अह पटियजिणिंदुहिदुसिदंतसत्थो गुरुजणपय-
आराहणुज्जुत्तचित्तो परिहरियपमायुम्मायमायापवंचो बहुविहतवकम्मासेवक्खीणदेहो ॥

विमलगुणकलावं अज्जिणंतो जिणंतो, कुसुमसरपमोक्खं वेरिवग्गं समग्गं ।

नियजियमिव सन्धे पाणिणो रक्खमाणो, खणमिव अचयंतो सुत्ततत्तत्थच्चित्तं ॥ १ ॥
 सुहदुहमणिलेद्धूसत्तुमिन्ताइएसुं, तुलमिव समरूवं चित्तवित्तिं धरितो ।
 तिणमिव पडलगं छंडितं सव्वसंगं, विहरइ वसुहाए निप्पकंपो महप्पा ॥ २ ॥
 तो वासकोडिमंगं पव्वज्जं पालिऊण कयमरणो । सुक्कमि देवलोए जाओ देवो महिद्धीओ ॥ ३ ॥
 इय वीरनाहचरिए सुपवित्ते दुक्खदारुकरवत्ते । सिवपुरंसमुहपत्थियमंगलकलसेक्कवरसउणे ॥ ४ ॥
 उसभजिणकहियहरिचक्कवट्टिपयपवरलामपडिबद्धो । जणमणविम्हयजणणो संमत्तो तइयपत्थावो ॥ ५ ॥ जुम्मं ॥
 (इति तइओ पत्थावो)

चतुर्थः प्रस्तावः

हरिचक्कवईण इमा भणिया वत्तवया पयत्तेणं । एत्तो नंदणनरयइवित्तंतं भे परिकहासि ॥ १ ॥
 अत्थि सयलवसुंधारमणीरयणकन्नपूरोवमा वेसमणरायहाणिविब्भमा छत्ता नाम नयरी, तत्थ धम्मराओ
 नयमगपव्वत्तेण कयंतो कोवेण अज्जुणो कित्तीए बलमहो भुयबलेण मयलच्छणो सोमयाए दिणयरो पयावेण पयणो
 सरीरसामत्थेण गुरू गुरुबुद्धिभवेण महुमहो बलिसत्तुदमणेण वम्महो रूवेण सयलजयपायडजसो जियसत्तु नाग
 राया, तस्स य मयरद्धयपणइणीसमइरेगरूवविभवेडवि विगयदप्पा इत्थिभावेडवि दूरपरिचत्तमाया जहत्थाभिहाणा

भद्रा नाम देवी, तीए सद्धिं अणुरुक्खविसयसोक्खमणुहवतस्स राइणो वच्चंति वासरा, अन्नया य सो पियमित्तो
आउयक्खएणं देवलोगाउ चइऊण समुप्पण्णो तीसे पुत्तत्तणेण, कयं च समुचियसमए नंदणोत्ति नासं, धवल-
पक्खससहरव्व वड्डिओ सरीरेणं कलाकलावेण य । अन्नया पिउणा जोगोत्ति कलिऊण निवसिओ नियपए, जाओ
सो नंदणो राया, पुव्वप्पवाहेण पालेइ मेइणी । एवं च तस्स निज्जिणंतस्स सत्तुनिवहं इंदियगणं च वित्थारंतस्स
दितासुहेसु निम्मलं जसप्पसारं गुणनिवहं च पणासंतस्स दोससमूहं पिसुणवगं च नितस्स समुन्नइ कोसं वंधुजणं
च परिपालितस्स साहुलोयं गुरुजणोवएसं च समइक्कताइ चउवीसवाससयसहस्साइ । अन्नया य बाहिरुजाणे समोसडा
भयवंतो भीमभवजलहितरणतरंडा विमुद्धसन्नाणाइगुणरयणकरंडा मोहमहामलपेण्णपयंडा कुमयतमोसुसुमूरण-
चंडमायंडा मिच्छत्तंधजअवलंबणेक्कदंडा पडिबोहियभवियकमलखंडा सुगहियनामधेया पोट्टिलाभिहाणा थेरा,
तओ सो राया विण्णायतदागमणो वियसियवयणो समुल्लसियकवोलो वियंभियसवंगरोभंचकुओ समागओ वंद-
णत्थं । तओ तिपयाहिणीकाऊण पढमदंसणुच्छलियहरिसपगरिसविप्फारियाणं धवलदिट्ठिवायाणं छलेण विल-
सियसभमरसियकुसुमोहिं पूयापब्भारंपिव सव्वगियं गुरुणो करेमाणो पयलंतनयणाणंदजलेण पक्खालेउसुवट्ठिओव्व
चरणे चरणेक्करसियमाणसो माणसोयरहिओ हिओवएसोवलंबकामो कामोवघायसूरस्स सूरिणो निवडिऊण चलणेसु
परमपमोयमुव्वहतो भणिउमाढत्तो—

वज्रिहरहरिसुराणं पि अज्ज मन्नामि अप्पयं अहिंयं । जं तुम्ह पायपउमं दुल्लहलंमं मए पत्तं ॥ १ ॥
 ते दूरनिरंतरवित्थरंतमुहनिवहभाइणो मणुया । जे तुम्ह चलणकमले कुणंति भसलत्तणं धन्ना ॥ २ ॥
 जीविज्जइ कज्जि एत्तियस्स तुच्छेऽवि जीवल्लोयंमि । जेण किर कहवि तुम्हारिसेत्थ दीसंति तित्थसमा ॥ ३ ॥
 उव्वहउ मही भुवणत्तएवि पयडं वसुंधरा नामं । जा अज्जवि तुम्ह सरिच्छपुरिसरयणाइं धारेइ ॥ ४ ॥
 इय थुणिऊणं विरए भत्तीए नंदणे नरिंदंमि । जोगोत्ति कलिय कहिउं पारद्धो सूरिणा धम्मो ॥ ५ ॥
 भो नरवइ ! संसारे सुचिरं परिभमिय दुक्खसंतत्ता । नरयाइगईसु केऽवि पाणिणोऽणंतकालेणं ॥ ६ ॥
 बालतवायराणाओ अहवावि अकामनिज्जरवसेण । पावंति माणुसत्तं कहकहवि हु रिद्धिसंजुत्तं ॥ ७ ॥ जुम्मं ॥
 पत्ते य तंमि अविगणियभवभया चत्तधम्मपडिबंधा । हीलियधम्मायरिया उव्वहसियविसिद्धज्जणेत्ता ॥ ८ ॥
 विसएसु पसज्जंती पाणिवहाईसु संपयदंति । भंगुरमवि ससरीरं मन्नंता सासयं मूढा ॥ ९ ॥ जुम्मं ॥
 अन्ने पुण मणवंछियभोगुवभोगोवलंभभावेऽवि । आणिस्सरियपहाणे विस्संभरनायगत्तेऽवि ॥ १० ॥
 विसयवामूढाविहु धम्मगिरं सुणिय धम्मगुरुमूले । नरवइ ! नरसिंहो इव पव्वज्जं संपवज्जंति ॥ ११ ॥ जुम्मं ॥
 अहवा पुण्णवसज्जियरज्जदुग्धापलच्छिच्छिहो । नरविक्रमनरनाहो तस्सेव सुओ महासत्तो ॥ १२ ॥
 एए च्चिय महणिज्जा पवरं एयाण चेव पुरिसत्तं । जेसिं जणविम्हयकरं चरियं सलहिज्जइ जयंमि ॥ १३ ॥

इमं च सोच्चा नंदणनराहिबेण जंपियं-भयवं ! को एस नरसीहो ? को वा तस्स सुओ नरविक्रमो ? कंहं वा एसो रज्जदुगं लद्धूणवि पव्वजं पयश्नोत्ति सवित्थरं साहेह, महंतं मे कोउगं, सुुरिणा जंपियं-निसामेहि ।

अत्थि कुरुविसयतिलयभूया अदिट्ठुपरचक्रभया जणनिवहाणुगया जयंती नाम नयरी,
पालेइ तं च ससहरसरिच्छपसरंतकित्तिपब्भारो । निज्जडिमपयावक्कतत्तत्तुपणिवइयकमकमलो ॥ १ ॥

उत्तुंगतुरयसिंघुरपक्कलपाइक्कचक्कलकलित्थो । सक्कोव्व सुरपुरिं परमविक्रमो राय नरसिंघो ॥ २ ॥
विसमच्छो इत्थीलोलुओ य दुग्गाववद्धनिच्चरई । जस्स हरोऽवि न सरिसो तस्स समं कं जणं भणिमो ? ॥ ३ ॥

तस्स य नीसेसअंतैउरप्पहाणा वयणलायणावगणियपडिपुण्णचंदमंडला सल्लियेव्वेहलगइविजियराय-
हंसा कुम्भुण्णयकमलकोमलपाडलचलणजुयला रायहाणिव्व मयरद्धयनरनाहस्स विसालसालव्व विमलसीलसाली-
णयामहामोछमंडस्स मंजूसव्व सव्वरइसोक्खमणिखंडभंडारस्स चंपयमाला नाम भारिया अहेसि, जीसे भंगुरत्तणं
तिरिच्छिच्छिविच्छोहेसु न धम्मकम्मच्छाहेसु तरलया विमलमणिसुत्ताहारे न विसिट्ठोयववहारे तणुत्तमुदरस्स न
सरस्स कुडिलत्तं केसकलावस्स न सप्पणयालावस्स, अवि य—

नियरुवविजियसुरवहुजोव्वणगव्वाए कुवल्लयच्छीए । उब्भडसिंगारमहासमुहदुद्धरिसिंघेलाए ॥ १ ॥
को तीए भणियविब्भमनेवत्थच्छेययागुणसमूहं । वण्णेउ तरइ तूरंतओऽवि जीहासएणंणि ? ॥ २ ॥

तथा—नियचक्रसंधिरक्खणवियक्खणो पयइपालणाभिरओ । अन्नोऽन्नवद्धपणओ दूरं संतोससारो य ॥ ३ ॥

सुप्पणिहियपणिहियओ पसुणिथरिउचक्कगुविलवाचारो । पडुभत्तो गुणरागी निवूढभरो महारंभो ॥ ४ ॥

एक्केक्कपहाणगुणो मंतिजणो बुद्धिसारपमुहो से । अत्थी समत्थनयसत्थ(नि)समणवित्थरियमइप्पसरो ॥ ५ ॥

अणवरयमसुरकीरंतडमरभयविडुसुरवहूसुहडं । हीरंतपवरयणं जो सोच्चा तियसरायपुरिं ॥ ६ ॥

उवहसइ सुरगुरंणिव सबुद्धिमाहप्पपडिहयविपक्खो । तस्स किर मंतिवगस्स भणसु केणोवमं कुणिमो ? ॥ ७ ॥ जुम्मं ।

एवंविहगुणे मंतिजणे समारोचियरज्जचित्तमहाभरस्स लीलाए चिय धरं धरंतस्स गामागरनगराउलं धरणिमंडलं

वससुवणिंतस्स जायमरणभयवामोहं दुइंतसामंतसमूहं पवत्तयंतस्स दीणाणाहज्जमणोवच्छियपूरणेक्कपच्चलाओ महा-

दाणसालाओ कारिंतस्स तुंगसिंगोवहसियहिमसेलसिहरसिंगां मयणाइमंदिरां निसामितस्स धम्मत्थपयासण-

समत्थां समयसत्थां आराहितस्स दुक्करतवचरणसलिलपक्खालियपावमलां गुरुचरणकमलां निवारितस्स ज-

णियज्जणवामोहं धम्मविरोहं सम्माणितस्स गुणगणोदगं पणइसयणवगं पुव्वज्जियसुकयसमुब्भवंतचित्ताइरित्तो-

क्खस्स पुरिसत्थसेवणभुज्जयस्स नयविणयवंतस्स दाणाणंदियवंदिज्जणसंदोह्गुट्ठुल्लट्ठुचरियस्स वोळिति वासरा तस्स

राइणो भुयणपथडस्स । अन्नया य विचित्तिचित्तमणहरंमि मंदिरंमि पच्छिमरयणीसमए सुहसेजाए सुत्तस्स तस्स

मंदीभूरंमि निदापसरे वियक्खणेण पढियमेक्केण जामरक्खगपुरिसेण—

जे पुवपुरिसवंसप्परोहगाढगुणरूढमूलसमं । बेरिकुलकमलनिहलणकुंजरं सयलगुणनिलयं ॥ १ ॥
पुत्तं ठविउं नियए पयंमि पडिवन्नसंजसुजोगा । इह परमेये य कह ते पावित्ति न निव्वुइं पुरिसा ॥ २ ॥ (जुम्मं)
एवं च सोच्चा चिंतियं रत्ना-अहो दुल्लभमेयं, जओ मम एत्तिक्कालेऽवि पउरासुवि पणइणीसु न एक्कस्सवि कुलाल-
वणस्स पुत्तस्स लामो जाओ, अच्छउ सेसं, एवं ठिए य किं करेमि? किं समाराहेमि?, कत्थ वच्चामि? कस्स
साहेमि? को उवाओ? के वा एरिसक्कजे सहाया? कोय मे पुरिसयारो? का वा पुव्वकस्मपरिणइत्ति खणं किं-
कायव्वयमूढयं अणुभविय तवेलं चेव अंगीकयसत्तभावो एवं सम्मं परिभाविउं पवत्तो-

परलोयपवत्ताणं जइवि सुएहिं न होइ साहारो । जं सव्वंसय उवारिं गओवि नगओ दुहं कुणइ ॥ १ ॥
तहविय पुव्वनराहिवसंतइवुच्छेय दुक्खमक्खिवइ । मज्झ मणो पुव्वनरिंदरक्खिओ कुरुजणवओ य ॥ २ ॥ (जुम्मं)
एत्थंतरे जायाइं समुद्धियमारुंडकारंडवंसचक्कवायकुलकोलाहलाउलियाइं दिसिसुहाइं वियलंतपभापसरो वि-
च्छाईभूओ तारायानियरो पसरिया सिंदुरेणुंजपिंजरा सूरासारहिपभा ताडियाइं पडहसुवझल्लरिंभभाभेरीभंकार-
भासुराइं पभायमंगलतूराइं समुग्गओ कमलसंडपयंडजइविच्छइखंडणुड्डामरकरपसरो दिणयरो, तओ उट्टिऊण स-
यणिज्जाओ निस्सरिओ वासभवणाओ कयपाभाइयकिओ अंगरक्खपीढमइप्पमुहपहाणपरियणाणुओ अत्थाणीमंडवे
गंतूण राया अणेगमणिकिरणविच्छुरियंमि सूराव पुव्वपव्वयसिहरंमि कणयसिहासणंमि निविट्ठो, तयणंतं च ठियाओ

उभयपासेसु चामरगाहिणीओ निविट्ठा य नियनियट्ठाणे मंतिसामंतसुहडखंडरक्खपामोक्खा पहाणपुरिसा पडि-
 च्छियाइं पच्चतरायपेसियमहरिहपाहुडाइं चित्तिथाइं रज्जकजाइं, खणंतरे य पेसियनीसेससामंतपभिइजणो कइव-
 यपहाणजणपरियरिओ एंगंतट्ठिओ रयणिवइयरं बुद्धिसारपमुहाण मंतीणं संसिऊण पुच्छिउमेवं समारद्धो-भो
 मंतिणो ! सुणह तुब्भे समयसत्थाइं बुज्झह तंतमंतपडलाइं पज्जुवासह विज्जासिद्धे सयंपि सद्दोवहासुद्धबुद्धिणो विवे-
 यह गुविलंपि कज्जजायं, ता साहह कहभिमस्स सुयलाभंचितासायरस्स पारं वच्चिस्सामोत्ति ? खणंतरं च चित्तिय
 जुत्ताजुत्तं भणियं मंतिवग्गेण-देव ! सुट्ठु सट्ठाणे समुज्जमो, अम्हे पुरावि देवस्स एयमट्ठं विद्वविउकामा आसि,
 संपयं पुण सयमेव देवेण सिट्ठे लट्ठं जायं, किं तु देवो अम्हे उवायं पुच्छइ, तत्थ य किं साहेमो ?

अइदिद्वनाणनयणोवलब्भरूवंमि एत्थ वत्थुमि । कमुवायविहिं भणिमो ? किं वा पच्चुत्तरं देमो ? ॥ १ ॥

आगारिगियगइभणिइगोयरं मिणइ मारिसो अत्थं । एवंविहे य कज्जे अम्हं को बुद्धिवाचारो ? ॥ २ ॥

एयं पुण जाणेमो नियनियकम्माणुरूवठाणेसु । जीवा उवायविरहेवि होति पुत्ताइभावेण ॥ ३ ॥

हसिऊण भणइ राधा जइ एवं जणणिजणगविरहेऽवि । गयणंगणे पइक्खणमुववज्जंतीह किमजुत्तं ? ॥ ४ ॥

कम्मपहाणत्तणथो ता मा एगंतपक्खमणुसरह । जं दव्वखेत्तकालावि कारणं कज्जसिद्धिमि ॥ ५ ॥

अह भालयलमिलंतकरकमलं जं देवो आणवेइ अवितहमेयति मन्निऊण बुद्धिसारपमुहो मंतिवग्गे भणिउमा-

दत्तो—देव ! जइ एवं ता निसामेहि, अत्थि इहेव साहियपयंडचडियाविजो मुंडमालालिकियविगहो निउणो पि-
सायसाहणेसु साहसिओ साइणीनिगहे कयकरणो खेत्तवालावयारेसु खोदक्खमो कन्नविज्जासु ओसहीसहस्ससंपि-
ट्टरसायणपाणपासियजराविहुरो विवरपवेसपरितोसियजक्खणीलक्खपरिभोगप्ययारपरूयणपंडिओ महद्धइयवे-
सधारी घोरसिवो नाम तवस्सी ।

अवि य—आगिट्ठमि पगिट्ठो खुन्नो पन्नगमहाविसुद्धरणे । विक्खेवकरणदक्खो अमूढलक्खो वसीकरणे ॥ १ ॥

जं सत्थेसु न सिट्ठं बंधुरबुद्धीहिं पुव्वपुरिसेहिं । जं नो पुव्वकइणवि कहिंपि मइगोयरमि गयं ॥ २ ॥

जुत्तीहिवि जं विहडइ सुयंपि जं सदहति नो कुसला । जं सुइरंपि हु विट्ठं संदिज्झइ तंपि दंसेइ ॥ ३ ॥ (जुम्मं)

भणइ य अत्थि असज्झं मज्झं भुवणत्तएवि नो किंपि । जइ सो एयसमत्थो एत्थवि देवो पमाणंति ॥ ४ ॥

एवं सोच्चा रत्ना कोउहलेण भणिथा पहाणपुरिसा—अरे आणेह तं सिग्घमेव, जं देवो आणवेइत्ति भणिऊण
निक्खंता ते य रायभवणाओ, गया तस्सासमपयं, पणमिऊण निवेइयं से आगमणप्यओयणं, तओ हरिसुप्फुल्लओ-
यणो कयकिचमण्याणं मन्नतो तो चलिओ घोरसिवो रायपुरिसेहिं समं, पत्तो य रायभवणं, दुवारपालनिवेइओ गओ
रायसमीवं, दिन्नासणो उवविट्ठो, सम्माणिओ उचियपडिवत्तीए नरवइणा, खणंतरे य पुच्छिओ एसो—भवयं ! कयरीओ
दिसाओ आगमणं ? कत्थ वा गंतव्वं ? किं वा एत्थावत्थाणप्यओयणंति ? घोरसिवेण भणियं—महाराय ! सिरिपट्ठयाओ

आगओऽम्हि, संपयं पुण उत्तरदिसिमुंदरीसवणकन्नपुरे जालंधरे गन्तुमिच्छामि, जं पुण पुच्छह अवत्थाणपओयणं तत्थ
 य तुम्ह दंसणमेव, संपयं एयंपि सिद्धंति, नरवइणा भणियं—भयवं! निरवगगहा सुणिज्जइ तुम्ह सत्ती मंततंतैसु ता
 दंसैसु किंपि कोउगं, तओ जं महाराओ निवेयइत्ति पडियज्जिय तेहिं तेहिं दिट्ठिवंचणदेवयावयारणनरवेहपुणफवेहनहु-
 मुट्ठिसुहदुक्खपरिजाणणप्पमुहकोऊहलेहिं वसीकयं घोरसिवेणं नरिंदचित्तं, अह अवसरं लहिऊण भणियं राइणा-
 भयवं! किं एएसु चेव कोऊहलेसु तुह विन्नाणपगरिसो उआहु अन्नत्थवि अत्थि?, सुणिणा भणियं—किमेवमसं-
 भावणागम्भमम्हारिसज्जणानुचियं वाहरसि?, एगसहेणेव साहेसु जं दुक्करपि कीरइ, तओ राइणा निवेइओ पुत्त-
 जम्मलाभविसओ वुत्तंतो, घोरसिवेण भणियं—किमेत्तियमेत्तेण किलिस्ससि?, अहमेयमट्ठं अकालेवि अविलंबं परा-
 हेमि, राइणा भणियं—जइ एवं ता परमोऽणुगगहो, केवलं को एत्थ उवाओ?, घोरसिवेण भणियं—एयंतो निवे-
 यइस्सं, तओ उक्खित्ता कुवलथदलसच्छाहा मंतीसु राइणा दिट्ठी, उट्ठिया य इंगियागारकुसला सणियं सणियं नरिं-
 दपासाओ मंतिणो, जायं विजणं, घोरसिवेण जंपियं—महाराय! कसिणचउहसीनिसिए मए बहुपुक्कफलधूक्ख-
 यबलिभक्खपरियरेण तुमए सह भयवं महामसाणहुयासणो तप्पणिज्जो, राइणा चित्तिं—कहं नु मए पुण्णाइपरि-
 यरेण सह हुयासणो तप्पणिज्जोत्ति?, अवसदोत्ति, अहवा अभिप्पायसाराइं इसियणाइं, नो विसंबंधलक्खणहुसुण-
 मावहंति, सुणिणा भणियं—महाराय! सुणणचक्खुक्खेवो इव लक्खीयसि, राइणा भणियं—मा एवमांसकह, निवेयह

जहा पारं, सुणिणा भणियं—तओ सो भयवं हुयासणो—उब्भडपयडियरूयो पयंडजालाकलावभरियनहो । दाही तुज्झं वंछियफलनियरं कप्परुखोव्व ॥ १ ॥ राइणा भणियं—जइ एवं ता सब्बहा आगमिस्सं चउइसीनिसाए, एस अत्थो साहियवोत्ति, पडिचन्नं च तेण, अह कयकुसुमतंबोलदाणसम्माणे सट्ठाणंमि गए घोरासिवे राया निव्वत्तियदेव-
याचरणकमलपूयापडिवत्तीहिं तेहिं तेहिं अस्सदमणाइएहिं विचित्तविणोएहिं अप्पाणं विणोएतो पइक्खणं दिणाइं गणमाणो य कालं गमेइत्ति, कमेण य पत्ताए कसिणचउइसीए आहूयं मंतिमडलं, निवेइयं रहस्सं, पुच्छियं च-संपयं किं कायव्वंति?, मंतीहिं पभणियं—देव ! किंपागफलाइपिव मुहंमि महुराइं परिणइहुहाइं अन्नाइं तदियराइं दुहावि दीसंति कजाइं, अत्थस्स संसओऽविहु पवित्तिहेउत्ति किं तु निहिट्ठो, अविसुक्काविस्सासेहिं सब्बहा उज्जमेयव्वं, एवं भणिए राइणा कुसुमतंबोलाइदाणपुव्वं सम्माणिऊण मंतिवगो पेसिओ सगिहे, जाए य रयणिसमए सयं कयवे-
सपरियत्तो नियत्तियपीढमहाइपरियणो समग्गबलिफलफुल्लपमुहसाहणपडलसमेओ करकलियतिकखगखग्गमंडलो घोरासिवसमेओ अलक्खिज्जंतो अंगरुखेहिं अमुणिज्जंतो दासचेडचाडुकारनियरेहिं वारिज्जमाणो पवत्तिज्जमाणो य पडिक्खलेहिं अणुक्खलेहि य अणेगेहिं सउणेहिं सवंगनिविट्ठविट्ठरुक्खामंतक्खरो संपत्तो महीवइं महामसाणदेसं । जं च केरिसं ?—

निलीणविज्जसाहंगं पवूढपूयवाहंगं, करोडिकोडिसंकडं, रडंतंभूयककडं ।

सिवासहस्ससंकुलं मिलंतजोगिणीकुलं, पभूयभूयभीसणं कुसत्तसत्तनासणं ॥

पधुट्टुट्टसावयं जलंततिवपावयं, भमंतडाइणीगणं पवित्तमंसमगणं ॥ १ ॥

कहकहकहट्टहासोवलकखगुरुरकुलकुलपेच्छं । अइरुक्खरुक्खसंबद्धिगिद्धपारद्वयोरवंचं ॥ २ ॥

उत्तालतालसहुम्मिलंतवेयालविहियहलबोलं । कीलावणं व विहिणा विणिम्मियं जमनरिंदस्स ॥ ३ ॥

तथ य निरुविओ सल्लक्खणभूमिभागो घोरसिवेण, खित्तं च बलिविहाणं कया खेत्तवालपडिवत्ती खणिया वेइया भरिया खाइंगाराणं मसाणसमुत्थाणं, भणिओ य राया-अहो सो एस अवसरो ता दढमप्पमत्तो इसाणक्कोणे हत्थसयदेससंनिविट्ठो उत्तरसाहगत्तणं कुणमाणो चिट्ठसु, अणाहूओ य मा पयमवि चलेज्जासित्ति पुणो पुणो निवारिय पेसिओ नरिंदो, गओ य एसो, घोरसिवेणावि आलिहियं मंडलं, निसन्नो तहिं, निबद्धं तहिं पउमासणं, कयं सकलीकरणं, निवेसिआ नासावंसग्गे दिट्ठी, कओ पाणायाभो, नायविंदुलवोववेयं आढत्तं मंतसुमरणं, समारूढो ज्ञाणपगरिसंमि । इओ य चित्तिं राइणा-अहं किर पुवं सिक्खं गाहिओ मंतीहिं, जहा-अविस्ससो सव्वत्थ काय-व्वोत्ति, निवारिओ य सव्वायरं पुणो पुणो एएण जहा अणाहूएण तए नागंतव्वंति, ता समहिआयरो य जणइ संकं, न एवंविहा कावालियमुणिणो पाएण कुसलासया हवंति, अओ गच्छामि सणिअं सणिअमेयस्स समीवं, उवलक्खेमि से किरियाकलवंति विगप्पिउं जाव पट्ठिओ ताव विप्फुरियं से दक्खिणल्लोयणं, तओ निच्छियंवच्छियत्थलाभो करकलिय-

करवालौ कसिणपडकयावगुणो मंदं मंदं भूमिविमुक्चरणो गंतूण पुट्टिदेसे ठिओ घोरसिवस्स, सुणिउमाढत्तो य,
सो य ज्ञाणपगरिसत्तणेण अणावेविस्सय अवायं अविभाविय पडिक्कलत्तं विहिणो अविद्यायतदागमणो नरवइथोभक-
रणदक्खाइं मंतक्खराइं पुव्वपचित्तविहिणा समुचरित्तो निमुणिओ रत्ता, परिभावियं चउणेण-अहो एस दुट्ठतवस्सी
मं थोभविहिणा विबलं काऊण सन्नहित्तिनिहित्तकत्तियाए परिकुवियकयंतभमुहकोणकुडिलाए विणासिऊण हुयवहं
तप्पिउं वंछति, पहाणनरोवहारविहिणा हि सिज्झंति दुट्ठदेवयाओ, ता किमेत्थ जुत्तं?, अवि य—

एतस्स किं इयाणिं वावडचित्तस्स तिवक्खस्वग्गेण । कदलीदलं व सीसं लुणामि पासंडिचंडस्स ॥ १ ॥

अहया दुद्धरिउगंधसिंधुराघायंदतुरग्गेण । खग्गेण मज्झ लज्जिज्जइह घायं करंतेण ॥ २ ॥

केवलमुवेहणिज्जो नयेस एयंमि होइ पत्थावे । जं थोभकरणविहिणा मरणं मह वंछइ काउं ॥ ३ ॥

तथापि—ज्ञाणावरोहवक्खित्तचित्तपसरंमि हणिउकामस्स । सगं गयावि गुरुणो होहिंति परंमुहा मज्झ ॥ ४ ॥

ता जुत्तमिणं ठाऊण दूरदेसंमि बोहिउं एयं । पढमं दिन्नपहारे पडिपहरेउं ममेयंमि ॥ ५ ॥

इय चित्तिऊण रण्णा ठाउं दूरे पयंपियं एयं । गिणहसु करेण सत्थं रे रे पासंडिचंडाल ! ॥ ६ ॥

इइ सोच्चा ज्ञाणेगगभंगरोसोवरत्तनयणजुओ । भालयलघडियभडिभडिसणो उट्ठिओ सोऽवि ॥ ७ ॥

करकलियनिसियकत्तिथनियंतकसिणप्पमोल्लिजडिसंगो । अह तिव्वगव्वघोरं घोरसिवो भणिउमाढत्तो ॥ ८ ॥

रे रे दुहुनराहिव ! विलज्ज निस्सत्त मा पलाइहिसि । सुयविसयतिक्खदुक्खाओ जेण मोएमि तं झत्ति ॥ ९ ॥
 रण्णा पढियं मा गल्ल निष्फलं पहर रे तुमं पढमं । न कयाइवि अम्ह कुले पढमपहारो कओ रिउणो ॥ १० ॥
 तत्तो विचिच्च वग्गणसुनिउणकरणप्पयारकुसलेण । घोरसिवेणं रत्नो पवाहिआ कत्तिआ कंठे ॥ ११ ॥
 रत्नावि तक्खणं चिय दक्खत्तणओ इमस्स सत्थजुओ । हत्थो पहारसमए बद्धो नियवाहुबंधेण ॥ १२ ॥
 भुयदंडनिविडपीडणविहडियदढपहरणंमि हत्थंमि । मुट्ठिप्पहारपहओ निवाडिओ सो धरणिवेट्ठ ॥ १३ ॥
 दढमंतंतसिद्धीवि विहडिया तस्स तंमि समयंमि । विवरंमुहंमि दइवे अहवा सव्वं विसंवयइ ॥ १४ ॥
 अह वीसमिऊण खणं घोरसिवो फुरियवीरिओ सहसा । पारद्धो रत्ना सह जुज्जेउं बाहुजुज्जेणं ॥ १५ ॥
 मल्लाण व खणमुट्ठीण पडणपरिवत्तणुच्चलणभीमो । सरहसहसंतंभूओ अह जाओ समरसरंभो ॥ १६ ॥
 निविडभुयदंडचंडिमसंपीडणविहडियंगवावारो । सुच्छानिभीलियच्छो अह निहओ सो महीवइणा ॥ १७ ॥
 एत्थंतरंमि तियसंगणाहिं वियसंतसुरहिक्कुसुमभरो । जयजयसहुम्मीसो पम्मुक्को नरवइसिरंमि ॥ १८ ॥
 हारद्धहारकंचीकलावमणिमउडमंडियसरीरा । रणज्झणिरमहुरनेउरखपूरियदसदिसाभागा ॥ १९ ॥
 नवपायियायमंजरिसोरभरहसुम्मिलंतभसलकुला । धरियधवलायवत्ता तहागया देवया एक्का ॥ २० ॥ जुम्मं ।
 तीए भणियं नरसिंघ ! निच्छियं तंसि चैव नरसिंघो । जेणस महापावो खत्तियखयकारओ निहओ ॥ २१ ॥

रणणा भणियं कह देवि ! कहसु खत्तियखयंकरो एस ? । मइ जीविते संपइ, पडिभणइ निव तओ देवी ॥ २२ ॥
एएण किंपि सिद्धि समीहमाणेण पावसमाणेण । हणिआ कलिंगवंगहूणपंचालपसुहनिवा ॥ २३ ॥
दिट्ठिण्वंचमाइं दजालपसुहेहिं कूडकवडेहिं । अच्छरियाइं दावितएण को को न वा नडिओ ? ॥ २४ ॥
न य केणवि एस जिओ न यावि एयस्स लक्खियं सीलं । तुमए उभयंपि कयं अहह मइ निम्मला तुज्झ ॥ २५ ॥
इय तुह असरिससाहससुंदरचरिएण हरियहियाए । मम साहसु किंपि वरं जेणाहं तुज्झ पूरेमि ॥ २६ ॥
तोहे मउलियकरकमलसेहरं नामिउं सिरं राया । भणइ तुह दंसणाओऽवि देवि ! अन्नो वरो पवरो ? ॥ २७ ॥
भणियं सुरीए नरवर ! इयरजणोव्व न जइवि पणेसि । तहवि तुह वंछियत्थो होही मज्झाणुभावेण ॥ २८ ॥
इय भणिए नरवइणा पराए भत्तीए पणमिया देवी । लच्छिच्च पुण्णरहियाण झत्ति अहंसणं पत्ता ॥ २९ ॥
नरिंदोऽवि तारिसमच्चमुयं देवीस्सुवं सहसच्चिय नयणगोयरमइं कंतसुवलब्भ चिंताकलोलमालाउलो एवं परि-
भावेइ—किमेयं सुमिणं उआहु विभीसिया अहवा एयस्स चैव दुट्ठकावालियस्स मायापवंचो किं वा मम मइ-
विब्भमो उआहु अवितहमेयंति ? ,

इय जात्र निचो संदेहदोलमालंबिउं विकण्णेइ । मा कुणसु संसयं ताव वारिओ गयणवाणीए ॥ १ ॥
घोरसिचोवि मत्तो इव मुच्छिओ इव दढदुघणताडिओ इव महापिसायनिफंदीकओ इव सुसियसारवक्खरो इव

पियविरहमहागहगहिओ इव दुट्टोसहपाणप्पणट्ठचित्तचेयणो इव खणंतरं चिट्ठिय सिसिरमारुण समासासियसरीरो
 थोवोवलद्धचेयणो मंदमंदमुम्मीलियलोयणजुयलो लजावसविसंतुलसव्वंगोवंगो अइदीणवयणो दीहमुस्ससिय राया-
 णमवल्लोइउं पवत्तो, नरवइणावि दढसंजायकरुणभावेण अइदुक्खिओ एसोत्ति उवलक्खिय भणिओ घोरासिवो-
 भो किमवल्लोएसि?, घोरासिवेण सगगयं भणियं-महाराय! अवलोएमि नियक्कम्मपरिणइविलसियं, राइणा
 भणियं-किमेवं सविसायं जंपसि?, सव्वहा धीरो भव परिहर दुरज्झवसायं परिचय कोवकंडुं विमुंच विजयाभिलासं
 अणुसर पसमाभिरइं पियसु करुणारसं परिचित्तसु जुत्ताजुत्तं समुज्झसु खुद्वज्जोचियं वावारंति, अह समीहियत्थ-
 सिद्धी न जायत्ति सम्मसि ता गिण्हसु इमं परिकुबियकयंतजीहाकारलं नीलपहापडलसामलियसयलदिसिचक्खवालं
 मम करवालं, करेसु मम सरीरविणासणेण नियसमीहियसिद्धिं, जओ मुक्को मए संपयं पोरिसाभिमाणो तुह कज्जसाह-
 णट्ठाएत्ति । अबि य—

अच्छउ तरंगभंगुरमसारंगं नियसरीरयं दूरे । जीयंपि हु पराहियकारणेण धारंति सप्पुरिसा ॥ १ ॥

जं पुण पढमं चिय तुज्झ कारणे नो समप्पिओ अप्पा । विहिओ य ज्ञाणविग्घो एयं नणु कारणं तत्थ ॥ २ ॥

मम विरहे एस जणो एसो नीसेससाहुवगो य । धम्मभंसमवस्सं पाविस्सइ पावल्लोयाओ ॥ ३ ॥

इण्हिं तुह गुरु दुक्खं उवलक्खिय वद्धकक्खडसहावं । निरेवक्खं मज्झ मणो जायं सेसेसु कज्जेसु ॥ ४ ॥

घोरसिवेण भणियं—महाभाग ! मा एवमुल्लवेसु, जीवसु तुमं मज्जीविण्णावि जाव जलहिकुलसेलससितारयिदिवारं,
पसीयसु मे, वियरसु एकं पसायंति, राइणा भणियं—किमेवं वाहरसि !, जीविददाणाओऽवि किमवरमदेयं ? ता अस-
मंतो पत्थेसु, घोरसिवेण भणियं—जइ एवं ता अणुजाणसु मम एयंमि पज्जलंतजालासहस्सकवलियसलभकुलसंकुले
मिसिमिसंतद्धदद्धकलेवरुल्लंतविस्सगंधुद्धुरे मसाणहुयासणे पवेसुज्जमं, हवसु धम्मबंधवो, नन्नहा मे पुव्वविहि-
महापावपव्यक्कतस्स अवस्सं विस्सामो भविस्सइत्ति, रण्णा भणियं—कुओ तुह पुवं पावसंभवो ?, जओ कयाइं
तुमए विविहाइं तवचरणाइं आपूरियाइं पावभक्खणदक्खाइं मंतज्झाणाइं पूइयाइं देवकमकमलाइं निव्वत्तियाइं
वेयरहस्सज्झयणाइं उवासिओ गुरुज्जो पवट्ठिया धम्ममग्गसु पाणिणो, ता न सब्बहा वोत्तुमवि जुत्तमेयं भवारिसाणं,
घोरसिवेण भणियं—महाराय ! अलमलं मम पासंडिचंडालस्स वीसत्थयाइणो पयडियविचित्तकूडकवडस्स दविलन्नर-
हियस्स निसायरस्सेव निक्करुणस्स, किंपागतएलस्सेव बाहिरमेत्तरमणीयस्स वगस्सेव सुसंजमियपाणिप्पायप्पया-
रस्स भुयंगमस्सेव परच्छिद्दावलोयणनिरयस्स दुज्जणस्सेव सुहमहुरभासिणो संकित्तणेणं, एवं च सब्बहा विरत्तोऽम्हि
पावंपकपडिहत्थाओ नियकडेवराओ, नेव य अन्नो पावविसोहणोवाओ, राइणा भणियं—ओ भो किमेवं पुणो पुणो
अत्ताणं अत्ताणं व पुरिसं दूसेसि !, पयडक्खरं निवेएसु नियपुव्ववित्तं, घोरसिवेण भणियं—महाराय ! गरुओ एस
वुत्तंतो, राइणा भणियं—किमजुत्तं ?, साहेसु, घोरसिवेण भणियं—जइ एवं ता निसामेहि—

अथि सुरसरितुसारपचित्तरुहेसं विविहावणभवनमालाविभूसियं समूसियसियवेजयंतीरेहंतसुरमंदिरसिहरं
 सिरिभवणं नाम नयरं, तत्थ य पयंडमायंडमंडलुहामपयावपरिसोसियविपक्खजलासओ अणेगसमरवावारविढत्तजसो
 अवंतिसेणो नाम राया अहेसि, जस्स विजयजत्तापत्थियस्स पत्थिवसहस्साणुगम्ममाणमगस्स उडंडपुंडरीयपंडुरच्छत्त-
 च्छाइयगयणाभोगा नट्टदिवसावगासव्व सोहंति दस दिसाभागा, जस्स य गजंतमत्तकुंजरगंडत्थलगलंतनिरंतरमयजला-
 सारजायदुद्दिणंधयारभीयाभिसारियव्व अणुसरइ कवाडवियडं वच्छत्थलं रायलच्छी, जस्स चउव्विहाउज्जवोरघोसं मे-
 होहरसियंपिव सोऊण दूरं पलायंति रायहंसा, जस्स समरंगणेषु रोसारुणाओ पडिसुहडेषु पडिबिंबियाओ पण्णु-
 ल्लसुकुमारकरवीरकुसुममालाउव्व रेहंति दिट्ठीओ, तस्स य नियरुवलावन्नजोव्वणगुणावगणियरइयवायाओ नीसे-
 सपणइणीपहाणाओ दुवे भारियाओ अहेसि, पत्तलेहा मणोरमा य, पढमाए जाओ अहमेक्को पुत्तो वीरसेणो नाम,
 बियाए पुण विजयसेणोत्ति, गाहिया दोउवि अहे धणुवेयपरमत्थं कुसलीकया चित्तपत्तच्छेयविणोणसु सिक्ख-
 बिया य खेडयखगगुणवणिं जाणाविया महल्लजुद्धं, किं बहुणा?, मुणाविया सव्वकलाकलावं, अन्नया य उचिओत्ति
 परिचित्तिय ठाविओऽहं ताएण जुवरायपए, दिन्ना य मज्झ लाडचोडमरहट्टसोरट्टपमुहा देसा कुमारमुत्तीए, परिपालेमि
 जुवरायत्तणं, ममंपि अणुमग्गमणुसरइ सुहडाडोवसंकुडा पगलंतगंडत्थला दण्डुरसिंधुरघडा, ममावि मग्गओ धावंति
 तरलतरतुरंगपहकरा, मज्झंपि परसुसेल्लचंडगंडीवसरविसरकुंतगयापहरणहत्थाइं वित्थरंति चउहिंसिवि पुरिसबलाइति,

दुइयस्सवि मज्झ सवत्तभाउणो दिन्नाइं ताएण कइयय गामसयाइं, एवं च विसयसुहमणुहवताणं वचंति वासरा ।
अणया खणविपरिणामधम्मयाए जीवलोयविलसियाणं पइसमयविणाससील्याए आउयकम्मदलियाणं अण-
डिहयसासणत्तणओ जममहारायस्स सुरिंदचावचवल्याए पियजणसंपओगसुब्भयसुहस्स पाविओ अवंतिसणराया
पंचत्तंति, कयंमि य तम्मयकिच्चे मंतिसामंतसरीररक्खप्पामोक्खपहाणलोएण निवेसिओऽहं रायपए, पयट्ठियाइं
मए तायस्स संगंगयस्स कएण तडियकप्पडियदीणाणाहाणिस्सियविदेसियजणण महादाणाइं कारावियाइं उजु-
गसिंसुंदराइं देवमंदिराइं निरुवियाइं अवारियसत्ताइं, कालक्कमेण य विगओ मम सोगो, वसीकयं सामंतचक्कं, नि-
वासिया नियमंडलविलुंगगा पयट्ठिओ पुव्वपुरिसमगो । अन्नया य—

सियसिंधुरखंधगओ विलयाजणधुव्वमाणसियचमरो । धरियधवलायवत्तो किंकरननियपरियरिओ ॥ १ ॥

उम्मगगपयट्ठुदामतुरयट्ठुक्खउद्वयओहो । नयराओ निग्गओऽहं वणलच्छीपेच्छणट्ठाए ॥ २ ॥

जाव य तत्थ पेच्छामि पुप्फफलसमिद्धवधुरं तरुणतरुणं परिब्भमामि माहवील्याहरेसु अवलोएमि कयली-
दलणं रुंदत्तणं निरिक्खामि संपिडियससिखंडपंडुरं केयइयत्तसंचयं अग्घाएमि अणग्घवउलमालियासुराहिरिमलं
करोमि करतलेण सोरभभरलोममितरणज्झणंतफुलधयरिछोलिलिहजमाणमयरंदं नवसहयारीमंजरीयुंजं ताव सह-
सच्चिय सुणोमि नियपरियणकलयलं । कइं ?—

सामी ! पेच्छह गयणंगणंमि कह वट्टए महाजुज्झं ? । सज्झसकरमइभीमं सुराण विज्जाहराणं वा ॥ १ ॥

एवं सोचा मएवि उत्तानीकयानिमेलोयणेण उट्टमवलोक्यमाणेण दिट्ठा विविहण्णथरोहिं जुज्झमाणा गयणंमि विज्जाहरा, ते य एवं जुज्झंति—

सियभल्लयसच्चलसिद्धसूल अवरोण्णरु मेछाहिं भिडिमाल । वंचावहि तकखणि लद्धरक्ख पुण पहरह जय जस सव्वपक्ख १

खणु निट्ठरमुट्ठिहिं उट्ठियंति, खणु पच्छिमभागमणुव्वयंति ।

खणु जणगजणणि गालीउ देंति, खणु नियसोंडीरिम कित्तयंति ॥ २ ॥

अच्छी निमीलियसुय राहिं चिर साहिय विजयविज्ज, उणु खणे खणे जायहिं जुज्झसज्ज ।

अविगणिय मरण रणरसियचित्त, भुयदंडमहावलमयविलित्त ॥ ३ ॥

इय तेसिं खयराणं परोप्परं जुज्झिराणमेक्केणं । लद्धूण छलं अन्नो पहओ गुरुमोगरेण सिरे ॥ ४ ॥

पडिओ धरणीवट्ठे ममंतिए विगयचेयणो सो य । मुच्छानिमीलियच्छो विच्छाओ छिन्नरुक्खोव्व ॥ ५ ॥

एत्थंतरे तयणुमग्गेण चेव कड्डियनिसियखगो पधाविओ इयरो विज्जाहरो तस्स वहनिमित्तं, मुणियो य मए जहा एसो एयस्स विणासणकए एतित्ति, तओ मए भणिया सदेवेहिणो धाणुहिया अंगरक्खा य, जहा—

रे रे रक्खह एवं भूमीतलनिवडियं महाभागं । एवं विणासणुज्जयमित्तं खयरं पडिक्खलह ॥ १ ॥

असिखेडयहत्थेहिं तस्संगं छाहयं वरभडेहिं । ओगासगलभमाणो रुद्धो खयरो तओ भणइ ॥ २ ॥
हे भो नरिंद ! मुंचसु एयं खयराहमं मम वहट्ठा । एसो खु मज्झ वइरी विणासियवो मएऽवस्सं ॥ ३ ॥
भणिओ य मए खयरो किं पलवसि तं पिसायगहिओव । किं एस खत्तयम्मो ? जेणेवमहं करेभिचि ॥ ४ ॥
किं चावरद्धमिणिणा जेणयं मारिउं समीहेसि । सो भणइ एस मम दारभोगरसिओत्ति ता हणिमो ॥ ५ ॥
ताहे मए स भणिओ साहू इयरो व होउ नऽप्येमि । सरणागयरक्खणलक्खणं च राइण खत्तययं ॥ ६ ॥
उब्बद्धभिउडिभंगो रोसारुणनयणजुयलदुप्पेच्छो । फरुसक्खरेहिं खयरो ताहे मं भणिउमाढत्तो ॥ ७ ॥
रे रे दुट्टनराहिव ! मा बोहसु केसरिं सुहपसुत्तं । दिट्ठीविसाहितुंडं कंइयसु मा करग्गेण ॥ ८ ॥
जालालिभीममग्गि अवक्कमसु य मा तुमं पयंगोव । जइ वंछसि चिरकालं रज्जं काउं महियलंमि ॥ ९ ॥
भणिओ य मए एसो किं रे वाहरसि मुक्कमज्जाय ! । सण्णुरिसमगलमग्गस्स मज्झ जं होइ तं होउ ॥ १० ॥
चिरकालजीविणवि पेरंतेऽवस्समेव मरियवं । ता अवसर दिट्ठिपहाओ कुणसु जं तुज्झ पडिहाइ ॥ ११ ॥
जइ एवं ता विहिणो मा दाहिसि दूंसणं तुमं राय ! । इय भणिऊण सरोसो खयरो सो गयणमुण्णइओ ॥ १२ ॥
तयणंतरं मए निरूविओ सो भूमितलनिवडिओ विज्जाहरो जाव अज्जवि सजीवो ताहे काराविया
चंदणरसच्छडापहाणा सिसिरोवयारा संवाहियाइं सरीरसंवाहननिउणेहिं पुरिसेहिं संबगाइं, खणंतरेण लद्धा तेण

चेयणा उम्मीलियं नयननलिंगं अवलोइयं दिसिमंडलं आलविओ पासवत्ती परियणो-भो भो महायस ! कहगहगिह
 महीवट्टे निवडिओ ? , कथ वा वेरिविजाहरो ? , को वा एस देसो ? , किणामं इमं नयरं ? को वा एसो छत्तच्छायानि-
 वारियरविकरपसरो परिचलंतधवलचामरजुयलो मज्झकए नरनियरं वाचारितो पुरो संठिओ चिट्ठइ महायसो नराहिज-
 इत्ति ? , इमं च सोच्चा निवेइयं से परियणेण गयणपडणाओ आरब्भ संबं जहाविंत्तंति । तओ सो खयरो दीहं नीसरिय
 मम पचासन्ने ठाऊण जोडिय करसंपुंडं विन्नविउमाढत्तो-महाभाग ! धन्ना सा महिमहिला जीसे तं पई कयलकखणा
 इमे भिच्चा सेवंति जे तुह चरणकमलं धन्ना ते सुहडा जे तुह कजे तणं व नवि गणंति नियजीवियं, अहो ते परो-
 वयारित्तणं अहो सप्पुरिसकम्माणुवत्तित्तणं अहो नियकज्जनिरवेकखया अहो सरणागयच्छलत्तणं, न सवहा मस
 मणांगं पिडमुष्याएइ सत्तुपराभवो जं तुमं सयमेव पुरिसरयणभूओ दिठ्ठोसि, मए भणियं-महाभाग ! अणवेनिसवय-
 जुत्ताजुत्तविचारो हयविही जं तुम्हारिसाणवि निवडंति एरिसीओ आवयाओ, अणुभूयपुवमवि पावंति विसरां
 दसाविवांगं, सवहा असरिससिमं जेण न कयाइं रंभायंभो सहइ मत्तमायंगंडयलकंहुवुच्छेयं, (न रेहइ जुज्जमाणो
 मुणालंतत्) पासंमि, को पुण साहेसु एत्थ वइयरो ? , खयेण भणियं-किमेत्थ कहियच्चं ? , पचकखमेव दिठ्ठं महा-
 णुभागेणं, मए भणियं-सम्मं निवेएसु, खयेण भणियं-जइ कोऊहलं ता निसामेसु-

कलहोयकूलकोडीविराइओ रयणकोडिचिच्छुरिओ । वेयट्ठगिरी तुमएवि निमुणिओ भरहखेत्तंगि ॥ १ ॥

सुरसिद्धजक्खरक्खसकिंनरकिंपुरिसभिहुणरमणिज्जो । सुराहिवरकुसुमतरुसंडमंडिउद्दामदिसिनिवहो ॥ २ ॥
विज्जाहरमणीजणरमणीयं विजियसव्वपुरसोहं । तत्थउत्थि गयणवल्लभनयरं नामेण सुपसिद्धं ॥ ३ ॥
तत्थ य राया निवसइ समग्गविज्जासहस्सवलकल्लो । पणमंतखयरमणिमउडकिरीडटिविडिक्कियग्गकमो ॥ ४ ॥
नियवलतुलियाखंडलपरक्कमो गुरुपयावहयसत्तू । तिहुयणविकखायजसो नामेणं विजयरओत्ति ॥ ५ ॥
रूवाइगुणसमिद्धाए तस्स भज्जाए हिययदइयाए । कंतिमईए पुत्तत्तणेण जाओ अहं एक्को ॥ ६ ॥
पक्कओ पुरे पमोओ मह जम्मे तत्थ खयरराएणं । करिणो मोत्तूण परे विमोइया बंधणेहिंतो ॥ ७ ॥
अह सुपसत्थमि दिणे सम्माणिय पणइसयणगुरुवगं । जयसेहरोत्ति नामं ठवियं मम गुरुजणेणंति ॥ ८ ॥
गयणंगणपरिसक्कणपमोक्खविज्जाओ गाहिओ अहयं । अह तरुणभावपत्तो गुरूहिं परिणाविओ भज्जं ॥ ९ ॥
पउमावइत्ति नामेण पवरविज्जाहरिंदकुलजायं । रूवाइगुणगेणं विजयपडायंय कामस्स ॥ १० ॥ जुम्मं ।
एस हुण वइरिखयो रहनेउरचक्कवालपुरगहुणो । सिरिसमरसिंहेनामस्स अत्तओ अमरतेओत्ति ॥ ११ ॥
बालवयस्सो मम गाढरूढपेमाणबंधमव्वस्सो । विस्सासपयं सधेसु पुच्छणिज्जो य कज्जेसु ॥ १२ ॥
सहसयणपाणभोयणचंक्रमणट्टाणकराणनिरयाणं । अहं दोणहवि कालो बोलइ दढमेक्कचित्ताणं ॥ १३ ॥
अह परियणेण मज्झं निवेइयं एगया रहट्टाणे । जह एस तुज्झ मित्तो विरूयचारी कलत्तंमि ॥ १४ ॥

असहृहणाओँ मए स परियणो वारिओ खरगिराहिं । अघडंतमेवमन्नं न भासियब्बं मह पुरोत्ति ॥ १५ ॥
 समयमवि दिट्ठं जं जुत्तिसंगयं तं वयंति सप्पुरिसा । सहसत्ति भासियाइं पच्छाऽपत्थं वारिंति ॥ १६ ॥
 रविकरपसरोच्च जणे घणपडलच्छाइओऽवि विप्फुरिओ । अह एस वइयरो गोविओऽवि पणयाणुरोहेण ॥ १७ ॥
 रायभवणाओँ सगिहंमि एगया आगओऽम्हि पच्छामि । समयमेव तं कुमिंतं अणज्जकज्जंमि आसत्तं ॥ १८ ॥
 दट्ठूण तं तहट्ठियमेगंते जाव चिंतिउं लग्गो । नियपरियणपरियरिओ तावेस पलाइओ झत्ति ॥ १९ ॥
 अहमवि पहरणसहिओ नियथोवपहाणपुरिसपरियरिओ । तस्साणुपहे लग्गो सोऽवि य अहंसणं पत्तो ॥ २० ॥
 मणपवणजइणवेगेण जाव पत्तोऽम्हि एत्थ ठाणंमि । ता एस महापावो मम पडिओ चक्खुमग्गंमि ॥ २१ ॥
 परियणपुरिसावि मए समयलासु दिसासु पेसिया पुवं । एयस्स विणासकए अहमेक्को एत्थ संपत्तो ॥ २२ ॥
 असहायं मं दट्ठु एसो सहसत्ति जुज्झिउं लग्गो । एत्तो अन्नं सव्वं जायं तुम्हंमि पच्चक्खं ॥ २३ ॥
 एत्थंतरंमि सन्नाहकरणदट्ठूढकायदुद्धरिसा । भूमियलं पेक्खंता खयरा तत्थागया तुरियं ॥ २४ ॥
 पुट्ठा य मए साहह किं भो तुज्झं समागमणकज्जं ? तेहिं कहियं सामी इह सुव्वइ निवडिओ अम्हं ॥ २५ ॥
 सो दंसिओ य तेसिं तो ते दट्ठूण तस्स पडियरणं । अच्चंतहरिसियमणा मं पइ भणिउं समाट्ठा ॥ २६ ॥
 संमं कयं नराहिव ! जमेवमेयस्स पालणा विहिया । जं एयकए बाढं परितण्णइ खयरनरनाहो ॥ २७ ॥

एयस्स भगणकए सत्थवि पेसिया खयरसुहडा । जं एक्को चिय पुत्तो एसो सिरिखयरनाहस्स ॥ २८ ॥
ता जयसेहरकुमारं पेसह एयं जहा समण्येसो । सुहिसयणजणजिज्जाण दंसणुक्कंठियमणणं ॥ २९ ॥
भणियो मए स खयरो कुमार ! तुह परियणो भणइ किंपि । ता साह तुमं चिय किं पुणेसि पच्चुत्तरं देसो ॥ ३० ॥
कुमरेण तओ भणियं एगत्तो तुज्झ असरिसो पणओ । एगत्तो गुरुविरहो दोन्निडवि दोलंति मह हिययं ॥ ३१ ॥
तोहे विसिद्धभोगणदिब्बंसुयरयणभायणाईहिं । सम्माणिऊण कुमरो सट्ठाणं पेसिओ स मए ॥ ३२ ॥
तेणावि भणियमेयं नरिंद ! काएण एस वचिस्सं । हिययं तु निगडजडियं व तुम्ह पासे परिव्वसिही ॥ ३३ ॥
वरमत्थखओ वरमन्नदेसगमणं वरं मरणदुक्खं । सज्जनविरहो पुण तिव्वखदुक्खलक्खंपि अक्खिवइ ॥ ३४ ॥
इय भणिउं सोगगलंतनयणजलविंदुधोगंडयलो । काऊण मम पणासं सपरियणो अइयओ गयणं ॥ ३५ ॥
अहंपि तेसिं गयणुप्पयणसामत्थमवलोइंतो पुव्वदिट्ठसमवाचारसंभमणुचितयंतो चितयंतो केत्तिंयं पि वेलं विलंवि
नियज्जक्काइं अणुचितिउं पवत्तो, विसुमारियं च मम भोगपमुहक्ककोडिकरणपसत्तस्स तं गयणनिवडियविज्जाहरमार-
णउल्लयदुट्ठखयरस्स सामरिसं वयणं । एगया य रयणीए जाव कइवयपहाणजणपरियरिओ नियदेससुत्थासुत्थपरिभाव-
भावणेण य रायंतररहस्सायन्नणेण य गयतुरयगुणवन्नणेण य किन्नराणुकारिगायणजणपारद्वकागलीगीयसवणेण य
सायरपणच्चिरवारविलासिणीचित्तपयक्खेवनिरिक्खणेण य नम्मालावकरणेण य बिंदुचुथपहेलियापणहुत्तरजाणेण य

विणोयंतो चिट्ठामि ताव अयं डविहडियवंभंडं डुडामरो जुगंतपणचिरभेरवपहयडमडं मेतडमरुयनिनायनिहुरो सरनहर-
 निहारियमयगलगलज्जियदारुणो पासपरिवत्तिभवणभित्तिपरिफालणसमुच्छलंतपडिसइयसहस्सदुधिसहो सपुडिओ
 हलबोलोत्ति, तं च सोऊण विष्फारिनयणजुयलो सयलदिसिमंडलमहप्रवलोयमाणो पेच्छामि तडिडं डपयंडकरवाल-
 वावडकरे भवणंगणमभिसरंते हणहणहणत्ति भणंते विज्जाहरे, ते य दट्टण मम परिणणो भयभरथरहरंतसरीरो करुणाइं
 दीणाइं वयणाइं समुल्लवित्तो सयलदिसासु सिग्धं पलाओत्ति, ताहे पहरणरहिओ एगागीवि ठाऊणाहं तेसिं संसुहं
 जंपिउमेवं पवत्तो य-रेरे किं गलगहि यव्व निरत्थयं विरसमारसह ? के तुब्भे ? केण पेसिया ? किं वा आगमणकज्जं ?
 तेहिं भणियं-रेरे नरिंदाहम ! तइया अमह पडुणो सत्तुरक्खणेण वयणमवगणिय संपयं धिट्ठयाए अयाणमाणो इव के
 तुब्भे केण पेसिया किं वा आगमणकज्जंति पुच्छसि, जइ पुण विसेसकहणेण तूससि ता निसामेहि, अमहे विज्जा-
 हरा रहनेउरचक्कवालपुरविज्जाहरनरिंदिसिरिसमरसिंघनंदणेण वेरिखयरासमप्पणपरूढगाढकोवानेलेन सिरिअमरते-
 यकुमरेण तुह दुधिययतरुफलदंसणत्थं पेसियत्ति, मए भणियं-जइ एवं ता जहाइं डुवचिट्ठहत्ति, तओ असयसरीरं
 चेव मं गहिऊण उप्पइया ते गयणमगेण, गया य दूरदेसं, सुक्को य अहं एगत्य भुयंगभीमे गिरिनिगुंजे, भणियं च
 मए-किं रे ! एवं मुंचह ? जं नेव पहरह, तेहिं भणियं-एत्तिया चेव पडुणो आणा, पडुचित्तानुवत्तणं हि सेवभस्स
 धम्मो, एवं भणिय उप्पइया ते तओ ठाणाओ । अहं पि कोइलकुलगवलगुलियसामलासु सयलदिसासु केसरिकि-

सोरनिहयनिहारियसारांगपमुक्कविरसारावभीसणेसु काणणेसु वणमहिसावगाहिज्जंतपल्लसमुच्छलंतपंकपडलुगुसु म-
गेसु तरुवरसाहासंहरिसयसनिवडंतदहणनिदज्झमाणेसु वेणुगहणेसु पज्जलंतपईवसिहाभीसणविप्पुंतरत्तलोयेणसु
इओ तओ वियरंतसु निसायरणेसु वराहतिक्खदादुक्किणलेट्टुनियरुचावचासु वणत्थलीसु असुणियमग्गुम्मग्गो
विमूढदिसाभागो असोढपयण्यारो एक्कमि गुरुतरुवरे समारुहिउं साहाए पसुत्तोम्हि, दुट्टमहिलव्व कट्टेण समा-
गया निहा, पच्छिमरयणिसमए य जामकरिघडव्व पासमल्लीणा चित्ता पवोहमंगलतूरेहिं पिय रसियं पुराणसि-
यालेहिं मागहेहिं व पढियं सुयगणेहिं, अह उइयंमि सयलतिहुयणभुवणण्यइवंमि दिवायरंमि उट्टिऊण कयपाभाइ-
यकिचो ओयरिऊण तरुवराओ एक्कदिसाए पयट्ठो गंतुं, खणंतरेण य तरुणतरुवक्कलववदपरियरो कोदंडकंडावड-
करो नियपणइणीए अणुगम्ममाणो गुंजाफलमालियामेत्तकयाभरणो भुयगंकुयनिव्वत्तियेकसकलावसंजमणो त-
क्खणविणिवाइयसिहडिससिहमुहविरइयकन्नपूरो दिट्ठो एक्को पुल्लेदो, सो य पुच्छिओ मए-भो महाणुभाग ! का एसा
अडवी ? को वा नियसिहरग्गभगरविरहहुरयमग्गो एस गिरिवरो ? का वा नयरगामिणी वत्तिणित्ति ? , पुल्लेदण भ-
णियं-अणामिया नाम एसा अडवी, सज्जाभिहाणो य एस गिरिवरो, एसावि वित्तिणी कंचणपुरनयरमणुसरएत्ति ।
तओ लग्गोऽहं तीए वत्तणीए तावसतवस्सीव कंदमूलफलेहिं पाणवित्तिं करितो पत्तो कइवयवासरेहिं कंचणपुर,
तत्थ य सुणिवरो इव निष्पडिबद्धो वीयरगो इव सब्वसंगरहिओ ठाऊण कइवय दिणाणि पेच्छंतो पुव्वट्ठाणाइ अव-

लेण्तो गामागरे निरुर्वितो धम्मियजणकारावियाइं समुत्तुंगसुंदरागाराइं सुरमंदिराइं कण्णडिओ इव दाणसालासु पा-
णविंत्तिं कुणमाणो अणवरयपयाणएहिं पत्तो सरज्जसीमासन्निवेसं, तत्थ य कइवयदिणाणि वीसमिय पुणरवि चलिओ
नियनयराभिमुहं । इतेण य सुणिऊण नियलहुभाउणो विजयसेणस्स संपत्तरज्जस्स विभववित्थरं चितियं मए—नूणं
विजयसेणेणाहिद्वियंमि रज्जे न जुत्तं तत्थ मे गमणं । जेण—

पुव्वकयधम्मकम्माणुभावओ पाविऊण रज्जसिरिं । चिंतामणिव्व दाउं को वंछइ वल्लहस्सावि ? ॥ १ ॥

पिच्छामि तहाविय मित्तमंतिसामंतवयणविन्नासं । जं नट्टं नणु रज्जं तं दिट्ठं हरणकालेऽवि ॥ २ ॥

इह चिंतयंतो पत्तो कमेण सिरिभवणनयरं, अलक्खिज्जमाणो पुरजणेण पविट्ठो सहपंसुकीलियस्स सोमदत्ता-
भिहाणस्स वयंसस्स गिहे, सो य ममं दट्ठूण झडत्ति जायपच्चभिन्नाणो सहरिसं पाएसु निवडिय गाढं परुव्वो,
भणिउमाढत्तो—

तुह विरहे मम नरवर ! वरिसं व दिणं न जाइ पज्जंतं । हिमहारचंदचंदणरसावि दूरं तविति तणुं ॥ १ ॥

भवणं पेयवणं पिव पणइणिवग्गो य डाइणिगणोव्व । सयणावि भुयंगा इव न मणंपि मणा सुहाविति ॥ २ ॥

एत्तियदिणाइं लोएण धारिओ कहवि गुरुनिरोहेण । जंतो इण्हिं विदेसे जइ नाह ! तुमं न इंतोऽसि ॥ ३ ॥

तो एयं वरभवणं एसो धणवित्थरो इमे तुरया । एसो किंकरवग्गो पडिवज्जसु तं महीनाह ! ॥ ४ ॥

एसाई पणयसाराई वयणाई भासतो भणिओ मए सोमदत्तो—पियवयंस ! किं सोयविहुरो हवसि ? किं वा निय-
भवणधणाइयं समप्पेसि ? किमेवं तुह पणयसारो पयडीमविस्सइ ? को वा अन्नो ममाओवि तुह पाणप्पिओ ? किं
वा तुह दंसणाओऽवि अन्नं ममेहागमणव्यओयणं ? ता धीरो भव, अच्छउ सव्वस्ससमप्पणं, तुह जीवियंमि ममायत्तं
चेव, तओ काराविओऽहं ण्हाणविलेवणभोयणपमुहं कायच्चं, खणंतरेण पुच्छिओ मए—पियवयंस ! साहेसु किमि-
याणिं कायच्चं ? सोमदत्तेण भणियं—देव ! किं निवेदेमि ? मं एकं पमोत्तणं अन्ने सव्वेऽवि मंतिसामंता दढपक्खवाया
विजयसेणे, नेच्छंति नाममवि तुह संतियं भणिउं, जइ सो कहवि आगमिस्सइ तहावि एयस्स चेव रज्जं, जओ एयस्स
मुद्धा मती अम्ह दढं वसवत्ती थेवपि वयणं न विलेधेइत्ति, विजयसेणो पुण नियसरीरमेत्तेण तुम्ह विरहे बाढं परि-
तम्मइ, भणइ य—जइ एइ जेइभाया ता धुवं समप्पेमि रज्जधुरं, जहाजेट्टरज्जपालणमेव अम्ह कुलधम्मोत्ति, एवं ठिए
किंपि न जाणिज्जइ जुत्ताजुत्तं, ता एत्थेव अलक्खिज्जमाणो तुमं चिट्ठसु कइवयदिणाणि जाव उवलक्खेमि नरिंदाइण
चित्तं, मए भणियं—एवं हवउत्ति, तओ सोमदत्तेण सामेण य दंडेण य भेएण य उवप्पयाणेण य आढत्ता मंतिसामं-
तादओ भेइउं, निट्ठुरवज्जगंठिपिव न य केणवि भिज्जंति उयाएणं, नाओ य तेहिं समागमणयइयरो, निवारिया य
रायदुवारपाला जहा न सोमदत्तस्स रायभवणे पवेसो दायवोत्ति, विजयसेणस्सवि सिट्ठं जहा तुम्ह जेइभाया
पंचत्तं गओत्ति निसामिज्जइत्ति, तेणावि एवं निसामिय कओ महासोगो; पयट्ठियाइं मयकिचाइत्ति, एवंति मह

रज्जकज्जविसयं जं जमुवायं घडेइ सो निउणो । दइवो पडिक्खलो इव तं तं विहेडेइ निक्खरुणो ॥१॥ अन्नया य गाढवि-
सायवसविसंदुलेण सुणियपरमत्थेण भणियं सोमदत्तेण-देव ! निम्मज्जाएहिं भंतिसामंताइहिं तुमह पंचत्तगयणयत्ता
निवत्तिथा राइणो पुरो, ता जइ कहं पि रायवाडियाए निगयस्स विजयसेणस्स दंसणपहे ठाऊण नियदंसण
ठावेसि ता जुत्तं होइत्ति, जओ तुमह दंसणं बाढसभिकखइ एसो, पडिवन्नं च मए एयं तदपुरोहेण, अन्नया य
पवरकरेणुगाखंधगओ निगओ विहारजत्ताए विजयसेणो, पासायसिहरमारुहिऊण य ठिओ अहं से चयसुगोथरे,
झडत्ति दिट्ठोऽहमणेण, सागयं २ चिरागयबंधवस्सत्ति हरिसुफुल्लेयणो य जाव सो वाहरिं पवत्तो ताव तदखणा
चेव भंतिसामंतपमुहेहिं रइया अंबरे अंतरवडा, कओ हलवोलो, नियत्तिओ विहारजत्ताओ राया । भणियं च-

असिवं तुह किंपि इमं जं देव ! पिसायदंसणं जायं । किं पंचत्तगयणो दीसइ य कयावि पच्चक्खो ? ॥ १ ॥

ता लहु गच्छह भवणं संतिं कारेह देह भूयवल्लिं । पारंभह होमविहिं सुमरह मच्चुजयं मंतं ॥ २ ॥

वियरसु सुवणदाणं माहणसमणाण तक्कयजणाणं । एवं कहिए सिग्वं भिंठेणं चोइया करिणी ॥ ३ ॥

भवणंमि तओ गंतुं जं जह भणियं तहेव नीसेसं । अइसुद्धुद्धिभावा करावियं विजयसेणेण ॥ ४ ॥

अहं पुण निरुच्छाहो निराणंदो ववगयधीरिमभावो अवयरिय तओ ठाणाओ सोमदत्तस्स अकहयणो
पच्छन्नदेसे ठाऊण चिंतिउमाढत्तो, कहं ?—

अणवरथकणयवियरणपरितोसियमाणसावि कह पावा । सांमंता मत्ता इव पुरद्वियपिहु मुणंति न मं ? ॥ १ ॥
कह वाऽवराहमणेण (सहणेण) भूरिसोगु(मह) सपयंमि ठवियावि । न गणंति मंतिणो मं तणं व पम्मुक्कमज्जाया ? ॥ २ ॥
कह नयरमहत्तरया उवयरिया णेगसोऽवि कजेसु । माणंति न मं सप्पणयवयणमेत्तेण विहयासा ? ॥ ३ ॥
जयसेहरकुमरो सो विज्जाहरायसुकुलजाओऽवि । तह उवयरिओऽवि कहं उवेहए मं तदियरोव्व ? ॥ ४ ॥
होउ वा, किं एएण विगप्पिएण?, अत्तहियमियाणिं कीरइ मुच्चइ इमं नयरं गम्मइ अन्नत्थ देसे ओलगिगजइ
अन्नो गरुओ नरवइत्ति, अहवा सयलजयपयडपरक्कमस्स सिरिअवंतिसेणमहानराहिवस्स सुओ होऊण कइवय दिणाइ
रज्जरिद्धिसुद्धुरमणुभविय कहमियाणिं अन्नस्स हेट्ठा ठाइस्सामित्ति सब्बहा न जुत्तं परिचिंतिउं, भेरवपडणेण अत्त-
परिचाओ चेव संपयं मे सब्बोवाहिविसुद्धोत्ति निच्छिऊण निग्गओ नयराओ लग्गो भेरवपडणाभिमुहं, वत्तिणीए
अखंडपयाणेहिं पवच्चंतो संपत्तो तरुणतरुसंडमंडियं उब्भडसिंहंडितंडयाडंबरमणिज्जं हंससारसकपिंजलकोकिलकु-
लकलकलरवमुहलं पुंनागनागजंबुजविरनिंबवंपयासोयसोहियपरिसरूहंसं भेरवपडणपच्चासन्नं एक्कसुववणं, दिट्ठो
य तत्थ अणेगजनमंसिजमाणचरणो सल्लक्खणनरसिरकवालमेत्तपरियरो मंतज्झाणपरायणो करकमलकलियजो-
गदंडो समत्थनाणविन्नाणपरमपगरिसपत्तो ससाहसपरितोसियवेयालो महाकालो नाम जोगायरिओ, पणमिओ य मए
सद्वायरेणं दिन्नासीसो य निविट्ठो संनिहियधरणिवट्ठे, अवलोइओऽहं तेण सिणिद्धाए दिट्ठीए, खणंतरे संभासिओ य-

भइ ! उद्विग्नचित्तो इव लक्ष्मीयसि, ता किं भट्टलच्छीविच्छड्ढोत्ति उयाहु विदेसागओत्ति, अन्नं वा किंपि कारणं ?, मए भणियं-भयवं ! अम्हारिसा पुन्नरहिया पाणिणो पए पए उद्विग्नचित्ता चेव, कित्तियाइं कारणाइं साहिज्जंति ?, तेण जंपियं-तहावि विसेसयरं सोउमिच्छामि, मए भणियं-भयवं ! किं एएण ज्ञाणविघकारएण नियवइयरसाहणेण ?, महाकालेण भणियं-किं तुज्झ ज्ञाणचिंताए ?, जहाइइं कुणसु, तथो मए विज्जाहरावलोयणं च जुज्झनिवडि-यखयररक्खणं च महाडविनिवाडणं च नियनगरागमणं च मंतिसामंतपमुहजणावमाणं च रज्जावहारदुक्खं च उवयरियविज्जाहरोक्खणं च नयरनिगमणं च भेरवपडणं पडुच समागमणं च सिट्ठमेयस्स, अह महाकालेण भणियं-अहो विरुद्धकारित्तणं हयविहिणो जमेरिसे असमसाहसधणे जणे विणिम्मिय एरिसत्तिक्खदुक्खभायणं करेइ, अहवा—

साहसधणाण हिययं दुक्खं गरुयंपि सहइ निवडंतं । इयराण दुहलवेणवि विहडइ जरसिप्पिणिपुडं व ॥ १ ॥
जह निवडइ गुरुदुक्खं तहेव सोक्खंपि संभवइ तेसिं । इयराण तुल्लसुहदुक्खसंभवो निच्चकालंपि ॥ २ ॥
कस्स व निरंतरायं सोक्खं ? कस्सेव नावया इति ? । को वूसिओ खलेहिं नो ? कस्स व संठिया लच्छी ? ॥ ३ ॥
इय नाउं चय सोयं पुणोऽवि तुह वंछियाइं होहिंति । सूरुोऽवि रयणितमनियरविगमओ पावए उदयं ॥ ४ ॥
जं पुण तुमए भणियं भेरवपडणं करेमि मरणट्ठं । तं बुहजणपडिसिद्धं खत्तिथधम्मं विरुद्धं च ॥ ५ ॥

जेण-बंभणसमणच्चिय मरणकज्जमब्भुज्जमंति नो धीरा । विहिविहडियंपि कज्जं घडंति ते बुद्धिविहयेण ॥ ६ ॥
तहा-चत्तविसायपिसायं अणलसमविमुक्कविक्रमेक्करसं । अणुसरइ सिरी दूरं गयावि पुरिसं हरिसियव्व ॥ ७ ॥
तओ मए भणियं-भयवं ! विमूढचित्तलक्खो म्हि संपयं, न जाणामि जुत्ताजुत्तं न सुणामि उवायं न समीहेमि
खत्तघम्मं न वियारेमि जणनिंदं न लक्खेमि सुहदुक्खं, सव्वा कुललददढ्ढवालियचक्काधिरूढं व मम मणो न
मणांगंपि कत्थवि अवत्थाणं पावइ, तो भयवं ! तुमं चेव साहेहि, किं कायवं ? को वा उवाओ समीहियत्थसि-
द्धीए?, महाकालेण भणियं-वच्छ ! पवज्जसु मम पवज्जं, आराहेसु चरणकमलं, अब्भस्सेसु जोगमगं, होहंति
गुरुभत्तीए मणोरहसिद्धीओ, तओ भयसंभंतो इव सरणागयवच्छलं दालिहाभिभूओ इव कण्णपायवं सहारोगपी-
डिओ इव परमवज्जं पहीणचकुबलो इव पद्ददेसंगं सव्वायेण तमाराहिउं पवत्तो, दूरमागरिसियं च विणएण मए
तस्स चित्तं, निउत्तोऽहमेक्को तेण नियरहस्सठाणेसु सिक्खाविओ निस्सेसाइं आगिट्ठिपमुहाइं कोऊहलाइं, अन्नया
य पसत्थेसु तिहिनक्खत्तमुहत्तेसु परमपमोयमुव्वहंतेण तेण एगंते उवइट्ठो मम तइल्लेक्कविजओ गंतो, कहिओ साहण-
विही जहा-अट्टोत्तरसयपहाणखत्तिएहिं मसाणहुयासणो तण्णणिज्जो, कायवं दिसिदेवयावलिवियणं, पवहियवं
अणवरयमंतसुमरणं, तओ एस सिज्झिहिइ, काही य एगच्छत्तधरणिथलज्जदाणं, पडिवन्नो य मए विणयपणएण,
समाढत्तो य साहिउं, गओ कलिंगपमुहेसु देसेसु, आरद्धो य जहालाभं खत्तियनरत्तमेहिं होमो जाव एत्तियं कालंति ।

ता नरसेहर ! नरसिंघ जं तए पुच्छियं पुरा आसि । किं अप्पाणं निंदसि इणमो नणु कारणं तत्थ ॥ १ ॥

भयवसविसंडुलंगा सारंगा इव विचित्तकूडेहिं । जं सत्ता विद्विया तमियाणिं दहइ मह हियं ॥ २ ॥

दुज्झाणकलुसबुद्धित्तणेण पुब्बं न याणियं एयं । तुह दंसणेण इणिह विवेयरयणं समुल्लसियं ॥ ३ ॥

नरसिंहेणं भणियं सच्चं पावं कयं तए भूरि । जं कीडियाणवि वेहे पावं गुरु किमु नरिंदाणं ? ॥ ४ ॥

तेसिं चिणासे जम्हा धम्मब्भंसो य सीमविगमो य । अवरोप्परं च जुज्झं विलयाजणसीलविलओ य ॥ ५ ॥

ता ठाणे तुह दुच्चरियगरिहणं धम्मगोयरा बुद्धी । एवं ठिएऽवि जलणप्पवेसणं तुज्झ नो जुत्तं ॥ ६ ॥

तित्थेसु वच्च कुरु देवपूयणं मुंच निंदियं भावं । पायच्छित्तं पडिवज्ज सुगुरुसयासे पयत्तेण ॥ ७ ॥

निंदसु पइक्खणं दुक्कयाइं निसुणेसु धम्मसत्थाइं । उत्तमसंसग्गिं कुणसु चयसु तिव्वं कसायं च ॥ ८ ॥

ईसाविसायमुच्छिद भिंद विसमविसयतरुनियरं । नियजीयनिद्विसेसं नीसेसं पेच्छ पाणिगणं ॥ ९ ॥

पसमरसं पिवसु सया दूरं परिहरसु खुद्वचरियाइं । जुत्ताजुत्त वियारसु सबक्खेसु जत्तेणं ॥ १० ॥

खणपरिणइधम्मत्तं चित्तसु भवंमि सबवत्थूणं । नियसुकयदुकयसच्चित्तणं च लक्खेसु परजम्मे ॥ ११ ॥

इय जयमाणस्स सया सुद्धी तुज्झं भविस्सइ अवस्सं । जलणपवेसं सलभा कुणंति कुसला उ न कयावि ॥ १२ ॥

एवं संठविऊण मरणदुरज्झवसायाओ धोरसिंघं जाव विरओ नरिंदो ताव पइयपडहसुवपमुहत्तरनिभावहि-

रियदियंतरा विचित्तमणिभूसणकिरणकब्बुरियमसाणगणा गयणाओ ओयरिया विज्जाहरा, परमपमोयमुघ्हता निव-
डिया घोरसिवचरणेसु, भणिउमाढत्ता य-देव ! अम्हे गयणवल्लहपुराहिवविजयरायविज्जाहरिंदसुएण सिरिजयसे-
हरायकुमारेण पेसिया तुम्ह आणयणनिमित्तं, ता कुणह पसायं, आरुहह इमं समुद्धुयविजयवेजयतीसहस्साभि-
रामं उज्झंतकसिणागरुकणूरूपूरसुरहिधूवधूमंधयारियदिसाभोगं मणिकणगरयणरइयविचित्तविच्छित्तिभित्तिभागं कुसु-
मावयंसाभिहाणं वरविमाणं, घोरसिवेण भणियं-भो विज्जाहरा ! मुयह मम विसए पडिवंधं, अन्नोऽहमियाणि विगय-
भोगपिवासो, विजणविहारेसु रणणेसु जाया निवासबुद्धी वद्धा भिगकुलेसु सयणसंबंधसद्धा पलीणो मायामोहो
जलणजालाकलावकवलिथमिव पेच्छामि जीवलोयं, ता जहाणयं गच्छह तुब्भे, जहादिट्ठं च से निवेएज्जहत्ति, विज्जा-
हरोहिं भणियं-मा भणह एयं, जओ जहिणाओ तुम्ह पासाओ गओ जयसेहरकुमारो तदिणादारब्भ जाओ रहने-
उरचक्कवालपुरनाहेण सिरिसमरसिंधेखेयराहिवइणा सह महासमसरंभो निवडिया अणेगसुहडा, कहमवि महाक-
ट्टेण निण्णिट्ठो सो अमरतेयाभिहाणो दुट्ठमित्तो, घडिया इयाणि परोप्परं संघी, कयाइं अन्नोऽन्नवरोसु भोयणवत्थ-
दाणाइं, अओ एत्तियकालं नियकज्जकोडिवावडत्तणेण संपयमेव नाओ तुम्ह अडविनिवाडणपामोक्खो वइयरो,
कुमारेण तओ अंचंतजायत्तिघसोगसंदब्भेण विसज्जिया अम्हे सव्वासु दिसासु तुम्हावल्लोयणत्थं, भणिया य-अरे
सिग्घं जत्थ पेच्छह तं महाणुभावं तत्तो सव्वहा आणेज्जह, नन्नहा भोयणमहं करिस्सामि, तओ सव्वत्थ निउणं निउणं

निरुवंता पत्ता एत्तियं भूमिभागं, एत्थ आगएहि य निसामिओ तुम्ह सद्दो, को पुण भीसणे मसाणे एत्तिथेवेलं होहिन्ति कोज्जहलेण सुणंतेहिं कुमारपचाणयणकालागएहिं पुरा तुम्ह निसुयसद्दणुमाणेण पच्चभिन्नायत्ति, ता कुणह पसायं जयसेहरकुमारजीवियदाणेण, एत्थंतरे विण्णायपरमत्थेण भणियं पत्थिवेण-ओ महारात्त ! परिचय फलस-भावं, पणयभंगमीरुणि भवंति सप्पुरिसिहिययाणि ता अंगीकरेसु एएसि पत्थणं, धोरसिवेण भणियं-महाराय ! बाढं विरत्तं मम रज्जादीहिंतो चित्तं, गाढपावनिबंधणं खु एयं, रण्णा भणियं-मा मेवं जेपेसु, जओ-

सन्नायं दिसओ विसिट्ठमुणिणो पालितथस्साणिसं, सासितस्स विसिट्ठनीइ मणुए दाणाइ दितस्स य । धम्मो होइ निवस्स वस्समइणो रज्जेऽवि संचिट्ठओ, नो साहुस्स स सत्थवज्जियविहीजुत्तस्स गुत्तस्सवि ॥ १ ॥ धोरसिवेण भणियं-महाराय ! एवमेवं, राइणा भणियं-जइ एवं ता गच्छह तुब्भे, पडिच्छह [वि]जयसेहरकुमार-पूयापडिवत्तिं, धोरसिवेण भणियं-महाराओ निवेयइ तं कीरइत्ति, तओ पहरिसिया विज्जाहरा, सायरं पणमिउं तेहिं राया विन्नत्तो-अहो महायस ! परमत्थेण तुब्भेहिं दिन्नं अह पडुणो जीवियं, अह पसुक्कवालपसुहकुलिंगो-वगरणो विओगेवेयणावसविसप्पमाणनयणंसुधाराघोयवयणो धोरसिवो गाढमालिंगिय नरवंइ सगगयगिरं भणिउमाढत्तो-

कुब्भमतिमिरुब्भामियलोयणपसरेण तुज्झ अवरद्धं । जं किंपि पावमइणा तमियाणिं खमसु मम सधं ॥ १ ॥

सीसो इव दासो इव रिणिओ इव किंकरो इव तुहाहं । ता साहसु किं करणीयमुत्तरं राय नरसिंह ! ॥ २ ॥

रत्ना भणियं जइया निरज्जसिरिं समगमणुहवसि । मम संतोसनिमित्तं तइया साहिज्जसु सवत्तं ॥ ३ ॥

एवं काहंति पथंपिऊण विज्जाहरोहिं परिरिओ । दिव्विमाणारूढो सो झत्ति गओ जहाभिमयं ॥ ४ ॥

रायावि पत्ततिहुयणरायसिरिवित्थरं पिव सयलसुकयसंचयपत्तोवचयंपिव समत्थपसत्थित्थदंसणपूयं पिव अत्थपाणं मन्नतो पाणिपइट्ठियखगरयणो गओ नियभवणं, निसण्णो सेज्जाए सुत्तो खणंतरं समागआ निदा, निसावसाणे य रणज्झणंतमणिनेउरराणुमगलगचक्कगखलियचंकमणा अणायरसट्ठ्ठाणिउत्तलट्टकंचीकलावणमुहाभरणा सहरिस- पधाविथलुज्जिवामणिपुल्लिदिपमोक्खचेडीयाचक्कवालपरिखुडा पविट्ठा चंपयमाला देवी, दिट्ठो राया निदावसनिस्स- हेसेज्जाविमुक्कसवंगोवंगो, भणियं चउणाए-परिणीयपुत्तिओ इव हयसत्तू इव विट्ठत्तदविणोव परिपट्ठियसव्वसत्थोव्व निब्भयं सुयइ नरनाहो, अह खणंतरं पवज्जियाइं पाभाइयमंगलतूराइं पयडीहूयाइं दिसिसुहाइं, पट्ठियं मागहेण- लंघेउं विसमंपि दोसजलहिं गंजित्तु दोसायरं, गोत्तं पायडिउं सवीरियवसा चंकमिउं भीसणे । आसाअंगसमुब्भवेण महसा सोरण संपूरिउं, सूरु देव ! तुमं पिवोदयसिरिं पावेइ सोहावहं ॥ १ ॥

एवं च निसामित्ता पबुद्धो राया, चित्तिउमाढत्तो य-अहो सारस्सयंपिव वयणं जहावित्तवत्थुगम्भं कंहं पट्ठियं मागहेण ?, एवमेव पुणो पुणो परिभावेमाणो उट्ठिओ सयणाओ, अवलोइया य हरिसवसवियसंतनयणसहस्सपत्ता

देवी चंपयमाला, पुट्टा य सा आगमणपओयणं, भणियं च तीए-देव ! अज्ज पच्छिमद्वज्जामे सेसरयणीए सुहपसु-
 त्ताए सुमिणयंमि सहसच्चिय वयणंमि पविसमाणो मए अनणुप्पमाणो मणिरयणमालालंकिओ पवणससुदुयंवल-
 भिरामो फल्लिमयडिंडिरपंडुरडंडोवसोहिओ महज्झओ दिट्ठो, एवंविहं च अदिट्ठपुब्बं सुमिणं पासिज्जा पडिबुद्धा
 समाणी समागया तुम्ह पासंसि सुमिणसुभासुभफलजाणत्थं, ता साहिउमरिहइ देवो एयस्स फलति, रत्ता
 भणियं-देवि ! विसिट्ठो तए सुमिणो दिट्ठो, ता निच्छियं होही तुह चउससुहमेहलावलयमहिमहिलापइस्स कुल-
 केउस्स पुत्तस्स लाभो, जं तुब्भे वयह अवितहमेयंति पडिवज्जिय निवद्धा देवीए उत्तरीयंमि निट्ठुरा सउणगंठी,
 खणंतरं च मिहोकहाहिं विगमिय गया देवी निययभवणं, रायावि कयपाभाइयकायवो निसण्णो सभगंढवंसि
 अह पढममेव गाढकोउहलाउलिज्जमाणमाणसा समागया बुद्धिसागरपमुहा मंतिणो, भूमितलविलुलियमउलिमंढला
 निवडिया चरणेसु, दिन्नासणा निविट्ठा सट्ठाणेसु, विन्नविउमाढत्ता य-देव ! अज्ज चउजामावि सहस्सजानव कहमयि
 पभाया अम्ह रयणी घोरसिवसुणिवइयरोवलंभसमसूगत्तणेणं, जइवि किंपि पसंतवयणावलोयणाइलिं गोवगया कज्जसिद्धी
 वट्ठइ तहावि विसेसेण तुब्भेहिं साहिज्जमाणिं सोउमिच्छामो, ता पासियउ देवो रयणिवइयरनिवेयणेणंति, ताहे तौसं
 वयणाणुरोहओ ईसिं विहसियं काउं जहा घोरसिवेण समं मसाणदेसंमि संपत्तो जह विन्नाओ लोभभायरमाणो
 जहा य सो भणिओ गिणहसु सत्थं जह तेण कत्तिथा वाहिया कंठे जह पडिस्सुओ बाहू सकत्तिओ जह महीयले

निहओ जह उट्ठिओ पुणोऽविहु निफंदो जह हओ पच्छा सुरसुंदरीहिं खित्तो जह कुसुमभरो समागया देवी जह दिन्नो तीए वरो जह सा अदंसणं पत्ता जहा घोरसिवो निवेयसुणओ पट्ठिओ य मरणत्थं जह पुव्वयइयरो तेण संठिओ (निवेइओ) जह व संठविओ जह परिचियविज्जाहरविमाणमारुहिय सो गओ नमिउ संखेवणं तह नरवरेण सिट्ठं समत्थं, सोच्चमं हरिसिओ मंतिवग्गो, पयट्ठिओ य नयरीए महंतूसवोत्ति ।

अह अन्नया कयाई चंपयमालाए रायमहिलाए । दुहिसत्तरक्खणंमी दीणाणाहाण दाणे य ॥ १ ॥
देवगुरुपूयणंमी पणईणं चित्तियत्थदाणे य । उज्जण्णो दोहलओ विसिट्ठगब्भाणुभावेण ॥ २ ॥ जुम्मं ।
चित्तेइ य सा एवं ताओ धन्नाओ अम्मयाउ इहं । इय पुन्नदोहलओ जाओ गब्भं वहति सुहं ॥ ३ ॥

एवं च अपुज्जंतदोहलयसंक्कप्पवसेण कसिणपक्खमयलच्छणमुत्तिव्व कसित्तणमणुभविउं पवत्ता देवी । अन्नया य पुट्ठा नरवइणा-देवि ! किमेवं पइदिणं किसत्तणं पावेसि?, साहेसु एयकारणं, गाढनिबंघे सिट्ठं तीए नियमणवच्छियं, ताहे परं पमोयमुव्वहतेण विसेसयरं पुरियं नरिंदेण, माणियडोहला य धरणिव्व निहाणसंचयं दिसव्व नलिणीनाहं सुहंसुहेणं गब्भं वहमाणी देवी कालं गमेइ, अण्णया य पडिपुण्णेसु नवसु मासेसु अट्ठमराइदिएसु सुभेसु तिहि-करणनक्खत्तमुहुत्तेसु पुरंदरदिसिव्व दिणयरं कोमलपाडलकरपडिपुण्णसव्वंगोवंगसुदरं पुत्तं पसूया । तओ सहरिसं गयाओ नरिंदभवणंमि चेडीयाओ, दिट्ठो राया, भणिओ य-देव ! वद्धाविज्जसि जएण विजएण य तुमं, जओ

इयाणिं चैव पसूया देवी चंपयमाला, जाओ य समुज्जोतियसयलदिसामंडलो तेयरसिध पुत्तोत्ति, इमं च सोच्चा नरिं-
देण दिन्नं तासिं भूरि पारिओसियं, कओ दासित्तविगमो, आहूया पहाणणपुरिसा, समादिट्ठा य जहा पयट्ठेह नीसेस-
नयरीए तियचउक्कचचरेसु खंदमुगुंदसूरिंदगयमुहमंदिरेसु य परममहूसवं, वियरह अणिवारियपसरं कणयदाणं मुयह
चारगाहितो जणंति बुत्ते जं देवो आणवेइत्ति भणिऊण पुरीए पारद्धं तेहिं वद्धावणयं ।

कहं चिय?, -पंचणयारवन्नयविरइयसुपसत्थसत्थियसमूहं । विक्खित्तक्खयदोवापवालसोहंतमहिवीढं ॥ १ ॥

रहसपणच्चिरतरुणिगणवच्छत्थलुट्टुहारसिरिनियरं । अन्नोन्नावहरियपुण्णपत्तवट्टंतहलबोलं ॥ २ ॥

पडिभवणदारविरइयवंदणमालासहस्सरभणिज्जं । कमलपिहाणामलपुन्नकलसेरंहंतगेहमुहं ॥ ३ ॥

वज्जंताउज्जसमुच्छलंतघणघोरघोसभरियदिसं । चिन्ताइरित्तिदिज्जंतदविणसंतोसियत्थिगणं ॥ ४ ॥

पसुइयनीसेसजणं कुलथेरीकीरमाणमंगलं । इय नरवइकयतोसं वद्धावणयं कयं तत्थ ॥ ५ ॥

एत्थंतरे मंत्तिसामंतसेणावइसत्थवाहपमुहा पहाणलोया गहियविविहतुरयरयणसंदणपमोक्खविसिट्ठवत्थुवित्थरा
गंचूण नरवइं वद्धाविसु ?

इओ य सो घोरसिवो विज्जाहरेहिं नेऊण समप्पिओ जयसेहरस्स कुमारस्स, तेणावि पिउणोव गुरुणोव तदागमणे
कओ परममहूसवो, पुट्ठो य एसो पढमंदसणाओ आरब्भ सव्वुत्तंतं, धरिओ ण्हाणविलेवणभोगयणदिंस्सुयदाणपुरस्सरं

कइयवि वासराइ, अन्नदियहे चाउरंगसेणासण्णाहेण जयसेहरकुमारोण गंतूण सिरिभवर्णमि नगरे विजयसेणरणो
दंसिऊण जहावित्तं संसिऊण य दुइत्तंमत्तिसामंतुस्सिखलदलणपुव्वं सो घोरसिवो सहत्थेण निवेसिओ रायपए, विजय-
सेणोऽवि ठविओ जुवरायत्ते, एवं कयकायव्वो जहागयं पडिगओ जयसेहरो, घोरसिवोऽवि पुव्वंपिब मुंजिउं पवत्तो
नियरज्जंति। अन्नया तेण सुमरिऊण नरसिंहनरवइणो रज्जसंपत्तिवुत्तन्तनिवेयणं पुव्वकालपडिवन्नं तक्खणंचिय विसज्जिया
पहाणपुरिसा विसिट्ठपाहुडसमेया नरसिंधनरवइणो समीवे नियवइयनरनिवेयणत्थं, पत्ता य ते अणवरयपयाणएहि
जयतीनयरियरिसरुइंसं, निसुणिया य रत्ता, पवेसिया य महाविभूईए, समणियाइं रत्तो तेहिं पाहुडाइं, साहिओ
घोरसिवनरवइसमाइठुत्तंतो, हरिसिओ राया, सम्माणिया उचियपडिवत्तीए, पेसिया य सट्ठुणंसि ।

अन्नदिवसे य समारद्धो कुमारस्स नामकरणमहूसवो, समाहूओ कुलथेरीजणो, तओ वज्जंतसु चउव्विहाउज्जेसु
नच्चंतसु तरुणीसत्थेसु मंगलमुहलेसु वारविलयाजणेसु पढंतसु मागहेसु पइद्वियं कुमारस्स पुव्वपुरिसक्कमागयं नरवि-
क्कमोत्ति नामं, कालक्रमेण य विइकंतवालभावो नीसेसविज्जापायस्स लेहायरियस्स चेडयचक्कवालपरिवुडो महा-
विभूईए पढणत्थमुवणीओ, अकालक्खेवेण य बुद्धिपगरिसेण जाओ एसो कलासु कुसलो, कहं चिय?—

पत्तट्ठो धणुवेए कुसलो नीसेसमल्लविज्जासु । कयकिच्चो करणेसु विचित्तचित्तसु निउणमई ॥ १ ॥
परभावलक्खणम्मी वियक्खणो जाणओ समयसत्थे । पत्तच्छेये छेओ निम्माओ सहसग्गेसु ॥ २ ॥

निउणो मंतविथारे तंतपओगेसु कुसलबुद्धी य । पुरिसकरितुरयनारीगिहलखणबोहनिउणो थ ॥ ३ ॥

आउज्जनट्टज्यूयप्यओगबहुभेयगेयचउरो य । किं बहुणा?, सबत्थवि गुरुघ सो पगरिसं पत्तो ॥ ४ ॥

एवं च गहियकलाकलावं कुमारं धेत्तुण गओ कलयरिओ नरवइसमीवं, अब्भुट्ठिओ परमाथरेणं नरवइणा, देवाविचारा-
णो उवविट्ठो पुट्ठो य-किमागमणकारणति, कलयरिएण भणियं-देव ! एस तुम्ह कुमारो गाहिओ नीलेसकलाओ भुरसु-
रुव पत्तो परमपगरिसं, न एत्तो उत्तरेण गाहियव्वमत्थि, ता अणुजाणेउ देवो अम्हे सट्ठाणगमणायत्ति, अह अकालभवे-
वसिक्खियकुमारकलाकोसलसवणपवहुमाणहरिसभरनिम्भरेण नरवइणा आचंदकालियसासणनिबद्धत्तगहारा-
णेण पवरचामीथरयणरासिवियरेण विसिट्ठवत्थफुल्लंतवोलसहत्थसमप्पणेण य सम्माणिऊण परमाथरेणं पेरिसो
कलयरिओ सट्ठाणं, कुमारोऽवि निउत्तो गयतुरयवाहीयालीसु समकरणत्थं, सो य दढासणवंधवीरयाए महात्थेण
य जामभेत्तेणवि समसुवणेइ सत्त मत्तसिंधुरे पवणजवणवेगे परमजच्चे चउद्दस तुरंगमे अट्ट महामल्ले य, एवं च इत्थो
असमबाहुबलेण य मइपगरिसेण य कलाकोसल्लेण य नयपालेण य विणयपवत्तणेण य समओचियजाणणेण य
असरिससाहसत्तणेण य मयणाइरेयरुवविभवेण य जणवच्छलत्तणेण य वाढमक्खित्तचित्तो कुमारभेक्कमेव धढोवेइ
मंगलपाढेसु लेहेइ चित्तभित्तिसु निसामेइ कित्तीसु गायावेइ गीएसु अभिणच्चावेइ नट्टेसु, अविय-
रुद्वेपि दुट्ठसीलेऽवि रुवरहिएऽवि गुणविहीणेऽवि । लोओ पुत्ते पणयं किंपि अपुत्तं पयासेइ ॥ १ ॥

किं पुन चिरकालसमुन्भवमि नीसेसगुणमणिनिहिमि । सकुलमुद्धरणखमे न होज्ज नेहो नरवइस्स? ॥ २ ॥
एगया य अत्थाणमंडवनिस्सन्नमि नरवइमि पायपीढासीणे कुमारे नियनियट्ठाणनिविट्ठसु मंतिसामंतसु समारद्धमि
गायणजणे मणोहारिसरेण गेए पणच्चिरमि चित्तपयक्खेवनट्टविहिवियक्खणे चारविलासिणीजणे पच्चासन्नभागतूण
विन्नविचं पडिहारेण-देव ! हरिसपुरनयराहिवइस्स देवसेणभूवइस्स दूओ दुवारे देवदरिस्सणं समीहेइ, राइणा
भणियं-भइ ! सिग्घं पवेसेहि, जं देवो आणवेइत्ति भणिऊण पवेसिओ अणेण, कया से उचियपडिवत्ती, पुट्ठो य
आगमणप्पओयणं, दूएण जंपियं-देव ! हरिसपुरपहुणा देवसेणनरिदेण रूचजोद्धणगुणोवहसियनागकन्नगाए निय-
सुयाए सीलवइनामाए वरनिरूवणत्थं पेसिओऽम्हि तुम्ह पासे, रणा जंपियं-भइ ! पेच्छसु पायपीढासीणं कुमारं,
परिभावेसु य किमणुरूवो वरो न वत्ति, दूएण भणियं-देव ! विन्नवणीयं अत्थि किंची, रत्ता भणियं-विन्नवेसु, दूएण
जंपियं-जइ एवं ता निसामेसु, अत्थि अम्ह नराहिवस्स देवसेणस्स समगवीरवग्गपहाणो कालमेहो नाम
महामल्लो, तस्स य किं वन्निज्जइ बलपगरिंसमि?, तथाहि-

दढकादिणकायवणमाहिसज्जूहनाहेण सह सरोसेणं । सीसेण संपलगइ जुज्जेउं सो बलमएणं ॥ १ ॥

मुंडादंडे घेत्तण पाणिणा मत्तदतिनाहंपि । तदिणपसूयसुरहीसुयं व कइइ लीलाए ॥ २ ॥

भारसथसंकलपि हु तोडइ हेलाए जुणरज्जुं व । निधमुट्ठिपहारेण य सिलंपि सो जज्जरं कुणइ ॥ ३ ॥

मंसस्स विरुद्धं किर लोहं एयंपि तत्थ विवरीयं । जं नाराया खित्तावि तस्स बाहिंपि न छिबंति ॥ ४ ॥

इय सो नियगाढवलवेलवओ तिहुयणं जरतणं व । मन्नतो भमइ पुरे निरंकुसो मत्तहत्थिन्व ॥ ५ ॥

अन्नया य तस्स पसिद्धिमसहमाणा समागया देसंतराओ मल्ला, दिट्ठो तेहिं राया, साहिंयं आगमणपओयणं, समाहूओ य रण्णा कालमेहसल्लो, निवेइओ से तव्वइयरो, अबुवगयं तेण तेहिं समं जुज्झं, सज्जीहूया दोवि पक्खा, कओ अक्खाडओ, विरइया उभयपासेसु मंचा, निविट्ठो अवलोयणकोज्जहलेण नीसेसअंतेउरसमेओ नरवइ पुरपहा-
णपुरिसवग्गो य, समाढत्तं च भुयाहि य अडुपायइयाहिं च बंधेहि य विसमकरणपओगेहिं मल्लेहिं सह तेण जुज्झिउं, खणंतरेण य दढमुट्ठिण्हारेहिं निहया कालमेहेण देसंतरागया मल्ला, कओ लोणेण जयजयसहो, दिन्नं से नरिंदेण विजयपत्तं, सम्माणिओ विचिच्चवत्थाभरणेहिं, गओ नियनियट्ठोणसु नयरज्जो, रायावि अंतेउरपरियरिओ संपत्तो नियमंदिरं, बीयदिवसे य सव्वालंकारविभूसिया काऊण देवीए पउमावईए पेसिया सीलवई कण्णगा पिउणो पायवडणत्थं, चेडीचक्कवालपरिवुडा य सा पत्ता नरिंदसगासे, निवडिया चरणेसु, निविसिया रण्णा उज्जे, पुच्छिया य-पुत्ति ! केण कारणेण आगयांसि ? , तीए भणियं-ताय ! तुम्ह पायपडणनिमित्तं अम्ममाय पेसियमिह, राइणा चित्तियं-अहो वरजोगत्ति कलिऊणं नूणं देवीए पेसिया, ता किमियाणिं कायन्व ? -

एकं चिय मह तणया परुढणयाए अग्गमहिंसीए । एसा वरस्स जोगा को पुण एयाए होज्ज वरो ? ॥ १ ॥

एयाए चित्तवित्तिं अवियाणिय जइ वरेज्ज निवपुत्तो । जो वा सो वा आजम्भ दुक्खया होज्ज ता एसा ॥ २ ॥
इति परिभाविज्जण पुच्छिया सा नरवइणा-पुत्ति ! को तुज्ज वरो दिज्जइ ? किं पुरुवो उयाहु समरंगणसवडमुहु-
सुहडपडिक्खलणपयंडपरक्कमो किं वा समरभीरुओत्ति, तओ ईसिं विहासिज्जण भणियं तीए-ताओ जाणइ, राइणा
भणियं-पुत्ति ! अवरोहकयकजाइं न सुहावहाइं होति ता सम्मसणुचितिय भणसु, तीए भणियं-ताय ! जइ एवं
ता जो एवं कालमेहमल्लं नियभुयवलेण महियपरक्कमं करेज्जा सो अम वरो होज्जत्ति, राइणा चित्तियं-अहो वलाणु-
रागिणी मम तणया, को पुण समत्थो एयस्स वइयरस्स ? , भणिया य सा-पुत्ति ! मा कुणसु एवं, अतुलमल्लो खु
एसो, ता अन्नं वरं पत्थेसु, तीए भणियं-ताय ! जइ परं हुयासणो अन्नोत्ति, इय तीए निच्छयमुवलब्ध रत्ता पेसिया
सवनरवइणं दूया, निवेयाविओ एस वुत्ततो, एवं च अणभुवगच्छमाणा नरवइकुमारा एवं ययंपति-
को बोहेज्ज कयंतं ? को वा हालाहलं विसं भक्खे ? । को कालमेहमलेण जुज्झिउं सह पवजेज्जा ? ॥ १ ॥
तेण न कज्जं रज्जेण किंपि न कज्जं च तीए भज्जाए । जा लब्भइ खित्तसंसयजीविद्येहिं कट्टेण ॥ २ ॥
एवं च निवभगजणभणोरेहिं असिद्धकज्जेहिं चव पडिनिधत्तिज्जण दूएहिं रणो कहिओ मल्लजुज्झाणभुवग-
मगब्भो नीसेसनरेसरकुमारवुत्ततो, तं च सोऊण गाढसोगाउलो जाओ देवसेणनरवइ, एत्थंतरे विन्नत्तो मंतिसामं-
तेहिं-देव ! किमेवं उच्छन्नच्छाहा होह, अज्जवि देवेण अनिरुविओ चिट्ठइ कुरुदेसाहिवनरवइसुओ नरविक्रमकुमारो,

राइणा भणियं-सोडवि एवं चैव परं सुहो हविस्सइ, मंतिसामंतेहिं वुत्तं-देव ! मा एवं जंपह, जओ अपोरिसे(परिओ)ओ
 तस्स बलपणरिसो असंभावणिज्जो निजुद्धपरिस्समो अणाइक्खणिज्जा मल्लविज्जाए कोसल्लथा, किं बहुणा ? नरसिंहनरवइ-
 साहसतोसियाए भगवईए जो दिण्णो तस्स किं वन्निवधं ? सरीरमेत्तेण चैव सो नरूथो सेसगुणेहिं निच्छियं देवोत्ति,
 एयं च समायणिऊण संजायहरिसेण देवेण पेसिओऽहं तुम्ह समीवे, ता देव ! एयं तं विण्णवणिज्जंति, राइणा भणियं-
 भइ ! वरयणपुन्नकेसरिगुहव सेसाहिमत्थयमणिव समगं चिय भयहरिसे जणेइ विण्णत्तिया तुज्झ, दूएण कहियं-
 देव ! एवमेयं, तओ राइणा अद्धच्छीए पेच्छियं कुमारवयणं, कुमारोऽवि तक्खणं चिय उट्ठिओ निवडिओ रण्णो
 चरणेसु, भणिउमाटत्तो य-ताय ! समाइसह किं कीरउत्ति ? राइणा भणियं-कुमार ! निमुणिंयं तए दूधवयणं ?
 केरिसो वा तुह भुयदंडपरक्कमो ? कुमारेण भणियं-ताओ जाणइ, तओ राइणा जोगयमुवलज्ज अज्जुवगयं उल्लं-
 जुज्झं, सम्माणिऊण सट्ठणं पेसिओ दूओ, गओ जहागयं, निवेइयं च तेण जहाविंत्तं देवसेरण्णो, जाओ सो परमो
 पमोओ, निरूविंयं परिणयणजोगं लग्गं, पेसिया य वरागरिसगा पहाणपुरिसा, अणवरयपयाणएहिं पत्ता जयंति-
 नयरिं, विरइओ आवासो, अणुरूवसमए दिट्ठो राया, सिट्ठं नियकज्जं, तओ पउरकरितुरगसुहडकोडिपरिखुओ पेसिओ
 तेहिं समं कुमारो, पत्तो कालक्कमेण हरिसपुरनगरसमीवे,

तो तं इंतं नाउं, रत्ना काराविओ पयत्तेणं । वंसगवद्धयचिंधवंधुरो झत्ति नयरमहो ॥ १ ॥

विहिया नरोहिं कुसलेहि कुसुमछाडोवमुंदरा मग्गा । खित्ता य कुसुमपयरा रणञ्जणिरभमंतभमरउला ॥ २ ॥
नच्चतनाडइज्जा तालायरकहगपवरमणिज्जा । जाया चउक्कचचउम्मुहणमुहदेसावि ॥ ३ ॥
ठाणे ठाणे रइया दसद्धवणेहिं सुरभिक्षुसुमेहिं । विच्छित्तिविचिताओ लंवतुद्दामदामाओ ॥ ४ ॥
भवणंपि तस्स जोग्गं निरुविंयं सत्तभूमियं रम्मं । चंदणरसलिहियपसत्थसत्थियं श्रंभसयकलियं ॥ ५ ॥
तं नत्थि जं न विहियं कुमारगमणे पुरंमि नरवइणा । अहवा हरिसुक्करिसा पुरिसा किं किं न कुंवति ? ॥ ६ ॥
इत्थंतरे समागया पहाणपुरिसा, पणमिऊण भणियं तोहिं-देव ! वद्धाविज्जह तुब्भे पुरसमीवसमागयकुमारकु-
सलोदंतसवणेण, तओ समुद्धयविजयेजयंतीसहस्साभिरामाए चाउरंगिणीए सेणाए समेओ सियसिंधुरखंधाधि-
रूढो पडिपुण्णचंदमंडलाणुकारिणा छत्तेण धरिज्जमाणेणं निग्गओ राया कुमारभिमुहं, खणंतरेण दिट्ठो कुमारो
समालिंगिओ गाढपणयं पुट्ठो य सरीरारोगयं, दट्ठण कुमारसरीरसंठाणसिरिं चित्थियं रण्णा-निच्छियं इयाणिं विण-
स्सइ कालमेहमल्लस्स बाहुवलमडण्णोत्ति, अह सुहुत्तमेत्तमणुगच्छिय पुवनिउत्तनियनियट्ठाणसु पेसिओ कुमारप-
रियरो, कुमारोऽवि विमुक्को तंमि चव पासाए, दवाविथाइं करितुरयाइं जोग्गसणाइं, कुमारस्सवि कए पेसिया
पउरवंजणभक्खभोगणसमिद्धा रसवइ, कयं च अन्नपि तक्कालोचियं करणिज्जं, आहूया य अवरणहसमए पहाणपुरिसा,
भणिया य-भो गंतूण निवेयह कुमारस्स जहा एसा अम्ह सुया बलाणुराणिणी, ता दसेह कालमेहमल्लस्स विजण्ण

नियसामत्थंति, जं देवो आणवेत्ति भणिऊण ते गया कुमारसमीवे, निवेइओ तस्स नीसेसवइयरो, अब्भुवणओ
कुमारेण, ततो बीयदिवसे आढत्तो अक्खाडयपरिक्खेवो निवद्धा मंचा परमकोऊहलाउलिजमाणमाणसो मिलिओ
नयरजणो, ठिओ मंचंमि संतेउरो नरवई, आरुढा य एकदेसंमि चेडीचक्कवालपरिवुडा पाणिपइट्टियलट्टपफुलकुल्ल-
माला सीलमई रायसुया, पडिक्खलिओ सव्वत्थ जणसंचारो, कओ अंगरक्खेहिं परिक्खेवो, वज्जियं पलयकालगज्जं-
तपक्खुहियपुक्खलावत्तपगज्जिरवगंभीरं चउव्विहमाउज्जं, जाओ अवसरो, मंचाओ तओ कुमारो गाढुणीडियनियं-
सियकडिहो दढवद्धकेसपासो पमुक्काभरणसंभारो कुल्लथेरीकयरक्खो जलणुब्भडगुरुपयावदुप्पक्खो संनिहियपाडिहं-
रोव भासुरो झत्ति अवयरिओ, तहा—

कंठतडुब्भडपरिहियपयतलविलुलंतविमलवणमालो । आवद्धमल्लत्रलओ गजंतो पलयमेहोव ॥ १ ॥

मयभिमलरत्तच्छो गव्वुद्धरकंधरो तुरियचवलं । पेच्छयजणपरियरिओ संपत्तो कालमेहोवि ॥ २ ॥

रे मल्ल ! मेल्लसु लहुं पुव्वज्जियविजयगद्वमेत्ताहे । अणुसरसु ममं सिगवं अह भणिओ सो कुमारेण ॥ ३ ॥

सोउं कुमारवयणं जरोव्व गव्वो झडत्ति तस्स गओ । अणुचित्तिउं च लग्गो जुत्ताजुत्तं सबुद्धीए ॥ ४ ॥

कहं ?—जइ एस मए विजिओ एयजणाओ तहावि नो कुसलं । अह एएण जिओऽहं वित्तिच्छेओ तओऽवस्सं ॥ ५ ॥

अतुलवलविक्रमस्स उ इमस्स विजएऽवि मज्झ संदेहो । ता उभयपासरज्जुव्व संकडं एयमावडियं ॥ ६ ॥

इय बहुभेद्यविकल्पणवसाउल्लिखतचित्तवित्तस्स । फुट्टं तडत्ति हियं तस्स कुमित्तस्स व रहस्सं ॥ ७ ॥

तओ जाओ कलयलो, उरघोसियं च जणेण-अहो महप्पसावं दंसणं कुमारस्स, जेणवलोयणमेत्तेणवि वज्जगंठिव निट्ठुरं फुट्टं तडत्ति हियमेयस्स, ता जयइ सवहा कुमारो, एत्थंतरे ओयरिऊण मंचओ चेडीजणपरिवुडाए सील-मईए खित्ता कुमारकंठदसे समं नियचित्तिचित्तीए वरमाला, पवज्जियाइ असंखघोससंखोभियभवणाइ मंगलतूराइ, जाओ णयरे पमोओ, तुट्ठो राया सह मंतिसामंतोहिं, पारद्धो विवाहो महाविभूईए उभयपक्खपरितोसणं, निव्वत्तिए य तंमि-पगलंतभयजलुब्भडकरडतडुद्दामभमिरभसराणं । सुहलक्खणं कियाणं पंचसयाइ गइदाणं ॥ १ ॥

मणपवणजविणवेगाण जच्चतुरंगाण वंक्कीयाणं । बारस चेव सहस्सा रहाण दो तुंगसियाणं ॥ २ ॥

कणगस्स तीस कोडी चीणंसुयपसुहवत्थरासीओ । दिन्नाओ कुमारस्सा पाणिस्स विमोयणे रत्ता ॥ ३ ॥

कयमन्नोपि सविसेसं कायध्वं, जाओ अवरोध्वरं पणयभावो । अवरवासरे य पेसिया कुमारेण पहाणपुरिसा देवसेण-नरवइस्स पासे नियट्ठाणगमणाणुन्नागहणनिमित्तं, गंतूण निवेइयं तोहिं नरवइस्स, तओ देवसेणेण पुणरवि सम्माणिओ पहाणवत्थुसमप्पणेण कुमारो, निरूवियं गमणजोगं दिणं, निउत्ता दंडनायगा अणुगमणत्थं, अह पसत्थवासरे समुरप्पभिइण कयसुचियकायध्वो पत्थिओ कुमारो हरिकरिनरनियरसमेओ सनयराभिमुहं । एत्थंतरे-

सव्वालंकारधरिं सीलवइं चेडियाजणसमेयं । लच्छिव कुमारपुरो काउं रत्ता भणियमेयं ॥ १ ॥

पुत्ति ! पवित्रं सीलं पालेज्जसु मा कोरज्जसु कुसंगं । अणुवत्तिज्जसु गुरुजणमवणिज्जसु दुव्विणयभावं ॥ २ ॥
 सेविज्जसु नयमगं भियमहुरक्खरगिरं वएज्जासि । आराहेज्जसु सपियं देवो भत्ता कुलवहूणं ॥ ३ ॥
 कुमरोऽवि इमं वुत्तो एसा एक्का लुया ममं इट्ठा । छावव सहयरी जह हवइ सया तह तए किच्चं ॥ ४ ॥
 इय सिक्खविउं राया धूपं विरहग्गिदूमियसरीरो । अणुगमिऊण कुमारं नियनयराभिमुहमह चलिओ ॥ ५ ॥
 कुमरोऽवि पेच्छतो नगनगरागरासकाणरमणिज्जं मेइणिं साहितो विसमपल्लीनिलीणे भिल्लाहिचइणो
 पयट्ठतो पुव्वनीईओ अवलोयंतो तावसजणनिसेविए अणवरयज्जंतघयमहुसमिहमहोसहिसमुच्छलंतवहलधूमपडल-
 कयमेहंसकसिहडितंडवाडंबरमणिजे आसमपए, पइदिणपयाणएहिं संपत्तो जयंतीए नयरीए वाहिरुज्जाणे, वद्धाविओ
 नरसिंघनरवई, काराविया नयरसोहा, जाया समुदुयविचित्तचीणंसुयचिंधंबंधुरा रायमग्गा, अह पसत्थंमि सुहुत्ते
 अंतउरपुरप्पहाजणपरियरिएण नरिंदेण अणुगम्ममाणो नरविक्रमो नयरिं पविसिउमारद्धो, ठिया य रायमग्गोभव-
 पासपासायमालासु तदवलोयणकोऊहलाउला कुसुमुम्मिस्सक्खयहतथा लोयसत्था, जाया य कुमाररुक्खपलोयणया-
 उब्भवंतविविहवियाराण जुवईजणाण विब्भमा । कंहं चिय ?—

दट्ठूण कावि पडिजुवईकंतंगडत्थलंतसंकंतं । कुसुमक्खएहिं ताडइ ईसाइतिव्व रायसुयं ॥ १ ॥
 पवियंभियकुमुमाउहवसवियसियलोयणा पलोयंती । न मुणइ सकडिल्लिपिहु पवणेणायट्ठियं अवरा ॥ २ ॥

कुमरपल्लेयणवामूढमाणसा निचला गिहगगया । अनिलचलंचलचूडा काविहु रेहइ पडायव ॥ ३ ॥
अम्मे ! जामि पलोइहुं दसदिसं कोलाहला सुवए, सा मा गच्छ मयच्छि ! निच्छियमिमो सो एइ रणो सुओ ।
दिट्ठे जम्मि पणट्ठनिव्वुइमणा सुद्धावरा मग्ग(ङ्ग)णा, वट्ठती विव सासुयाए पुरओ अन्ना इमं जपइ ॥ ४ ॥
इय एवं सविलासाहिं नयरनारीहिं सबविज्जंतो । कुमरो वहूसमेओ संपत्तो निययभवणंमि ॥ ५ ॥
तहिं गएण य कया सविसेसं गुरुजणाण पणामाइपडिवत्ती, समण्णिओ य रणा अंवरतलमणुलिहंतो निययभव-
णनिव्विसेसो पासाओ कुमारस्स, तत्थ ट्ठिओ य सो सक्को इव देवलोए धरणो इव पायाले विसयसुहं भुंजंतो
कालं गमेइ, अन्तरंतरा य तुरगवाहियालिं च मत्तसिंधुरदमणं च मल्लजुज्झब्भसणं च राहावेहकोऊहलं च धम्मसत्थ-
सवणं च देसंतरनयरवत्तानिसामणं च गुरुचरणनिसेवणं च मग्गजणमणोरहपूरणं च करेइत्ति । अह कुमारस्स का-
लक्कमेण सीलमईए सह विसयसुहं भुंजमाणस्स कुसुमसेहरविजयसेहरनामाणो जाया दोन्नि पुत्ता, ते य वल्लहा पिया-
महस्स, विविहप्यथारोहिं उवलालिज्जमाणा वट्ठति । अन्नया राइणो समीवे निसन्नंमि नरविक्रमे जहोचियठाणनिवि-
ट्ठमि सेवगजणे मयभरसंभरियसच्छंदजमुणावणविहारो तडयडारावतोडियनिविडवडुत्तरतारसयणमाणलोहनिगडो
सयखंडचुन्नियमहालाणखंभो निइयकरप्पहाराहयारोहगवग्गो पहाविओ नयरमज्जेण जयकुंजरो उम्मूलियगरुयहुममो-
डियगुरुविडवंकडयडरउदो कुंभत्थलपणोल्लणपाडियसुरभवणसिहरग्गो अइकट्ठिणकरप्फालणविहाडिउद्दामंतुंगपागारो

अइवेगुच्वालियकन्नतालविहवियमसलउलो अइरमसभरपहावणसपकखुकुलसेलचल्लिकयसंको दढदंतदंढताडणढलढ-
 लियट्टालयसमूहो करघायदंतवेहणचरणुणीडणनिवाडियजणोहो सव्वत्थ भमइ भीमो जमोव्व जुगविगमसमयंसि, अह
 मंदरमहिजमाणमहोयहिधोसघोरे समुच्छलिइ तियचउक्कचचोरेसु जणाणं अक्कदियरेवे पुच्छियं नरवइणा-भो भो
 किमेवं नयरे कोलाहलो सुम्मइत्ति ? जणेण भणियं-देव ! एस तुह जयकुंजरो भग्गालाणखंभो नयरं विहवह,
 एवं सोच्चा विसजिया कुमारपमुहा पहाणलोया जयकुंजरगहणनिमित्तं, भणिया य-अरे ! सव्वहा सत्थघायं परिहरं-
 तेहिं एयस्स वट्टियव्वं, एवं च पडिवजिय गया ते तदभिमुहं, न य पेच्छंति कमवि उवायं जेण हत्थी वसमुव्वग-
 च्छइत्ति, एत्थंतरे वेलामासवत्तिणी गुरुगम्भभारवसविसंदुलनिवडंतचरणा गाढपाणभयकंपंतसरीरजट्टी इओ तओ
 य धावंती एगा कुलंगणा दिट्ठा जयकुंजरेण, तओ उल्लालियकरगो पवणवेगेण धाविओ तीसे अभिसुहो, सावि
 कुंजरं तहा सिग्घमागच्छंतं पेच्छिऊण सज्झसभरनिरुद्धपयप्पयारा कलुणाइं दीणाइं विलविउं पयत्ता, कंहं चिय ?-
 हे माइ भाय ताया तायह मं मा उवेक्खह इयाणिं । एसो मम वहणट्ठा दुट्टकरी पासमल्लियइ ॥ १ ॥
 हं हो पेच्छगलोया ! निक्करुणा करिवरं पडिक्खलह । गुरुगम्भभरकंता एसा संपइ विवज्जामि ॥ २ ॥
 अहह कंहं पावकरी एसो सो आगओ मम समीपे । निस्सरणा नित्ताणा कसुवायं संपइ सरामि ? ॥ ३ ॥
 किं कोऽवि महापुरिसो परोवयारत्थधरियनियपाणो । एत्थ न पेच्छइ सहसा मं दुक्खत्तं विणस्संति ॥ ४ ॥

इय दीणकलुणवयणाइं णेगसो भासिऊण खणमेक्कं । सुच्छानिमीलियच्छी वसत्ति सा महियेले पडिया ॥ ५ ॥
सोवि करिवरो दढरोसभरत्तणेत्तो संपत्तो तीसे थेवंतरेण, दिट्ठा य सा कुमारेण भयवसभूमिस्सहनिवडियंगी,
चित्तिंयं च-अजुत्तमजुत्तमियाणिं उवेहणं एयाए, जओ—

एक्कं अबला एसा अन्नं गुरुगम्भभारविवसंगी । अन्नं पुण सुच्छाए निमीलियच्छी धरणिपडिया ॥ १ ॥

अन्नं च पुणो ताथस्स एस जयकुंजरो अतीव पिओ । सत्थेण न हंतव्वो विसममिमं निवडियं कज्जं ॥ २ ॥

अहवा रूसउ ताओ जं भवइ तं करेउ मम इण्ह । हंतव्वो एस करी दुव्वलजणपालणं धम्मो ॥ ३ ॥

इय निच्छिऊण निविडवद्धुगुलंचलो तुरंगाओ अवयरिऊण अवलोइज्जंतो नरनारीजणेण निवारिजंतो पासव-
त्तिपरियणेण पडिखलिज्जमाणो अंगरक्खेहिं निरवेक्खो नियजीविद्यस्स सिग्घं पधाविऊण मेहस्स व भयजलासार-
पसमियरयनियरस्स कयंगंभीरगलगज्जियस्स सहस्सनयणोव थेवंतरेणासंपत्तस्स जयकुंजरस्स करणप्पओ-
गवसेण आरूढो पट्टिदेसंमि कुमारो, ताडिओ य कुलिसनिट्ठरेण छुट्ठिप्पहारेण करी कुंभत्थलसि, अह खयरं रोस-
मुवागओ सणांगि अनियत्तंतो नारीवहाओ सो कुमारोण जमजीहादुव्विसहाए खगंधेणूए आहओ सव्वसत्तीए
कुंभजुयलंतराले, तओ पढसुगमंतरविमंडलाओव करपसरो खरपवणपणुन्नकमलसंडाओव मयंदनीसंदो महागिरि-
गेरुयागराओव निव्वभरसलिलुप्पीलो कुंभत्थलाओ से वूढो महारुहिरप्पवाहो, सहसच्चिय विगयनयणोवलंभो विहलं-

घलीभूओ भओ इव मुच्छिओ इव दढपाससहस्ससजमिओ इव निच्चलो ठिओ करी, तओ अवयरिऊण कुमारेण संठविग्या
सा भूमिगया इत्थिया, विमुक्का य समीहिथपएसंमि, संथपि गओ नियमंदिं, सोऽवि करिवरो गहिओ आरोहेहि,
पारद्धो अणवरयजलघडसहस्सखेण तिसिरोवयारो, पयट्ठाविगाइं घायविसोहणाइं, महाविमहेण नीओ निययवास,
निवेइयं नरवइणो जहावित्तं, रुद्धो राया, परं सोयमुवागओ, भणिउमाढत्तो य—

रे रे वच्चह पुरिसा ! निस्सारह तं सुयं दुरायारं । जयकुंजरंऽवि निहए अज्जवि इह वसइ जोऽलज्जो ॥ १ ॥

अवो साहसतुट्ठाए तीए देवीए सुंदरो दिन्नो । पुत्तो अमित्तरूयो देवाविहु विण्ययारंति ॥ २ ॥

नूणं मूढो लोओ तम्मइ पुत्तस्स जो निमित्तमि । न सुणइ एवंविहदोससाहणे पयडसत्तुत्तं ॥ ३ ॥

अन्नाणविलसियमिणं गइं अपुत्तस्स जं निवारंति । इहलोयप्पडिणीओ परलोयसुहो कं होज्जा ? ॥ ४ ॥

नीसेसरज्जसारं एयं जयकुंजरं हणंतेण । कह भह सोवेक्खत्तं पुत्तेण पयासियं भणसु ? ॥ ५ ॥

ता जह पुवं एक्केण रक्खियं खोणिवलयमक्खंडं । रक्खिस्सामि तहेण्ह निस्सारह वेरियं एयं ॥ ६ ॥

जो एरिसं अणत्थं वीसत्थो कुणइ वसइ निस्सको । सो नूण ममंपि विणासिऊण रज्जपिहु हरेज्जा ॥ ७ ॥

इय पुणरुत्तं नरवइस्स निच्छयमुवलब्भ विमणदुम्मणा गया कुमारसमीवं रायपुरिसा, तं च पणमिऊण ^{सामन}
यणा निविट्ठा एगदेसे, पलोइऊण य तेसिं सुहसोहं भणियं कुमारेण—किं भो ! गाढमुविग्या दीसह ?, साहह किमेत्थ

कारणं? खण्तरं निरुद्धकंठं चिट्ठिय दीहुणहुणहुमुक्कनीसासपुरस्सरं दुस्सहविरहविरहनिस्सरंतवाहणवाहं परासुसियलो-
यणजुयलं भणियं पुरिसेहिं-कुमार! निम्भगगसिरसेहरा किं साहेमो? कुमारेण भणियं-कहं चिय? पुरिसेहिं भणियं-
जेण तुमेहिं सह दुस्सहो दीहविरहो भविस्सइत्ति, इंगियाकारकुसलत्तणओ परियाणिज्ज तेसिभिष्यायं भणियं
कुमारेण-किं कुविओ ताओ निविसयमाणवेइ? रायपुरिसेहिं भणियं-कहमेयं परुसक्खरं देवदुल्लहाणं तुम्ह भणि-
ज्जइ? सयमेव जाणह तुम्हे जमेत्थ पत्तकालं, तओ वत्थतंबोलाइणा पूइज्ज रायपुरिसा सट्ठणे पेसिया कुमारेण,
वाहराविया य निययसेवगा, भणिया य-भो महाणुभावा! वारणसिरवियारणकुविएण ताएण निविसओ आणत्तोहि,
ता गच्छह नियट्ठणेसु तुम्हे, अवसरे पुणरवि एज्जहत्ति, सम्माणिज्ज सप्पणयं पेसिया, देवी य सीलमई भणिया,
जहा-गच्छसु पिए! तुमं पि पियहरं, पत्थावे पुणरवि एज्जाहि, सा य खणमवि वियोगदुक्खमसहमाणी जमुणाजलस-
च्छहं सकज्जलं नयणवाहप्पवाहं मुंचती रोविउं पयत्ता, संठविया कुमारेण तेहिं तेहिं भदुरवयणेहिं, नेच्छइ य सा खण-
मवि वियोगं, तओ भणिया कुमारेण-पिए! दुग्गा मग्गा आजम्मसुहलालियाणं दढमजोगा य, असंजयसरीरवला
बालजुयलपरिवुडा य तंसि, ता विरम सव्वहा ममणुग्गहं कुणमाणी इमाओ असग्गहाओत्ति, सीलमईए भणियं-
अज्जपुत्त! तइया ताएण तुह किमुवइहं? कुमारेण भणियं-न सरामि, सीलमईए जंपियं-मम एक्कचिय धूया एसा
अचंतं निवुइठणं छायव सहचरी जह हवइ सया तह तए किंचत्ति, कुमारेण भणियं-पिए! सुमारियसियसियाणि,

तीए जंयिं-ता कीस नियत्तेसि सं ? कुमारेण भणिंयं-मग्गगाढपरिस्समकारेण नियत्तेमि, जइ पुण अवस्समेवागतं
मए संमं ता पडणा भवसु, विमुंचसु भवणनिवासभिइं परिचय सुकुमारत्तगंति, सीलमईए भणिंयं-एसा रामसुह-
दुक्खसहा जाया पगुणम्हि, तओ करकलियसरासणो पिट्ठिप्पएसवद्धतोणीरो सुयजुयलसमेयाए सीलमईए सहिओ
सुहपसुत्तेसु नयरलोएसु पसंतेसु गीयरवेसु सट्ठाणनिविट्ठसु अंगरक्खेसु पमत्तेसु जामकरिघडाधिरुट्ठसु सुहडंसु इओ
तओ पेसिएसु नियचेडगेसु नीहरिओ नयराओ कुमारो, अविच्छिन्नपयाणएहिं परं रंजंतरं गंसुं पवत्तो य ।

इओ य आयन्निऊण कुमारस्स विदेसगमणं सयलोऽवि नयरीजणो सुक्ककंठं विलविउसारद्धो, भंतिणोऽवि परिच-
त्तनीसेसरज्जवाधारा हरियसव्वस्ससारा इव विमणदुब्भणा गंतूण नरनाहं उवलंभिउं पवत्ता, कंहं विय ?

तिलतुसमित्तंपिहु नियपओयणं अम्ह साहिउं देवो । पुर्विं करिंसु इण्ह पव्वयमेत्तेऽवि नो पुट्ठा ॥ १ ॥
ता देव ! जुत्तमेयं काउं किं तुम्ह थेक्कजेऽवि ? । रज्जभरधरणधीरो जमेस निवासिओ कुमरो ॥ २ ॥
किं एगदुट्ठकुंजरकएण नियजीयनिव्विसेसस्स । पुत्तस्स एरिसगई विहिया केणावि नरयइणा ? ॥ ३ ॥
किं वा विंझमहागिरिपरिसरधणीए कुंजरकुलाइं । हरियाइं तक्कोरहिं जं देवो ववसिओ एवं ॥ ४ ॥
इत्थीए रक्खणओ किमजुत्तं नणु कयं कुमारेण ? । नियडिंभदुट्ठचेट्ठावि जणेइ जणयस्स संतोसं ॥ ५ ॥
पररजेसु य अजसो अम्हाण पयासिओ तए नूनं । जह नरसिंघनराहिवरज्जमुवेक्खंति गुरुणो य ॥ ६ ॥

ता गिणहह नियमुहं सह भयणधणेहिं मौक्कलह अम्हे । न सहिस्सामो एत्तियमवजसरयंफंसणं देव ! ॥ ७ ॥
इय मंतीहिं भणिए राया संजायचित्तसंतावो । अब्भुवगयनियदोसो ताहे ते भणिउमाढत्तो ॥ ८ ॥
सरिसह मम अवराहं जमपुच्छिय एरिसं कयं कज्जं । नो कोवभराओ जओ जुत्ताजुत्तं मए नायं ॥ ९ ॥
जह तुब्भे भणह तहा न कोऽवि दोसेऽवि चयह नियपुत्तं । इय वहयरछउमेणं मन्ने लच्छीए छलिओऽहं ॥ १० ॥
जं पुण इय दोसाओ मंतित्तविमोयणं कुणह तुब्भे । एसेव निरंजणसामिभत्तिजुत्ताण होइ मई ॥ ११ ॥
केवलमेक्को पुत्तो रज्जसमत्थो गओ विदेसंमि । तुम्हेवि उवेक्खह मं उभयं सोढुं न सक्कोऽहं ॥ १२ ॥
ता संपयं पसीयह रज्जं चित्तेह लहह कुमरस्स । सव्वत्थावि पउत्तिं एत्तो रोसेण पज्जत्तं ॥ १३ ॥

एवं गाढनिबंधेण पडिवन्नं मंतिजणेणमेयं, पेसिया य सयलदिसासु वरतुरयाधिरूढा पुरिसनियरा कुमारस्नेसण-
निमित्तं, गया य सव्वत्थ, निरुविओ सव्वजत्तेण, न केणवि दिसाभागमेत्तपि वियाणियं, तओ कहवयवासराहं
वियरिय तेसु तेसु ठाणेषु अकयकज्जेहिं चेव नियत्तिज्जण तेहिं सिट्ठो सभानिविट्ठस्स मंतिजणसमेयस्स नरिंदस्स
कुमाराणुवलंभवुत्तंतो, तं च सोचा अचंतं सोगं कुणंतो राया वागरिओ मंतीहिं-देव ! अलं परिदेविण, न
कयाइ करतलाओ विगलिओ पुणोवि पाविज्जइ चिंतामणी, न य दढकुमयदंडताडिया पुणोऽवि मंदिरे निवसइ
रायलच्छी, न गाढमक्कारणावमाणिओ नियत्तइ सपुुरिसजणो, राइणा भणियं-जइ पढममेव सो तुम्हेहिं नियत्तिओ

होंतो ता जुत्तं हुत्तं, मंतीहिं भणियं—जइ मूलेऽवि से न रोसुण्पायणं देवो करैतो ता जुतत्ततरं हुत्तं । अवि य—
 कज्जविणासे जाए जह बुद्धी बंधुरा पवित्थरइ । तह जइ पढमं चिय होज्ज देव ! ता किं न पज्जत्तं ? ॥ १ ॥
 धन्ना सबुद्धिविभवेण जाणिउं वत्थु तस्स य सरूवं । पढमं चिय सुग्गहिंयं कुणंति सप्पस्स वयणं व ॥ २ ॥
 रत्ता बुत्तं सच्चं एयमहो केवलं बहुसणाहो । जाणेण विणा कह सो दूरपहं पाविओ होही ? ॥ ३ ॥
 मंतीहिं तओ भणियं जेणेसा विहडणा कया देव ! । सो दूरेऽवि नएज्जा नूण कुमारं लहुं दइवो ॥ ४ ॥
 एवं चिरं परितप्पिय पुणोवि चारपुरिसे[हिं] कुमारवत्ताजाणत्थं पेसिय नियनियठाणेसु गया मंतिणो, रायवि
 सुयचिरहवेयणाविहुराए चंपयमालाए देवीए संठवणनिमित्तमंतेउरं गओत्ति ॥

इओ य सो कुमारो कमंकेमेण गच्छंतो चिरकमलवणविहारुद्विगाए लच्छिदेवीए तुट्टेण पयावइणा निवासनिमित्तं
 व विरइए नाणाविहतरुणतरुसामलियसयलरविकरपसरे अणेगकोडीसरीयजणसंकुले संदणपुरवेलाउले संपत्तो, अवि-
 याणमाणो य तहाविहं गेहंतरं गोपुरपचासन्नस्स पाडलाभिहाणमालागारस्स मंदिरंमि पविट्ठो, दिट्ठो य सो पाड-
 लेण विन्नाओ य विसिट्ठागिइए जहा नूणं कोई एस महापुरिसोत्ति, तओ अब्भुट्ठिऊण सपणयं कया उचियपडिक्खती,
 दंसिओ गिहस्स एगदेसो, निक्कारणवच्छलयाए य भायरं व तं उवयरिउमाढत्तो, कुमारोऽवि तत्थट्ठिओ सजूहस-
 ड्ठोवपवंगमो दिणगभणियं कुणंतो अच्छइ । अन्नया य पुव्वसमाणियंमि निट्ठियंमि दविणजाए पाडलेण भणियं—कुमार !

महायस निव्ववसायाणं केरिसो निव्वाहो ? ता परिचयसु आलस्सं, गिणहसु ममारामस्स एगदेसं, समुच्चिणसु कुसुमाई, गुंथिऊण य विविहमालाओ विक्किणसु रायमग्गमि जहा सुहेण चेष निव्वहइ तुह परिग्गहोत्ति ।

तओ-जह जह वाएइ विही विसरिसकरणेहिं निट्ठुरं पडहं । धीरा पहासितवयणा नञ्चति तहा तह चेष ॥ १ ॥
इय चित्तिऊण खत्तधम्ममाणुरूपि तयणुरोहेण पडिवन्नमेयं कुमारेण, पइदियहं च सह सीलमईए मालागारो-
वदंसियकाणगेगदेसतरुसुमाई उच्चिणिय नियगेहमांगतूण मालाओ विरएइ, पाडलगभजाए य समं सीलमई तविक्रय-
निमित्तं रायमग्गे पेसेइ, उण्यज्जइ बहू अत्थो, एवं च पइदिणं पुण्णविक्रयकरणेणं सुहेण संपज्जइ निव्वाहो, अन्नया
पण्डुलविइलमालाओ गहाय सीलवई गया रायमग्गे, अह तीसे रूवेण जोद्वणेण य लायणेण य सोहग्गेण य अक्खि-
त्तचित्तो समागओ एगो कोडीसरीओ देहिलो नाम नावावणिओ, भणिया य तेण-भइ ! केत्तिएण इमाओ मालाओ
लभंति ? तीए भणियं-पंचहिं सुवण्णधरणेहिं, तओ

दानेन वैराण्युपयान्ति नाशं, दानेन भूतानि वशीभवन्ति । दानेन कीर्तिर्भवतीतिशुभ्रा, दानात्परं नो वरमस्ति वस्तु ॥ १ ॥

इय चित्तितेण तीसे चित्तावहरणत्थं समप्पिया तेण तिणिण दीणारा, सहरिसाए तीए गहिऊण समप्पियाओ
फुल्लमालाओ, विणएण भणिया य सा-भइ ! इओ दिणाओ आरब्भ मा अन्नस्स दाहिसि, समहिगतमुल्लेणवि अहमेव
गहिस्सामि, पडिवन्नं च तीए, गयाइ दोन्निवि नियनियगेहेसु, एवं पइदिणं सो तीए सगासाओ पुण्णमालाओ पि-

पृहइ, साऽवि समहिगदविणलोभेण तस्स चेवं दलयइ । अन्नया परतीरगमणनिमित्तं नाणाविहअमुल्लभंडभरियं जाणवत्तं
 ठावियं अणेण समुहतीरे, सावि भणिया, जहा-कल्लेऽहं परतीरे गमिस्सामि, तद्वा तुमे समुहतीरे असुगंभि पएस्से
 आंगंतूण नीसेसाइं कुंदवेइल्लनवमालइपाडलाइमुत्तयचंपयपमुहाइं कुसुमाइं समण्येज्जासि, अहं ते चउग्गुणं मोल्लं
 दवाविस्सामि, पडिवन्नं च तीए हट्ठहियाए, न सुणिओ कोऽवि परमत्थो, बीयदिवसे गया समगकुसुममालाओ
 गहिऊण निहिट्टुट्ठाणे, दिट्ठो सो वणिओ जाणवत्ताधिरूढो, पणामियाइं तीए कुसुमाइं, पसारिओ तेण हत्थो, तीएवि
 समप्पणं(णत्थं)पलंबिया मुणालकोमला नियमुयलया, तेणवि हरिसभरनिब्भरगेण सकुसुममाला चेव गहिऊण आरो-
 विया सीलवई जाणवत्ते, उविखत्ता उवरिगाए, एत्थंतरे वज्जावियाइं मंगलदूराइं पयट्ठियं पवहणं विमुक्का सिग्गवडा
 वाहियाइं आवल्लयाइं चंडगंडीविमुक्ककंडव वेगेण गंतुं पवत्तं जाणवत्तं । इओ य सो नरविक्कमकुमारो अचंतं तदयाग-
 मणकालविलंबुद्विगगचित्तो इओ तओ सीलमइं पलोइउं पवत्तो, तं अपेच्छमाणेण य तेण पुट्ठा पाडिवेसिया, अवलो-
 इओ रायमग्गो, सम्मं निरिक्खिया तियचउक्कचच्चा, अवलोइयाइं सयलेदवउलभवणकाणणाइं, निवेइया वत्ता पाडु-
 लयमालागारस्स, तेणावि सद्वायेरेण गवेसिया सीलमइं सव्वट्ठाणेसु, कत्थविय पउत्तिमपावमाणेण सिग्गमेव नियत्तिस्स
 भणिओ कुमारो-महायस ! धीरो भव, परिचयसु कायरत्तं, कुमारोण भणियं-भइ ! न किंपि मम कायरत्तं, केवलं एए वालए
 जणणीविओगवसविसंहुलं रोयमाणे न सक्केमि पेच्छिउं, पाडलेण भणियं-एवं ठिएवि पुरिसाय(सयार)त्तं कायच्च, ता

पुत्रादिसिविभागे तीसे अन्नसणनिमित्तं अहं गच्छामि, तुमं पुण पुत्तसमेओ चिय उत्तरादिसिहुत्तं इमाए नईए उभयकूलेसु उज्झरेसु य दरीसु य दुत्तडीसु य विसमणवेससु य अवलोइजासित्ति, एवं करेमिन्ति पडिबजिय पुत्तजुयलसमेओ चैव गओ नरविक्रमो नईए पासदेसंमि, ते य पुत्तए मणागं पि सन्निहिमसुंचमाणे संठविय चिंतिउमारद्धो । कंहं चिय?—
किं होज्ज केणवि हडा? वसीकया वावि केणवि नरेण? । किं वा सरीरपीडाए होज्ज कत्थवि निसन्ना सा ॥ १ ॥
किं वा ममावमाणं किंपि हु दहुण विलयमावन्ना । पुरिसंतरंमि अहवा जाओ तीसे पणयभावो ॥ २ ॥
सुमरांमि न तावडवमाणकारणं होउ वाडवमाणेऽवि । नो सा बएज्ज पुत्तं अवच्चनेहो जओ गरुओ ॥ ३ ॥
संभवइ न एयंपिहु जमन्नपुरिसं मणेऽवि चित्तेज्जा । कह तारिसकुलजाया सीलं मइलेज्ज ससिधवलं? ॥ ४ ॥
अहवा जुवईण मणं कुंडगगुविलं क एव जाणेज्जा? । बाहिंदसियपणयाण कवडभरियाण मज्झंमि? ॥ ५ ॥
अन्नं वयंति पुवं पच्छा पुण वाहरंति गिरमन्नं । अन्नं धरंति हियए साभिण्यं करंति पुणो ॥ ६ ॥
गयणे गणंति गहगणमुयाहिंमि जलंपि जे परिमिणंति । पेच्छंति भावि कज्जं न तेऽवि जाणंति जुवइयणं ॥ ७ ॥
सच्चं चिय जुवईओ एरिसियाओ न एत्थ संदेहो । केवलमेयाए मए दिट्ठं लहुयंपि नो विलियं ॥ ८ ॥
ता सब्बा न उवेहणिज्जा होइ एसत्ति निच्छिऊण पुत्ते य नईकूले संठविय परकूलन्नसणद्वाए पविट्ठो नईए, पत्तो य मज्झयारे, एत्थंतेरे अचंचंतपडिणि यत्तणओ हयविहिस्स अघडंतवत्थुसंघडणसीलयाए भवियवयानिओगस्स बलवत्त-

णओ वेयणीयकम्मस्स गिरिसिवरिसणवसविसप्पमाणसलिलप्पवाहेण पूरिया तक्खणेण नई, जाया अगाहा, खलिओ पयप्पयारो पवाहिओ तरुपल्लववारिपूरेण नरक्किमकुमारो नीओ दूरप्पएसं, अह कहवि कुसलकम्मवसओ पाविथ-मणेण फलंगं, तंनिस्साए अवयरिओ तीरे तीए, नुवन्नो तरुवरच्छायाए, चिंतिउं पवत्तो—

कह नियनयरचाओ ? कहेत्थ वासो ? कहिं गया भज्जा ? । कह पुत्तेहि विओगो ? कह वा नइवेगवहणं च ? ॥ १ ॥
 खरपवणाहयजरतिणनियरो विव देवया दिसिबलिव । एक्कपए चिय कह मज्झ परियरो विसरिओ झत्ति ? ॥ २ ॥
 हे दइव ! तुज्झ पणओ एसोऽहं खिवसु सव्वदुक्खाइं । मज्झं सयणजणाओ जेणऽन्नजणो सुहं वसइ ॥ ३ ॥
 एत्थंतरे पच्चासन्नजयवद्धणनयराहिवई कित्तिवम्मनामो नरवई अनिवत्तगसूलवेयणाए अपुत्तो सहसा पंचत्तमुवगओ, तओ मिलिआ मंतिसामंताइणो लोथा, कओ पंचदिवाभिसेओ, रज्जारिहं च पुरिसं सव्वत्थ मगिउं पवत्ता, खणं-तरेण नयरब्भंतरे रज्जारिहमपेच्छंताणि बाहिं अवलोयणट्ठा निगयाणि पंच दिवाणि, गंतुं पयट्ठाणि य तमुद्देसं जत्थ सो चिंताउरो नरक्किमकुमारो निवसइ, अह तदग्गगामिणं पयंडसुंडादंडुडामरं वेगेण पवरकुंजरमिन्तं दट्ठुण विग-प्पियं एवं कुमारेण—

मन्ने पुव्वब्भत्थं इयाणि दइवो समीहए काउं । कहमन्नहेह हत्थी दूरुल्लालियकरो एज्जा ? ॥ १ ॥

अहवा एउ इमो लहु कुणउ य मणवंछियं जहा मज्झं । ससुयदइयविरहपमोक्खदुक्खवोच्छेयणं होइ ॥ २ ॥

अहं गलगर्जं घणघोसविष्मं कुंजरेण काञ्चन । नियपट्टीए ठविओ झत्ति कुमारो करगणेण ॥ ३ ॥
हयहेसियं च जायं जयतूरवो विधंभिओ सहसा । सामंतसंतिलोएण परिवुडो तो गओ नयरं ॥ ४ ॥
जाओ पुरे पमोओ अपणयपुद्वावि पत्थिवा पणया । नरविक्रमेण रज्जं अत्तायत्तं कयं सच्चं ॥ ५ ॥
नरसिंघनिधिसेसा जाया करितुरयरणभंडारा । सक्कोव देवलोए विलसइ सो विविहकीलाहिं ॥ ६ ॥
केवलमेक्को चिय फुरइ तस्स हिययमि नट्टसल्लं व । दइयासुयदीहरविरहवइयरो दुस्सहो अणिसं ॥ ७ ॥

अन्नया जयवद्धणनयरसन्नुज्जाणे अणेगसीसपरिवुडो सीहोव दुद्धरिसो सूरुव निहियतमपसरो चंदोव सोम-
सरीरो मंदरो इव थिरो जच्चकणगंव परिकखखमो दूरविवज्जियराओवि अणंतराओ धरियपयडजमच्चओवि नीसे-
ससत्तरक्खणवद्धलक्खो समिइवावारियमणपसरोऽवि सया पसंतचित्तो छत्तीसगुणमहासिणरोहणभूमिच्च धीनि-
हाणं व पच्चक्खधम्मरासिच्च भुवणभवणेक्कदीवोव सिवपंथसत्थथाहोव कम्मतरुनियरहवयाहोव दढजा-
यदणकंदप्पसणसन्नागदमणिच्च ससमयपरसमयजलणवाहसिंधुव लोचक्खुव नियनियविसंखुलकराणकुंगे-
क्कापासोव मिच्छत्तजलाउलभवसमुदनिवडंतजंतुबोहित्थो पंचविहायारमहाभरेक्कनित्थारणसमत्थो जइधम्मो असमत्थे
सावयधम्ममि संठवमाणो इयरे पुण जइधम्मं सिद्धंतपसिद्धनाएणं अपुद्वापुद्वाजिणभवणाइं वंदमाणो गाभाणुगामं
विहरंतो आंगतूण समंतभद्दाभिहाणो सूरौ समोसरिओत्ति, जाया नयरं पसिद्धी, जहा असेसगुणगणवातो सूरौ

आगओ, तओ कोऊहलेण य भवनिव्वेएणत्ति य संदेहपुच्छणेण य बहुमाणेण य धम्मसवणनिमित्तेण य नियनियद-
रिसणाभिप्पायचिमरिसेण य समागया बहवे मंतिसामंतसेट्ठिसेणावइसत्थवाहंदनाहण्णमुहा नयरलोया, निवडिया
चरणेसु, निविट्ठा जहासंनिहिया धरणिपट्ठे, खुरीवि पुवभवज्जियगुरुकम्मजलणजालालितत्तगत्तेसु करुणाभयबुद्धिपिब
दिट्ठि सत्तेसु पेसंतो मंदरगिरिमंथमहिज्जमाणखीरोयखगंभीरेण सहेण सद्धम्मदेसणं काउमारओ, कहं?—

खरपवणपणुन्नकुसगलगजलविंदुचंचलं जीयं । सुरायचावचवलं खणेणवि गलइ सरीरवलं ॥ १ ॥

पेम्मं पि तुंगगिरिसिरसरंतसरियातरंगमिव तरलं । लच्छीवि छड्डणुडुमरवंछिरी पेच्छइ छलाइं ॥ २ ॥

पयडपयट्ठियदारुणविविहवियारा महासमुद्वे व । निवडंति आवया आवयव्व निचं सरीरंमि ॥ ३ ॥

मणिमंततं तदिद्वोसहीण वावारणेवि अविणासं । भुंजंता दंति दुहं विसया विसवल्लीउव्व ॥ ४ ॥

मिच्छत्तमोहमोहियमईहिं कीरंति जाइ पावाइ । भवसयंपरंपरासुवि वेरिव्व सुयंति नो ताइं ॥ ५ ॥

पियपुत्तकलत्ताईण जाण कजेसु वट्ठियं बहुसो । परलोयपयट्ठाणं ताणिवि नो हुंति ताणाय ॥ ६ ॥

इय भो नाउं जिणधम्ममणुदिणं सरह सरहसं कुसला ! । जावज्जिवि वज्जमहासणिव्व निवडइ न तुम्ह जरा ॥ ७ ॥

तीसे पडणे पुण छिन्नपक्खपुडया विहंगवग्गव्व । उट्ठियदाढासुयगव्व हरियरज्जा णरिंदव्व ॥ ८ ॥

सच्छंदगमणपरभीइज्जणसञ्चयसाहणविहीणा । चिररिद्धिं सुमरंता सुचिरं तुम्हे किलिस्मिहिह ॥ ९ ॥

यज्जंतं एत्तो जंपिण्ण जह कामियाइं सोक्खाइं । भोत्तुं वंछह ता वीयरायवयणे समुज्जमह ॥ १० ॥

इय संसारनिस्सारत्तणपरिकहेण पडिबुद्धा बहवे पाणिणो । वीयदिवसे य समायन्नियसूरिसमागमणवुत्ततो सम-
गगयतुरयनरनिधरपरियरिओ भारियासुयसंपओगपुच्छणकए समागओ नरविक्रमनराहिवो, तओ वंदिऊण सूरि-
चिंतिउमाढत्तो-अहो एयस्स भुवणच्छरियभूयं रूवं विमुक्कागयवुट्ठी दिट्ठी सजलघणघोसमुंदरो सरो नीसेसपसत्थल-
क्खणजुत्तं गत्तं पाणिगणकयरई भारई, तथा—

तमनिग्गहिओ चंदो तवंमि मंदा रुई दिणयरस्स । गिरिविहियाभिसवो सायरोऽवि को हुज्ज एयसमो ? ॥ १ ॥
तं नत्थि जं न जाणइ भूयं भवं भविस्समवि वत्थुं । ता होइ पुच्छणिज्जो नियदइयापुत्तवुत्तं ॥ २ ॥

इय निच्छिऊण उयविट्ठो उचियासणे राया, गुरुणावि पारद्धा धम्मकहा, पुणरवि पडिबुद्धा पभूयपाणिणो,
राइणावि पत्थावमुवलब्भ पुच्छिओ सूरि-भयवं ! निच्छियं मए, जहा-तं नत्थि जं न जाणह तुब्भे, ता काऊणाणुकंपं-
साहह कइया भारियाए सुएहि य सह मम समागमो भविस्सइत्ति, गुरुणा भणियं-महाराय ! धम्मज्जेण तदंतरा-
इयकम्मक्खओवसमो जया होहिइ, राइणा भणियं-भयवं ! जाणामि एयं, केवलं दुस्सहविओगविहुरो न संकमि
धम्मज्जमं काउं, चित्तिनरोहसव्यपेक्खो हि धम्मलक्खो कहम्महारिसेहिं साहिउं तीरइ?, ता सव्वाह ऊणह पसायं,
निवेयह अवरसुवायंति, गुरुणा भणियं-जइ एवं ता पज्जवासेसु पइदिणं मुणिजणं, एयं खु परमोवाओ वंछियकज्ज-

सिद्धीए, जओ-विहडइ निविडकम्मनिगडं पि दु भिंदइ दुगइ, लहु कछाणवछिमुछासइ नासइ दुक्खसंगइ ।
 वंछइ लच्छि पास परिसपणु दपणु जिम पभासए, सुणिजणसंगेवि किं किं जणु जं नवि सोक्खु पासए ॥१॥
 तओ रोगिणव वेजोवइदोसहं पंथपरिब्भट्ठेण व सुमगदेसणं तण्हाभिभूएण व विमलसलिलपडिपुणसहास-
 रोवरनिवेयणं राइणा संमम्भुवगयमिमं गुरुवयणं, गओ य पणमिऊण सट्ठानं ।

इओ य ते दोवि तस्स सुया नदीए कूलंमि निलीणा तण्हाछुहाभिभूया जाव खणंतरं चिट्ठति ताव एगो गोउलिओ
 दहिमहियाणि गयरे विक्किणिऊण समागओ तत्थ पएसे, पेच्छइ देवकुमारनिविससरूवे करुणसरं रुथमाणे ते दोउवि
 दारगे, तओ पुच्छिया तेण-रे पुत्तगा ! कीस रोयह ? केण तुब्भे एत्थ ठविया ? को वा तुम्ह एत्थ सयणजणेत्ति ?
 जेट्ठेण साहिओ सबो पुववुत्ततो, अह अणाहत्ति परिकलिऊण तेण जहासंनिहियअसणपाणदाणेणमहिंनंदिऊण तेहिं
 तेहिं पयरोहिं उवल्लोमिऊण य नीया ते नियगोउलंमि, समणिया य गोउलाहिवस्स, तेणावि पुत्तविरहियाए समणिया
 नियदइयाए, सावि उदरुब्भवे इव परिपालेइ सव्वजत्तेण, उवयरइ खंडखज्जाइपमुहविसिट्ठवत्थुप्पयाणेण अपवरयं,
 सोऽवि गोउलाहिवई किल जयवद्धणनयराहिवस्स संबद्धोत्ति अन्नया कयाइ तेहिं दोहिवि पुत्तेहिं समेओ महासुल्ल
 पाहुडमादाय नरविक्कमनरिंदसणत्थं समागतो जयवद्धणनयरं, दिट्ठो य नरवई, पणमिओ सव्वायेरेणं, समणियं पाहुडं,
 दिन्तो राइणा सहत्थेण तंबोलो, पुट्ठो य सयलसुत्थासुत्थवत्ताओ, एत्थंतरे निवडिया दोसु तेसु पुत्तेसु राइणो दिट्ठो,

जाओ गाढ पसोओ, परिभावियं च जहा धुवं एए मम तणयत्ति, तहावि पुच्छामि एयं-को पुण एत्थ वइयरोत्ति परिभाविय पुट्ठो गोउलाहिबई, कस्स भो एए पुत्तगत्ति?, तेण भणियं-देव! मम संबंघिणो, गोहिणीए आबालका-
लाओ उ वड्डियत्ति, राइणा भणियं-संमं साहेसु, जायसंखोभेण तेण सिट्ठो नईकूलाओ आरब्भ सयलो वुत्तंतो, एयमाय-
न्निऊण राइणा परमहरिसपगरिसमुव्वहेतेण ते दोउवि दारगा गाढमालिगिय उच्छंगे निवेसिया, गोउलनायगेण भणियं-
देव! पुरावि मए विविहचेठ्ठाहिं नाया एए जहा कस्सइ सांमत्तस्स वा सेणावइस्स वा नरवइस्स वा मग्गे गच्छंतस्स
केणावि विसमपओगेण पब्भट्ठा होहिंति, कहमन्नहा एएसिं पइदिणंपि मट्ठियावडियदोघट्टघडभेडणेण य कित्तिम-
तुरयघट्टपट्टणेण य संपिडियसरिडयपरिकप्पियसंदणवाहणेण य बुद्धिपइट्टियकट्टलट्टिसग्गुव्वहणेण य चाउरंगसेणा-
संमहुद्दामसंगामपरिकप्पणेण य डिंमाण गामागरनगरपसायदाणेण य विविहा कीला अहेसि?, न य एवंविहा चेट्ठा
पागयसुयाण होइ, तहा सव्ववेलासु मम तुमह दंसणत्थंमेतस्स एयाणवि नरिदभवणदंसणकए गाढनिब्वंधो आसि,
केवलमहं वावत्तिऊण विसिठवत्थदाणेण दिट्ठिवंचणेण य पुरा एंतो, इण्हिं पुण गाढनिब्वंधं काऊण मम खणंपि पुट्ठि
अमुंचमाणा समागयत्ति, अहो महाणुभावणेण कहं ममोवयरियंति चिंततेण रत्ता परमममोयसरनिब्वंभगेण दिन्नं तस्स
तं चेव गोउलं गामसयं च आंचंदकालियं सासणनिबद्धं भुत्तीए, पभूयवत्थंतोलाइणा य पूइऊण पेसिओ सट्ठाणंति ।
सयंपि पुत्तजुयलपरियरिओ गओ सूरिसमीवं, वंदित्ता परमायरेणं निवेइओ पुत्तसमागमयुत्तंतो, सूरिणा भणियं-महा-

राय ! सुमरिसि पुव्वभणियं अम्ह वयणं ? राइणा भणियं-भयवं ! नियनामपिव सुमरामि, सूरिणा भणियं-महाभाग ! केत्तियमेत्तमेयं ? गुरुजणपज्जुवासणेण तं नत्थि जं न सिज्झइत्ति, रत्ता भणियं-अवित्तहमेयं, किं पच्चक्खेवि अणुववन्नं भणिज्झइ ? पसीयसु इयाणि एक्केण दइयवियोगदुक्खवोच्चेयणेणं, गुरुणा भणियं-मा ऊसुगो होसु, एवंति पडिव-ज्जिय पणमिऊण य सव्वायेरेण गओ राया सट्ठाण ।

इओ य सो देहिलो नावावणिओ अणुकूलपवणपणोलिज्जमाणसियवडवसवेगपयट्ठियजाणवत्तो गंतुं पवत्तो ससु-दंमि, सीलमईवि तहाविहं अदिट्ठुपुव्वं वइयरं अवलोइऊण हा पिय ! पाणनाह ! किमेवंविहं वसणं विसमभावडियंति जंपिऊण य अकंडनिवडियवज्जदंडताडियव्व मुच्छानिभीलियच्छी परसुच्छिन्नव्व चंपगलया निवडिया जाणवत्तभूमितले, समासासिया पासवत्तिणा परियणेण सिसिरोवयारोहिं, खणंतरेण लद्धचेयणा गाढसुयपिययमवियोगवसविसंदुला गलंतनयणजलप्पवाहा विलविउमेवं पवत्ता—

हा भुवणपयडपोरिस ताय ! सजीयस्स संनिहं दट्ठुं । किमुवेहसि अइडुहियं नियडुहियं संपयं एयं ? ॥ १ ॥

नरसिंहनराहिव ! नियवहुंपि किमुवेहसे अणज्जेण । एवंपि हीरमाणिं ? हा हा विपरंसुहो दइवो ॥ २ ॥

हा पाणनाह ! हा गोत्तेदेवया हा समत्थदिसिनाहा । रक्खह रक्खह एयं हीरंती पावमिच्छेणं ॥ ३ ॥

एवमईणि करुणाइं जंपंती सा संभासिया नावावणिएण-भइ ! कीस एवं विलवसि ? , धीरा भव, नाहं सुमि-

णेवि तुह पडिक्कलकारी, जओ एसा समुद्रुरा रिद्धी तुहायत्ता, एसोउहं दासननिव्विसेसो, ता पडिवज्जसु सामिणीसदं,
वावारेसु नियबुद्धीए गेहकज्जेसु एयं परियणंति, सीलमईए भणियं—

अवसर दिट्ठिपहाओ निट्ठुर! पाविट्ठु! धिट्ठु! दुचेट्ठु! । अहवा सासनिरौहेण जीवियं लहु चइस्सामि ॥ १ ॥
रे रे स्वत्तिथकुलसंभवपि आजम्मसुद्धसीलंपि । मं एवमुल्लवंतो नियजीयस्सवि न लज्जेसि? ॥ २ ॥

किंच-खिज्जउ देहं निहरउ जीवियं पडउ दुक्खरिंछोली । नियतायदिन्ननामत्थविहणं नेव काहामि ॥ ३ ॥

इय तीए निच्छयमुवलब्भ निवारियं तेण भत्तपाणं, छुहापिवासाभिभूयाएवि न परिचत्तो तीए नियनिच्छओ,
एत्थंतरे तीए विमुद्धसीलपरिपालणतुट्ठाए सणिणहियसमुद्देवयाए खित्तं महावत्ते तस्स जाणवत्तं, कओ सुगंतसम-
यदारुणो समीरणो, समुल्लासिया कुलसिहरविब्भमा जलकल्लोला, विउद्वियाइं गयणे धोरायाराइं गंधघनगराइं,
दंसिया गहिरगज्जिरवभीसणा फुरंतफारविज्जुपुंजपिंजरा जलहरा, तओ वाउलीहूओ कन्नधारो, जाया विहत्था
मुहडसत्था, ठिया विमणदुम्भणा अवल्लवाहगजणा, बाढं वाउलीभूओ नावावणिओ, एत्थंतरे गयणट्ठियाए
जंपियं देवीए—

रे रे जइ दुट्ठवणियत्तणय! गयविरहिय हियकाम कामगइह दहणसारिच्छ रिंछोव तुच्छपेच्छय छयललथणसमाण
माणवजणगरहणिज्जसील! सीलमइं धरिसिहसि एवं ता याव! पावेसि इयाणिं विणासंति सोचा पंडुरपडपाउ-

रणो कथयूयादित्थरो विणयपणओ करकलियधूवदहणो सो विन्नविउं समाढत्तो-देवि ! ममेकं दोसं दासस्स व
 खमसु परिहरसु कोवं न पुणो काहामीमं, पणए न पंभुहा देवा, ताहे भणियं देवीए-रे तुमं जइ गुहेण पालि-
 हिसि नियजणणिनिव्विसेसं एयं ता जीवसि हयास !, तेण तहत्ति सवं पडिवन्नं गाढभयवसट्टेण, उवसहरियं देवीए
 डमरं अहंसणं च गया । अह जाओ अणुकूलो पवणो, मग्गेण लगं जाणवत्तं, हरिसिया कन्नधाराइणो जणा, परि-
 तुट्ठो सो वणिओ, पडिओ सद्वाथरेण चलणेसु सीलमईए, खामिया नियदुच्चरियं, भणिया य सा-सुयणु ! मा काहिसि
 सद्वाहा सोणं, अचिरेण तहा काहामि जहा मिलसि नियपिययमस्स, काराविथा य पाणवित्तिं, समप्पिया निरुवद्ध-
 निवासनिमित्तमेक्का उच्चरिगा, तओ पइदिणं मायरं व भयणिं व देवयं व गुरुं व सामिं व वत्थेण य भोगेण य भेसहेण
 य तंबोलेण य संमं पडियरमाणो पत्तो परतीरं, विक्किणियाइं निययभंडाइं पाविओ भूरिअत्थसंचओ निवत्तियासे-
 सकज्जो वलिओ सनयराभिमुहं, अंतरे आगच्छंतस्स अणणुकूलपवणपणो छियं लगं जयवद्धणनयरपरिसरंमि वोहितं,
 तओ विमुक्का नंगरा पाडिओ सिधवडो उत्तरिओ बहुकिंकरनपरियिओ सो वाणिओ, गओ विचित्ताइं महरिहाइं
 परतीरभवइं पाहुडाइं गहाय नरविक्कमनराहिवस्स दंसणत्थं, पडिहारनिवेओ य पविट्ठो रायभवणं, दिट्ठो राया, सम-
 प्पियाइं पाहुडाइं, कओ राइणा सम्माणो, तओ समुदलंधणवइयरनिवेयेण परतीरनयररायसरूववत्ताकहणेण नियक-
 थाणगुणदोसपडणेण य ठिओ नरवइस्स समीवे पहरमेकं, एत्थंतरे पणमिऊण विन्नत्तं तेण-देव ! सुन्नं पयवहणं समगच्छइं

रयणी ता अणुजाणह मं गमणायत्ति, राइणावि पिययमाविओगविहुरेण एस चैव अज्ज दीहरनिसाए विणोयकारी हवउत्ति परिचितयतेण भणिओ सो-अह ! वीसत्थो इहेव चिट्ठसु, नियपहाणपुरिसेहिं रक्खावइस्सामि तुह जाण-वत्तं, जं देवो आणवेइत्ति भणिऊण पडिबन्नं तेण, विसज्जिया य राइणा नियपहाणपुरिसा पवहणरक्खणत्थं, एत्थंतेरे उट्ठिया दोवि कुमार, विन्नत्तं च तेहिं, जहा-ताय ! अदिट्ठपुवं अम्ह पवहणं, गाढं च कोउयं तंहसणे, ता अणु-जाणउ ताओ जेण गच्छामोत्ति, तन्निच्छयमुवलब्भ अणुन्नाया य नरिंदेण, गया य अंगरक्खनपरिक्खित्ता ते जाण-वत्ते, तं च इओ तओ निरिक्खऊण पसुत्ता तत्थेव । अह पच्छिमरयणिसमए पडिबुद्धा परोप्परं वत्ता काउमारद्धा, खणंतरेण लहुएण भाउणा पुट्ठो जेट्ठो भाया-अहो भाय ! कहसु किंपि अपुवं अक्खाणयं, इह द्वियाण न द्विजइ कहमवि विभावरी, जेट्ठभाउणा भणियं-अह ! किमन्नेण अक्खाणयसवणेण ?, एवं चिय अप्पणोत्तणयं अक्खाण-यमपुवं निसुणेहि, तेण जंपियं-एयमवि साहेहि, तओ

करकालियकुसुममाला जह जणणी रायमग्गमणुपत्ता । जह वलिया नो पुणरवि जह नयरे मग्गिया बहुसो ॥ १ ॥

जह ताओवि दुहत्तो अम्हेहिं समं गओ नईकूले । जह परतीरनिरुवणकएण सलिलंमि ओगाढो ॥ २ ॥

जह सरियनीरूपरप्पवाहिओ दूरदेसमणुपत्तो । जह अम्हे गोउलिएण गोउलं पाविया विवसा ॥ ३ ॥

जह बुद्धिं संपत्ता रायउले जह गया तओ अम्हे । रायावलोयणत्थं जह विन्नाया य ताएणं ॥ ४ ॥

जह वा महलकोजहलेण एत्थागया तहा सबं । अक्खाणयमप्पणं उवइइं लहुगभाउस्स ॥ ५ ॥

एयं च कहिज्जमाणमामूलाओ निमुणियं समग्गमवि समीवेदससंठियाए सीलमईए, तओ अपुवं अणाइक्खणिज्जं केवलमणुभवगम्मं नियसुयसाहियवइयरपरिन्नायससुत्थहरिसपगरिसमुच्चंती समुच्चरोमंचुचाइयकंचुया सुयसिगेहव-सपणलंतथणमुहसुद्धुद्धधारा एह चिरकालपत्तगा पुत्तगा ! नियजणणिं गाढमालिंगहत्ति भणंती गया तेसिं पच्चा-सन्नं, निवेइओ पुच्चवित्तंतो, विन्नाया जेठुत्तेण, तओ गाढं कंठमवलंबिय चिरविरहदुहावेगसूयगविसंतुलवयणगब्भं निब्भरं सपुत्तावि रोविउं पवत्ता, विन्नायपरमत्थेण सुहुत्तमेत्तं विलंबिय समासासिया कुमारपरियेण, अह लग्गंयंमि दिणथरे परियणमज्झाओ एगेण पुरिसेण लुरियं गंतूण भणिओ नरविक्रमो-देव ! तुम्ह दइया कुमारोहिं एयस्स चेव नावावाणियस्स जाणवत्ते पत्तत्ति, तओ हरिसभरनिब्भरहियएण सविम्हयं पुच्छिओ राइणा एसो-भइ ! को एस बुत्तंचोत्ति ? तेणवि संजायभएण भणियं-देव ! वियरसु मे अभयदाणेणप्पसायं जेण जहा वित्तं निवेएमि, पडिबन्नं नरिंदेण, तओ पढमाणुरागाओ आरब्भ जाणवत्तारोवणक्कंदणोवलोभणेदेवयाभेसणप्पमुहो साहिओ नीसेसो बुत्तंतो, एयमायन्निऊण य नरवइणा समग्गधणजाणवत्तसहिओ निविसओ आणत्तो सो चाणियगो, सीलमईवि देवी करेणुगाखंधगया धरियसियलत्ता चामरोहिं वीइज्जमाणी पए पए पडिच्छंती नयरजणकयं पूयासकारं ठाणे ठाणे वियर-माणा दीणाणाहाण कणगदाणं पवेसिया परमविभूईए निययमंदिरं, काराविओ पुरे अट्टदिवसिओ महुसवो, अह

पहविषयविलिप्ताए नियंसियामलमहगधवत्थाए सुयजुयलपरिवुडाए पमोयभरनिभरंगीए सीलमईए पुरओ पुवणु-
भूयं कहं कहतेण तीसे य हरणपमुहं वित्तं निसुणमाणेण रण्णा मालागारस्स तस्स पाडलयनामधेयस्स सचरिय-
मणुवचारं तहाविहं सुमरियं झत्ति, तो भणिया सीलमई-पिण्ण! पियाविहु न एरिसो होइ जारिसओ स महप्पा
मालागारो सिणेहपरो, भणियं सीलमईए-सच्चमिणं नाह!, ता कुण पसायं सुसमिद्धिवियरणं महाणुभावस्स
तस्स तुमं, फलमेयं चिय लच्छीए नाह! संझभरागववलाए जं पूरिज्जति मणोरहाओ उवयारिलोगस्स ।

इय सोचा से वयणं रण्णा संदणपुराउ सो सिग्वं । आणाविऊण ठविओ चोडयविसए महाराओ ॥ १ ॥
दिन्नो से भंडारो समणिया करितुरंगरहजोहा । किं बहुणा? अत्तसमो सोऽवि कओ तेण नरवइणा ॥ २ ॥

अन्नदिवसे य भज्जासुयसमेओ नरविक्रमो महया रिद्धिसमुदणं गओ उज्जाणे, दिट्ठो सूरी, सवायरेण पणमिऊण
पसाहिओ समीहियसंपत्तिवइयरो, गुरुणा भणियं-महाराय! एरिसक्खणवल्लिनिबंधणाणि मुणिज्जचरणसेवणाणि,
राइणा चित्तियं-अहो अमोहं गुरुवयणं, अहो जिणधम्मस्स माहण्यं, सवहा धन्नोऽहं जस्स मे एवंचिहेण मुणि-
णाहेण समं संगमो जाओ, एवं च चित्तयेतेण रत्ता उवज्जियं सुगइक्कप्पतरस्स सम्मत्तस्स वीयति, गुरुणा भणियं-
महाराय! पडिवज्जसु निच्छइयं संपइ जिणधम्मं, राइणा भणियं-अयवं! इट्ठमण्यमनुत्तमत्तज्जजोवो जिणधम्मो,
कहममहारिसज्जणा सक्कंति अनुपालिउं?, गुरुणा नायं-अज्जवि निट्ठरो मोहंगंठी दढनिबंधणा मिच्छत्तवासणा

तिद्याणुबंधो विसयपडिबंधो सवणमेत्ता विसेसधम्मवत्ता, तम्हा जहाभद्गत्तमेव एयस्स इण्हमुचियंति चित्तिऊण
बुत्तो सो-महाराय ! जइ एवं ता पज्जुवासेज्ज सुसाहुणो पसेसेज्जसु जिणधम्मं अणुमोएज्जसु तप्पडिवन्ने भवजणे,
एत्तियमेत्तेणवि होही दढकम्मविगमो, एवंति पडिवज्जिऊण गओ राया सट्ठाणंमि ।

निप्पच्चवायमउले भोगे भुंजेति पंचरुवेवि । सवत्थ जायकित्ती नरविक्कमनरवई ताहे ॥ १ ॥

सूरीवि धम्ममग्गे आरोविथ भूरि भवपाणिगणे । सीसगणसंपरिवुडो नयराउ विहरिओ बाहिं ॥ २ ॥

पडिबोहंतो सूरोव भवकमलाइ वयणकिरणेहिं । कालक्कमेण पत्तो जयंतिनयरीं विहारेण ॥ ३ ॥

उग्गहमणुजाणाविथ नयरीए बाहिं चंपगुज्जाणे । सद्धम्मकम्मउज्जुयज्जइजणसहिओ ठिओ भयवं ॥ ४ ॥

जाया पुरे पसिद्धी सिद्धंतविसारओ जहा सूरी । इह आगउत्ति ताहे वंदणवडियाए नयरिजणो ॥ ५ ॥

अंतेउरेण सहिओ हरिकरिरहजोहवूहपरिकिण्णो । नरसिंहभूमिनाहोवि आगओ सूरिपासंमि ॥ ६ ॥

साथरमह विणमंतुत्तिमंगमणिमउलीढपयपीढं । पणमिय मुणिजणसहियं गुरुमुवविट्ठो धरणिवट्ठे ॥ ७ ॥

संसारासायागब्भा, तथो सद्धम्मदेसणा । गुरुणा काउमाढत्ता, मोहविद्धंसकारिणी ॥ ८ ॥

जहा—वलयासिंधुनिम्मग्गवडवीयं व दुल्लहं । को माणुसत्तं संपप्प, पमाएज्ज विथक्खणो ? ॥ ९ ॥

खणोऽवि नाउक्कम्मस्स, जाइ जेणाविणस्सरो । तेणेस मुच्छिओ लोओ, निरुद्धिग्गो कंहं भवे ? ॥ १० ॥

भवेज्ज कोऽपि किं धीमं, निदाकरणलालसो । मंदिरे हववाहुगजालमालापलीविण् ? ॥ ११ ॥
 विण्से सुहगम्मेवि, सण्याहेओ पयट्ठइ । दुग्गेऽणंते भवट्ठाने, जे न किंपि समीहण् ॥ १२ ॥
 हण् से नियबुद्धीए, ठाणे ठाणे विसीयइ । अन्ने सोक्खे न पावेइ, सिद्धिसद्धम्मसंबले ॥ १३ ॥
 बलेण तेण किं कज्जं ? किं वा तेण धणेणवि ? । न जं सद्धम्ममग्गस्स, उवयारे निजुज्जइ ? ॥ १४ ॥
 जएज्ज सब्बहा धम्मे, पमायपरिहारओ । जीवघायनिविट्ठिमि, पविट्ठिमि सुहेसु य ॥ १५ ॥
 सुयाइमोहसंबद्धा, पावं कुव्वंति पाणिणो । तेण पावेण संतत्ता, निवडंति अहो गइं ॥ १६ ॥
 गइंदा इव बज्झंति, जोणिलक्खेसु णेगसो । किं किं दुक्खं न पेक्खंति, ते तिव्खमवियक्खणा ? ॥ १७ ॥
 तमहा एवं नाउं जइधम्मं सब्बहा समायरह । एसो खु तिवहुजलणसमणघणवरिसणसमो जं ॥ १८ ॥
 सग्गापवग्गमंदिररोहणनिस्सेणिदंडसारिच्छो । कम्मब्भडविडविहाडणेक्कधारुक्कडकुहाडो ॥ १९ ॥
 अचिरेण दिन्ननिस्सेससारनिस्सेयसो सुहत्थीहिं । अणुसरियवो सम्मं सुसत्तिजुत्तेहिं सत्तेहिं ॥ २० ॥
 रत्ता भणियं भयवं ! जं तुब्भे वयह तं पवज्जामि । जाव नियरज्जभारण्णणेण सुत्थं करेमि जणं ॥ २१ ॥
 गुरुणा भणियं जुत्तं एयं तुम्हं भवेक्कभीयाणं । निद्विगं कुणह लहुं चयह पमायं पयत्तेण ॥ २२ ॥
 अहं गुरुं पणमिज्जण गओ राया समवणं कयमणंतरकरणिज्जं आहूया मंतिणो कहिओ निययाभिप्पओ अवगओ

मंतीहिं, एत्थंतरे समागया कुमारचारोवलभनिमित्तं पुव्वपेसिया गूढपुरिसा, पणमिओ तेहिं राया, निवेइओ नयरनि-
ग्गमाओ आरब्भ जयवद्धणपुररज्जलाभपज्जंतो सब्बो कुमारवुत्तंतो, पुट्ठो राया, दिन्नं च चिंतियाइरित्तं तेसिं वित्तं, पेसिया
य कुमारणयणनिमित्तं बुद्धिसागरपमुहा मंतिणो, अणवरयप्पयाणएहिं पत्ता य ते जयवद्धणपुरं, नरविक्रमोवि नाऊण
तेसिमागमणं सपरियणो निग्गओ अभिमुहो, पवसिया वड्डविच्छेइणं, कया जणगनिव्विसेसा पडिवत्ती, पुट्ठा य उचि-
यसमए आगमणप्पओजणं, निवेइयं तेहिं जहा—पव्वज्जापडिवज्जणाभिलासो राया, तुममि नियरज्जभरारोवणमणोरहो
य देवस्स, अओ तुम्हाणयणनिमित्तं पेसियम्हि, इमं सोच्चा तक्खणमेव तत्थ रज्जे जेट्टपुत्तं ठविऊण समग्गनियखंधा-
वारसमेओ चलिओ नरविक्रमो समं मंतीहिं, कालक्कमेण पत्तो जयंतिनयरिपरिसरं, विन्नायतदागमणो दूरं संसुहमागओ
नरसिंहनरवई समं चंपगमालाए देवीए, तओ दूराओ चेव नरविक्रमो जणगमागच्छंतं पेच्छिऊण हरिसुप्फुल्लोयणो
उयरिऊण करिवराओ मंतिजणसमेओ गंतूण निवडिओ चलणेसु जणयस्स जणणीएय, तेहिंवि चिरदंसणुप्पन्नाणं-
दंसंदिरच्छेहिं गाढमालिंकिऊण निवेसिओ नियउच्छंगे, पुट्ठो य सररीरारोगयं, खणंतरे य पविट्ठाइं नियमंदिंरं,
पत्थावे पुट्ठो नरवइणा नरविक्रमो पुरीगमणकालाओ आरब्भ पुव्ववइयरं, साहिओ नरविक्रमेण समत्थोऽवि, एवं
च चिरकालदंसणसुब्भवसुहसंदोहमणुहवंताण गया कइवि वासरा, अन्नदियेहे य भणिओ राइणा नरविक्रमो—पुत्त !
पुव्वपुरिसपवित्तिवत्तिणीपरिपालणेण उस्सिसखलजणताडणेण य एत्तिथं कालं जाव मए पालियं रज्जं, इयाणि पुण

ममाहिं तो सरीरबलेण य पुन्नपगारसेण य विक्रमेण य समत्थो तुमं ता अंगीकरोसु रज्जमहाभरं, परिवाल्लेसु पुव्वप-
वाहेण जणवयं, अहं पुण पुव्वपुरिसायरियं धम्ममग्गं अणुचरिस्सामि, कुमारेण भणियं-ताय ! विरमह इमाओ
अज्झवसायाओ, तुम्ह दंसणुस्सुओ चिरकालेण अहमिहमागओ, नवि य अज्जवि एस पत्थावो पत्थुयवत्थुस्स, निव-
सह ताव सगेहे चिय कहवय वरिसाहं, राइणा भणियं-यच्छ ! किं न पेच्छसि जायविमलपलियसंगमुत्तिमंगं ? न
वा निरुवेसि विसंदुलसयल्लहिं सरीरल्लहिं ? न निरिक्खसि श्वेपयासेवि चलंतिं दंतपंतिं ? न विभावसि पत्थुवि-
लोयणावलियं लोयणजुयलं ? न कलयसि वल्लिपडलसंतयं सरीरत्तयं ? न वा सुणसि समत्थकज्जासाहणजायसदहं
देहं ? एवं च पच्छिमदिसावलंबि बिंबं व रविणो रयणीविराममलिणं मंडलं व सभिणो पाटजरत्तणपत्तं पत्तं व तरुणो
जायसूत्थमणसंभावणं वणं व कमलाण पब्भट्टलट्ठपुव्वसोहं अप्पाणप्पाणमवल्लोइज्जण कहं खणमवि गेहे वसामि ? ,
ता सुयसु पडिवंधं पडिवज्जसु मम वयणं भवसु धम्मसहाओ, तओ तायनिच्छयमुवल्लभ नरविक्रमो अणणुभूयपुव्व-
दुक्खकंतो वज्जताडिओ इव लेप्पघडिओ इव पत्थरुक्कीरिओ इव चित्तलिहिओ इव खणं ठाज्जण वाढं रोविउं पवत्तो,
समासासिओ य रत्ता कोमलवयणेहिं, पडिवन्नो य तेण महाकट्टेण रज्जाभिसेओ, समागए य पसत्थवासरं सव्वसा-
मग्गीए संतिसामंतमित्तयप्पमुहमहाजणसमक्खं निवेसिओ नरविक्रमो निययसीहासणंमि, कओ अट्ठोत्तरकलस-
सएणं महाविभूइए रायाभिसेओ, पणमिओ य रत्ता मंडलाहिवपुरपहाणलेयपरियएण, भणिओ य सव्वायरेण

वच्छ ! जहवि नयविणयसचाइगुणगणमणिमहोयही तुमं तहवि किंपि भणेज्जसि, एसा हि रायलच्छी अपडमंध-
 त्त णं अमज्जपाणं मयजणं सूरससहरकरप्पसरासज्झमंधयारं, ता तहाकहंपि वट्टिज्जसि जहा न मइलिज्जइ ससहर-
 धवलं नियकुलं, जहा न खंडिज्जइ दूरप्परूढो पयावपायवो, जहा न पमिलायइ नोइकमलिणी, जहा न उस्सिखली-
 हवंति खला, जहा न विरच्चति पयइणो, जहा करभरेहिं न पीडिज्जइ जणवउत्ति, एवं च वट्टमाणस्स पुत्त ! इहलोए
 इच्छया होहिंति सयलवंचियत्थसिद्धीओ, किमंग पुण परलोएत्ति ? , एवं सिक्खविज्जण नरसिंघनरयइ पट्ठिओ समंत-
 भइसूरिसमीवंमि, तओ पउणाविद्या नरविक्कमनरवइणा सहस्सवाहिणी सिबिगा से निक्खमणनिमित्तं, कयमज्जणी-
 वयारो सव्वालंकारविभूसिओ समारूढो तत्थ नरसिंहनरवइ, उक्खित्ता पवराभरणविभूसियसरीरेहिं सुइनेवत्थेहिं
 पवरपुरिसेहिं सिबिगा, तओ दिज्जंतेहिं महादाणेहिं वज्जंतेहिं चउव्विहाउज्जेहिं पढंतेहिं मागहसत्थेहिं गायंतेहिं
 गायणेहिं मंगलमुहरमुहीहिं नयरनारीहिं णचिंराहिं वारविलियाहिं महाविभूइए निगओ नयरीओ, पत्तो सूरि-
 सगासं, ओयरिज्जण सिबिगाओ तिपयाहिणपुव्वं पडिओ गुरुचरणेसु—

भालयलघडियकरसंपुडेण भणिओ गुरू तओ रण्णा । भयवं ! तायसु इण्ह जिणिंदिक्खापयाणेण ॥ १ ॥

पडिवन्नंमि य गुरुणा पुव्वुत्तरदिसिसमुज्झियाहरणो । एगनियंसियवत्थो पसंतवहुंतसुहलेसो ॥ २ ॥

सिद्धंतभणियजुत्तीए तत्थ सूरिहिं गाहिओ सम्मं । पव्वज्जं निरवज्जं कम्ममहासेलवज्जसमं ॥ ३ ॥

भणिओ य जहा भइय ! एसा संसारसिंयुनावव । तुमए गहिया दिक्खा ता सम्मं उज्जमिज्जासु ॥ ४ ॥
 मा काहिसि खणमेक्कपि पावमित्तेहिं दुहनिमित्तेहिं । संसग्गिं दुक्खेहिं विसयकसाएहिं सह भइ ! ॥ ५ ॥
 एवं चंक्रमियवं भोत्तवं एवमेवं सइयवं । एवं भासेयवं इचाइ निवेइयं गुरुणा ॥ ६ ॥
 संमं संपडिवज्जिय छट्टट्टमखमणकरणखीणगो । अप्पडिबद्धविहारं विहारिय गामागराईसु ॥ ७ ॥
 अहिगयजइधम्मविही विहियाणुट्ठाणनिच्चतल्लिच्छो । लच्छिव संजमं रक्खिऊण निम्महियकम्मसो ॥ ८ ॥
 सो भोक्खपयं पत्तो नरविक्रमनरवईवि तस्स सुओ । उवमुंजिय रज्जुगं निययपए ठविय पुत्तं च ॥ ९ ॥
 पावियसम्मत्तगुणो पज्जते पालिऊण पव्वज्जं । कयदुक्करतवचरणो महिंदकप्पे सुरो जाओ ॥ १० ॥
 इय नंदण ! नरपुंगव ! चरियं एएसिं पुरिससीहाण । तुज्झ मए परिकहिंयं जं तुमए पुच्छिअं आसि ॥ ११ ॥
 सोऊण इमं तुममवि नरिंद ! धम्मो तहुज्जमं कुणसु । जह उत्तिमपुरिसाणं अचिरेण निंदसणं होसि ॥ १२ ॥
 इमं च सोच्चा राया जायपव्वजापरिणामो गुरुं विन्नविउं पवत्तो-भयवं ! तुमं महातावतवियस्स व अणयधारा-
 वरिसो छुहाभिभूयस्स व सुन्नखज्जागवणो दोगचचक्ककंतस्स व चिंतामणी दुरालोयंघयारगिरिगुहागयस्स व पयास-
 दीवो नीरनिहिनिहित्तस्स व समासासदीवो विथडाडवीपडियस्स व पसत्थसत्थनाहो मह कहकहवि चक्खुगोयरं
 गओ, ता इयाणिं परमपहु ! करुणाकुलभवण ! एयं पवाहओ अणाइयं अणवदग्गं अपरिच्छेयमिच्छाजलुप्पीलपडि-

हत्थं मोहमहावत्तदुत्तरिच्छं निरंतरुभवंतजम्भमरणकछोलमालाउलं कसायकलुसपंकसंकुलं वियरंतविविहायंकनक्क-
चक्काउलं वियारगोअरुत्तिणऽण्णाणतिमिरभरगुविलं पयइदुगगेज्झमज्झं पयइभीसणं पयइविवागदारुणं पयइ-
निगुणं पयइकिलेसायासाइदुक्खसंखोहकारणं रणं व कायरणं सव्वहा चित्तिज्जमाणमवि परमरोमुद्धोसजणगं भव-
समुदं निरवज्जपव्वज्जाजाणवत्तेण सुवद्धेण नाणंदसणविहिसंछाइयछिड्डेणं संवरवज्जलेवेणं संमपाविद्धेण तवपव्वज-
वेणं अणुलग्गेणं वेरगमग्गमि अक्खोभेण विसुत्तियावीईहिं पडिपुण्णेण अणेगसीलंगरयणसहस्सेहिं तुम्हेहिं कन्न-
धारेहिं झत्ति समुत्तरिउं समीहामित्ति, स्सरिणा भणियं—महाराय ! आ पडिवंधं करेहि, तओ नंदणनरिंदो पुत्तारो-
वियरज्जभारो वाहिं व मोत्तूण रायलळिं विहगेव्व पंजरओ घरवासाओ निक्खंतो, जाओ व त्तिगुत्तिगुत्तो पंचससि-
इत्तुत्तो जियपरीसहो निहयंपंचिदियपसरो समणो समियपावोत्ति । तओ कमेण अहिगयएक्कारसंगो कडाणं कम्मणं
पुन्विं दुप्पडिक्कंताणं खवणत्थं मासंमासेण अणिकिखत्तेणं कायरदुरणुचरेणं घोरेणं तवोकम्ममेणं अप्पाणं सोसितो
अप्पडिबद्धविहारेणं विहरइ । तित्थयरत्तलाभवीयभूयाइं वीसइ ठाणाइं सम्मं फासेइ थ, कंहं?—

सव्वजगजीवबंधधुवंधमूए जिणे जियकसाए । सिवपंथसत्थवाहे तत्थाहिं गिराहिं थुणमाणो ॥ १ ॥

ववगयजरमरणभए सिन्नमयलमणंतमक्खयं पत्ते । परमसरे थ सिद्धे समिद्धसोक्खे नमंसंतो ॥ २ ॥

सन्नाणचरणंदसणमहाभरुद्धरणपच्चलसहावं । चाउव्वन्नं संघं एक्कं सरणंति मन्नंतो ॥ ३ ॥

करुणोयहिणो गुरुणो पंचविहायारधरणधीरस्स । अणुवकयज्जाणुगहभावं समं पसंसतो ॥ ४ ॥
सद्धम्मसिद्धिलचित्ते सत्ते धम्मे धिरीकरमाणे । परियायपमुहथरे उववूहंतो य भयवन्ते ॥ ५ ॥
ससमयपरसमयपरूढगाढससयसहस्सनिम्महणे । सुस्ससंतो निचं बहुस्सुए साहुणो पवरे ॥ ६ ॥
मासदुमासतिमासाइविविहवतवकम्मकरणपडिबद्धे । विस्सामणाइणा तह तवस्सिणो पडिचरेमाणो ॥ ७ ॥
अंगाणंगसरूवे सुयंमि सव्वहुनिच्छियत्थंमि । अणवरयं गयचित्तो तयत्थपरिभावणुज्जुत्तो ॥ ८ ॥
तत्तत्थसहहाणप्पहाणसम्मत्तपवरत्थुंमि । संकाइदोसजालं परिहरमाणो पयत्तेण ॥ ९ ॥
नाणाईणं उवयारपमुहविणयंमि बहुविगप्पंमि । अइयारपरंपरयं वज्जंतो निउणबुद्धीए ॥ १० ॥
पडिलेहणापमज्जाणपमुहावस्तयविहीसु विविहासु । सद्धम्मवद्धलक्खो खलियं निचंपि रक्खंतो ॥ ११ ॥
सीले पिंडुगमपभिइदोसविरहा वएसु पंचसुवि । पाणवहाइएसु य विसोहयंतो य सालिन्नं ॥ १२ ॥
पइसमयं संवगाइभावणाजालभावणुज्जुत्तो । ससरीरेऽविहु निचं ममत्तबुद्धिं अरुणमाणो ॥ १३ ॥
वज्जन्मंतररूवं वारसभेयंपि धोरतवकम्मं । अनिगूहियनियसत्ती आयरमाणो य पइदिवसं ॥ १४ ॥
धम्मोवगारिसाहूण वत्थकंवलपमोवखसुवगरणं । देतो कोहाईणं निचं चायं कुणंतो य ॥ १५ ॥
आयरिओज्जायतवस्सिथरसाहम्मियाण सेहाणं । कुलगणगिलाणसंधे वेयावच्चंमि वट्ठंतो ॥ १६ ॥

एएंसिपि तहाविहआवयवसजायदुत्थचित्ताणं । ओसहदाणाईहिं समाहिभावं च जणमाणो ॥ १७ ॥
 अक्खरपयगाहसिलोगमेत्तयं सव्वया अपुव्वसुयं । अहिगयसुत्तथोऽविदु सुयाणुरागेण पढमाणो ॥ १८ ॥
 भत्तिं तह बहुमाणं तदिदुत्थाण सम्मभावणयं । विहिगहणं चिय निच्चं सुयस्स सम्मं पयासितो ॥ १९ ॥
 भव्वाण धम्मकहणेण पइदिणं पवयणुन्नइं परमं । सियवायसाहणेण य कुणमाणो सुद्धचित्तेण ॥ २० ॥
 सो नंदणसुणिवसहो इय वीसइठाणसाइं फासित्ता । तित्थयत्तामगोत्तं कम्मं बंधेइ परमप्पा ॥ २१ ॥
 अह पमायपरिहारपरायणो एगं वाससयसहस्सं समणपरियागं पाउणित्ता पज्जंतसमए य सम्ममालोइयनिय-
 दुच्चरियवग्गो समुचारियपंचमहव्वओ खामियसव्वसत्तसंताणो मासियसंलेहणासंलिहियसरीरो पंचनमोकारपरायणो
 मरिऊण समाहीए समुण्णन्नो पाणयकप्पे पुण्फुत्तरवाडिसए विमाणे देवोत्ति ॥

ताहे सो सरभसमाविरेण नियपरियणेण परियरिओ । विलसइ तत्थ विमाणे अयराइं वीसइं जाव ॥ १ ॥
 आउयकम्मविगमे य तत्तो चविरूण इहेव जंबुदीवेदीवे भारहे खेत्ते माहणकुंडगामे सन्निवेसे सयलवेयविज्जावियक्ख-
 णस्स उसभदत्तस्स माहणस्स देवाणंदाए भारियाए गब्भे सो नंदणदेवजीवो मिरियभवकयकुलप्पसंसणदोससमुवज्जि-
 यनीयगोयकम्मसामत्थेणं आसाढसुद्धछट्ठीए हत्थुत्तरे नक्खत्ते पाउब्भूओ पुत्तत्तणेणंति, दिट्ठा य तीए रयणीए सुहप-
 सुत्ताए गयवसहाइणो चउइस महासुमिणा, तओ अदिट्ठपुण्यतहाविहसुविणोवलंभजायहरिसा गया उसहदत्तस्स

माहणस्स सगासे, सिट्ठा चउहसवि सुमिणा, उसहदत्तेणवि ते सम्ममणुचितिज्ज भणियं—

तुज्झ पिए ! धणलाभो पंचविहविसिट्ठभोगलाभो य । होही नीरोगत्तं नूणं एयाणुभावेण ॥ १ ॥

रिउजउसामाथव्वणचउवेयवियक्खणं जणपसिद्धं । जणिहिसि पुत्तं च तुमं समहिगनवसासपज्जत्ते ॥ २ ॥

इय सा निसामिज्जणं पहिट्ठचित्ता विमुक्कुविगप्पा । निययावाससुवगया सम्मं गब्भं समुव्वहइ ॥ ३ ॥

जद्विक्सं चिय चिंतामणिव्व गब्भे जिणो समोइन्नो । करितुरगरयणनिव्वहो तद्विक्सं चिय न माइ गिहे ॥ ४ ॥

अणवरयहोभकरणच्छलंतधूमोलिसामलं गयणं । उन्नयमेहासकं कुणइ अकालेऽवि हंसाणं ॥ ५ ॥

अह भयवओ गब्भगयस्स विइक्कतेसु बायासीदिवसेसु वट्टतेय तियासीतमदिणमि सोहम्मक्कपवासी देविदो सोहम्माए समाए निसन्नो वत्तीसाए विमाणसयसहस्साणं चउरासीए सामाणियसाहस्सीणं तायत्तीसाए तायत्तीसाणं चउण्हं लोगपालाणं अट्ठण्हं अगमहिसीणं तिण्हं परिसाणं सत्तण्हं अणियाणं सत्तण्हं अणियाहिवइणं चउण्हं चउरासीणं आयरक्खदेवसाहस्सीणं अन्नोसिंपि देवाणं देवीणं य सामित्तमणुपालेमाणो इमं च जंबुद्वीवं दीवं विउल्लेणं अक्खलिय-पसरेण ओहिनाणेण करकमलनिलीणमुत्ताहलं व अवलोएमाणो भयवंतं चरिसित्थयरं माहणपणइणीकुच्छीमयं पेच्छइ, तओ आणंदवियसियनयणकमलो हरिसवससमुच्छलियरोमंचंचियसरीरो संभमसट्ठणचलियकडगतुडियके-ज्जाकिरीडकुडलाइभूसणो तक्खणविमुक्कसीहासणो पायपीढाओ पच्चोरुहइ, वेसलियवरिट्ठुरत्तरयणखंडमंडियाओ

पाउयाथो विमुंचइ, एगसाडियं उत्तरासंगं करेइ, निडालतड घडियकरसंपुडो सत्तट्ट पयाइं तित्थयराभिमुहं अणुगच्छइ,
तथो वामजाणुं अंचित्ता दाहिणजाणुं धरणिजले निहट्टु तिवसुत्तो सुद्धाणं धरणिजले निवाडेइ, तहा मत्थए अंजलिं
काऊण सुचिरं पराए भत्तीए संथुणइ, कंहं ?—

तुम्ह नसो जिण ! निहयारिवग्ग ! भयवंतं णाह ! आइगर ! तित्थयरा सयं चिय जायबोध ! पुरिसोत्तम ! पसिद्ध ! ॥ १ ॥

भवभीममहाडविपडियपाणिगणसत्थवाह गयवाह । सिव मयलमणंतमुहं संपावियकाम गयकाम ! ॥ २ ॥

परमेसर तत्थ गथोवि ताव अक्खलियनाणनयणेण । एत्थ गथंपिट्ठु पणयं मं पेच्छसु किंकरसरिच्छं ॥ ३ ॥

एवं च थुणिऊण पुवाभिमुहसीहासणनिसन्नस्स देविंदस्स एवंरूयो संकप्पो समुप्पन्नो—अहो तित्थयरा भयवंतो न
कयाइ तुच्छकुलेसु दरिद्रकुलेसु किवणकुलेसु भिक्खागकुलेसु उप्पज्जिंस्सु वा उप्पज्जंति वा उप्पज्जिंस्संति वा, किं तु उग्ग-
भोगराइन्नखत्तिथइक्खागहरिवंसाइएसु सयलभुवणसलाहणिज्जेसु, केवलं कहवि कम्मवसेण हीणकुलेसु अवयरियाविय
भयवंतो अजोणीनिकखंता चेव सक्केहिं उत्तमकुलेसु संहरिज्जंति, जथो तीयपच्चुप्पन्नाणागयाणं सुरिंदाणं जीययेयं,
एवं च जुत्तं ममावि इमं चरिमत्तित्थयरं इमाउ माहणकुलाओ कामवगोत्तस्स सिद्धत्थनरिंदस्स वसिट्ठगोत्ताए तिस-
लाए कुच्छिसि संकामिउं, तिसलागब्भंपि देवाणंदाए कुच्छिसि, एवं संपेहिन्ता पायत्ताणीयाहिवइं हरिणगपेसिं
तिसलाकुच्छिसि गब्भोवसंहरणत्थं निरुवेइ, सो य हरिणगमेसी सक्काएसेणं उत्तरवेउद्वियरुवधरो मणपवणजइणीए

गईए संपत्तो देवाणंदाए माहणीए समीवं, ओसोयणीदाणपुव्वणं च तीसे अवहरइ भयवं गब्भाओ, माहणीवि
तक्खणं चिय वयणकमलेण ते चउइसवि महासुमिणे पडिनियत्तमाणे पेच्छऊण ववगयनिदा निइयताडियउरपंजरा
जरावेगविडुरियव नित्थामसरीरा अवहरिओ मम गब्भोत्ति सुचिरं अय्याणं निंदती करयलनिवेसियक्वोला परमसो-
गंसंभारं काउमारद्धा ॥

इओ य इहेव जंबुदीवे भारहवासित्लयभूयं समुचुंगपायापडिहयविपक्खपक्खुक्खेवं विचित्तासायसहस्ससिहर-
रद्धदिसावगासं खत्तिथकुंडगामं नाम नगरं, तत्थ य कसिणत्तणं कल्यंठिकेठसु सव्वावहारलोवो सहसत्थेसु कंटगु-
प्यत्ती कमलनालेसु कुडिलत्तं कोदंडदेसु निट्ठत्तं तरुणीपओहरेसु भित्तिविरोहो रयणियस्स वंधो य सारणिसलि-
लेसु । जहिं च पढमाभासी पियंवओ करुणापरो वेसमणोव्व अणवरयदाणरसिओ महातरुव्व सउणजणकयक्ख-
वाओ पारद्धिलुद्धव्व कयसारमेयसंगहो गेवज्जयसुरजणोव्व अणितो सारयसलिलं अकलुसो निवसइ लोओ । जत्थ
य चउहिंसिं पि अणवरयवहंतउरहट्ठघडिसुहमुक्कसलिलसिच्चमाणाइं सव्वोउयफुल्लफलमगहराइं जंबूजंबीरखज्जूता-
लतमालपमुहतलसंडमडिद्याइं परिभूयनंदणवणाइं सोहंति काणाणाइं, जं च संकेयठाणं व तिहुयणलच्छीए समुप्यत्तिभू-
मिं व्व विविहच्छेराणां लीलाभवणं व सिंगारस्स आवासोव्व धम्मस्स मुहमंडणं व वसुंधारामणीए । तत्थ य पुरंदरोव्व
छिन्नभूधरपक्खो सुणिं व्व समसोवओगो सुरवारणोव्व दाणसित्तकरो जलनिहिं व्व समजायाणुव्वती अणेगनरिंदमउ-

लिमालानमंसियकमकमलो भुवणपसिद्धो सिद्धथो नाम नरिंदो ।

हरिपीलुपरिक्खित्तं भमतविविहगमहिसिपरिकलियं । सुन्नपि वसंतं पित्र नज्जइ जस्सारिजगभवणं ॥ १ ॥

एगेसु पलाणेसुं जयत्तूरवेण सत्तुसु परेसुं । पणमतेसुं जेणं समरसुहं नेव संपत्तं ॥ २ ॥

तस्स य वम्महस्स व रई महमहणस्सेव लच्छी सव्वतेउरपहाणा रुवाइगुणगणाभिरामा तिसला नाम देवी,
जहत्थाभिहाणो य नंदिवद्धणो नाम पुत्तो सुदंसणा य धूया, अह आसोयबहुलेतरसीए अद्धरत्तसमए हत्थुत्तर-
नक्खत्ते सुकुमालहंसत्तलीपडलसुदरंमि दहिपिंडपंडुरपडपच्छाइयमि गंगापुलिणविसाले सयणिज्जे सुहपसुत्ताए तिस-
लादेवीए पुव्वगम्भं देवाणंदाकुञ्छिमि संकामिऊण दिव्वसत्तीए सो पुव्वभणिओ हरिणेगमेसिदेवो असुभपोगलाव-
णयणपुव्वयं जिणं कुञ्छीए मोत्तूण पणमिऊण य जहागयं पडिगओ, गम्भाणुभावेण य सा तिसलादेवी पच्छिमरय-
णीसमयंमि चउद्दस सुमिणाणि पासइ, कहं चिय ?—

करडतडगलियमयसलिलगंधुद्धुरं, गुलुगुलंतं सुदंतं महासिंधुरं ।

वसहसुल्लासिसुइलंबपुच्छच्छडं, चारुसिं ग सुतुंगं रवेणुब्भडं ॥ १ ॥

धुसिणरसरागकसरसडाडंबरं, केसरिं कंठरवभरियगयणंतरं ।

कुंभिकरकलियकलसेहि कयमज्जणं, लच्छिसुहामकामत्थियसासणं ॥ २ ॥

मालईमल्लिकाकमलरेहतयं, मालममिलाणमलिवलयलीढतयं ।
किरणजालं सुयतं ससिं सुंदरं, निहयतमपसरमइरुगयं दिणयरं ॥ ३ ॥
फालिहंडगलोलंतसियधयवडं, पुन्नकलसं च सुहकमलगंधुब्भडं ।
कुसुयकल्हाररम्मं महंतं सरं, बहुलकल्लोलमालाउरं सायरं ॥ ४ ॥
चिविवहमणिथंभसालं विमाणं वरं, कंतिकब्बुरियगयणं च स्यणुक्करं ।
धूमरहियं तहा हुयवहं सुमिणए, देवि वयणंमि पविसंतयं पेच्छए ॥ ५ ॥

पेच्छिऊण य इमे सुमिणे हरिसुद्धुसियरोमकूवा परमाणंदमुव्वहती गया सिद्धत्थपत्थिवसमीवं, कहिओ चउइस-
महासुमिणोवलंभवइयरो, तेणावि नियमइविभवानुसारेण संमं चिंतिऊण भणियं-सुंदरि ! सयलनरिंदसदोहवदणिज्जो
निरुवक्कमविक्रमकंतसत्तुचक्को निप्पडिमपयावपरिभूयरविमंडलो निरुवमसत्तो पुत्तो ते भविस्सइ, सायरं पडिच्छिऊण
य इमं अणाइक्खणिज्जभूरिहरिसपब्भारमंथरगई गया नियभवणं, तहिं च देवगुरुसंबद्धाहिं मंगल्लाहिं असिवोवघाय-
दक्खाहिं सुहावहाहिं कहाहिं रयणिसेमइवाहिं पउत्तत्ति, राइणावि जाए पभायसमए समाहूया अट्टगनिमित्तस-
त्थपरमत्थविधक्खणा नेमित्तिगा, आसणदाणपुव्वयं सक्कारिऊण पवरवत्थाइणा निवेइओ देवीदिट्ठचउइससुमिणवुत्ततो,
तओ ते सम्मं निच्छिऊण परोप्परं जहावट्ठियमत्यं भणिउमारद्धा-देव ! एयारिससुमिणाणुभावेण नूणमुप्पज्जिही

धम्मवरचक्कवट्ठी तिहुयणपूयणिज्जपायवीढो नियकुलनहयलभियंको अणुवमचरिओ तित्थयोरो तुम्ह पुत्तोत्ति, एवमाय-
 न्निऊण परमहरिसुव्वहतेण राइणा दवाविद्यं तेसिं आसत्तपुरिससंतइदालिह्विद्वकरं मणोरहपहाइकंतं दविणजायं,
 विसज्जिया य नियनियठाणेसु, निवेइओ य एस वइयोरो देवीए, जाओ य परमो पमोओ तीसे। एवं च पइदिणपुज्ज-
 तमणोरहाए जिणाणुभावेण दूरपलीणरोगाए सुरमणीसरिच्छवट्तं विलासाए वट्ठिउमारद्धो गब्भो, तयणुभावेण य
 एवं सा सोहिउं पउत्ता—

अंतरनिहित्तवररणसंचया फलिहमयधरिच्छि । संकतफारदिणनाहमंडला मेरुभिच्छि ॥ १ ॥

अंतद्वियमुत्ताहलरेहंतुदामजलहिचेलव । पढमुगमंतससहरपसाहिया गयणलच्छि ॥ २ ॥

अंतोविफुरणसमुल्लसंतसोयामणीनिवहकिन्ना । उच्चमडवणंतघणपडलपुन्ननवपाउससिरि ॥ ३ ॥

इय गब्भगयजिणिंदाणुभावसोहंतकतसंघा । नवकप्पहुमलइयव्व मणहरा रेहए देवी ॥ ४ ॥

अद्विवसं च भयवं भुवणमहासरेक्करायहंसो तिसलादेवीए उदरकमलमइगओ तद्विसाओवि सुरवइवयणेण तिरियजं-
 मगा देवा विविहाइं महानिहाणइं सिद्धत्थनरिंदभुवणंमि भुज्जो परिक्खिचंति, तं पि नायकुलं धणेणं धन्नेणं रत्तेणं
 रत्तेणं वलेणं वाहणेणं कोट्टागारेणं पीइसक्कारेणं वाढमभिवहइ, सिद्धत्थनराहियस्सवि अचंतवाहुवलदप्पिणो तद्विनिहं-
 विसमपण्णु संठिया अपणयपुव्वावि वसमुवगया पचंतद्वियावि नराहिवा । अन्नवासरे भगवओ अस्मापिऊणं एवमि

रूढो वियप्पो समुत्पण्णो, जहा-जप्पमिइ एस गब्भो संभूओ तप्पमिइ धणकणगाइज्जविभवेणं अमहे वहुमो, ता जइया एस जाओ भविस्सइ तइया एयस्स इमं गुणनिप्पण्णं वद्धमाणोत्ति नामधेयं वयं करिस्सामोत्ति, एवरूवाइ मणोरहसयाइं परिकप्पयंति ॥

अह भगवं भुवणपहू नाणत्तपरिगओ महाभागो । करुणापरेक्कचित्तो समुहविरत्तो महासत्तो ॥ १ ॥
चलणप्फंदणरूवं संहरिउं सब्वमंगवावारं । सेलेसिपवन्नो इव अणुकंपट्टा सजजणीए ॥ २ ॥
तह कहवि वसइ गब्भे जह नियजजणीवि नो मुणइ सम्मं । तइलोकविम्हयकरो गरुयाणं कोऽवि वाचारो ॥ ३ ॥
नवरं तिसलदेवी तहट्टिए जिणवरे विचितेइ । किं गलिओ मम गब्भो ? उयाहु देवेहिं अवहरिओ ? ॥ ४ ॥
किं मज्जेवि विणट्ठो ? किं वा केणावि थंभिओ होज्जा ? । अहवा निप्पुन्नाणं रयणं किं करयले वसइ ? ॥ ५ ॥
जइ सच्चं चिय विगओ एसो ता निच्छयं निए पाणे । नीसेसदुक्खलक्खेक्कभायणेऽविहु परिचयामि ॥ ६ ॥
अट्टज्झाणोवगया करयलपल्हत्थिएण वयणेण । अच्चंतदुक्खवसया दूरज्झियमंडणाभरणा ॥ ७ ॥
परिचत्तसमुल्लावा महियलक्खरुक्खचक्खुविकखेवा । दीहुस्सासनिवारियमुहसोरभमिलियभसलकुला ॥ ८ ॥
इय भूरिसोगसंभाररलिया गलियकेसपासा य । हिययंतो रोवंती देवी जावऽच्छए ताव ॥ ९ ॥
सिद्धत्थारायभवर्णपि तक्खणं विमणदुम्मणं जायं । उयसंतमुंगरवं उवरयवरगीयनिग्घोसं ॥ १० ॥

अह भयवं एवंविहवइयरसुवलक्खिऊण नाणेण । अंगं अंगावयवं चालइ जणणीसुहट्टाए ॥ ११ ॥
 ताहे तुट्ठा देवी हरिसवसुल्लसिरलोयणकवोला । जायं झडत्ति भवणंपि राइणो पमुइयजणोहं ॥ १२ ॥
 तत्तो भयवं चितइ गब्भुभवमेत्तओऽवि कह जाओ । जणणीजणगणमहो पडिबंओ कोऽवि अइयरओ ? ॥ १३ ॥
 जं गब्भनिण्णकंपमेत्तेणवि एरिसा विसमरूवा । नियसंवेयणगम्मा एएसि दसा समावडिया ॥ १४ ॥
 जह पुण जीवतेसुवि समणत्तणमहमहो पवज्जिस्सं । तो मम विरहेण धुवं एए जीयं चइस्संति ॥ १५ ॥
 इय चित्तिऊण भयवं संतोसठ्ठं सज्जणजिजगणं । इयरजणाणवि एवं ठिइं व लट्ठु पइट्ठतो ॥ १६ ॥
 जीवतेसुं अम्मापिइसु नाहं मुणी भविस्सामि । इय गब्भगओऽवि जिणो पडिज्जइ नियमभइयरं ॥ १७ ॥
 अह सा तिसलादेवी गब्भफुरणसंपत्तपरमपमोया पहाया नियंसियमहघचीणंसुया सरसंयदणकंयंराया आवि-
 द्धपररयणा तं गब्भं नाइउणहेहिं नाइसीएहिं नाइतित्तेहिं नाइकडुएहिं नाइकसाएहिं नाइअंबिलेहिं नाइभइुरेहिं
 सबोउयसुहावहेहिं भोयणेहिं परिवालंती पूरियडोहला निब्भया पसंता सुहेण भवणतलसमारूढा कयाइ पवर-
 नाड्यपेच्छणेण कयाइ पुराणपुरिसचरियायन्नणेण कयाइ विचित्तकोज्जहावल्लोयणेण कयाइ महीजणपरिहासकर-
 णेण कयाइ उज्जाणविहारविणोएण कयाइ दुक्खियजणतवणिज्जपुंजवियरणेण कयाइ नयरसोहानिरिक्खणेण कयाइ
 बंधुज्जणसम्माणेणं कयाइ धम्मसंवद्धकहावियारेण दिणाइं गमेइत्ति ।

अन्नया य निष्फणसस्सोवसोहि ए पणट्टरोगमारिपमुहाणिठे जणवए नियनियधम्मकरणुज्जएसु समणलोएसु
उवसंतपयंहुड्डमरेसु परोणरं नराहिदेसु पसुकचाडभडचोरभयासु विलसंतीसु पयासु रेणुपडलविगमरमणिज्जासु
जणमणाणंददाइणीसु सयलदिसासु उज्जाणतरुकुसुमसंबंधगंधुडुरेसु पयाहिणावत्तपरिभयणरमणिजेसु मंदं मंदं वायतेसु
समीरणेसु परमविजयसाहगेसु सबसउणेसु गंभीरघोसासु सयं चियवजंतीसु विजयंहुडुभीसु चेत्तसुद्धतरसीए सुरभव-
चवणकालाओ आरब्भ नवणहं मासाणं अट्टमाण य राइंदियाणं विइक्कताणं उच्चट्टाणं गएसु महागहेसु अट्टरत्त-
समए हत्थुत्तराजोगमुवागए चंदे तिसलदेवी पुव्वदिसिक्ख पयासियसयलजीवलोयं भयवत्तं दिणयरं व भवियजणरहं-
गमिहुणकयपरमसंतोसं पसूयत्ति ।

तयणंतरं च पवरपंचवणरयणविणिम्भियविविहविमाणमालारुढेहिं पययपडुपडहपमुहजयतूरेहिं उल्लुट्ठिसीहना-
यकलयलमुहलेहिं पवराभरणमणिविच्छुरियगयणंगणेहिं पहरिससमुल्लसंतसरीरेहिं अणेगेहिं देवेहिं देवीहिं य इतोहिं
पडिनियत्तमाणेहिं य देवलोयपुरिपिव रमणिज्जं अमंदाणंदसंदोहजणं च कुंडमामनयरं जायंति । सिद्धत्थरायभवणे
य वेसमणवयणाणुवत्तिणो जंभगा सुरा रयणकणगवत्थाहरणवासं वरिसंति, पत्तपुण्णफलंगंधचुण्णवासं च सुयंति ।

अह जाए सुइक्कम्मपत्थावे अहोलोगवत्थवा चउसामाणियसहस्सपरिवुडा सत्तहिं अणिएहिं सत्तहिं अणियहिं-
वईहिं परियारिया-भोगंकरा भोगवई, सुभोगा भोगमालिणी । तोयधारा विचिता य, पुण्णमाला अणिंदिया ॥ १ ॥

एआओ अट्ट दिसाकुमारीओ जिणाणुभावचलियासणाओ ओहिन्नाणेण जिणजम्मवइयरं नाऊण दिव्वविमाणारू-
ढाओ सव्विह्दीए जिणजणिसमीवमागच्छति, तिपयाहिणीकाऊण य जिणमायरं पराए भत्तीए थुणंति, कइं चिय ?-

तुम्ह महायसि ! रामाजणेक्कसिरयणविब्भमे नमिमो । पयकमलं निम्मलकोमलगुलीपवरदलकलियं ॥ १ ॥

इत्थीणं मज्झे चंगिमाए लद्धा तए पढमेरहा । तुमए चिय निम्माहिओ महिलाहुयत्तणकलंको ॥ २ ॥

पुत्तवईणं मज्झे तुमए चिय पावियं विजयपत्तं । मिच्छत्तंयजणस्सालब्बणेहु तुमं जाया ॥ ३ ॥

सरयनिसाथरकरनियरहारगोरो जसो तुमाहितो । आसंसारं परिभमउ निब्भरं दससुवि दिसासु ॥ ४ ॥

मूढोचिय सुयपसवे परमाणंदं जणो समुव्वहइ । तुज्झ सरित्था धूयावि पुत्तकोडिपि परिभवइ ॥ ५ ॥

तिहुयणपणमियचलणो जीए कुच्छिमि वाढसुव्वूढो । कलणाइक्कंतबलो चरिमजिणिंदो जयाणंदो ॥ ६ ॥

इय सुइरं जिणजणीं पणमिय परमायेण जंपंति । देवि ! नहु भाइयव्वं अम्हे जं दिसिक्कुमारीओ ॥ ७ ॥

परमेसरस्स भुवणेक्कचक्खुणो जिणवरस्स एयस्स । निययहिगारऽणुरूवं जम्मणमहिमं करिस्सामो ॥ ८ ॥

एवं भणिऊण तित्थयरजम्मणभन्नणस्स समंतओ जोयणपरिमंडलं भूभागं ववगयतणकट्टपत्तकयवरं दुरुस्तारिया-
सुइदुरभिगंधयोगलं तवखणं विउव्विएणं मणहरेणं सव्वोलयकुसुमंगंधाणुवासिएणं संवट्टगयवणेणं काऊण भगवओ
तित्थयरस्स तिसलादेवीए य अदूरे गायंतीओ चिट्ठति ।

एवं चिय चलियासणपउत्तदिद्वोहिसुणियपरमत्था । उट्ठदिसावासाओ देवीओ इमा तओ इति ॥ १ ॥
मेहंकरा मेहवई, सुमेहा मेहमालिणी । सुवच्छा वच्छमिता य, वारिसेणा बलाहगा ॥ २ ॥
तो निहयरयं वेउविण्ण मेहेण महियलं काउं । गंधवलुद्धुल्लंधाउलं पुण्णवरिसं च ॥ ३ ॥
जिणवरगुणगणमइकोमलेण सुइसोवस्वरणदक्खेण । अइदूरंमि ठियाओ गायंति सेरेण महुरेण ॥ ४ ॥
अह पोरत्थिमरुयगट्ठिइओ अट्ठवि दिसाकुमारीओ । बहुपरियणपरियरियाओ एयाओ आगया झत्ति ॥ ५ ॥
नंदुत्तरा य नंदा, आणंदा नंदिवद्धणा । विजया य वेजयंती, जयंती अपराजिया ॥ ६ ॥
रविमंडलसारिच्छं हत्थे धरिऊण दप्पणं ताहे । पुव्वदिसिंमि ठियाओ किंचित्ति गुणे जिणवरस्स ॥ ७ ॥
अह दाहिणरुयगनिवासिणीओ अट्ठवि दिसाकुमारीओ । नायजिणजस्मणाओ इति विभाणेहिं एयाओ ॥ ८ ॥
समाहारा पइन्ना य, पुण्णबुद्धा जसोहरा । लच्छिमई सेसवई, चित्तगुत्ता वसुंधरा ॥ ९ ॥
करपल्लवेण कलि(गहि)उं भिगारं सुरहिवारिणरिपुन्नं । दक्खिणपासे पड्डुणो गुणथवणपरा परिसंसति ॥ १० ॥
अह पच्छिमरुयगगया अट्ठव पुणो दिसाकुमारीओ । भत्तिभरनिब्भराओ इमाओ पविसंति जिणगेहे ॥ ११ ॥
इलादेवी सुरादेवी, पुहवी पउमावई । एगनासा नवमिया, भदा सीया य अट्ठमी ॥ १२ ॥
करकलियतालियंटा विसट्ठकंदोददहरच्छीओ । पच्छिमदिसिम्मि ठाउं थुणंति जिणनाहुगुणनिवहं ॥ १३ ॥

अह उत्तरिछरुयगाभिहाणगिरिवासिणीओ अद्वेव । आगच्छति इमाओ देवीओ दिसाकुमारीओ ॥ १३ ॥
 अलंबुसा मिससेसी, पुंडरीकी य वारुणी । हासा सबप्पभा चेव, हिरिदेवी सिरी तहा ॥ १५ ॥
 वेदिता जिणजणणीं धेचुं सिचचामरं करगेण । उत्तरदिसिम्मि गुरुणो पुव्वकमेणं परिवसंति ॥ १६ ॥
 अह विदिसिरुयगपव्वयवत्थवा चउ दिसाकुमारीओ । चित्ता य चित्तकणगा सतेय सोयामणीनाम ॥ १७ ॥
 नमिउं तिसलादेवीं जिणं च विदिसासु चउसुवि निलीणा । सुंदरपईवहत्था जिणगुणनिवहं पगायंति ॥ १८ ॥
 मज्झिमरुयगट्ठिओ पुणोवि चत्तारि दिसिकुमारीओ । देवी रुया रुयसा सुरुया रुयगावई नामा ॥ १९ ॥
 आंगतूणं पुव्वक्केमेण नाभिं जिणस्स कप्पेति । चउरंगुलपरिवज्जं ताहे वियरं परिखणिंति ॥ २० ॥
 तं नाभिनालमह तत्थ ठाविउं पंचवणरयणेहिं । पूरिंति तं समगं तदुवरि पीढं च वंधंति ॥ २१ ॥
 पीढस्सोवरि हरियालिगं च धियरंति नीलमणिम्मं । लोयणआणंदयरिं दिवाए देवसत्तीए ॥ २२ ॥
 तयणंतरं तिन्नि कयलीहरां विउव्वंति, तेसिं च मज्झभागे पवरपंचप्पयारमणिविणिम्मियकोट्टिमतलां विच्छि-
 त्तिचित्तरंगावलीमणहरां दुवारदेसठविद्युण्णकणयकलसां दिव्वरुवरेहंतसालभंजियाभिरामां दाहिणपुव्वुत्तरदिसासु
 तिणिण चउसालभवणां विसालां विरयंति, तेसिं च मज्झभागे महग्घमणिसुखंडमंडियां नियकिरणजालुसुत्तिय-
 सुरिंदकोदंडां कणगसेलसिलाविच्छिन्नां तिणिण सीहासणां ठवेंति, तओ तित्थयरं करयलपुडेणं तित्थयरज-

णर्णिं च बाहाहिं घेत्तूण परमायेरेण दाहिणदिसिचाउसालसीहासणे निसियावेति, तओ सयपागसहस्सपागतेल्लोहिं पहाणंगंधुदुरोहिं तेसिं सरीरमब्भंगिति, गंधुवट्टणेणं उव्वेट्ति, तओ पुव्वट्टिइए जिणं जणर्णिं च पुव्वदिसिचाउसाल-सिंहासणंमि आरोविऊण गंधोदएण पुण्फोदएण सुद्धोदएण मज्जिऊण पवरमणिरयणाभरणसंभारेण विभूसियसरीराइ काऊण परमायेरेण पुव्वविहीए उत्तरदिसिचाउसालसिंहासणे निवेसिंति, नवरं नित्थकिंकोरेहिं चोल्लहिमवंताओ गोसीसचंदणदारुणाणि आणाविऊण अरणिनिम्महणुट्टिएण जलणेण संतिनिमित्तं होमं च करोति, नियपभावपरि-विखयस्सवि भगवओ जीयंतिकाऊण रक्खापोट्टलियं बंधिऊण रयणपाहाणगे सवणमूले ताडिति, एवं भणंति य-

सत्तकुलपव्वयाऊ अण्णडिहयसासणो हवसु देव ! । गयरोगसोगदुक्खो पणइयणपूरियासो य ॥ १ ॥

इय भणिऊण पहिट्ठा जम्मणगेहे ठवित्तु जिणजणर्णिं । गायंति जिणिंदगुणे तिसलापासे समल्लीणा ॥ २ ॥

इय जम्मस्स य कायव्वित्थरो तित्थनाहभत्तीए । वेणेण समत्थिज्जइ छप्पन्नदिसाकुमारीहिं ॥ ३ ॥

एत्थंतरे सोहम्मकप्पाहिवइस्स सक्कस्स सीहासणं चलइ, तच्चलणेण ओहिनाणेण भगवओ तित्थयरस्स जम्मं मुणिऊण संसंभमं सक्को सीहासणाओ उट्टइ, सत्तट्ठपाणुगमणपुव्वयं परमाए भत्तीए तत्थट्ठिओऽवि जिणं शुणिऊण पाइत्ताणी-याहिवइं हरिणेगेमेसिं देवं आणवेइ-अहो भइ ! गच्छसु सोहम्माए सभाए मेधोवघोरघोसं जोयणपरिमंडलं सुवो-सधं तिक्खुत्तो ताडित्तो महया सदेणं एवमुगघोसेहि-सक्को जंबुदीवभारहखेत्तसमुब्भवस्स जिणस्स जम्मणमहिंम

काळं पट्टिओ, ता भो देवा ! तुब्भे सव्वबलेणं सव्वविभूहए सव्वनाडएहिं सव्वालंकारविभूसाए दिव्च्छरागणेणं परिवुडा पवरविमाणाइं आरूढा मम सयासं पाउब्भवहत्ति, एवं भणिए हरिणेमेसी देवे देवरणो वयणं विणएण पडिसु-
णित्ता तुरियगईए सोहम्मसभाए गंतूण सुधोसं घंटं तिकखुत्तो ताडेइ, तीसे य पयंडनिग्घोसवसुच्छलंतपडिसइयप-
डिफलणवसेण अन्नाइं एगूणाइं बत्तीसं घंटासयसहस्साइं समकालं रणज्झणारवं काउमारद्दाइं, एवं च दिसि दिसि
समुब्भवंतपडिनिग्घोसवहिरियदियंतरो सोहमकण्णो समुण्णन्नोत्ति । एत्थंतरे—

पंचविहविसयसेवापमत्तचित्ता समंतओ देवा । तं एगकालवज्जिरघंटागणगुरुसरं सोउं ॥ १ ॥

चिंतंति सव्वओ किंचि (च) कुट्टवंभंडरवसमो घोरो । फालिहविमाणमालापडिफलणचउग्गुणीभूओ ? ॥ २ ॥

आपूरितोच्च दिसावगासमखिलं चराचरं लोगं । सद्देगसरूवंपिव कुणमाणो निययमहिमाए ॥ ३ ॥

संखुद्धमुद्धतियसंगणाहिं भयवेगतरेलियच्छीहिं । हा नाह ! रक्ख रक्खत्ति जंपिरीहिं सुणिज्जंतो ॥ ४ ॥

दणुवहरणसुमरणतुट्ठतियसंवठोहकंठरवभीमो । अणिवारियं वियंभइ जघवंटारणणारावो ॥ ५ ॥

इय चिंतावससिद्धिलियदइयादढकंठबाहुपासंमि । सव्वत्तो सुरनिवहे जायम्मि विमूढहियंमि ॥ ६ ॥

खणमेत्तस्सउवसाणे समत्थघंटावंमि उवसंते । हरिणेमेसिदेवो भणइ सुरे अवहिए जाए ॥ ७ ॥

भो भो तियसा ! सक्को तुब्भे आणवइ जह लहुं एह । जेण जिणजम्ममज्जनमहूसवो कीरए इण्हि ॥ ८ ॥

इय आणत्तियमायन्निज्जण परिसुक्कसेसावावारा । मुणियजिणनाहमज्जणमहूसवा हरिसिया तियसा ॥ ९ ॥
तो मज्जणपोक्खरिणीए जंति, बहुविहज्जेण मज्जणु करंति । कण्णूरामिस्सचंदणरसेण, आलिपहि देहु सुबंधुरेण ॥ १ ॥
अइकोमलनिम्मलदूसुअल, परिहंति वियंभियकंतिपडल । अह कंठपइट्ठियलुहार, दूकल्लियकासुयजणवियार ॥ २ ॥
अइसुरहिक्कुसुमनिम्मविदास, नवपारियायमंजरिसणाम । बंधंति सुगंधसमिद्ध सीसि, तक्खणकयकुचिरचारुकेसि ॥ ३ ॥

मणिमउडकिरणविच्छुरियगयण, नियरुवमडण्णरहसियमयण ।

वरकडयतुडियभूसियसरीर, तणुकंतिपसरपरिभूयसूर ॥ ४ ॥

किवि मगरसरालयसन्निस्सन्न, किवि हरिणवसहसिहिण्वन्न ।

आरुहवि केवि कुंजरि महंति, केवि तुंगतुरए वेगे वयंति ॥ ५ ॥

चीणंसुयचिंधसहस्सरम्म, अवलोयणिमेत्तह दिन्नसम्म ।

आरुहवि चालिय किवि वरविमाणि, किंकिणिरवसुहरि महण्यमाणि ॥ ६ ॥

सहुलसरहरिपट्ठि चडिय, किवि पट्ठियवेगेऽन्नोन्न घडिय ।

इय सुरसमूहह सध्वे बलेण, सुरवइ समीवमाणय जवेण ॥ ७ ॥

एत्थंतरे खंसहस्ससंनिविट्ठं फालिहमणिघडियसालभंजियाभिरामदारदेसं अणेगलंबंतमुत्ताहलमालं पवरवइरवे-

इगापरिक्लिप्तत्तेपरंतविभागं रणंतघंटावलीमहुरसरसुहयं पवणकंपमाणनिबिडजयपडागापयडं सिंहं व तिरियलो-
यमहामंदिरस्स फलं व पुव्वकयपुन्नमहापायवस्स तिहुयणसारपरमाणुविणिम्मियं व सयलविभूइविच्छहाखंडमंडा-
गारं सोलसभेययणरासिघडियं व सुरवइवयणसंमंतपालकामरविउवियं जोयणसयसहस्सविच्छिण्णं पंचजोयण-
सयसमुवेहं वरविमाणमारूढो अणेगदेवदेविकोडिपरिबुडो पत्थिओ पुरंदरो, तओ पवणविजइणीए गइए तिरियस-
संखेज्जाणं दीवसमुद्दाणं मज्झमज्झेणं नंदीसराभिहाणदीवस्स दाहिणपुरत्थिमिल्ले रइकरपव्वए आगंतूण तं दिव्वं
देविहिं विमाणवित्थारं व पडिसंहरिऊण जेणेव जंबुदीवो जेणेव दाहिणडुमरहं जेणेव भगवओ जम्मणभवणं तेणेव
उवागच्छइ, तयणंतरं च तेण दिव्वेण विमाणेण तिकखुत्तो आयाहिणपयाहिणं भगवओ जम्मणभवणस्स काऊण विमाणं
उत्तरपुरच्छिमे दिसिभागे ठवेइ, तओ अट्टहिं अगमहिसीहिं चुलसीइए सामाणियसाहस्सीहिं समेओ जत्थ भयव
तित्थयरो तित्थयरजणणी य ताहिं आलोएइ, पणामं कोरमाणो पविसइ, सामिं समायरं तिपयाहिणपुव्वयं नंदइ,
वंदिता सविसेसं तिसलादेविं थुणइ, कइं?—

जयसि तुमं देवि ! सगेत्तगयणपडिपुन्नचंदनवजुण्हे ! । सुविमुद्धसीलसालीणयाइ गुणरयणवरधरणि ! ॥ १ ॥
तिहुयणचिंतामणिकुच्छिधारिण ! तं धुवं जगे धन्ना । तुज्झं चिय सुहफलओ पसंसणिज्जो मणुयजम्मो ॥ २ ॥
एत्तियमेत्तेणं चिय तुमए उल्लंघिउव भवजलही । परमासीसट्ठाणं जायासि मुणीसराणंपि ॥ ३ ॥

एवं च शुण्णिऊण ओसोयणिदाणपुव्वगं तक्खणाविउव्वियजिणपडिरूवं च ठविऊण तिसलादेवीसमीवे सयं पंच सरारे विउव्वह, तओ एगेण परमसुइभूओ सरससुरभिगोसी सचंदणपकपंडुरोयेर करकमले कयण्णामो सबहुमाणं तित्थयरं संठवेइ, एगेण य तस्सेव य पिट्ठिदेसट्ठिओ हरट्ठहासकुसुमप्पगासं चामीयरचारुदंडं पुंडरीयं धरेइ, दोहि य रूवेहिं भगवओ उभयपासेसु सुरसरिवारिप्पवाहविब्भमे चामरे मंदं मंदं चालेइ, एगेण पुरओ ठिओ धारासहस्सभीसणं समुच्छलंतकिरणपडलं सरयसूरमंडलं व दिसिवलयमुज्जोवितं पयंडपडिवक्खविकखेवदारुणं कुलिसमुव्वहइ । एवं च पंचरूवेहिं समायरियनियनियकायवो अणेगेदेवदीहिं परियरिओ-

संपत्तपावणिज्जं समत्थतित्थोहदंसणपविच्चं । अप्पाणं भन्नतो हरिसणंगे अमायतो ॥ १ ॥

मंदरसेलाभिसुहं कंठपलंबंतरयणवणमालो । पयलंतदिद्वकुंडजुयलो आखंडलो चलिओ ॥ २ ॥

सिग्घाए दिव्वाए देवगईए कमेण गच्छतो । जोयणलक्खुच्चत्तं संपत्तो मंदरगिरिंदं ॥ ३ ॥

जस्सावट्ठियरूवा पडिर्विबियसिहरकाणणाभोगा । विमलपरिमंडला दप्पणव्व रेहति ससिसूरा ॥ ४ ॥

जस्स रमणीययारंजियाइं गंधवेदेवमिहुणाइं । उज्झियनियठाणाइं सिहरेसु सुहं परिवसंति ॥ ५ ॥

नाणाविहफलभरंभुरगगसाहाइं जत्थ रेहति । सबोउयकुसुमसमिद्धिसुदराइं तरुवणाइं ॥ ६ ॥

किविणो व कणगपरिहाणिवज्जिओ सज्जणोव्व अइतुंगो । सुसुणिव्व एगरूवो जो निच्चं सिद्धिखत्तं व ॥ ७ ॥

एगत्थुन्नयनवमेघज्जिपरिटुट्ठनीलकंठो जो । अन्नत्थ किन्नरारद्धगेयसुइनिच्चलकुरंगो ॥ ८ ॥
 एगत्तो मरगयनिस्संतकिरणोलिसामलियगयणो । अन्नत्तो रवितावियफलिहोवल्लजलणकणो ॥ ९ ॥
 तत्थ एवंविहे मंदरगिरिंमि नीहारगोक्खीरहारुज्जलाए अइपंडुकंबलसिलाए विचित्तरयणप्पभापडलपक्खा-
 लियंमि अभिसेयसिंहासणे पुद्वाभिमुहो सुरिंदो उळ्ळंगनिवेसियजिणो उवविसइ, एत्थंतरे जिणपुन्नमाहप्पचलियासणा
 ओहिनाणविन्नायजहट्ठियपरमट्ठा नियनियसेणाहिदइताडियधंटाखपडिबोहियसुरयपत्ततियसगणा तक्कालविउच्चि-
 यपवरविमाणारूढा सच्चालंकारेहंतसरीरा ईसाणप्पमुहा चंदसूरपज्जंता एगत्तीसंपि समागया सुरिंदा, कयपणामा
 य ट्ठिया सट्ठाणेसु, एत्थ य पत्थावे अच्चयतियसाहिवेण भणिया नियदेवा-अहो सिग्घसुवणमेह महरिहं पसत्थं
 तित्थयराभिसेयं, तओ ते पहिट्ठचित्ता अट्ठोत्तरसहस्सं सुवन्नकलसाण अट्ठोत्तरसहस्सं कलहोयमयाणं एवं मणिमयाणं
 सुवन्नरूपमयाणं रूपमणिमयाणं सुवन्नरूपमणिमयाणं भोमेयगाणं अट्ठसहस्सं रयणकलसाणं, एवं भिंगाराणं
 पत्तेयं पत्तेयमट्ठसहस्सं विउवित्ता गया खीरोयसमुद्दं भरिया खीरसलिलेण सयलकलसा, गहियाइं उप्पलकुसुयसय-
 पत्तसहस्सपत्ताइं,

एवं पसत्थतित्थाण मागहाईण वरनईणं च । सलिलं महोसहीओ सुकुमारा मद्विया जा य ॥ १ ॥
 वक्खारसेल्लकुलपद्मएसु सोमणसनंदणवणेसु । अंतरनइहरएसु य जाणि य कुसुमोसहिफलाइं ॥ २ ॥

आदाय तां खीरोयसलिलपाडिपुन्नपुन्नकलसा य । अच्युयसुराहिवङ्गो विणयण्णया समप्येति ॥ ३ ॥
अह सो अच्युदेविंदो ददूण अभिसयसमगसामग्गिं जायहरिसो सिग्घमासणाओ उट्टिता दसाहे सामाणिय-
सहस्सेहिं तायत्तीसाए तायत्तीसेहिं चउहिं लोगपालेहिं तिहिं परिसाहिं सत्तहिं अणिएहिं सत्तहिं अणियावईहिं
चचालीसाए आयरक्खदेवसहस्सेहिं संपरिउडो तेहिं विमलतित्थुत्थखीनीरपरिपुत्ताहेहिं विमलकमलपिहाणेहिं
गोसीसचंदणपमुहपहाणवत्थुगम्भिणेहिं सव्वोसहीरससणाहेहिं बहुसहस्ससंखेहिं महण्णमाणेहिं कलसेहिं विउच्चि-
एहिं साभाविएहि य परेणं पमोएणं भगवओ भुवणिक्कबंधवस्स चरमतित्थयरस्स जंमज्जणमहूसवं काउं समुवट्ठि-
ओत्ति । एत्थंतरे चित्तिं सुरिदेण, जहा—

लहुयसरीरत्तणओ कहेस तित्थेसरो जलुप्पीलं । सहीही सुरसत्थेणं समकालमहो खिविजंतं ? ॥ १ ॥

एत्तिचकुंभजलुप्पीलपेल्लिओ गरुयगंडसेलोउवि । पल्लत्थिज्जइ नूणं किमेत्थ जुत्तं न याणेसो ? ॥ २ ॥

इय एवं कयसंकं सक्कं ओहीएँ जिणवरो नाउं । चालइ मेरुं चलणंगुलीए बलदंसणट्ठाए ॥ ३ ॥

तच्चालणे य—चंगतुंगिमरुद्धगयणगपरिकपिय, सिहरसयकडयंडततडवियडविहडिय ।

टलटलियटोलोवलविच्छिन्नटंकदोत्तडविनिवडिय ॥ १ ॥

कंदरगयकेसरिविहियगलगज्जियरवमीम । पवियांभियचाउहिसिहिं पडिसइय निस्सीम ॥ २ ॥

तथा-चलिरमंदरभारसभगसिरनमिरमुयगाहिवइ दूरमुक्क दुद्धरु धरायलु, विलुलंतकुलसेलगणु तुद्वबंधु डोलिओ विसंतुलु।
उस्सिखलभयभरविदुर उद्धयसुंडादंड अनिवारण दिसिवारणवि गमणि ययदु पयंड ॥ ४ ॥

खुभियदारुणमच्छकच्छवयपुच्छच्छडाडणेण उच्छलंतकछोल-संकुलगयंगणविगयसिहमुक्कमेरवियरंतमहिजल ।
अइवेगप्पवणप्पहय हल्लियसयलसमुइ । नज्जइ जगबोलण भणिय चाउदिसिहिं रउहु ॥ ५ ॥

सूरससहरताराणां पि विवरंसुहपट्टियइं तक्खणेण सव्वइं विमाणइं, भयभीएण सुरगणेण अइजवेण उज्झियसगणइं ।
विमणंमणुसुरवहुनिवहु जाउ विसंतुलचेदु, मरणासंकिउ खयरज्जु गिरिकंदरिहिं पइदु ॥ ६ ॥

एवं वियंभमाणे तिहुयणसंखोहे पंचनमोक्कारसुमरणपरायणे चारणमुणिगणे विविहाउहनिवहमणुसरंते अंगरक्ख-
सुरसमूहे पयंडकोवुडुमभीमो घडियनिडालभिउडिमासुरो करकलियकुलिसो सुराहिवो भणिउमादत्तो-अहो सो
एस सेंटिकम्मसमारंभेऽवि वेयालसमुल्लासो भोयणपढमकवलकवलणेऽवि मच्छियासन्निवाओ पुन्निमाचंदपढमुगंभेवि
दाढाकडप्पदुप्पिच्छो विडप्पागमो जं सयलमंगलालयस्स अणप्पमाहप्पवलणिहाणस्स तित्थेसरस्सवि जम्मणमहूस्सव-
समए एरिसो विग्घो समुवट्ठिओ, केण गुण अकालकुवियकयंतसंगमूएण देवेण दाणवेण य जक्खेण रक्खसेण
नियमुयसामत्थवित्थारदंसणट्ठयाए वा जिणमहिमावलोयणमच्छरेण वा भुवणसंखोहदंसणकोऊहेलण वा कओ हवेज्जत्ति
ज्जायसंसओ ओहिन्नाणं पउजइ । तओ दिव्वनाणमुणियजिणचलणचंपणुक्कपियमेरुवइयरो तक्खणसंहारियकोवुगमा

निन्दयनियच्छुवियप्पो खासिऊण बहुप्पयारं भगवतं जिणेसरं पाणिपरिगहियकलसे तियसे भणिउमाढत्तो-
भो भो बिबुहा!—

जह सिरिरिसहजिणिदो ण्हविओ पुच्चिं इहव तियसेहिं । तह चरिमतिथनाहं पि न्हवह मोचूण कुवियणं ॥ १ ॥

एगसरूवबलच्चिय निब्भंतं जेण सव्वजिणनाहा । तणुगुरुलहुयत्तं पुण न कारणं वीरिउल्लासे ॥ २ ॥

एवं च सुरवइवयणाणंतरमेव समकालं निवडियं सयलकलसेहिंतो सारयससिमऊहजालं व गयणसुरसरिजलपडलं
व तुसारहारधवलं जिणोवरि खीरोयहिजलं, एवं च पवट्टे जिणाभिसेगे—

दुंदुहीपडहं भंभाहुड्काउलं, वेणुवीणारवुम्मिस्सहयमदलं । झल्लरीकरडकंसालरवबधुरं, धोरंगभीरभेरीनिनायुद्धुरं ॥ १ ॥

काहलारावसंबद्धखरमुहिसरं पूरियांसखसरवुत्तरवनिब्भरं ।

पलयकाले व गज्जंतघणवदयं, ताडियं सुरेहिं चाउविहाउज्जयं ॥ २ ॥

हरिसमरनिब्भरुब्भिन्नरोमंचया, केवि संशुणाहिं जिणु तियस नच्चंतया ।

अवरि वरसुराहिं मंदारकुसुमुक्करं, सुयाहिं गंधवमसलावलीकब्बुरं ॥ ३ ॥

केवि फोडिति मल्लव तिवइ सुरा, सिंहनायं च मुंचंति हरिसुद्धुरा ।

कुणाहिं गलगज्जियं अवरि हयहेसियं, केवि य किर रासयं दिति करणंचियं ॥ ४ ॥

अन्नि हरिसेण विरइति गलदहरं, केवि सुट्टाहिं ताडिंति विस्संभरं ।
 केइ कलसे य खीरोयजलपूरिए, तक्खणं निति तियसाण हत्थंतिए ॥ ५ ॥

इय जहिं सुरसंघेण निहणियविग्घेण वट्टिज्जइ सद्वायेरेण ।
 ताहिं जिणवरमज्जणि भवभयतज्जणि किं वन्निज्जइ मारिसिण ? ॥ ६ ॥

जिणाभिसेगे य वट्टमाणे सबे सुरिंदा छत्तचामरधूयकडुच्छूयपुण्णगंधहत्था पुरओ पमोयपुलइयंगा आणंदवियसि-
 यच्छा ठिया । अह अञ्जुयसुरेसरे जिणं ण्हविऊण विरए पाणयाइणो देविंदा नियनियपरिवारपरियरिया महाविभ-
 वेणं सोहम्माहिवइं मोत्तूण तीसंणि कमेण जिणं अभिसिंचंति । तयणंतरं च ईसाणिंदो भयवंतं उच्छंणे धरंतो सिंहा-
 सणे निसीयइ, सोहम्माहिवइवि चउदिसिं तित्थयरस्स चत्तारि धवलवसहे संखदलुज्जले रमणिज्जसरीरे विउवइ,
 तेसिं च अट्टसिं गगेहिंतो अट्टखीरोयसलिलधाराओ उट्ठुं गयणंगणगामिणीओ पुणो अहोनिवडणेण एगीभूयाओ
 काऊण जिणुत्तमंगे संठवेइ, अन्नेहि य बहुएहिं खीरोयकलसहस्सेहिं अभिसिंचइ, एवं कमेण निवत्तिए मज्जण महुं-
 सबे परमपमोयभरपुलइयंगो सोहम्मसुरनाहो सुकुमालंगंधकासाईए जिणदेहं लूहिऊण गोसीसचंदणुम्मीसघुसिणेणं
 अंगमालिंपइ, सियसुरभिकुसुमेहिं पूयावित्थरं विरएइ, सद्वालंकारविभूसियं च करेइ, पुरओ य ससिकलाववलेहिं
 अक्खेहिं दप्पणभद्दासणवट्टमाणकलसमच्छसिरिवच्छसत्थियनंदावत्तलक्खणे अट्टमंगलके समालिहइ, बउलतिलयकणं

वीरकुंदमल्लियासोयचूयमंजरिपारियायपसुहं पंचवणकुसुमनियमजाणुमेतं सुयह, नाणाविहमणिभत्तिविचित्तदंडेण
वइरामयकुहुच्छुएणं पवरगंधाभिरामं धूवमुत्खिवह, पज्जलंतदीविथाचक्कवालमणहरं आरत्तियमंगलपईवं च समुत्तारेइ,
एवं च कथंमि सवकायधे हरिसुक्करिसनभिरसिरनियडियकुसुमच्चियमहीयलं कोमलमुयमुणालअंदोलनमणिकंकणरवा-
उलं उब्भडकरणेगेरिंखोलिसुत्तावलिकलावयं तयणु सुरासुरोहं सव्वायेरेण जिणपुरओ पणच्चियं, नच्चिऊण भत्तिभर-
निब्भरा भयवंतं थोउं एवमारद्धा—

जय भुवणत्तयवांदिय ! लीलाचलणमगघालियगिरिंद ! भवकूवमज्झनिवडंतजंतुनिथारणसमत्थ ॥ १ ॥
परमेसर सरणागयपरूढदढवज्जपंजर जिणिंद । वम्महकुरंगेकेसरि मच्छरतमपसरदिवसर ! ॥ २ ॥
सच्चं चिय सिद्धत्थो कंहं न सामिय ! जहत्थनामत्थो ? । चिंतामणिसारिच्छो जस्स सुओ तं विसालच्छो ॥ ३ ॥
अच्चंतमविरइपरायणं पि अइयुन्नवंतमप्पाणं । मण्णेमो जिण ! जं तुज्झ मज्जणे एवमुवयारिया ॥ ४ ॥
भहं भारहखेत्तस्स नाह ! तं जत्थ पाविओ जम्मं । धरणीवि वंदणिज्जा जा वहिही तुज्झ कमकमलं ॥ ५ ॥
जइ तुह पयसेवाए जिणिंद ! फलमत्थि ता सया कालं । एवंविहपरममहं अहं पेच्छता होमो ॥ ६ ॥
इय चउविहदेवनिकायसामिणो जिणवरं थुणेऊण नियनियठाणेषु गया मोचुं सोहम्मसुरनाहं, गए य सट्ठाणं
देविंद सोहम्माहिवई कयसव्वकायव्वो जिणिंद करसंपुडेण गहिऊण अणेगदेवकोडाकोडियसिउडो गंतूण जिण-

जम्मघरंमि पडिरूवं ओसोवणिं च अवणिता तिसलादेविसमीवे निसियावेइ, एगं च पवरं देवदूसजुयलं कुंडलजुयलं च
 ऊसीसगमूलंमि ठवेइ, एगं च पंचवन्नियरणविच्छित्तिमणहरं जच्चकंचणविणिम्मियं लंबंतसुत्ताहलावचूलं लंबूसयं
 भगवओ अभिरमणनिमित्तं अवलोयमि ओलंबेइ, जं अवलोयंतो जिणो सुहेण चक्खुक्खेवं करेइ, तओ सक्को वेसमणं
 आणवेइ-जहा भो ! सिग्घमेव वत्तीसं हिरन्नकोडीओ वत्तीसं पुवन्नकोडीओ वत्तीसं नंदाइ वत्तीसं भदाइ अन्नाणि य
 विसिट्ठवत्थूणि भगवओ जम्मणभवणे उवणमेहि, सोऽवि जंभगदेवेहिं सव्वं तहत्ति निव्वत्तेइ, पुणरविदेविंदो निय-
 तियसोहिंतो सव्वत्थ एवं उग्घोसावेइ-भो भो भवणवइवाणमंतरजोइसियेवमाणिया देवा देवीओ य ! सुणंतु
 भवंतो-जो किर तित्थयरस्स तित्थयरजणणीए वा असिवमणिट्ठं काउं संपहारेही तस्स अवस्सं अज्जगमंजरिच्च
 उत्तिमंगं सहस्सहा तडित्ति फुट्ठिहित्ति, एवं च सव्वं काऊण विहिं भगवंतं पणमिऊण उण्णइओ नीलुण्णलसामल
 गयणं पुरंदरो ॥

अह उग्गयंमि दिणयरे पगासीभूयासु सयलदितासु वज्जिएसु गंभीरघोसेसु जयत्तरेसु सुहपडिबुद्धा तिसला
 पेच्छइ सव्वालंकारविभूसियं पवरसुरहिपरियायमंजरीपरिमलमिलंतालिवलयसामलियसरीरं सुरहिगोसीसचंदणरस-
 कयंगरागं जिणेसरं, इओ य सिद्धत्थनरिंदो सहरिसपधाविएण चेडीजणेण साहियतिहुयणच्छेरयरूवसुयजस्ममहूसवो
 चेडीजणरस अवणिण्यदासत्तभावो आसत्तवेणिवंछियत्थसमत्थरणरासिदाणजणियाणंदो भणइ, जह-भो पुरिसा !

गच्छह तुभे सव्वत्थ नये तिथचउक्कच्चरेसु कयवरावणयणपुव्वयं वारिवरिसपसमिययमणहरेसु कुंकुमपिजरियधर-
णियेलेसु कुणह पंचपयारपुप्फंजोवयारं, अगुरुत्तुक्कुदुरुक्कधूधमंधयारियदिसिमुहाओ पइट्टह ठाणे ठाणे कणग-
धूवघडियाओ, पवरमणिमुत्ताजालेरंहतमज्झभागे नचत्तरुणीचरणकिंकिणीकलवाऊरियदिसिमुहे गायंतगायण-
जणे ऊसियविविहवेजयंतीसहस्सोवसोहिए समंतओ समुत्तुंगथोरंथभावलीसुसिलिट्टुलट्टावबद्धे मंचाइमंचे संचएह,
पडिमवणदुवारं च विसिट्टपइट्ठाणगपइट्ठिए सहस्सपत्तपउमपिहियाणो कुसुममालुम्मालिए सरसचंदणपंपंडुरि-
ओदरे विमलसलिलपुन्ने पुन्नकुंभे निवेसह, सयलपएसेसु य कहगतालायरनडपेच्छणयाइ पयट्टावेह, नयरदुवारसु य
नवचंदणमालाउ बंधेह, जूयसहस्सं चक्कसहस्सं च उब्भवेह, उस्सुक्कं उक्करं अचाडभडपवेमं ववगयधरणिजं माणवु-
ड्डिजुत्तं विमुक्कचारगागारनिरुद्धावराहकारिनरनियरं पुरं च कारवेहत्ति, जं देवो आणवेइत्ति सविणयं पडिसुणि-
ऊण वयणं गया पुरिसा, सविसेसो य साहिओ नरिंदाएसो, तओ—

हरिसपणीच्चिरतरुणीकरंगुलीगलियमुद्धियाजालं । जालुब्भडधयमहुसित्तसंतिहोमानलाउलियं ॥ १ ॥
आउलियचित्तमगणधणलभनिमित्तविहियहलबोलं । हलबोलसवणधात्रियनरवइजणदिज्जमाणधणं ॥ २ ॥
धणावियरणसुणणीकयनिहाणपक्सित्तियसतवणिजं । तवणिज्जपुंजपिजरचीणंसुयचिंधसयरम्मं ॥ ३ ॥
रम्ममहीयलविलिहियपसत्थसत्थियसहस्ससोहंतं । सोहंतकंतपुवरनरजणकीरंतमंगलं ॥ ४ ॥

मंगलकरणवाडलपुरोहियारद्धदेवयापूयं । पूयाबलिविक्खेवणपीणियनिस्सेसपक्खिगणं ॥ ५ ॥

गणणाइकंतसमुच्छलंतमहिदूररुढनिहिनिवहं । वहबंधविरत्तपसंतलयपारंभियविलासं ॥ ६ ॥

लसुल्लासिरकुलथेरिनारिपारद्धचच्चीगीयं । गीयवियक्खणगायणसुस्सरसरपूरियदियंतं ॥ ७ ॥

इय कुंडगगामपुरं सबाहिरब्भंतरं समत्तेण । तित्थाहिवजम्ममहूसवंभि जायं सुरपुरं व ॥ ८ ॥

एवं च पुरमहूसवे पयट्टे समाणे सिद्धत्थनारिदो ण्हाओ कयालंकारपरिग्गहो नियंसियमहग्घपहाणवत्थो निसण्णो ज-
त्थाणमंडवे, एत्थंतरे समागया मंतिसामंतसेट्ठिपमुहा विसिट्ठलोया, निवडिया चलणेसु, भणिउमाढत्ता य-देव ! विजएणं
धणागमेणं रज्जवित्थारेणं सरीरारोगत्तणेणं वद्धाविज्जह तुब्भे, जेसिं तिहुयणेक्कचूडामणी नियकुलनहयलमियंको एसो
पुत्तो पसूओत्ति जंपिऊण समप्पियाओ तेहिं पवरकरितुरयरयणरासीओ, राइणावि ते सम्माणिरूण पुण्णत्तयंगंयालं-
काराइदाणेण विसज्जिया नियनियट्ठाणेसु, खणंतरेसु य दंसणसुओ पत्थावसुवलब्भ पत्थिवो उट्ठिओ अत्थाणाओ, गओ
य मणिकुट्ठिमलिहिज्जमाणसुरंगरंगावलीसत्थियं दुवारदेसनियेसियलोहरक्खं उब्भवियमहंतमुसलजूसरं विविहरक्खा-
परिक्खेवसस्सिरीयं जिणजम्मणभवणं, दिट्ठो य तत्थ रयणरासिच्च सरयदिणयोव एगट्ठियसच्चतेयपुंजोच्च समुज्जोइय-
मंदिरब्भंतरो जिणवरो, तं च दट्ठण चित्तिउमाढत्तो-अहो पढमदिवसजायस्सवि अपुच्चा सरीरकंती अनणसरिरु-
वसंपया अविभावणिज्जं लायणं निम्मेरसुंदरं अमगं सोहगं, ता सच्चहा पुण्णपगरिसागरं मम कुलं जत्थ पसूयमेवं-

विहं पुत्तरयणंति विभाविकुण भणिआ तिसलादेवी—

येच्छसु नियसुयपसरंतकतिपब्भारविजियपहपडले । कज्जलसिहाणदीवे परिगोविंतोव अत्ताणं ॥ १ ॥

पुवं बहुसोवि मए दिट्ठमिमं मंदिरं विसालच्छि ! । किं तु पमोयमियाणिं किंपि असरिच्छमावहइ ॥ २ ॥

संजुणियचामीयरचुण्णयसरिसेण कंतिनिवहेण । एगसरूवा कीरंति उभयगिहचित्तिभित्तीओ ॥ ३ ॥

इय एवमाइकहाहिं नारिंदो देवी य विगमिज्ज भगवओ पढमंदेवसियं ठितिवडियं करिति, तइयदिवसे य तरुणतरणिताराहिचविवाइं दंसेति, कमेण य जाए छट्ठवासरे रायकुलसंवड्डियाहिं अविणट्टलट्टपंचिदियाहिं नीरोग-सरीराहिं जीवंतपाणनाहाहिं कुंकुमंपकालितवयणकमलाहिं कंठकंदलावलयियसुरहिमालइमालाहिं कुलविलयाहिं अचं-तजायचिन्तसेतोसाहिं जागरमहूसवं पयट्टेइ, आगए य एक्कारसदिवसे जहाभणियविहाणेण सुइजायकम्ममवणंति, बारसदिवसंमि नाणाविहवज्जणसमेयं बहुप्पगारखंडखजपरियुन्नं विविहपाणयपरियरियं सुगंधगंधद्वेयणसूयसंपन्नं रसवइं निव्वत्तावेति, तयणंतरं कारियणहाणविलेवणालंकाराणं नायखत्तिथाणं पणयजणपुरप्पहाणलोकाणं परमायेण भोयणं पणांमेति, खणंतरेण य आयन्ताणं सूइभूयाणं वीसत्थाणं सुहासणगयाणं तत्थ गंधमल्लालंकारेहिं सम्माणियाणं तेसिं पुरओ सिद्धत्थनराहिवो एवं वयासी—भो भो पहाणलोया ! पुवंपि मम एस संकप्पो समुप्पजित्था जहा—जहि-वसं एस कुमारो देवीए गब्भं संकंतो तद्विसाओवि करितुरयकोसकोट्टागारज्जेहिं सुहिसयणपरियणेहिं परम

बुद्धिमहमुवागओ, अओ मए एयस्स वद्धमाणोत्ति नामधेयं कायच्चति, तम्हा इयाणिंपि तुम्ह समक्खं एयमेव नामं
 हवउत्ति, तेहिं भणिंयं-देव ! जुत्तमेयं, गुणनिप्पन्ननामधेजे विज्जमाणंमि कीस न जहट्टियमभिहाणं कीरइत्ति ?
 एवं तेहिं जंषिए पइट्टियं जयगुरुणो वद्धमाणोत्ति नामं, जाओ परमप्पमोओ, पुरंदरेणावि अयलो भयभेरोवसग्गेहिं
 खंतिख मो य इतिकारुण वरं महावीरोत्ति नामधेयं से कयंति, इय निव्वत्तिचाभिहाणो सुरसंकाभियकाभियपवर-
 रसाए निययंगुलीए पाणेण कयभोयणकायच्चो जयगुरु पंचहिं धावीहिं परियरिओ अंतउरीजेण सायरं चेव ला-
 लिज्जमाणो अम्मापियरोहिं बहुप्पयारं चरणचंक्रमणं काराविज्जमाणो चेडचडयरेणं पइक्खणमुल्लाविज्जमाणो सायरं
 देवदेवीविंदेण पज्जुवासिज्जमाणो निरंतरं गीएहिं गिज्जमाणो पाढेहिं पढिज्जमाणो चित्तेहिं उचलिहिज्जमाणो दंसणू-
 सुएहि लोएहिं अहमहमिगाए पलोएज्जमाणो गिरिकंदरगउच्च कप्पपायवो वह्णिउमारद्धोत्ति कमेण य पडिपुन्न-
 सरीरावयवो ताविच्छगुच्छसच्छहरुढसिणिद्धमुद्धरुहसिंहडो विमुद्धपबुद्धबुद्धिपगिसागिट्टुभासाविससविसारओ
 पडिपुन्नसुयसायरपारगामी ओहिन्नाणमुणियचक्खुगोयराइकंतवत्थुवित्थारो अतुच्छमुइनेवत्थधरो सयल्लोयल्लोयणाणं-
 दज्जणणं दंसूणट्टवरिसपज्जायं कुमारत्तणमणुपत्तो समाणो भयवं बालभावसुलहत्तणओ कीडारइए अणेगेहिं समव-
 एहिं मंतिसामंतसेट्ठिसेणावइसुएहिं खेड्विहिवियक्खणेहिं समं पारद्धो रुक्खखेड्डेण अभिरमिउं, तत्थ य एसा
 ववत्था-जो रुक्खेसु सिग्घं आरुहइ उत्तरइ य सो सेसाइं डिंभाइं पट्ठीए आरुहिज्ज वारहेइ, इओ य सोहस्से

देवलोए सोहम्माए सभाए अणेगदेवकोडियखुडस्स सहस्सनयणस्स पुरओ जायंतसु तियसेहिं समं विविहसमुल्लापेसु धीरत्तणगुणवन्नणपत्थावे भणियं पुरंदरेण-भो भो सुरा ! अपुवं किंपि भयवओ वद्धमाणसामिस्स बालत्तणमणपत्तस्सवि धीरत्तणं सरीरपरक्कमो य, जं न तीरइ केणावि बलपगरिसकल्लिएण देवेण दाणवेण वा समयेव पुरंदरेण वा भेसिउं, परक्कमेण वा पराजिणिउंति । एवं च निसामिऊण एणो सुरो अंचंतकिल्लिट्ठचित्तत्तणओ अतुच्छमिच्छतुच्छाइय-वियेयत्तणओ य चित्तिउमारद्धो, कहं ?—

जह तह जंपियरम्मं सच्छंदुद्दामचिट्ठियसणाहं । मुक्काववायसकं धन्ना पावंति सामित्तं ॥ १ ॥

किं संभविज्ज एयं जं बालंपिहु न खोभिउं सक्का । अविचित्तिणिज्जमाहप्पसालिणो देवदणुवइणो ? ॥ २ ॥

अहवा हत्थट्ठियकंकणस्स किं दप्पणेण परिमिणणं ? । गंतूण सयं चिय तस्स धीरिमं लहु परिक्खामि ॥ ३ ॥
एवं संकप्पिऊण जत्थ सामी अभिरमइ तत्थ आंगंतूण तरुवरस्स हिट्ठओ खोमणत्थं एणं महापमाणसरीरं अंज-
णंगुंजगवल्लुगुलियापडलकसिणप्पभोलिसामालियवणनिगुंजं तंबचूडचूडाईरगरत्तलोयणं विज्जुदंडचंचललतलोली-
हाजुयलं उक्कडकुडिलवट्टुलकक्खडफडाडोवकरणदच्छं जुगक्खयलुभियसमीरघोरघोसं अणाकलियपयडरोसेवगं
तुरियगमणं संसुहमित्तं दिव्वमहाविसं सप्परूवं विउवइ, सामीवि तं तहारूवं लीलाए अवलोइऊण जुम्भरज्जुखंडं व
वामहत्येण उहं दूरे निच्छुभइ, ताहे देवो विचिंतइ-एसो एत्थ न ताव छल्लिओ । अह पुणोऽवि सामी तिंदूसएण

अभिरमइ, सो य देवो धिट्टिममवलंविऊण आगामियमवायमविभाऊण य बालयरूवं विउविऊण सामिणा सद्धिं
रमिउमारद्धो, अह जिणेण वियक्खणत्तणओ पराजिया सवेऽवि बालगा पट्टिए समारुहिऊण समाढत्ता वाहिउं,
अह वाहिएसु सयलेसु तेसु समागओ सुरकुमारस्सवि वारओ, पणामिया तेण सहरिसं पट्टी, आरूढो य तत्थ वद्ध-
माणसामी, तओ सो देवो सामिभेसणद्धं तं पिसायरूवं विउच्चित्ता पवट्टिउमाढत्तो, केरिसं पुण तस्स रूवं?—खरफ-
रूसा सूयरवालसन्निभा से केसा घडीसंठाणसंठियं उत्तिमंगं उट्टियाकमल्लखल्लयमज्झं निडालवट्ठं कविलजडिललोमाओ
भमुहाओ, मरुक्खयंगंभीरं पुरंतपिंगलपभाजालं लेयणजुयलं, जमल्लुल्लिमहल्लं चिविडं च नासापुडं, रुंदगिरिकंदरा-
गारं कवोलमंडलं, घोडगपुच्छसच्छहाओ दाढियाओ, करहस्स व दूरपलंविं ओट्टुजुयलं, कुंजरस्स व बाहिं निग्गया
कुडिलभीसणा दसणा, अनिलंदोलियपडायच्च चंचला निसियकरवालीहा जीहा, सुक्कखाणुसरिसा कंधरा, कोट्टिगा-
णुरूवाओ दोवि वाहाओ, सुप्पचप्पडं पाणिसंपुडं, सिलापुत्तगोवमाओ करंगुलीओ, पुराणसिप्पिपुडरुक्खा अंगुलीणं
नहा, पयडनसाजालजडिलं पंसुयंतराले पमुत्तघोरंतविसहरं उरट्टिपुंजरं, अलंजरगारं उयरं, मुट्टिगेज्जा टाणट्टाणभग्गा
कडी, वालुंकीफलपलंविरा वसणा, करिवंगण्णरूढं मेढं, दीहवीभच्छाविवन्नरोमावलीपरिखित्तं तालतरुदीहरं जंधा-
जुगं, नीसाहपत्थरविच्छिन्ना चलणा, कुदालदारुणा चरणंगुलीणं नहा । अवि य—

विगरालविडंविद्ययणकंदरुगिरियजलणजालोहं । चलणतलपहयभूयलचालियपासायसिहरगंगं ॥ १ ॥

उद्धृपसारियदीहतरभुयगगलाखलियसूरहपसरं । परिमुक्कमहंतदृढहासपायडियदढदाढं ॥ २ ॥
 कंठपलंबिरपयतलविलगबीभच्छसरडवणमालं । नउलकयकणपूरं जन्नोइयकयमहासण्णं ॥ ३ ॥
 उक्कात्तियचित्तयचम्मनिवसणं रुहिरमंसलित्ततणुं । अइधोरजराजज्जरअयगरपरिवद्धखंतलं ॥ ४ ॥
 पइसमयमुल्लंतं नच्चंतं कहकहंति पहसंतं । उक्काट्टं च करितं भीसणसहेण भासंतं ॥ ५ ॥
 इय तस्स भीसणं जिणवरेण दिट्ठं महापिसायस्स । पइखणविवहुमाणं रूवमसिमहतमसामं ॥ ६ ॥
 तथो सुणियकइयववियारेण जिणेण सव्वाहा असंभंतेण सो पहओ हेलाप पट्टियट्ठमि मुट्ठोए, करयलकुलिसज्जिणि-
 यसराराभिघाओव्व विरसमारसंतो झडत्ति पत्तो मडहत्तणं, निरुक्कमकायत्तणओ चेव न सयसिक्करमुवगओ, नवरं
 निच्छियसुराहियइववणो जायपच्छायावो नियदुच्चरियच्चुन्नियगो सवायरं पणमिऊण जिणं पटिउमाढत्तो—
 हा दुट्ठ दुट्ठ तइलोयनाह ! एयं मए समायरियं । सच्चं पि न सद्दहियं सहस्सनथणस्स जं वयणं ॥ १ ॥
 तस्सऽणुरूवं संपइ संपत्तोऽहं फलं इमं भीमं । अवगन्निग्रुगुवयणाण अहव किर केत्तिं एयं ? ॥ २ ॥
 संसारमहाभयमवि जो तं विद्दवसि देव ! लीलाए । अह्मारिसे भयकरे तुह तस्स हवेज्ज का गणणा ? ॥ ३ ॥
 तथा—चलणंगुलिचालियकणयसेल डोलियमहल्लमहिगोल । जस्स किर बाललीलाइयं पि चित्तं चमक्केइ ॥ १ ॥
 तस्सविय तुज्झ तइलोक्कनाह ! जो विक्कमं न याणामि । सो नाममेत्तओ चिय विबुहोऽहं न उण किरियाए ॥ २ ॥

एवंविहस्स दुविणयविलसियं खमसु एक्कवारं मे । पर्यईएऽवि हु जं पणयवच्छला हुंति सणुरिसा ॥ ३ ॥
 इय खामित्ता भुवणेक्कबंधवं पणमिऊण सो तियसो । गयणयलं उप्पइओ चलंतमणिकुंडलामरणो ॥ ४ ॥
 भयवंपि खणं एक्कं कीलित्ता ताहिं ताहिं कीलाहिं । चेडसुहडंगरक्खेहिं परिबुडो नियगिंहमि गर्जो ॥ ५ ॥
 अह समहिगऽट्टवच्छरणजाए जयगुरुमि जायंमि । हरिसियमणो नरिंदो तिसलाए पुरो इमं भणइ ॥ ६ ॥
 देवि ! कुमारो संपइ गहणसमत्थो कलाकलावस्स । वट्टइ ता उवणिज्जउ लेहायरियस्स पढणत्थं ॥ ७ ॥
 इय भणिए देवीए जएक्कनाहो महाविभूईए । ण्हविओ पसत्थतित्थुत्थसलिलभरिएहिं कलसेहिं ॥ ८ ॥
 नासानीसासोज्झं चक्खुहरं हरिणलंछणच्छात्रं । परिहाविओ य पवरं सुकुमारं देवदूसजुयं ॥ ९ ॥
 मणिमउडकडयकुंडलतुडियपमोक्खेहिं भूसणेहिं च । सुवरसमप्पिएहिं अलंकिओ तक्खणं चेव ॥ १० ॥
 सिद्धत्थनरिंदेणवि नीसेसकलाकलावकुसलमई । अज्झावगो महप्पा वाहरिओ निययभवणंमि ॥ ११ ॥
 एणं महप्पमाणं ठवियं सिंहासणं च तस्स कए । अन्नं च थेववित्थसुवणीयं जयगुरुनिमित्तं ॥ १२ ॥
 अह जाव नोवणिज्जइ सामी अज्झावगस्स पढणत्थं । सक्कस्स ताव चलियं सिंघासणममलमणिरुहरं ॥ १३ ॥
 ता ओहिन्नाणेणं मुणिउं जयनाहपढणवुत्तंतं । चित्तेइ अहह मोहो कह विलसइ जणणिजणगाणं ? ॥ १४ ॥
 जं सयलसत्थपरमत्थज्जाणं जयगुरुंपि पढणत्थं । अज्झावगस्स संपइ समप्पिउं अभिलसंतित्ति ॥ १५ ॥

सको इय चिंततो आंगतूणं महप्पमाणंमि । सिंहासणंमि ठविउं नाहं परमाएँ भत्तीए ॥ १६ ॥
वंदिता जोडियपाणिसंपुडो सदसत्थपरमत्थं । आपुच्छिउं पवत्तो सामीऽविय वोत्तुमारद्धो ॥ १७ ॥

सोऽवि उवज्झाओ परमं विम्हयमुव्वहतो तं कहितं एगगचित्तो निसामेइ, जणजिजणगाइणो य विम्हियमणा जाया । अह सदसत्थपयत्थे कहिऊण ठिओ, ताहे सक्केण साहियं तेसिं-जह जाइसरणाणुगओ आगब्भवासाओऽवि नाणत्तयपरिगहिओ एस भयवं, पाणिपइट्ठियं लट्ठमाणिं व सबं वत्थुं नियमईए मुणइ, ता किमेवं अणत्थओ सरंभो कओ ? एवमायन्निऊण विम्हियमणा परं पमोयमुवगया जणजिजणगा, पुरंदरोऽवि जिणं नमिउं दिवं गओ, तेण पुण उवज्झाएण जे केऽवि पयत्था भयवओ वागेरंतस्स सम्ममवधारिया तयणुसारेण सुसिलिट्ठं विरइयं इंदवागरणंति । भय-वंपि निरुवसग्गं कमेण पत्तो तरुणत्तणं, तयणुभावेण य तस्स सुसिणिद्धसुहुमकसिणकुंचिरकेसपासेण विराइयं छत्ता-गारमुत्तिमंगं, सवणमूलावलेविणा नालेणेणं व नयणजुयेलेणोवसोहियं वयणं, अच्चंतसस्सिरीएण रयणेणं व सिरिवच्छेण पसाहियं कणयसेलसिलापिहुलं वच्छत्थलं, गंभीरदक्खिणावत्ताए सण्णुरिसिचित्तवित्तीएव्व नाभीए अलंकियं झसाणु-रुवमुयरं, हंसतणुरुहकोमेलहिं लेमेहिं करिकराणुरुवं मंडियं जंधाजुयलं, अंगुलीदलगविष्णुरंतनहावलीए चिंताम-णिपरंपराएव्व सोहियं जयपडागामगरमच्छाइलक्खणलंछियं चरणकमलं ।

अन्नं च-भाधिरमपायमासंकिऊण मन्ने जिणस्स पढमंपि । हिययाओ नीहरिउं ठियं व केसेसु कुडिलत्तं ॥ १ ॥

रागोचिहु थ्रेवुप्पन्नपणयभावोऽवि भाविभयभीओ । बाढं कुणइ व वासं करचरणतलाधरतलेसु ॥ २ ॥

एवं च भयवंतं तरुणत्तणसुवगयं रूवविणिज्जियदेवदाणविंदसंदोहं नाऊण सेसमहीवईहिं नियनियधूयापाणि-
ग्गहत्थं पेसिया वरगपुरिसा सिद्धत्थनरिंदसमीवे, विन्नत्तो य तेहिं राया, जहा-देव ! अम्हे वद्धमाणकुमाररूवाइरेगरं-
जियमणेहिं नरिंदेहिं अप्पणप्पणधूयावरणत्थं तुम्ह सगासे पेसिया ता साहेह किमिह पच्चुत्तरं ? रत्ता जंपियं-सम्म-
मालोचिऊण कहिस्सं, वच्चह ताव तुब्भे निययावासेसु, एवं भणिए अवक्कता ते पुरिसा, नरिंदेणवि साहिओ एस
वइयरो तिसलादेवीए, एवं च आयन्निऊण हरिसभरनिब्भराए जंपियं तीए-देव ! तुम्ह पुत्तपसाएण पावियाइं
मए पावणिज्जाइं, अणुभूयाइं अणुभूयपुच्चसुहाइं, जइ पुण इण्हि तस्स वीवाहमहूसवं पेच्छामि ता कयकिच्चा
होमि, रत्ता वुत्तं-जइ एवं ता देवि ! वच्चसु कुमारसमीवं, पन्नवेसु य तं विवाहनिमित्तं, देवीए भणियं-महाराय !
न जुज्जइ पढमं चिय तत्थ मह गंतुं, लज्जापहाणो हि कुमारजणो होइ, ता सिक्खविऊण पेसिजंतु तप्पणइणो, एवं
वुत्ते रत्ता पेसिया कुमारसमीवे पाणिग्गहणपडिवज्जावणत्थं पणइणो, तेहि य गंतूण सविणयं जयगुरुणो साहिओ
तदादेसो, तं सोच्चा भगवया भणियं-भो महाणुभाव ! किं न सुणह मम चित्तवित्तिं ? नोवलक्खह विसयविरागं ?
न जाणह गिहवासपरिहरणाभिलासं ? जेणवसुल्लवह पाणिग्गहणविसए, तेहिं भणियं-कुमार ! सुणेसो सच्चं, किंतु
अणुवत्तणिज्जं अम्मतायाण वयणं अलंघणिज्जा नियपणइणो, न खलुदुल्लहो पच्छिमकाले गिहपरिचायभावो, न थावि

पुण्यमणोरहा पडिकूलिस्सति पुणो तुम्हाभिर्पेयं अम्मापिउणो, भगवया भणियं-पाणिग्गहणमंतरेणावि पुच्चं चिय
अब्भुवगयं मए इमं-जं न जणणीजणगेसु जीवंतेसु सवविइं पडिवज्जिस्सामि, ता जइ एवं ठिए मइ संतोससुव्व-
हंति जणणिजणगा किमकक्षाणं हवेज्जा?, का वा पाणिग्गहस्स लट्ठया?, जेण पेच्छह पयडच्चिय विवाहसमए कलस-
परंपराठवणमिसेण दंसिज्जइ उत्तरोत्तरदुहाण पावपबंधो, पज्जलंतजलणच्छलेण पयडिज्जइ महामोहवियंभणं, गयणय-
लविलसंतधूमपडलनिभेण कहिज्जइ अत्तणो लहुयत्तणं, चउमंडलगावत्तणवएसेण परुविज्जइ चउगइयं संसारभमणं,
वयमहुपसुहवत्थुहुणकवडेण दाविज्जइ सयलगुणगणदहणं, तरुणीजणभिणिज्जमाणमंगलउउमेणरियंउगिरियंभाविज्जइ
चाउहिंसमजसो, कंठावलंबियकुसुममालामायाए परुविज्जइ समीववत्तिणी दुक्खदंदोली, चंदणरसंगरागमिसेण सुइज्जइ
तक्खणं चिय कम्ममलावलेवो, कन्नगापाणिग्गहणकइयेवण दाविज्जइ अट्ठकम्ममहामोहभंडकिणणत्थं हत्थसन्नंति ।

किं बहुणा?-जं जं विवाहसमए विहिं पलोएमि सुहुमबुद्धीए । सो सो चित्तिज्जंतो रोमुद्धोसं जणइ मज्झं ॥ १ ॥

ता सुयह मोहपसरं अणुजाणह मं विणा विवाहेण । एवं चिय निवसंतं अम्मापिउनिव्वुइकएण ॥ २ ॥

एवं भणिए पट्टणा तो ते जंपंति विणयपणयंगा । तुम्हारिसाण काउं एयं नो जुज्जइ कुमार! ॥ ३ ॥

पणइयणपत्थणाभंगभेरुणो जं सयावि सणुरिसा । निक्कज्जपवित्तिपरंमुहा य पयइए जायंति ॥ ४ ॥

तहा-किं उसभजिणवरेण पाणिग्गहणाइ नो कयं पुट्ठिं? । किं वा न चक्किलच्छी परिमुत्ता संतिपसुहेहिं? ॥ ५ ॥

इय एवं जंपतेसु तेसु कंचुइजणेण परियरिया । तिसलादेवी सयमेव आगया भगवओ मूले ॥ ६ ॥

अह सत्तट्ट पयाइं अणुगतं संसुहं जिणो तीसे । आसणदाणप्पमुहं पडिवत्तिं कारवइ सच्चं ॥ ७ ॥

अणोणघडियकरसंपुडं च देविं पडुच्च भगवंतो । जंपइ अम्मो ! साहह आगमणं किंनिमित्तंति ॥ ८ ॥

देवीए जंपियं-पुत्त ! तुह दंसणाओऽवि किमन्नं निमित्तं ? जओ एत्तिएण वसइ जीवलोगो भरियं दिसावल्लयं सुहावहा रायलच्छी संतोसमावहइ गेहं निवुइ उवजणइ पणइजणो विगयंधयारं तिहुयणं, ता किमवरं वरं सोहेमि निमित्तंति, एवमाइन्निउण भगवया चित्तियं-अहो अणाइक्खणिज्जो कोऽवि जणणीजणस्सावचे सिणेहो, अतुल्लं किंपि वच्छल्लं, असरिसा कावि अवलोयणाभिरई, जं सया चक्खुगोयरएवि मए अम्भा ईसिअहंसणेऽवि संपइ एवं संतप्पइत्ति विगप्पिऊण पुणी भणिया देवी-अम्मो ! तहावि साहेसु किंपि पओयणं ? तिसलाए भणियं-पुत्त ! जइ एवं ता पडिवज्जसु विवाहमहूसवं, जओ एयनिमित्तं एसो पणइजणो अम्हेहिं तुज्झ पासे पेसिओ, तुह विवाहुक्कंठिओ खु नराहिवो नयरजणो य, ममावि एत्तियमेव संपयं अपत्तपुद्वं सुहं, पडिपुन्ना सुहाणुभावेण सेसमणोरहत्ति, भगवयवि आगव्वकालओऽवि मम एस पइन्नाविसेसो-जं अम्मापिऊणं अप्पत्तियकारिणी पव्वज्जावि न कायव्वत्ति चित्तिऊण निरभिलासेणवि अन्नुवययं तथाइट्ठं, परिट्ठा य देवी समं परिजणेण, निवेइओ एस वइयरो नरिंदस्स ।

एत्थंतरे सिद्धथरायपुवट्ठिओ पडिहारो निवडिऊण चलणेसु विन्नविउमाढत्तो य-देव ! समरवीराभिहाणराइणो दूथो

दुवारदेसे तुम्ह दंसणसुओ चिट्ठइ, तत्थ को आएसो?, राइणा भणियं-लहु पवेसेहि, जं देवो आणवेइत्ति भणिऊण पवेसिओ पडिहारेण, पणमिओ य तेण राया, उवविट्ठो य दिन्नासणो, पत्थावे य पुट्ठो नरिंदेण, जहा-भइ! किं आग-मणकारणं?, दूएण भणियं-देव! निसामेसु, अत्थि निसोभापराजियकुबेरपुरे वसंतपुरनथरे समरंगणपरितोसिय-सुरउच्छरासत्थो जहत्थाभिहाणो समरवीरो नाम राया, तस्स य नियपाणनिव्विसेसा पउमावईए पणइणीए कुच्छि-संभूया जसोयानाम कन्नगा, सा य कहं जसोयत्ति नाममणुपत्तत्ति निसामेह कारणं, किर इमीए जम्मसमए देवो समरवीरो रयणीए सुहपसुत्तो पभायसमए सुमिणं पासइ-जहाउहं अंगरक्खिगापरिक्खित्तगत्तेहिं विविहपहरणकरेहिं सुहडेहिं परिकरिएहिं तरलतुरंगमेहिं गुडियाहिं गयघडाहिं नाणाविहपहरणजोहजुत्तेहिं पहाणरहवरेहिं पस्वेदिओ संयंयि मत्तकुंजराधिरूढो उज्जाणमइगओ, तत्थ य ठियस्स सहसच्चिय पाउब्भूओ हलबोलो, अंतरंतरा नच्चत्ति केऽवि सुहडा केऽवि पलायंति केऽवि य महीयले धूलीधूसरा रलति पडति विजयचिंथाइं विहडंति जयतूराइं, एवं च असमंजसं दट्ठण मए इओ तओ डोछंतं गहियं नियछंतं हत्थेण, पत्तो एगो महाविजयद्धओ, सोऽवि संठ-विओ सारिओ य, एवंविहं च सुविणं पासित्ता पडिबुद्धो संभंतचित्तो पभायसमए सुमिणपाढगे सदावेत्ता तेसिं सुमिणं परिकहेइ, तेहि य सिट्ठ-देव! पंचहिं कारणेहिं सुमिणोवलंभो हवइ, तंजहा-अणुभूएण दिट्ठेण चित्तिएण पयइवियारेण देवयावसेण वा, तत्थ न सुणिज्जइ तुम्हाणं एएहिंतो केणावि कारणेण सुमिणोवलंभो जाओत्ति, राइणा

मणियं-एवमेयं, न सम्मं उवलब्भेमि कारणं, तेहिं वुत्तं-जइ एवं ता करेह सच्चं सुविणंगं, जहा दिट्ठिइए सव्वसा-
मरिं काऊण गच्छह उज्जाणं, को दोसो?, न सुणिज्जइ कोऽवि परमत्थो, एवंपि कीरमाणे कयावि गुणो होज्जा,
साभिप्पाओ य किंपि एस ङोळंतच्छधरणविजयचिंधलाभोत्ति वुत्ते राइणा पडिवज्जिऊण तेसिं वयणं ताडाविया
सन्नाहभेरी, तीए सद्दायन्नणेण तक्खणादेव कयसव्वसंनाहो नरवइसमीवमुवगओ सामंतवग्गो परिचत्तसेसवाचारो
पुरो ठिओ जोहसमूहो, पासमल्लीणा करितुरयाइणो, तओ चाउरंगबलकलिओ पहाणहत्थिकंधराधिरूढो नयरदूरव-
त्तिणं गओ नंदणुज्जाणं, तत्थ य रयणिदिट्ठसुमिणभीसणत्तणं चिंतेतस्स तक्खणफुरियवामनयणपिसुणियानिट्ठघड-
णस्स किंपि अरइविगारमणुसालीणस्स बज्झवित्तीए काणणमणुपेच्छंतस्स नरिंदस्स सच्चिय पुव्वदिणपेसियचारपुरिससू-
इयपत्थावो चिरपरूढवेरसाहणगाढामरिसो अमुणिथतद्विद्वसनरवइवइयरो जुज्झसज्जो पच्चंतसामंतो दुज्जोहणाभि-
हाणो पहुत्तो उज्जाणसमीवं, दिन्नो परिवेढो, जाओ हलबोली, लक्खियतदागमणो य निगओ उज्जाणवाहिं नरिंदो,
दिट्ठो य पडिरिउणा संगामसज्जो राया, तओ किं वियाणियं ममागमणमणेणति खुभियचित्तेणवि दुज्जोहणेण पारइ-
रन्ना सह पहरिउं । अह-

निसियखगकप्पियपयंडं नरमुंडमंडियाभोगं । दट्ठोद्वद्धमोगरनिप्पिट्ठुक्किट्ठुरहनिवहं ॥ १ ॥

कुंतगभिन्नकुंजरकुंभत्थलगलियमोत्तियसमूहं । तक्कालमिलियवेथालकिलिकिलारावभयजणंगं ॥ २ ॥

निवडंतछत्तधयचिंधनिचयसंछन्नमेइणीवट्टं । उत्तट्टसहत्थिविहम्ममाणनियपवरपरिवारं ॥ ३ ॥
करितुरयथायनिस्सरियरुहिरपूरिज्जमाणमहिगतं । रणदूरदुन्नच्चिरकबंधयेच्छणधभीसणयं ॥ ४ ॥
इय धोरसमरवावारमेक्केहलाए काउमच्चिरेण । सिरिसमरवीरणणा बद्धो सो नागपासेण ॥ ५ ॥
भणिओ य सुमर रे इट्टदेवयं एस वट्टसि जमस्स । संपइ पाहुणगो तं दुच्चरियरहमि आरूढो ॥ ६ ॥
दुज्जेहेणेण भणियं भो नरवर ! कीस वाहरसि एवं ? । पारंभे चिय समरस्स सुमरणिज्जं मए सरियं ॥ ७ ॥
नियकुलकमाणुरुवं अणुचेट्टसु संपयं विगयसंको । देहेण कयं देहोऽवि सहउ को एत्थ अनुतावो ? ॥ ८ ॥
एवं च आयन्निऊण पडिवन्नकरुणाभावेण समरवीररत्ना नीओ नीयमंदिरं, उच्छोडिया बंधा, काराविओ ण्हाणभो-
यणाइयं, समप्पियाइं समरगाहियाणि करितुरयाइणि, तेणावि अंगीकया सेवावित्ती, तओ जाओ राइणो परमसं-
तोसो, पसरिओ चाउदिसिं जसोत्ति, भणियं च रत्ना-अहो मम इमीए कन्नगाए पसवकालेऽवि एरिसो जसो दिण्णो,
तम्हा होउ एयाए जसोयत्ति जहत्यभिहाणंति वुत्ते महया रिद्धिसमुदणं कयं एवमेव से नामं ।
अह सा चंदलेहव्व वट्टती पत्ता कमेण जोव्वणं, अन्नया पुट्ठो राइणा नेमित्तिओ-को इमीए पाणिग्गाहो भविस्सइत्ति ? ,
तेणावि साहियं-देव ! सिरिवच्छलंछियवच्छयलो सयलसुरासुरनभियकरकमलो अट्टसहस्सलक्खणधरो पुरिसप्पवरो नि-
च्छियं एयाए पई होहित्ति, एवं निउणिए ठिओ नरिदस्स हियए तुम्ह कुमारो, तओ आइओ मेघनाओ नाम सेणावई

समप्पिया तस्स जसोयकन्नगा, दिन्नो संयंवरविवाहजोगो महंतो हयगयकणगाइविच्छड्डो, भणिओ य जहा--मह ! गच्छसु तुरियं, कारेवसु पाणिगहणमहिमंति, तओ नरवइवयणाणंतरेव चलिओ अक्खलियपयाणगेहिं एसो, अहं पुण एयकज्जनिवेयणत्थमेव पढमं चिय तुम्ह पासे पेसिओत्ति, ता देव ! एयं तं आगमणकारणं । रत्ता भणियं--मह ! सम्मं कयं, अणुरूवमेयं, पयट्टिज्जउ अकालपरिहीणं वंछियत्थो, दूएण जंपियं--देव ! कहं न पयट्टिज्जइ जेण विवाह-लगंमि आसन्नं वट्टइत्ति वुत्ते रत्ता सेसनरवइवरगपुरिसा सम्माणिऊण विसज्जिया नियनियट्टाणेसु, अन्नदिवसे य समागया सा रायकन्नगा वद्धाविओ नरिंदो दवाविओ तीसे निवासनिमित्तं समुत्तुंगसत्तभूमिगो पासाओ पेसिया रसवई काराविंया अन्नावि तक्कालोचिया पडिवत्ती, पसत्थमुत्ते य कयपवरसिंगारो अणेगसाभंतसुहडपरिबुडो आगओ मेहनाओ सेणावई, पणमिओ अणेण राया, पुच्छिओ य कुसलोदंतं, राइणाडवि तस्स दवाविंयं आसणं तंबोलाइदान-पुब्बयं च पुट्टो समरवीरनरेसरसीरकुसलवत्तं, सविणयं साहिया य तेण, अह विविहसंकहाहिं गमिऊण खणसकं रत्ता अब्भणुन्नाओ समाणो उट्ठिओ मेहनाओ, गओ य निययावासे, समारद्धो विवाहोवक्कमो, वंधाविया मंचा, जहोदियं विरइयाइं आसणाइं, निरुविया विविहकम्मेषु किंकरा, परिकप्पियं वेइगाविमाणं । तं च केरिसं ?--

मरगयमणिचच्चिकिय सुवण्णवरकलसविरयणारम्मं । अइनिम्मलरंभागब्भसंभउद्धयविजयपडं ॥ १ ॥

परिसुक्कसुमंजोवयापरिभमिरभमरवसुहरं । निम्मलमुत्ताहलभरियचारुमणिओट्टिमचउकं ॥ २ ॥

चउदिसिविसुकदण्णपडिबिबिधकामिणीवयणकमलं । ठाणट्ठाणनिवेशियवरमणिपडिहणियसंतमसं ॥ ३ ॥

गरुडमणिपसरियकिरणपडलविच्छुरियमहियलाभोयं । नवगोभयरसलित्तं व रेहए वेइयाभवणं ॥ ४ ॥

एवं च निवृत्तिज्जणं तक्कालोचियकायवं मेहनोहेण कहावियं सिद्धत्थन्नो, जहा-समीवमागयं वट्टइ पसत्थं हत्थ-
गहणमुहुत्तं, ता कुमारं धेत्तूण सिग्घमागच्छहत्ति । राइणावि एवमायन्निज्जण भणिथा तिसला-देवि ! सिग्घं करोहि
कुमारस्स पुंखगाइ कायवं, आसन्नो वहइ समओत्ति, एवं सोच्चा देशेए परमायरेण विविहप्पयारेहिं मंगलसहपुरस्सरं
पुंखिज्जण सबोसहीहिं ण्हविओ कुमारो, नियसाविओ महामोल्लं धवलदुगुल्लजुयलं, काराविओ सवं कायवविहिं,

अविय-गोसीससुरभिचंदणविलेवणापंडुरो जिणो सहइ । सरयनिसायरजोणहए धवलिओ कंचणगिरिच्च ॥ १ ॥

कसिणवणकेसपासो रेहइ सो कुसुमगुच्छसंछन्नो । पञ्चुरियतारतारोवसोहिओ गयणभागोच्च ॥ २ ॥

सट्ठाणपिणद्धविचित्रयणनवभूसणब्भहियसोहो । जंगमभावमुवगओ रोहणसेलोच्च पडिहाइ ॥ ३ ॥

साभावियावि सोहा न तीरए जिणवरस्स साहेउं । किं पुण विसेसमंडणसंडियदेहस्स तत्थ खणे ? ॥ ४ ॥

एवं च कयउचियकायवे कुमारो निवेश्यं राइणो, तेणावि निउत्ता नियपुरिसा-अरे पयट्टेह नगरसहूयवं मेल्लेह
नायखत्तियवग्गं समण्णेह कुमारस्स पसाहियसरीरं जयकुंजरं जेण गम्मइ विवाहट्ठाणमि, जं देवो आणवेइत्ति भणि-
ज्जण गया पुरिसा, निवृत्तिओ नरिंदाएसो, तओ धवलपसाहियकारिवारूढो पवणपणञ्चंतथवडुग्घाययंसुंदरहवरा-

रुढरायलोयपरिथरिओ मणहरनद्वेवयारकुसलनचंतावरोहसुंदरीवंदनिरुद्धरायमगो वज्जंतमंगलतूरवाऊरियसयलदि-
 सासुहो सिद्धत्थनराहिवेण जेट्टभाउगनंदिवद्धणजुवराएण य अणुगम्ममाणो सिरिवद्धमाणकुमारो सायरमवल्लोयण-
 विखत्तचित्तेण भवणमालातलसंठिएण पुरजणेण दंसिजंतो अंगुलिसहस्सेहिं पुज्जमाणो आसीससएहिं अग्घविज्ज-
 माणो अक्खयसम्मिस्सकुसुमुट्ठिवरिसेहिं संपत्तो कमेण विवाहमंडवंति, अह मंडवदुवारेच्चिय पडिरुद्धो पडिहार-
 जणेण सामन्नलोओ, पविट्ठो पहाणलोएण समं अब्भितरंमि, विलयाजणेण ओमिलणपुव्वगं झत्ति विविहं पसाहिया
 सा जसोयवरारायकन्नावि, तथाहि—

रमणफलंगंमि तीसे आवद्धा पंचरायमणिकंची । अइविच्छिन्ने गयगंगणंमि हरिधणुहलेहच्च ॥ १ ॥
 नयणेहिं कज्जलुम्मिस्सिरेहिं सइदीहरेहिं निद्धेहिं । पच्चक्खा सरयसरिच्च सहइ सा नीलनल्लिणेहिं ॥ २ ॥
 कंठतलंमि य तीसे लोलंतो नवसरो वरो हारो । वयणिंदुविब्भमागयतारावलिल्लुमुवहइ ॥ ३ ॥
 तीसे जावयरसंपकाडलं कोमलं चलणजुयलं । पल्लवजुयं व नज्जइ वम्महकंकिल्लसाहिस्स ॥ ४ ॥
 भालतलंमि य तीसे लिहिओ गोरोगणाए वरतिलओ । तह दससु अंगुलीसु आविद्ध सुदियाजालं ॥ ५ ॥
 इय सविसेसपसाहणपसरंतसरीरकंतिरमणिज्जं । मंजुमणिनेउरारवसवणागयहंसखलियगइ ॥ ६ ॥
 मणिकुट्टिमपडिबिंबियमुहकमला मत्तकुंजरगइए । चलिया चेडीचक्रेण परिवुडा सा नरिंदसुया ॥ ७ ॥

पत्ता य तक्खणागयपुरोहिथारद्धजलणकम्ममि । नववंदणमालामणहरमि वरवेइगाभवणे ॥ ८ ॥
तत्तो पाणिगहणं पारद्धं गीयमंगलसणाहं । सयलतइल्लोक्कदावियपरमाणंदं मदिह्डीए ॥ ९ ॥
एत्थंतरे उभयपक्खेहि वि काराविओ जणाणमुवयारो दावियाइं मिगनाभिपमुहसुरहिगंधविलेवणाइं सरभसरुटंत-
छप्पययनिवेसमज्जिराइं कुसुमदामाइं सुराहिगंधबंधुरा पडिवासा भूरिकप्परपारीपहाणाइं पूगीफलसणाहाइं नागवल्ली-
दलाइं देवंगचीणद्धचीणदोगुल्लपट्टमुहाइं पवरवत्थाइं केयूरकुण्डलकिरीडतुडियकड्याइणो आमरणविसेसा सिंधुतुर-
क्खल्लीयवज्जरकंबोजाइसुखेत्तजायाओ तुरयबंधुराओ मंदमहाइविसिद्धवंसप्पसूया महागयविसेसा, एत्थंतरे जलणे हुणि-
जमाणमिं महुवयाइहिं कम्मावराण वित्तं चउत्थमंडलगपरिभमाणं, ताहे सेणावइणा आणंदुल्लियवहलपुलएण कोडी-
वत्तीसं पवररुवस्स कणगस्स कुण्डलकडिसुत्तयमणिकिरीडपमुहं तमाभरणं कच्चोलसिण्णिथालाइयं च कलहोयमयभंड
अइदूदेससंभूयचित्तचेलाइं भूरिभेथाइं कम्माए पाणिविभोयणमिं दिन्नाइं कुमारस्स, सिद्धत्थनरिंदेणवि बहुगाए
कणगवत्थलंकारा परितोसमुवहंतोण विथरिया मुवणदुल्लभा ।

एवं च सुरासुरनरपरितोसकारए वित्ते विवाहमहूसवे कए भोयणाइसक्कारमिं सट्टाणसु पडिनियत्तमिं रायलोए
निधनयरमुवगयमिं मेहनायेसणावइमिं ससहरकरगोरपासायसिहरसंठियस्स उचियसमए दिव्विसयमणुमुंजमाणस्स
पुन्नपरिसुपज्जंतचित्तिथत्थस्स देवगणोवणिज्जमाणपवरवत्थगंधमल्लविलेवणालंकारस्स ववगयरोगायंकस्स कयाइ

सेवागतुंबरुसमारद्धकलरवपंचमुगारसवणेण कयाइवि साथरपणच्चिरसुरवहूपेच्छणयावलोयेण कयाइ गंभीरजणं-
विवायनिन्नयकरणेण कयाइ जणजणगसमीवगमणेण भगवओ वोलेति वासरा ।

अह गएसु किच्चिएसुवि संवच्छरेसुवि आवन्नसत्ता जाया जसोया, कालक्रमेण य पसूया सुकुमारचरणकरयल चार-
रूवोवसोहंतसरीरावयवं तेयसिरिं व पच्चक्खं दारियं, कयं च समुच्चियसमए पियदंसणत्ति से नामं, सा य सायरसुव-
लालिजमाणा पयड्डिउमारद्धत्ति । अह भगवओवि वट्टमाणंमि अट्ठावीसइमे वरिसे पालियनिकलंकपासजिणपणीय-
धम्मा अम्मापियरो कुससंथारयमारुहिच्चा कयभत्तपच्चक्खाणा अपच्छिमसंलेहणाञ्जुसियसरीरा तइयभवे अवरवि-
देहंमि अवस्सपावियव्वनिव्वइणो कालं काऊण अचुयकप्पे देवत्तेण उववन्ना, ततो सोगाउरेण नंदिवद्धणपसुहेण
रायलोएण कओ तेसिं सरीरसक्कारो, कयतक्कालोच्चियकायंवे य सट्ठाणट्ठियंमि तंमि अणिट्ठं दट्ठु अपारंतोव पत्थिओ
अत्थमणगिरिं दिणयरो, सउणिकोलाहलरेवेण रोविउमारद्धव संझा, निस्सरंतममररिंछोलिच्छलेण अंसुजालं व सुक्कं
कमलायेहिं, सदुक्खमहिलाजणमणुसासिउं व पयट्ठा रयणी, विरहानलसंतत्तगत्तं रायलोयं निव्वविउक्कागेव
समुग्गओ ताराहिओ, अहापभायाए रयणीए समुग्गयंमि दिणयरे अचंतदुस्सहसोगोवेगविवससरीरं पिव थिरह-
विट्ठरंतोउरीपरिगयं नीसेसयणवग्गणरिवुडं नंदिवद्धणजुगरायं पेच्छिऊण भणियं भगवया-भो परिचयह सोधं,
अणुच्चित्तह परमत्थं, निरत्थओ खु सोगो, जओ-अणिवारियसच्छंदसंचरणदुल्लिओ पंचाणोव कयंतो सुमिणंगं व

खणदिदृनट्टं संजोगविलसिथं माइंदजालरमियं पिव मुहुत्तमेत्तसुदरं पेम्मं कोदंडलट्टिव गुणाणुगयावि कुडिला कज्ज-
परिणई संझन्नभरागोव अचिरावत्थाणं धणं महाभुयंगा इव दुन्निवारा विविहरोगायंका, ता सन्नहा नत्थि किंपि
एत्थ संसारे सोयणिज्जं पडिबंघट्टाणं वा पवलं, एक्कं चिय अणुसरह विवेयं परिचयह भोगपिसायं कुणह कायव्वं,
सवसाहारणो हि एस वइयरोत्ति । एयं ते निसामिऊण पयणुपमाणुबंधा सिट्ठिलियसोयावेया जायत्ति ।

अन्नदिवसे य जोइससत्थपरमत्थवियक्खणनिमित्तिगोवइट्ठपसत्थमुत्तमि पहाणलोणेण अणेगपयारोहिं भणिओऽवि
जयगुरू जाव न पडिवज्जइ रज्जं ताव नंदिवद्धणो अभिसित्तो सिद्धत्थराइणो पए, पणमिओ नायखत्तियवग्गेणं
बहु मन्निओ नयरकारणिएहिं परियरिओ सामतेहिं पडिवण्णो सेवगज्जेणं पूहओ पंचंतराईहिं, एवं जाओ
सो महाराओत्ति ।

अन्नया य तं सयणवग्गाणुगयं भयवं भणिउमाठत्तो-ओ पडिपुन्ना मम संपयं पुव्वपडिपुन्ना पइन्ना, कयं च सव्वं
करणिज्जं, ता सिट्ठिलेह नेहगंठि, होह धम्ममसहाइणो, अणुमन्नहे मम सव्वविरइगहणत्थंति, अह वज्जासणिनिवडणदु-
विसहं निसामिऊण वयणमेयं भणियं तेहिं-कुमारवर ! अज्जवि महारायसोगो तहट्ठिओ चेव अम्हाणं नट्टुसंछं व
विइवइ हिययं, किं पुण अकाले चिय तुम्हेहिं सह विओगो खयक्खारावसेगोव दुत्तसो?, अहो मंदमगगसिर-
सेहरा अम्हे जेसिं उत्तरोत्तरा निवडइ दुक्खदंदोलित्ति भणिऊण रेविउं पवत्ता, बहुण्ययारं च तासिया महुववय-

नेहिं भगवया, कहकहवि निरुद्धवाहप्यवाहा य तक्कालचउग्गुणीभूयं संताववेगं निरुंभिऊण भणिउमाढत्ता—अहो परमे-
 सर ! करुणापरो हयसु अम्ह जीवियवे, परिहरसु संपयं सबविरइवंचं, एयंपि काऊण तुमए पाणिणो रक्खणिज्जा, ते
 य जइ पढमंपि दुस्सहविओगकरवत्तभिज्जमाणहियया रक्खिज्जिस्संति ता किमजुत्तं होजा?, तुम्हेहिं रहिया नूणं
 अवगयलोयणव्व अमुणियगम्मागम्मविभागा वइदेसिगा इव अणाहा खणमेत्तंपि न संधीरेमो अय्पणंति, भगवया
 भणियं—जइ एवं ता सम्ममालोचिऊण भणह—केत्तियकालेण तुब्भे ममं दिक्खुणागहणत्थमणुमन्निस्सह?, तेहिं
 भणियं—संवच्छरदुगेणं अइगएणंति, भगवया जंपियं—एवं होउ, परं मम भोयणाइसु न तुम्हेहिं विसेसंचित्ता कायदा,
 तेहिं भणियं—एवं करिस्सामो, तओ तहिणाओ आरब्भ परिचत्तसव्वसावज्जवावरो सीओदगपरिवज्जणपरायणो
 फासुयाहारभोई दुक्करवंभचेरपरिपालणपरो परिसुक्कणहाणविलेवणपसुहसरीरसक्कारो फासुओदगेण कयहत्थपायपक्खला-
 लणाइकायवो जिणिंदो ठिओ वरिसमेगं ॥ तहिं च—

परिसुक्काभरणोऽविहु ण्हाणविलेवणविवज्जिओऽवि जिणो । जुगवुग्गयवारससूतेयलच्छिं समुवहइ ॥ १ ॥

सयणोवरोहेणेण धरियगिहसरिसबज्जवेसोऽवि । लक्खिज्जइ जयनाहो संजमरासिच्च पच्चक्खो ॥ २ ॥

सा कावि गिहगयस्सवि जिणस्स मज्झत्थया पवित्थरिया । जा निग्गहियमणाणवि मुणीण चित्तं चमकेइ ॥ ३ ॥

अह वच्छरपज्जते तिलोयचूडामणी महावीरो । वारिसियमहादाणं दाउं परिचितए जाव ॥ ४ ॥

सोहम्मदेवलोए सुहासणत्थस्स ताव सक्कस्स । रयणपहपसरययडं झडत्ति सिंहासणं चलियं ॥ ६ ॥
तच्चलणे ओहीए सो नाउं नाहमाणसविकप्पं । अइरभसयरवियंभियपुलउप्पीलंचियसरीरो ॥ ६ ॥
सिंहासणाओ उट्टिय सत्तट्ट पयाइं संमुहं गंतुं । थोउं जएक्कनाहं चित्तेउमिमं समाढत्तो ॥ ७ ॥
भयवं जिणवरवीरो आवरिसं दाणमीहए दाउं । तस्स य धणप्पयाणं जुज्झइ मह संपयं काउं ॥ ८ ॥
इय चित्तिऊण जक्खं वेसमणं आणवेइ वज्जहरो । निक्खमणदाणजोगं खिव कणगं जिणगिहंमिति ॥ ९ ॥
इमं च सोच्चा धरणिवट्टुंचिणा मत्थएण पडिच्छिऊण सुरिंदसासणं कयकिच्चसप्पाणं भवंतो वेसमणो तिरि-
यजंभगे देवे आणवेइ, तेऽवि तहत्ति विणएण पडिसुणित्ता जिणिंदमंदिरे तरुणतरणिसप्पगासं चाभीयररासिं वरि-
संति । तओ भयवं पइदियहं तियचउक्कचरचउम्मुहमहापहहेसु अन्नसु य तहाविहट्टाणेषु बहूणं सणाहाण य
अणाहाण य पंधियाण य करोडियाण य कप्पडियाण य वाहियाण य वइदेसियाण य रिणपीडियाण य दोगच्चसं-
तावियाण य अन्नोसिंषि धणाभिलासीण अणिवारियप्पसरं वरवरियाओसणापुव्वयं कणगं सययं दवावेइ, तं च महया
पवंधेण दिज्जमाणं अट्टलक्खाहिगएगहिरन्नकोडीमेत्तं एगदिणेणं निट्ठविज्झइत्ति ।
अह मयहमसूरकलिंगंगसोरट्टपमुहदेसेसु । अच्छिन्नमुवन्नमहापयाणओ पसरिया किन्ती ॥ १ ॥
ताहे जंपंति जणा परोप्परं तेसु तेसु ठाणेषु । चल्लह लहु भयवंतं पेच्छामो तत्थ गंतूणं ॥ २ ॥

तवणिज्जपुंजलाभेण इह भवे विगयदुक्खमप्पाणं । कुणिमो परलोयंमि य तहंसणजणियपुन्नेण ॥ ३ ॥
 परभवपरुद्धखरदुक्खनिवहसंतत्तसव्वगत्ताणं । अन्नो नत्थि उवाओत्ति अम्ह एसो हवउ सरणं ॥ ४ ॥
 इय गेगेसुं मग्गणगणेसु इत्तेसु दूरदेसाओ । पूरियमणोरहेसुं अन्नेसु नियत्तमाणेसु ॥ ५ ॥
 कुंडग्गामंमि पुरे रुंदासुवि तासु तासु रत्थासु । निदयनिदलियउरो दुक्खेण जणो परिब्भमइ ॥ ६ ॥
 जत्थ निहाणे दिट्ठिं पम्हलव्वलं परिकिखवइ वीरो । दट्ठइ तत्थ हिरन्नं करुणारसमच्छरेणं व ॥ ७ ॥
 अत्थिजणपरिवुडे जिणवरंमि गेहंगणे भमंतंमि । परिसक्किरक्कपमहादुमव्व लक्खिज्जाए पुहइ ॥ ८ ॥
 दाणे य जायणंमि य दायवत्तकुयजणेण सव्वत्थ । सरिसच्चिय उल्लावा विंयंभिया देहि देहिति ॥ ९ ॥
 एत्थ रयणुक्कर एसु ठवेह एत्थ य पवित्थरे वत्थे । पूरेह एत्थ तवणिज्जपुंजए मग्गणनिमित्तं ॥ १० ॥
 इय दाणनिउत्तजणस्स पइदिणं किंकरे भणंतस्स । पुणरुत्तो वावारो जाओ संवच्छरं जाव ॥ ११ ॥
 अखलियपसरं सिरिजिणवरणे दिंतेण दुत्थियाण धणं । सेसाणवि पयडिज्जइ सिवपुरपंथो धुवं एस ॥ १२ ॥
 सव्वावायनिबंघण धोणेवि जो कुणइ मोहिओ मुच्छं । सो दुक्करतवचरणे अत्ताणं कह व संठविही ? ॥ १३ ॥
 ता जिणवराणुमाणेण सव्वविरइं समीहमाणेण । अन्नेणवि एवं चिय पयट्ठियव्वं सइ धणंमि ॥ १४ ॥
 एवं च दाणे अणुदियहं पयट्ठमाणे नंदिवद्धणनरिंदो निययुरिसे सदावेत्ता एवं आणवेइ-भो भदा ! एयस्स

रस्स तेषु तेषु पएसेसु बहूओ महाणससालाओ काराविज्जण विउलं असणपाणखाइमसाइमरूवं आहारं उवक्ख-
डेह, तयणंतरं च जे जहागच्छति खुहाभिभूया तण्हापरिसुसियंकठा पासंडत्था गिहत्था वा अन्ने वा तहारूवा
तेसिं तहा आसत्थाणं सुहासणगयाणं हरिसुप्फुल्लोयणाणं तं चउच्चिहंपि आहारं सवायरेण दवावेह, तहा ठाणे
ठाणे मुंचह मंदभदाइजाइणो करिणो चउइसं संठवेह सूरहत्तुरयविब्भमे पवरत्तुरंगमे सवत्थ पयडह रहनिवहे
पएसे पएसे मेळह पवरपट्टणुगए वत्थससुदए देसेह गामागराइणो संनिवेसे, एएहिंतो जो जं समीहेइ तस्स तं
वियरहत्ति, जं देवो आणवेइत्ति भणिज्जण निगया पुरिसा, समारद्धो सवत्थ नरिंदाएसणुरूवो उवक्कमो । अह
अनिचारियवेरिए समगणियरायरोरे अमंदाणंदसंदोहजणणे भगवओ पयट्टे संवच्छरियमहादाणे एत्तियं अत्थो
संवसंखाए गओ—

तिन्नेव थ कोडिसया अट्ठासीयं च होति कोडीओ । असियं च सयसहस्सा सव्वगेणं दविणसंखा ॥ १ ॥

इय मगगलोयं तप्पिज्जण आवरिस कणगवरिसेण । पव्वज्जापडिवत्ति कुणइ मणे जिणवरो वीरो ॥ २ ॥

अह बंभलोयकप्पे रिट्ठमि विमाणपत्थडे विउले । दिव्विमाणोवगया एए देवा महासोक्खा ॥ ३ ॥

सारस्सयमाइच्चा वण्णी वरुणा य गहत्तोया य । तुसिया अवावाहा अगिच्चा चेव रिट्ठा य ॥ ४ ॥

तक्खणविचलियसीहासणा य ओहीए नायनियकिच्चा । नियनियपरियणसहिया झडत्ति जिणपासमल्लीणा ॥ ५ ॥

विणयपणमंतमथ्यगलंतमंदारसुरहिकुसुमभरा । तत्थाहिं गिराहिं जिणं थोउं एवं समारद्धा ॥ ६ ॥
 जयसि तुमं मयरद्धयसिंधुरखरनहरदारुणमंडद ! । चलणगगचालियाचलसंखोभियसधरणिमल ! ॥ ७ ॥
 नियकज्जपरंमुहमुवणरक्खणक्खणिय ! परमकारुणिय । नायकुलकमलवणसंडचंडमायंड ! तुज्झ नमो ॥ ८ ॥
 जह लोथालोयगयंपि नाह ! तं मुणसि वत्थुपरमत्थं । तह किं कयाइ जाणइ मंदमई मारिसो लोओ ? ॥ ९ ॥
 अहवा हेलुछासियकरपसरनिरुद्धतिमिरनियरस्स । सूरस्स पुरो खज्जोयगण का होइ देहपहा ? ॥ १० ॥
 तहवि य निययाहिगारं नाह ! कलिज्ज नूणमम्हेहिं । सुमरणमेत्तनिमित्तेण तुह इमं सीसए किंपि (सामी) ॥ ११ ॥
 पव्वज्जं पडिवज्जसु भवरुयसंतत्तगत्तसत्ताणं । तित्थंकर ! तित्थमणत्थमंथणं लहु पयट्ठेसु ॥ १२ ॥
 अइमूढकुत्तित्थयदुट्ठदेसणातिमिरनियरअंतरियं । पयडेसु मोक्खमग्गं निरुवमनाणप्पइवेण ॥ १३ ॥
 अइभूरिविचिच्चाइसयरयणकारुन्नवारिमरियाओ । वयणामयं पणिणहउ लोओ तुह सायराउव ॥ १४ ॥
 निस्सामन्नं सामन्नभावमायन्निज्जण सयलज्जणो । रोमंचकंउइछो आकप्पं तुह कंहं कहउ ॥ १५ ॥
 इय सविणयदेवगणोवइट्ठकायवहुगुणिउल्लासो । जाओ जएक्कचक्खू सविसेसं मोक्खसोक्खमई ॥ १६ ॥
 एवं च विन्नविज्जण सट्ठाणं गएसु लोगंतियतियसेसु उट्ठिज्जण भयवं सीहासणाओ पासवत्तिणा परियेणअणु-
 गम्ममाणो गओ नंदिवद्धणपमुहाणं नायक्खत्तियाणं समीवे, तेऽवि जिणमितं दट्ठुण सत्तट्ठ पथाइ गया समुहं, कया

उचियपडिवची, दवाविद्यं महप्पमाणं सिंहासणं, निसन्नो जिणो, अणुरूपासणेसु य जहक्कमं उवविट्ठा नंदिवट्ठणाइणो । तओ ते भगवया अमयविंदुसंदोहसुंदरीए सभावमहुराए अणुरुत्ताए गंभीराए भारइए भणिया, जहा-ओ देवाणु-प्पिया ! पडिपुन्नो तुम्हाणमवही, जाओ पत्थावो मम सबविरइपडिवचीए, ता सहसिं अणुमन्नह इयाणिं, सुयह पेमाणुबंधं, निट्ठुरं कुणह विओगकायरं नियमणंति, ते य एवमायन्निउण गाढमणुपरिपूरिजिमाणगलसरणिणो कह-कहवि निरुद्धसौगावेणा अणवरयनिस्सरंतनयणंसुविंदुजालच्छलेण पणयप्पभारं व चिरं उगिरिऊण भणिउमाढत्ता -भयवं ! तुम्ह एवं भणंता वज्जमया धुवं अम्ह सवणा जं न संपत्ता बहिरत्तणं, वइरसारप्परमाणुविविम्मियं हिययं जं न वच्चइ तडत्ति सयसिक्करत्तणं, निदक्खिन्नत्तणपरममंदिरं व सरीरमिमं जमज्जवि न पवज्जइ रसायलगमणं, एवं ठिए य कहं पत्थुयत्थाणुमन्नणनिमित्तं पयट्ठुउ वराइणी वाणी, जओ-को होही विसमक्कजोयहिनिवडिराण अम्ह हत्थावलंबो ? कहं वा ससुरासुरनरनरिंदसंदोहवंदणिज्जपायपकेरुहेण तुमए विरहिद्यं भुवणत्तयपयंडं सोहिस्सइ नायखत्तियकुलं ? अहो महामंदभागिणो अम्हे जेसिं करयलाओऽवि अवक्कमइ रयणंति, एवमाईणि कलुणवयणाणि भासिऊण निरभिलासा चेव निवडिऊण चलणेसु भगवओ विव्वात्तिं काउं पवत्ता—

जइवि जिणनाह ! तुम्हे पवज्जं काउमुज्जमह इणिंह । तहविदु अम्ह सुहट्ठा पडिवज्जह निक्खमणमहिमं ॥ १ ॥
तेसिं उवरोहेणं तओ जिणिंदो इमंपि पडिसुणइ । अब्भत्थणभंगपरमुहाइं हिययाइं गरुयाणं ॥ २ ॥

अह नंदिवद्धनरिदेण भणिया नियपुरिसा-अरे सिग्घं महरिहं भगवओ अणुरूवं अभिसेओवगरणं उवाह-
 रेह, जं देवो भणइत्ति सम्मं पड्डिमुणिऊण निग्गया पुरिसा, पडणीकया अट्टोत्तरसहस्ससंखा अणेगे सुवन्नाइ-
 कलसा, उवाहरियाइं समत्थपसत्थत्तित्थसमुत्थाइं सल्लाइं, उवणीयाओ परमोसहीओ, पणामिया गोसीसिच्चंद-
 णाइविलेवणविसेसा, एत्थंतरे चलियासणा बत्तीसंपि पुरंदरा विम्बियमणा ओहिणाणसामत्थमुणियपरमत्था
 तक्खणं महप्पमाणविमाणारूढा वियसियसयवत्तविसालोयणा अहंचंदणाणुलित्तगत्ता नियंसियसिलंधपुण्णसुह-
 फरिसपवरदूसरयणा कुंदसंखदलदगरयधवदंतंपतिरेहतंवयणा अंजणपुजघणमसिणरुयगरमणिज्जेकसपासा भद्दजो-
 वणे वट्टमाणा मऊहपडलपल्लवियचूडामणिपसाहियमत्थया अणेगरूवाभरणभूसियसरीरा सोमचारूवा छत्तचिंधाइ-
 विविहक्कुहधारिणो असंखदेवकोडिचडगरपरियरिया पडहमुइंगकाहलतिलिमहुडक्काइत्तूरवभरियंवरा जिणिदस्स
 अंतियं समागया, तिपयाहिणादाणपुव्वगं च पणमिऊण पराए भत्तीए पहूणो पायपंकयं कयत्थमप्पाणं मंझता
 जिणचरणमुद्दाविन्नासमुंदरे निसन्ना भवणंगणे ।

अह अचुयामरिदेण हरिसुल्लसंतदेहेण भणिया नियनियदेवा-भो सिग्घमेव निवत्तह जिणस्स महावीरस्स जोग-
 महंतं निक्खमणाभिसेयं, ते य एयमायन्निऊण कयपणामा अणेगकणयाइकलसे खीरोयसलिलपड्डिपुन्ने असंखपुण्णप-
 डलाइं च अन्नं च तहप्पगारमभिसेयपाओगं पहाणवत्थुनिवहं अचुयपुराहिवस्स पणामेति, तओ अचुयतियसाहिवा

सयलनियदेवपरिग्रहो तेहिं दिवोहिं कणथाइकुमेहिं अट्टसहस्ससखेहिं दिवोसहिंसुगंधगधुम्मिस्सोहिं मंदिराट्ठियं
भयवंतं हरिसचियसियवयणो अभिसिंचइ, एवं कमेण सेसावि सुराहिवइणो चंदसूरपज्जता णवन्ति जयगुरुं, अह तेसु
मज्जणं काऊण सट्ठराण्हिएसु नंदिवद्धणो राया कयमुहकोसविन्नासो परेणं विणएणं अंचतमप्पमत्तचित्तो तेहिं पुवो-
वणीएहिं चामीयाइकलसहस्सोहिं गंधुद्धुरपवरतिथजलभरिएहिं मज्जेइ जिणवरं, तहा वट्टमाणे य भगवओ मज्ज-
णमहूसवे केइ सुरिंदा चालेति मंदं मंदं चामीयरदंडुडामराओ चामराओ केवि धारिंति नियधवल्लिमाविजियसिय-
सयवत्ताइं आयवत्ताइं केवि संमुहमभिट्ठाविति पणहुसंपणं पवरदप्पणं केवि करयलेणुव्वहंति सुगंधखीरोयसल्लिपुन्न-
पिहाणपउमगंधुक्कडे कुडे केवि उप्पाडेति इज्झंतारुखणसारसुराहिधूवधूमंधयारलंछियं पंचवन्नयणधूवकडुच्छुयं केवि
समुव्वहंति परिमलमिलंतालिसामलाओ दसद्धवन्नकुसुममालाओ, अन्ने देवा य देवीओ य भगवंतं अभिसुहट्ठियाओ पज्ज-
वासंति । अह निवत्तियम्मि मज्जणे नंदिवद्धणो राया दोच्चपि उत्तरावक्कमणं सीहासणं विरयावेइ, तत्थट्ठियं च भयवंतं
सेयापीयकलसोहिं णववेइ, तयणंतरं च णं अलंकारियस्स पुव्वाभिसुहसीहासणसन्निस्सस्स सामिणो सुराभिमुकुमालाध-
कासाइल्लहियसरीरस्स गोसीससरसंचदणचच्चियंगस्स परिहियनिरुवहयफल्लिहुज्जलदिद्वेदवदूसजुधलस्स निवद्धयंचराय-
रयणकडिसुत्तयस्स कणगसेलसिलाविच्छिन्नवच्छत्थलवोलेतविमलमुत्ताहलकलावस्स विचिच्चमणिखंडमडियकुडलुज्जा-
वियगंडयलस्स रयणक्कडकिरीडविभूसियसिरस्स पंचवन्नपुष्फमालालंक्रियस्स पाक्खित्तसुगंधवरवासस्स भगवओ वद्धमा-

णस्म वंदिऊण चलणजुयलं सुरासुरिंदा पुणो पुणो धरणियलनामिउत्तिमंगा आसीसासएहिं थुणिउं पवत्ता, कहं?—

विजयसु जएक्कबंधव ! ससुरासुरतिहुयणेणवि अजेयं । अचंतमहल्लं भोहमल्लमचिरेण लीलाए ॥ १ ॥

मिच्छत्ततिमिरसुच्छिदिऊण सन्नाणसूरकिरेहिं । पयडेसु सुत्तिमगं विमग्गलग्गाण भद्वाण ॥ २ ॥

पालेसु समणधम्मं चिरकालं जाव निग्गयपयावो । अजियं जिणेसु मज्झे जियस्स निवससु तुमं नाह ! ॥ ३ ॥

तुह अणवरयं गुणनिवहक्कित्तणारावओ विबुहलोगो । सवत्तो दिसिवलयं पक्कुणउ क्कोऊहलाउलियं ॥ ४ ॥

तुज्झ जसो कुमुओयरगोरो भुवणत्तएवि हिंडंतो । सवत्तो उग्गयचंदविबसोहं समुव्वहउ ॥ ५ ॥

सिंहस्स व तुह अचंतविक्कमं पेच्छिऊण तरलच्छा । भीया कुत्तिथियमिगा एत्तो दूरे पलायंतु ॥ ६ ॥

इय आसीवायपुरस्सराहिं थुणिउं गिराहिं भुवणणुरं । नट्टविहिं च पयट्ठिय विरयंमि सुरिंदविंदमि ॥ ७ ॥

भावियजयगुरुविरहग्गिदूमिओ नंदिवद्धणो राया । वाहरिउं नियपुरिसे पयपिउं एवमाढत्तो ॥ ८ ॥

भो भो देवाणुपिया ! जगपहुणो निमित्तं विसिट्ठवेइगापरिविखत्तपरिसरं सरसचंदणुम्मिस्सधुसिणरसालिहिय-
विविहसत्थियं थिरनिवेशियसपायपीढनानामणिमयसीहासणं रणंतकणयिक्किणीभुरनिनायमुहलियदियंतरं रंयंत-
विविहच्चिंधसयसंपुन्नं पन्नासधणुहायासं पणुवीसधणुविच्छिन्नं छत्तीसधणुमुविद्धं चंदप्पभनामधेयं सीयं उवट्ठवेहत्ति ।
तओ ते सामिवयणं निसामिऊण पट्ठिहियया तहत्ति सवं निवत्तन्ति ।

एत्थंतरे तियसाहिचेण हरिसुल्लसंतहियएण । पवरमणिलुडमंडियमहतसंभवावलीकलिया ॥ १ ॥

पंचविहरयणकिरणोहविहियदिसिसिखुरिंदकोदंडा । चंदप्पभाए तुल्ला कारविया न्थियुरोहंतो ॥ २ ॥

सुवणच्छेरयभूया सिबिगा लंबंतमोत्तिओज्जला । नवरं इमावि तं चिय पढमं सिबिगं अणुपविट्ठा ॥ ३ ॥ त्रिभिर्विशेषकम् ॥

अह भयवं केसालंकारेण वत्थालंकारेण आभरणलंकारेण मल्लालंकारेणालंकिओ कयच्छट्ठतवोकम्मो उट्टिऊण आस-
णाओ अणुण्ययाहिणीकुणंतो चंदप्पहं सीयमारुहिच्चा पुट्ठाभिमुहंमि सीहासणे निसीयइ, तओ भयवओ कुलमहरिया
णहाया सूइभूया गहियपवरनेवत्था हंसलक्खणं साडयं आदाय सामिस्स दाहिणे पासे भदासणंमि निसन्ना, एवं
अम्मघाईवि वामपासे संठिया, तहा सामिस्स पिट्ठओ एगा वरतरुणी विचित्तसिगारागारभूयं महंतं विमल-
मुत्ताजाललंबतावचूलयं पुंडरीयदंडं छत्तं धरेमाणी ठिया, उभयपासेसु य दुवे वरविलासिणीओ धोयरुण्णपट्टधवलं
चामरजुयलं गहाय संठियाओ, उत्तरपुरत्थिममि य भागे एगा अंबंतदरिसणिज्जा विलया निम्मलसल्लिपडिपुन्नं
सुरकारिरेरहतनालागारं रथयभिंणारसुवहंती निसन्ना, एवं दाहिणपुरत्थिमेण एगा वरसुंदरी विचित्तमणिकिरण-
जालं सुयंतं कणयदंडं तालवंटं करयलेण कलयंती दूरूढा, पिट्ठओ य सुवणनाहस्स भगवओ देविंदा हिमरयकुंद-
दुण्णगासाइं वेश्लियमयदंडाइं अट्टसहस्सकंचणसलागाइं सबरयणामयाइं कुमुदामंदतुराइं आयवत्ताइं धरति,
उभयपासेसु चंदप्पहसीयाइ सोहम्माहिवो ईसाणो य अमयहिमफेणुपुंजसोन्निगासोहिं चामरोहिं भयवंतं वीयंति ।

एतथंतरे नंदिवद्धणनरवइणो वयणेण पवररूवा निरुवहयंगा णहाया कयविलेवणा परिहियपवरवत्था सवालंकार-
मणहरसरीरा विसिट्ठवलसालिणो समवथा पुरिसा समूससियरोमंचकंचुया कयसवकयच्चा नीसेसपुन्नफगरिसमय्पाणं
मन्नमाणा सहस्ससंखा झडत्ति आंगंतूण तं सीयमुक्खिवंति, अह वचंतीए तीए सोहम्माहिबई सुराहिवो दाहिणिल्ल-
मुवरिल्लबाहं गिणहइ, ईसाणोऽवि देविंदो उत्तरिल्लबाहं, चमरवल्लिणो य असुरिंदो दाहिणुत्तरसिबिगाहेड्डिल्लबाहाओ
समुवहंति, अवसेसा भवणवइवाणमंतरजोइसेवमाणिया य जहारिहं सीयमुक्खिवंति । किं बहुणा ?—

पुविं उक्खित्ता माणुसेहिं साहट्ठरोमकूवेहिं । पच्छा वंहति सीयं असुरिंदसुरिंदनागिंदो ॥ १ ॥

गेहाओ नीहरंते जिणंमि चाउविहेहिं देवेहिं । इतेहि य जंतेहि य कहमिव उब्भासियं गयणं ॥ २ ॥

वणसंडोव कुसुमिओ पउमसरो वा जहा सरयकाले । सोहइ कुसुमभरेणं इय गयणयलं सुरगणेहिं ॥ ३ ॥

सिद्धत्थवणं व जहा असणवणं सणवणं असोगवणं । चूयवणं व कुसुमियं इय गयणयलं सुरगणेहिं ॥ ४ ॥

अयसिवणं व कुसुमियं कणियारवणं व चंपवणं वा । तिलयवणं व कुसुमियं इय गयणयलं सुरगणेहिं ॥ ५ ॥

वरपडहभेरिझल्लरिंदुभिंसंखाइतूरनिग्घोसो । धरणिथले गयणयले पयट्ठिओ देवमणुएहिं ॥ ६ ॥

एवं च भुवणबंधवस्स वच्चमाणस्स तप्पढमयाए सव्वरयणविणिम्मविथा पुरओ अहाणुपुष्पीए सेत्थियइणो
अट्टमंगलगा संपट्ठिया, तयणंतरं च पुन्नकलसंभिगारा दिवा सच्छत्तपडागा गयणतलंचुंविणीओ पवणकंपराणं-

चलाओ महावेजयंतियाओ संपट्टियाओ, तयणंतरं वेरुलियविमलदिप्पतदंडं पलबकोरिटमालोवसोहियं चंदमंड-
लाणुरूवं समूसियं दिवमायवत्तं, पवरसिंहासनं च समणिरयणपायवीढं मणिमयपाउयाजोगसंपजुत्तं बहुकिंकरनपरि-
ग्गहियं संपट्टियं, तयणंतरं च ललियपुलियलंधणजवणगईणं लोलंतलासगललमवरभूसणाणं कणमयमुहनिजोगजु-
त्ताणं उज्जलगथासगमडियकडीणं तरुणपुरिसपरिक्खित्ताणं अट्टसयं जच्चतुरगाणं अहाणुपुट्ठीए संपट्टियं, तयणंतरं
च सत्तंगपइट्टियाणं भइजाइसमुब्भवाणं सवलक्खणोववेयाणं कंचणकोसीपविट्ठकलहोयधवलदंताणं कंचणमणि-
तारगामूसियाणं कुसलारोहसंपउत्ताणं अट्टसयं उत्तमकुंजराणं संपट्टियं, तयणंतरं च सलत्ताणं सज्झयाणं सघटाणं
सपडागाणं सतोरणवराणं सनंदिघोसाणं हिमवंतुगयतिणिसदारुनिम्मियाणं सुसिलिट्ठचक्रमंडलपुराणं जोत्तियपव-
रतुरंगाणं रणज्झणंतकिंकिणीजालाणं वत्तीसतोणपरिमंडियाणं चावपमुहपरणनिवहभरियाणं अट्टसयं रहाणं अहा-
णुपुट्ठीए संपट्टियं, तयणंतरं निविडपरियराणं करयलकलियविविहाउहाणं निययविक्रमोवहसियससभडाणं पुरिसा-
णमट्टसयं संपट्टियं, तयणंतरं च अपरिगणियसखं हयाणीयं गयाणीयं रहाणीयं पायत्ताणीयं च पहावियं, तयणंतरं
च पंचवन्नकुडभीसहस्सकल्लिओ वइरमयवट्टलुजट्टिपइट्ठिओ विचित्तलत्ताइच्छत्तपरिक्खित्तो रंतंभभरकुसुममाला-
मंडिओ अनिलदोलिजमाणधंटियापडलमणहरारावपूरियनहविवरो जसपुंजोव्व सुत्तिमंतो सुत्तिमगोव्व पयडो नियगु-
रुयत्तणेण गयणं व परिमिणंतो सायरसुरविसरसंपरिगगहिओ जोयणसहस्ससूसिओ महिंदज्झओ संपत्थिओ, तयणंतरं

च अन्ने य बहवे दंडिणो मुंडिणो सिंहडिणो हासकरा खेडुकरा चाडुकरा गायंता य वायंता य नचंता य रमंता य हसंता य जयजयसहं पंडजमाणा मंगलसहस्साइं कुणमाणा गुणवणं शुणमाणा संपत्थिया, तयणंतरं उग्गा भोगा रायन्ना खत्तिया सेट्ठिणो सत्थवाहा पुरिसनियरपरियरिया केइ पायविहारेणं केइ रहगया केइ तुरगाधिरूढा केइ कुंज-
रपट्टिसन्निसन्ना केइ जाणजंपाणाइगया सामिस्स पुरओ मग्गओ य संपट्ठिया, तयणंतरं अन्ने य बहवे देवा य देवीओ य सएहिं सएहिं विमाणेहिं सएहिं सएहिं चिंधेहिं सएहिं परिवारेहिं समंतओ संपट्ठिया, नंदिवद्ध-
णमहानरिंदोऽवि कयमज्जणो विहियसिंगारो गंधसिंधुरखंधगओ समूसियसियायवत्तो धुवंतधवलचामरो हयगयर-
हओहसेणापरिकिन्नो पिट्ठओ भयवंतं अणुगंतुमारद्धो ।

एवं च नियनियट्ठाणगयसुरासुरनरनियराणुगम्ममाणो वद्धमाणो सत्तरयणिप्पमाणसरीरो समचउरंसंठाणसं-
ठिओ वज्जरिसहनारायसंधयणो कमलुप्पलसुरहिनीसासो जल्लमलकलंकसेयरयदोसवज्जियतणू देहप्पभापभारभा-
सुरियदिसिचक्कवालो भिंगनीलजल्लभसलसामलपसत्थसुहुमनिबद्धनिउरंबनिचियकुंचियपयाहिणावत्तकेसो अद्धयं-
दम्ममनिडालवट्ठो पमाणजुत्तमुंदरसवणो चावदंडकुडिलभमुहो धवलपत्तलवियसियपुंडरियनयणो गरुडाययउज्जुतुं-
गनासो विपक्कविंवाफलसंनिभाधरोट्ठो संखगोखीरमुत्तामणिधवलसुसिलिट्ठसमंदतंपती पीणमंसलकवोलजुयलो सज-
लघणत्थणियदुंडुभिनिग्घोसगंभीरसरो दाहिणावत्तरेहावलयालंकियसुप्पमाणकंठकंदलो वणमहिससीहसहूलपडि-

पुन्नवदृखंधो सुहुमलोमरेहतंसलपलंबवाहुदंडो संजमलच्छिनिवाससुभगविसालवच्छत्थलो पवररोमराइरोहिरंगंभी-
रनाहिसोहियमज्झभागो वट्टाणुपुवोवचियचारुंजधो सुसिलिदुग्गुंफो नगनगरभगरसागरचंक्कुसमच्छाइलक्खण-
लंछियचलणतलो परिचत्तपाणभोयणेसु पासायसिहरमारुदसु चेलुक्खेवं करेतसु पुरजणेसु कुसुमनियरं मुंचमाणेसु
गयणट्ठितियेसु सप्पणयपणच्चमाणेसु विज्जाहरीसु मंगलसुहल्लसु वारविलयासत्थेसु दिज्जमाणेसु सवकासुयदा-
णेसु गोत्तमुक्कित्तमाणेसु देवचारणेसु कमेण संपत्तो नायसंडाभिहाणंसुववणंमि । तं च केरिसं ?—

पढसुम्मिछिरपल्लवसोहिल्लमहल्लपायवसमूहं । सवोउयकुसुमसमिद्धगंधवायंतमिउपवणं ॥ १ ॥

तरुणतरुसंडपत्तलसाहापडिरुद्धसूरकरपसरं । अच्चंतरम्मयागुणरंजियपरिभिमियसुरखयरं ॥ २ ॥

दिसिसुहपवियंभियकुसुमपरिमलायडिह्या भमरनियरा । उज्जाणंतरविहरणपरंसुहा जत्थ कीलति ॥ ३ ॥

जं जिणमितं नाऊण पवणडोल्लंतपल्लवकरेहिं । चिरकालदिट्ठपियमाणुसं व तं वाहरइ तुरियं ॥ ४ ॥

मयभरपरवससिहिकल्लरेण जं सागयं व वागरइ । निवडंतकुसुमनियरुक्क्रेण अगंधं व दोयेइ ॥ ५ ॥

इय निययचंगिमावियजियनंदणुजाणरम्मयगुणस्स । जयनाहचलणपूयस्स तस्स का वणणा होउ ? ॥ ६ ॥

एवंविहिंमि तत्थ आंगतूण सिवियाओ ओयरिऊण सामी असोगवरपायवस्स मूले सयमेव अलंकारकुसुमनिवहं
ओसुयइ, सा य कुलमयहरिया हंसलक्खणेणं पवरसाडएणं तं पेच्छमाणी छिन्नमुत्ताकलावगलंतसुत्ताहलविब्भमाइ

अंसुयाइं चिणिम्सुयमाणी सदुक्खं रोयमाणी मन्नुभरखलंतक्खराए गिराए भयवंतं भणिउं पवत्ता—

कासवगोत्तुब्भूओऽसि पुत्त ! सिद्धत्थपत्थिवसुओऽसि । नायकुलनहयलामलसारयथणीमयंकोऽसि ॥ १ ॥

वासिट्ठसगोत्तुब्भवतिसलादेवीए कुच्छिजाओऽसि । खत्तिजणतिलओऽसि य नवजोच्चणदिब्वदेहोऽसि ॥ २ ॥

गन्भावत्थाओच्चिय अइसुकुमालोऽसि सुंदरंगोऽसि । अण्णडिमख्खलायन्नकंतिपब्भारकल्लिओऽसि ॥ ३ ॥

तिहुयणविक्खायजसोऽसि सयलविन्नाणनीइनिउणोऽसि । ता कहमिममइद्धरतवकम्मं संपवज्जिहिसि ? ॥ ४ ॥

इह असिधारसरिच्छं महच्चयं वच्छ ! अणुचरेयवं । घोरोवसग्गवेयणनिवहाओ न भाइयवं च ॥ ५ ॥

सुद्धुच्छतुच्छभोयणवित्ती निच्चं पि एत्थ कायच्चा । गामागराइसु तहा पडिब्धमई विमोत्तच्चा ॥ ६ ॥

इय वच्छ ! तुज्झ साहेमि केत्तियं सुणियसथलभावस्स । तह कहवि पयट्ठेज्जसु जह सिवसोक्खं लहुं लहसि ॥ ७ ॥

एत्थंतरंमि नीसेससयणवग्गेण परिगओ राया । आणंदांमंदगलंतनयणवाहण्णवाहेण ॥ ८ ॥

अभिवंदिऊण चरणे जिणिंदसिरिवद्धमाणसामिस्स । एगंतमवक्कंतो दुस्सहविरहग्गिसंतत्तो ॥ ९ ॥

कुलमयहरियावयणं तहत्ति पडिसुणिय जिणवरो वीरो । सयमेव पंचसुट्ठियलोयं काउं समारद्धो ॥ १० ॥

ते य केसे सामिकरयलपल्हत्थिए सुरिंदो नियदेवदूसंचलेण ईसिविणमियसरीरो सम्मं पडिच्छइ, कमेण य निव्वत्ति-
यंमि लोयकम्मे जिणं अणुन्नविऊण तं कुंतलकलावं मेहपडलं व सामलं दुज्जणहिययं व कुडिलं खीरोयसलिले पक्खिस्सवइ,

दिवतूरनिनायं मणुस्समंगलुगारहलबोलं च निवारइ, अह मगसिरकिणहदसमीए पच्छिमहसमए हत्युत्तरनक्खत्ते वट्ट-
माणे सयमेव संबुद्धो भयवं नमोत्थु णं सिद्धाणंतिक्कहु करमि सामाइयं सवं सावज्जं तिविहं तिविहं वोसिरामिच्चि चारित्तं
पडिचज्जए, एत्थ य पत्थावे अंवरतलट्टिण भूमितलगएण य देवदेवि विजाहरनरविसरेण विमुक्को भगवओ चाउहिंसिपि
इंकारसुहलमसलविलुप्पमाणो सुगंधियसयलजीवलोओ पिंगलियगयणमंडलो पववासनुत्तो, बहलधूमसिहाजालुच्छा-
इयदिसामुहो ठाणठाणेसु ठविओ डञ्झंतागुरुखुरंगमयमीणुगारकणूरधूवघडियनिवहो, पहयाओ असंखसंखयोसु-
म्मिस्ससंभासुइंगमदलकाहलातिलिमडुक्कटकाओ, कओ य निब्बरभरियमुवणंतरालो जयजयारवोत्ति ॥
अह चत्तवसणभूसणमल्लस्स पुरंदरेण जयगुरुणो । वामंसतले नसियं अदूसियं देववरदूसं ॥ १ ॥
नीसामन्ने सामन्नगुरुभरे तह जिणेण उक्खित्ते । काउं साहिज्जं पिव सणपज्जवणाणमुप्पणं ॥ २ ॥
ओलंबियभुयपरिहो वाढं निक्कसियमोहमाहणो । मेरुव निणकंपो काउस्सग्गे ठिओ भयवं ॥ ३ ॥
चउविहदेवनिकाओ नयरज्जो नरवई य नमिज्जण । जयनाहं भत्तीए नियनियठाणे पडिनियत्तो ॥ ४ ॥
इय उत्तमगुणगणवद्धमाणसिरिवद्धमाणचरियंमि । सग्गापवग्गसंगमल्लच्छीण निवासभवणंमि ॥ ५ ॥
गब्भावयारजम्मणादिक्खाकक्षाणकहणपडिबद्धो । संपत्तो पज्जंतं चउत्थओ एस पत्थावो ॥ ६ ॥
इइ सिरिगुणचंदसूरिरइए सिरिमहावीरचरिए गब्भावयारजम्मदिक्खाकक्षाणगमओ चउत्थो पत्थावो

भाविमणत्थसत्थं पेहंताविहु सबुद्धिविहवेण । धीरा सहरिसमणिसं पत्थुयवत्थुं समत्थंति ॥ १ ॥

इति विभाविरुणं व भविस्सोवसगवगसंसग्गासंबुद्धमाणसो महावीरजिणवरो गंभीरिमाइगुणरथणागरो दूरज्झियनीसेवसणोवि वासवोवरोहधरिएक्कचारुवसणो मग्गणगणपूरिआसोऽवि निव्वाणकरो सुक्कतुरयचारोवि दूर-
दमियदुड्ढिदियासो सकलत्तोऽवि परिचत्तपरिग्गहो परिहरियकरिवरोवि मत्तकुंजरगमणो भयवं आपुच्छिऊण अहास-
न्निहिं नायवगं नायसंडवणाओ निग्गओ, कमेण य अतुरियं जुगमित्तिनिहितचक्खुपसरो मुहुत्तावसेसंमि वासरे
कुम्मारागामं नाम संनिवेशं पाविओ, ठिओ य एगंते काउसमगेणंति ।

इओ च सिद्धत्थरायबालवयस्सो कुंडगामपुरवत्थवो महाज्यूवसणविणासियासेसतहाविहद्वनिचओ भोगोव-
भोगलालसो असंपज्जंतवंछियत्थो सोसो नाम बंभणो झीणविहवत्तणेण अचयंतो परिचियजणमज्झे निवसिऊण
गिहे मोक्षूण बंभणिं गओ वइरागराइसु दवोवज्जणनिमित्तं, तत्थ य अइनिविडत्तणओ अंतराइयकम्मस्स अच्चंतपव-
लत्तणओ असायवेयणिज्जस्स निष्फलत्तणओ पुरिसयारस्स अवस्सं भवियव्वयाए तहाविहभावस्स सुचिरं कालं परि-
भमियस्सवि तेसु तेसु ठाणेषु न तस्स काणकवड्डयमेत्तावि संपत्ती जाया, समइक्कंताणि य आसापिसायनडियस्स
बहूइं वच्छराइं, अणया य—

धवलबलायादीहरवथणो अह तरलियविज्जुल्लियनयणो । कलियसुरारायचावो अंजणगिरिसिंगसारिच्छो ॥ १ ॥

परिमुक्कगज्जिघोरदृहासहयविरहियहियवावारो । वरिसायालो वेयालदारुणो इत्ति संपत्तो ॥ २ ॥

तं च दहूण सो सुमरियनियकलत्तो तक्कालवियंभमाणनीलकंठरवसवणचउगुणीकयउक्कंठो दीहं नीससिऊण चलिओ
अविलंविषययाणगेहिं सनयराभिमुहं, अइदूरत्तणेणं मगस्स दुब्बलत्तणओ सरिस्स असमत्थत्तणेणं सिग्घमणस्स
मासपंचमपज्जंते संपत्तो कुंडग्गामे नगरे, पविट्ठो नियगिहे, संभावियविट्ठदवाए अब्भुट्ठिओ पणइणीए, दिणं
आसणं, पक्खालिया चरणा, पुच्छिओ सरिक्कोसल्लं, वाहियं सरिं, दंसिओ पणयभावो, भोयणकाले य उवट्ठा-
विया य कंठिगाइ हट्ठे विणिवट्ठिऊण विचित्ता रसवई, काराविओ भोयणं, तटुत्तरकालं ठिओ सयणिज्जे, वंभणीवि
पहिट्ठहियया समीवमागया तस्स, आरद्धा य पुच्छिउं, जहा-अज्जपुत्त ! केसु केसु देसंतरेसु परिभगिओ एत्तियं
कालं ? केत्तियं वा दविणजायमज्जियंति ? , तेण भणियं-पिए ! केत्तिए साहेमि देसे ? , किं वा केहेमि दविण-
ज्जणं ? तहाहि—

सिरिपच्चवइरागरसमुदपरतीरोहणगिरिसु । रसकूवियासु विवरेसु मुयंगभीमेसु विविहेसु ॥ १ ॥

भमिओ एत्तियकालं दच्चपिवासाए गेगठाणेसुं । विहिओ य खन्नयाओ धमिया य सुवणणपाहाणा ॥ २ ॥

अंजणसिद्धिनिमित्तं दिट्ठोसाहिणो निरुविया बहुसो । विहिया नरिंदसेवा वियाणिया मंतंतताई ॥ ३ ॥

असिचावकुंतचक्काइएसु सत्थेसु जणपसिद्धेसु । पक्कओ परिस्समोविट्ठ किं किं अहवा मए न कयं ? ॥ ४ ॥

तहविहु पिए ! न जाया भोयणसेत्तावि मज्झ सामग्गी । तुह दंसणतण्हाए नियत्तिओ केवलं इण्हि ॥ ५ ॥

इमं च आयणिऊण वज्जताडियच्च सुसियच्च सा माहणी कसिणवयणा कोवफुरंताहरा रत्तनयणा भणिउमाढत्ता-आ पाविट्ठ ! अवलक्खणसिरसेहर ! वाहणसरिच्छ ! निब्भग्गनिडाल ! जइ एवं ता कीस एत्तियं कालं कडुघोसेडीफलाइ बुक्कमाणो ठिओऽसि !, किं निरास ! तत्थ वसंतेण तुमए इमावि वत्ता न निसामिया ? जहा पोक्खलावट्ठगमेहोच्च अणवरयकणगधाराहिं सिद्धत्थनरिंदनंदणो संवच्छरं जाव वरवरियापुव्वगं वरिसिओत्ति, किन्न पेच्छसि पुरओ आज-म्मदारिहियावि रहतुरयवाहणा परिहिद्यदिवाभरणा कारियउत्तुंगभवणा नियपणइणीपरिगया जिणप्पसाएण विल-संति ?, किं वा न दिट्ठा पडिपुण्णमणोरहा उवलद्धकणयरासिणो सगिहेसु पडिनियत्तता देसंतरायजणा ?, बंभ-णेण भणियं-पिए ! दूरदेसंतरनिवासत्तणेण नो सुणियमेयं मए, किं करेमि विपरंमुहो हयविही दीहकालमणुभ-वियच्चा विसमदसा, बंभणीए भणियं-अज्जवि लहुं गच्छसु तस्स सगासे, करुणापरो खु सो भयवं निच्छियं तुमए मग्गिज्जमाणो किंपि दाविस्सइत्ति, एवं निसामिऊण धाविओ महावेगेण जिणाभिमुहो बंभणो, आपुच्छंतो पत्तो कुमारगामं, दिट्ठो काउस्सग्गठिओ सुरवइनिहित्तसुगंधचुण्णपरिमलुम्मिमलंतच्छप्पयच्छणदेहो भयवं जिणवरो, तिपया-हिणिकाऊण पणमिओ परमायरेणं, विण्णत्तो य जहा-देव ! निसामेसु मम वत्तं-

कंठब्भंतरपक्खलियजीहमफुडक्खराए वाणीए । को को न पत्थिओ नाह ! दाणविपरंमुहोवि जणो ? ॥ १ ॥

कथं न वसिओ पहधूलिधूसरो देव ! पहियगेहेसुं । हयउयरएरणट्ठा किं वा न कयं कुकम्ममवि ? ॥ २ ॥
दविणोवज्जणेहं लहुं पविट्ठो कयंतवयणेवि । नेवत्थंपि नडेण व तं नत्थि मए न जं धरियं ॥ ३ ॥
इय दूरेदसविहरणपरिसमुण्णविविहरोगस्स । विगओ एत्तियमेत्तो कालो मम मंदपुन्नस्स ॥ ४ ॥
संपइ पुण धरिणीए आगयमेत्तस्स साहियं एयं । जह संवच्छरसीमं दिन्नं तुमए महादाणं ॥ ५ ॥
केसिपि नगरपट्टणगामागरपवरदवभंडारा । अन्नसिं मयजलगंधंधुरा उट्ठुरा करिणो ॥ ६ ॥
अन्नसिं पारसवब्बरउलवल्हीयसंभवा तुरया । केसिपि जच्चकंचणजडिया वरभूसणुग्घाया ॥ ७ ॥
इय संकप्पियभूरिप्पभेयदाणेण कप्पतरुणव्व । निम्महिया नाह ! तए तण्हा मेहेण व जणाणं ॥ ८ ॥
एक्कोच्चिय दुग्गयलोयतिलोयभूओ ठिओ अहं विहलो । पुवभवजणियदुविसहुदुक्कम्माणुभवेणं ॥ ९ ॥
करुणारसवरिसणिसित्तदुक्खसंतत्तसव्वभुवणवण ! । ता पसिय पणयवच्छल ! पूरेसु मणोरहं मज्झ ॥ १० ॥
तुज्झ पयकमलेसवाविथंभियं सगमच्चपायाले । जं कीलंति जहिच्छं सुरवइनरनाहदणुवइणो ॥ ११ ॥
सिद्धत्थरायनंदण ! तुमएऽविहु जइ कहंपि चत्तोऽहं । पायालनिवडियस्स वि नत्थि धुवं ता मम परित्ता (वरिस्ती) १२
एमाइ दीणयावसगलंतनयणंसुधोयवयणेणं । तह तेण विन्नविज्झइ जह भिज्झइ वीयरगोऽवि ॥ १३ ॥
भगवयावि एवमायणिऊण समुच्छलियापरिकलियकारुण्णवित्तेण भणियं-भो भो देवाणुप्पिय ! परिचत्ता-

सेससगोऽहं संपयं, तुमं च अचंतदोगचभरविहुरियसरीरो, अओ जइवि असारिच्छमेयं तहावि गिणहसु इमस्स देव-
दूसस्स अद्धंति, जं सामि ! आणवेइत्ति भणिऊण हरिसवसुगयवहलपुलओ बंभणो वत्थस्स अद्धं गहिऊण कयप्प-
णामो अणुचिंततो पुणो पुणो सामिस्स अपुवसु दारत्तणं गओ नियगेहं, दिट्ठो य बंभणीए, पुच्छिओ परमायेरणं,
साहिओ तेण देवदूसद्धलामो, जाओ बंभणीए परमसंतोसो ।

अन्नदिवसे य तेणवि समप्पियं तं दूसद्धं दसिगाबंधणत्थं तुन्नागस्स, तेणवि तारिसमदिट्ठपुव्वं पेच्छिऊण
पुच्छिओ सो बंभणो-भइ ! तुमए कहिं लद्धमेयं ? , न जेण एरिसदूसाइं महीयले दीसंति, बंभणेण भणियं-मुद्ध !
भगवया दिण्णंति, तुण्णागेण भणियं-बीयंपि खंडमाणेहि, जेण उभयखंडमीलणेण तुण्णेमि एयं, पडिपुण्णं व दीणा-
रलक्खसुद्धं पावेइ, अद्धेण य तुज्झ ममंपि दव्वं भविस्सइत्ति, बंभणेण भणियं-कहं पुण दुइज्जयं वत्थद्धं लभि-
स्सामि ? , जिणसमायारवियक्खणेण भणियं तुन्नागेण-जया खाणुगाइफरिसेण सामिखंधेदसाओ निवडइ
तया गिणिहज्जासि, एवं सोचा सो तल्लोभेण लग्गो भगवओ पिट्ठीए, जहा य तस्स तल्लामो भविस्सइ
तहा पुरओ भणिस्सामि ।

अह कुम्मारगामवहिथा पडिवन्नपडिमस्स पलंबियमुयस्स भगवओ महावीरस्स समीवे सयलदिगवाहपरिस्संते छुहा-
भिहए चरमाणे वसहे भलविऊण एगो अचंतपावसंगयसरीरो विणयणयविणणजा(नो)णविज्जिओ गोवालो गावी-

दुहणनिमित्तं गओ गाममज्झे, तत्थ द्वियस्स वावारंतरवावडणेण लग्गा महती वेला, ते य वड्डणा खणमेकं भगवओ समीवे चरिऊण खुहाभिहयसरीरा सणियं सणियं तिणभक्खणं कुणभाणा पविट्ठा अडविं, सो य गोवालो खणंतरेण आगओ भगवओ समीवे, वसहे अपेच्छतो पुच्छिउमारद्धो-भो देवज्जया ! जे तुह मए भलाविया पुंवं वसहा ते साहेसु कत्थ गयत्ति ? ,सामीवि असुणिंतोव तुणिहक्को ठिओ, तेणावि नायं-नूणमेसो महाणुभावो न जाणइत्ति, तओ गिरिकंदरेसु य नईसु य निज्झरेसु य महातरुहणेसु य गामंतरालेसु य अन्नसु य विविहप्पएससु य गोसामि-यभयभीओ विमणहुम्मणो तं सगगं काउमारद्धो, ते य वसहा सुचिरं सच्छंदप्पयाणेण उवसंतछुहावेयणा पुणोवि समागया तत्थेव पएसे, भयवंतं दट्टूण रोमंथता य ठियत्ति, सो य गोवालो अणुवल्दगोणपउत्तिविसेसो चउपहर-रयणिजागरपरिमिलाणनयणो रेणुभरधूसरियसरीरो खाणुकंटगाइपरिविहओ सुचिरं परिसमिऊण बलिओ तेणव पएसेण, दिट्ठा य ते सामिणो समीवे सुहनिसन्ना नियवसहा, अह रोसारुणियच्छो फलसगिराए भयवंतं तज्जिउमा-ढत्तो, कहं विय ?—

देवज ! दुज्जणो इव दावोसि पसंतवत्थनेवत्थं । अन्विमतओ पुण चित्तकुडिलया एरिसी तुज्झ ॥ १ ॥

जं गोविऊण हरणट्ठया तुमं मज्झ संतिए वसहे । नूणमियाणिं गच्छंतओऽसि जइ मं न पेच्छतो ॥ २ ॥
तावित्थ चंगिमा तुह वयस्स ! अरि भल्लिमा विवेयस्स । गोमट्टत्तणमणं किंपिय दक्खिन्नभावस्स ॥ ३ ॥

मन्ने पलवियभुओ निरुद्धनीसेसवज्जवावारो । तं जणमुसणनिमित्तं उवायजालं विचिंतेसि ॥ ४ ॥

इय दुव्वयेहिं तज्जिऊण सो दावणेण हणिउमणो गोवालो वेयालोव्व धाविओ भयवओऽभिमुहं, एत्थंतरे सोहं-
म्मसभासीहासणनिसण्णो सहस्सनयणो सामिस्स लुहविहारोवलंभनिमित्तं ओहिं पउंजइ पेच्छइ य भयवंतं पडुच्च
वेणेण धावमाणं तं गोवयं, तओ तत्थट्ठिओऽवि तं थंभिऊण सको दिवाए देवर्गइए उइण्णो जिणसमीवे, तज्जि-
उमारद्धो य तं गोवालयं, जहा-रे दुरायार ! पुरिसाहम ! पसुनिविसेस ! नूणं एयाण वसभाण चैव पुण्णेहिं न
भवसेसि तूमं तिणाइ, जो एयं सिद्धत्थनारिंदनंदणं परिचत्तकरितुरयपाइक्कसंदणं संपयमेव गहियपव्वजं नियधम्मक-
ज्जसज्जं समसुणिपत्तणमणिं वट्ठमाणमहामुणिंपि न सुणेसित्ति, एवं निब्भच्छिऊण तं सको तिपयाहिणीकाऊण भय-
वंतं वंदेइ, सिरनिमियकरकमलो य विन्नवेइ-भयवं ! तुम्ह दुवालस वरिसाणि जाव ससणमेत्तेणवि दुक्खजणगा इयर-
जणजीवियंतकरणखमा पवरसूराणवि लोमुद्धोसजणगा उग्गा उवसगवग्गा भविस्संति, ता कुणह पसायं, अणु-
मन्नह एत्तिंयं कालं मम, जेण समीवट्ठिओ वेयावचं भे करेमित्ति, एयं च आयन्निऊणस्सारिकाउसगणेण भणियं
भयवया, जहा-भो भो देविद !

तुह असरिसभत्तिमहाभरस्स जुज्जइ इमं न संदेहो । किं तु न भूयं एयं नो भवइ न भावि कहयावि ॥ १ ॥
जं तित्थया तुम्हारिसस्स निस्साए पुव्वकयकम्मं । खवइसु खविस्संति य खवेति वा निच्छियं सक्क ! ॥ २ ॥

अह परसामर्थ्येणवि जइ कम्मकखउ घडेज ता विहलो । सिरलोयंभचेराइविविहतवचरणवावारो ॥ ३ ॥
अइसंकिलिट्टुचिच्चत्तणेण दढबद्धरसविवागाणं । सयसणुभवणं मोचुं कम्माण ण गिज्जरणमत्थि ॥ ४ ॥
एगोच्चिय सुहमसुहं एस जिओ सहइ कम्मवसवत्ती । अवयारुवयारकरा तस्सेव पमावओ हुंति ॥ ५ ॥
ता जे पुवं सिद्धा जे सिज्झिस्सति जे य सिज्झति । ते नियवीरियकम्मकखएण अन्नोऽत्थि नोवाओ ॥ ६ ॥
एवंविह विविहमहोवसग्गवग्गं वियाणिउं पुंविं । पडिवन्नोऽहं संजमभत्तो का तेसु मम गणणा ? ॥ ७ ॥
इय सुरनाहं विविहोवउत्तिजुत्तीहिं वोहिउं भयवं । काउस्सग्गमि ठिओ नूणं मियभासिणो गरुया ॥ ८ ॥
एत्थ य पत्थावे भयवओ चेव जणणिभगिणीए पुत्तो कयतहाविहघोराबालतवविसससामत्थोवलद्धवंतसुरभवो सि-
द्धत्थो नाम देवो समागओ तं पएसं, सो य भणिओ सुरिंदेण जहा-भो सिद्धत्थय ! एस भयवं तुह आसन्नसयणोत्ति
एगं कारणं, वीयं पुण ममाएसो, ता सब्बहा पासट्ठिओ सामिस्स मारणंतियसुवसग्गं पडिक्खलेज्जासिच्चि, सोऽवि
एयमायन्निज्जण देविंदसंभासणजायपरमतोसो तहत्ति पडिसुणइ, पुंदरोऽवि सट्ठाणं गओ । अह जायंमि पभायसमए
भयवं चलिओ तओ ठाणाओ, कमेण य पत्तो कोल्लागसंनिवेसे, तत्थ य बहुलो नाम माहणो परिवसइ, तस्स य
गिहे महूसवो समारद्धो, निष्फाइया रसवई, जेमइ सयलजणो, एत्थंतरे भयवं सुणियमिक्खासमजो अतुरिं
असंभतो छट्टपारणगे पविट्ठो भिक्खानिमित्तं गाममज्झे, उच्चनीयगिहेसु य परिभमतो संपत्तो बहुलस्स मंदिरं, दिट्ठो

य अणेण अप्पडिमरूवो भयवं भवणंगणगओ, तं च दट्ठण चिंतिउमारद्धो-अहो इमस्स महासुणिणो सरीरलाव-
णया अहो निरूवमरूवया अहो सयललक्खणपडिपुणया अहो पसंतायारत्तणं अहो सस्मिरीयत्तणं, निच्छियं न
होइ एसो सामन्नगुणो, ता धन्नोऽहं जस्स मम गिहमणुपत्तोत्ति परिभाविंतो उच्छलियवहलपुलयजालो मुत्ताहलालं-
किओव उट्ठिऊण परमायेरेण धयमहुमिस्सं पायसं भगवओ पणामेइ, भयवंपि निच्छिइं चक्कुसलंछणलंछियं
पसारेइ करकमलं ।

अह पाणिसंपुडे बंभणेण खित्तंभि पायसे पवरे । गयणयले सुरनिवहा ओयरिउं भत्तिभरभरिया ॥ १ ॥

वायंति केवि जयदुंदुहीओ अन्ने सुयंति जुसुभाइं । चेलुक्खेवं केवि य करंति अन्ने थुणंति जिणं ॥ २ ॥

गंभीरगुरगिराए अहो सुदानंति केइ धोसंति । अच्छिन्नकणयधाराहिं हरिसिया केइ वरिसंति ॥ ३ ॥

सेसोऽवि गामलोओ तहाविहं पेच्छिऊण अच्छरियं । विम्हियहियथो सहसा जिणस्सगासं समल्लीणो ॥ ४ ॥

किं बहुणा ?—भयवं पायसलाभेण निवुओ माहणोऽवि कणगेण । विम्हियरसेण लोगो एवं जाओ महाणंदो ॥ ५ ॥

अह चम्मचक्खूहिं अपेहिज्जंतो पारिऊण भयवं अन्नत्थ विहरिओ । गामाणुगामेण परिभंसंत्तस्स य सामिणो
पव्वज्जासमयसुरविखत्तकुसुमवासुन्नगंधवासियंमि सरीरे कयज्झंकारवा निरंतरं परिसुक्खणकुसुममयरंदा भमर-
नियरा पीडं उप्पायंति, चिरनिच्चसणेण य किंचि अपावमाणा रोसेण नेहेहिं विंधंति मुहेहिं खाइंति, वसंतसमए

रोमकूयनिगयं सिणेहमापिबति, सरीरमारूढा य समं विहरन्ति, गामतरुणाथवि तेण गंधेण आयरसियचित्ता भणन्ति-भयवं! अमहं पि देहि इमं गंधजुत्तिं, सुरभो तुज्झ सरीरगंधो, तथा नवनीलुण्णपलपलाससरिच्छमच्छिजुयलं सुरभिनीसाससुभगं सुहकमलं रूवसंपयं च दट्ठेण भयरुद्धयसरपहारज्जरियहिथयाओ गामतरुणीओ गामाणुगायं परियट्ठमाणस्स भगवओ निवासट्ठगं पुच्छन्ति, बहुप्पयारं उवसगंति यत्ति । एवं पवज्जादिणाओ आरब्ध चत्तारि मासा समहिथा जाव सुरनिहित्तवासपच्चइया दुट्ठभमराइणो उवसग्गा जायत्ति ।

अन्नया तेलोक्कतिलओ सयलुण्णनिलओ सामी परियडतो गओ मोरगसन्निवेसे, तत्थ दूइज्जंता नाम तावसरूय-धारिणो पासडिणो परिवसन्ति, तेसिं च अहिर्वइ जलणस्सम्मो नाम, सो य भित्तो सिद्धत्थरणोत्ति पुव्वनेहेण सामि दट्ठेण सागयन्ति भणिऊण संसुहसुबट्ठिओ, भयवयावि पुव्वपओगेण चेव वाहा पसारिया, तओ कुलवइया संसभम आपुच्छिऊण पुव्ववत्तं भणिओ भयवं-कुमारवर ! एत्थेव निवसह किंचिकालं, निप्पच्चवाओ एस आसमो, न य कोइ ज्ञाणविगघकारी, वासारत्तस्सवि समुचिओत्ति, ता सब्बहा जइ संपयं न ठाउकामो तहावि वासासु इहावसेज्जासित्ति वुत्ते सामी तवयणं पडिसुणिय तत्थेव एगराई वोलेइ । तयणंतरं च—

पणट्ठपेमबंधणो असंखदुक्खनासणो । पसंतचित्तसुंदरो सथेज्जजित्तमंदरो ॥ १ ॥

बहूवसगसंगओ गओ व मंदगाभिओ । भिओव सुन्नसेवओ व(पि)उव रक्खणुज्जुओ ॥ २ ॥

मडबखेडकब्बडे अणेगलोगसंकडे । सुरिंदविंदवंदिओ परिब्भमेइ सामिओ ॥ ३ ॥

एवं च हिंडमाणस्स जयगुरुणो पज्जंतमणुपत्तो गिम्हसमओ, उवागओ वासारत्तो, तओ थणियसहं कुणमाणेसु सजलजलहरेसु मंदं मंदं निवडंतीसु वारिधारासु नियनियगेहमणुवच्चंतेसु पहियजणेसु माणससरं सरतेसु रायहसेसु सामी पडिनियत्तिऊण समागओ तत्थेव मोरागसंनिवेशे, दिट्ठो कुलवई, समण्णिओ तेण पेमसवस्समुव्वहंतेण संछन्ना मढो, वुत्थो तत्थ पलंबियमुओ काउस्सग्गेण भयवं, एवं वच्चंति वासरा ।

अह वट्टमाणंमि पढमपाउसारंभे निट्ठिएसु चिरं संचियवुसतणपलालपमुहचारिविसेसेसु अणुगमंतेसु अभिणयत-
णाईसु कत्थवि किंपि भक्खणिज्जं अपावमाणाइं गोरूचाइं छुहापरिगयाइं आगंतूण तेसु तावसग्गिहेसु छायणतण-
भक्खणत्थमल्लियंति, तावसावि निट्ठुरलट्ठिप्पहारेण ताणि कुट्टिऊण निट्ठाडिति, दुवारट्ठिया य निचंपि सव्वायरेण
रक्खंति नियउडवए, गोरूयाणि तेहिं ताडियाणि इओ तओ परिब्भमिऊण अविज्जमाणरक्खणं भगवओ मढं
उव्वहंति, तावसावि नियग्गिहट्ठिया तं विलुप्पमाणं पेच्छिऊण भयवओ उवरि परिओसमुव्वहंति-अहो अम्हे निय-
उडवए रक्खेमो, एस पुण समणो मणांगंमि न रक्खेइ, ता किं करेमो?, कुलवइणा धरिओत्ति न किंपि पारिज्जइ
पच्चक्खं फरसमुल्लविउंति, एवं च पइदिणं जायमाणे पस्सुगढमच्छराणुवंचा एगया गया ते कुलवइसगासे, सोचा-
लंभं च भणिउमाडत्ता, जहा-सामि !

अह गिहे तुम्हेहिं कोऽविहु मुक्तो उ जो इसो समणो । सो अच्चंतं नियकज्जकरणपडिबद्धावरो ॥ १ ॥
एयंपि नो विद्याणइ गोरूवेहिं जहागिहं एयं । पइदिणमुवदविज्जइ रक्खइ न खणंतरं एयं ॥ २ ॥

किं आलसं अहवाऽणुकंपणं अहव होज्ज व उवेहा । निद्विखणत्तं वा न याणिमो तस्सऽभिष्णायं ॥ ३ ॥

अहवा मुणित्ति गोरूववारणं नो करोति स महप्पा । गुरुदेवपूयणपरा अम्हे समणा न किं होमो? ॥ ४ ॥

हे कुलवइ ! जइ रुट्ठोसि अम्ह तं उडवयं हणिज्जंतं । एएणावि पओगेण वंछसे ता लहुं कहसु ॥ ५ ॥

जेण विमुंचामो तस्स संकहं को मए सह विरोहो? । रुट्ठोवि तोसणिज्जो जो किर को तेण सह माणो? ॥ ६ ॥

तुह चित्तवित्तिमवियाणिऊण णूणं मुहा कओ रोसो । तस्सोवरि अम्हेहिं का वा मूढाण होइ मई? ॥ ७ ॥

इय ईसाभरसम्मिस्सकोवदरफुरियअहरमुखविउं । दूइजंतगमुणिणो कुलवइपासाउ निक्खंता ॥ ८ ॥

ते य तहा गच्छमाणे दट्ठण कुलवई सवायेरेण वाहाराविऊण भणिउमाढत्तो, जहा-भो महाणुभावा ! किमेवं
परिकण्णह?, को मज्झ दोसो?, मए वयंससिद्धत्तरायपुत्तोत्ति कलिऊण एयस्स मुणिणो गउरवं कयं, किं मए एयं
विद्याणियं? जं एसो एवं नियगेहमुखेहिस्सइ, एवं ठिएवि तहा करिस्सं जहा न विणस्सइ तुम्ह आससो, एत्तो
मा वहिस्सह संतावं, मा चित्तिज्जह कुविगण्णजालं, तुम्हाणं अवरो को मम पिओत्ति?, एवमायन्निऊण जायसं-
तोसा गया ते जहागयंति, कुलवईवि गओ जिणसगासे, दिट्ठो उडवओ निलुत्तपुखपुडविडओव नाममेत्तावसेसो,

तं च पेच्छिऊण चित्तिं कुलवइणा-अहो सम्ममुवइहुं तेहिं वरागेहिं, मए पुवं वियाणियं-मच्छेण एए जंपति,
इयाणिं पुण एयंदंसेणे जहावट्ठियं नायंति, एवं संकप्पिऊण भयवंतं भणिउमाढत्तो—

चउरासमगुरुणो तं सुओऽसि सिद्धत्थमुवइस्स जओ । तइलोकूपिहियकित्ती ता तं पइ किंपि जंपेमि ॥ १ ॥
तुज्झ पिउणावि एयं आसमपयमायेरेण निचंपि । रक्खियमिणिं ह पुत्तय ! पालेयवं हवइ तुमए ॥ २ ॥
दुट्ठाण ताडणं चिय तुम्ह नयं तेण सुक्कपरिसंको । कीस न गोरूवाइं तणभक्खणओ निवारिसि ? ॥ ३ ॥
सउणीवि वच्छ ! नियनीडरक्खणं कुणइ सबजत्तेणं । भूभारधरणधीरो किं पुण तुम्हारिसो पुरिसो ? ॥ ४ ॥
अम्हारिसजइजणरक्खणइया निच्छियं पयावइणा । तुम्हारिसा महायस ! निष्काइज्जंति सप्पुरिसा ॥ ५ ॥
अन्नह गोरूवेहि व दुट्ठेहिं धम्मपच्चणीएहिं । उवहम्मंता अम्हे कं सरणं किर पवज्जंता ? ॥ ६ ॥
ता गिहनाहोव कुमार ! वससु तुह संतियं इमं सबं । पइं दिट्ठे पियमिच्चं सिद्धत्थनिवं सेरेमि अहं ॥ ७ ॥
इय संथवणोवालंभणयसिक्खवणगम्भवयेणेहिं । भणिऊण जिणं सो तावसाहिओ पडिगओ सगिहं ॥ ८ ॥
अह तेसिं भयवं तो मुणिउं अप्पत्तियं महासत्तो । जयजीवहिएक्करओ चित्तेउमिमं समाढत्तो ॥ ९ ॥
मज्झ निमिस्सेण इमे पाविंति अबोहिवीयसइभीमं । ता सबहा न जुत्तं एत्तोऽवत्थाणमिह काउं ॥ १० ॥
इय सुवणगुरु संचित्तिऊण जाएऽवि वरिसयालंमि । ठाणाओ तओ चलिओ परपीडावज्जिणो गरुया ॥ ११ ॥

एत्तो चियं अब्बोहिंवि परणीडावज्जणमि जइय्वं । जहसत्तीए एवं जम्हा सद्धम्मसारोत्ति ॥ १२ ॥
एयं चेव भगवया वेरगणकारणमुव्वहंतेण तिवा पंच अभिगहा गहिया, तंजहा-अचियत्तकारए उग्गहंमि न
वसियव्वं, निब्बं उस्सग्गं करेय्वं, एगदुवयणवज्जं भोणेण ठाइयव्वं, पाणिपत्ते भोत्तव्वं, एगे किर सरिणो एवं भणंति,
तं च किर कहं?—सपत्तो धम्मो पत्तवेयव्वोत्ति भगवया पढमपारणे परपत्तमि मुत्तं, तेण परं पाणिपत्तमि जाय
छउमत्थोत्ति, गिहत्यो य न अब्बुट्ठेयव्वोत्ति पंचमो, एवं च गहियपंचाभिगहो अद्धमासावसाणे तत्तो नीह-
रित्ता अट्टियगामंमि वच्चइ, तस्स पुण अट्टियगामस्स पढमं वद्धमाणानाममासि, तं च किर कहं ववग्गंयंति?
निसामेह कारणं—

कोसंबीए नयरीए असंखदविणसंचओ धणो नाम सेट्ठी परिवसइ, तस्स अणेगोवजाइयसएहिं पसुओ धणदेवो
नाम पुत्तो, अच्चंतं पाणप्पिओ वीसासट्ठाणं च, सो य अन्नया अणेगकुवियप्पदुट्ठसत्तभीसणं समुल्लसंतमयणकुसुभसरं
रंगंतण्हामिगविहियापडलं दुव्वारपसरेंदियचोरभयावहं दुरुत्तारमूढयामहानिम्भगाविसमं अन्नं व रउइं संपत्तो
तारुणं, तवसेण य वसइ वेसागिहेसु रमइ जूयं पइदियहं विहवइ अत्थसंचयं, कुणइ विविहे विलासे, उवचरेइ दुल्ल-
लियगोहिं, पोसेइ नडनाडइज्जगायणपसुहं अनिवद्धं जणं, नाउवेक्खइ कुल्लमं न परिचितेइ सयणाववायंति, एवं
च वच्चंतेसु य वासरेसु खीणेसु दव्वपडिपुण्णमहानिहाणेसु, सुन्नीभूएसु कोट्टागारेसु चित्तियं धणसेट्ठिणा-अहो

अजपज्जयाइपुरिसंपरंपरागथंपि अपरिकलियसंखंपि खयं व पत्तमियाणिं सम धणं, ता न जुत्तं एत्तो पुत्तस्स उवेहणंति निच्छिऊण एगंते भणिओ धणेदेवो-पुत्त ! तुम्हारिस्ताणं उवभोगाइनिमित्तमेव अत्थोवज्जनमम्हाणं, न एत्तो विसिट्ठं ठाणमत्थि, केवलं जराज्जरियसरीरोऽहमियाणिं असमत्थो चंक्रमणमेत्तेऽवि अखमो समहिगभासियेव्वेवि अपरिहत्थो कलाकोसल्लेवि, ता वच्छ ! तुमए एस सव्वो लुहुवभारो धम्मववहारोय अणुचिंतणिजो, सो य अरथं विणा न तीरए सुहुत्तमवि सोढुं, अत्थोत्ति नाम पवरो पुरिसत्थो, तहाहि—

अत्थेण सुगुणसुणिजणखेत्तनिहितेण सुहफलोणमियं । निष्काइज्जइ सद्धम्मसस्सयं विणु पयासेण ॥ १ ॥
किं पुत्त ! तए न सुयं जिणाण दिन्नाउ जेहिं भिक्खाओ । पढमाउ ते य तस्मिंवि केऽवि जणा सिक्खपयं पत्ता ॥ २ ॥

केई तइयभवेणं सुरवरसोक्खाइं भुंजिउं धीरा । सट्ठाणनिहिततहविहइत्थसामत्थओ सिद्धा ॥ ३ ॥

अत्थेणं चिय कोसुइमयंकतुल्लाणणाउ तरुणीओ । आवद्धपाणिसंपुडमाणाए लहुं पयट्ठंति ॥ ४ ॥

निंदियकुलुभयोविहु सयलकलावज्जिओविहु धणेणं । पुरिसो गुरुच्च देवोच्च पुच्छणिज्जो हवइ लोए ॥ ५ ॥

जे सूरा समरसिरे जे माणेणं गिरिंदसारिच्छा । जे भव्वकव्वंधेण जंति किंत्तिं परं भुवणे ॥ ६ ॥

जे रुवमरेट्ठेणं मयरद्धयमवि हसंति किर पुरिसा । अत्थट्ठाण जणाणं तेवि हु सेवं पवजंति ॥ ७ ॥

अच्छउ दूरे अन्नो नियगिहिर्णीऽविहु न जेण धजहीणं । आयरइ नरं पुत्तय ! सयलोऽविहु लज्जए तेण ॥ ८ ॥

चिरसंश्रुयावि चिर(सह)कालियावि निचं कओवयारावि । गोहचकारांगपिव भित्तावि सुयंति धणरहियं ॥ ९ ॥
किं बहुणा दढदालिददूमि(स)यं माणुसं विणासंतो । सवंकसो कयंतोवि पुत्त ! आलस्ससमुच्चहइ ॥ १० ॥
इय सव्वगुणाहाणं सधणत्तं तदियरं च दोगच्चं । नियबुद्धीए नाउं पुत्तय ! उचियं समायरसु ॥ ११ ॥
जइ वयसायं वंछसि काउं दविणज्जणत्थमिह भइ ! ता एसो पत्थावो जावड्ज्जवि अत्थि किंपि धणं ॥ १२ ॥
सव्व विणासे जाए अंगिगपि समप्पिही न ते कोडवि । किं पुण ववहारकए भंडोलं जीविगाजोगं ? ॥ १३ ॥
एवं निसुणिऊण भणियं धणदेवेण-ताय ! जइ एवं ता किं तुमए उवेहिओऽहमेत्तियं कालं ? किं मए
अवगणियं कयाइ तुम्ह वयणं ? दंसिया अणुचिया पडिबत्ती ! सुरुद्धताडणेणवि पासिओ विरूवो सुहरागो ?
जं विणस्समाणेऽवि घरमारे ण सिक्खविओऽमिह, अहवा अलं पुव्वगयवइयरसोयणेण, पसीयह मे, देह
आएसं, दुट्ठमहिंलव आकरिसेमि दूरगयंपि लंछि, नंदह तुम्मे वहुं कालं केत्तिमेत्तमेयंति, सेट्ठिणा भणियं-
पुत्त ! किं न सुणेमि तुह कलाकोसल्लं, न जाणामि साभावियं भुयबलं, न लक्खेमि अंगीकथभरधुरधव-
लत्तणं, न बुज्झामि महिं चित्तावट्ठमं, अओच्चिय मए एत्तिदिणाइं न किंपि भणिओऽसि, विससदसाविडि-
यस्सवि पुत्त ! किमसज्जं तुह परक्कयस्स ? , ता इयाणिपि कुणसु समुज्जमं पूरेसु पणइज्जणमणोरहे दलेसु दुज्जणदुट्ठ-
चित्तियं अब्भुद्धेरेसु विहलियं जणं पयडेसु मयंकनिम्मलं नियकुलंति, धणदेवेण भणियं-ताय ! किं पुणरुत्तवयणवित्थ-

रेणं?, पगुणीकरोसु सपडि सत्थं सच्च(सग्ग)संवाहगं च, इय भणिए सेट्ठिणा नारुण से निच्छयं वाहराविद्या नियपुरिसा,
 भणिया य-अरे! करेह संवलगाइसमेयं समग्गं सग्गसंवाहगं, संजेत्तेह विविहमहामोहभंडपडिपुणं सगडसमूहं
 उचणेह वलिट्ठं लट्ठसंधोगणं पवत्तेह कम्मकरजणं वाहरह पहरणत्थं गोहसत्थंति, जं सामी आणवेइत्ति पडिसु-
 णिरुण गया पुरिसा, अकालविलंबं समायरियं सच्च, निवेइयं च सेट्ठिणो, सो य वणदेवो ण्हाओ कयविलेवणो केस-
 वद्धसियकुसुमो परिहियपंडुरवत्थो पणयदेवगुरुवरणो आपुच्छियजणणिजणगसयणवग्गो गणिमधरिसमेयपारिच्छे-
 ज्जपडिपुन्नपंचसयसगडीसत्थसमेओ सुसुहुत्ते पट्ठिओ दूरदेसंतरं, ताह पेच्छंतो अपुच्चापुच्चसंनिवेसे किणंतो अन्नोन्न-
 भंडां, आपुच्छंतो देसंतरसमायारं, विण्णासंतो विचित्तभासाविसेसे, देंतो दीणदुत्थियाण दाणं अइगओ दीहम-
 द्दाणं, कमेण रणज्झणिरवसहकंठपलंवन्तं पटियाराग्रनिरुद्धावरसहवाचारो अणेगसहाइजणपयट्ठियंगंतियागणो पडुत्तो
 वद्धमाणगगामसमीवं, तस्स य अन्तरावि समनिवृत्तयंगंभीरखड्डुविसमप्पवेसा आनाभिमेत्तसुहुमवेलुगापडहत्थविसा-
 लुलिणा महल्लचिक्खल्लाणुविद्धतुच्छसलिला वेगवई नाम नई, तहिं च पविट्ठाओ सगडीओ, ताओ पुण उभयपा-
 सावलंविणा जणेण सुसमणेणव धरियपचणेण (धरियवचणेण) सारहिणा निगिणहंतेण वसहनिवहं कोदालाइणा पगु-
 णिज्जेतेण चक्कमग्गेण कहकहवि कट्टेण पावियाओ अद्धमग्गं, अह विसमत्तणओ नदीए दूरपहखीणसामत्थत्तणओ
 वसमाणं अइमारियत्तणओ सगडीणं वाढमायासिया सारहिणो अविगणियकसखं(वं)घाइघाया निवडिया महीयले

बलीषद्वा, बाढमुष्मिगो धणदेवो, वाउलीहूओ परियणो, तत्थ य सत्थे एगो वसभो सयलगोमंडलपहाणो सप्पुरिसो इव लीलाए चिय ससुद्धरियमहाभारो विसमणएसनिथारणसमत्थो य अत्थि, सो य तहाविहविसमनिवडिण सुमरिओ धणदेवेण पप्फुक्कारपुव्वयं च सक्कारिऊण जोत्तिओ सो सगडीए, तक्खणं अखेवेण य गओ सो निक्खवडसा-मत्थेण गहिऊण लीलाए भारियंपि तं नईए परकूलं, जहा सा एगा, एवं पंचसथाणिवि सगडीयं निघाहियाणि तेण विसमणएसोत्ति । अविय—

एगत्तो सो वसहो अन्नत्तो सयलगोणसंघाओ । उत्तारइ सगडीओ सत्तावत्सत्थि किमसज्झं ! ॥ १ ॥

अइदुद्धरभरपरिकट्टणेण तुट्टं तडत्ति से हिययं । वयणुग्गीरियरुहिरो धसत्ति धरणीयले पडिओ ॥ २ ॥

तं च तारिसमवत्थंतरं पत्तमवल्लोइऊण धणदेवो परिसुक्कसेसकायघो सोयभरमुव्वहतो वाहारावेइ विज्जे, कारवेइ चिगिच्छं, सयमेव समीवडिओ बंधवं व भित्तं व पडिजागेइ, अन्नदिवसे य भणिओ सो परियेण जहा—सत्थवाह । किमे-गोणनिमित्तं उवेहिज्जंति नियकज्जाइ ? किं न सुणह तुब्भे सीयंति वणिथपुत्ता ?, विणत्संति कियणगाइ ? वोलेति बहवे वासरा, समीवमणुसरइ वासारत्तोत्ति, धणदेवेण भणियं—एवमेयं, किं तु न सक्कमि एयं वराणं परमपित्तं व सत्तावसारं भोत्तुं, परियेण भणियं—तुब्भे जाणह जमेत्थोचियंति, तओ तप्परिहारकायरमणेणवि धणदेवेण सदा-विद्या वद्धमाणगगामप्यहाणा पुरिसा, सुहासणत्था तंबोलाइदाणेण सम्भाणिऊण सप्पणयं वसहस्स समक्खं

भणियं जहा-एसो मम पवरवसभो एरिसदुष्टुत्थामभवत्थंतरं पत्तो ता तुम्हेहिं एयस्स इमिणा रुवगसएण ओसह-
चरणाइचिताए संमं वट्ठियच्चं, एसो तुम्ह नासगो इव समप्पिओ मए, न सब्बहा अन्नहा कायव्वंति निलविऊण सो
मयहत्तरजणे मोयाविऊण वसहस्स पुरओ वहुं चारिं पाणियं च ससिणेहं खामिऊण य तं जहाभिमयं भओ धणदे-
वसत्थवाहो । सो य वसभो गाढवेयणाभिभूओ जेट्टमासदिणयरनिट्टुरकरोलिकरालिओत्ति गिम्हुणहतत्तमहियलडज्झभा-
णदेहो विरसमारसंतो दिणं गमेइ, तं पि से तिणाइयं अवरगोरूवेहिं भक्खिज्जइ, सोऽवि चारिवारिहियत्तणेण गाढ-
वाहिपीडियत्तणेण य सदीणं दिसाओ अवलोएमाणो तणसलिलहत्थे तं पएसं वोलेते जणे दट्ठूण चित्तेइ-नूणं भय
निमित्तं एए इममुवाहरंति, लोगोऽवि तं अइक्कमित्ता नियनियकज्जेसु पयट्ठइ, एवं च सो वसभो पइदिणं तहा-
दंसणविहलियासो, चम्मट्ठिपंजरावसेसो एवं सो परिकप्पेइ-अहो महापाविट्ठो वज्जंगठिनिट्टुरमाणसो निगियणो
चंडालविससो असच्चसंधो कलिकालकलिलकलुसिओ एस गामजणो जेण मम एवं दुहियस्स अच्छउ दूरे करुणाए
तण्णपूलगाइदाणं जं तइया धणदेवसत्थवाहेण मम समक्खं जवसाइ जीवणमप्पियं तं पि गसिऊण ठिओत्ति । एवं
च पइदिणं पओसमुवहतो अकामतणहाए अकामलुहाए अकामतिवेयणाए आउलीक्यसरीरो महानगरदाहभज्झो-
पडिओ इव देहदाहाभिभूओ मरिऊण तंमि चेव गामे अग्गुज्जाणे सूळपाणिनामो वाणमंतरो समुपपन्नो, तहिं च उक्क-
वण्णो समाणो तहाविहं देवरिद्धिं पेच्छिऊण विमरिसिउमारद्धो-अहो मए पुच्चभवे किं दाणं किं दिन्नं ? किं वा तवं

तवियं? कस्म वा उवयारे ठियं? को वा धम्मो सम्ममाराहिओ? कत्थ वा सुतित्थे सरीरचाओ कओत्ति?, इइ विमंसिऊण पउत्तो ओही, दिट्ठं च तं तहाविणारलखं बलीवद्दसरीरं, ताहे समुच्छलिओ से महाकोवानलो वियं-
मिओ अवियेओ समुल्लसिओ अकळकरणपरिणामो, तयणंतरं पेच्छंतु दुरायारा नियपावपायवस्स फलंति विभावित्तेणं तेण विउव्विया सयलगामवांसिजणण मारी, तप्पभावेण य अणवरयं मरिउमारद्धा उत्तिममज्झिमजहन्ना बहवे जणा, जायंति य पइदिणं अक्कदियखा । कंहं चिय?—

हा नाह! पाणवल्लह! कत्थ गओ मज्झ देसु उल्लावं । हा हा कयंत! निक्किय! कह सहसा ववसिओ एवं? ॥१॥
हा वच्छ! किमुच्छंगेऽवि तं गओ अइगओ सि पंचत्तं । मम मंदमाइणीए अहो किलेसो मुहा जाओ ॥ २ ॥
हा जणणि! तहा कट्ठेण पालिउं मं निलक्खणमियाणिं । कह निरवराहएच्चिय न देसि तं मज्झ पडिवयणं? ॥३॥
हा भाय! बंधुवच्छल! हा हा तं भइणि! निक्कवडपेम्मे । एक्कपए चिय चलियाइं कीस मुत्तण मं दुहियं? ॥४॥
हा वच्छे! बहुदविणवएण परिणाविआ पयत्तेण । तहविहु इमं अवत्थं संपत्ता हा हयासोऽमिह ॥ ५ ॥
हा जक्खबंभहरिसूरबुद्धजिणखंदरुदपमुहसुरा । तह पूइयावि संपइ किमुवेक्खह तो कुणह रक्खं ॥ ६ ॥
इय अणवरयं तियचच्चरेसु लोयस्स रोयमाणस्स । परिसुक्कावरकजस्स जंति दुक्खेण दिवसाइं ॥ ७ ॥
एवं च जुगंतसमएच्च रोगेहि य छिइपवेसेहि य पियजणविरहुदुक्खेहि य हिययंसंघट्ठेहि य मरमाणंमि अणेगलणे

सुत्रीभवत्तेषु पवरमंदिरेषु बुच्छिज्जमाणेषु य अइगरुयकुलेसु मडयकोडिसंकुलसु गामरत्थासु भयभीओ अवसेसो
 जणो जीवियरक्खणनिमित्तं लिहावेइ रक्खावल्लं पाणिपल्लवेषु बंधेइ दिवोसहीओ कुणइ महागहपूयं समायरइ
 पियरपिंडप्पयाणं परावत्तेइ विविहमंते समीवट्ठियं धरइ दिवमणिगणं पयट्ठावेइ होमविहिं आपुच्छइ जाणयजोइ-
 सिए समारंभइ गिहदेवयाणं णइयणवल्लिपूयामहूमवं, अन्नपि जं कोइ समाइसइ तं सवं तहट्ठियं निवत्तेइ, तहवि
 ओइण्णमहाजरोच्च पटमच्छुहाभिभूयपंचाणणोच्च निकाइयकम्मनिवहोच्च न मणांगपि सो सूलपाणिवंतरो उवसमं
 गच्छइति । अह गामजणो अणिवत्तंगं दट्ठण मारिं धणक्कणगसमिद्धां गोमहिसितुरगाइपरिकिन्नाइं गिहाइं मोत्तूण
 जीवियट्ठयाइं नियनियकुट्टुवाइं घेत्तूण अन्नन्नगामेषु गओ, तत्थवि गयं महावेरिओच्च उवइवइ सो तग्गामवासिलेयं,
 एगया य तेमिं चिंता जाया-न नजइ तन्थ अस्सेहिं देवो वा दाणवो वा खेत्तवालो वा जक्खो वा रक्खमो वा
 विराहिओ होज्जा, नम्हा ताहिं चैव गंतूण पमाणमोत्ति संपथारिऊण समागया तत्थेव गामे, उवट्ठाविद्या वल्लिकुगुम-
 धूवाइमामग्गी, नयणंतं णहाया पंडुरवत्थक्कयउत्तरांगगा त्वंतंविमुक्कंकेमा सच्चममुदाणं नियचउक्कचत्तय्य
 पटिमडियभूयगिहेन्नु रुद्धमंदावमंहेन्नु उज्जाणंनु य वल्लिं च कुमुमपयं च मुंचमाणा उट्ठमुहा जोडियकंजत्तिणो
 एवं अपिउं पउत्ता—

भो अनरिक्खानियया देवामुत्तमस्वरक्काकिंगुग्गिमा । दिवाटमयंगमया निमुगइ विद्वन्नियं ण्यं ॥ १ ॥

इत्सरियमएणं वा अन्नाणेणं व अविणएणं वा । जं अवरद्धं तुम्हं तं सबं खमह अम्हाणं ॥ २ ॥
पणएसु सदुच्चरिओहखाभाणाउज्जएसु सत्तेसु । जं तुम्हारिस देवा खमंति गरुयावराहंणि ॥ ३ ॥
कोवस्स फलं दिट्ठं पेच्छामो संपयं पसायस्स । इति भणिए सो देवो गयणठिओ वुत्तुमारद्धो ॥ ४ ॥
'रे रे विणट्ठसीला । धट्ठा निण्डिट्ठसिद्धजणचिट्ठा । लोहमहागहनडिआ एत्तो मे खामणं कुणह ॥ ५ ॥
तइया न सरह पावा वसहस्स छुहाइणा किलंतस्स । तणजलसमप्यणेणवि अनुकंपा जं न विहियत्ति ॥ ६ ॥
नियसयणवग्गमरणे जाए संतावमुग्गमुवहह । वसहे तहा मयंमिवि न श्वेमत्तोऽवि भे सोगो ॥ ७ ॥
अलमहुणा भणिएणं वच्चह दूरेवि नत्थि भे मोक्खो । खलविसवेळिं आमूलओवि छिंदेमि दुहहेउं ॥ ८ ॥
इय तव्वयणमायन्निऊण भयवसकंपंतसरीरा धूवकडुच्छुयहतथा सुरभिपुण्णपुंजोवयारं कुणभाणा जय जीवि नंदाइ-
कोमलवयणेहिं शुणंता अट्ठगं निवडिया महीए, भणिउमाढत्ता य-देव ! सच्चमेव अवरद्धमम्हहिं, नत्थि तुम्ह एत्था-
वराहो, तहावि पसीयह इयाणिं, आइसह इमस्स दोसस्स निग्घायणनिमित्तं पायच्छित्तं, 'अइकंतत्थमुभरणं विह-
लं चिय विणट्ठकज्जंमि' किं बहुणा ? , खित्तं नियसिरं तुह चरणपुरओ, कुणसु जं किंवि कीरइ सरणागयाणंति भणि-
ऊण अग्घदाणपुरस्सरं पुणो पडिया चरणेसु, एवं च निसामिऊण सुलपाणिपंतरो मणागं उवसंतचित्तो भणइ-जह
एवं ता एयाणि माणुसद्वियाणि एगतथ पुंजीकाऊण उवरि पवरं कणंतंकिंकिणीधयवडाडोवमणहरं देवहरथं विर-

एह, अब्मंतरे बलीवहाणुगयं जखलपडिमं पइठवेह, निचं बलिकुसुमच्चणियं पयट्टेह, एवं कुणमाणं तुम्हाणं
 जीवियं देमि, न अन्नहत्ति, तओ जं देवो आणवेइत्ति तं तहत्ति विणएण सासणं सिरण पडिच्छिऊण तेहिं गामस्स
 अदूरदेसे जहोवइहं तहेव कारवियं तस्स मंदिरं, इंदसम्माभिहाणो य निरुविओ तत्थ देवचओ, आयेरेण तिसंझं
 कीरइ पेच्छणयंति । एवं च अणेगमाणुसट्ठिनिचयपूरियत्तणेण इंतजंतेहिं पहिएहिं अन्नगामजणपुच्छिज्जमाणेहिं तस्स
 अडिगामोत्ति नामं कयं, पसिद्धिं च सवत्थ संपत्तं । एएण कारणेण अट्टियगामं जायति । तत्थ पुणवाणमंतरघरे जे
 तडियकप्पडियाइणो मग्गपरिस्समपीडिया परिवसंति रयणीए ते सूळपाणी पुट्टीए आरुहिऊण चिरं ताव वोहेइ जाव
 न सक्केति पयमवि दाउं, पच्छा किलिकिलारावं कुणमाणो केइ तिंदूसयं व गयणे उल्लालिऊण अहो निवडंतेसु तिवख-
 खगेण छिंदइ केइ चरणेसु गहिऊण वत्थं व सिलायलंमि पच्छाडेइ केइ धंटं व दुवारतोरणे पलंवेइ केइ खंडाखंडिं
 काऊण बलिं व सवदिसासु पक्खिवइ, एवंविहजायणाहिं पहियजणं विणासेइ, तच्चएण य गामलो गो दिवसे अ-
 च्छिऊण वियाले सगिहेसु वच्चइ, इंदसम्मदेवच्चगोऽवि धूवं पईवं पूयं च से काऊण दिवसओ चेव निक्खमइत्ति ।
 एवं वच्चंतेसु वासरेसु भयवं महावीरसामी तावसासमाओ समागओ समाणो तं वंतरसुरं वोहिउकामो देवचगं
 भणइ-अहो एत्थ जक्खगिहे अम्हे निवसामो?, तेण भणियं-गामो जाणइ, तओ भगवया तत्थेव मिलिओ सयलो
 गामजणो अवत्थाणनिमित्तेणमापुच्छिओ, लोणेणवि अचंतसोमसस्सिरीयरूवं भयवंतं दट्ठण भणियं-देवज्जग ! न सक्का

एतथ वसिष्ठं, एहि गाममज्ज्ञे, गिणहाहि जहाभिरुइयं अमह गिहेसु वसहिं, भयवंपि अणिच्छमाणो भणइ-इत्येव
अणुजाणह, लोणेण भणियं-जइ एवं ता ठाहत्ति, ताहे गंतूण एगमि कोणे पडिमं ठिओ सामी, सो य इंदसम्मो
पच्छिमसेलसिहरं संपत्ते दिवसयरमंडले ध्रुवेलं निम्मविज्जण कप्पडियाइतडियवगं निस्सारित्ता भयवंतंपि
भणइ-देवज्जगा ! तुब्भेवि नीहरह, मा इमिणा जक्खेण मारिज्जिहिह, सामीवि असुणमाणोव तुसिणीए य गमेइ,
पुणो पुणो इय भणंते य देवच्चगे सो वंतरसुरो चित्तेइ-अहो कोऽवि एस देवचएणं गामजणेण य भणिज्जमाणोवि
न गओ एत्तो ठाणाओ, ता पेच्छिही जमज्ज करिस्सामि, बहूणं दिवसाणं दिट्ठियाखेछणगसुवागयंति । एत्थंतरे अत्थ-
मिओ दिणयरौ समागया संझा, सट्ठाणं गओ देवच्चगो, काउस्सग्गे ठिओ भुवणबंधवो ।

ताहे काउस्सग्गे ठियस्स सो भेसणट्ठया गुरुणो । जुगविगमघोरघणघोसविब्भमं भेसियजणोहं ॥ १ ॥

अट्ठट्ठहासमसमं चाउदिसिपसरियं महाभीमं । उच्छलियवहलपडिसहनायविप्फारियं कुणइ ॥ २ ॥

गामलोओऽवि तं सइं सोऊण भयसंभंतो परोप्परं भणइ-अहो एसो देवज्जगो महाणुभावो जक्खेण मारिज्जइत्ति,
तत्थ य उप्पलो नाम परिद्यागो पासजिणत्तिथपुव्वपडिवन्नसामन्नो भोसुण्णायसुमिणंतलिकखअंगसरलक्खणवज्जणरूव-
अङ्गमहानिमित्तसत्थपरमत्थवियाणगो लोगाओ एरिसो तारिसो देवज्जगो जक्खेण मारिज्जिहित्ति निमुणिज्जण मा
तित्थंकारो महावीरो पडिवन्नदिकखो होज्जत्ति संकियमणो वंतरगिहे य तब्भएण गंतुमचाइतो अद्धिइं काउमारद्धो ।

सो य सूलपाणी जाहे अट्टट्टहाससद्देण भयवं न भीओ ताहे पिसायरूवं विउव्वह, तं च केरिसं?—
 अइकविलथूलंलविरकेसोहच्छन्नगयणयलमज्झं । अविपक्कसुक्कतुंबयसरिच्छबीभच्छवयणिहं ॥ १ ॥
 दिसिंखुंजरंखुसागारदूरनिकसियकलुसदसगगं । चिविडगगघोरघोणानिलकंपियकविलमुहलेमं ॥ २ ॥
 लंविबलिचम्मोणद्धमडहवच्छत्थलट्टिसंधायं । पिट्ठावलगलेंजरकप्परसमजरडजठरतलं ॥ ३ ॥
 तालतरुजुयलदीहरनिम्मंसणहारुनद्धजंघजुयं । ठाणट्ठाणोलंबियपलंबतंडवियफणसप्यं ॥ ४ ॥
 अइवेगसुक्ककमभरथरहरियससेलमेइणीवट्टुं । कक्खंतारालनिग्गहिमडयपिसायासणाभिरयं ॥ ५ ॥
 अइकुडिलकत्तिउक्कत्तिंयंगिनिससरियरुहिरपाणपरं । उब्भवियपयंडमुयं पावसमूहं व पच्चक्खं ॥ ६ ॥
 इय एवंविहरूवं पिसायमवि पासिऊण जयनाहो । मसगं व अवगणिंतो धम्मज्झाणं विचिंतेइ ॥ ७ ॥
 ताहे स सूलपाणी उवउत्तो पेहए जिणवरिंदं । मेरुव निप्पकंपं निब्भयचित्तं पवरसत्तं ॥ ८ ॥
 तयणंतरं च पुणरवि भेसणकजेण सो महापावो । निसियगकुंतभीसणउग्गविसुग्गाढदाढालं ॥ ९ ॥
 अविकलियरोसवसनिसरंतविसमिस्सजलणजालेहं । पप्फुरियफारफुक्कारवायभजंततरुनियरं ॥ १० ॥
 वियडुब्भडचडुलफणाकडप्पपडिरुद्धदिसिमुहाभोगं । सिरियणकिरणसंचयदावियगुरुयणदवासंकं ॥ ११ ॥
 कलिकालपदमभित्तं व तिद्वदुरिओहभूरिरासिं व । जमपासंपि व सकखा महिमहिलावेणिदंडं व ॥ १२ ॥

सयं विउवइ महं तो सो सारिं निएण देहेण । आंगतूणावेढइ बाढं थंभं व रज्जए ॥ १३ ॥ पंचहिं कुलयं ।
पुच्छच्छडाए ताडइ सच्छंदं दसइ तिवखदसणेहिं । कंठस्स पीडणेणं कुणइ निरुस्सासयं सहसा ॥ १४ ॥
अह अट्टहासभीसणपिसायनागोवसगकरणेवि । अविचलचित्तं मुणिऊण जयगुरुं गाढकुवियमणो ॥ १५ ॥
सो सव्वं सव्वरिं जाव अचंतरउइं दुरहियासं सत्तविहं वेयणं भगवओ करेइ, तंजहा—सीसवेयणं सवणवेयणं नयणवेयणं
दसणवेयणं नहवेयणं नासावेयणं पिट्ठिवंसेवयणं, एयाणं वेयणाणं एक्ककावि समत्था पागयनरस्स जीवियं ववक्कमिउं, किं
युण सत्त एयाओ एगकालपाउब्भूयाओ अणाइक्खणिज्जरूवाओत्ति?, भयवं पुण ताओ सम्ममहिंयासेइ, सो य वाणमंतरो
जाहे न पारेइ भयवंतं भेसिउं वा खोभिउं वा ताहे बाढपरिस्समसुवगओ अहो निष्फलो मम वावारोत्ति कयचित्तसं-
तावो धीरिसारंजियहियओ य भयवंतं पायवडिओ सवायेरेण भणइ—भयवं! खमह मम अवरहं, अयाणमाणेण तुम्ह
सामत्थं सुचिरं मए अवरद्धंति, एत्थंतरे नियक्ककरणवावडिचित्तो तक्खणसुमरियसुरवइजिणमलवणावयणो सो सि-
द्धत्थेदेवो दट्ठूण भयवओ तिवोवसगं धाविओ वेगेणं, पत्तो तं पएसं, भणिउमारद्धो य—अरे रे सुलयाणिवंतराहमा!
अचंतदुट्ठलक्खणा दोगच्चमच्चुपत्थगा विसुद्धुद्धिवज्जिया न जाणसि खलियारंतो इमं सिद्धत्थरायपुत्तं भयवंतं चरि-
मत्तित्थयरंति?, जइ रे दुरायार! एवं वइयरं सक्को कहवि जाणंतो ता को जाणइ तं किंपि पाविंतीत्ति?, सो य एव-
मायन्निऊण बाढं भयभीओ चउग्गुणं पुणो पुणो जिणं खामेइ, सिद्धत्थो य तस्स धम्मदेसणं काउमाढत्तो जहा-

वीथरागो देवबुद्धीए गहियवो, साहुणो य गुरुबुद्धीए परिभायियवा, तत्तथसहहणं कायवं, सवपाणीणं पीडा परि-
 वज्जियवा, पुव्वदुच्चरियाइं भुज्जो गरहणिजाइं, जओ एक्कसिं कथाणंपि तिक्खपओसेण पावाणं कोडाकोडाइरूवो
 दुहविवागो हवइत्ति, सूलपाणीवि एवमायन्निऊण अणेगलोगक्खयसुमरणउप्पन्नातुच्छपच्छायावो जायसंमत्तो अञ्चत-
 भवविरत्तचित्तो असेसदोसपसमणट्ठा तिहुयणपहुणो पुरओ गीयनट्टमहिमं काउं पयत्तो, गामवासिलोगोऽवि गीया-
 इसइं सोचा चित्तेइ-अहो तं देवज्जयं जक्खो मारित्ता इयाणिं परितुट्ठो सच्छंदमेवं कीलइत्ति, भयवंपि चत्तारि रयणि-
 जामे देसूणे परिताविओ समानो पभायकाले मुहुत्तमेत्तं निदापमायसुवगओ संतो इमाइं दस महासुमिगाइं पस्सइ,
 कइं?, जहा किर मए तालपिसाओ उहुं बहुमाणो निहओ १ पंडुरो(सउणो)चित्तकोइलगो य दुवे पज्जुवासमाणा
 दिट्ठा २-३ सुरहिक्कुसुमंगंधुदुरं दामदुगं ४ गोवगो य पज्जुवासणापरो ५ पउमसरो विबुद्धंपकओ अवलोइओ ६
 कछोलमालाउलो सायरो समुत्तिण्णो भुयाहिं ७ पइण्णरस्सिमंडलं चक्खुगोयसुवगयं दिणयरविंबं ८ नियंतेहिं
 माणुसुत्तरगिरी परिवेदिओ ९ मंदरसिहरं चारुढोत्ति १०, एवं एए दस सुमिणे पासित्ता पडिबुद्धो सामी । एत्थंतरे
 समुगओ सूरु, समागओ धूवक्कुसुमक्खयहतथो सयलगामजणो उप्पलनेमित्तिगो य, ते य दिव्वगंधचुण्णपुण्णवासिंहिं
 समच्चियं अक्खयसरीरं सामिं पेच्छिऊण उक्कुट्टिसीहनायं करेमाणा चरणेसु पडिया, परोप्परं भणिउमेवं पवत्ता
 य-अहो देवज्जगेणं जक्खो उवसामिओ, तेणेसा पूया कयत्ति, उप्पलोवि परिआणिऊण भयवंतं पहिट्ठो, वंदिऊण

चलणजुयलति ए निसन्नो, अह भगवओ काउस्सग्गावसाणंमि पुणरवि नमसिज्ज अट्ठगनिमित्तसाम्थओ मुणियसु-
मिणाइवइयरो भणिउमारद्धो-सामि ! तुब्भेहिं अंतिमराइए दस सुमिणा दिट्ठु, तेसिं इमं फलं-जो किर तालपि-
साओ महादेहो निहओ तमचिरेण मोहणियकम्मं उम्मूलेहिसि, जो य सियसउणो तं सुक्कज्झाणं झियाइहिसि, जो
विचित्तो कोइछो तं दुवालसंगं पणवोहिसि, गोवगेण य जं तुमं परियरिओ तं ते चउव्विहसमणसमणीपमुहो चउ-
विहो संघो भविस्सइत्ति, पउमसरा य चउविहो य देवनिकाओ तुमं पज्जुवासेही, जं च सायरसुत्तिणो तं संसारसुत्त-
रिहिसि, जो य सूरु अवलोइओ तमचिरेण केवलनाणं उप्पज्झिही, जं च उदराउ निस्सरिज्ज अन्तेहिं माणुसुत्तरगिरी
वेढिओ तं ते निम्मलजसकित्तिपयावा सयलतिहुयणे अनिवारियपसरा परिभमिस्संति, जं च मंदरसिरमारुद्धो तं
सीहासणत्थो सदेवमणुयासुराए परिसाए धम्मं पन्नविहिसि, जं च दामदुगं तस्स फलं न याणासि, सामिणा
भणियं-हे उप्पल ! जं तुमं न याणेसि तमहं कहेमि, जं इमं दामदुगं तमहं दुविहं सागारमनागारियं धम्मं पन्नवेहा-
मिन्ति, एवं निसामिज्ज हरिसुल्लसियपुलयजालो उप्पलो नमंसिज्ज जयगुरुं जहागयं पडिनियत्तोत्ति । भयवंपि धम्म-
ज्झाणपरायणो कालं गमेइ ।

अह अद्धमासखमणेहिं जयगुरुवि गमिज्ज चउमासं । विविहाभिग्गहनिरओ अट्ठियगामाओ निकखंती ॥ १ ॥
ताहे स सुलपाणी जक्खो अणुगच्छिज्ज भयवंतं । पयकमलनिलीणसिरो भत्तीए भणिउमाढत्तो ॥ २ ॥

नाह ! तुह तिद्वउवसगकरणओ नत्थि मम समो पावो । जं एत्थ तुमं वुच्छो तेण कयत्थोऽवि नेवत्थि ॥ ३ ॥
 जाणामि सामि ! मम बोहणट्टया तं समोसढो एत्थ । न हु सूणासालाए कोवि निवासं जओ कुणइ ॥ ४ ॥
 बहुजीवविणासणजणियपावपडलेण पीडिओ संतो । नो पेच्छंतो दुक्खं किमहं जइ तं न इंतोऽसि ? ॥ ५ ॥
 ता तुमए चिय भवकूवयाओ हत्थावलंबदाणेण । उत्तारियमिह जयगुरु ! नियसोक्खपरं सुहमणेण ॥ ६ ॥
 इय सूलपाणिजक्खो संथविउं जिणवरं पयत्तेणं । दुस्सहविओगभल्लीए सल्लिओ पडिनियत्तोत्ति ॥ ७ ॥
 पव्वज्जागहणाओ पढमं संवच्छरं जहावित्तं । सिद्धं जइक्कगुरुणो इण्हिं वीयं निसामेह ॥ ८ ॥

अह शुणिकुण वलियंमि जक्खे भयवं गामाणुगामं विहरमाणो गओ मोरागसन्निवसे, तत्थ य वाहिरुज्जाणे शीप-
 सुपंडगाइदोसरहिए पएसे ठिओ पडिमाए, तहिं च गामे अच्छंदूगा नाम पासंडत्था परिवसंति, तेसिं च एगो
 अच्छंदगो लोगाणं मंतंतंतभूइकरणेहिं जीवइ, सो य सिद्धत्थवंतरो भयवंतंमि पडिमापडिवन्नंमि कलहकेलिपियत्त-
 नेण विणोयमपावमाणो नाहस्स पूयमपेच्छमाणो य अधिइं करेइ, अन्नदिवसे य सो भयवओ सरीरे संकंतो तेण-
 तेणं वोलितं एगं गामगोहं सदित्ता कीलानिमित्तं एवं जंपइ-भो भइ ! तुमं कंगुकूरं सोवीरेण सह अज्ज पजिमिओ,
 संपयं च वसहरक्खणट्टया चलिओ, इतेण य मग्गे भुयंगमो दिट्ठो, सुमिणगंमि परुत्तो य ता रे संभवइ सव्वमेयं ?
 गामगोहेण भणियं-भयवं ! अवित्तहमेयंति भणिए सिद्धत्थेण अन्नंपि से बहुं समाइहं, सो परितुट्ठो परमच्छेरयंति

मणमाणो गंतूण गाममज्झे नियसयणवगस्स पुरओ एवं परिकहेइ, अह कोउवि देवज्जओ गामवाहिं ठिओ तीया-
जागयवट्टमाणाइं जाणइ, पूरिया मम तेण बहवे पच्चया, एवं च आयत्तिज्जण गाढकोज्जहाउल्लिमाणमाणसो
गामजणो कुसुमक्खयहत्यो गओ भयवओ समीवं, संभासिओ तेण जिणतणुसंकतेण सिद्धत्थेण, जहा भो तुब्भे मम
अइसयपेच्छणत्थं एत्थ संपत्ता, गामजणेण भणियं-सामि ! एवंति । तदणंतरं—

जं पुव्वकालवित्तं जं च सुयं जं च दिट्ठमित्तिहं । जं भासियं परोप्परमहं जं रयणीए अणुभूयं ॥ १ ॥

जं इट्ठाणिट्ठविओगजोगसुहुदुक्खलाभलोभाइ । अज्जवि भविस्सविसयं तंपि हु सो साहए तेसिं ॥ २ ॥

ते य तहाविहं कोउगं दक्खूण सद्वायेरेण वंदंति पूयंति महिमं च कोरंति, एवं च पइदिणं इंतजंतसु गामिछएसु
पवित्थरिओ सिद्धत्थस्स परमो आणंदो । अन्नया य लोगो भणइ-भयवं ! एत्थं अन्नोवि अच्छंदओ नाम जाणओ
परिवसइ, सिद्धत्थो भणइ-सो बराओ न किंचि जाणइ, ताहे लोगो गंतूण तस्स पुरओ साहेइ, जहा देवज्जगो
भणइ-तुमं न किंपि जाणसि, सो य तं सोच्चा अहंकारमुव्वहतो अप्पाणं ठाविउकामो भणइ-एह तुम्ह समववं अव-
धेनि जेण तस्स परिन्नाणाभिमाणं, दुक्करं खलु अम्हारिसस्स पुरओ अत्तणो पयासणं, सुकरा तुम्हारिसस्स पुरओ
गामिछयाण मज्जे विविहसमुखावत्ति, एवं च नियन्धियक्खणत्तं पयडंतो ईसामहलसल्लविछियहिययो सकोउहल्लेण
लोणेण परियरिओ गओ सो तत्थ जत्थ जणसमूहोवासिजमाणपायकओ भयवं काउस्सगे चिट्ठइत्ति । तयणंतरं च

करंगुलीहिं उभयपज्जतेसु तणयं घेत्तूण भयवओ समुहं ठिओ पुच्छिउमारद्धो-भो देवज्जय ! इमं तणं किं छिज्जिही नवत्ति ? तस्स एस अभिप्पाओ-जइ किर देवज्जो भणिही-छिज्जिही तो न छिंदिस्सं, अह अन्नहा तो छिंदिस्सामि । एवं च विगप्पमाणंमि तंमि सिद्धत्थेण भणियं-न छिज्जिही, सो एवं सोचा समारद्धो छिंदिउं ।

एत्थंतरंमि सक्को सुहासणत्थो इमं विचिंतेइ । गामागरेसु भयवं ! कह विहरइ संपयं वीरो ? ॥ १ ॥

दिद्वोवओगविभवेण वइयरं तं तओ सुणइ सव्वं । पेच्छइ य तं पुरत्थं तणभंगसमुज्जयं समणं ॥ २ ॥

अहूह महापावो कह जिणंमि मिच्छं समीहए काउं ? । इय चिंतिऊण मेछइ महल्ल धारुक्कडं कुलिसं ॥ ३ ॥

तं मणसमाणेवंगं आंगंतुं करजुंगुलीवल्लयं । छिंदइ तस्स सहसा अछिज्जमाणंमि तंमि तिणे ॥ ४ ॥

अहू सो अच्छंदगो कुलिसघायनिवडियासु दससुवि करंगुलीसु जायेवेलक्खभावो सयल्लगामज्जेण विक्कारिज्जमाणो गओ तप्पएसाओ, ताहे सिद्धत्थो तस्सोवरि बाढं पओसमावन्नो तं गामज्जणं भणइ-अरे रे दुरायारो महाचोरो एसो, लोएण वुत्तं-भयवं ! कस्स एएण चोरियं ? सिद्धत्थेण भणियं-निसामेह, अत्थि एत्थ वीरवोसो नाम कम्ममारओ, सोऽविय निसामिज्ज नियनामं लोयमज्झयाराओ आंगंतूण निवडिओ चलणेसु, भणिउं पयत्तो य-भयवं ! तुइहेहिं जो समुक्कित्तिओ सो अहं, साहेह किं कीरउत्ति, सिद्धत्थेण भणियं-भइ ! तुह असुगंमि काले दस-पालियं वट्टगं नट्टपुवं ? तेण भणियं-आमं, सिद्धत्थेण वुत्तं-तं एएण पासंडियाहेमण हरियं, वीरवोसेण भणियं-कत्थ

तं पुण पोविस्सं?, सिद्धत्थेण भणियं-एयस्स चैव पुरोहडे महिसिंदुनामस्स पायवस्स पुरत्थिमेणं हत्थमेत्तं गंतूण भूमिनिहिंसं उक्खणिज्ज गिण्हसुत्ति वुत्ते सो कम्मारओ लोणेण समं गओ जहोवइट्ठपएसे, आगरिसिज्ज गहियं वट्ठयं, हल्लबोलं कुणंतो य जणो पडिनिचसो जिणस्स अतिए । तयणंतरं च पुणो सिद्धत्थेण भणियं-अन्नपि सुणेह, अत्थि किमिह इंदसम्मो नाम गाहावई?, जणेण भणियं-अत्थि, एत्थंतरं सो इंदसम्मो निथयनाममुक्खित्तिज्जमाणं सोज्जण तयमेव उवट्ठिओ भणइ-आणवेह सो अहंति, सिद्धत्थेण भणियं-अत्थि भइ ! तुज्झ पुवकाले ऊरणगो पणट्ठो?, तेण भणियं-अत्थि, सिद्धत्थेण भणियं-अरे एण अच्छंदएण सो हणिज्जण खाइओ, अट्ठियाणि से उक्कु-रडियाए वदरीए दाहिणे पासे उज्झियाणि अज्जवि चिट्ठति, जइ कोऊहलं ता अज्जवि गंतूण पेच्छहत्ति वुत्ते वेणेण धाविथा तदभिमुहं, अट्ठियाणि पलोइयाणि, कलकलं करेता आगथा जिणसगासे, पुणरवि सिद्धत्थेण भणियं-एयं दुइज्जं दुच्चरियं, अन्नपि तइज्जं अत्थि, परं नाहं कहिस्सं, ते य एयमायन्निज्जण गाढं निब्बधं काऊण पुच्छिउ-मारद्धा, कहं?—

देव ! पसीय महापहु पुणोवि अण्णं न पत्तिणइस्सामो । अट्ठोवइट्ठमक्कं एत्थं अम्हं निवेएसु ॥ १ ॥

जह जह न साहइ सुरो तह तह पुच्छंति आउला धणियं । सच्चं जायं एयं जमद्धकहियं हरइ हिययं ॥ २ ॥
एयं निब्बधंपरेसु तेसु सिद्धत्थेण भणियं-अरे मा तरलायह, अम्ह अभासणिज्जमेयं, जइ अवस्सं सोयवें ता

गंतूणं पुच्छह एयस्स चैव भजं, सा तुम्ह साहिस्सइत्ति, एयमायन्निकुण पधाविद्या तग्गिहाभिमुहं, इओ य-सा अच्छं-
दयस्स भज्जा तद्वियं तेण पिट्ठिया, वाढं पओसमावन्ना चित्तेइ-सोहणं जायं जं तस्स अंगुलीओ छिन्नाओ जणेण
धिक्कारिओ य, तथा इयानिं जइ गामो एइ ता सच्चं दुस्सीलयं पयडेमिप्पि विगपंतीए संपत्तो गेहंगणे गामज्जणो,
पुच्छउं पवत्तो य, सा भणइ-मा इमस्स कम्मचंडालस्स नामपि गिणहह, जओ एस नियमगिणीए सहोयराए
सद्धिं विसए अणुमुंजइ, ममं निच्छइत्ति, एवमायणिकुण ते उक्किट्ठीसिहनायं कुणंता नियनियगिहेसु गया पणवेत्ति-
जहा एरिसो तारिसो सो महापावोत्ति, एवं सो अच्छंदओ जणेण अवमाणिकुमाणो कयवंभणहचो इव अपेच्छिज्ज-
माणो लुक्खभिकखाकवलपि अपावमाणो एगया गंतूण जिणनाहं सकरुणं जोडिय करसंपुडं च भणिउमाढत्तो—

देवज्जय ! वल्लेसुं निवासमिह तं महाणुभावोऽस्ति । ठाणंतरेवि तुज्झं पूयामहिमं जणो काही ॥ १ ॥

अन्नत्थं गओऽहं पुण कित्तिमकणगं व नेव अगवामि । सदरीए चिय गोमाउयस्स सूरत्तणं सहइ ॥ २ ॥

तुह पुरओ जो विहिओ दुव्विणओ देव ! मूढहियएणं । सो मं दढकुवियकयंतदडयाओव दुक्खवइ ॥ ३ ॥

एवं भणमाणे अच्छंदगे अचियत्तो गहोत्तिकलिकुण सव्वस्सापत्ति (पीति) परिहारपरायणो भयवं नीहरिकुण मोराग-
सन्निवेशओ उत्तरवाचालाभिमुहं पत्थिओ, अह मग्गे वच्चमाणस्स दक्खिणवाचालसन्निवेशं समइक्कंतस्स उत्तरवाचा-
लसंनिवेशं च अपावमाणस्स अंतरा सुवणणकूलाभिहाणाए महानइए पुलिणं वोलितस्स भगवओ महावीरस्स खंवाव-

लंवि वत्थखंडं कंहं पि पवणकंपिजभाणं कंटए विलगिऊण निवडियं, सामीवि थेंवं भूमिभाणं गंतूण अत्थंडिले पडियं
होअत्ति भणागमेत्तं वलियकंधरो तसवल्लोइऊण जहाभिसयं गंतुं पवत्तो । सो य पिउवयंसो पुव्वभणियं वंभणो चिर-
कालेण तं निवडियं वत्थखंडं पडिडुचित्तो गिणिहऊण भयवत्तं च वंदित्ता कुंडगामनयरमुवगंतूण पुव्वभणियतुन्ना-
गस्स समणोइ । तुन्नागोऽवि अइनिउणं तुन्निऊण एगरूवं विरएइ । तओ सो वंभणो देवदूसं आदाय गओ नंदिवद्धण-
नराहिवस्स समीवे, पणासियं तं वत्थं, राइणावि कोऊहल्लुव्वहंतेण सुचिरं पलोइऊण भणियं-भह् ! एवंविहं पवर-
वत्थं कत्थं तए पावियं ? वंभणेण भणियं-देव ! सहइ एयस्स कहा, राइणावि भणियं-वीसत्थो सम्मं साहसु, तओ

जह दालिदोवहओ सुचिरं देसंतरेसु भमिऊण । नियमंदिरमणुपत्तो गिहिणीए तज्जिओ पुव्वं ॥ १ ॥

जह जिणनाहो करुणक्खरेहिं गंतूण भूरि विन्नाविओ । अणुकंपाए तेणं जह दिन्नं देवदूसद्धं ॥ २ ॥

जह तुन्नाएण पुणो दूइज्जवत्थद्धलाभकजेण । जयगुरुणोच्चिय पासे सिक्खविउं पेसिओ सहसा ॥ ३ ॥

जह संवच्छरमेगं पुट्ठिमि ठिओ पुरागराईसु । सिस्सो इव परिभमिओ जयपहुणो विहरमाणस्स ॥ ४ ॥

जह वा सुवणणकूलानईए कंटगालगवत्थद्धं । चइऊण गए नाहे तयं च गहिऊण चलिओ य ॥ ५ ॥

जह तुन्नागेण तयं दुखंडसंसीघणेण मेलवियं । तह सयलं नरवइणो निवेइयं तेण सविसेसं ॥ ६ ॥

एवं च निसामिऊण तुट्ठो नंदिवद्धणनरिदो दीणारलक्खमेगं वत्थस्स सुलं दाविऊण सबहुमाणं सक्कारिऊण

भणइ-अहो भइ ! कहं भयवं विहरइत्ति, बंभणेण भणियं-देव ! सुणेह, सो जएकनाहो कयाइ फुट्टहासजणियसं-
तासेसु भूयभवणेसु गोदुहियाए दुद्धरं नियमविसेसमालंविऊण नासभगसंगिचकलुविकखेवो मंदरोव यिमिओ झाणं
झियाइ, कयाइ करालवेयालमालाउलासु पयंडपडियनमुंडयंडलीसु सुसाणभूमीसु बीरासणं संठिओ निरुद्धउ-
स्साससमीरपसरो सूरविंवनिहियनयणो मज्झदिणंयि आयावेइ, कयाइ गुरुभारकंतनरोघ ईसिअवणथकाएण पलं-
वियभुयदंडो गामवहिया काउस्सगणे चिट्ठइ, कयाइ निक्कारणकुवियपिसाथविहियतिवोचसगं सोकखपरंपरं पिव
सम्ममहियासेइ, कयाइ छट्ठममद्धमासाइतव विसेससुसियसरीरो पंतकुलपरिब्भमणलुंदुलुञ्जुआसाराहार गहेण
पाणवित्तिं निव्वत्तेइ ।

कइयावि हीणरूचेहिं दुट्ठसीलेहिं कीडमेत्तेहिं । पागयनरोहिं विहियं विसहइ सो तिव्वसुवसगं ॥ १ ॥

सा आवथावि सण्णे नियुणिज्जइ जा जएक्केदेवस्स । दइयच्च दुन्निवारा नेव समीवं समल्लियइ ॥ २ ॥

एवं किर तस्स महायसस्स उत्थरइ दुत्थिमा भीमा । कइयावि तियसनिवहा पूयामहिमं पकुवंति ॥ ३ ॥

इय नरवर ! तच्चरियं न मारिसो किंपि साहिउं तरइ । तारिसजणचरियाइं सुणंति जइ तारिसा चेव ॥ ४ ॥

एवं निसामिऊण राया तपरिसाजणो दीहरमुक्कनिस्ससो अच्छिन्ननिवडंतवाहापवाहाउलवयणकमलो सोगे
काउमारद्धो । बंभणोऽवि गओ सणिहं । समण्णियं तुन्नागस्स मोलऽद्धं, सेसदेवेण विविहं विलसंतो कालं वोलेइत्ति ।

इओ य-वद्धमाणसामी उत्तरवाचालसन्निवेशे गंतुकामो कुडिलपहपरिहारेण उज्जुयमगाणुलमगणगखलामि-
हाणासममज्झेण पट्ठिओ संतो निवारिओ गोवालेहिं, जहा-भयवं! एत्थ आसमे दिट्ठीविसो सण्णो अभिह्वेइ ता
मा एएण पहेण वच्चह, सामीविजाणइ, जहा-सो भविओ संबुज्झिहिति निवारिजमाणोऽवि गोवेहिं परकज्जकरणर-
सियत्तणेण गओ कणगखलं नाम आसमपयं, जं च केरिं?—

कप्पूरतमाललवंगतिणिससाहारपमुहतरुद्धं । अइमुत्तयवासंतियकयलीहरनिवहरमणिज्जं ॥ १ ॥
तावसजणनिम्मियहोमहुयवहुच्छलियधूममलिणाओ । तेल्लोळा इव रेहति जत्थ साहीण साहाओ ॥ २ ॥
पवणपकंपियपल्लवकेरिं जं वारइव जिणमितं । दिट्ठीविससण्णभयं कहइ व सउणाण सदेणं ॥ ३ ॥
एवंविहंमि तत्थ आसमपए आंगंतूण ठिओ जक्खभणमंडवियाए सामी काउस्सग्गेण चंडकोसियसण्णं पडि-
बोहणत्थंति । को पुण एस एस सण्णो पुव्वभवे आसित्ति? निसासेह—

अत्थि अणेगधणकणगसमिद्धजणपरिच्छन्नो अदिट्ठपरचक्कोवइवो समुदोच्च बहुवाणिओवेवओ महासरोच्च वि-
चित्तचित्तपत्तपउमाहिट्ठिओ रासिसमुदओच्च मेसविसमिहुणकन्नासमओ गयणायोगोच्च सुरसोमगुल्लुहलोगाहिट्ठिओ
कोसिज्जो नाम सन्निवेशो । तत्थ असेसदेसआसामिसेसवियक्खणो नाणविन्नाणकोऊहलविहिविहण्णु छंदलक्खणजो-
इससत्थपरमत्थकुसलो छक्कम्मकरणनिरयचित्तो गोभदो णाम माहणो परिवसइ,

नियबुद्धिविषयविविहोवधारओ जेण सयलगामजणो । विहिओ पहिद्वहियओ एणं लच्छि विमोत्तूणं ॥ १ ॥
अहवा न सो कोऽवि गुणो जो तस्स न विज्जए दियवरस्स । तं नत्थि किंतु जं भुंजिएहिं दिवसं स वोलेइ ॥ २ ॥
एवं च धणविरहेवि सो अविचलचित्तत्तणेण मणांगं पि दीणत्तमदांसितो नियनियपरिगहत्तणेण चैव संतोसमुब-
हंतो चित्तेइ-अहो महाणुभावा ! इमे धणियो जे इमीए सिरीए परिगहिया पीडिज्जंति दाइएहिं विलुप्पिज्जंति
नराहिवेहिं अभिभविज्जंति तक्करनियरेहिं मग्गिज्जंति मग्गणगणेहिं अणुहवंति विविहावयाओ, पयमेत्तं पि न परि-
मंमंति सच्छंदयाए, तुच्छऽपत्थमोइणोवि अभिलसिज्जंति वाहीए, अहं पुण एत्तो एगस्सवि अणत्थस्स न गोयरसु-
वगओत्ति, एवं तस्स परिभावितस्स वच्चंति वासरा । अन्नया य सो सिवभदाभिहाणाए निययपणइणीए भणिओ,
जहा-अज्जउत्त ! आवन्नसत्ता वहामि अहसियाणिं, पसवसमए विससेण मह ओसहाइणा कज्जं भविस्सइ, तो कीस
तुमं न किंपि पुरिसयारमवलंबेसि ? न वा दवोवज्जणोवायं विगप्पेसि ? , न हि अणागयत्थचित्तापरसुहा सलहि-
ज्जंति पुरिसत्ति, सो एवमायन्निकुण तक्खणविसुमारियपुव्वविओ जलहिव मेहोदएणं कुवियण्णकल्लोलमालाउलो परि-
भाविउमारद्धो-किं एत्तो ववसायं करेसि ? कं वा जणं अणुसराभि ? को वा इमस्स कज्जस्स होज्ज साहेज्जदायगो ?
कत्थ व गयस्स एयं सिज्जेज्ज ? को इमस्स हेउत्ति, इय किंकायवययाउलत्तजलहिमि सो बुड्ढो, ताहे सिवभदाए
भणिओ सो-कीस वाउलो होसि ? , केत्तियमेत्तं एयं तुह विमलकलाकलावस्स ? , जइ कमविहु धणवंतं गंतुं मग्गेसि

सोऽपि ध्रुवमेयं कज्जं पसाहइस्सइ, दुलहो तुम्हारिसो अतिही, गोभेण भणियं-पिए ! साहेसु परपत्थणं मोत्तणं
अन्नमुवायं, पत्थणा हि नाम नरस्स जणेइ मरणसमयनिविसेसत्तणं, तहाहि-जायणापयइस्स सन्निवायाभिभूयच्च
पक्खलइ वाणी विगलंति विच्छायछायाओ अच्छीओ विगयसोहं हवइ वयणकमलं कंयंति अंगाइ पयइति दीह-
दीहा उस्सासा संखुब्भइ हियंयति । अविय—

तावच्चिय दुमुयस्यंकनिम्मला विप्फुरंति गुणनिवहा । जाव परपत्थणाकुलुसपंकलेवं न पावेति ॥ १ ॥

तावच्चिय पूइजइ गुरुत्तबुद्धीए परमभत्तीए । जावऽत्थित्तं सत्तुत्तणं व पयइइ न पुरिसो ॥ २ ॥

तावच्चिय सुहिसयणत्तणाइं दंसंति निच्छियं लोया । देहिंति दुट्ठमक्खरजुयलं जा नेव जंयइ ॥ ३ ॥

देहिंति जंपिरेणं भाणविमुक्केण विणयहीणेणं । धम्मत्थवज्जिएण य जाएणवि को गुणो तेण ? ॥ ४ ॥

ता अन्नमुवायंतरमहुणा मम दुक्करं पि किंपि पिए ! । साहेसु पत्थणंपिहु सरमाणोवि हु न काहामि ॥ ५ ॥

इय सा तन्निच्छियमुवलब्भ खणमेगं चित्तिज्जण भणिउमारद्धा—अजउत्त ! जइ एवं ता अत्थि अन्नो उवाओ,
परं बहुसरारायाससज्जो अचिरकालसाहणिज्जो य, जइ भणह ता निवेयमि, गोभेण भणियं-पिए ! को दोसो ? निवे-
एहि, तीए भणियं-सुणेसु, अत्थि पुव्वदेसे असंखदेवललमालंकिया वाणारसी नाम नयरी, तीसे समीवे फुरंतफा-
रंभंगुरतरंगाविद्धविमुद्धसलिला हंसचक्कवायमिहुणोवसोहिया अणवरयवहंतमहासलिलप्पवाहूपुरियरयणागरा गंगा नाम

महानई, तीसे तडंमि वहवे दूरदेसंतरागथराईसरसेट्टिसेणावइंदनाहणमुहा जणा केइ परलोगस्थिणो केइ
किन्तिजसस्थिणो केइ अणत्थपडिवायस्थिणो केइ पियतत्तणस्थिणो अणवरयं काराविति महाहोमं पाडिति
पिंडं दिति सुवन्नदानं सक्कारिति उद्धलियचलणे साहणेत्ति, अओ अज्जउत्त ! जइ तुमंपि तत्थ वच्चसि ता उवत्थान-
मेत्तेण पत्थणाविरहेऽवि पावेसि कणगदक्खणं, थेवमेत्तकालेण य पडिनिगत्तिहिसि, इमं निसामिऊण भणियं गोभइ-
ण-पिए ! मुद्धाऽसि तुमं, सवणरमणीया खलु दूरदेसवत्ता, सिवभदाए भणियं-अज्जउत्त ! तहावि भवणनिविट्टस्स का-
तुज्झ कज्जनिप्फत्ती ? गोभइण भणियं-किमजुत्तं ? एवंपि होउ, कुणसु संबलं जेण वच्चांमि, तओ तीए कयं से नि-
मित्तं पाहेज्जं, अन्नादिवसे संबलगहत्थो पयट्ठो सो वाणारसीसंमुहो, कमेण वच्चंतेण दिट्ठो निट्ठसररीरसंठाणो नियंसि-
यवत्थजुयलो निराभरणोवि अहिगं सररीरप्पभाए उवसेहंतो बज्झागारेणविलिखज्जमाणातिसओ पवरपाउगाधिरूढो
रतिविरहिओ वम्महोच्च पचक्खो सलीलं असंभंतो पहे वच्चंतो एगो सिद्धपुरिसो, तं च संभमभरियाहिं अच्छीहिं जाव
पेच्छइ ताव संभासिओ अणेण-भो गोभइ ! समागओऽसि ? किं संपयं तुमं वाणारसिं गंतुमिच्छसिन्ति वुत्ते सवि-
म्हयं गोभइो चित्तिउमारद्धो-अहो कहां अदिट्ठं असुयं मं पच्चयिजाणइ ? कह वा मम गिहिणीए य एयंतजायं इमं
गमणवइयरं उवलक्खेइ ? सव्वहा न एस सामन्नो हवइत्ति, तहा जो एत्तियं मुणइ सो अन्नंपि मुणिस्सइ, ता देवयं
व उवचरेमि एयं, जइ पुण एत्तोच्चिय निगक्खी होज्जत्ति विमवित्तो जोडिय करसंगुडं तं भणिउमाढत्तो-अज्ज !

एवमेयं, सम्मं तुभोहं वियाणियं, तेण भणियं-भद् ! एहि समं चिय, जेण तहिं वच्चाभो, पडिवन्नं गोभेइण, गंतुं पयट्ठा, खणंतरे जाए भोगणसमए गोभेइण भणियं-अज्ज ! पविसह गाममज्जे, करमि भोगणोवक्कमं, अइकालो वट्ठइत्ति, विज्जासिद्धेण भणियं-सोम ! किमत्थ पविट्ठहिं कायच्चं ? एहि अज्जवि जाममेत्तो वासरो कोमला सूरकि-रणा थेवमगं अइकंता य, गोभेइण भणियं-जं तुभे वियाणह, तओ पुणो पयट्ठा गंतुं, मज्झंदिणसमए य संपत्ता बहलतरुसंडसंछणं उज्जाणं, दिट्ठा य तत्थ अच्छसलिलपडिहत्था कमलकरवकल्लारपरागपिजरहंसोवसोहियतीर-देसा एगा महासरसी, पविट्ठा तत्थ, कयं मज्जनं, विहिया मुहसुद्धी, पयट्ठो य गोभदो देवयानुसरणं काउं, इय-रोऽवि ठिओ समाहीए ।

एत्थंतरंमि बहुभक्खभोगणा रसवई गुणसमिद्धा । बहुवंजणपडिपुण्णा मंतपभावेण अवयरिया ॥ १ ॥

कच्चोलथालदवीसिप्पिसणाहो उवक्खरो सवो । सुविणीयपरियेणप्पिओव पुरओ ठिओ तस्स ॥ २ ॥

एरिसं च परमब्भुयभूयं वइयरमवल्लोइऊण विम्विओ गोभदो, भणिओ य विज्जासिद्धेण-गोभद् ! पगुणो भव, कुणसु भोगयंति, जमज्जो आणवेइत्ति पडिवज्जिऊण तच्चयणं उवविट्ठो सो भोगयकरणत्थं, विज्जासिद्धोऽवि परिवे-सिउमारद्धो, कमेण य निव्वत्तियभोगणंमि गोभद् सयसुवविट्ठो विज्जासिद्धो, गोभेइणवि कओ से परिवेसणइया-वारो । एवं च निव्वत्तियंमि भोगणे विज्जासिद्धविमुक्केकुहंकाराणंतरमेव अंसणसुवगया थालाइसमेया रसवई, खण-

मेतं च वीसमिऊण माहवीलयाहरे निरुव्विगहियया विविहकहाओ कहेभाणा संपट्टिया गंतुं, गच्छंताण य जाए रयणिसमए गोभेइण भणियं-अज्ज ! कलयंतकंठसच्छहा समुच्छलइ तिमिरिंछोली न लक्खिज्जंति संपयं निणणुणया महिमगा निदावसविसंडुलाइं युम्मंति लोयणाइं पयत्तसंचालियावि न चलंति चलणा, ता गच्छह गामे, कुणह वीसामंति, विज्जासिद्धेण भणियं-सोम ! सिग्घगईए एहि सुहुत्तमेत्तं, किं गामपवे- सणकज्जं, गोभेइण भणियं-एवं हवउत्ति । ताहे जाममेत्तं अट्ठाणमइलंघिऊण ठिया एगत्य पएसे । तथणंतं च विज्जासिद्धो आबद्धपउमासणो निरुद्धसमीरणपयारो ज्ञाणं काउमारद्धो, अह—

कणगकलसकलियं रणंतमणिक्किणीनिवहरम्मं । सुसिलिट्ठुट्ठुथिरथोरथंभसोहंतवरसालं ॥ १ ॥

सुविभत्तचित्तेरंहवेइगावल्यलीढपरंतं । बज्झपएसनिवेसियमहल्लपल्लकसोहिहं ॥ २ ॥

गयणाओ अहापवरं विमाणमेगं समोथरेऊणं । विज्जासिद्धस्स पुरो लहुं निविट्ठं धरणिवट्ठे ॥ ३ ॥

अह तत्तो नीहरिऊण दिण्पंतमणिमउलंकियसिरा विमलकुंडलकंतिविच्छुरिगंडयला पवरमुत्तासरिविराइय- सिरौहरा हारलयाच्छाइयथणकलसा पंचरायमणिकंकणमंडियकोमलबाहुलया रोमावलीसणाहमुट्ठिगेज्झमज्झभाग- देसा रसणादामंसगयनियंबफलया नियंसियपंचवन्नदिवदूसा झंकारमणहरमणिनेउराणुगयचलणा हरियंदणरसवि- च्छुरियसरीरा अप्पडिमरूवा एगाए समाणरूवजोव्वणाइगुणालंकियाए विलयाए अनुगम्ममाणा समागया विला-

सिणी, जोडियकरसंगुडा य विज्जासिद्धं भणिउमारद्धा, जहा-भो महायस ! उयसंहरेसु संपयं मंतमुमरणं अलंकरेसु
विमाणमेयंति निसामिऊण उट्टिओ विज्जासिद्धो, पविट्टो विमाणब्धंतरे निसन्नो सेजाए, उवणीयाणि य तस्स
तंबोलवीडगाणि, ताहे वाहरिओ विज्जासिद्धेण गोभद्रो, तंबोलदाणपुव्वगं च विसज्जिओ निहाकराणाय, दूरे ठाऊण
य तदीयमाहणपविम्हिइयमणो पसुत्तो एसो, विज्जासिद्धोवि ताहिं रमणीहिं समं विविहसंकहाहिं गमिऊण खणमेकं
जेट्टाए अणुचरिं जुवइं भणइ-महे ! तुमं इमस्स गोभद्रस्स माहणस्स भज्जाभादंसणेण अत्ताणं पवित्तं कोसु, तीए
वुत्तं-एवं करोमि, अह जायमि विजणे विज्जासिद्धो पारद्धो इयरीए समं भोगे उवसुंजिउं, सावि तदुवरोहेण गवा
गोभद्रसमीवे, पवोहिऊण सिद्धो विज्जासिद्धाएसो, तेण य कुसलमइत्तणेण नाऊण कज्जपरमत्थं भणिया सा,
जहा-मयच्छि ! भगिणी तुमं मे होसि, ता अलं एत्थ पत्थुयत्थनित्थेणं, जहायिण्येयं समायसु, अकज्जपवित्तीएवि
जओ न एयस्स हयजीवियस्स कोऽवि समुणज्जइ सुणो, अविय—

अइधोरमारुयाहयनलिणीदललमसलिलवचवलं । जीयं सुपालियंपिहु न चिरायथाणमणुहवइ ॥ १ ॥
विविहोवभोगविसमणुकूलयालालियंपि बहुकालं । परिसडियविटफलमिव विगलइ गत्तंपि अचिरेण ॥ २ ॥
सुव्वंति य नरएसुं धम्मविरुद्धत्थकरगसत्ताणं । सत्ताणं तिकखदुक्खइं तेण कुणिमो कहसकज्जं ? ३ ॥
सकलत्तसंगइविहु उउकालाओ परेण पडिसिद्धा । किं पुण परमणीजणविसयपसंगो समयसत्थे ॥ ४ ॥

नियजीवस्सवि उम्मग्गगामिणो जइ केरमि न निरोहं । ता कह अन्ने अणधारचारिणो नणु निसंभिसं ? ॥ ५ ॥

इय गोभदेण तहा कहंणि संभासिया सवेरगं । नियभायनिविसो जह जाओ तीए पडिबंधो ॥ ६ ॥

खणमेत्तं च विगमिऊण भणियं तीए-अहो महाणुभाव ! सुंदरो तुहाभिजाओ, एयं चिय सण्णुरिसलक्खणं, एयं चिय धम्मसद्वस्सं, एत्तो सयलकळ्हाणोवल्लो, इमाओ असेसदुस्सज्झविज्जासिद्धीओ हवंति, एयं तु सुरासुरा-णवि दुरणुचरं, एयाणुगओ य नरो न रोगसोगदुक्खेहिं बाहिज्झइ, ता पत्तं तुमए जम्मजीवियफलं जस्सेरिसो दुक्करपरित्थीसेवापरिहरणपरिणामो, एयं च कुणमाणेण तए अहंणि निओइया सवकासुयसिद्धिआंभेणति, गोभदेण भणियं-कहं चिय मए निओइया सवकासुयसिद्धीए ? , तीए भणियं-महायस ! भायनिविसोत्तिकाऊण साहि-ज्झइ तुज्झ एस वइयरो, निसामेहि, गोभदेण भणियं-एसो निसामेमि, तीए कहियं—

अत्थि सयलतइलोयविकखायं अणेगअच्चमुयभूयाइसयजणियजणविस्सयं आगरो विज्जारयणाणं कुलभवणं तं-तप्पओगाणं ठाणं खुइसिद्धीणं जालंधरं नाम पुरवरं, जत्थ—

आगट्ठिवसीकरणप्पओगअहिस्सकरणकुसलाओ । नहगमणदूरदंसणपमोकखलद्धीसमिद्धाओ ॥ १ ॥

हुंकारमेत्तपडिभिन्नसत्तुसंदोहतुट्ठहिययाओ । निरुवमरुवनिरक्खियंमहमहिलाभिमाणाओ ॥ २ ॥

अट्ठप्पयारअणिमाइसिद्धिसंवधसस्सिरियाओ । निवसंति जोगिणीओ देवाणवि वंदणिज्जाओ ॥ ३ ॥

इधरजणा दुविणयं जं नो दंसति तं किमच्छरियं ? । तासिं महाबलाणं संकइ कुविओ कयंतोऽपि ॥ ४ ॥

सुरखयरजकखरकखसमडफरफंसणावि नूण जरा । निचावट्टियजोव्वणगुणाण जासिं न संकमइ ॥ ५ ॥

चिरदूरकालवोलीणभूवईणं समग्गचरियाइ । अज्जवि जाओ पयडंति सेललिहियप्पसत्थिच्च ॥ ६ ॥

इय तारिसपयडपभावजोगिणीचक्कवालकलियस्स । नयरस्स तस्स भण केण वज्जणा तीरए काउं ? ॥ ७ ॥

तत्थ य अहं चंदेलेहाभिहाणा जोगिणी परिवसामि, एसवि विज्जासिद्धसमीववत्तिणी मम जेड्डा भइणी पसा-
हियपवरविज्जा अचंतदरिसिज्जा जोगिणीपीढस्स चउत्थट्ठाणपूयणिज्जा चंदकंतानामा, गोभइेण भणियं-भइणि !
को एस विज्जासिद्धो ?, किंनामो ?, कहं वा एरिसमाहण्यो ?, किं वा एस तुह जेड्डभइणीए एयं उवचरइत्ति, केहेसु
बाढं कोऊहलाऊलं मे हिययं, चंदेलेहाए भणियं-कहेमि, एसो हि कामरूपाभिहाणजोगिणीपरिवेदियस्स डयरसी-
हस्स पुत्तो ईसाणचंदो नाम, एएण य पुरा अणेगण्ययाराओ साहिऊण विज्जाओ अखलियपसरं सयलकाभियसिद्धिं
समीहमाणेण कच्चाइणीए भगवईए पुरओ कओ अट्टोत्तरबिल्लक्खेण होमो, तित्तियमित्तेणवि जाव न परिटुट्ठा
भगवई ताव आकट्ठिऊण खग्गधेणुं समारद्धो नियकंधरं छिंदिउं,

नियजीवियनिरवेक्खो, कंठद्धं जा न छिंदए एसो । ताव सहसत्ति कत्तोवि आगया देवि रुद्धाणी ॥ १ ॥

अहह महाकट्टमिमं कीस तुमं पुत्त ! ववसिओ भीमं ? । इय जंपिरीए तीए कराओ छुरिया लहुं हरिया ॥ २ ॥

ताहे इमेण भणियं देवि ! पसीयसु ममेत्ति एणावि । पडिवज्जसु सिरकमलेण पूयणं होउ सीसेण ॥ ३ ॥
 देवीए तओ भणियं पुत्तय ! तुह साहेसेण तुट्ठमिह । वरसु वरं एत्ताहे पज्जत्तं देहपीडाए ॥ ४ ॥
 तओ एएण भणियं-सामिणि ! जइ सच्चं चिय तुट्ठासि ता जं तुमए पुत्तत्ति अहं वागरिओ एसो चिय मम वरो,
 एत्तो य पुत्तवुद्धीए मम पेच्छेज्जासित्ति भणियावसाणे दाऊण सच्चसमीहियत्थकरं रक्खावल्यं पडिवज्जिऊण तच्चयणं
 अहंसणमुदगया कचायणी, एसोऽवि पावियतिलोयरज्जं पिव अत्ताणं मन्नमाणो रक्खावल्यमुद्वहंतो सगच्चं अक्खलि-
 यगमणो सवत्थ वियंभिउमाढत्तो । अविय—

न गणइ नरवइवग्गं नय भीमभएवि उद्वहइ कंपं । सच्छंदलीलगमणो जमपि उवहसइ सबलेणं ॥ १ ॥
 अंतोउरेसु निवसइ उवमुंजइ कुलगयावि विलयाओ । आगरिसइ दूरगयंपि वत्थु वरमन्तसत्तीए ॥ २ ॥
 जण्णभिइं चिय कचाइणीए एयस्स बाहुमूलंमि । वद्धं रक्खावल्यं तत्तो चिय चित्तियं लहइ ॥ ३ ॥
 अह अन्नया कयाई हिंडतो एस महियलं सयलं । संपत्तो जालंधरपुरंमि रामाभिरामंमि ॥ ४ ॥
 दिट्ठा य जोगिणीजणमज्झगया विहियपवरसिंगारा । अह तत्थ चंदकंता एसा मम जेट्टिया भयणी ॥ ५ ॥
 ताहे हठेण वररुवजोव्वणाइसयरंजिओ एसो । कुणइ पसंगमिभीए सद्धिं सद्धम्मनिरेवक्खो ॥ ६ ॥
 ठाऊण कहवय दिणे सच्छंदं विचिहदिक्खीलाहिं । अणवट्टियमणपसरो अमुणिजंतो विणिक्खंतो ॥ ७ ॥

तयणंतरं च कथवि एत्तिथकालं परिब्रमिय इमिणा । दिवविभाणारूढा अहयं एसावि मह भइणी ॥ ८ ॥
आगिटिसत्तिणा आणीयाओ संपइ पयंडदंढेण । सिरियव्वयासणट्ठा गेहाओ नीहरंतीओ ॥ ९ ॥
एत्तोऽणंतरमेवं जेमस वागरइ तं करेमोत्ति । तुज्झइ खंधेण हडी सच्चं चोरस्स वलियस्स ॥ १० ॥
एयमायव्विऊण गोभइण चित्तियं-अहो रक्खसाणंपि भेक्खसा अत्थि, जमेवंविहजोगिणीजयोवि एवं आणानि-
देसंमि वट्ठाविज्झइ, अओ चिय भणिज्झइ-वहरयणा वसुंधरा भगवई, एत्तोचिय वरगुणगणनिहिणोऽवि न गवसुव-
हंति सण्णुरिसा, चंदलेहाए भणियं-अहो महायस ! एयं किर साहियवं, जइ एस विज्जालिद्धो एत्थ पर्याये मम
भइणीचंदकंताए न वंभयरभंगं करंतो ता इमीए सयंपभा नाय महाविज्जा साहिया हुता, वस पुण तुमए तील-
खंडणं अकुणमाणेण तस्साहणविही अज्जवि पडिपुन्नो चेव वट्ठइ, सत्तरत्तमेत्तेण य चित्तियत्थसंपत्ती भविसइ, ता
भो महाणुभाव ! जं पुरा पुच्छियं तुमए जहा कहं मए जोइया सब्बकामुदलायलिद्धीयत्ति तत्थ इत्थ परत्तथो, गोम-
देण भणियं-सुयणु ! किमतथ भणियवं ?

पीडंतु गहा निहडंतु संपया पडउ दुक्खदंदोली । सयणावि होंतु विमुहा तहवि न सुंत्तामि तच्चरियं ॥ १ ॥
नियजीवस्स खलस्सव जहिच्छचारेण दिन्नपसरस्स । दुक्खेण मामि ! सम्मगगडायणं जइजणो कुणइ ॥ २ ॥
चंदलेहाए भणियं-एवमेवं, किं वन्निजइ तुमह निम्मलगुणाणं जस्स एरिसं जिहंदियत्तणं ? एवंविहो अज्जकरण-

निरमो एरिसं पावभीरुत्तणं एवंरूवा य वयणपइट्ठा, सवहा धन्नाऽहं कयलक्खणाऽहं जं मए तुमं सप्पुरिससिसेहरभूओ
 दिट्ठोसित्ति, गोभेदेण भणियं-केत्तिचमिच्चोऽहं, अज्जवि महीयले दीसंति ते महापुरिसा जेसिं चरणेणुमेत्तस्सवि न सारि-
 स्समुवहंति अम्हारिसा । तओ चंदलेहा सप्पणयं सीसे अंजलिं काऊण भणिउमारद्धा-अज्ज ! तुह असरिससच्चरियमत्ति-
 परवसत्तणेण किंपि विन्नविउमिच्छइ मम मणो, गोभेदेण भणियं-भइ ! कीस एवं संखोहमुवहसि ?, निव्विसं कं भणसु
 जहाभिप्पेयं, चंदलेहाए भणियं-जइ एवं ता कयाइ परिभमणपरिवाडीए कायवो अम्ह गेहागमणेण अणुगहो, गोभ-
 देण भणियं-किमणुचियं ?, नहि तुह गेहमागच्छंतस्स मम किंचि लहुयत्तणं, पत्थावंमि जहोचियं आयरिस्साभि, न
 अन्नहा तुमए संभावणिज्जं, चंदलेहाए भणियं-महाभाग ! बाढं अणुगहियमिह, न एयमन्नहा कायवंति, एवं च जाय-
 तक्खणपेमाणुबंधंधुराहिं विविहसंकहाहिं सन्भावसाराहिं विसुमरियसेसवावाराणं ससहरजोणहावसोवलक्खियपरो-
 प्पररूवाणं तेसिं झडत्ति जाया पच्छिमरयणी, उम्मीलिओ पुरंदरदिसिमुहे जवाकुसुमगुजद्धकुसुमरसकिंसुयसुयमुहप-
 उमरायसरिसवन्नो कुंकुमबहलरागोवसित्तोव सूरसारही, पविरलीभूयं गयणं गणे तारागावल्यं, वियंभिओ पच्चससिसिर-
 मारुओ पल्लहत्थिओ पच्छिमजलहिम्मि रस्सिरज्जुजडिओ ससिपुण्णकलसो सलिलाकट्ठणत्थं व पच्छिमदिसिरमणीए,
 एत्थंतरे विज्जासिद्धेणं भणियं-भो भो गोभइ ! बहुप्पभाया रयणी पगुणो भवसु जेण गम्मइ, गोभेदेण भणियं-एस्स
 पगुणीहूओऽमिह, चंदलेहाऽवि तं आपुच्छिऊण गया चंदकंताए समीवं, विज्जासिद्धोऽवि ताओ सविमपाओ बी-

सज्जिऊण गंतुं संपयद्दो, गोभदोऽवि पुणो पुणोऽणुचिंततो निसावुत्तंतं लग्गो से अणुमगगओ, तओ आयुच्छिओ विज्जासिद्धेण-भद! निसिंसि मए तुह समीवे पेसिया एगा तरुणी, तीए कया कावि पडिवत्ती?, गोभदेण भणियं-अज्ज! बाढं कया, किं चिरं जीविउकामो कोइ तुह सासणमइक्कमइ?, केवलं अहं वाणारसीतित्थदंसणत्थं अबं-भकयनियमो आसि, एवमायण्णिऊण भणियं विज्जासिद्धेण-भद! ममावि चरणेहिं तत्थ गंतवति अत्थि एस नियमो, न बंभचरपडिवत्तिरूवो, एवं ठिए विसेसेण मए तुह निमित्तं एस उवक्कमो कओ, जइ पुण तुहाभिप्पायं सुणितो ता अहंपि बंभचरं करितो, एवं च कए तित्थदंसणं सफलं हवइ, गोभदेण भणियं-अज्ज! एवमेयं, को तुम्हाहि-तोवि अन्नो एरिसविवेयभायणांति?, अह पुवक्कमेण भोयणं कुणमाणा विदेसियमढेसु रयणिं अइवाहिता पत्ता कमेण वाणारसिं, पक्खालियमुहकररणा य गया सुरमंदिरिसे, दिट्ठा य खंदसुगुंदरुइपसुहा देवया, कया तेसिं पूया, एवं च अण्णणसुरमंदिरावलोयेण जाए वेयालसमए विज्जासिद्धेण भणिओ गोभदो-भद! संपयमणुसरो सुरसरिपरिसरं, करेमो तत्थ पहाणेण पूयपावं अत्ताणं, गोभदेण भणियं-एह जामो, गया दीवि गंगातीरे, एत्थंतरे अविभाविय-आवयावडणेण अविचिंतियवत्थुपरमत्थेणं विज्जासिद्धेण अहरमसवसेण ओत्तारिऊण तं दिव्वरक्खावल्लयं समप्पियं गो-भदस्स, भणिओ य सम्मं रक्खेज्जासि जाव अहं इह भागीरहीवारिमज्झे मुहुत्तमेत्तं पाणायामं करेमि, एवंति पडिवज्जिय गहिय रक्खावल्लयं ठिओ गोभदो, इयरोऽवि पविट्ठो वारिमज्झे, अह मुहुत्तमेत्ते गए गोभदो विज्जासिद्धमपेच्छमाणो

संभतनयनो इओ तओ सयलं अवलोइउं पयत्तो, जाव तहेव सव्वओ पलोयमाणस्स पच्छिमदिसिमवलंच्चियं भाणु-
 विंबं, विष्फुरिया बालप्पवालाडला किरणा वाउलीहूयाइं रहंगमिहुणाइं, तओ गोभहेण निवेइया गंगातारगण
 वत्ता, जहा-भो भहा ! अचंतरूवो वरपुरिसो एत्थ तित्थमि पविट्ठो, सो य संपयं दुत्तरउचुंगतरंगपरपण्णाइओ
 वा मगराइदुदुसत्तनिकंतिओ वा विसमंपकनिमगो वा भवेज्जत्ति न जाणिज्जइ परमत्थो, ता लहुं तच्चिरहतरल्लियं
 मम जीवियं अणुकंपमाणा पविसह नईमज्जे निरुवह तं महाभागं, मा अपत्थावे चिय अत्थमउ तारिसवरपुरिस-
 दिणयरो, मा आजम्मं पाउब्भवउ सुरतरंगिणीए एरिस महाकलंकोत्ति भणियावसाणे करुणापरव्वसीकयहिअया
 पहाविआ सव्वओ तारगा, समारद्धं च अमरसरियावारिप्पवाहावागहणं, अह सव्वायेरेण दीहप्पसारियमुयाहिं अल्लो
 डिज्जण जलं तेसु तेसु ठाणेषु आमूलाओ कत्थवि तं अलभमाणा पडिनियत्ता तारगा, निवेइया तदरापतिवत्त
 गोभइस्स, सो य गाढमुगराभिहओव दुस्सहसोगावेगविहलंघलसरीरो विचिंतिउमारद्धो—

कह जणनयणाणंदो समुग्गओ सरयपुण्णिमाइंदो । कह दाहुग्गाढमुहेण कवल्लिओ सो विडप्पेण ? ॥ १ ॥

कह भूमंडलमंडणरूपो कप्पहुमंकुरो जाओ । कह वा मूलाओ चिय समुक्खओ वणवराहेण ? ॥ २ ॥

कह एस भुवणतिलओ विजासिद्धो अकारणसिद्धो । मइ मित्तत्तमुवगओ कह वा अहंसणं पत्तो ? ॥ ३ ॥

मम मंदभगवाए मण्णे तस्सेरिसी दसा जाया । जत्थइल्लिग्रइ कवोडो सचं सा सुमइ तरसाहा ॥ ४ ॥

किल मे मणोरहो एस आसि जं चितियत्थसंपत्ती । एत्तो होही सयला सा पुण विहलीकया विहिणा ॥ ५ ॥
ता किं अज्जवि एरिस कलंकपंककियं नियसरीरं । विसपायवं व जणहुक्खकारयं परिवहिस्सामि ॥ ६ ॥
एवं च संचितिऊण मुक्ककंठं रोइउमारद्धो-हा परमच्छेरयरयणयाथर ! हा निक्कारणकरुणरससायर ! हा परम-
विज्जाहरीविलासलुभग ! हा असमसाहसपरितोसियक्काइणीदिणवर ! कत्थ सहसच्चिय अइगओसि ? देहि मे
पडिवयणं मंदउण्णस्स, किं तुम्हारिसाणवि निवडंति एरिसीओ आवयाओ ? हा पावकथं ! किमेक्कपएच्चिय पणट्ट-
पुरिसरयणं धरणिं काउमुज्जुओ सि, एवं परदेविऊण तच्चिरहुयवहपसमणत्थं गंगजले निवडिउकामो आवद्धनिवि-
डनियंसणो संजमियकेसपासो जोडियकरकमलो भागीरहिं विणविउमारद्धो-देवि ! सुरसरि एस परमबंधवो
तुमए चिय अवहरिओ अओ तमणुसरिउकामो अहंपि संपयं पडेमि तुह सल्ले, जओ अगिगदहुण अग्गिच्चिय
ओसहंति बुड्ढवाओ, इइ भणिऊण जावज्जवि न सुयइ उचुंगदोत्तडीओ अत्ताणं ताव गहिओ सो समीववत्तिणा
नत्थियवाइज्जेण, पुच्छिओ य-अरे मुद्ध ! कीस तुमं इह निवडसित्ति ? निवेइओ अणेण गामनिगमाओ आरब्भ
सयलवुत्ततो जाव तहंसणं अभिकंखमाणो इह निवडाभित्ति, तेहिं भणियं-मूढ ! केण तुह निवेइयमेयं जमिह निवड-
णेण पियसंपओगो वाहिविगमो पावनासो वा हवेज्जत्ति, एसा हि असेसदेसंतरावगाढकोढुडियसच्चंगनरनिवहवगा-
दणदुगुंछणिज्जसल्लिला अणेगमइयद्विसंघायणभक्खणपरा महारक्खसिव कहं मणवंछियत्थं पूरेजा ? अहो महामोहो

किल मे मणोरहो एस आसि जं चितियत्थसंपत्ती । एत्तो होही सयला सा पुण विहलीकया विहिणा ॥ ५ ॥
ता किं अज्जवि एरिस कलंकपंककियं नियसरीरं । विसपायवं व जणहुक्खकारयं परिवहिस्सामि ॥ ६ ॥
एवं च संचितिऊण मुक्ककठं रोइउमारद्धो-हा परमच्छेरयरयणयायर ! हा निक्कारणकरुणरससायर ! हा परम-
विज्जाहरीविलासलुभग ! हा असमसाहसपरितोसियक्काइणीदिणवर ! कत्थ सहसच्चिय अइगओसि ? देहि मे
पडिवयणं मंदउण्णस्स, किं तुम्हारिसाणवि निवडंति एरिसीओ आवयाओ ? हा पावकयत्त ! किमेक्कपएच्चिय पणट्ट-
पुरिसरयणं धरणिं काउमुज्जुओ सि, एवं परदेविऊण तच्चिरहुयवहपसमणत्थं गंगजले निवडिउकामो आवद्धनिवि-
डनियंसणो संजमियकेसपासो जोडियकरकमलो भागीरहिं विणविउमारद्धो-देवि ! सुरसरि एस परमबंधवो
तुमए चिय अवहरिओ अओ तमणुसरिउकामो अहंपि संपयं पडेमि तुह सल्ले, जओ अगिगदहुण अगिगच्चिय
ओसहंति बुडुवाओ, इइ भणिऊण जावज्जवि न सुयइ उचुंगदोत्तडीओ अत्ताणं ताव गहिओ सो समीववत्तिणा
नत्थियवाइज्जेण, पुच्छिओ य-अरे मुद्ध ! कीस तुमं इह निवडसित्ति ? निवेइओ अणेण गामनिगमाओ आरब्भ
सयलवुत्ततो जाव तहंसणं अभिकंखमाणो इह निवडाभित्ति, तेहिं भणियं-मूढ ! केण तुह निवेइयमेयं जमिह निवड-
णेण पियसंपओगो वाहिगिमो पावनासो वा हवेज्जत्ति, एसा हि असेसदेसंतरावाढकोढुडियसच्चंगनरनिवहवगा-
दणदुगुंछणिज्जसल्लिला अणेगमडयट्ठिसंघायणभक्खणपरा महारक्खसिव कहं मणवंछियत्थं पूरेजा ? अहो महामोहो

अहो गङ्गरियापवाहो, सचं चिय पढति इमं वियवखणा—

कर्णविषेण हि दग्धः किं किं न करोति बालिशो लोकः?, । क्षपणकतामपि धत्ते पिबति सुरां नरकपालेन ॥ १ ॥

अह एत्थ निमग्गा पावन्ति समीहियत्थं ता रे किं कयसिमेहिं मच्छकच्छवाइहिं आजम्मपि सलिलावगाहे-
हिंति, किं बहुणा?, सुयसु विसायं, परिचयसु मरणाभिलासं, कुणसु नियकरणिज्जं, न एवंविहजणो कयंतवयणपवि-
ट्ठोवि विवज्जह, अह विणिवाओऽवि होज्ज ता विवणजीयं सरीरं सलिलोवरि सयमेव टाएज्जा, अओ अलं बाउ-
लत्तणेणं, होउ परिदेविण्णंति । एत्थंतरे गुलुगुलियं गंधहत्थिणा वज्जियं मंगलतूरं पढियं वंदिणा एसियं सारससि-
हुणेण, तओ तेहिं भणिओ-ओ भद! एसिसनिमित्तेहिं अज्जवि सूहज्जह से जीवियं, गोयहेण भणियं-सुह वयणसा-
मत्थेण एवं हवउ, इय सो तेहिं मरणाओ वावत्तियचित्तो दो तिन्नि दिणाइं तत्थेव निवसिओ, अन्नदियेहे य
चित्तियमणेण, जहा-न जुत्तं एत्थावत्थाणं, जओ—

वाणारसीवि वाणारसिच्च किंतह सरीरमहिगं मे । मंदाइणीवि मं दाइणिच्च दूगेइ पयदियहं ॥ १ ॥

ता गच्छामि जालंधरं, पेच्छामि चंदलेहाए भणियं पणयंति विभाविऊण तमभिसुहं गंतुं पयट्ठो, गच्छंतेण य
संपत्ते मज्झणहसमए विज्जासिद्धभोगणाइललियं सुमरणमाणेण असुजलाविलोयणजुयलेण चित्तियमणेण—

तारिसजणदुस्सहविरहजलणजालातविज्जमाणंपि । अज्जवि न लज्जसि वज्जघडिय! निहज्ज हयहियय! ॥ १ ॥

तथा-तं चिय महण्णभावं रक्खावल्लयं इमो य सो समओ । तेणेक्केणव विणा सुन्नं सव्वं दिसापडलं ॥ २ ॥
अहवा रक्खावल्लयवि होज्ज निणुन्नयस्स किं मज्झ ? । चिंतामणिलभेऽविहु सीयइ सीयइ विमुहो विही जस्स ॥ ३ ॥
आधारवसेण धुवं गुणोदया न उण जहा तथा होति । सल्लपि सिण्णिसंपुडपडियं मुत्ताहलं होइ ॥ ४ ॥
इय एवं भावितो तमेक्कचित्तेण सो निराणंदो । जालंधरमणुपत्तो कमेण अविलंबियगईए ॥ ५ ॥
तव्वासिजणं च पुच्छितो पविट्ठो चंदकंताए गिहे, सुन्नण्णायं च तं दट्ठण भणिया दुवारट्ठिया गेहरक्खिया,
जहा-भइ ! किमेत्थ कोऽवि न दीसइ, तीएवि बहिरत्तेण वयणमसुणमाणीए दांसिया नियसवणा, तेणावि बहिरिति
नाऊण जंणियं महया सट्ठेण, एत्थंतरे समीवगिहट्ठिण्ण ईसाणचंदविज्जासिद्धेण सुणिओ सो सट्ठो, पच्चभिन्नाओ य,
तओ भणिओ सो-गोभइ ! इओ इओ एहि, इहाहं निवसामि, गोभट्ठोऽवि संसंभमं वयणमेयं निसामिऊण कंहं विज्जा-
सिद्धो इव मं वाहरइत्ति जायसंको जाव कित्तिंयपि भूभागमइक्कमइ ताव समखं चिय दिट्ठो अणेगनाडीनिविडऊ-
डियसरीरो चरणपसारणं पि काउमसमत्थो ईसाणचंदो विज्जासिद्धो, तं च दट्ठण चित्तिमणेण—
किं किंपि कूडमेयं विभीसिया वा मइब्भमो किं वा । दिट्ठीए मोहणं वा होज्जा छलणणगारो वा ? ॥ १ ॥
अहवा पीढमिमं जोगिणीण सव्वपि संभवइ एत्थ । नूणं सकम्मपवणणामिओ जामि निहणमंहं ॥ २ ॥
सुरसरियातीरे जइ तइया काऊण धम्मकिच्चाइ । परलोयं साहितोऽम्हि ता धुवं लट्ठयं होतं ॥ ३ ॥

इय जाव मरणभयकंपमाणदेहो स चिंतइ ससोगो । तुरियं ताव पुणोऽविहु विज्ञासिद्धेण वाहरिओ ॥ ४ ॥

गोभइ ! भइ किं कुणसि बिब्भमं नत्थि तुज्झ भयमेत्थ । पुव्वोवणीयमहुणा रक्खावलयं समणेषु ॥ ५ ॥

इय भणिए गोभदो वीसत्थो अइगओ समीवंमि । पेच्छइ विज्ञासिद्धं विविहपयारेहिं अवरुद्धं ॥ ६ ॥

अह सो तं दट्ठणं वाहाऊल्लोयणो भणइ एवं । हा अज्ज ! तुज्झवि कंहं दुत्थावत्था समोत्थरइ ? ॥ ७ ॥

विज्ञासिद्धेण भणियं-गोभइ ! अलं विसाएण, लहुं बंधेहिं मम बाहुमूले रक्खावलयं, जमज्जो आणवेइत्ति भणि-
ऊण बद्धमणेण, एत्थंतरे तडयडत्ति बिहडियाइं नियलाइं, जाओ पगुणसरीरो, पुच्छिओ गोभदेण-अज्ज ! को एस
बुत्तंतो ? , कहिं नईनिमज्जनं ? कहिं एत्थ आगमणं ? , कंहं वा एस निरोहो ? , बाढं कोऊहलाउलं मम हिययं,
साहेसु परमत्थं, विज्ञासिद्धेण भणियं-साहेमि, जं तइया तरलत्तेणवि सुमरियजुत्ताजुत्तवियारो दिव्वमाहप्पभणि-
ऊण तुह रक्खावलयं पविट्ठोऽम्हि गंगाजले तस्स फलमेयं, गोभदेण भणियं-कंहं ? , सो भणइ-जाव किर तत्थ
सुहुत्तमेत्तं पाणायामं काऊण ठिओ ताव सहसच्चिय अब्बंतं सरारिविबलत्तणं लंभिऊण तुम्हारिसेहिं अपेच्छिज्जभाणो
उक्खित्तो अहं एयगिहसामिणीए पुव्वेराणुबंधमुव्वहंतीए चंदलेहाभिहाणाए जोगिणीए, उवणीओ एत्थ ट्ठाणे, दढं
निजंतिओ निगडाईहिं, गोभदेण भणियं-अज्ज ! केण पुण कारणेण इमीए सद्धिं वेराणुबंधो ? , विज्ञासिद्धेण भणियं-जं
तइया विमाणमारुहिय समागयाए जेट्ठभइणीए चंदकंताभिहाणाए मए बला परिभोगो कओत्ति, गोभदेण भणियं-

कहं पुण चितियमेत्तसमत्थवत्थुलाभेऽवि संपयं तुह एरिसं अचित्तिणिज्जं विसममावडियं?, विज्जासिद्धेण भणियं-देवया-
दिन्नरक्खावल्यविरहो एत्थ कारणं, परं भइ! तुमए नित्थारिओऽहं इमाओ आवयाओ, साहु साहु तुह वियक्खणत्त-
णस्स, एरिसमवत्थंतरनिवडियस्स न तथा जाया मह देहपीडा जहा तुह अइसणेणं, मत्तं इह भवे चिय पसन्ना भा-
गिरहो देवी जीए तुमं अणुवचरियपरूढपणओ मित्तो पणामिओ, ता बाढं पसन्नं मे मणो, वरं सु जहा पियंति भणिए
गोभेहेण भणियं-अज्ज! देवो वडणो जाणइ कोवि अणुवचरियपरूढपणओ कस्सवि मित्तो पणामिओ, विज्जासिद्धेण
भणियं-अलं इमीए संकहाए, वरेहि जहिच्छियं वरं, गोभेहेण भणियं-महापसाओ, पत्थावे वरिस्सामि, एत्थंतरे डम-
डमिरडमरुथनिनायभरियभुयणंतराला वराभरणकिरणविच्छुरियनहंगणा दिवविमाणारूढा पविट्ठा चंदलेहा य चंद-
कंता य, तओ गोभेहेण भणियं-विज्जासिद्ध! कहमिणिह तुमं एयासु वट्ठिस्समि?, विज्जासिद्धेण भणियं-जहा सत्तुसु
वट्ठिज्जइ, गोभेहेण भणियं-अज्ज! मामेवं जंपसु, जओ विसवलिव वट्ठती वरंपंपरा न कोसलमावहइ, विज्जासिद्धेण
भणियं-ता किं कीरइ?, विवक्खाभिभवेणेव अत्तणो अवत्थणंति, नहि निसांसंतमसमखंडिज्जण पभवइ मायंडमंडलं,
नेव य पंकत्तणमपावेज्जण धूलिपडलं चिरावत्थाणं बंधइ सलिलं, गोभेहेण भणियं-अत्थि चिय एस ववहारो, परं मम
वयणोवरोहेण ताव उदासीणेण होयवं तुमए, विज्जासिद्धेण भणियं-जं तुमं जाणासि, एवं वुत्ते जणेण असुणिज्जंतो
तत्तो सो नीहारिज्जण पट्ठिओ तंमदिराभिमुहं, इंतो य दिट्ठो चंदलेहाए, रयणियरप्पगासदिट्ठरूवाणुमाणेण य

जायपच्चभिन्नाणाए तीए गाढमालिंगिऊण सुहासणत्थो हरिसुल्लसियलोगणाए पुच्छिओ-अज्ज ! कत्तो कहं वा ससा-
 गओऽसिन्ति ? तेणावि से साहिओ सामन्नेण वुत्ततो, चंदलेहाए भणियं-मुहु कयं तुमए जमेत्थ पत्थावे ससाग-
 ओऽसि, जओ अह पडिपुन्ना इयाणिं सब्बे मणोरहा, गोभइण भणियं-कहं चिय ? तीए भणियं-जं तहया तुमए
 मम बंभचेरखंडणा रक्खिया तेण सत्तरत्तपज्जंते सम्मभाराहिज्जमाणा सिद्धा भगवई संयपभाभिहाणा विज्जा, सो य
 दुट्ठविज्जासिद्धो ईसाणचंदो सव्वकामुयरक्खावल्यविहूणो जणहुकन्नाजलमज्झगओ झसोव विवसो पाविओ, गोय-
 हेण भणियं-कहमियाणिं सो संठविओ ? तीए भणियं-जहा दुट्ठकारिवरो, तेण भणियं-किमित्थं पुण तहा धरि-
 ज्जइ ? तीए भणियं-कसिणचउद्दसीए चंडिगाए बलिबिहाणत्थं, गोभइण भणियं-जइ एवं ता दंसेसु तं थैवदिणपरि-
 चियत्तणेण तेण समं मे किंपि वत्तवमत्थि, तीए भणियं-को दोसो ? एहि जेण दंसेसि, तओ पट्ठियाइ गंतुं, जाव
 य केत्तियमेत्तमंतरमुवगया चंदलेहा ताव दिट्ठो विज्जासिद्धो बाहुबद्धरक्खावलओ वियलियनियलंबंधणो महाकोय-
 फुरंताहरो पायडियनिडालभिउडिमासुरोत्ति, तं च दट्ठण चित्तिमयाए-अहो कहं रक्खावलयाभो इमस्स रक्ख-
 सस्स ? कहं वा नियडच्छओ संपत्तो ? अहो अवितक्कियं केरिसमावडियंति ? जायभयावि आगारसवरणं काऊण तेण
 समेया समीवमुवगया एयस्स, तेणवि इंति दट्ठण ईसि पच्छाइयकोवविरागेण संभासिया, जहा भइ ! एवविस्स,
 तओ आसणनिसन्नाए चंदलेहाए पुणो कइयवेण उट्ठमवल्लोइऊण भणियमणेण-अहो कहं पुवपरिचिओ गोसहो

दीसइ?, इओ एहि भइ!, किं तुमपि अहमिव एयाए छलणगोयसुवगओत्ति जेण वाणारसीविमुक्कोवि एत्थ पेच्छि-
ज्जसि?, गोभइण चित्तिं-अहो गाढो अमरिसो, ता तहा केमि जहा अवरोप्परं पणयभावो हवइ एसिं, अणु-
विया हिवोवहा विसिद्धुरिसाणंति, इइ संचित्तिज्ज आवद्धकरंजली सो भणिउमाढत्तो—
हे भइणि चंदलेहे! हे विज्जासिद्ध! गुणगणसमिद्ध! जइविहु कुसलत्तणओ तुम्हाण न किंपि वत्तव्वं ॥ १ ॥
तहविहु असरिसपेसप्यबंधसंधतरलियमणोऽहं। दियभावभूरिजंपिरसभावओ किंपि साहेमि ॥ २ ॥
जो तुम्ह परोप्परमेस रोसलेसो कहंपि संभूओ। सो मोत्तव्वो होइत्ति परमेवरिच्च दुहदायी ॥ ३ ॥
जेणानलुव्व पढमं नियठाणं दहइ एस वहुतो। ता अवगासोऽवि कहं दायव्वो होइ एयस्स? ॥ ४ ॥
अह वेरिसु दोसकरणत्तणेण कोव्वो समुल्लसइ तुम्ह। कोवेच्चिय किं कोवं न कुणह दुक्खेक्कहउमि? ॥ ५ ॥
न चलइ गरुयाण मणो अवराहपए अइव गरुएवि। जह जलहरेण खुब्भुइ गिरिसरिया तह न नइनाहो ॥ ६ ॥
तथा-अवयारे अवयारो जं कीरइ एस नीयववहारो। उवयारकारगच्चिय गरुया अवयारिणि जणेऽवि ॥ ७ ॥
इहरा विसेसलंभो उत्तमनीयाण कह णु जाएज्जा! न हि एगरुव्वत्थुमि होइ विविहाभिहाणाइ ॥ ८ ॥
अलमेत्तो भणिएणं तुम्हं जइ मम गिरिमि पडिब्वो। जइ उत्तमगुणमग्गेण विहरिउं विज्जए विच्छा ॥ ९ ॥
जइ ससहरजोणहासत्थहं च किंत्तिं सया समभिलसह। पुवाणुसयं मोत्तुं परोप्परं कुणह ता पणयं ॥ १० ॥ जुम्मं।

अणं च-हे विज्ञासिद्ध ! पओसमुव्हंतो कंहं न लज्जिहिसि ? । इत्थीसु तिहुयणंमिवि अवज्झसम्भावसिद्धासु ॥ ११
इतिहासपुराणपमोक्खसत्थविक्खायमवि इमं तुज्झ । पम्हुट्टंकीस ? महाणुभाव ! कुसलावि मुज्झंति ? ॥ १२ ॥
आयन्निज्जण एवं विज्ञासिद्धेण जायल्लेण । भणियं आपसं मे देहि लहुं जमिह कायच्चं ॥ १३ ॥

उप्पहपवन्नमारिसज्जणवोहणकारेण निम्मविया । वेयत्थमहानिहिणो तुब्भे नूनं पयावइणा ॥ १४ ॥

एवं सोऊण गोभइण भणियं-साहु साहु विज्ञासिद्ध ! को अन्नो एवं वियाणेइ वोत्तुं ? अहवा-को सिसिइ नि-
सिनाहमंडलं ? को वा चित्तेइ सिहिसिंहडाइ ? । देहसहसमुग्गओ चैव विणओ तुम्हारिसज्जाणं ॥ १ ॥ उट्ठसु
संपयं कुणसु चंदलेहाए पणामं, चंदलेहे ! तुमंपि विमुक्कमच्छरं परिचत्तपुद्वाणुसयं नियसु इमं सयणनिद्विसेसं,
विहेसु इमेण समं पणयभावं, इय भणियावसाणे निवडिओ चंदलेहाए चल्लेसु विज्ञासिद्धो, भणिउमारद्धो
य-सुयणु ! तारुन्नमएण वा विज्ञाबलावलेवेण वा अविवेयसुलभदुव्विणएण वा मए जमवरद्धं तं तुमए मरिसियच्चति,
चंदलेहाए भणियं-विज्ञासिद्ध ! अलं खामणेणं, सव्वा मंदभागिणी अहं जा थेवमेत्तावराहेवि एवंविहभणत्थं
काउं ववसिया ।

एत्थंतरंमि कइवयचेडीचक्केण परिवुडा झत्ति । विम्हयनिब्भरहियया समागया चंदकंतावि ॥ १ ॥

ताहे गोभइणं विज्ञासिद्धो पयंपिओ एवं । जीए कए वइरमिमं तहि(तुह)ट्ठिया सा इमा सुयणु ॥ २ ॥

ता परिमुक्तामरिसं सविसेसं कुणसु खामणमिमीए । रोसावेसो थेवोऽवि होइ अगिगव दुहेज ॥ ३ ॥
इय भणिए भइणीसिद्धसंधिसंघडणतुट्टहिययाए । तीए विज्जासिद्धेण खामणा सायरं विहिया ॥ ४ ॥
एवं च पणट्टकोवाणुबंधाणं एगजजणीजणियाणं व जायदढपेमाणं तेसिं परोप्परं जंपिराणं महाणसिणीए आगं-
तूण विन्नत्ता चंदकंता-देवि ! कुणह पसायं, एह गेहम्मि, निप्फन्ना रसवई, मज्झंदिणमणुपत्तो य भयवं भुवणचक्खू
दिणयरोत्ति, एवं च निसामिऊण चंदकंताए भणियं-हे चंदलेहे ! भोयणत्थमुवनिमत्तेसु पाहुणगे अइकालो वट्टइत्ति,
तओ चंदलेहाए उट्टुविओ विज्जासिद्धो गोभदो य, गया भोयणमंडवं, कयं समगं चिय विविहविच्छित्तिप्पहाणं
भोयणं, तदुत्तरं च दवावियाइं कप्पूरधूलिधूसरपूगीफलदलसणाहाइं तंबोलबीडयाइं, एत्थंतरे विज्जासिद्धेण सिरमि
करकमलं कट्टु भणिओ गोभदो, जहा-पुव्वपडिबन्नं गिणहसु वरं, नियत्तिउकामोऽहमियाणिं, गोभदेण भणियं—

जइ सच्चं चिय तुट्टो वियरेसु तुमं वरं महाभाग ! । ता तं एयाहिं समं (पे)म्मं सययं वहेज्जासि ॥ १ ॥
एवं कयंमि तुमए विहियं चिय मज्झ चित्तिथमसेसं । परचित्ततोसदाणाओ दाणमन्नापि किं अत्थि ? ॥ २ ॥
किर सिविवलिहरिचंदणमोक्खविस्संभराहिवा पुव्वं । नियजीवियदाणेणवि अकरसु जणाणमुवधारं ॥ ३ ॥
खणनस्सरस्स दुहनिवहभाइणो जीवियस्स फलमेयं । जं उवयारो कीरइ दुहसंतत्ताण सत्ताणं ॥ ४ ॥
विज्जासिद्धेण तओ भणियं भो कीस वाहरसि एयं ? । तुह्यारिसाणवि पुरो किमन्नहा हुंति उल्लावा ? ॥ ५ ॥

निद्वाधुम्मिरनयणावि सज्जणा जं वयंति किर वयणं । नियजीवियव्वएणवि तं तह अहियं समत्थंति ॥ ६ ॥

मिच्छाकारिं मिच्छा व भासिणं मं धुवं सुणेऊण । कच्चाइणीवि देवी लज्जइ किं पुण परो लोगो ? ॥ ७ ॥

ता-गोमह ! परिचयसुं एत्थ मम संतियं अविस्सासं । अन्नं मग्गेसु वरं मा कीरउ मे पणयभंगो ॥ ८ ॥

एयमायन्निऊण गोभेइण भणियं-जइ एवं ता परिहरेसु परमहिलापसंगं, एसो हि कारणं वेरपरंपराए कुलभ-
वणं अणत्थसत्थाणं वत्तणी नरयनगरस्स बंधवो दुव्विणयस्स ठाणं परिभवस्स आगरो अकित्तीए मसिक्खच्चओ निय-
कुलस्स निलओ पावपडलस्स मूलकसो गुणकलावस्स जणगो उत्तरोत्तराधम्मपरिणइए, एत्तोच्चिय मुयणपयइवि
वेरिमुयदंडकडंचंडिमखंडणेक्कसुंडावि असेसविज्जाइसयसालिणोऽवि पाविया लंकाहिवइपभिइणो विणासं, एत्तो चिय
अविणयितणनिच्चिसेसनियजीवियव्वा असुणियजुत्ताजुत्तकायवा तिकखदुक्खलक्खंपि अभिकंखंति पाणिणोत्ति, ता
मूसगोव मज्जारस्स घयंकुंभोव हुयवहस्स पयंगोव पईवस्स सारंगो इव पंचाणणस्स सुहाभिलासी दूरमवक्कमइ कुसलो
परदारस्सत्ति निसामिऊण समुप्पण्णगाढपच्छायावो वेरगमग्गालुगचित्तो विज्जासिद्धो भणिउमाढत्तो-गोमह !
साहु समुवइठ्ठं साहु समुवइठ्ठं समुद्धरिओऽहं तुमए अपारपावपारावाराओ, होउ संपयं सदारपरिभोगं मोत्तूणाऽऽपर-
णंतं निवित्ती मम सेसमहिलापसंगस्सत्ति, गोभेइण भणियं-अज्ज ! जाओ इयाणिं मम वंछियत्थलाभो, एत्तो सुम-
रिज्जासि मं सुहिसयणाइकहंतरेसुत्ति । एवं बुत्ते विज्जासिद्धो जोडियपाणिपल्लवो पणामं काऊण सव्वेसिं सिणेहवस-

संदतवाहफुरतनयणो सायरमवलोज्जमाणो चंदकंतापमुहेहि अंदसणसुवगओत्ति । चक्खुपहमइकतंउवि तंमि खणं
विरहेवेयणासुन्नत्तणमणुभविऊण भणियं गोभदेण-अहो से वयणविन्नासो अहो पावपरिहारो अहो भीरुत्तणं अहो
विणीयया अहो सुगुणज्जणसमुज्जमो अहो असरिसदक्खिणत्तणंति, चंदेहेहाए भणियं-तुहाणभावो खलु एसो,
न हि नरिंदसामत्थमंतरेण भुयगफणाफलमइक्कमिउमभिसक्कइ साल्लो, न त्तिक्खल्लुसकारोहं विणा पहे पयट्ठइ
मत्तदोषट्ठोत्ति, एवं च विविहसंकहाहि ठाऊण कइवय दिणे अन्नदियहे य भणियं गोभदेण, जहा-बहूइ दिणाइ
मम गिहनिगयस्स ता अणुजाणह मं गसणत्थं, न जाणिज्जइ कहंपि तुम्ह भाउज्जाया संपथभावणसत्ता निवसइत्ति,
एवमायणिऊण चंदेहेहाए पुणोवि कइवय वासराणि धरिऊण अन्नसमए य पभूयरयणदाणपुद्दणं सम्भाणिऊण
विसज्जिओ गोभदो सट्ठणं पत्तो कहाणगविसंसेणं निययगामं ।

अह जाव पिययमादंसणसुओ नियगेहाभिमुहं वच्चइ ताव दूराओ चिय दिट्ठं भग्गदुवारदेसं रेणुपडलसंछन्नं
दरीपसुत्तसाणधुरियधोरघोसभीसणं अणेगकोलविलाउलं सुसाणं व भयावहं तं गिहं, तारिसं च दट्ठणं सुभिय-
हियएण पुच्छिया सहेज्जिया, तीएवि चिरकालागयं दट्ठणं तं जायपण्याए आहूओ सणिहे, दावियं आसणं, कयं
चरणसोयणं, भणियं च-गोभद! करेसु ताव भोयणंति, तेणावि तहाविहगेहंदसणजायसरीरदाहेण आपुट्ठा पुणोवि
एसा सधवुत्तंतं, तीएउवि अणिट्ठं भोयणावसाणे सीसइत्ति लोयवायं परिभावितीए भणियं-पियहरं गया तुह

घरिणी, सेसं पुणो कहिस्सामि विहेसु ताव भोयणं, तओ आउलहियएणावि तदणुविचीए कयमणेणाहारगहणं, तयणंतरं आयंतस्स सुहासणगयस्स निवेइयमणाए-गोभइ ! तुह गयस्स कइवयदिवसावसाणे विओगदुक्खेण वा तहाविहवाहिवसेण वा परिकिसियसरीराए सिवभदाए अयंडेच्चिय सपुण्णन्ना गाढं सुलवेयणा, आउलियं सरीरं, ओसहेहिवि न जाओ विसेसो, गया य सुहुत्तमेत्तेण पंचत्तंति, एयं च सो आयन्निज्जण विओगवज्जजरियहियओ खणंतरमुच्छिओ इव विगमिज्जण मुक्कपोक्कारकरुणसइ रोइउं पवत्तो, समासासिओ पासवत्तिणा जणेण, कयाइं भय-लोइयकिचाइं, कालेण य जाओ अप्पसोगो । अन्नया य भणिओ लोगेहिं, जहा-गोभइ ! कीरउ कलत्तसंगहो, विसु-च्चउ सोगो, एसच्चिय गइं संसारविलसियाणं, तेण भणियं-भो दूरमसरिस्समेयं, तहाहि—

पढमं दवोवज्जणकएण देसंतरं गओऽहमहो । चिरकालकिलेसवसा तल्लोभे नियगिहं पत्तो ॥ १ ॥

किर भुंजिस्सामि अहं इणिह नियपणइणीए परियरिओ । पंचविहविसयसोक्खं निरवेक्खो सेसकज्जेसु ॥ २ ॥

भवियव्वयावसेणं अक्काले चिय दिवं गया सावि । एवं ठियंमि अन्ना परिणिज्जइ केण कज्जेण ? ॥ ३ ॥

जह सा मरणं पत्ता अहुणुवूढावि तह जइ मरेज्जा । ता होज्ज निष्फलच्चिय पुणोऽवि सव्वेऽवि आरंभा ॥ ४ ॥

नियजीवियस्सवि कहं विस्सासो वुज्झए सयन्नेण ? । आगययाइं जं किर कुणइ व सुहमारुयमिस्सेण ॥ ५ ॥

संघडणविहडणापडुपरक्कमे निक्खिवे कयंतंमि । सच्छंदं वियंतंते कत्थ व जाएज्ज थिरबुद्धी ? ॥ ६ ॥

दइयाधणपरिणसंगमेसु जइ सरिसवोवमं सोक्खं । पाविज्ज विण्णओगे निथमा मेरुवमं दुक्खं ॥ ७ ॥
इय पज्जत्तं मह घरणिविसयतणहाए बहुकिलेसाए । एत्तिथमेत्तमि वए विसयासा हीलणाठाणं ॥ ८ ॥
एवं तन्निच्छयं मुणिऊण तुसिणीए ठिओ जणो, सो य धम्मकज्जेसु उज्जओ जाओ, अन्नदियहे समोसरिजो
तत्थ पंचसयमुणिपरिवुडो छत्तीसगुणरयणरायरो नीसेसपाणिगणरक्खणपरो सुगहियनामो धम्मवोससूरी, गया
तस्स वंदणत्थं बहवे जणा, गोभदोऽवि भवविरत्तमणो जाणिऊण तदागमणं पत्तो सूरिससीवे, पहिठ्ठचित्तो य पण-
मिऊण से पायपंकयं गुरुणा दिन्नासीसो उवविट्ठो भूमिवट्ठे, सूरिणावि पारद्धा धम्मदेसणा, जहा—
जीववहालियवज्जणसदत्तधणगहमेहुणनिवित्ती । जो य परिगहचाओ एवं धम्मस्स सवस्सं ॥ १ ॥
जीववहे आसत्ता सत्ता अट्ठण्णयारमवि कम्मं । वंधति जंति नरए पावंति य तिवखदुक्खाइं ॥ २ ॥
तत्तो उवट्ठित्ता तिरिक्खजोणीसु लक्खमेयासु । उववज्जंति वराया नियदुच्चरिण बहुक्कालं ॥ ३ ॥
जे उ नियजीवियसमं समं रक्खंति सव्वपाणिगणं । ते सयल्लोयलोयणससहरतुल्ला हवंति जणा ॥ ४ ॥
दीहाऊउववेया वारूवा दिव्वदेवसोक्खाइं । अणुमुंजिऊण नूनं कमेण भोक्खंमि वच्चंति ॥ ५ ॥
भूयत्थनिण्हयकरं पाणिविणासेक्कारणं घोरं । जं वयणं तं सव्वंपि वज्जणिज्जं सुबुद्धीहिं ॥ ६ ॥
इह लोए चिय जीहानिकंतणं निंदणं च लोथाओ । पावंति वितहभासणपरायणा परभवे य दुहं ॥ ७ ॥

एत्तो विरत्तचित्ता कुडिलत्तणवज्जिया मियाभासी । जे ते अवजसंपकेण नेव छिप्पति कइयावि ॥ ८ ॥
 पडिबुद्धकमलपरिमलसमुहनिस्साससुरहियदियंता । पूहजंति जणेण य आएज्जगिरा य जायंति ॥ ९ ॥
 जो परधणं विलुपइ सो झंपइ सुगइगिहकयाडाइं । निविडाइं कम्मनिगडाइं कुणइ तुच्छेहियसुहत्थं ॥ १० ॥
 एत्तो चिय दोगचं पइजम्मं उवचिणेइ मूढप्पा । सुयदइयाविरहुब्भवदुहं च पावेइ दुव्विसहं ॥ ११ ॥
 जे पुण संतोसपरा तणंपि गिण्हंति नेव य अदिन्नं । ते देवाणवि पुज्जा हवंति किं पुण मणुस्समाणं ? ॥ १२ ॥
 वट्ठंति धणविलासा निवडंति न आवयाउ कइयावि । पुज्जंति य निव्विग्घं मणोरहा तेसि नीसेसा ॥ १३ ॥
 जे अणिगिहियप्पाणो इहभवसुहलेसमेत्तपडिबद्धा । दासव्व कामलुद्धा सुद्धा जुवईण वट्ठंति ॥ १४ ॥
 नरवइसेवणसंगामकरणपमुहाइं विविहवसणाइं । मेहुणसन्नाभिरया असइंपि ल्हंति ते पुरिसा ॥ १५ ॥
 कामविवरंसुहा पुण नरसुरजणपूयणिज्जकमकमला । देहुब्भवमविणस्सरपरमाणंदं सइ चरंति ॥ १६ ॥
 पडिपुण्णवंभपालणपवित्तगत्ताण पुरिससीहाण । सुमरणमेत्तेणं चिय विज्जा मंता य सिज्झंति ॥ १७ ॥
 जे न परिग्गहविरइं कुणंति पावेसु संपयट्ठंति । वंधंति कोसियारोव्व अप्पयं ते सकिरियाए ॥ १८ ॥
 पइदियहलाभवसवहुमाणगुरुलोभदूभियसरीरा । सव्वत्थ ममत्तपरिग्गहेण सुचिरं किलिस्संति ॥ १९ ॥
 अपरिग्गहा उण नरा ससरीरेऽविहु ममत्तपडिबंधं । न कुणंति वत्थपत्ताइएसु सेसेसु का गणणा ? ॥ २० ॥

एतौ चित्र तिष्ठयरोवसगवगोऽवि ते ण ज्ञाणाओ । मंदरगिरिच्च विचलति मोक्खसोक्खं च साहंति ॥ २१ ॥
इय भो देवाणुपिया ! अविरयविरयाण दोसगुणसहियं । कहियं तुम्हाण मए सुद्धं सद्धम्मसद्धम्मं ॥ २२ ॥
चिंतामणिच्च दुलहं संसारमहोयहिंमि भमिराणं । जीवाण नूणमेयं सकम्मगुरुभारपिहियाणं ॥ २३ ॥
एयंमि उ संपत्ते तं न जए जं न पावियं होइ । ता एयंमि पयत्तो कायवो कुसलबुद्धीहिं ॥ २४ ॥
एयं च निरइयारं न साहुदिव्खं विणा घडइ जम्हा । पडिवज्जह पव्वजं तम्हा दुहसेलवज्जसमं ॥ २५ ॥
एवं च गुरुणा उवइट्ठे सद्धम्ममग्गे पडिबुद्धा बहवे पाणिणो पलीणा मिच्छत्तवासणा जाओ केसिंचि सव्वविरइ-
परिणामो अन्नसिं समुण्णन्ना देसविरइबुद्धिं, एत्थंतरे संसारासारं परिभावंतो तक्कालतिव्वेरगसमुग्गयपव्वजाप-
रिणामो गोमदो गुरुसमीवं गंतूणं विन्नविउमारद्धो-भयवं ! अमयं व परिणयं मम तुम्ह वयणं समुल्लसिओ विवेओ
तुट्ठा गेहवासणा, ता तुम्भेहिं निज्जामगेहिं पव्वजाजाणवत्तमाहिऊण भवोदहिं लंघिउमिच्छामि, गुरुणा भणियं-
मद्द ! जुत्तमेयं तुम्हारिसाणं, तओ सूरिं पणमिऊण गओ गेहे, रयणविक्रओवलद्धद्वेण दिन्नं दीणाणाहाईणं महा-
दाणं, अह पसत्थे तिहिमुहुत्ते सूरिसमीवे गहिया पव्वजा, जाओ महातवस्सी, पालेइ निरयारं समणधम्मं अहि-
यासेइ सम्मं परीसहे पउजइ बालगिलाणाईणं विणयं भावेइ भावणाजालं पेढेइ समयसत्थं परिचितेइ तन्भावत्थं
कुणइ अपुवापुव्वतववरणं, एवं च विसुज्झमाणस्स तस्स वोळिति वासरा, अन्नया य गुरुमापुञ्छित्ता समास्साइ तेण

मासकखमणाइं,परिसुसियं च से सरीरं, तहावि वालाईण कज्जेसु अणिग्गहियसामत्थो सबत्थ पयट्ठइत्ति । अन्नसमए य सो खमगो गओ खुड्डगेण समं वासियभत्तस्स, तेण य पहे गच्छमाणेण जुगमेत्तनिहित्तचखुपसरेणवि कहवि दिव्वजो-
गवसा चंपिया चरणेसु मंडुक्किया, विवन्ना य सा, पट्ठिट्ठिएण य भणिओ सो सुड्डएण-जहा खमग ! तुमए एस विरा-
हिया, ता सम्मं निरूवेहि, सोऽवि एवमायन्निज्जण ईसिसमुप्पन्नोसावेसो असूयाएइयरजणचरणचंपणपणट्ठजीवाओ
मंडुक्कलियाओ दंसितो भणइ-अरे दुट्ठसिक्ख ! इमावि मए मारिया ? इमावि मए मारिया ? इमावि मए मारियत्ति,
खुड्डगेण नायं-होउ ताव, वियाले सयमेव गुरुपुरओ आलोइस्सइत्ति, एवं च पत्थुयकज्जं काऊण पडिनियत्ता दोवि
निययासमं, कमेण य जाओ संझासमओ, आरद्धं आवस्सयं, गुरुपुरओ य खमयरिसी आलोइत्ता देवसियं उवविट्ठो,
नवरं मा विस्सुमरियं होहित्ति चित्तयंतेण खुड्डएण कहिओ मंडुक्कियावइयरो खमगस्स, एत्थंतरे निट्ठुरविगिट्ठवचरण-
संतत्तत्तणेणं सरीरस्स माहणजम्मसुलभत्तणेणं तहाविहित्तिकोवुब्भवस्स पणट्ठो से विवेओ, समुद्धाइओ महया
वेगेणं खुड्डगताडणनिमित्तं, अंतरा य आगच्छमाणो निट्ठुरथंभसिरावडणघाइयम्ममपएसो तहाविहकलुसाभिप्पाय-
विराहियसामन्नो कालं काऊण उववन्नो जोइसियदेवसु, कोहदूसियस्स एवंविहा विडंबणा, जेण—

छट्ठमाइदुक्करविगिट्ठवभेयसेवणुब्भूयं । गुरुवालसिक्खेगलणपंडियविणओवणीयंपि ॥ १ ॥

दसविहजइजणकिरियापरिपालणपोसियंपि सुहपुन्नं । खणमेत्तेणवि तेणं तणं व कोहग्गिणा दहं ॥ २ ॥ जुम्मं ।

एत्तोच्चिय पसमविवज्जियाण सद्वा निरत्थिया किरिया । उक्कटुतयोऽविहु होइ केवलं भुक्खमारो सो ॥ ३ ॥
जह पव्वयाण मेरू नईण गंगा मियाण पंचमुहो । पक्खीण जहा गरुडो सेसाही सयलमुयगाण ॥ ४ ॥
जह साहूण जिणिंदो मणीण चिंतामणी तहा पसमो । सारो समत्थधम्मस्स तेण एत्थेव जइयवं ॥ ५ ॥ जुम्मं ।
अलं पसंगेणं । सो खमगजिओ जोइसदेवेसु अहाउयं पालिऊण चुओ समानो कणगखले आसमपए पंचतावस-
मयाहिवइस्स कुलवइणो गिहिणीए उववन्नो दारगत्तणेणं, जाओ य उच्चियसमए, कथं से कोसिओत्ति नामं, सो य
समावेणं चंडरोसो, थेवावराहेऽवि सेसतावसकुमारो कुट्टेति, ते य तेण ताडिज्जमाणा निययियपिऊणं साहेति, तेहि
य केण कुट्टियत्ति पुच्छिज्जमाणा निवेइति कोसिएणं, तत्थ अन्नेऽवि तावसकुमारगा कोसियाभिहाणा अत्थि अओ
न मुणिज्जइ केणावित्ति तव्विसेसोवलंभनिमित्तं तप्पभिइं ठावियं चंडकोसिओत्ति नामं, ताहिणाओ आरब्भ पावियं
च पसिद्धिं, एवं सो चंडकोसिओ जाओत्ति । अन्नया य कुलवइ पंचत्तमुवगओ, पच्छा सो सेसतावसेहिं कुलवइपए
निवेसिओ समानो तत्थ वणसंडे अच्चंतं अज्झोववणो, अणवरयं अपुद्वापुद्वापावसेयणपालणपरो कालं गमेइ, सेस-
तावसे य पुण्णफ़लाइं तहिं गेण्हते पयत्तेण निवारइ, ते य तत्थ कुसुममेत्तपि अपावमणा गुरुस्मि व गुरुपुत्तंगमि
पवट्टियव्वंति सुमरिऊण तव्वयणमविकूलंता दिसोदिसिं गया, जोऽवि गोवालागई तत्थ फ़लाइनिमित्तमेइ तंपि
हंतूण सो निद्धाडेइ, जाया य समीवगामनगरेसु पसिद्धी जहा चंडकोसिओ उववणं अवलोइउंति न देइ । अन्नया य

सो निसियधारं परसुं घेत्तण वइकरणनिमित्तं कंठिगाणयाय गओ दूरवणसंडे, इओ य आसमययासन्नं सेयविया-
 पुरिवत्थघेहिं रायपुत्तेहिं फलगहणनिवारणाकुविएहिं सुणियतगमणवुत्तेहिं पुद्दामरिसेण आगंतूण ओकखया तल-
 पोयगा छिंदिया सरलतरुणतरुवरा पाडियाइ फलाइ हयमहियो कओ से उडवओ भग्गा कलसगा फोडिया कर्म-
 डलू खंडिया दक्खामंडवा पणासियाइ कयलीहराइ, अन्नपि जहासत्तीए उवदविउमारद्धत्ति, एत्थंतरे दिट्ठतहाविहा-
 समभंगवइयरेहिं गोवालगेहिं गंतूण सिट्ठं चंडकोसियस्स, जहा-तुह उववणं कुमारेहिं हणिजइत्ति, सो एवमयगन्नि-
 ऊण कोवेण जलणोव धगधगन्तो परसुमुगीरिऊण धाविओ पवणवेगेण तदभिमुहं, दिट्ठो य एंतो कुमारेहिं, ते य
 मुणी अवज्झोत्ति चित्तिऊण पलाणा नियनयराभिमुहं, चंडकोसियोऽत्रि तयणुमगलग्गो वाहरइ—

रे खत्तियाहमा ! मज्झ उववणं छिंदिऊणवि परोक्खं । इण्हिं नियजणणीए किं पुण उयंमि पवित्तिहिह ? ॥ १ ॥

मा वेगेण पलायह वट्ठह सवंडमुहा खणं एक्कं । तालफलाणिव सीसे जेण कुहाडेण पाडेमि ॥ २ ॥

एमाइ असब्भे गालिगब्भवयणे समुल्लवेंतो सो । तह कहवि कोववसवियल्लयेणो धाविओ तुरियं ॥ ३ ॥

जह खाणुखलणनिवडणअट्ठियपरसुच्छिन्नसीसस्स । अवमाणंसणाउव तस्स लहु अइगयं जीयं ॥ ४ ॥

अह अट्ठज्झाणगओ मरिउं सो तस्मिं चैव वणसंडे । मुच्छावसेण जाओ भीमो दिट्ठिविसो सत्थो ॥ ५ ॥

ते य तावसा तम्मरणवइयर निसाभिऊण समागया तंमि वणसंडे ठाउमारद्धा य, अन्नया य पुद्दसिणेहाणुवधस-

मुप्यन्नवणरक्खणपरिणामेण इओ तओ परिब्भमतेण दिट्ठा ते दिट्ठीविससप्पेण, तओ सरोससूरविंवावलयणुगि-
रियजलणजालाकलवणे निदुड्ढा अभिसुहट्ठिया अणेण, अदहुंगा य पलाणा दिसोदिसिं, एवं च तिसंझं सो वणसंडं
तिपयाहिणीकाऊण जं सउणगमवि पासइ तंपि देहेइ, अन्नेऽवि तम्मगणेण वोलेमाणे तडियकण्डियपमुहे पंथिगे
विह्वेइ, अह तब्भएण अवहो जा जाओ सो मग्गो, एसा चंडकोसियसप्पस्स उप्पत्ती ।

अह तेण सप्पेण उववणंतरे परिब्भमतेण दिट्ठो जक्खमंडवियाए पडिमं ठिओ वद्धमाणजिणवरो, तं च दट्ठण
समुच्छलियकोधानलो अहो मम सामत्थं एस न सुणइत्ति विगप्पिऊण तरणिमंडलावलयणचउगुणीभूयविणिस्सरंत-
विसुम्मिस्सदुस्सहसिहिसिहाभासुरच्छिविच्छोहो निहोइउकामो भयवन्तं पेच्छिउमारद्धो—

अह जयगुरुणो देहे दिट्ठी दिट्ठीविसस्स पडिफालिया । पिऊससीयले साऽणुभावओ झत्ति विज्झाया ॥ १ ॥

असमत्था निहोइउं जाया जिणनाहलोममिच्चंपि । ताहे पडिहयसत्ती तंडवियपयंडफणभित्ति ॥ २ ॥

गरलकणुक्करसम्मिस्सगरुयपम्मुक्कफारंफुंकारो । वेणेणं डसिउमणो पहाविओ जिणवराभिमुहं ॥ ३ ॥

तओ तिव्वविसुब्भडाहिं दाढाहिं जिणं डसिऊण पच्छाहुत्तं अवक्कमेइ, मा उग्गविसविहयजीवियवो भमोवरि
एस निवडिहिति, भयवंतं च तहट्ठियं चेव दट्ठण पुणो पुणो तिन्नि वारे जाव डसित्ता अमरिसेणं पलोयंतो अच्छइ,
तहावत्थणे य जिणसोमविंवावलयणेवसंतदुड्ढदिट्ठिविसविगारो सो करुणाए भणिओ भयवया—उवसम गो

चंडकोसिया!, उबसम महाणुभाव!, किन्न सरसि सयं चिय अणुभूयं तं वइयरं ? ।

पुवभवे जं समणो कोवविराहियसमग्गसामन्नो । कुञ्छियजोइसदेवत्तलच्छिमणुपाविओ मरिउं ॥ १ ॥

तत्तो इह वणसडे तावसपुत्तो य जं तुमं जाओ । तत्तोऽपिय तिच्चविसो इण्हि सपत्तणं पत्तो ॥ २ ॥

ता भइ ! एत्तोऽवि मुंच कोवं, एसो हि विग्घभूओ परमसुहसंपयाणं पडिखलणमल्लो कल्लणवल्लीणं महापडिक्खलो पवरविवेयस्स जलणो कुसलाणुट्ठाणवणसंडस्स जणओ दुग्गदुग्गइपडणस्सत्ति, सवहा अलमेत्तो कोवाणुवंधंति, इमं च सोच्चा भुयगस्स पुद्वाणुभूयसरणवसेण ईहावूहसग्गणवेसणं करेमाणस्स जायं जाइसरणं, दिट्ठं च पुद्वाणु-
ट्ठियं तवचरणं सामणणपरिपालणं तच्चिराहणोवलद्धजोइसियसुरजम्मं च, अह उम्मीलियविवेओ समुल्लसियक्खमपरि-
णामो जायपावदुगुंओ आयाहिणपयाहिणापुव्वगं परमभत्तीए भयवंतं भुवणगुरुं वंदिऊण अणसणं पडिक्खइ, भय-
वंपि सुणइ जहा एस पडिबुद्धो कयाणसणो य, तहावि तअणुकंपाए तत्थेव काउस्सग्गओ परिवालेइत्ति, चंडको-
सियोऽवि मा कहवि रोसवसेण नयणग्गिणा पाणविणासो होज्जत्ति परिभाविऊण विलनिहित्तुंओ पयडिक्खसेसरीरो
परमवेरग्गावडियमई चित्तेइ—

कह गुणरयणोयहिणा गुरुणा सह संगमो पुरा जाओ ? । कह पवज्जारयणं अपत्तपुव्वं मए पत्तं ? ॥ १ ॥

कह वा पीऊसंपिव असेसदोसग्गिविज्झवणदक्खं ? । सम्ममहीयं सुत्तं विचिच्चनयभंगदुव्विगमं ? ॥ २ ॥

कह वा भासकस्यमणाइ दुक्करं तह चिरं तवो चरियं ? कह दुद्धरं पि चरियं अकलंकं बंभचरं पि ? ॥ ३ ॥
खणमेत्तत्तद्विकोवप्यभावओ कह इमं समगं पि । विफलत्तणमणुपत्तं ? हा सुद्धो मंदभाणोऽहं ॥ ४ ॥
इण्हिं तु पयइभीसणसुयंगभावं गओ हयासोऽहं । मुणिधम्मस्स अजोणो कमुवायं संपवज्जामि ? ॥ ५ ॥
हा पाव जीव ! तइया जह सिरलोयाइ विविहदुक्खाइ । सहियाइ तहा खुडुगवयणां पि य कीस नो सहियं ? ॥ ६ ॥
किं मूढ ! नियसिरंभी एवं पज्जालिओ तए जलणो ? । सुहकामिणा हणिज्जइ अप्पा किं अप्पणो चेव ? ॥ ७ ॥
इय उत्तरोत्तरपवहुमाणवेरगमग्गमणुल्लगो । सप्पो झंप्पियदप्पो संलीणगो मओव ठिओ ॥ ८ ॥
अह भयवंतं समीवसुवगयं पेच्छिऊण गोवालादयो तरुवरतिरोहियसरीरा तहा निचलस्सवि भुयंगमस्स उवरिं
अविस्ससेमाणा चेयणापरिक्खणनिमित्तं पाहाणखंडे खिंवति, तेहिं ताडिजमाणोऽवि जाव न मणागं पि विचलइ
एसो ताव समीवमागच्छन्ति, कट्टेण य घट्टेति, तहावि अण्णंदमाणे तंमि सेसलोयस्स साहेति, जहा—दिट्ठीवि-
ससप्पो देवज्जएणं उवसामिओ, न संपयं ड्हइत्ति, ताहे लोगो आगंतुं सामिं वदित्ता तं पि वंदइ महिमं च करइ,
अन्नाओवि गोउलियविलयाओ घयमहियाविक्किणत्थं तेणतेण वचमाणीओ तं सप्पं तुप्पेण मक्खंति, घयंगं घेण य
(अहि)सरंततिकखुंडुपिवीलिगापडलखजमाणदेहुप्पणत्तिद्वेयणं सम्ममहियासमाणो अद्रुमासियाए खेलेहणाए
कालं काऊण सहस्सारे देवलोए देवो अट्टारससागरोवमो उववणोत्ति ।

इय सुहपरंपराए निजुंजिऊण चंडकोसिथं परमेसरो तिहुयणेक्कदिणयो वीरो तत्तो निकखमिऊण उत्तरवायो-
लसन्निवेसं गओ, तत्थ पक्खवखमणपारणए पविट्ठो गोयरचरियाए, कमेण पत्तो नागसेणगाहावइस्स मंदिरं,
तहिं च तहिणे दुवालसवरिसओ पुत्तो समागओत्तिकाऊण पयट्ठो महूसवो, जेमियो नियगजणो, सो य निय-
गजणो सामिणो रूवसंपयाए आणंदुब्रहतो परमणेणं भयवंतं पडिलाभेइ, एत्थंतरे अहो दाणं अहो दाणंति
वाहरमाणेहिं चेलुक्खेवं करेतेहिं कणगमुट्ठिं सुयमाणेहिं चउविहत्तूरनियरं वायंतेहिं गंधोदयं वरिसंतेहिं दसद्धवन्नं
कुसुमपथरं कीरंतेहिं नच्चमाणेहिं गायमाणेहिं तिवइ अफ्फालेतेहिं सहरिसं थुणंतेहिं असुरसुरखयरनिवहेहिं भरिय-
मम्बरविवरंति, जयगुरुवि पारिऊण सेयविथं नयारं गओ, तत्थ य नमंतसामंतमउलिमंडलीमंडियपायपीढो सम्भइ-
सणमुणियजहट्ठियजिणोवइट्ठजीवाइतत्तप्पवंचो पएसी नाम नराहिवो परमसमणोवासओ, सो य भयवंतं आगतं
मुणिऊण चाउरंगसेणापरिवारिओ सयलनयरजणसमेओ निग्गओ वंदणवडियाए, दिट्ठो सामी, तिपयाहिणीकाऊण
य वंदिओ परमायेरणं, थोउं पयत्तो, कहं?—

जय भुवणेक्कनिसायर! सायरसुरायनमियकमकमल! । मलविरहिय! हियकाय! स्यतमभरहरणदिवसयर! ॥ १ ॥
करुणारसनिवावियभवगिम्हुत्तत्तसत्तरुनिवह! । जिणनाह! तुमं पुवज्जिएहिं पुणेहिं दिट्ठोऽसि ॥ २ ॥
तं चिय दिणं पसत्थं सोचिय समओ समत्थसुहहेऊ! जत्थ भुवणेक्कवंधव! तुह सुहकमलं पलोएमो ॥ ३ ॥

अहनिस्सारस्सवि जीवियस्स पत्तं मए फलं अज्ज । जं तुम्ह चरणफरिसणपवित्तियं उत्तमंगं मे ॥ ४ ॥

इय जिणनाहं श्रोउं बहुप्पयारं पराएँ भत्तीए । राथा पुरज्जणसहिओ जहागयं पडिनियत्तोत्ति ॥ ५ ॥

भयवंपि सुरहिपुरनयराभिमुहं वच्चइ, तत्थ य अंतरा पएसिनरवइसमीवभागच्छमाणा पंचहिं रेहिं निज्जगा
रायाणो भयवंतं दट्ठूणं पूयं सक्कारं सवायेणे कुणंति, सामीउवि नियप्पभावप्पबोहियसत्तसंवाओ बहुविहउग्गतव-
विससपणस्समाणासेसनिविडकम्मसो विमुद्धसीलसुरभिसरीरो सुरभिपुरं अइक्कमिज्जण संपत्तो जलहिपवाहाणुकारि-
वारिपसरं सयलसरियापवरं गंगामहानइ, अविय—

पवणुच्छालियजलकणसेयवससिणिद्धतीरतरुसंडं । अन्नोन्नोप्पिडणविफुट्टलोलकल्लोलवमुहलं ॥ १ ॥

पप्फुरियफाराडिंडीरपिडपंडुरियतारतीरंतं । जिणदंसणतोसवसा तक्खणविहियदूहासं च ॥ २ ॥

वणकुंजरकुलमज्जणविदलियसिप्पिउडमोत्तियसभिद्धं । वियरंतंहससारसरंहगरवमणहरदियंतं ॥ ३ ॥

मज्जिरविलयाजणथोरथणहराघायमंगुरतरंगं । रंगंतमच्छक्कवमयरोरगभीसणावत्तं ॥ ४ ॥

इय एरिसं सुरसरिं सरणागवच्छलो जिणो जाव पेच्छइ कमलदलच्छो परतीरगमायिलसेण ताव मुसिलिद्धनिदुर-
विसिट्ठतरुक्कट्टफलगनिम्मविथा परतीरगमणत्थं नाविण्ण पगुणीकथा नावा, तहिं च समारूढो परतीरगामी
जणो, भयवंपि आरुहिज्जणं ठिओ तीसे एगदेसे, एवं च निलीणंमि जणे पवाहिया नावा, जसिओ सियवडा

चालियाईं अवलुगाईं पथट्टा महावेगेण गंतुं नावा, एत्थंतरे तडट्टिएण वासियं कोसिएण, तं च निसामिऊण भणियं
 खेमिलाभिहाणेनेमित्तिएणं-अहो इमो महासउणो इमं वाहरइ, जहा-तुब्भे इह मारणंतियं आवइं पाउणिस्सह,
 केवलमेयस्स महारिसिस्स पभावेण अक्खयसरीरा नित्थरिस्सहत्ति, एवं निसुणिऊण विम्हिया नावाजणा जाव
 अवरोप्परं विविहं संलवंति ताव पत्ता अगाहसल्लिमज्झयारदेसं नावा,

एत्थावसरंमि जिणं नावारूढं पलोइउं पावो । संभरियपुव्ववरो नागसुदाढो विचित्तेइ ॥ १ ॥

एसो सो जेण पुरा तिविट्ठुचक्कित्तणमुवगएणं । गिरिकंदरमल्लीणो सीहत्ते वट्टमाणोऽहं ॥ २ ॥

सच्छंदविविहकीलाविणोयलीलाविलासदुल्ललिओ । परिजुन्नपडोव्व दुहा विफालिओ पाणिणा घेत्तुं ॥ ३ ॥

एयस्स किमवरद्धं तइया विजणे वणे वसंतेणं ? । जेण तहा निहओऽहं अनिमित्तियसत्तुणा इमिणा ? ॥ ४ ॥

ता मज्झ पुन्नपणरिसवसेण जायं समीहियं अज्ज । जं एस वेरिओ चक्खुगोयरं सयमिहावडिओ ॥ ५ ॥

जीयस्स एत्तियं चिय पंसंसणिज्जं जए सुपुरिसाणं । उवयारे उवयारो जं किज्जइ वेरिए वेरं ॥ ६ ॥

आसन्नमुवगयंपि हु मरणं मम चित्तनिवुइं जणइ । जं पुव्ववरसाहणमुवट्ठियं एत्थ पत्थावे ॥ ७ ॥

इय असरिसनिच्चाभरिसपगरिसायंबअच्छिविच्छोहो । सो चित्तिउं सुदाढो वेगेण जिणंतियं पत्तो ॥ ८ ॥

अह अंतलिवखसुवागएण किलकिलारावं कुणमाणेणं तेण अरे रे कत्थ वच्चिहत्ति भणिऊण विउविओ संवत्तगम-

हापवणो, तेण पहणिज्जमाणे उम्मूलिया तरुणो दलटलिया कुलसेला थरहरियं धरणिवट्टं दूरमुच्छलियं गंगासलिलं
विसंठुला डोलिया नावा भगो तडत्ति कूवयखंभो जजरिओ सियवडो वामूढो कन्नधारो मरणभयभीओ इट्टदेव-
ए सुमरिउं लग्गो नावाजणो, अवि य—

संचलियमच्छकच्छवजलकरिकरघायज्जरतरंगे । तारापहमोगाढे सलिलुपीले महापवले ॥ १ ॥

पवथमहोल्लकलोलपेछणुवेछिरी सफरिगव । बोलेउं आढत्ता ताहे नावा सुदाढेण ॥ २ ॥

एत्थंतरे कंबलसंबलाभिहाणा दो नागकुमारदेवा तक्खणचलियासणा परमत्थजाणणट्ठा जाव ओहिं पउंजति ताव
पासंति भयवंतं नावारूढं सुदाढेण जले बोलिउमाढत्तंति, तं च पासित्ता अलाहि सेसकज्जेहिं, सामिं ताव मोया-
वेमोत्ति चित्तिज्जण वेगेण समागया तं पएसं, आवडिओ य एगो नागकुमारो सुदाढेण सह जुज्झिउं, बीएणवि वियड-
पाणिसंण्डेणुप्पाडिऊण नावा नइपरिसरंमि पमुक्का ।

अह सो सुदाढनागो सहिड्डिओ जइवि तहवि खीणवलो । आसन्नमरणनिभरणरणगुच्छायउच्छाहो ॥ १ ॥

अप्पट्टिएहिवि तथा कंबलसंबलाभिहाणदेवाहिं । अहिणवदेवत्तणदिवसत्तिणा निज्जिओ झत्ति ॥ २ ॥

उद्धियदाढे नागेव निव्विसे निम्मिए सुदाढंमि । नागकुमारा ताहे वंदित्तु जिणं विणयपण्या ॥ ३ ॥

मुंचंति पुण्णपथरं सुराहिं गंधोदयं च वरिसंति । गायंति भत्तिभरनिस्सरंतरोमंचकंचुइया ॥ ४ ॥

एवं च अवलोइऊण जायपरमविम्हओ नावाजणो चित्तेइ-अहो कोइ एस महापुरिसो माणुसवेसोवि अमाणु-
साणुरुवपभावो, जओ एयणभावाओ अम्हे समुत्तिन्ना आवयामहन्नवाओ, ता जुज्जइ एस महग्घा पणमिउंति
विभाविऊण निवडिओ तिहुयणगुरुणो चलणकमलंमि, कंबलसंबलावि जिणं पणमिऊण गया जहागयं ।

अह के पुण कंबलसंबला पुव्वभवे हुंतत्ति सुणेह मूलुप्पत्तिं-अत्थि सयलमहियलविकखाया समुत्तुंगपसत्थसुपास-
तित्थयरथूमसोहिया महुरा नाम नयरी, तत्थ य अहिगयजीवाजीवविचारो नियसुद्धबुद्धिपरिसोवलद्धपुन्नपावो
आसवसंवरपमोक्खतत्तविचारवियक्खणो पंचाणुव्वयाइसावधम्मपरिपालणबद्धलक्खो जिणिंदसमयाणुरागरंजिय-
हियओ आगरो पसमाइगुणरयणाणं निवासट्टाणं गंभीरिमाए संकेयभूमी करुणाए वल्लहो धम्मियजणाणं बहुमओ
नरवइस्स सबत्थ पावियसाहुवाओ जिणदासो नाम सावओ, साहुदासी नामेण से भारिया, ताणि य दोन्निवि अचंत-
धम्मकरणलालसाइं अणवरयगुरूवएसपालणपरायणाइं फासुयएसणिएहिं असणपाणखाइमसाइमेहिं सुणिजणं
पडिलाभेमाणाइं कालं वोलेति । अन्नं च—

संसारावत्तविचिन्तणत्थ(ण्)भीयाइं जइवि अच्चत्थं । जइवि य गिहवाससमुत्थदोसपरिसंकिचमणाइं ॥ १ ॥

तहविहु गिहंमि अन्नोन्नगाढपेसाणुबंधभावेणं । समणत्तणं पवज्जिउकामांइवि ताइं निवसंति ॥ २ ॥

तेहि य अन्नया सुगुरुपायमूले सुणिऊण तिरियाइअंसजयपाणिपरिगहतिव्वपावोवलेवासमंजस्सं गहिंय गोमहि-

सिचउप्पयाण पच्चक्खाणं, अन्नो य अंगी कया बहवे अमिग्गहविससा, अह धेण्णमभावे साहुदासी साविगा दिवसे दिवसे गोरसं आभीरिहत्थाओ गिण्हइ, अन्नदियहे य तीए आभीरी भणिया, जहा-भहे! तुमं पइदियहं मम घरे महियं घेत्तण आगच्छेज्जाहि, अहं जेत्तियं तुमं आणेसि तेत्तियं गिण्हस्सामि, अन्नत्थ मा वचिहिसि, पडिवन्नं च इमं तीए, एवं च पइदिणंदसणेणं निक्कवडकयविक्रयकरणेण य ससुण्णन्नो तासिं परोणरं सिणेहाणुबंधो, अंतरंतरा य साविगा से गंधपुडिगाइदाणेण उवयारं करइ, इयरीवि सविससं दुद्धं दहिं पणामेइ, अन्नया य आभीरीए कन्नगा-विवाहो पारद्धो, तओ सा जिणदासं साहुदासिं च सपणयं भणिउमारद्धा—

जइवि न आसणदाणेऽवि तुम्ह सामत्थमत्थि मे किंपि । तहवि सिणेहवसेणं किमवि अहं विन्नविउकामा ॥ १ ॥

किर गुरुमणोरेहेहिं सुहिसयणविसिट्ठगोठ्ठिकजेण । अम्हारिसेण जायइ सुचिरेण महूसवारंणो ॥ २ ॥

तुम्हारिसाण पुण पुव्वजम्मसुविटत्तपुन्नविमवाणं । पइदियहमूसवच्चिय लीलाए संपयट्ठंति ॥ ३ ॥

एयं च उल्लवती सा भणिया सेट्ठिणा—भहे! फुडक्खरेहिं भणसु जमिह पओयणं?, तीए भणियं-अम्ह घरे विवाहो पारद्धो, अओ तुम्हेहिं तत्थ भोयणं कायधं, सेट्ठिणा भणियं-को दोसो?, कीरइ, केवलं बहुगेहवावा-वडत्तणेणं न पारेमो सुहुत्तमेत्तंपि गिहं परिच्चइउं, अओ न कायधो तुमए चित्तसंतापो न वोढवो अब्भत्थणाभंग-ससुम्भवो अवमाणो न गणियधं निहक्खिस्सन्नत्तणं न मोत्तवो मणांगपि पुव्वपणओ, न हि निक्कवडसिणेहाणुबंधो सम-

वेकखइ वज्झोवयारं, ता गच्छ नियगेहे कुणसु समीहियपओयणंति पन्नविऊण समप्पियाइं धूयणवसणाइं पणासि-
 याइं तदुचियाइं वत्थाभरणाइं दिन्नाइं कुकुमाइविलेवणाइंति, सावि ताणि गहिऊण परमहरिसमुच्चहंती गया
 सगिहं, कओ विवाहो, मिलिया सुहिसयणबंधवा, जाया म्हाइ सोहा, पसंसियाइं ताइं इयरजेणं, जहा-मुंदरो
 विवाहमहूसवो एएहिं कओत्ति, ताणि य पसंसं निसामिऊण चिन्तेति-अहो परमोवयारकारी महाणुभावो सेट्ठी
 जेण अम्ह विवाहे पवरोवगरणदाणेणं एवं सोभा निवत्तिया, ता कहमेशस्स पच्चवयारे वट्ठिस्सामोत्ति संपेहिऊण
 उवचियसरीरे अतुच्छपुच्छोवसोहिए सुप्पमाणकुडिलचारुसिंगे सरयससहरकिरणसरिसयणणे समानदेहपरियडले
 अच्चंतसुंदरगोरं कंवलसंबलाभिहाणे तिवारिसिए गोवरणपहाणे जुवाणवसहपोयगे गहिऊण गयाइं ताइं सेट्ठिभवणे,
 पणामिया य ते सेट्ठिणो, चउप्पयपरिगहकयपच्चक्खाणेण निवारिया ते सेट्ठिणा, तहावि असुणियपरसत्थाणि भव-
 णंगणे ते बंधिऊण गयाइं ताइं नियगेहे, तेण सावएण चित्तिं-अहो संकडमेवमावडियं, जओ-जइ मुच्चंति एए,
 वराया ता लोगो हलाइसु वाहेइ तहाविहहीणसमायारो वा कोइ विद्वेइ, अह एत्थेव धरिज्जंति ता निरुवयारि-
 त्तेणेण दुरणुपालिज्जा हवंतित्ति खणं विगप्पिऊण जिणवरवयणायन्नणसमुप्पन्नकरणापूरपूरियहियएणं संगोविया
 सेट्ठिणा, पइदिणं दावेइ किणिऊण य तेसिं फासुगचारिं, पणामेइ वत्थगलियं सलिलं, एवं पइदिणं उदंते वट्ठइ,
 सो य सावगो अट्टमिचाउइसीसु आहारपोसहं सरीरसक्कारपोसहं बंभचेरपोसहं अद्वाचारपोसहं च पडिपुन्नं काऊण

सामादयपडिव्वो समणससो अइयारंपकरिक्खणपरो धम्मसत्थपोत्थयं वाएइ, नियपरिणो य पंजलिउडो चित्त-
लिहिओव निसामेइ, तेऽवि कंबलसंबला अहामइयाए तहाविहमोहणिज्जकम्मलायेवेण य थिरिकयसवणउडा
अव्विक्खत्तचित्ता सन्नित्तेण सुणियजुत्ताजुत्ता सम्मं सुणंति, जायभवभवमया य जइवसं सावगो उववासं कुणइ
तद्विसं तेऽवि चारिं पाणियं च परिचयंति, पुणो पुणो दिज्जमाणं पि न गिण्हंति चि ।

अह तेसु तिरियजोणीसमुब्भवसुवि तवं करंतेसु । सगुणत्ति पक्खवायं वहमाणो चित्तए सेट्ठी ॥ १ ॥
एत्तिवकालं अनुकंपणइया दिन्नमोसिमसणाई । साहम्मिगबुद्धीए एत्तो सबं करिस्सामि ॥ २ ॥

साहम्मियवच्छं जेण जिणिं देहिं भुवणपणएहिं । सम्मत्तसुद्धिहं न्हिदं धम्मियजणस्स ॥ ३ ॥

अणुव्वो कोइ धुवं अहो पभावो जिणिंदवयणस्स । जं निमुणिऊण तिरियावि जंति वेरगमगंमि ॥ ४ ॥

इय चित्तिऊण सविसेसमायरं तोसै दंसए सेट्ठी । भवेसु पक्खवायं वंहति जं वीयरगाऽवि ॥ ५ ॥

एवं च उच्चियकायव्वपरायणस्स सम्मसुवसंतचित्तस्स सरंति वासरा, अन्नया य तीए नयरीए भंडीरजक्खस्स
जणेण जत्ता पत्थुया, तत्थ य विविहतुरगाइयाहणाधिरूढो निगंतूण सयलपुरलोओ तस्स पुरओ वाहं कोइ ।

इओ य-जिणदाससेट्ठिणो पियमित्तो अच्चंतकोऊहलिओ जक्खजत्ताए वाहियालिं काउमणो सेट्ठिं अणापुच्छि-
ऊण पणयभावेण कंबलसंबले गंतीए जोत्तिऊण गओ जक्खपुरओ, वाहिया महतीवेले, ते य अच्चंतदरिसणिज्जायारत्तणेण

अन्नपणयिणा जणेण वाहिज्जमाणा आरावेहनिस्सरंतरुहरिधारापरिगया कोमलदेहा अदिट्ठतहाविहयेधणा दुट्ठ-
हियया नित्थामा जाया, तहाविहे य ते सेट्ठिगेहे बंधिता मित्तो पडिगओ, सेट्ठीवि भोगणसमए जाव जवसाइ
धेत्तूणं एइ ताव पेच्छइ एए कंपतदेहे निस्सहगलतनयणे वणमुहनीहरंतसोणिए दोवि गोणए, एवंविहेय दट्ठण रुद्धो
पुच्छइ—अहो केण दुरायारेण इमे वराया इमं अवत्थमुवणीया?, निवेइयं च से जहावित्तं परियेणं, तदायद्वरणेण
य समुण्णन्नो महंतो चित्तसंतावो, कंबलसंबलावि दट्ठघायज्जरियसरीरा अणसणं काउयणा सायरं पुरओ उवणी-
यंपि चारिपाणियं न गेण्हति, जाव य पुणो पुणो गवत्ताइयं दिज्जमाणं नेच्छंति ताव सेट्ठिणा सुणिज्जण तदकिण्णायं
दिन्नमेतेसिं भत्तपच्चक्खाणं, पडिवन्नं च साभिलासं एएहि,

ताहे कारुन्नेणं विमुक्कनीसेसगेहवावारो । सुसिणिद्वबंधवाण व तेसिं पासो ठिओ सेट्ठी ॥ १ ॥
भणइ जहा रोसमहो मणागमेत्तंपि मा वहेज्जाह । जं निहएण तेणं दुत्थावत्थं इमं नीया ॥ २ ॥
संसारपवत्ताणं जंतूणं जेण कित्तिंयं एयं? । न हु नामेगंतसुहो जणंमि जाओ जणो कोई ॥ ३ ॥
दट्ठवज्जपंजरोदरगयंपि सेलाइगुगलीणंपि । पुवकथमसुभकम्मं जीवं संकमइ कुविथं व ॥ ४ ॥
विहवइ तयणु विवसं सुबहुं अइविरसमारसंतं च । कूडपडियं व चडयं बहुप्पयारं तडफडंतं ॥ ५ ॥
ता भो महाणुभावा! सम्मं अहिंयासणं विमोत्तण । अन्नो निज्जरणविही न विज्जए पुवपावस्स ॥ ६ ॥

उवचिययुन्ना तुब्भे सफलत्तणमुवगयं च भे जीयं । जं दुक्खविमोक्खस्समा पत्ता जिणधम्मसामग्गी ॥ ७ ॥

इय एवमाइवयणेहि पसमसारोहिं अमयसरिसिंहिं । संठविया सुहमग्गे ते वसहा सेट्ठिणा सम्मं ॥ ८ ॥

एवं च विसुज्झमाणज्झवसाणा सरीरेवयणं सहमाणा सेट्ठिभणिज्जमाणं पंचनमोक्कारं पडियच्छमाणा कालं काऊण नागकुमारोसु देवेषु उववणणा, ते इमे कंबलसंबलत्ति ॥

इओ य-भयवं महावीरो नावुत्तिन्नो संतो जलतीरंमि इरियावहियं पडिक्कामिय सुरसरियापरिसरे इसिजलोछसु-
हुमवालुगोवरि मंदं मंदं पयाइं निसितो थूणागसंनिवेसे गंतुं पयत्तो, नवरि सामिणो पडिफलंतचक्कमलकुलिसं-
कुसकलसपासायपसुहपहाणलक्खणंकिं पयपतिं नइयुल्लिणे पलोइऊण पूसो नाम सामुहुलक्खणवियक्खणो
चित्तिउमारद्धो-अहो आजम्मकालाओऽवि अदिट्ठुवा अचंतमच्छरियभूया कस्सइ महाणुभावस्स छक्खंडमहिमंड-
लेवभोगिणो चक्किणोव पवरलंछणा पयपद्धइ एत्थ दीसइ, जइ पुण कहंपि कोइ अपत्तरज्जो वा देसंदसणकोऊहली
वा तहाविहविसमदसावडिओ वा चक्कवट्ठी एवं भमेज्जा, पेच्छामि तं महापुरिसं, जइ पुण एथावत्थंमि इमंमि
सेविज्जमाणंमि मय समीहियत्थसिद्धी जाएज्जत्ति परिभाविऊण तुरियगइ जाव कइवयपयंतरमुवगओ ताव दिट्ठो
अणेण थूणागसन्निवेसस्स बहिया बहलपल्लवालंकिंयकंकलितरुणो हेट्ठओ पडिमासंठिओ जिणो, दट्ठुण य परमे-
सरस्स सिरिवच्छलंछियं वच्छयलं दाहिणावत्तगंभीरं नाभिमंडलं बालणपालपाडलं व करकमलं चित्तियमणेणंन

केवलं एयस्म चरणजुयले लक्ष्मणं, सरीरंपि नियनियविभागाणुरुवल्लक्षणाणुगयं उवल्लिखज्जइ, ता कंह एवं-
विहा समत्थपसत्थलक्ष्मणसंपया?, कंह परिजुन्नवत्थमेत्तंपि से न संपज्जइ? कंह वा समग्गभरहरज्जिसिरिसूयण-
परा तारिसा सासुहसत्थवयणविन्नासा?, कंह असंपज्जंतलुल्लिखिभिल्लिखिहारकिसमेयस्स सरीरं?, अहो दूरं पच्चल्लेखणं
विरुद्धं लक्ष्मणसत्थं ।

चिरकालं सेसकलाकलावमवि उज्झिज्जण जत्तेणं । सासुहसत्थमेयं अघमिचारंति पढिओडहं ॥ १ ॥
इण्हिं तु एत्थ समणे निव्वसणे चक्खुगोयरं पत्ते । लक्ष्मणसत्थमसेसं नूनं दूरं विसंवइयं ॥ २ ॥
हा हा धिरत्थु मज्झं परिस्समो जेण हरिणपोयव्व । माइणिणयासमेणं लक्ष्मणसत्थेण नडिओडहं ॥ ३ ॥
मुट्ठीहिं हयं गयणं नवणीयत्थं विरोलियं सलिलं । अघडंतत्थनिवद्धं जं एयं अहिगयं सत्थं ॥ ४ ॥
केलिप्पिण मग्गे संवडिअमिमं पयारणणेण । धुत्तकयं पिव कच्चं कालेणं होइ सिद्धतो ॥ ५ ॥
अलमेत्तो एएणं पलालकप्पेण दुट्ठसत्थेणं । इय तक्किज्जण पूसो परमविसायं गओ सहसा ॥ ६ ॥
एत्थंतरंमि सक्को सुहासणत्थो पउज्जए ओहिं । कह भयवं भवअहणो विहरइ परमेसरो वीरो?, ॥ ७ ॥
थूणागसन्निवेसे पेच्छइ पडिमट्ठियं जिणवरिंदं । नेमिच्चियं च पूसं दूसंतं अत्तणो सत्थं ॥ ८ ॥
तो सिग्घं वियडकिरीडकोडिमणिकिरणविच्छुरियगयणो तियसेसो जिणकमकमलवदणत्थं लहुं एइ, जहा-

भणियविहिणा य नमंसिज्जण सामिं महुरवधणेणं पूसं भणइ-भइ ! किमेवं दूसेसि लक्खणसत्थं, नहु मिच्छां-
भासिणो महाणुभावा सत्थयारा, किं तुमए न सुओ एस ससुरासुरखयरनरनेसरसिरपणयचलणो सिद्धत्थनरिदंन-
दणो तिहुयणविकखायकित्ती धम्मवरचाउरंतचक्कवट्ठी खलमहिलवं रायलच्छिं छड्डिऊण एवं विहरइ । अन्नं च—

एसो सो जस्सेसरियकोडिलेसंपि न घडइ समगो । पायालसगनरखेत्तजायलो गो लुतुंगोऽवि ॥ १ ॥
एसो चिय भवभयभीमकूवमज्जेतसत्तउद्धरणो । वद्धंतुम्भडकलिकालदलणदक्खो इमो चेव ॥ २ ॥
एसो चिय सिवमंदिरकवाडपुडविहडणेक्कतल्लिच्छो । संजमलच्छिनेविसियविसालवच्छत्थलो एस ॥ ३ ॥
एसो चिय करुणाजलनिष्ठावियमच्छरिगित्तजणो । अप्पडिमनाणदंसणपमोकखुगुणगणनिही एस ॥ ४ ॥
पच्चाइऊण एवं पूसं तिविहेण वयणनिवहेण । पणमियजिणवरचरणो सहस्सनयणो गओ सगं ॥ ५ ॥
इय धोरपरीसहवोरिसमरविद्धसणेक्कवीरस्स । वीरस्स भुवणपहुणो चरियंमि सुहोहभरियंमि ॥ ६ ॥
सुरसूलपाणिकोसियमहाहिपडिबोहणत्थसंबद्धो । पंचमओ पत्थावो समत्थिओ वित्थरेणोसो ॥ ७ ॥

इइ सिरिगुणचंदसूरिरइए महावीरचरिए सुलपाणिचंडकोसिअणबोहणो नाम पंचमो पत्थावो ।

अथ षष्ठः प्रस्तावः

पुष्वज्जियावज्जविणासणत्थं, एगागिणा वीरजिणेसरेण । तित्तिक्खिया जे उवसग्गवग्गा, निंदसिया ते सयला कमेण ॥१॥
एत्तो य गोसालयदुव्विणेयजुत्तस्स तस्सेव महापटुस्स । होहिंति जे ते उ निंदंसइस्सं, एग्गचित्ता निमुणेह तुब्भे ॥२॥

अह पुष्वोवइट्ठूणागसन्निवेसाओ निक्खमिऊण गामाणुगामेण परिब्भमंतो ठाणे ठाणे सुरविसरेण
पूइज्जमाणो अभणमाणोवि नियमाहप्पेण पाणिगणं पडिबोहिंतो पत्तो काणुज्जाणदीहियारमणिज्जं रासगिहं
नयरं, तस्स य अट्ठरदेसे समुत्तुंगपासायसहस्ससमद्दासिओ नालंदो नाम संनिवेसो, तत्थ धणकणगसमिद्धो
अज्जुणो नाम तंतुवाओ परिवसइ, तस्स य अणेगे कम्मकरा विसालसालासु संठिया विसिट्ठपट्टदूसाइं वुणंति, भय-
वंपि वासारत्तं काउकामो अज्जुणं अणुजाणाविऊण एगंतभूयाए तसपाणविरहियाए सुन्नसालाए मासखमणं पढम-
मुवसंपज्जित्ता विहरइ । इओ य गोसालो नाम मंखलिमंखस्स पुत्तो चित्तफलगोवजीवी एगागी परिभमंतो तत्थेव
सालाए ठिओ जत्थ भयवं पलंविद्यमुओ चिट्ठइत्ति । जहिं च एयस्स उप्पत्ती तं पच्छा भणिणही, पढमं ताव जस्स
सगासाओ मंखलीमंखो जाओ तहा कहिज्जइ ।

उत्तरावहविसए अत्थि सिलिंदो नाम संनिवेसो, तत्थ केसवो नाम गामरक्खगो, तस्स पाणप्पियाए विणीयाए

सिवाभिहाणाए भारियाए कुञ्छिसि संभूओ मंखो नाम पुत्तो, सो य कमेण जोवणमुवगओ, अन्नया सो पिउणा सह सरोवरं गओ, जलमज्जनं च काऊण तडे निवन्नो पेच्छइ चक्कवायमिहुणं अन्नोन्ननिम्भरपेमाणुरारंजियहियं विविहकीलाविसेसे कुणमाणं, कहं चिय ?—

चंचपुडछिन्नवननलिणिनालवसंविभागफुडपणयं । सूरत्थमणासंकाकयनिविडयरोप्परसिलेसं ॥ १ ॥

जलपडिर्विविनयनिरूपेकखणुप्पन्नविरहपरिसंकं । अन्नोन्नविहियनिकवडचाडुवकिखत्तमणपसरं ॥ २ ॥

एरिसं च तं नाऊणं मंदं मंदं परिसप्पिणा कयंतेणेव असुणियागमणेण पारद्धिण्ण आयन्नंतमाकड्डिऊण खित्तो तदभिमुहो सिलीमुहो, अह दिवसजोगेण लग्गो चक्कवायस्स, मम्मिओ य सो तेण घाएणं, जावडज्जवि न वावज्जइ ताव तं तहाविहं पेच्छिऊण खणं रुणुञ्जुणिऊण य सकरुण विवन्ना चक्कवाई, इयरोऽवि मुहुत्तमेत्तं जीविऊण पंचत्त-
मुवगओत्ति । एवं च तद्वइयरमवलोइऊण मंखो सुच्छानिमीलियच्छो निवडिओ वरणिमंडले, दिट्ठो य केसवेण अहो किमेवमतक्कियमावडियंति विव्हियमणेण, समासासिओ सिसिरोवयारोहिं, खणंतरेण उवलद्धचेयणो पुच्छिओ य—
पुत्त ! किं समीरखोभो ? उय पवलपित्तदोसो ? अहवा नित्यामत्तणं ? अन्नो वा कोइ हेऊ ? जेणेवं निस्सहंगो चिरं मो-
हमुवगओऽसि ? साहेसु परमत्थं, तेणावि पिउवयणमायन्निऊण विसुक्कदीहुस्सासेण भणियं—ताय ! एवंविहं चक्कवाय-
मिहुणं नियच्छिऊण मए पुव्वजाइ सरिया, किर अहं पुव्वभवे माणससरोवेर एवं चिय चक्कवायमिहुणत्तणेण वहुंतो पुल्लं-

दमुक्कमग्गणाभिहओ तक्खणविरहफुट्टहिययाए चक्कवाईए अणुगओ मओऽम्हि, मरिऊण संपयं तुह पुत्तत्तणेण उववञ्जो,
इण्हिं च चिरपणइणीए तीसे चक्कवाईए विरहं सोढुं न पोरमि, केसवेण भणियं—वच्छ ! अलं समइक्कंतदुक्खसुमरणेण,
एसो चिय सहावो एयस्स दढकयंतस्स जं न सहइ दहुं चिरकालं पियसंपओगसुहियं कमवि जणं, अवि य—

देवाविय नियपणइणीविरहुब्भयदुक्खदहणसंतत्ता । मत्तच्च मुच्छया इव कहकहवि गमति नियजीयं ॥ १ ॥

तुम्हारिसाण पुत्तय ! केत्तियमेत्तं इमं अओ दुक्खं । जेसिं चम्मओणद्धं देहं सवावयासज्जं ॥ २ ॥

ता विरम पुच्चभवसुमरणाउ वट्टेसु वट्टमाणेणं । तीयाणागयचित्तणवसेण सीयइ सरीरं पि ॥ ३ ॥

तेणं चिय संसारो नूणमसारो इमो दढं जाओ । जं जम्मभरणजरोगसोगपलुहाइं दुक्खाइं ॥ ४ ॥

इय पन्नविउं विविहप्पयारहेऊहिं केसवेणं सो । नीओ कहमवि गेहे विरहमहावेयणाभिहओ ॥ ५ ॥

तत्थ गओऽवि सो पसुक्कपाणभोयणो सुन्नमणो धरणिनिसियलोयणो महाजोगिच्च निरुद्धवाचारंतरपरिचित्तणो
तणंपि व नियजीविंधपि गणेमाणो अच्छइ, एयावत्थं च तं पासिऊण जायचित्तपरितावेण सयणवग्गेण मा छलणा-
विगारो कोऽवि होजत्ति संकियमणेण सच्चायेरेण वाहराविया तंतमंतवाइणो, दंसिओ तेसिं, कया य उवयारा, न
जाओ मणांगपि विसेसो, अन्नया य देसंतराओ आगओ एगो धेरपुरिसो, ठिओ एयस्स चैव गिहे, दिट्ठो अणेण भंसो,
पुट्ठो य पासवत्ती केसवो, जहा—भइ ! किं कारणं जं एसो जुवावि रोगाइणा निरुवहओवि ससछो इव लक्खिअइ ? ,

केसवेणवि साहिओ दोसुब्भओ, तेण भणियं-कयं किपि तुमए एवंविहोसस्स पडिविहाणं? केसवेण भणियं-दंसिओ एसो पवरमंततंताइजाणगाणं, थेरेण जंणियं-निरत्थओ सवोवक्कमो, पेमगहस्स किं करिंति ते वरागा?, तहाहि—

उग्गविससप्पसंभूयवेयणोवसमकरणदक्खावि । पंचाणणदुट्ठुकरिंदरक्खसीथंभणपरावि ॥ १ ॥

भूयसमुत्थोवद्वविणासकुसलावि परमविज्जावि । पेमपरव्वसहियं पणुणं काउं न पारिंति ॥ २ ॥

केसवेण भणियं-किं पुण एत्तो कायवं?, तेण भणियं-जइ मं पुच्छसि ता जावज्जवि दसमिदसं न पावइ एस ताव आलिहावेसु चित्तफलहे पुव्वइयरं, जहा-पुल्लिदेण चक्कवाओ सेरेण पइओ, जहा तंमि जीवंते चेव तप्पणइणी मयत्ति, एवं च काराविज्जण चित्तफलगहत्थं एयं परिब्भमावेसु गामनगराहुसु, मा एवं कए कहवि विहिव-सेण पुव्वमव्वभज्जावि पाविथमहिलाभावा फलगलिहियचक्कवायमिहुणवइयरावलोयणजायजाइसरणा इमिणा सद्धि संघडेज्जा, सुव्वंति य पुराणागमेसु एरिसवुत्तंता, एवं च कए एसोऽवि आसासुयगलाखलियजीओ कइवय-दिणाणि जीवेज्जा, एवमायन्निज्जण केसवेण साहु साहु तुह बुद्धीए, को जाणइ परिणयमइणो पुरिसे मोत्तुण एवं-विहविसमत्थनिन्नयं? ति अभिणादिज्जण तव्वयणं निवेइयं मंखस्स, तेणावि भणियं-ताय! किमजुत्तं?, सिग्घमुवट्ठ-वेह चित्तफलं, एसो चेव हवउ कुवियण्णफळोलमालाउलस्स चित्तस्सुवक्खेवो, तओ केसवेण मुणिज्जण तदभिप्पायं आलिहावियं जहावट्ठियचक्कवायमिहुणरूपाणुयं चित्तफलं, समणियं च मंखस्स, दिन्नं संबलं, तयणंतरं च सो

चित्तफलगत्यो सहाइणा एगेण अणुगम्ममाणो नयरपुरखेडकच्चडमडंबपमुहेसु सन्निवेसेसु आसापिसायनडिओ निव्विस्सामं परिब्भसइ ।

दंसेइ पइगिहं चिय समूसियं तं च तियचउक्केसु । चउमुहमहापहेसु य पवासभादेउलेसुपि ॥ १ ॥

ताहे रहंगमिहुणं तहासरूवं निरुविकुण जणो । कोऊहलेण पुच्छइ साहेइ य सो जहावित्तं ॥ २ ॥

अणवरयंपि सवित्थरमसमत्थो नियकहं च सो काहिउं । संखेवत्थनिबद्धं साहइ दुवईए नियवत्तं ॥ ३ ॥

जहा-माणससरोवरंमि अवरोप्परपोढपमाणुरंजियं, नयणनिमेसमेत्तविरहदूभिज्जंतदेहयं । लुद्धयमुक्कनिसियसर-
विदुरियमह पंचत्तमुवगयं, संपइ संपओगमभिवंछइ एयं चक्कमिहुणयं ॥ ४ ॥ इमं च निसामिकुण केई पवसंति
केई अवहीरंति केइ अणुकंपंति, सोऽवि अविलक्खचित्तो सकज्जपसाहेक्कनिरओ परियडंतो चंपं नयरिं गओ, तत्थ
य निट्ठियं पुट्ठाणियं संबलं, तओ अन्नं जीवणोवायमपेच्छंतो तं चेव चित्तफलं पासंडं ओड्डिऊण गायणाइं गाय-
माणो भिक्खं भमिउं पवत्तो, अविय—

अइतिक्खल्लुहाभिहयस्स पिययमाजोगऊमुयमणस्स । एक्काविय से किरिया उमयत्थपसाहिया जाया ॥ १ ॥

इओ य-तत्थेव पुरे वत्थवो मंखली नाम गिहवई, सुभदा य से भज्जा, सो य अपरिहत्थो वाणिज्जकलासु अकु-
सलो नरिंदसेवाए असमत्थो करिसणसमए अलसो कट्ठकिरियाए अवियक्खणो वावारंतरेसु, केवलं भोजणमेत्तं-
पडिबद्धो कइं सुहेण निव्वाहो होज्जति अणवरयं उवायंतरं विचिंततो पेच्छइ मंखं चित्तपट्टपयडणपडियकगभिकखा-

वित्तीए पइदिणं सुहेण निव्वहतं, तं च दट्ठण वित्तिमणेण-अहो एयस्स इमा अणुवरोहिणी वित्ती अचोरहरणिज्जं
मंडोळं निचंडुहा कामधेणू असलिला सस्सनिप्फत्ती अपरिकिलेसो महानिही, ता जीविओऽहि चिरकालाओ जं
पाविओ एस परमोवाओत्ति विगप्पिऊण गओ मंखस्स समीवं, पडिवन्ना तस्स सेवा, सिक्खियाइं गायणाइं, अह
तंमि पुव्वभच्चमज्जाविरहवज्जजरियहियंमि पंचत्तमुगए सुणियत्तं व अण्णाणं मन्नतो महया वित्थरेण चित्तफल-
गमवरमालिहाविऊण समागओ नियमंदिंरं, भणिया नियगेहिणी-पिए ! पाडेसु संपयं छुहासिरे वज्जासणिं पगुणा
सवाहि य विहारजत्ताए, तीए बुत्तं एसा पगुणाऽहं, वच्चसु जत्थ भे रोयइ, तओ चित्तफलं घेचुं तीए समओ
नीहरिओ सो नयरीओ, तव्वित्तीए परिब्भमिउमारद्धो य देसंतरेसु, तव्वासिलोगोऽवि पुव्वदिट्ठनाएण तमागय
पेच्छिऊण मंखो आगओत्ति वाहरइ, एवं मंखली मंखोवइट्ठपासंडसंबद्धेण मंखो जाओत्ति । अन्नया य सो परिब्भ-
मंतो पत्तो सरवणसन्निवेशे, ठिओ गोबहुलमाहणस्स गोसालाए, तत्थ निवससाणस्स पयूया सुभदा, जाओ से
दारगो, कयं उचियसमए गुणनिप्फन्नं गोसालोत्ति नायं, संवड्ढिओ कमेणं, अइकंतो बालत्तणं, सो य दुट्ठसीलो
समावेणं, कुणइ विविहाणत्थे समावेण, न वट्ठइ आणानिद्देसे, सिक्खविज्जमाणो पवहइ पओसं । अवि य-

सम्मानदाणपगुणीकओवि उज्जुत्तणं खणं धरइ । सुणपुच्छंपिव पच्छा कुडिलत्तं झत्ति देसइ ॥ १ ॥

अत्थक्कजंपिरं सम्मवेहगं कूडकयडपडिवद्धं । वेयालं पिव तं पेच्छिऊण को को न संकेइ ? ॥ २ ॥

पाव ! नवमासमेतं गन्धे वृढोवि पालिओवि बढुं । सयवारंपि य भणिओ वट्टसि नो वयणमेत्तेऽवि ॥ ३ ॥
 इय जणणीए एसो वुत्तो पच्चुत्तरं इमं भणइ । अम्मो ! ममोदरे विससु जेण दुगुणं तुमं धरिमो ॥ ४ ॥
 जत्थ दिवसंसि कलहं पिउणावि समं पउंजइ न एसो । भोयणरुईवि पावस्स तस्स जायइ न तत्थ कुडं ॥ ५ ॥
 नीसेसदोसनिवहेण निम्मिओ निच्छियं पयावइणा । जं तारिसो न दीसइ अन्नो सबंनिवि जयंसि ॥ ६ ॥
 तह कहवि तेण निथदुट्ठिमाइ लोगो परंमुहो विहिओ । जह दुस्सीलजणाणं सो पढमनिंदसणं पत्तो ॥ ७ ॥
 इय विसतरुव दिट्ठीविसोच्च पढमुग्गमेवि वट्ठतो । दंसणमेत्तेणं चिय भयावहो सो जणे जाओ ॥ ८ ॥
 अन्नया य सो पिउणा समं बाढं कलहिऊण तारिसयं चिय चित्तफलं आलिहावेत्ता एकडो भगंतो उवागओ
 तत्थेव सालाए जत्थ भयवं ठिओत्ति । एसा गोसालगस्स उप्पत्ती ॥

अह सामी पढमं मासकलमणं काऊण पारणगदिणे पविट्ठो भिक्खट्ठा, गोथरचरियाए पत्तो विजयाभिहाणस्स
 सेट्टिस्स मंदिरं, दिट्ठो य तेण भयवं, तओ परसहरिसवसविसप्पमाणससुच्चरोमंचमुव्वहेतेण पाराविओ भूरिमकल्लवं-
 जणसनिद्धाए भोयणविहीए, पाउब्भूयाणि नहयले गंभीरभेरीभंकारुम्मिस्सचउविहत्तूरसणाहाइ सिंदूरपूरारुणचा-
 मीयरधारापज्जवसाणां पंच दिवाइ, विणंभिओ तिगचउक्कवचरपहेसु विविहो साहुवाओ, निसागिओ गोसालेअ
 एस वुत्तंतो, तओ चिंतियमणेण-अहो न सामन्नसाहप्पो एस देवज्जो, ता परिच्चइऊण चित्तपट्ठिगापासंडं पड्डिक्क-

ज्जामि एयस्स सीसत्तणं, न कयाइ निष्फला हवइ रथणायरसेवा, एवं विगणपमाणस्स भयवं पारिऊण पत्तो तमेव
तंतुवायसालं, ठिओ काउस्सगेणं, गोसालोऽवि सामिणो अट्टुगं निवडिऊण चलणसु विन्नवेइ—
एरिसमाहणं तुह देवज्जय ! नो मए पुरा नायं । कुसलोऽवि मुणइ नग्घं अहवा थवियाण रयणाणं ॥ १ ॥
नियजणगाओऽविहु वंछियसुहअथसाहगो जाओ । अणुकूले वा दइवे अनओऽवि नयत्तणमुवेइ ॥ २ ॥
हवउ बहुजंपिणं पडिवज्जिस्सामि तुम्ह सीसत्तं । अब्भुवग्गेमसु सामिय ! पत्तो एक्को तुमं सरणं ॥ ३ ॥
सामीवि इमं सुणित्तावि विहिपडिसेहे अकुणमाणो तुसिणिक्को ठिओ, इयरोऽवि निययाभिप्पाएण पडिवन्न-
सिस्सभावो भिक्खाए पाणवित्तिं काऊण भगवओ समीवं न मुयइ, अह बीयमासखमणपाएणए आणंदनामस्स
गिहवइस्स घरे गोयरचरियाए पविट्ठो भयवं, पडिलाभिओ य खज्जगविहीए, तइए य मासखमणपाएण सुनंदस्स
मंदिरे सव्वकामगुणिणंति । एत्तो चउत्थमासखमणमुवसंपत्तिंत्ताणं विहरइ, गोसालोऽवि बहुदिवसेवासंभाविय-
पणयभावो कत्तियपुन्निमादिवसे संपत्ते पुच्छइ—भयवं ! एरिसियंमि वारिसियमहूसवे किमहमज्ज भत्तं लभिस्सामि ? ,
एत्थंतरे जिणवरत्तणुसंलीणेण भणियं सिद्धत्यवंतरेण—भइ ! अज्ज तुमं पाविहिमि अंबिलेण समं कोहवक्कूरं, कूड-
ल्लयं च दक्खिणाएत्ति, सो एवं निसामिऊण सूरुगमाए आरब्भ सव्वायेरेण उच्चावएसु गिहेसु परिममिउमा-
रद्धो, जत्थ जत्थ वच्चइ तत्थ तत्थ आरनालकल्लविचं कोहवक्कूरमेव लब्भइ, अह जायंमि अवरणहसमए छुदा-

पिवासाभिहओ जाहे अन्नं किंपि न पावेइ ताहे एगेण कम्मएण गेहे णेऊण जेमाविओ अंबिलोछियं कोदवकूरं,
उवणीओ य से भोगणावसाणे रूवणो, गहिओ य तेण, नवरं वीहीए दंसिओ, कूडगो य जाओ, तओ सो 'जेण
जहा भवियवं, न तं हवइ अन्नह'त्ति नियइवायं गिणहइ, भयवंपि तंमि चिय कच्चियपुण्णिमादिणे निक्खसिऊण नालं-
दाओ गओ कोछागसन्निवेसं, तत्थ य बहुलो नाम माहणो तदिणं दिवरे परमायेणं भुंजावेइ, तस्स य गिहे
चउत्थमासखमणपारणं काउकामो सामी पविट्ठो भिक्खं, दिट्ठो अणेण, तओ परमन्नेण ययमहुसणाहेण पडिला-
मिओ, वियंभियाइ पंच दिवाइ । इओ य—

कूडगरूयहत्थो लज्जाए मंदमंदसंचरणो । जाए वियालसमए गोसालो एइ सालाए ॥ १ ॥

जिणनाहमपेच्छतो संभंतो पुच्छइ समीवगयं । लोयं जिणप्पउत्तिं पुणरुत्तं सब्वजत्तेणं ॥ २ ॥

जाव न कोइ निवेयइ सत्ताहिरब्भंतरं समत्तेणं । नालंदं तावेसो हिंडइ सामिं निहालंतो ॥ ३ ॥

न य कत्थवि उवलद्धो तग्गमणविही तओ स चित्तेइ । पडिक्कलो मज्झ विही पुणोवि विहिउडिहि एगागी ॥ ४ ॥
एवं च सुचिरं परिच्चूरिऊण परिचत्तचित्तफलपमुहोवगरणो विमुक्कनियंसणो सउत्तरोट्ठं सिरं खउराविऊण नीहं
रिओ तंतुवायसालाओ, ठुरियं वचंतो य पत्तो कोछागे, तत्थ य बहिया जणो अणमणं एवं जंपेइ—अहो धण्णो
कयउण्णो उवलद्धजम्मजीवियफलो माहणो जस्स घरीमि तहाविहमहामुणिदाणयसेण निघडिया कणगवुट्ठी, तियं

सेहिं उग्रधुट्टु अहो दाणं, जाओ जयमि निम्मलो साहुवाओ, गोसालोऽवि एयमहुं जणंतियाओ सोचा हट्टुट्टो
एवं विचिंतै-जस्मिं महासुणिं एए वयंति तारिसणभाओ सोच्चिय मम धम्मायरिओ महावीरो, जेण न खलु अत्थि
अन्नस्स कस्सइ तहारुवस्स समणस्स वा माहणस्स वा एवंविहा इहीसक्कारपरक्कमत्ति निच्छिऊण कोल्लागसंनि-
वेसंमि स बाहिरब्भंतरं सुनिउणदिट्ठाए जाव पलोएइ ताव दिट्ठो भयवं काउस्सग्गमुवगओ, तं च पेच्छिऊण हरिस-
वस्ससिरोमकूयो वियसियवयणो पावियचित्तायणं व अण्णाणं मन्नंतो तिवसुत्तो आयाहिणपयाहिणं काऊण
निवडिओ भयवओ चरणेसु, भालतले वडियपाणिसंपुडो य एवं भणिउं पवत्तो—

असरिसगुणगणयणायरो तुमं तिहुयणस्स पुज्जो य । विहलियजणसाहारो य जेण ता विणवमि इमं ॥ १ ॥
पुव्वं वत्थाइपरिग्गहेण जोग्गो न आसि दिक्खाए । संपइ पुण परिचत्तमि तंमि जाओ अहं जोग्गो ॥ २ ॥
ता तेलोक्कदिवायर ! पडियज्जसु जेण संपइ भवामि । तुह सिस्सो जा जीवं एत्तो तं चेव धम्मगुरू ॥ ३ ॥
तुह थवमेत्तविरहेवि नाह ! हिययं कहंपि फुट्ठंतं । पुणरुत्तसंगमसमीहणेण कट्टेण संघरियं ॥ ४ ॥
जाणामि वीयरारो कीरंतो नेव निव्वहइ नेहो । पेमगहिलं सच्चित्तं किंतु न पारेमि पडिखलिउं ॥ ५ ॥
अन्नं च-अच्छउ दूरे सेसं वियसियनवल्लिमणहरच्छीए । जं पेच्छसि तं तेणवि सुणेवि अब्भुवगओऽहंति ॥ ६ ॥
इय सविणयं सपणयं भणमाणे तंमि तिहुयणेक्कपह । उज्झियपेमवियारोवि तस्स वयणं पडिस्सुणइ ॥ ७ ॥

जाणंताविहु अइदुदुसीलयं भाचिरं अणत्थं च । गरुया पणएसु तहावि हुंति न परंमुहा कहवि ॥ ८ ॥

एवं च सामी तेण पडिवणसिस्सभावेण समओ सुवन्नखले सन्निवेसे वच्चइ, तस्संतरे गोवाले बहुखीरं गहाय महतीए थालीए अखंडफुडिएहिं नवएहिं सालितंदुलेहिं पायसमुक्खडेतं पेच्छिऊण गोसालो भणइ-भयवं ! दढं छुहाभिभूओऽस्मि, ता एह एत्थ पायसं परिमुंजामो, अह सिद्धत्थेण चिरकाललद्धावगासेण भणियं-भइ ! मा तम्मसु, एसा थाली अद्धसिद्धा चेव विहडीहि, ताहे सो नियदुदुसीलयाए तं वयणं वितहं काउमणो गंतूण ते गोवे भणइ-अरे एस देवज्जगो तीयाणागयजाणओ एवं केहइ, जहा-एस पायसथाली अद्धसिद्धा चेव विवज्जिही, ता पयत्तेण संठवेह, एवं च निसामिऊण ते भयभीया वंसदलेहिं तं पिढरं गाढं वेढिऊण रंधिउमारद्धा, अह पउरतं दुलपक्खेवविहसिया निमेसमेत्तेण फुट्ठा थाली, पच्छा गोवेहिं जं जहा पावियं तीसे पायसालिद्धं कप्परं तं तहा घेत्तूण परिमुत्तं, गोसालोऽवि कंदुकाबिरालोव्व पेच्छमाणो विलक्खो चेव ठिओ सुहुयरं च नियइवायं पडिवन्नो, अह सामी वंभणगामं गओ, तत्थ य गामे द्दोन्नि पाडगा, तेसु दो भायरो नंदउवणंदनामाणो सामित्तं कुणंति, भुवणगुरूवि छट्टुपारणगंमि पविट्ठो नंदपाडयंमि, दिट्ठो नंदेण, पडिलाभिओ दहिमिस्सेण वासियकूरेण, गोसालोऽवि गओ इयरपाडयं, उत्तुंगपासायमवल्लोइऊण पविट्ठो उवणंदस्स मंदिरे, भणिआ उवणंदेण कम्मयरी, जहादेहि एयस्स भिक्खति, उवणीओ अणाए वासियकूरो गोसालयस्स, सो य तं अणिच्छंतो उवणंदं एवं निब्भच्छेइ-

गामुक्कोडं गिणहह नरनाहस्स व न देह किंपि करं । विविहे कुणह विलासे अक्खलियं पावमायरह ॥ १ ॥

अम्हारिसाण सुणिपुंगवाण गेहंगणमुवगयाणं । वासियभत्तं दावितया कंहं नेव लजेह ॥ २ ॥

एवं च आयन्निज्जण रुट्ठेण उवणंदेण भणिया दासी-भइ ! एयस्स चैव समणस्स सीसंमि पविक्खवसु भत्तमेयंति,
खित्तं च तीए, तओ गोसालो बाढमुव्वढाभिमाणो दट्ठोडभिउडिभासुरो अन्नं किंपि तस्स अणत्थं काउमसमतथो
गेहदुवारे ठाऊण भणइ-जइ मम धम्मायरियस्स अत्थि तवो वा तेथो वा ता एयस्स भणुयाहमस्स भवणं डज्झ-
उत्ति, अह अहासन्निहिहिं वाणमंतरेहिं भगवओ पक्खवायमुव्वहंतरेहिं विउविओ हुयवहो, दट्ठं से मंदिरं ।

तयणंतरं च भयवं चंपानयरिं गओ, तत्थ य तइयं वासारत्तं ठाइ, दोमासिएण य खमणेण तवोकम्ममुवसंपज्जइ,
विविहाणि य उक्कुडयासणाईणि करेइ, चरिमदुमासियपज्जवसाणे य बाहिं पारेत्ता गोसालेण समेओ कालायं नाम
सन्निवेशं वच्चइ, तहिं च एंगंतमूए तसपाणरहिं सुन्नागारे निसासमयंमि पडिमं पडिवज्जइ, गोसालोडवि चवल-
त्तेण निरोहमसहमाणो गेहदुवारदेसे निळुक्को अळ्ळइ, एत्थंतरे सीहो नाम गामाहिवपुत्तो विज्जुमईनाभाए दासीए
समेओ भोगत्थी तं चैव सुन्नघरं पविट्ठो, तेण य महया सहेण भन्नइ-अहो जइ कोइ एत्थ समणो वा वंभणो वा
विओ वा वसिओ ता सो साहेउ जेण अहे अन्नत्थ वचामो, इमं च सुणिज्जण सामी ताव पडियापडिवन्नत्तेण
पुणिहक्को जावेइ, इयरो पुण कवडेण न देइ पडिवयणं, ताणि य अणुवलद्धपडिवयणाणि निस्संकं सुरयविणोएण

खणं अच्छित्ता नीहरिउमारद्धाणि, एत्थंतरे दुवारदेसंतरट्टिएण गोसालेण गच्छंती छित्ता विज्जुर्मई, तओ तीए भणियं-अज्जउत्त ! अहं पुट्ठा केणावि, एयं च निसामिऊण सीहेण वलित्ता गहिओ बाहाए गोसालगो, भणिओ य-अरे कइयेवेण अम्हे अणायासमायमाणणि पाससि, पुच्छिओऽवि न साहेसि जहा अहमिह निवसाभित्ति विष्भ-च्छिऊण जहिच्छं पिट्ठिओ लट्ठीए, गओ य सट्ठाणं, तओ-गोसालो भणइ जिणं-तुम्ह समक्खंवि एक्कओ अहयं । एवं निट्ठुरघाएहिं कुट्ठिओ कारणेण विणा ॥ १ ॥ न मणागंवि हु तुम्हे निवारणं कुणह तस्स पायस्स । मम धाय-पुज्जयस्सवि जुज्जइ गरुयाण किमुवेहा ? ॥ २ ॥

अह जिणतणुमल्लीणो सिद्धत्थो वागरेइ गोसालं । रे दुट्ठसील ! जइ तं सच्चं चिय सुहसमायारो ॥ ३ ॥
ता किं अनिमित्तं चिय तं महिलं छिवसि पाव ! गच्छंति । जह अम्हे संलीणा तह ठासि न गेहमज्झाओ ॥ ४ ॥
तुह पक्खं कुणमाणा अम्हेवि तुमं व नणु हणिज्जामो । दुट्ठोवट्ठभपरा होति सदोसा अदोसावि ॥ ५ ॥
एत्थंतरंमि सामी निक्खमिउं पत्तकालगामंमि । पुव्वविहाणेणं चिय सुन्नघरे संठिओ पडिमं ॥ ६ ॥
अह तत्थवि रयणीए गामउडसुओ उ खंदओ नाम । नियभज्जालज्जाए एइ समेओ सदासीए ॥ ७ ॥
दंतलियानामाए ताहे पुव्वं व पुच्छइ इमोऽवि । गोसालोऽवि निलुक्को भएण गेहेक्खेदंसमि ॥ ८ ॥
विजणंति मन्नमाणो तत्तो तीए समं जहिच्छाए । उव्वमुंजिऊण भोगे सो निस्सरिउं समारद्धो ॥ ९ ॥

तेसिं मिहो कहुल्लावसवणसंवड्डमाणपरितोसो । कहकहकहत्ति पहसइ गोसालो अह पिमाओच्च ॥ १० ॥
सोचा पहसियसइं खंदो कोवेण जट्टिमुट्ठीहिं । हणिज्जण तं विमुंचइ ताहे सो एइ जिणमूले ॥ ११ ॥
भणइ य सोवालंभं नायगधम्मो किमेस संभवइ ? । पेच्छंताणवि तुमंहं जं एवमंहं हणिज्जामि ॥ १२ ॥
रक्खाकएण तुब्भे ओलगिज्जइ सया पयत्तेणं । जइ पुण सावि न विज्जइ निरत्थिया ता धुवं सेवा ॥ १३ ॥
अज्जवि सद्दोसाणवि पहुणो नियसेवगण परित्ताणं । सद्वायेरेण कुब्बंति किं पुणो नीइनिरयाणं ? ॥ १४ ॥
सिद्धत्थेणं भणियं केत्तियमित्तो इमो विणिग्घाओ ? । अज्जवि सुहस्स दोसेण नत्थि तं जं न पाविहिंसि ॥ १५ ॥
तथो सामी कुमारसंनिवेसं गओ, तत्थ य चंपगरमणिज्जाभिहाणे उज्जाणे पलंबियभुओ ठिओ काउस्सग्गेण, तहिं
च सन्निवेसे अपरिमियधणधन्नसमिद्धो अब्बंतसुरापाणप्पिओ कुवणयनाम कुंभकारो परिवसइ, तस्स आवणंसि पास-
जिणसिस्सा ससमयपरसमयत्थपरिन्नाणनिउणा भवोयहिनिवडंतपाणिगणसमुद्धरणसमत्था छत्तीसगुणरथणनिहिणो
जहोवइदुपगिड्डइकिरियापरूवणापरायणा अणेगदेसंतरागयविणेयभमरलिहिज्जमाणसुयभयरदा सुणिचंदा नाम
सूरियो निवसत्ति, ते य बाढं वुहुभावसुवगया एवं विचिंतंति—

सवणणुजिणपणीओ धम्मो सवत्थ वित्थरं नीओ । मिच्छत्तवसपसुत्ता सत्ता पडिबोहिया बहुसो ॥ १ ॥
सुत्तत्थेहिं सिस्सा संपइ निप्फाइया जहासत्तिं । परिवालओ चिरं तह सबालवुहुउलो गच्छो ॥ २ ॥

ता एत्तो जुत्तं मे विससपरिकम्मणं सरिरस्स । काउं जहसत्तीए सव्वथवि उज्जमेयव्वं ॥ ३ ॥
 इय चित्तिज्जण सपए निवेसिओ तेण वद्धणो नाम । सिस्सो पडिरूवगुणो विहिया से तह गणणुन्ना ॥ ४ ॥
 भणिओ य वच्छ ! गच्छो जहा मए पालिओ पयत्तेण । तुमएवि तहा एसो पालेयव्वो सयाकालं ॥ ५ ॥
 सिद्धंतदेसणावि य अविगणियपरिस्समेण कायव्वा । सिस्साणं एवं चिय रिणमोक्खो कम्मविगमो य ॥ ६ ॥
 एत्तोऽवि भद्द ! भद्दं नूणं भुवणत्तएवि नो अत्थि । तो सुहसीलो होउं सुहाए मा हारिसिं एयं ॥ ७ ॥
 भो मुणिणो ! तुम्हेहिं पयट्ठियं इमस्स वक्कमि । निब्भच्छिहिवि बहुं कमकमलं नेव मोत्तव्वं ॥ ८ ॥
 जं किंपि मए पुवं तुम्हे सम्मं गुणेषु नो ठविया । अपए वा सिक्खविया तं सव्वं मरिसिज्जं मे ॥ ९ ॥
 इय मुणिचंदमुणिंदा तक्कालोचियविहिं विहेज्जण । पारंभंति सुधीरा दुक्करजिणकप्पपरिकम्मं ॥

अन्नाया य ते महाणुभावा भाविथदुवालसविहभावणा पंचणहं तुलणाणं तवसत्तसुत्तएगत्तवलसरूवाणं मज्झया-
 राओ बीयाए सत्ततुलणाए अप्पाणं भावेमाणा विहरंति । इओ य-गोसालो मज्झंदिणसमए भगवंतं भणइ-एहि
 पत्थावो वट्ठइ, पविसामो गाममज्झे भिक्खानिमित्तं, सिद्धत्थेण भणियं-पज्जत्तं अम्ह अहुणेणं, तओ गोसालो
 पविट्ठो भोयणत्थं गामे, दिट्ठा य अणेण इओ तओ परिभमंतेण ते पासनाहसिस्सा विचित्तपडपाउरणा पत्तपसुहो-
 वगरणकलिया यत्ति, ते य पेच्छिज्जण गोसालेण पुच्छिया-के तुब्भे ? तेहिं भणियं-समणा निगंगथा, सट्ठकमढवि-

णिम्मियमहामेहवारिधरोवसग्गावलोयणाउलफणिरायफणाफलगविरइयातुच्छत्तस्त पासनाहस्स सिस्सा, इति सोचा सो सिरं धुणंतो भणइ-अहो अहो निगंथा दुक्करकारया तुम्हे जे एत्तिमत्तंपि गंथमुव्वहंता अत्तणो निगंथत्तणं ठावेह, अहो पच्चक्खमुसावाइत्तणं अहो निन्निमित्तमत्तुक्कोसो तुम्हाणं, सव्वाहा निगंथाणं मज्झे न केवि तुम्हे, मम धम्मायरिओ चेव दूरुज्झियवत्थाइपरिगहो दुक्करतवचरणनिरओ महग्गा जहत्यनिगंथो भन्नइ, तेहि य जिणनाहं अयाणमाणेहिं उलुंठयाए भासंतं पेच्छिऊण भणियं-भइ! जारिसओ तुमं तं मन्ने धम्मयारिओऽवि तारिसो चेव, जओ-जाणिज्जइ पुत्तविसरिसचेट्ठाए जणणीए सीलसंपया, कंतिगुणेणवि मुणिज्जइ रयणस्स आगरस्स सुद्धी, ता अलं वन्नणाएत्ति वुत्ते रुद्धो गोसालो भणइ-जइ मम धम्मगुरुणो तवो वा तेओ वा अत्थि ता एएसिं धम्मायरियदूसगाणं पडिस्सओ डज्झउत्ति, तो तेहिं भणियं-न अम्हे तुम्ह वयणेणं डज्झामो, तो विलक्खो सो गंतूण सामिं भणइ-भयवं! अज्ज मए सारंभा सपरिगहा निगंथा दिट्ठा एवमाइ जाव पडिस्सओ न दट्ठोत्ति किमिह कारणं?, सिद्धत्थेण भणियं-ते पासावचेज्जा थेरा साहुणो, न तेसिं पडिस्सओ तुह वयणेण डज्झइत्ति । एत्थं-तरे जाया रयणी, कज्जलभसलसामलाइं पसरियाइं दिसिसुहेसु त्तिमिरपडलाइं, इओ य ते मुणिचंदसरिणो चउक्कमि तद्दिणे रयणीए एगाणिणो उस्सग्गेण ठिया, सोऽवि कूवणयकुंभकारो सेणिमत्तमि निब्भरमइरापाणपरव्वसो विसंठु-ल्लुयुलंतचलणो समवणाभिमुहमइतो पेच्छइ बाहिमि काउस्सग्गपडिवन्ने ते सरिणो, तओ चोरो एसोत्ति जायकुवि-

यथेण तेण निविडकरसंपुडेण पीडियं तेसिं गलयं, निरुद्धो उस्मासपसरो, तहवि अविचलियचित्ता सुभज्झाणे वहुता तक्खणमेव कम्मलाघवयाए सपुण्णघोहिनाणा कालं काऊण देवलोयं गया, तेसिं च अहासन्निहियसुरेहिं कुसुमवरिसपुब्बयं कया महिमा । इओ य गोसालो ते देवे विज्जुपुंजभासुरसरीरे उप्पयंते निवयंते य साहु निवाससमीवे पेच्छिऊण सामिस्स साहेइ-भयवं ! तेसिं तुम्ह पडिणीयाण पडिस्सओ डज्झइ, सिद्धत्थो भणइ-भइ ! मा एवमासंकेहि, तेसिं आयरिया देवलोगमुवगया, अओ देवा महिमं करेति, ताहे सो कोऊहलेण गओ तं पएसं, देवावि पूयं काऊण सट्ठाणं पडिनियत्ता, अह तत्थ गंधोदकं पुण्फवासं च दट्ठूण दुगुणजायहरिसो पडिस्सए गंतूण सज्झायद्वा णविणयकरणपरिस्संते निम्भरं पसुत्ते तेसिं सिस्से उट्ठविऊण वागरेइ-अरे दुट्ठसिस्सा ! तुम्हे सुंडियसिरा चैव हिंडह, जहिच्छं भिक्खं परिमुंजिऊण सवं रत्तिं सुयह, एत्तिथपि न सुणह-जहा सूरिणो महाणुभावा पंचत्तमुवगया, अहो तुम्हं गुरूसु पडिबंधो, एवमाइ कलकलं करेत्तंमि उट्ठिया साहुणो, णवरं तवयणासंकिया सहसा गया ते सूरिसमीवे जाव पेच्छंति कालगयमायरियं, तओ सुचिरं अद्धिइं काउमारद्धा । कंहं ?-

तह पालियावि तह पाडियावि तह गुणगणेसु ठवियावि । तह सिक्खवियावि दढं हा हा अकयन्नुया अम्हे ॥ १ ॥
 किं दुक्करतवचरणेण अम्ह किं वावि कुसलबोहेणं । किं चिर गुरूकुलसंवाससेवणाएवि विहलाए ॥ २ ॥
 जं असरिससंजमरयणरोहणं नियगुरुंपि कालगयं । पच्चक्खधम्मरासिंपि नेव मुणिमो पमाएणं ॥ ३ ॥

इय ते नियदुच्चरियं पुणो पुणो चेव जंपिरे समणे । गोसालो निब्भच्छिय बहुसो सामिं समल्लीणो ॥ ४ ॥
तओ सामी चोरगसन्निवेसं गओ, तत्थ य तद्दिवसं परचक्कभयमुवट्ठियं, तब्भएण य खंडरक्खा तियचउक्कमुन्न-
मढसभादेउलकाणणुजाणेसु अन्नसु य तहाविहठाणेसु अपुवपुरिसं चारियसंकाए निभालेमाणा पेच्छंति भयवतं
एगंमि वणनिगुंजे फासुगविजणरूवे गोसालएण परिवुडं काउस्सगेण संठियंति, तं च पिच्छिऊण 'भीओ भयाइ
पासइ' त्ति जायसंका चिंतिउमारद्धा-अहो एरिसंमि एगंतदेसे एएसिं अवत्थाणं न कोसल्लमावहइ, तहाहि-जइ
इमे निद्दोसा ता किं पयेडे चिय नो गाममज्झे वुत्था?, अओ निच्छयं चारोवलंभत्थं परचक्कसंतिथा केइ आगयत्ति
निच्छिऊण पुट्ठो तेहिं सामी गोसालगो य, अहो के तुब्भे? किं निमित्तं वा एत्थावत्थाणंतिवुत्ते भयवं भोणेण
चिट्ठइ, गोसालोऽवि तयणुविचीए तहेव जावेइ, जाव य पुणो पुणो वागरिज्जमाणाऽवि न देति पच्चत्तरं ताव निब्भंतं
चारगा एएत्ति कलिऊण तेहिं नीथा कूयतेडे, पारद्धा य वरत्ताए बंधिऊण तत्थ पक्खिविउं, नवरं पढमं गोसालं पक्खि-
वंति, पच्छा तं उत्तारिऊण भयवंतं बोलीति, एवं च उब्बोलणनिबोलणे कूणमाणाण सोमाज्जयंतीनामाओ प्रासजिणत्ति-
त्थपडिवन्नसामन्नपन्नपरीसहपराइयाओ जीविगानिमित्तघरियपरिघायगनेवत्थाओ पुट्ठभणियस्स उण्णलेनमित्थियस्स
भगिणीओ निमुणियएवंविहवइयराउ मा भयवं चरिमत्तिथयो गहियदिक्खो एस होज्जत्ति जायसंस्याउ जाव
तत्थ पएसे आगच्छंति ताव पेच्छंति भयवंतं तहा वाहिज्जमाणंति, तओ ताहिं भणियं-अरे रुरायारा! नूणं विण-

स्तिउकामा तुभे जे इमस्स सिद्धत्थनरवइसुयस्स सुरविसरपणयचलणस्स एवं उवसगं करेह, एवं च निससि-
ऊण भयभीएहिं सबहुमाणं खामिऊण मुक्को खंडरक्खेहिं जयगुरू, तं च ताओ वंदिऊण भावसारं गयाओ सद्दा-
णंमि । सामीवि तत्थेव कइवय दिणाइं परिपालिऊण गोसालेण समेओ नीसेसनयरमंडलमंडणाए पिट्ठिचंपापुरीए
गंतूण चउत्थं वासारत्तं उवसंपज्जइ, वीरासणलगंडासणाइनिसेज्जाहिं निरंतरं जावेइ चाउम्मासियं च महासम्मणं
करेइ, तस्स पज्जंतदिणंमि य अन्नत्थपारणयं काऊण कयंगलसन्निवेसंमि वच्चइ, तत्थ य दरिद्धेरा नाम पासंडत्था
सारंभा समहिंला सपरिगहा सपुत्तनचुगाइसयणा परिवसंति, तेसिं च गेहपाडगस्स मज्जे सकुलक्कमागयदेवया-
समद्धासियब्भंतरं विउलपट्टसालपरिक्खेवमणहरं समुचुंगसिहरोवसोहिअं देवउलमत्थि, तस्स एगंतकोणे समा-
गंतूण सामी ठिओ पडिमाए, तद्विसं च मंदमंदनिवडंतजलतुसारवायं निरायितसिसिरमारुयं निवडइ महंत
सीयं, तेसिं च पासंडत्थाणं तंमि दिणे जाओ महुसवो, तम्मि दिणे देवउले मिलिऊण सडिंभा सदारा भत्तीए गायंति
यं नचंति य, तेऽवि तहारूवे दट्ठूण अविगणियभाविभओ गोसालो सोवहासं भणिउमाढत्तो—

जत्थ गिहिणीसु पेमं ज्ञाणज्झयणेहिं सह महावेरं । सुरयपंचपरूवणपरायणाइं च सत्थाइं ॥ १ ॥

जीवदयानामंपिपि न सुणिज्जइ जत्थ नूण सुमिणेऽवि । निब्भरमइरापाणंमि निच्चसो उज्जमो जत्थ ॥ २ ॥

गाइज्जइ नच्चिज्जइ सविलासं नियकुंडुबसहिएहिं । को होज्ज नाम एसोऽवि कोऽवि पासंडपरमत्थो ? ॥ ३ ॥

ते एवं फरसक्खरं तं जंपमाणं पेच्छिऊण समुण्णरोसा भणंति-अरे बाहिं निच्छुमह एयं दुडुमुहं, न कज्जमेएण इहट्टिएणं, एवं कहिए कंठे घेत्तूण इयरेहिं निस्सारिओ देवउलस्स बाहिंमि गोसालो, तहिं च हिमत्तुसारसंवलि-यानिलेण अब्भाहओ समाणो निविडबाहुवल्लरीसंछाइयवच्छत्थलो कंपंतकाओ दंतवीणावायणं कुणमाणो समुद्ध-सियरोमकूवो अच्छिउं पवत्तो, तारिसं च तं दट्ठण जायाणुकंपेहिं अइनीओ सो अन्नोहिं देवउलमज्जे, खणमेत्तं च जायसीयावगमो नियदुडुसीलयं पडिक्खल्लिउमपारयंतो पुणोऽवि वागरेइ-‘जत्थ गिहिणीसु पेम’मिचाइ, तओ पुणोऽवि नीणिओ पवेसिओ य जाव तित्ति वारे, चउत्थवाराए भवणमज्झपविट्ठो गोसालो भणइ-

दूरे अच्छउ नियमयविगप्पियं जं न लब्भए वोत्तुं । सबभूयंपि न पावेमि भासिउं किं करेमि अहं ? ॥ १ ॥

नमिमो तिसंझमेयं ठाणं न जहिं सदुच्चरीयस्स । रूसिज्जइ थेवंपिहु जइ पर फुडवाइणो चेव ॥ २ ॥

एवं च निसामिऊण परिणयबुद्धाहिं भणिथा-एस इमस्स देवज्जगस्स कोऽवि पीढियावाहगो वा छत्तधारगो वा पडिचारगो वा होही, ता किं अरे एएण ? तुण्हक्का अच्छह, नियनियकजाइं करेह, जइ सोढुं न तरेह ता सद्वत्तूराइं वाएह, जहा से सहो न सुणिज्जइ, तहेव विहियं तेहिं, अह जायंमि पभायसमए समुगए दिणयरे पचक्खी-भूयंमि जीवनिनियरे तओ ठाणाओ पडिमं उवसंहरिऊण सामी सावत्थिं नयरिं गओ, ठिओ तीसे बाहिं पडिमाए, इओ य भोयणसमए गोसालो पुच्छइ-भयवं ! तुब्भे भिक्खहुं अइयह ?, सिद्धत्थो भणइ-अज्ज अम्ह उववासो, सो पुच्छइ-

भयं! अज्ज किमाहारं भुंजिस्सामि?, सिद्धत्थो भणइ-अज्ज तुमए माणुसमंसं खाइयव्वं, सो भणइ-अज्ज मए तं भोत्तच्चं जत्थ इयरमंसंभवोऽवि नत्थि, किमंग पुण माणुसमंसस्स?, एवं निच्छयं काऊण सव्वत्थ हिंङ्गिउमारद्धो ।

इओ य-त्तत्थेव नयरीए पियदत्तो नाम गाहावई, तस्स सिरिभद्दा नाम भारिया, सा य मरंतविद्यायणी, पुत्तभंङ्ग-जीवणनिमित्तं उवयरेइ मंतवाइणो पुच्छेइ संवच्छरिए सविसेसं पूएइ देवयाओ तहवि न जाओ कोइ विसेसो, तंमि य समए वेलामासे वट्टमाणे देसंतरागयं पसिद्धं सिवदत्तनामधेयं नेमित्तियं पुच्छइ-कह मम पया जीविस्सइत्ति?, तेण भणियं-जइ जायमेत्तं मयल्लयं बालं ससोणियमंसं पीसिऊण दुद्धपक्खेवपुव्वयं पायसविहाणेण रंघिऊण ययम-इहिं सुसंभियं काऊण सुतवस्सिणो उद्धलियचरणस्स सबहुमाणं भोयणत्थं पणामसि ताधे पया यिरा होइत्ति, केवलं तंमि कयभोयणे सट्टाणसुवगए गेहस्स अन्नओसुहं दारं करेज्जासि, मा सो कहंमि मुणित्ता भोयणसरूव्वं गेहं देहेज्जत्ति, पडिवन्नं च सयलं तीए, तम्मि य दिणे पसूया सा मएल्लयदारयं, तओ जहाभणियविहाणेण पायसं काऊण दुवारदेसे ठिया अत्तिहिं निहालेइ ।

एत्थंतरे गोसालो अणेगमंदिरपरिच्चागं कुणमाणो समागओ तं पएसं, दिट्ठो अणाए, सायरं उवणिमंतिओ य समाणो पविट्ठो तंमि गेहे, दिन्नमासणमिमीए, उवविट्ठो एसो, ठावियं से पुरओ भायणं, परिवेसियं च ययमहुस-णाहं पुव्वसंसिद्धं पायसभत्तं, कहं एत्थ मंसंसंभवोत्ति सबुद्धीए निच्छिऊण संतोसमुव्वहंतएण मुत्तमणेणं, भुंजिऊण

गओ भगवओ मूलं, ईसिं विहसियं काऊण भणिउं पवत्तो-भयवं! तुमए चिरं नेमिच्चिगत्तणं कयं, नवरि अज्ज विह-
डियं, सिद्धत्थेण भणियं-भइ! मा ऊसुगो होसु, अवितहमम्ह वयणं, जइ पुण न सहहेसि ता उवमेसु जेण
पच्चक्खं हवइ, तओ अंगुलिं गलए दाऊण वभियमणेण, दिट्ठा कुवियंमि पायसे मंसकेसाइसुहुमावयवा, तदंसणे य
रुद्धो सो तं धरं मग्गिउमारद्धो तं पुण तेहिं धरं तब्भएण चैव अन्नओसुहं कयं, सो य तंमि पएसे पुणो पुणो
हिंडमाणो जाव न लहइ ताव भणइ-जइ मम धम्मगुरुणो तवतेयप्पभावो अत्थि ता डज्झउ इमो पएसो, जिण-
माहप्पमवितहं कुणमाणेहिं अहासन्निहिचवाणमंतरेहिं निह्दो सबो सो पएसो, भयवंपि कइवय दिणाइं विगमि-
ऊण गंतुं पयट्ठो, संपत्तो हलहुयाभिहाणंमि गामे ।

तस्स बहिया अणेगसाहप्पसाहाभिरामो बहलपत्तपडलपडिबलियतरणिमंडलपभापसरो महाखंधो हलिद्दगो नाम
तरुवरो, तस्स हेट्ठओ ठिओ भयवं काउस्सग्गणं, इओ य सावत्थि नयरीं गंतुकामो रयणिमि आवासिओ तत्थेव
सत्थो, सो य सीयपीडिओ संतो पज्जालिऊण जलणं सुचिरं तण्णिऊण य पभायसमए उट्ठिता गओ, जलणोऽवि
जणेण अविज्झविओ निहहंतो क्रमेण पत्तो जिणंतियं, गोसालेण भणियं-भयवं! नासह एस हुयवहो एइ,
इय निसुणिएऽवि सामी अविचलचित्तो तहेव जावेइ । अह पसरिएण सहसा पयकमलं ज्ञामियं सिहिणा ॥ १ ॥

गोसीसचंदणपिच तुसारवरिसं व सिसिरसलिलं व । परिभाविंतो तिबं सिहिदाहं सहइ जिणनाहो ॥ २ ॥

गोसालोऽवि तहाविहमसमंजसमिक्खिऊण भयभीओ । अइदूरमवक्कंतो नियजीवियरक्खणट्टाप ॥ ३ ॥
 अह उवसंतंमि जलणंमि सामी मंगलाभिहाणे गाभे गओ, तहिं च वासुदेवमंदिरे ठिओ पडिमाए, गोसालोवि
 निलुक्को एगत्य पएसे, केवलं केलिकलहाइविणोयाभावेण बाढं दुक्खमणुहवंतो फालचुक्कोव मक्कडो दिसीओ अवलो-
 एइ, एत्थंतरे कीलानिमित्तमागयाइं तं पएसं गामचेडरूवाइं, तओ ताइं पेच्छिऊण उवलद्धरयणनिहाणं व पच्चुजी-
 वियं व मणमाणो विडंविद्यवयणकंदरो दूरं निछालियलोलजीहो पसारियवीमच्छिऊणुयलो धाविओ वेगेण भय-
 जणनिमित्तं तेसिमभिमुहं ॥

अह तं भीसणरूवं दट्ठूणमतक्कियं समुहमितं । गामाभिमुहं भयओ चेडाइं लहु पधावंति ॥ १ ॥
 धावंताणं ताणं पक्खलणवसेण केसिमवि जंघा । भज्जइ अन्नसिं पुण फुट्ठइ सीसं टलइ चलणो ॥ २ ॥
 इथरेसिं पुण वियलंति देहनद्धाइं भूसणाइंपि । केसिं चिय वत्थाइं निवडंति तदा भयवसेण ॥ ३ ॥
 अह तारिसमसंजसमम्मपियरो पलोइऊणेसिं । रोसेण दोसमूलं गोसालं संपवज्जंति ॥ ४ ॥
 रे पाव पिसाय किमम्हं चेडरूवाइं तमिह भाएसि । इय तज्जिऊण तेहिं कुट्ठिजइ सो दढं विवसो ॥ ५ ॥
 ताहे तं हम्मंतं दट्ठु वारिंति गामजणबुद्धा । देवज्जगस्स एसो खु नूनं सिस्सो अओ सुयहा ॥ ६ ॥
 कहमवि तेहि विसुक्को गोसालो वागेरइ जिणनाहं । किं मइ हणिज्जमाणे तुग्हाणं जुज्जइ उवेहा ? ॥ ७ ॥

एत्तिथिदिणाइं समसोकखदोकखसहणेवि नेव पडिबंधो । किं उप्पन्नो तुम्हं ? अहो सिलानिदुरं हिययं ॥ ८ ॥
सिद्धत्थेणं भणियं-किं रूससि निन्निमित्तमम्हाणं ? । अष्णाणमप्यणच्चिय दोसकरं भो निरुंभेसु ॥ ९ ॥
अह उस्सगं पाराविऊण सामी तओऽवि निक्खमिउं । आवत्तनामगामे बलदेवगिहे ठिओ पडिमं ॥ १० ॥
तत्थवि कलहिकरुइ गोसालो दारिएक्कवयेण । पुव्वाणत्थं विसमरिऊण डिंभाइं भेसेइ ॥ ११ ॥
रुयमाणाइं ताइं गंतुं मायापिऊण साहंति । तेहि पुणेवि हणिज्जइ गोसालो पुव्वनाएणं ॥ १२ ॥
गामपहाणजणेणं भणियं किं हम्मए मुहा एसो ? । एयमनिवारयंतस्स होइ दोसो गुरुस्स इभो ॥ १३ ॥
इय कहिए झत्ति जएक्कचक्खुणो सम्मुहं च ते लोया । उग्गीरियदढंढा उवट्ठिया ताडणट्ठाए ॥ १४ ॥
एत्थंतरंमि जिणपक्खवाइणा वंतरेण सा पडिमा । लोआण भेसणत्थं नंगलहत्था समुट्ठविया ॥ १५ ॥
ताहे अदिट्ठपुवं पडिमाचलणं पलोइउं झत्ति । भयभीया ते सामिं भूरिपयोरोहं खांमिति ॥ १६ ॥

खामिऊण विमुक्को जयगुरु चोरायसन्निवेशं गओ, तत्थ पच्छन्नपएसे पडिमं पडिबन्धो, गोसालोऽवि छुहाए परिकिलंतो पुच्छइ-भयवं ! अज्ज चरियवं न वा ? , सिद्धत्थो वागरेइ-अंतरं अम्हं, तओ गोसालो पविट्ठो गाममज्झे तहिं च गोट्ठीभोयणएण बहुभक्खभोयणजायं उवक्खडिज्जइ, सो य अत्थिरत्तणेणं केवलं देसकालो भविस्सइत्ति जाणणट्ठा निहुओ होऊण पुणो पुणो तथभिमुहमचलोयइ, तत्थ य गामे तद्वियं महंतं चोरभयं, ताहे गामवासिणो

जणा जाणंति-एस पुणो पुणो पलोएइ, मन्ने चारो चारिओ वा हवेजा, ता जइ पुण कंहं पि एत्तो पुव्वमोसोवल्लो जाइज्जत्ति विगण्णिऊण गहिओ तेहिं निस्सढं हणिउमारद्धो, य, पुच्छिज्जमाणो जाव न किंपि जंपेइ ताव सुक्को कुट्टिऊण, तओ सो विलक्खो चित्तेइ-अच्छउ दूरे भोयणसंपत्ती, सरीरस्सवि जं न सुक्को तमच्छरियं बहुइ, अहो निक्कारणदुज्जणाण मीलणो, अहवा किमेएण?, जइ अत्थि मम पहुणो पभावो ता डज्जउ एएसिं पावाणं मंडवोत्ति भणिए निदद्धो जिणाणुरागिणा वाणमंतरेण, जिणिंदो पहाविओ कलंबुयाभिहाणसद्विवेसाभिमुहं, तत्थ य दो पच्च- न्तिया भायरो मेहो कालहत्थी य, सामित्तं कुणंति य, तस्मि पत्थावे कालहत्थी भडचडयरपरियरिओ करयलकलि- यविविहपहरणो चोराणुमगलगो जाव केत्तिथं पि भूभागं गच्छइ ताव पेच्छइ ससुहमित्तं जिणं गोसालयं च, ते य दद्वूण भणइ-के तुब्भे?, सामी तुसिणीए जावेइ, गोसालोऽवि केलिपियत्तणेण मोणमवलंबिऊण ठिओ, तओ सो रुद्धो निस्सट्ठु हणिऊण भयवंतं गोसालयं च बंधिऊण महल्लुगस्स भाउणो मेहस्स पेसेइ, सो य भयवंतं तहो- रूवं दद्वूण ससुट्ठिओ बंधणावणयणपुव्वयं पूएइ खामेइ य, तेण किर सामी कुंडगामे नयरे सिद्धत्यनरवइणो समीवसुवगएण दिट्ठो आसि, अह तेण सुक्को समाणो भयवं ओहीए इमं आभोएइ-अज्जवि बहुं कम्मं निज्जरियच्चं, तं च सहायविरहेण निज्जरित्तं न सक्किज्जइ, ता अत्थारियादिट्ठतो एत्थ जुत्तो, सो य एवं—

जह फलभरविणमंतगसंस्ससभारपूरियं छेत्तं । दद्वूण तस्स सामी सिग्घं गहणं समीहंतो ॥ १ ॥

एगाणि चिय लुणिउं अपारयंतो परंपि बहुलंगं । समुचियसुल्लपयाणेण सस्सलुणणे पयट्ठइ ॥ २ ॥
तह मज्झवि चिरभवसंभवस्स कम्मस्स निज्जरणिमित्तं । जुज्झइ अणज्जणसंगएसु देसेसु विहरेउं ॥ ३ ॥
जं तत्थ अणज्जणो निक्कारणकोवसंगओ धणियं । उवसग्गणेण काही साहेज्जं कम्मनिज्जरणे ॥ ४ ॥
इय चित्तिऊण नाहो लाढाविसए मिलेच्छज्जणकिन्ने । गोसालेण समेओ अह निज्जाओ विजियमोहो ॥ ५ ॥
अह तत्थ गयं नाहं हेरियबुद्धीए केइ पाविट्ठा । निट्ठसुट्ठिपहारेहिं विहवति निरणुकंपा ॥ ६ ॥
अन्ने असब्भवयणेहिं तज्जणं हीलणं च कुवति । अइचंडतुडसाणेहि पेसणेणं वंहति परे ॥ ७ ॥
वंतरसुरऽसुरवइजक्खरक्खसपमुहंमि देवसंघाए । बहुमाणपरेऽवि जिणो एगागी सहइ उवसग्गे ॥ ८ ॥
धम्मायरिओ एसोत्ति मज्झ हिययंमि निहियपडिबंधो । पट्ठि ठिउ गोसालोऽवि सामिणो दुक्खमणुहुवइ ॥ ९ ॥
अह तत्थ भूरितरकम्मनिज्जरं पाविऊण जिणनाहो । आरियखेत्ताभिमुहं आगच्छइ पुन्रवंचोव ॥ १० ॥
आरियखेत्ताभिमुहंमि तस्स भयवओ पुन्रकलसाभिहाणगामसन्निहिंमि वट्ठमाणस्स दोन्नि चोरा लाढाविसयसुस-
णट्ठा नीहरंता अवसउणोत्तिकाऊण जमजीहासन्निहं खग्गं उगिरिऊण धाविआ संमुहं, एत्थंतरे पुरंदरो कहिं
जिणो वसइत्ति जाणणट्ठं जाव ओहिं पउजेइ ताव पेच्छइ थवेणासपत्ते आयड्ढियकरवाले चोरे वहनिमित्तं
जिणस्स उवट्ठिए, अह जायतिवकोवावेगेण तेण तहट्ठिएणव समुचुंगगिरिसिहरदलणदुल्लिएण निहया कुल्लिएण,

सामीवि गामाणुगामं विहरमाणो गओ भदिलनयरिं, तत्थ य वासारत्तो पंचमो समुवागओ, तो भयवं विचित्तास-
णाइं कुणमाणो चाउम्मासियं खमणमुवसंपज्जइ, कमेण समइकंते वासारत्ते बाहिं पारित्ता विहरमाणो पत्तो कय-
लिसमागमे गामे, तत्थ य तद्विवसमत्थारियाभत्तं जहिच्छं भोयणं पहियकप्पडियाईण विपणाभिज्जइ, गोसालोऽवि तं
दहूण पविट्ठो, सामिं भणइ-एह एत्थ जामो, सिद्धत्थो भणइ-अज्ज अंतरं अम्हाणं, एवं निसामिय गओ गोसालो
अत्थारियाभत्तट्ठणे, उवविट्ठो भोयणत्थं, परिवेसिउमारद्धं जणेण, सो य बहुयासित्तणेण न पावइ कहिंपि तित्तिं,
ततो गामजणेण महल्लं भायणं दहिकल्लवियकूरस्स भरिऊण समप्पियं एयस्स, सोऽवि समग्गमवि तं भोचुमपारयंतो
भणइ-एत्तिं न नित्थरिही, तओ पाव ! दुक्कालकवल्लिओव नियभोयणमाणंपि न याणसित्ति भणिऊण रोसेण
खित्तं तं भायणं से मत्थयंमि जणेण, पच्छा उयरं परामुसंतो गओ सो जहागयं ।

पुणोवि जंबूसंडं गाममुवागयस्स जयपहुणो तहेव सो अत्थारियाभत्तमल्लीणो खीरं कूरं च जेमिओ तहेव पज्जंतो
जणेण धरिसिओ य, अह सामी अहाणुपुवीए विहरमाणो तंवायनामसन्निवेसं गओ, तस्स बहिया ठिओ पडिमाए,
तत्थ य गामे बहुस्सुया बहुपरिवारा पासजिणसंताणवत्तिणो नंदिसेणा नाम थेरा गच्छचित्तं मोत्तण सुणिचंद-
सूरिणोव जिणकप्पपरिकम्मं करंति, गोसालो य पविट्ठो गाममज्झो, ते समणे सवत्थकंवलोवगरणे दहूण पुव्व-
साहूणं पिव खिंसं काऊण सामिस्स सयासमेइ, ते य नंदिसेणा थेरा तीए चेव रयणीए चउक्के काउस्सग्गेण निच्चला

संठिया, पच्छा आरक्खियपुत्तेण इओ तओ परिभंतेण चोरोत्ति कलऊण महल्लभल्लएण आहया, तव्वेळ चिय ससुप्पण्णोहिनाणा मरिउं दिवमुवगया, अहा सन्निहिदेवनिवहेहि य तेसिं महिमं कीरमाणिं पासित्ता तं पएसं गओ गोसालो, दिट्ठा य कालगया थेरा, तओ सुहपमुत्ता पडिस्सए गंतूण पडिबोहिया तेसिं सिस्सा, निब्भञ्छिऊण साहिओ थेरमरणवइयरो, गओ य सट्ठाणं, जयगुरूवि कुवियसन्निवेसमेइ, तत्थवि चारियत्तिकऊण गहिओ दंडवासिएहिं, बंधणताडणपमुहकयत्थणाहिं पीडिउमारद्धो य ।

अह जिणनाहे तेहिं वहिज्जमाणे जणे समुल्लावो । जाओ जह देवजो अप्पडिमो रुवलच्छीए ॥ १ ॥

कह चारिओत्ति गहिओ किं सोऽवि कोल्ल एरिसं कम्मं । अहवा विचित्तरूवा कम्मगइ किं न संभवइ ? ॥ २ ॥

तहविहु इमं सुणिज्जइ जत्थागिति तत्थ निवसइ गुणोहो । ता नूण मूढयाए एए एयं कयत्थति ॥ ३ ॥

भोगोयभोगेउं साहूवि विरुवमत्थमायइ । जो वत्थपि न वंछइ स चारियत्तं कहं काही ? ॥ ४ ॥

इय लोयपवायं निसुणिऊण विजया तहा पगन्भा य । पासजिणिसिस्सिणीओ तक्कालविमुक्कदिक्खाओ ॥ ५ ॥

निच्चाहत्थं परिवाइयाए वेसं समुवहंतीओ । मा वीरजिणो होहित्ति संसएणाउलमणाउ ॥ ६ ॥

गच्छंति तहिं दट्ठूण जिणवरं आयेणे वंदंति । पच्छाऽऽरक्खिखगुरिसे तज्जति सुनिट्ठुरगिराए ॥ ७ ॥

रे रे किं न हयासा ! सिद्धत्थनरिंदनदणं एयं । धम्मवरचक्कवाट्टिं मुंचह ? सिग्घं च खामेह ॥ ८ ॥

जइ रे वइयरमेयं सुणइ सुरिंदो कंहपि ता नूणं । तुम्हे सरज्जरट्टे किणसगेहंमि पेसेइ ॥ ९ ॥
 इय भणिए भयभीया भयवंतं ते णमंति विणयनया । खामेति सदुच्चरियं निडालतलघडियकरकमला ॥ १० ॥
 अह तेहिं परिमुक्को भयवं वेसालिनयरिमणुसरिउं । चलिओ गच्छंतस्स य जाया विच्चे दुवे मग्गा ॥ ११ ॥
 अह लाढाइसु देसेसु विविहतिवोवसगवग्गेणं । पडिभग्गो गोसालो सामिं विन्नविउमाढत्तो ॥ १२ ॥
 एक्कं पेच्छंतोऽविहु हणिज्जमाणं ममं न रक्खेसि । अन्नं तुहोवसग्गेण एइ मज्झंमि उवसग्गो ॥ १३ ॥
 अवरं पढमं लोगो मं चेव हणइ पच्छओ तुम्हे । भोयणवित्तीवि महाकिलेसओ पइदिणं होइ ॥ १४ ॥
 माणावमाणसमचित्तवित्तिणो सुणणेसेवणपरस्स । नायगधम्मोऽवि न तुज्झ कोऽवि पेच्छज्जइ समीवे ॥ १५ ॥
 जेण-जो सेवगंमिमुहिए नो मुहिओ दुक्खिए य नो दुहिओ । सोक्खाभिकंखिणान्णु सेविज्जइ सोऽवि किं समीहि ॥ १६ ॥
 तम्हा अज्जवि चिरजीवियत्थिणो सोक्खकंखिरमणस्स । एत्तो तुह सेवाए देवज्जय ! मज्झ पज्जत्तं ॥ १७ ॥
 इय कहिए सिद्धत्थो वागरइ करेसु जं तुहावडइ । अम्हाण एरिसच्चिय ववहरणा किमिह तुह भणिमो ? ॥ १८ ॥
 एवं जाए परोप्परुद्धावे सामी वेसालीमग्गेण लग्गो, इयरोऽवि भगवओ निव्वट्टिऊण रायगिहमग्गेण पट्टिओ,
 अंतरा य करिहरिहरिणविरुवग्गपमुहसत्तंसकुले गयणतलावलंबिदीहरतरुभीसणे निवडिओ महारण्णे, तत्थ य
 चोरवइणा एगंमि महातरुसिहरे पहियजणावलोयणनिमित्तं आरोहिओ नियपुरिसो, तेण य दिट्ठो सो सच्छं-

दलीलाए आगच्छमाणो, दट्टूण य साहिं चोरवइणो, जहा-एगो नग्गसमणो एइ, तेण भणियं-न हरियच्चमत्थित्ति एस न भाइ, अन्नहा कहं एत्थ अमाणुसाए अडवीए पविसेज्जा?, अहवा एस कोइ दुरायारो अम्हाणं एवंविह-रुवपडिवणो मण्णे परिभवं उप्पाएइ, ता एउ अक्खलियगईए जेण अवणेमो से दुव्वियं, एवं च जंपताण समीवमाणओ गोसालो, तओ तेहिं दूराओ चिय साहिलासं-एहि माउलग ! सागयं तुहत्ति भणिज्ज गहिओ करेण, उड्ढाविओ पट्टिं, मरणभयविहरेण य उड्ढिया अणेणं, तओ चोराहिवइणा पंचसयचोरसमेएण आरुहिज्ज जहक्कं वाहिओ सुचिरेलं, छुहातणहापरिस्समभिहओ जया कट्ठगयजीओ जाओ ताहे मोत्तण जहाभिमयं गया तक्करा, गोसालोऽवि बाढं सुट्ठियसरीरो मोग्गपहारज्जरिउव कुलिसताडिउव विगयेयेणो तरुसड्ढायाए सुहुत्तमेत्तं विगमिज्ज सिसिरमारुएण उवलद्धचेयणो सोगं करेउमारद्धो, कहं?—

हा दुहु दुहु विहियं हियत्थिणा नट्टुद्विणा उ मए । जं सो सामी सुक्को अचित्तमाहप्पपडिहत्थो ॥ १ ॥

निदोसंमिवि नाहे कुवियण्णेहिं मए हयासेण । जा किर कया अवण्णा सा संपइ निवड्डिया सीसे ॥ २ ॥

तस्स पभावेण पुरा अणेगठाणेसु दुट्ठसीलोऽवि । निदूढोऽहं संपइ तक्किहे नत्थि मे जीयं ॥ ३ ॥

अहवा-सहसच्चिय सम्ममच्चित्तज्ज कौरंति जाइं कज्जाइं । अणत्थभोयणं पिव ताइं विरासे दुहावेत्ति ॥ ४ ॥

मण्णे इमिणच्चिय कइयेण मं छलिउमिच्छइ कयंतो । कहमन्नहा कुबुद्धी हवेज्ज एयारिसी मज्झ ॥ ५ ॥

ता किं एत्तो सरणं सरेमि ? किं वा गइं पयज्जासि ? । कस्स व पुरओ दुक्खं निवेइउं होमि निच्चित्तो ? ॥ ६ ॥

अहवा कयं विगप्पेहिं नत्थि मम तिहुयणेऽवि साहारो । तं चेव धम्मसूरिं मोत्तुं ता तं निहालेमि ॥ ७ ॥

इय निच्छिऊण कहमवि संसारं पिव सुभीसणसरणं । लंघित्ता गमाइसु हिंडइ सामिं निरूवित्तो ॥ ८ ॥

इओ य-भयवं महावीरो अहाणुपुट्ठीए परिण्डतो पत्तो विसालसालवलयपरिविद्धियाए मयणुम्मत्तरामाभिरामाए वेसालीए नयरीए, तत्थ य बहूणं कम्माराणं साहाराणए सालाए अहासन्निहियजणं अणुजाणावित्ता ठिओ पडि-
माए, अन्नया य एगो कम्मारागो रोगपीडिओ संतो छट्ठमि मासे पणुणसरीरो जाओ समाणो पसत्थे तिहिसुहुत्ते मंगलतूरपुरस्सरं चंदणुद्धिन्नदेहो हरहासकासकुसुमपंडुरदुकूलनिवसणो सिरे निसियदोवक्खयसरिसवो सयणजणं अणुगम्ममाणो तमेव कम्मारासालमागओ, पेच्छइ पुरट्ठियं उद्धट्ठाणं पडिवन्नं विगयवत्थं जिणवरं, तं च दट्ठण वियं-
भियपलयकोवानलो पढमं चिय अमंगलरूवो नगगओ दिट्ठो, ता अमंगलं एयस्स चेव उवणेमिति चित्तिऊण लोह-
घणं घेतुं धाविओ सामिवहणत्थं, एत्थंतरे सुराहिवइणा कहं नाहो विहरइत्ति जाणणनिमित्तं पउत्तो ओही, दिट्ठो एयरूवो वइयरो, तओ नयणनिमसमेत्तेण आगओ चलंतमणिकुंडलो आखंडलो तं पएसं, नियसत्तीए य निवाडिओ घायगस्स चेव सिरिमि सो घणो, तग्घायाभिहओ य पत्तो पंचत्तमेसो, तओ हरी तिपयाहिणादाणपुव्वयं पणमि-
ऊण जयगुरुं भणिउमाढत्तो—

निरुमकल्लाणकलावकारणं लोयलोयणाणंदं । तं पेच्छिऊण सामिय ! कहमिव पाचा पउस्संति ? ॥ १ ॥
तिक्करणसुद्धीएविहु जणक्खं जो समीहए काउं । तस्स तुहोवरि दुट्ठा कह वा बुद्धी पयट्टेज्जा ? ॥ २ ॥
किं अमयंपिव विसनिविसेसबुद्धीए कोऽवि बोहेज्जा । अहवा विमूढहिययाण होइ एसेव नूण भई ॥ ३ ॥
धुवमम्हाणं देवत्तदिव्वमाहण्यसंपया विहला । जा तुम्हावइविणिवारणेण नो होइ सकयत्था ॥ ४ ॥
निच्छउ सा पडुभत्तीवि कह व लक्खिज्जए सयणणेहिं । जाव न निच्चं पासट्ठिएहिं सेविज्जसे तंसि ॥ ५ ॥
इय सुरनाहो सुचिरं उवसग्गकरं जणं समत्तिं च । दूसित्ता सुदुहत्तो नमिउं अहंसणं पत्तो ॥ ६ ॥

सामीवि विहरमाणो गामागरसन्निवेशमागओ, तस्मि य विभेलगो नाम जक्खो, सो य पुव्वभवफासियसम्मत्त-
वसेण समुप्पणपरमपमोओ भयवओ पडिमापवणस्स अहिणवपरियायमंजरीपरिमलुम्मिलंतफुल्लयधुसराहिं
हरियंदणरसुम्मिस्सघुसिणघणसारविलेवणेण य पृथं परमायेरणं निवत्तेइ, अह पुण को एस विभेलगजक्खो पुव्वभवे
आसि ? भणइ—

मगहाविसए सिरिपुरे नयरे महासेणो नाम नरवई, तस्स सिरी नाम भज्जा, तीसे य असेसविन्नाणकलाकलाव-
कुसलो सुरसेणो नाम पुत्तो, सो य संपत्तजोद्वणोऽवि न खिवइ चक्खुं पवररूवासुवि रमणीसु, बडुं भणिज्जमा-
णोऽवि न पडिवज्जइ पाणिग्गहणं, किं तु सुणिवरोव्व संहसियवियारो चित्तपत्तच्छेयाइविणोदेहिं कालं वोलेइ, रायावि

एरिसं तं पेच्छिऊणमच्चंतमाउलमाणसो अणेगेसिं मंततंताइजाणगाणं एयवइयरं परिकहेइ, ते य करेति विविहे उवाए,
न य जायइ कहिं पि कुमारस्स भावपरावत्ती ।

अह अवरासांसी बाहिं नगरस्स करिवारूढो । सह परियेण राया नीहरिओ रायवाडीए ॥ १ ॥
विविहपएसेसु खणं परिभमिउं वाहिउं च करितुरगे । पच्छाहुत्तं इंतो पेच्छइ नयरीजणं सयलं ॥ २ ॥
रहतुरगजाणसिविगापयपयारेण सिग्घवेगेण । कयसुंदरनेवत्थं वच्चंतं काणणाभिमुहं ॥ ३ ॥
तं पेच्छिऊण रणा पयंपियं रे किमेस पउरजणो । परिमुक्कावरकज्जो वच्चइ एगेण मग्गेण ॥ ४ ॥
नो अज्ज जेण कस्सवि महूसवो देवयाविसेसस्स । नउपेच्छणयाइयं कोउगमवि दीसइ न किंपि ॥ ५ ॥
अह परियेण भणियं तुब्भे नो मुणह देव ! किं एयं । जं एत्थ समोसरिओ सूरी सूरप्पहो नाम ? ॥ ६ ॥
जो तीयाणागयवत्थुविसयसंदेहतिमिरहरेणं । पुहईए पत्तिकत्ती जहत्यनोभेण परमप्पा ॥ ७ ॥
जस्स पयपउमधूलीफासेणविवि विहरोगकलियावि । जायंति तक्खणं चिथ मयरद्धयसन्निभा पुरिसा ॥ ८ ॥
जस्सेस दंसणेणवि समत्थत्तिथोहपूयसलिलं व । विद्धंसियपावरयं पाणिगणो गणइ अप्पाणं ॥ ९ ॥
जे पिउणोऽवि पणामं कुब्बंति न दुव्वहेण गवेण । जस्संहिनक्खकिरणा ताणवि सिरसेहरीभूया ॥ १० ॥
सूरिस्स तस्स पयवंदणत्थमेसो पुरीजणो जाइ । तुम्हं पि देव ! जुत्तं पयपंकयंदंसणमिमस्स ॥ ११ ॥

एवं सोचा विम्वहवियमाणसो तर्कखणेन नरनाहो । उज्जाणस्साभिमुहं वच्चइ कोऊहलाउलिओ ॥ १२ ॥
ता दूराओच्चिय करिवराउ ओयरिय परमभत्तीए । वंदित्ता सुणिनाहं निसीयए धरणिवडुंभि ॥ १३ ॥
सूरीवि जोगगयं से पलोइउं दिव्वनाणनयणेण । गंधीराएँ गिराएँ एवं भणिउं समाढत्तो ॥ १४ ॥
भो नरवर ! संसारे पढमं चिय दुल्लहो मणुयलंभो । तत्थवि य निरुवयरिया ङ्कलरूवारोग्गसामग्गी ॥ १५ ॥
तीएवि पवरकरितुरयजोहरहनिवहभूरिंभंडारं । भयवसनमंतसामंतमंडलं नरवइत्तंपि ॥ १६ ॥
तत्थवि सत्थत्थवियक्खणेहिं अच्चंतभवविरत्तेहिं । कुसलेहिं समं गोट्ठी दुल्लभा धेवमेत्तंपि ॥ १७ ॥
एयं च तए सयलं संपत्तं पुन्नपगरिसवसेणं । ता एत्तो सविसेसं पाणवहाईण वेरमणे ॥ १८ ॥
नयसेवणंमि सुगुणज्जणंमि करुणाय दुत्थियजणणं । धम्मत्थविरुद्धविवज्जणे य परलोयचिंताए ॥ १९ ॥
भंगुरभवभावविभावणंमि वेसइयसुहविरांगमि । तुम्हारिसेण नरवर ! पयट्ठियच्चं मणो निच्चं ॥ २० ॥
इय गुरुणा उवइट्ठे नरनाहो पुरजणो य हिट्ठमणो । सव्वं तहत्ति पडिसुणिय पड्डिओ न्थियगिहाभिमुहं ॥ २१ ॥
नवरं भूमीनाहो गंतुं थोवत्तरं पडिनियत्तो । पुव्वभणियस्स पुत्तस्स वइयरं पुच्छिउं सहसा ॥ २२ ॥
ता एगंते ठाउं वंदिय सूरिं पयंपए एवं । भयवं ! अगोयरं नत्थि किंपि तुह नाणपसरस्स ॥ २३ ॥
ता कहसु मज्झ पुत्तो भणिज्जमाणोवि विविहहेज्जहिं । किं कारणं न वंछइ सोउं परिणयणनामंपि ? ॥ २४ ॥

किं भवभण्ण अहवा भूयपिसायाइछलणदोसेण । धाउविचज्जासेण व कूरगहपीडणेणं वा ? ॥ २५ ॥
 गुरुणा भणियं नरवर ! मा संकसु कारणाइं एयाइं । दढपुव्वभवावज्जियमेगं कम्मं विमोत्तण ॥ २६ ॥
 संजोगविओगुप्पायपलयसुहदुक्खपमुहकिरियासु । सत्तावत्थासुंणिय पभवइ कम्मं चिय जणस्स ॥ २७ ॥
 रणणा भणियं भयवं ! किं पुण एएण पुव्वजम्ममि । पकयं कम्मं ? साहह महंतमिह कोउगं मज्झ ॥ २८ ॥
 सूरिणा पयंपियं-महाराय ! एस तुज्झ पुत्तो पुव्वभवे संखपुरंमि नयरे खवलायन्नसोहगाइगुणसंगओ चारुदत्तो नाम
 वणियसुओ आसि, तेणवि एगया निकाणकुवियाए भज्जाए दुव्वयणेहिं तज्जिएण सरोसं पयंपियं-आ पावे ! तहा कांह
 जहा सदुक्खं जीवसि, तीए वुत्तं-जं तुह पिउणो पडिहाइ तं करेज्जासि, तओ सो एगेण नम्मसचिवेण सद्धिं कन्नगतर-
 परिणयणत्थं पयद्दो गंतुं दक्खिणदिसाए, अविलंविपययाणएहिं वंचतो पवराभारयणनिहाणभूयाए पत्तो कंची-
 पुरीए, ताहिं च पविसमाणेण दिट्ठाइं परोप्परं कीलंताइं डिंभाइं, तेसिं च एगेण डिंभेण सुरहिमालइमाला अन्नस्स
 डिंमस्स कंठे पक्खिखिउमारद्धा अन्नस्स निवडिया, तं च दट्ठुण चित्तिं चारुदत्तेण-अहो सोहणो सउणो, परं दूर-
 वगमो, जओ एसा कुसुममाला अन्नत्थ पक्खिखिउमारद्धा अन्नत्थ निवडिया, अहवा किमणेण ? चित्तिवत्थसं-
 पत्तीए सयं चेव होही एयावगमोत्ति विभाविऊण पविट्ठो सयणवग्गगेहंमि, कओ तेण ण्हाणविलेवणभोयणप्पया-
 णप्पसुहो से य वावारो, ठिओ य कइवय वासराइं, पत्थावे य सयणवग्गस्स सिट्ठमणेण निययपओयणं, पडि-

सिद्धो य बहुप्ययारं तेण एसो । इओ य तत्थेव पुरे गंगदत्तसेट्ठिणो कम्मा अयपडिमरूयजोघणाइगुणकलावकलिया
कणगवइसहीजणपरिवुडा उज्जाणमि कुमुमावचयं कुणंतीं सिरिदत्ताभिहाणं वणिग्जुवाणमवलोइऊण मयणुम्मु-
क्कसरविसरपहारजज्जरियसरीरा कहकहवि पडिनियत्तिऊण संगेहे निसट्ठं निवडिया सुहसेज्जाए, वाउलत्तं च से सुणि-
ऊण मेलिओ गेहजणो, पुट्ठा सरीरवत्ता, अलद्धपडिवयणेण य तेण कओ तक्कालोचिओ विही, सो य जुयाणो तदं-
सणमेत्तेणवि हरियहियओ तक्कालवियंभमाणमयणजलजालाकलावकवलियसरीरो कर्हिपि रइं अयावमाणो तमेव
कुवल्यदलदीहरच्छिं चितंतो अच्छिउं पवत्तो, नवरं पुच्छिओ एसो एगाए पद्दाइगाए-वच्छ ! किमेवं सुन्नवक्खुक्खेवो
लक्खिज्जसित्ति, तेण भणियं-भयवइ ! किं केहमि !, अबलाएवि हुंतीए विसट्ठकदोददीहरच्छीए । हरियहिययस्स वट्ठइ
विहलं चिय मज्झ पुरिसत्तं ॥ १ ॥ एत्तिथमेत्तेणं चिय न ठिया सा छणमयंकविवसुही । अवहरिउमिच्छइ धुवं संपइ मह
जीवियंघंपि ॥ २ ॥ ता एव ठिए भयवइ ! तसुवायं किंपि लहु विचिंतेसु । पसमियमणपरितावो जणेस जणो सुहं वसइ ॥ ३ ॥
पद्दाइगाए जंपियं-पुत्त ! फुडक्खरं साहेसु, तओ तेण कहिओ कणगवइदंसणवुत्तंतो, तीए भणियं-पुत्त ! वीसत्थो
होहि, तहा करेमि जहा तीए सह निरंतरं संपओगसुहमणुहवसि, तेण वुत्तं-जइ परं तुह पसाएणंति, भणियावसाणे
गया सा गंगदत्तसिद्धिणो गिहे, दिट्ठा य सदुक्खेण परियणेण संवाहिज्जमाणसरीरा कणगवइ, भणियं चउणाए—
भो ! किं कारणं सरीरे विहुयत्तणमिमीए ?, परियणेण भणियं-भयवइ ! न सुणेभो, तीए वुत्तं-जइ एवं ता अवसरह,

खणमेकं कुणह विजणं, न होइ सामन्नो एस दोसो, उवेहिजंतो जीवियंति हरेज्जा, एवमायन्निऊण दिन्नं से परि-
 यणेण आसणं, विजणं च कयं, तओ तीए सुचिरं अडुवियडाइं पछविऊण महाया वित्थरेण कओ सुहाविन्नासो,
 पारद्धं मंतसुमरणं, कुसुमक्खयखेवेण य पूइयं जोगिणीचकं, मुक्को हुंकारो, अचंतसमीवे य ठाऊण महामंतोव्व सिट्ठो
 तस्स वणियस्स वुत्तंतो, कणगवईवि झत्ति तं निसामिऊण पच्चुज्जीवियव्व हरिसभरमुव्वहंतो भणिउं पवत्ता-भयवइ !
 एत्तो तुमं चेव पमाणं, तो तहा कहं पि कुणसु जह निरंतरो तेण सह संजोगो जायइ, तीए वुत्तं-एवं करेमि, अह
 दिन्नंतंबोला उट्टिया एसा, सिट्ठो य एस वइयरो तस्स जुवाणस्स, तेणावि पवरवत्थाईहिं उवचरिया एसा, अवर-
 वासेर य तेसिं सिट्ठमेयाए, जहा-अज रयणीए जामदुगंमि अइक्कंतंमि सोहणो सुहुत्तो ता तुब्भेहि वि भगवथो कुसु-
 माउहस्स भवणे गंतव्वं, विवाहो कायवोत्ति, पडिवन्नं च तेहिं । इओ य सो चारुदत्तो सयणजणेण दारपरिग्गहाओ
 पडिसिद्धो समाणो असिद्धकज्जोत्ति सोगमुव्वहंतो तेण सहाइणा समं नीहरिऊण रयणीए सयणघराओ पसुत्तो तंमि
 चेव कुसुमाउहमंदिरंमि, खणं च समागयनिदो पडिबुद्धो समाणो जाव कुसुममालानिमित्तनिष्फलत्तणपमुहं पुवव-
 इयरं विचिंतंतो अच्छइ ताव गिहजणेण अविद्याणिज्जंतो अविमुणियरयणिविभागा अपत्तेऽवि मज्झरत्ते परिणयणाणु-
 रूवोवगरणहत्थाए पवाइगाए अणुगया मंदमंदसुक्कचलणा समागया कणगवई, विरइया कुसुमाउहस्स पूया, पद्मा-
 इगाएवि भवणन्भंतरं करेण परामुसंतीए पत्तो चारुदत्तो, पुव्वभणियवणियसंकियाए सवणमूले ठाऊण भणिओ-अहो

किमेवं विलंबेसि ? अवक्कमइ एस पसत्थहत्थलग्गमुहुत्तो, एयं च सोच्चा चारुदत्तेण चिंतियं-मन्ने एसा वराई पुच्चदिन्नसक्यपुरिसबुद्धीए मं समुल्लवइ, ता जावडज्जवि सो न आगच्छइ ताव करेमि कुसुममालासउणं जहतथयति चित्तिऊण झडत्ति उट्ठिओ एसो, नीओ तीए कुसुमाउहस्स पुरओ, पाडिओ तचरणेसु, गहाविओ कणगव-
ईए सभावपाडलं पाणिपल्लवं, कओ संखेवण सेसोऽवि तक्कालोचियविही, इय वित्ते विवाहे पणमिऊण कणगवईए विसज्जिया सट्ठाणं पच्चाइया, भणिओ य चारुत्तो-अज्जउत्त ! उत्तमाणं एसो नो सम्मओ ववहारो, ता कइवय वासराइं जुज्जइ अन्नत्थ निवसिउं, पडिवन्नं चारुदत्तेण, निहरियाइं कुसुमाउहस्स मंदिराओ, नवरं चारुदत्तेण मयण-
पायपडणकइयवेण पडिनियत्तिऊण तं नम्मसच्चिवं निब्बरपसुत्तं पबोहिऊण सिट्ठो परिणयणवुत्तं, तेण भणियं-
चारुदत्त ! जइ एवं ता वच्चसु अलक्खियसरूवो चिय तीए सह तुमं, अहं पुण खणंतरं एत्थेव पडिवाल्लिऊण आगमि-
स्सामि, एवं भणिए चारुदत्तो तच्चयणं पडिवज्जिय तीए समं समयं नयरहुत्तं गंतुं पवत्तो । इओ य समइक्कंते रयणीए जामदुगे पत्थावं मुणिऊण सो वणिज्जुवाणो विवाहसामग्गिं घेत्तूण समागओ तंमि कुसुमाउहमंदिरं, मंदगिराए
भणिउं पवत्तो य-भो कणगवइ ! एहि संपयं आगओऽहं वट्ठामित्ति, सो य नम्मसच्चिवो केलीकिलत्तणेण इत्थी-
भासाए निहुयं पडिवयणं दाऊण ठिओ तदभिमुहो, तेणावि रभसभरवक्खित्तचित्तत्तणेण अविभाविऊण परमत्थं खित्ता
से कंठमि कुसुममाला, कंकणबंधपुरस्सरं च कओ पाणिग्गहो, एत्थंतरे य कहकहत्ति पहसंतणेण भणियं तेण-भो

भो महाणुभाव ! किं अत्थि एस बवहारो तुह नयरीए जं पुरिसो पुरिसेण पुरिणिज्झइ, सब्बहा असुयमदिट्ठं व नो-
ज्झमिणंति जंपिऊण पलाणो वेगेणं, इयरोऽवि विलक्खमाणो एवं परिभाविउमाढत्तो—

हे हियय ! हयास तुमं एवंविहवंचणाए जोगंसि । जं कूडकवडभरियासु पावग ! रमणीसु पत्तिथसि ॥ १ ॥

किं एत्तिथंपि न मुणसि जं एयाओ विचित्तसीलाओ । नियकुसलयाए सहसा सुगुरुमवि विण्वयारंति ॥ २ ॥

तथा-एगेण समं पणयप्पहाणवयणेहिं बहुप्पयंपंति । साणंदच्चक्खुविक्खेवमेत्तओ अक्खिवंति परं ॥ ३ ॥

अन्नेण समं कीलंति निब्भरं हरियहियमविरामं । अवरस्स य संकेयं लीलाए च्चिय पयच्छंति ॥ ४ ॥

इय मूढ ! हियय ! मा तम्म निष्फलं मुणिय वत्थुपरमत्थं । अभिरमसु जहादिट्ठसु संपयं निययकजेसु ॥ ५ ॥

एवं अत्ताणं संठविऊणागओ जहागयं । सो य नम्मसच्चिवो समुगगच्छंतंमि तरणिमंडले मिलिओ चारुदत्तस्स,
तेणावि से बाहुमि कंकणं बद्धमवलोइऊण जंपियं-अरे णवपरिणीओव लक्खिज्जसि, ता दंसेहि निययभज्जं, ईसिं
पहसिऊण भणियं तेण-पियमित्त ! तुह पसाएण अहं सयं चिय भज्जा बट्ठामि, चारुदत्तेण कहियं-कहं चिय ? तओ
तेण सिट्ठो सबो पुव्वुत्तंतो, इमं च सोच्चा मुणियजहड्डियवइयरा परिचत्तलजं हसिउं पवत्ता कणगवई, दिट्ठरुवाइ-
सया य अणुरत्ता चारुदत्तंमि ।

अह परोण्णरूढगाढपेम्माणि ताणि पत्ताणि संखपुरं, पविट्ठाणि य निययगिहं, सुहसागरावगाढाणि य वोलेति

कालं, सा य पुव्वमज्जा असमंजसाइं पलवती निद्धाडाविद्या कणगवईए, तण्णच्चइयं च वद्धं भोगंतराइयं कम्ममणाए । काल-
क्केमेण य मरिऊण उववन्ना सा तिरिएसु, चारुदत्तोऽवि तण्णरिणयणोवट्ठियविंसवायणपरिणाभल्लियनिविडभोगं-
तरायपाहिज्जो कालं काऊण पत्तो तिरियत्तणं । एवं च सुचिरं तीए विण्णउत्तो संसारं परियट्ठिऊण सुचरियसुहकम्म-
वसेण भो महाराय ! तुह मंदिरंमि जाओ पुत्तत्तणेणं, सावसेसभोगंतरायकम्मवसओ य पुव्वभवमज्जमपेच्छतो न वंछइ
अन्नं परिणेउं, एवं सूरिणा कहिए सूरसेणकुमारवुत्तं राया विहियमणो गओ नयरिं । सूरिवि अन्नत्थ विहरिओ ।

सा य कणगवई चिरभवममणेण जायकम्ममलाघवा कुसुमत्थलनयरे जियसत्तुरन्नो उववन्ना धूयत्तणेणं, उचिय-
समए कयं रयणावलित्ति नामं, सा य संपन्नजोवणावि तेण पुव्वभवपियपरूढपणयवसेण सुरूवंपि रायसुयनिवहमण-
मिलसंती कालं वोलेइ । अन्नया य तं सूरसेणकुमारं रामापरंसुहं सोचा नियधूयं च पुरिसपउसिणिं मुणिऊण चितियं
रन्ना-जइ पुण एयाणं परोप्परं विहिणा संजोगो काउं वंछिओ वट्ठइ ता दंसावेमि एयाण परोप्परं पडिरूवाइं, एवंपि
कयाइ समीहियसिद्धी जाएज्जत्ति विभाविऊण लिहाविद्या रयणावलीरूवाणुगा चित्तपट्ठिया, समप्पिया य दूतस्स,
भणिओ य एसो-अरे वच्चसु तुमं महासेणरणो समीवे, केहेसु य जहा-अहं जियसत्तुरणा तुह सुयस्स निय-
धूयादाणत्थं पेसिओऽम्हत्ति, पत्थावे य चित्तवट्ठियं दंसिऊण कुमारपडिरूवं च गहाय एजाहित्ति, गओ य एसो,
दिट्ठो राया, पत्थावे य कहियं पओयणं, राइणावि भणियं-भो मुणियं मए एयं, केवलं दूरट्ठियाए रायसुयाए रूव-

मपेच्छमाणो कहमिहट्टिओ कुमारो तीए पणयमुघेहजा ?, सा वा अविण्णायकुमारसरूवा सहसच्चिय परिणाविया पच्छा कहं न संतप्पेज्जा ?, ता न जुत्तमेयं । जेण—

सुनिरूविऊण कीरंति जाइं कज्जाइं निउणबुद्धीए । दिवाओ विहड्डियाणिवि न ताईं लोए हसिजंति ॥ १ ॥

एवं भणिए रत्ता तेण उवणीया चित्तफ़लहिगा, राइणावि समप्पाविया सा कुमारस्स, सो य पुव्वभवपेस्मवसेण तदवलोयणे समुण्णणहरिसो चिरलद्धावसरकुसुमसररोसनिस्सट्ठाकुठुस्सहविसिहकीलिओघ निचलसरीरो परिचत्त-वाचारंतरो थुलमुत्ताहलविब्भमसेयविंदुजालभासुरियभालवट्टो जाओत्ति, तं च तहाविहं दट्टुण सुणियमणोगयया-वेण पासट्टियजेण सिट्ठं नरनाहस्स, समुण्णणो से परिओसो, कहियं चउणेण दूयस्स-अरे जाओ तीसे उवरि कुमारस्स पडिबंधो, नवरं रायमुया एयंमि केरिसित्ति सुणियवमियाणिं । जओ—

एगंमि नेहनिब्भरमणंमि अन्नमि नेहरहियंमि । श्रीपुरिसाणं भोगा विडंवणाभेत्तया होंति ॥ १ ॥

अणुवक्खरियं अकुडिलं परोप्परं छिड्डपेच्छणविमुक्कं । उभओ चिय जं तुळं पेम्मं सलहिज्जइ जयंमि ॥ २ ॥

दूएण भणियं-देव ! सच्चमेयं, ता समप्पेह मम कुमारस्स पडिरूयं रायमुयाए उवदंसणत्थं, राइणा कहियं-जुत्तमेयं, तओ चित्तफ़लगे आलिहाविऊण कुमाररूयं गओ दूओ, पत्तो कालक्केभेण जियसत्तुनरिंदसपीवं, पण-मियपायवीढो उवविट्ठो सन्निहियधरणिवट्ठे, पुट्ठो राइणा, जहावुत्तं सिट्ठं च अणेण, तदवसाणे य आकड्डिऊण दंसिया

चित्तपट्टिगा, अवलोइया य सायरं रत्ना, चिरं निवृत्तिऊण पेसिया रयणावलीए, सावि तेण पुव्वभवपरुण्डपेम्मवसेण तं पलोइऊण मयणमल्लिसल्लियहियथा समुच्छलियसेयविंदुपिसुणियवियारावि कुमारीजणोचियं लज्जं पमोत्तुमपारयंती नियगविगारगोवणत्थं आवद्धकवडभिउडिभीसणं वयणं काऊण भणिउमारद्धा-अहो केणोवणीया एसा चित्तपट्टिगा?, चेडीहिं भणियं-सामिणि ! ताएण, (तीए भणियं-किमट्ट?, चेडीहिं) भणियं-तुम्ह दंसणनिमित्तं, तीए भणियं-किं ममं दंसियाए?, काऽहमेत्थ?, गुरुज्जणायत्तो कण्णगालोयो हवइ, सच्छंदचारित्तणं तु परमं कुलदूसणं, ता अलमेयाए इति भणिऊण पविट्ठा भवणब्भतरे, निसण्णा सुहसेज्जाए, तग्गया य चिरकाललद्धावसेणं व सव्वग गहिया रणरणएणं, धाईएव्व अणुसरिया उक्कंठाए, चित्तालिहियकुमारावल्लोयणविरामपरिकोविएणं व बाढमालीढा परितोवेण, तओ तत्थट्ठाउमपारयंती कइवयपहाणचेडीपरिवुडा गया पमयवणं, तहिं च अणवरयवहंतजलजंतगंभीरघो-सघणविब्भमुब्भंतपहिट्ठनीलकंठमणहारावाडंवरसु सुरहिमालइकमलपरिमलसुंदरदियंतरेसु तुच्छा खणमेकं कयलील-याहरेसु, भणिया य चेडीओ-हलाओ ! वाहरेह सरसनलिणनालाइं विरएह सेज्जं, बाढं दुस्सहा अज्ज मज्झंदिणदिणयरते-यत्तब्बच्छी, जं भट्टिदारिया आणवेइत्ति भणिऊण समासणसरसीओ आणीयाइं नलिणीनालाइं कया सेज्जा निवन्ना रयणा-वली, समारद्धो अन्नोहिं विमलयरसघणसारपमुहेहिं वत्थूहिं सिसिरोवयारो, न य मणांगं पि जाया से संतावहाणी । अवि य-जह जह कीरइ तीसे सीयलवत्थूहिं तणुपडीयारो । तह तह मयणहुयासो हवइ हयासो सहस्सगुणो ॥ १ ॥

किं च—उवत्तइ परियत्तइ दीहं नीससइ जंपइ न किंपि । थोयजलमज्जलीणा भीणव्व नरेसरस्स सुया ॥ २ ॥

एवंविहं च उट्ठितं देहदाहं पलोइऊण पुच्छिया चेडीहिं—सामिणि ! किं कारणं जमेवं अज्ज वाढं वाउलसरीरा उवलक्खिजसि ? , किमपत्थभोगणवियारो उयाहु पित्तदोसो अन्नं वा कारणंतरं ? , सव्वहा कहेउ भगवती, जेण सा-
हिज्जइ वेज्जस्स, कीरइ समुच्चियेसहाइसामग्गी, अणुवेहणिज्जा खलु रोगा सत्तुणो य, रयणावलीए भणियं—न मुणेमि
किंपि संपइ विसेसकारणं, चेडीहिं भणियं—सामिणि ! जण्यभिइं तुमए सा चित्तपट्टिगा पलोइया तवेलेच्चिय जाओ
कित्तियओवि सरीरस्स अन्नहा भावो इइ अह्मे वितक्कमो, निच्छियं पुण सरीरधारणं तुमं जाणेसि । तओ लक्खिय-
मेयाहिंति विगप्पिऊण भणियमणाए—हला ! तुब्भे जाणह, तओ ताहिं चित्तियं—जाव अज्जवि विरहेण न वाढं
वाहिज्जइ इमा ताव निवेएमो रत्तो, जेण विसमा कज्जगई निट्ठरा सरा कुसुमाउहस्स सिरीसकुसुमकोमला सरीर-
सिरी इमीए, न जाणिज्जइ किंपि हवइत्ति निच्छिऊण कहाविओ एस वइयरो राइणो, तेणावि आहूया रयणावली,
सपणयं भणिया य—पुत्ति ! सूरसेणकुमारोण तुमं परिणाविउमह्मे वंछामो, जुत्तमेयं ? , तीए भणियं—ताओ जाणह,
तओ लक्खिऊण तदभिप्पायं राइणा भणिया नियपहाणपुरिसा—अरे गच्छह महासेणनरवइणो सयासे, अणेह
सुरसेणकुमारं, जेण विवाहो लुहुं कीरइ, जं देवो आणवेइत्ति भणिऊण निग्गया पहाणपुरिसा, गंतुमारद्धा, कमेण
य पत्ता सिरिपुरं, दिट्ठो राया, निवेइयं पओयणं, नरिंदेणवि पवरमंतिसामंतचाउरंगसेणाणुगओ रयणावलीविवाहनि-

मित्तं पेसिओ सूरसेणकुमारो, अविलंबियपयाणगेहिं पत्तो सिरिथलनयरसमीवं, निवेइयं जियसत्तुनरिंदस्स कुमारगमणं,
परितुट्ठो एसो, दावियं पियनिवेयगाण पारिओसियं, समाइट्ठा य अणेण नियपुरिसा-अरे मोयोवेह बंधणबद्धं जणं
दवावेह अविसेसेण महादाणं सोहावेह रायमगे कारावेह हट्ठसोहाओ पयट्ठेह महूसवं सजेह मंगलतूर वायोवेह
हरिसुक्करिसकारए जमलसंखे, ढावेह करणुगं जेण निगच्छामो कुमारामिमुहं, संपाडियं इमं रायसासणं पुरिसेहिं,
निगओ राया, दिट्ठो यउणेण लच्छीसमागमसमुओ चेव महुमहणो कुमारो सूरसेणो, दूराच्चिय पणमिओ कुमारोणं,
गाढमालिगिऊण अभिनंदिओ राइणा, पवेसिओ महाविभूईए पुरं, दिट्ठो उच्चियठाणे जन्नावासओ, अन्नपि संपा-
डियं तक्कालोचियं कायवं, कमेण समागओ विवाहदिवसो, तओ कयमज्जणो गहियसुंदराभरणो पवरचारुवारणाधिरूढो
संखकाहलागब्भगंभीरतूरनिगवोसपूरियदिसामंडलो गहियकणयंदडधयवड्डुघायनरनिवहाणुगओ मंगलपहाणगायं-
तगायणसणाहेपेच्छणयसंकुलो पइन्नवरवासधूलिधूसरियमणहरुत्तालनचंतवसविलओ कुमारो सूरसेणोवि विवाहम-
डवमागओ, कयं से सासुयाए उच्चियकरणिज्जं, पेसिओ कोउयहरयं, दिट्ठा अणेण पसाहिथा विविहवन्नएहिं विभू-
सियंगमंगा पवररयणालंकारेहिं नियंसिया चिम्मलखोमजुयलयंति चच्चिया हरिचंदणेणं पडिनद्धा सुरहिसियकुसुमदा-
मेहिं, तं च दट्ठूण पुव्वभवदढपेम्मदोसेण सहसा वियंभिओ कुमारस्स अणोरपारो पेसपसरो, चित्तिं चउणेण-अहो नि-
रुवमा रुवसंपया अहो अखंडियपसरं सरिरलावणं, असोरेवि संसारे एरिसाइं कणणगारयणाइं दीसंतिचि पमोयसुव-

हंतो काराविओ पुंखणगाइकिंचं, सविसेसं, च पूइया देवगुरुणो, पारद्धो परमविभूइए हत्थगहो, जाओ राइणो परि-
तोसो, सम्माणिया सामंता, कयत्थीकया तक्कुयजणा, अभिनंदिया नायरया, भमियाइं चत्तारिवि मंडलाइं, चित्तो
विवाहमहूसवो, अनन्नसरिसं च रयणावलीए सह विसयसुहमणुहवंतस्स समइक्कंता कहवि वासरा । अन्नदियहं य
नवइमाणुच्छिऊण तीए समेओ नियनयराभिमुहं गंतुं पयट्ठो कुमारो, वंचंतस्स य अंतरा समागओ वसंतसमओ ।
सो य पुण केरिसो ?—उद्दामरामाजणमणवियंभंतंपंचबाणो महुपरहुयववित्तासियपहियहियओ कुसुमभयरदविहु-
पाणपरवसिलीमुहंकारमुहरो पण्णुलसहयारेणुधूलीधूसरियसयलदिसामंडलो कुरवयकुसुमामोयहरियमहुयरिय-
गणो सेवणमुहपसुरिहम्मंतपामरो जणचचरीतूरमहुरनिग्घोसो तरुसंडमंडवावद्धहिंडोलाउलो वीयरगोव अहसुत्त-
याणुगओ लच्छीनाहोव छप्पयरिंछोलिसामलच्छओ माणससरोव पाडलापसूयसुंदरो तरुणीजणोव ससिणिहूलोव-
तिलयपसाहिओ सुसुणिणुव असोगाणुगओ, अवि य—

गिमहुणहतावियाइं पल्लपंङ्कुल्लियंगमंगाइं । गिरिक्खडा इव नज्जंति जत्थ वणमहिसज्जूहाइं ॥ १ ॥

कुडयसिलिंधसिरिसाइविविहतरकुसुमंगंधरमणिज्जो । छज्जइ गंधियहट्ठो व जत्थ वरकाणणाभोगो ॥ २ ॥

रेहंति कुसुमसंचयसमोत्थया जत्थ किंसुयसमूहा । तक्कालपहियपण्णुट्ठहिययरुहिरोवलित्तव ॥ ३ ॥

जत्थ य परहूयकलरवगीयनिनायं रणंतअलित्तरं । पवणेरियतरुपल्लववाहुलयं नचइव वणं ॥ ४ ॥

जन्मि य पियंति तरुणा दइयासुहकमललद्रुसुहवासं । मइरं मयरद्धयजीवणेक्करमोसहिरसं व ॥ ५ ॥

वेइल्लमउलदसणा कुवल्लयनयणा मरालवसदा । उग्गायइव्व जहियं उउलच्छी कमलवयणेण ॥ ६ ॥

सुमरियपणइणिवरगं पहियसमूहं विलुत्तयेयन्नं । वउल्लण कुणइ गंधो विसपुप्फाणं व पसरतो ॥ ७ ॥

जन्मि य उच्चा तरुणो वियसियसियकुसुमगुच्छसंछन्नो । तारानियराउल्लयणदेसलच्छि विडंबंति ॥ ८ ॥

एवं गुणाभिरामे य पत्ते वसंतसमए सो सूरसेणकुमारो तक्कालदेसंतरागवणियजणोवणीयपवतुरंगमाभिरूढो
विसेसुज्जलनेवत्थेण परिगओ जणेण पयद्वो काणसिरिं पेच्छउं, गच्छंतस्स य विवसीभूओ तुरंगमो विवरीयसिक्ख-
त्तेणेण य जहा जहा वेगपडिसलत्थं रज्जुमायडुइ कुमारो तहा तहा अपत्थसेवाए उइन्नरोगोव्व वेगेण सो गंतुमा-
रद्धो, दूरपरिसुक्कपरियणो य दुक्कयकम्मणव्व निवाडिओ कुमारो एगागी महाडवीए चोडएण, परिस्समकिलंतो य
मओ एसो, कुमारोवि तण्हाभिभूयो इओ तओ सलिलमन्नेसिउं पवत्तो, अइगंभीरयाए अडवीए कहिचि तमपाव-
माणो निसन्नो सिसिरतरुच्छायाए, चिंतिउमारद्धो य-अहो कुडिला कज्जपरिणइ अहो सच्छंदाभिरइ दुल्लिओ दइवो,
जं सब्बहा अपरिचिंतियं पि कज्जं एवमुवदंसेइ, अहवा किमणेण?, सत्तयणो चैव सप्पुरिसजणो होहिति, एवं च
विगण्यमाणो जाव खणंतरं विगमेइ ताव समागओ एगो पुल्लिदगो गहियकोदंडो करकलियवाणो तं पएसं, सपणयं
पुच्छिओ य अणेणं, जहा-भइ ! को एसणएसो ? कत्थ वा सलिललाभोत्ति ? तेण भणियं-कायं वरीए महाडवीए

मञ्जुदेसो एस, सलिलं पुण एत्तो वणसंडाओ केत्तिएणवि भूभागेणं वट्टइ, केवलं दुट्टसत्ताउलत्तणेणं न सुहगेज्झं, भो
महाणुभाव ! जइ पिवासिओ ता एहि जेण सयमेव दंसेमि, एवमायन्निज्जण पडिवन्नं कुमारेणं, पयट्ठो य तयभिमुहं,
तओ पुल्लिदगेण चडावियचावगुणारोवियारोवेण देसिज्जमाणमग्गो पत्तो सरोवरं, कयं जलावगाहणं, अवणीया
तण्हा, अहो णिक्कारणोवयारी एसोत्ति चित्तिज्जण कुमारेण दिन्नं से नामंकियं मुहारयणं, परिहिंयं च अणेण अंगु-
लीए, नीओ य तेण नियगुहाए, काराविओ कयलीफलाइणा पाणवित्तिं, अह परिणयंमि वासरे कुमारेण भणिओ
पुल्लिदगो-अहो बाढं कोऊहलं मे बहुअच्छरियनिलयभूया य एसा संभाविज्जइ महाडवी, अहो दंसेसु किंपि अच्छ-
रियनिलयभूयं इमीए पएसंतरं, पुल्लिदगेण भणियं-जइ एवं ता एहि दंसेमि, तओ गया एगं वणगहणंतरं, तं च
केरिसं ?-एगत्य रत्तचंदणालिहियमंडलगं निहितरत्तकणवीरकुसुमदामंदतुरं अन्नत्थ मंतवाइजणहुणिज्जमाणगुग्गुलुगु-
लिकांगंधुद्धयाभिरामं एगत्य मिलियधाउवाइनिवहधमिज्जंतधाउपाहाणं अन्नत्थ विविहोसहीरससाहिज्जमाणभूहयं
एगत्य पउमासणनिविट्ठजोगिजणपारद्धमणपरिकम्मणं, एवंविहं च तं दट्ठण जायपरमविग्गहण पुच्छिओ सो कुमा-
रेण-भइ ! किं नाम एयस्स पएसस्स ? , तेण भणियं-सिद्धिखेत्तंति, कुमारेण चित्तिं-अहो नामेणवि मुणिज्जइ एयस्स
महिमासारो, ता निच्छियं तं नत्थि अच्छरियं जमिह न होही, अहो एयं सट्ठाणे पेसिज्जण असंभंतो पलोएमि
निहुयदिट्ठीएत्ति विगण्णिज्जण भणिओ अणेण पुल्लिदो, जहा-भइ ! गच्छसु तुमं गुहाए, अहंपि खणमेकं परिभसिज्जण

विगयकोऊहलो पडिनियत्तिस्सामि, तेण भणियं-अज्ज! न जुज्जइ निसाए एत्थ निमंसंमि वसिंउं, जओ इह पाउअभ-
वंति पिसाया भिलति वेयालवंदाइं समुच्छलंति घोरेफ्फारसदा जायंति छिहपवेसा, अओ अलमेत्थावत्थाणेण, कुमा-
रेण भणियं-जइ एवं ता तुमं इहेव निलुक्को पडिवाडेसु खणंतरं जाव अहं संखेवेण पेक्खिउमागच्छामि, तेण भणियं-जं
भे रोयइत्ति, परं सिग्घं एज्जाहि जेण समइकंता जाममेत्ता रयणी, एवंति पडियज्जिऊण कुमारो अइयओ वणगहणब्भं-
तरं, पज्जलंतदिबोसहीपहापसारेण य इओ तओ पलोयंतो पत्तो दूरविभागं, अह एगत्थ माहवीलयाहरे जालाउलं
पज्जलंतं जलणकुंडं पेच्छिऊण सकारणमेयंति जायबुद्धी पहाविओ वेगेण तयभिमुहं, जाव केत्तिंयंमि भूभागं वच्चइ
ताव निसुणइ साहगविहिउक्कमंतसाहगं पडुच्च सकोवं चेडयसुरं समुलवंतं, कहं तं?—

रे मुद्ध! मरिउकामोऽसि नूण जं मंतसाहणं कुणसि । अविगण्णिऊण पुंवं सबुद्धिविभवस्स माहणं ॥ १ ॥
किं कोऽवि तए दिट्ठो निसुओ वा साहगो महियलंमि । जो साहणंमि चुक्को मुक्को हि मए जमेणं व ॥ २ ॥
जह इयरदेवमंताण सुमरणं कुणसि तं जहिच्छाए । तह मज्झवि कुणमाणो न भवसि तं निच्छियं एत्तो ॥ ३ ॥
कयमणपरिकम्मेहिं मुणिनाहेहिवि दुसाहणिज्जोऽहं । पायडियकूडकवडो न चेडओ किं सुओ तुमए? ॥ ४ ॥
इमं च भणिज्जमाणं कुमारेण निसुणिऊण चित्तिं-नूणं कोइ महाणुभावो साहणविहिपरिभट्ठो एस चेडएण
निब्भच्छिऊण हणिज्जइ [लग्गो], ता जुत्तं मम एयपरित्ताणंति विगण्णिऊण दाहिणक्रेण नीलमणिच्छायं छुरियं

धरंतो धाविओ तम्मगेण, दिट्ठो यऽणेण तवेलं चिय भो भो सुरासुरा परित्तायह परित्तायहत्ति भणगणो
 चलणेसु घेत्तण चेडगेण उप्पाडिओ सिलायले पच्छाडणनिमित्तं विज्जासाहगो, तओ देवेषु सत्थं न कमइत्ति चिं-
 तिऊण मुक्कपहरणो निविडिओ कुमारो चेडयसुरस्स चलणेसु, विणविउमाढत्तो-देव ! पसीयह पसीयह, परिच्चयह
 कोवं, मम जीविण रक्खह एयं, को तुम्ह इमिणा सह कोवो ? , न हि सुकुद्धोऽवि पंचाणणो पहरइ गोमाउयंभि,
 किं तुम्हेवि अहमजणोचियं कम्मं काउमरिहह ? , इमं च सोचा ईसिं जायपसमो चेडगो समुल्लविउमारद्धो-भो
 कुमार ! अविलंबणिज्जोऽसि तुमं, तहावि निमुणेषु एयावराहं, इमिणा हि मम मंतराहणपरेणावि न संगं वट्टिज्जइ,
 कुमारेण भणियं-महावराहकारीवि ममं जीवियमोलेण मोत्तवो, मा कुणसु विहलं देवदंसण प्पवायं, चेडगेण भणियं-
 सुयणु ! किं तुमए निरवराहेण विणासिएण ? , एसो चेव विणासणिज्जो आसि, परं तुह महाणुभावयाहयहिथएण
 पसाउत्तिकाऊण एस परिचत्तोत्ति भणिऊण अक्खयसरीरं चेव मंतसाहगं मोत्तण अंसणमुवगओ चेडओ, सोऽपि
 मरणभयागयमुच्छाभिभूयचेयणो अहसन्निहियमंतसाहणत्थोवणीयहरिचंदणरसेण समासासिओ कुमारेण, युट्ठत्त-
 मेत्तेण य उवल्लद्धचेयणो पच्चुजीवियं व अप्पाणं परिकप्पितो मंदमंदमवल्लोइउं पयत्तो, खणंतरे य समुल्लविज्जो कुमा-
 रेण-भइ ! निब्भओ निरुद्धिगो अच्छसु, दूरमवकंतो तुह कयंतो, केहसु परमत्थं, को तुमं ? किं नामधेओ ? कुओ
 वा आगओ ? किमियं सुहपसुत्तकेसरिकंङ्कयणं विणासपज्जवसाणं मंतसाहणं समारद्धं ? कहां वा विहडियं ? , जीव-

दाइति पेमसुब्रह्तेण भणियमणेण—

सुंदर ! विज्ञाहरो कणयचूडयनामोऽहं गयणवल्लहपुराजो चेडगसाहणं काउमिहागहो म्हि, मंतं च परावत्तयत्तस्स मे कहवि भवियव्वयावसेण सुण्णणिहियस्सवि विसंखुलियमेक्कमक्खरं, एत्तियमेत्तावराहसंभवोऽवि परिकुविण्ण उण्या-
डिओ सिलायले निवाडणत्थमणेणं, तक्कालं भयविहुरेण य न सरियाणि तणुरक्खामंतक्खराणि, तयणंतरं च न मुणेमि किंपि जायं, एत्तियमेत्तं ईसिं जाणामि जं तुमए भणियं-मम जीवियमोळेणऽवि मोत्तवो एसत्ति, कुमा-
रेण भणियं-भद ! के अम्हे ? , नियसुकियदुक्कियाणि चेव सबत्थ सुहदुक्खेसु पभवन्ति जीवाण, कणयचूडेण भणियं-
को सदेहज्ज अहिसमाणरूवाइं सुकयदुक्कयाइं । तुमए सजीयदाणेण रक्खमाणेण मह जीयं ॥ १ ॥

कहमिव बहुयणा नो वसुंधरा ? जत्थ तुम्ह सारिच्छा । परहियकरणेक्कपरा अज्जवि दीसन्ति सण्णुरिसा ॥ २ ॥

जाय चिय नीसेसावि मज्झ नूणं समीहिया सिद्धी । दुल्लभंदसणो दिट्ठिगोयरं जं गओ तंसि ॥ ३ ॥

अन्नं च-तुह सच्चरिएणवि नामगोत्तमुक्कित्थिं जइवि भुवणे । तहवि सविसेसजाणणकएण तम्मइ गहं हिययं ॥४॥

तथो कुमारेण सुणिज्जण तदभिप्पायं साहिओ दुट्ठुरागवहरणपज्जवसाणो सवो नियवइयरो, विज्ञाहरेण भणियं-
कुमार ! किमिह मे जीवियप्पयाणत्थमेव तुम्ह आगमणं?, किं वा कारणंपि आसि?, कुमारेण भणियं-कोज्जहलेण,
न पुण अन्नं कारणंतरं, विज्ञाहरेण भणियं-जइ एवं ता कुणह ममाणुगहन्ति एह वेयहुपव्वयं, पेच्छइ तत्थ अणे-

गच्छरियाई, अणुगिणहह नियंदसनदाणेण मम कुंडुवयंति, अचंतकोऊहलावलोयणसयणहेण पडिवन्नं च कुमारोणे ।
 तयणंतरं सो कुमारं घेत्तूण उप्पइओ तिमिरुप्पीलसामलं गयणयलं, निमसमेत्तेण पत्तो वेयडुगिरिं, पविट्ठो सभवणं,
 कया कुमारस्स महई भोयणाइपडिवत्ती ॥ सो य पुल्लंदगो तत्थ जाममेत्तं पडिवाल्लिऊण जाव कुमारो नागओ
 ताव वणनिगुंजेसु सुचिरं पलोइऊण दुहत्तो सगुहाए गओ ॥ कुमारोऽवि कणगचूडेण समओ वेयडुगिरिपरिसरेसु
 सुरहिपारियायतरुंजरीगंधुदुरेसु विसमगिरितडनिवडंतनिज्झरझंकारमणहरेसु सविलासकिन्नरमिहुणसंगीयसहसुंदरे-
 सु निंकुंजदेसोवसोहिएसु विहरिउमारद्धो, अह परिब्भमेत्तेण कोऊहलवियसियच्छिणा कुमारो दिट्ठो एणत्थ
 सिलायले एक्कचलणावट्ठुभनियमियसयलंगभारो उट्ठसमुक्खित्तोभयभुयाजुयलो ज्ञाणवसनिसियनिच्चलपयंडमायंडसं-
 डलुम्मुहलोयणप्पसरो निप्पकंपत्तणतुलियकुलाचलो पडिमासंठिओ एगो चारणसमणो, तं च दट्ठूण अंतो विथंभि-
 यउद्दामहरिसवसपयंटतपुलयपडलेण कुमारोण भणियो कणगचूडो-भइ ! एहि एयस्स महासुणिस्स वंदणेण पक्ख-
 लियकल्लिमलं अत्ताणं केरमोत्ति, विज्जाहरेण संलत्तं-एवं होउ, तओ गया सुणिसमीवे, पणमिओ सविणयं, सुणिणावि
 जोगगयं नाऊण पारियं काउस्सग्गं, उवविट्ठो समुच्चियट्ठणे, अज्जवि मूलगुणट्ठानवत्तिणो एए इति परिभाविऊण
 भणिया साहुणा-भो महाणुभावा ! एयस्स निस्सारसंसारस्स सारमेत्तिं जं वीथरागेहिं करुणापरियरियंतकरणेहिं
 देसिओ सवज्जेण कीरइ धम्मो, तस्स एण मूलं अहिंसा, सा य मज्झंसनिसिभत्तपरिहारेण जहुत्ता संभवइ, तत्थ

मज्जं ताव विसिद्धजणपेयवज्झं, अमञ्जरसंपि व परिहरणिज्जं दूरओ, न मणसावि तप्पिवासा कायवा, एयं हि पिज्जमाणं निट्ठवेइ दविणं अणवेइ विसिद्धत्तणं जणेइ उम्मायं संपाडेइ विहलत्तणं दावेइ कज्जहाणिं पयडेइ अत्त-
मम्माणि लज्जावेइ मित्ताइं कलुसेइ बुद्धिपसरं विनडेइ कुलजाइओ भंजावेइ निम्मलं सीलं उप्पाएइ वेरपरंपराओ भंसेइ धम्मकम्माओ संजोएइ अकुलीणजणमेत्ताए अभिगमावेइ अगम्माणि भक्खावेइ अभक्खाणि उवहसा-
वेइ गुरुजणं मइलावेइ सयणवग्गं बोलावेइ अबोल्लणिज्जाणि, तहा इमं हि मज्जपाणं मूलं असुइत्तणस्स अवगासो वेरियाणं पडिबोहो कोहाइणं संकेयट्ठाणं पराभवाणं अट्ठाणीमंडवो अणत्थाणं । अविय-

पच्चक्खं पि य दावेइ कलुसभावं जमेत्थ जंतूणं । मज्जस्स तस्स का होज्ज चंगिमा पावमूलस्स ? ॥ १ ॥

वरसुग्गतालुडुडभक्खणेण अत्ता विणासमुवणीओ । मा मज्जपाणवत्थाए धेवमित्तिं पि संठविओ ॥ २ ॥

एत्तो चिय लोइयसाहुणोऽवि मइरं सुयंति दूरेण । वेयपुराणेषुपिवि निसिद्धमेअं जओ भणियं ॥ ३ ॥

गौडी पैथी तथा माध्वी, विज्ञेया त्रिविधा सुरा । यथैवैका तथा सर्वा, न पातव्या द्विजोत्तमैः ॥ ४ ॥

नारीपुरुषयोर्हन्ता, कन्यादूषकमद्यपौ । एते पातकिनस्तूक्ताः, पञ्चमस्तैः सहाचरन् ॥ ५ ॥

तथा-सुरां पीत्वा तु यो मोहादन्निवर्णां सुरां पिबेत् । तथा सकाये निर्दग्धे, मुच्यते किल्बिषात्ततः ॥ ६ ॥

यस्य कायगतं ब्रह्म, मयेन प्लाव्यते सकृत् । तस्य व्यपैति ब्राह्मण्यं, शूद्रत्वं च नियच्छति ॥ ७ ॥

इय भो देवाणुपिया ! मज्जं पाउं न जुज्झइ कयावि । सग्गापवग्गसंगमसुहत्थिणो सव्वकालं पि ॥ ८ ॥

जहा य किर विसिट्ठाणं मज्जमपेज्जं एवं मंसमवि अभक्खणिज्जं । एयं हि—

अवचओ सुहज्झाणस्स पयरिसो अट्ठरूढाणं उवसंहारो संपाइमसत्ताणं उप्पत्तिपयं किमियाणं आयंतियजीवा-
(ववा)ओ सवावत्थासु हेऊ विसेसरसगिद्धीए कारणं पारद्धिकम्मस्स निमित्तं महारोगायंकाणं बीभच्छं पेच्छगच्छीणं
पउणपयवी दुग्गईए जलंजलिदाणं सुहाणुबंधसुहाणुभावस्स, ता को नाम सयन्नो एवंविहदोसनिहाणमिणं मणसादि
समभिलसेज्जा !, अवि य—

धम्मं सलाहणिज्जं परपीडावज्जणं पयत्तेणं । तं पुण मंससीणं न घडइ गयणारविंदव्व ॥ १ ॥

मंसमसारयस्स सरीरयस्स परिपोसणत्थिणो मणुया । भुंजंति परमेवसुं तिकखदुक्खाइं अगणित्ता ॥ २ ॥

को नाम किर सयन्नो मोहोत्तियतुच्छसोकखकजेण । अस्संखभवपरंपरदुहरिछोलिं पवट्टेजा ॥ ३ ॥

लोइयसत्थेवि इमं बहुप्पयाणेण भणिइनिवहेण । पयडं चिय पडिसिद्धं अविक्कं जेण भणियमिणं ॥ ४ ॥

हिंसाप्रवर्धकं मांसं, अधर्मस्य च वर्धनम् । दुःखस्योत्पादकं मांसं, तस्मान्मांसं न भक्षयेत् ॥ ५ ॥

स्वमांसं परमांसेन, यो वर्धयितुमिच्छति । उद्धिन्नं लभते वासं, यत्र तत्रोपजायते ॥ ६ ॥

दीक्षितो ब्रह्मचारी वा, यो हि मांसं प्रभक्षयेत् । व्यक्तं स नरकं गच्छेदधर्मः पापपौरुषः ॥ ७ ॥

आकाशगामिनो विप्राः, पतिता मांसभक्षणात् । विप्राणां पतनं दृष्ट्वा, तस्मान्मांसं न भक्षयेत् ॥ ८ ॥
शुक्रशोणितसंभूतं, यो मांसं खादते नरः । जलेन कुरुते शौचं, हंसते तं हि देवताः ॥ ९ ॥
श्रूयन्ते यानि तीर्थानि, त्रिषु लोकेषु भारत ! । तेषु प्राप्नोति स स्नानं, यो मांसं नैव भक्षयेत् ॥ १० ॥
नाश्विना न च सूर्येण, न जलेनापि मानव ! । मांसस्य भक्षणे शुद्धिः, एष धर्मो युधिष्ठिर ! ॥ ११ ॥
किं लिङ्गेष्वग्रहणैः ? किं शिरस्तुंडमुण्डनैः ? । यदि खादन्ति मासानि, सर्वमेव निरर्थकम् ॥ १२ ॥
यथा वनगजः स्नातो, निर्मले सलिलार्णवे । रजसा गुण्डते गात्रं, तद्वन्मांसस्य भक्षणम् ॥ १३ ॥
प्रभासं पुष्करं गङ्गा, कुरुक्षेत्रं सरस्वती । देविका चन्द्रभागा च, सिन्धुश्चैव महानदी ॥ १४ ॥
मलया यमुना चैव, नैमिषं च गया तथा । सरयू कौशिकं चैव, लौहित्यं च महानदम् ॥ १५ ॥
एतैस्तीर्थैर्महर्द्धिव्यैः, कुर्याच्चैवामिषेचनम् । अभक्षणं च मांसस्य, न च तुल्यं युधिष्ठिर ! ॥ १६ ॥
यो दद्यात्काञ्चनं मेरुं, कृत्स्नां चैव वसुन्धराम् । अभक्षणं च मांसस्य, न च तुल्यं युधिष्ठिर ! ॥ १७ ॥
हिरण्यदानं गोदानं भूसिदानं तथैव च अभ० ॥ १८ ॥ कपिलानां सहस्रं तु मासे मांसं गवां ददे । अभ० ॥ १९ ॥
इय लोह्यसत्यमुवि परिहरिज्जत्तणेन निदिष्टं । मंसं महाविसंपिव किं पुन लोउत्तरे समए ? ॥ २० ॥
जह मज्जमंसविरई बहुदोसत्तेण होइ कायवा । तह रयणिभोयणंपिपि परिहरणिज्जं सयन्नोहिं ॥ २१ ॥

जइविहु फासुगमन्नं कुंथूपणगा तहावि दुण्यस्सा । पच्चक्खनाणिणोवि हु राईभत्तं परिहरंति ॥ २२ ॥
 जइविहु पीथीलगाई दीसंति पईवजोइउज्जोए । तहवि खलु अणाइन्नं मूलवयविराहणा जेण ॥ २३ ॥
 इय भो देवाणुपिया ! संसारतरुस्स रूढकंदसमं । मज्जं मंसं निसिभोयणं च नाउं परिच्चयह ॥ २४ ॥
 किं वा मूढा अच्छह नो पेच्छह छिड्डपाणिपुडपडियं । सलिलंपिव विगलंतं पइसमयं चैव नियजीयं ॥ २५ ॥
 केत्तियमेत्तं एयं ? अज्जवि संसारचारगविरत्ता । रज्जंपि विवज्जित्ता पव्वज्जं संपवज्जंति ॥ २६ ॥

एवं च सुणिणा कहिए कणगचूडो समुट्टिऊण परमं भवविरागमुव्वहतो निवडिओ सुणिचलणेसु, भणिउमाढत्तो य-
 भयवं ! जाव कुमारं संठावेमि ताव तुम्ह समीवे पव्वज्जापडिवत्तीए करेमि सफलं नियजीवियं, सुणिणा भणियं-एसो
 चिय परिच्छेओ भवपासस्स, अओ जुज्जइ तुम्हारिसाण काउमेयं । एत्थंतरे कुमारोऽवि जायसंवेगो पणामं काऊण
 भणइ-भयवं ! ममंपि मज्जमंसनिमिभत्ताणं आमरणंतं देह पच्चक्खाणं, साहुणावि नाऊण जोगगयं दिन्नं से पच्च-
 क्खाणं, तओ गुरुं वंदिऊण गया सगिहं, पवराभरणाइदाणेण सम्मानिऊण भणिओ कुमारो कणयचूडेण, जहा-
 कुमार ! भवविरत्तोऽमिह, संपयं दिक्खागहणेण विगयपावं अत्ताणं करिस्सामि, अओ तुमं साहेसु जं मए कायच्चं,
 कुमारेण भणियं-किमहं साहेमि ?, दुण्परिहारो तुमं, केवलं चिरकालविसुक्को गुरुज्जणो मम दंसणसुओ कहंपि वट्ठ-

इत्ति बाढं परितप्पइ मणो, कणयचूडेण भणियं-जइ एवं ता वच्चाभो तत्थ, पडिबन्नं कुमारेण, तओ विमाणमारु-
हिऊण दोवि गंतुं पयद्दा ।

इओ य तं सेन्नं दुट्टुत्तरगावहरियं कुमारं सुचिरं अरन्ने पलोइऊण कहवि अपत्तवत्तं निराणंदं निरुआहं गयं
सिरिपुरं नयरं, निवेइया नरवइस्स कुमारवत्ता, तओ राया अवहरियसव्वस्सो इव संतावमुव्वहतो परिचत्तपाणभो-
यणो चाउरंगिणीए सेणाए अणुगम्ममाणो अंतउरेण दुस्सहदुक्खकंतहिययाए रयणावलीए थ समओ निगओ
नयराओ कुमारन्नेसणनिमित्तं, पत्तो य कमेण तं चैव कायं वरीए मज्झदेसं, पेसिया कुमारवलोयणत्थं सव्वत्थ
पुरिसा, समारद्धा य निस्सुविउं, अब्बया इओ तओ परिममंतेहिं दिट्ठो सो पुल्लंदगो, पलोइयं च से अंगुलीए कुमार-
रनामंकिंयं मुद्दारयणं, तं च दट्ठूण जइ पुण अणेण विणासिओ होज्ज कुमारोत्ति कुविकप्पकलुभियहियएहिं उव-
णीओ सो नराहिवस्स, तेणावि अणाउलहियएण पुच्छिओ एसो-अहो मुद्ध! मह अवित्तं साहेसु कत्तो एस मुद्दा-
रयणलाभो? कत्थ वा कुमारोत्ति भणिए सो पुल्लंदगो अदिट्ठपुव्वं हरिकरिरहमडुम्भंडं रायलच्छं पेच्छिऊण जाय-
संखोभो अड्ढविअड्ढं खलंतक्खरं कुमारवत्तं कहिउमारद्धो, तओ राइणा भणियं-अरं अवरोधरविरोहिणा वयणसं-
दब्भेण मुणिज्जइ जहा कुमारो अणेण विणासिओत्ति, कहमन्नहा मुद्दारयणलाभो हवेज्जा?, न हि जीवंतस्स सुय-
गाहिवस्स फणारयणं केणावि घेत्तुं पारिजइ?, एवं ठिएवि पंचरत्तं जाव सुसंगोविधं करेह एयं, ण मुणिज्जइ कोउवि

परमन्थो, गंभीराइं विहिविलसियाइंति भणिए पुरिसिहिं निगडिओ पुल्लो, राया हि संदेहदोलहिखुओ अंसुजल-
 पुन्नलोयणो मन्नुभरं रोविउं पवत्तो, अह पसरिया कुमारपंचत्तमणवत्ता खंधावारे, दूमिया सामंता, विच्छायत्तं
 पत्तो पायक्कजणो, विमणदुम्मणीभूया मंतिणो, हाहारवग्गं रोविउमारद्धमंतउरं, चिरं अक्कंदिऊण सोगभरभारिथंगा
 निस्सट्ठं निवडिया धरणिवट्ठे रयणावली, समासासिया कहकहवि चेडीचक्कवाल्लेण, एत्थंतरे जाया रयणी, अंजण-
 गिरिविन्ममाइं वियंभियाइं तिमिरपडलाइं, एवं च कमेण पत्ते मज्झरत्तसमए रयणावलीए भणिया निययधावी-
 अम्मो ! किं एत्तिएवि गए धरियव्वं नियजीवियं मए सहिअवा हीणजणफेसणा दट्ठवाइं पियगेहे सामलाइं सयणाण
 वयणाइं सुणियवाइं अकारणकुवियखलुद्वयणाइं, ता सावियासि तं मए नियजीविएण, मा अन्नहा काहिसि, होसु
 संपथं सहायणी, पज्जत्तं पेसुब्भवसुहेण जस्स एरिसा गई ॥ अविय—

किं पागतलस्स फलं उवमुजंतं जणेइ पज्जते । दुक्खं पियजोगो पुण पढमारंभेऽवि विद्वइ ॥ १ ॥

करिकन्नविज्जुसुरचावचावलेणं विणिम्मियं मन्ने । पियजणसंगमसोक्खं नूनं विहिणा हयासेण ॥ २ ॥

तेणेव पंडिया परिहरंति पेम्मं अहिं बिलगयं व । जाणंति जेण पियविप्पओगविसवेगमाहणं ॥ ३ ॥

अंबधाईए भणियं—पुत्ति ! कस्स कज्जस्स ममं सहायणीं पत्थेसि ? तीए भणियं—अम्मो ! दुस्सहविरहुहयासण-
 परितावियस्स नियजीवियस्स परिचागकएणं, धावीए भणियं—वन्हे ! मा ऊसुगा होसु, अज्जवि न सुणिज्जइ

कोऽवि निच्छओ, पच्छावि सुलभो चैव मरणाभिलासो, तओ रयणावलीए सुणिऊण तीसे निसेहपरं वयणं कंयं मोणं, खणंतरेण य दिट्ठिं से वंचिऊण परियेण असुणिजमाणा निग्गया आवासाओ, पविट्ठा दूरदेसगरिसंठियंमि वणनिगुंजे, जोडियपाणिसंपुडा य भणिउं पवत्ता—

भो काणणेदेवीओ ! वयणं मे सुणह मंदपुत्ताए । को अन्नो इह ठाणे ? साहिज्जइ जस्स नियकज्जं ॥ १ ॥
एसाऽहं दुहेहउं विरुवलक्खणचएण निम्मविद्या । परिणयणुत्तरकालंपि जीए जाओ इमो विरहो ॥ २ ॥
एत्तो तुज्झ समक्खं अत्ताणं तरुवरंमि लंबित्ता । मोएमि अजसकालुस्सकलुसिएणं किमेएण ! ॥ ३ ॥
सिरिपुरायतणुब्भव ! तुमंपि दूरट्ठिओऽवि लक्खिज्जा । जह तीए वराईए मम विरहे उज्झओ अण्णा ॥ ४ ॥
इय भणिऊण संजमिओ केसपासो निविडमापीडिया नियंसणंगंठी उत्तरिखवत्थेण रइओ तरुसाहाए पासओ आवद्धो नियकंधराए, सुक्को अप्पा, एत्थंतरे सेज्जाए तमपेच्छमाणी अणुमग्गेण धाविया अंबघाई, पत्ता कम्मधम्म-संजोएण तं पएसं, चंदजोणहाए य लंबमाणा दिट्ठा रयणावली, तओ हाहारवं कुणमाणी तक्कालिययं पडियारं काउयस-मत्था लग्गा वाहरिउं—भो भो सुरवितरखयरा ! परित्तायह परित्तायह, इममि इत्थीरयणंमि देह पाणभिक्षुं, छिन्नह पासगं, मा अंगीकरेह उवेहाजणियं पावपंकति । इओ य कणगचूडो सुरसेणकुमारो य पत्ता तं पएसं, सुणिया एसा उग्घोसणा, तओ गयणाओ ओयरिऊण छिन्नो से पासओ संवाहियं अंगं, पुच्छिया य अणेहिं-सुयणु ! को

एरिसदुरज्झवसायस्स कारणं जाओ?, रयणावलीए चिरं निस्ससिऊण भणियं-दुक्खिकम्माइं, कुमारणे भणियं-त-
 हावि विसेसेण साहेसु, जइ एवं ता सुरसेणकुमारस्स महासेणतणयस्स विरहोत्ति, तओ पच्चभिन्नाया कुमारणे,
 भणिया य-जइ एवं ता पज्जत्तं एत्तो दुरज्झवसाणेणंति बुत्ते जायपच्चभिन्नाणा लज्जावसनिमित्तलोयणा तुण्हिक्का
 ठिया रयणावली, मुणियपरमत्थाए 'सागयं सागयं चिरागयकुमारस्स'त्ति जंपियं धावीए, निवेइओ नरिंदस्सागमण-
 बुत्तंतो य । एत्थंतरे विन्नत्तं विज्जाहरेण-कुमार ! पडिपुन्नमणोरहा तुब्भे, ता अणुजाणह ममं सट्ठाणगमणाय संपयं,
 अह तव्विओगकायरमणेण कहकहवि विसज्जिओ सो कुमारणे, गयमेत्तेण य तेण पडिवन्ना भावसारं चारणमुणिस-
 मीचे पवज्जा । कुमारोऽवि रयणावलीए समेओ गओ खंधावारं, मिलिओ राइणो, सिट्ठो नियबुत्तंतो, जायं वट्ठावणयं,
 मुक्को सम्माणिऊण सो पुल्लिंदगो, पडिनियत्तो य राया सनयराभिमुहं, पत्तो य कालक्कमेणं, समप्पिओ कुमारस्स
 सुंदरो पासाओ, तत्थ ठिओ य गमेइ वासरे विविहकीलाहिं । अन्नया य सो पंचत्तमुवागओ महसेणराया, कयाइ
 कुमारणे मयगकिच्चाइं, पडिवणं च रज्जं, परिवालेइ रायनीतीए पुहइं । अन्नया य सो कणयचूडो सुमुणियमुणिधम्मो
 अहिगयसुत्तथो विहरमाणो समागओ बाहिरुज्जाणे, विन्नायतदागमणो वंदणत्थमागओ सुरसेणनरिंदो, वंदिओ
 अणेण परममत्तीए, दिन्नासीसो य निविट्ठो गुरुपायमूले, कहिओ साहुणा जिणप्पणीयधम्मो, पडिबुद्धा बहवे
 पाणिणो, धम्मकहावसाणे य मुणिणा पुच्छिओ राया-सम्मं निव्वहंति चिरगहिया मज्जमंसनिसिभोयणवेरमणरूढा

अभिगमहन्ति, रायणा भणियंन्नाढं निव्वहन्ति, तथो पुणो समणेण भणिओ राया, जहा-पडिवज्जसु असेसदोसरहियं
जिणनाहं देवबुद्धीए, अंगीकोरेसु सम्मत्तं, परिचयसु कुचासणासमुत्थं मिच्छत्तं, एत्तियमेत्तणवि कएण परमत्थेण कयं
चिय परमवहियं, रायणा भणियं-एवमेवं, पडिवन्नो मए एत्तो जिणधम्मो, जाया तुम्हाणुभावेण मम मिच्छत्तचा-
यबुद्धी, सब्बहा कयत्थीकओ तुम्भेहिति अभिन्नंदिऊण य गओ जहागयं, मुणीवि कण्णसत्तीए विहरिओ अन्नत्थ ।
अन्नया राया तहाविहसमुप्पन्नसरीरेवथणो अविमुद्धञ्जवसाणवसदूसियसम्मत्तो कालं काऊण उववन्नो जक्खत्तणेण ।
एसा विभेलगजक्खस्स मलुप्पत्ती ॥

अह महावीरजिणवरो तस्स विभेलगजक्खस्स उज्जाणाओ निक्खमिच्चा सालिसीसयनागस्स गामस्स बाहिरु-
ज्जाणे संठिओ पडिमाए, तम्मि य समए माहमासो वट्ठइ, तत्थ कडपूथणा नाम चाणमंतरी, सा य सामिस्स तिवि-
ट्ठुमेवे वट्टमाणस्स विजयवई नाम अंतोरिया आसि, तथा य न सम्मं पडियरियत्ति परं पओसमुव्वहती मया समाणी
संसारपरिभमणवसमासाइयमाणुसत्ता बालतवायारेण पावियवंतरीभवा पडिमोवगयस्स जिणस्स पुव्वेरेण तेयम-
सहमाणा तावसीरूवं विउव्वइ, तथो वक्कलनियंसणा लंबंतगुरुज्जडाभारहिमसीयलसल्लेण सवं सरीरं उल्लिऊण
सामिस्स उवरिं ठिया, अंगाणि धुणिउं पयत्ता, तयणंतरं च—

हिमकणनिवहुम्मिस्सा अइसिसिस्समीरेण परिगहिया । लगंति जिणं सल्लिबिंदुणो बाणनिवहच्च ॥ १ ॥

पइसमयं विहडियजडकडप्पक्कलगलंतजलकणिया । अंतो विसंति तणुणो जयगुरुणो दुस्सहा धणियं ॥ २ ॥

पयईए चिय माहुब्भवस्स सीयस्स दुस्सहं रुवं । किं पुण परोट्टुच्चेट्टवंतरीसत्तिपग्गहियं ॥ ३ ॥

पागयनरस्स तारिससीउब्भववेयणाविणिहयस्स । फुट्टइ देहं निरुक्कमाउत्ता ण उण पहुणो ॥ ४ ॥

इय चउजामं रयणिं जिणस्स सीओवसग्गसहिरस्स । सविसेसं संलगं धम्मज्झाणं भवुम्महणं ॥ ५ ॥

तओ तदहियासेणेण जायमि विसेसकम्मक्खए वियंभियं ओहिनाणं, सबं च लोगं पासिउमारद्धो, पुच्चं पुणं गब्भसंभवाओ आरब्भ सुरभवकालमित्तो ओही आसि, एक्कारसय अंगाणि सुयसंपयं होत्था, अह कडपूयणा निण-
कंपं भयवंतं वियाणिऊण रयणिविराममि पराजिया समाणा उवसंता कयपच्छावाया य भत्तीए पूयं काऊण गया
सट्ठाणं । सामीवि तत्तो निक्खमित्ता भदियं नाम नयरिं छट्ठं वासावासं काउसुवागओ, गोसालगोडवि मिलिओ छट्ठ-
मसाओ, सामिं दट्ठूण जायहरिसो नमिऊण पायपंकयं पमोयसुवगओ समाणो पुच्चपवाहेण पज्जवासिउं पवत्तो,
सामीवि तत्थ विचित्ताभिग्गहसणाहं चाउम्मासखमणं काऊण वासारत्तपज्जंते बाहिं पारेत्ता गोसालेण सभेओ
मगहाविसए अट्ट मासे उउवद्धे निरुवसग्गं विहरइ ।

सत्तमं च वासारत्तं काउकामो आलहियं नाम नयरिं एइ । तत्थवि चाउम्मासखमणाणंतरं बाहिं पारेत्ता कंछा-
गनामसन्निवेशसुवागच्छइ, तहिं च उउंगसिहरस्स महुमहणभवणस्स समुचिए एग्गदेसे ठिओ काउस्सग्गेण सामी,

गोसालोऽवि जीयरक्खं व जिणनाहमाहणमुव्हंतो चिरकालं संलीणयापीडिओ अविगणियपडिभओ दूरपरिचत्तल-
ज्जावल्लोवो भंडोव महुमहपडिमासुहे अहिट्ठाणं दाऊण ठिओ । एत्थंतरे पुक्कपडलगहत्यो धूवकडुल्लुयसमेओ
समागओ देवच्चगो, दूराउ चिय तहट्ठियं दट्ठूण गोसालयं सविम्भयं चित्तिभरणे—

बोलिणो बहुकालो देवमिमं मज्झ पूयमाणस्स । न य दिट्ठो कोइ मए कुणमाणो एरिसं भत्तिं ॥ १ ॥
ता किं होज्ज पिसाओ कोऽवि इमो अहव गहपरिगहिओ । धाउविवज्जासवसेण किं नु एवं ठिओ कोऽवि ? ॥ २ ॥
इय भावेंतो जाहे भवणब्भंतस्सुवेइ ताहे सो । समणोत्ति नगभावेण लक्खिओ तेण छेएण ॥ ३ ॥
परिचित्तियं चऽणेणं जइ दंडमहं इमस्स काहामि । तो जाणिस्सइ लोगो जह दुट्ठो धम्मिओ एस ॥ ४ ॥
तमहा गामस्स परिक्खेमि सोऽविय सयंपि दट्ठूण । एयस्सुचियं काही किं मम इमिणा अणत्थेण ? ॥ ५ ॥
इय चित्तिऊण सिट्ठं जणस्स तेणावि तत्थ गंतूण । तह चेव ठिओ दिट्ठो गोसालो वासुदेवपुरो ॥ ६ ॥
कुविएण जट्टिमुट्ठीहिं कुट्ठिओ गहिल्लओत्ति काऊण । सुक्को चिरेण कहवि हु जणेण सो जजरसरीरो ॥ ७ ॥
सुक्कमि तंमि सामी महणनामंमि सन्निवेसंमि । गंतुं बलदेवगिहे फासुयदेसे ठिओ पडिमं ॥ ८ ॥
दुस्सिक्खियत्तणेणं गोसालो पुण सुगुंदपडिमाए । लिंगं दाऊण सुहे अपमत्तो अच्छइ सुणिघ ॥ ९ ॥
तत्थवि पुव्वपवाहेण गामलोणेण जायकोवेणं । सुचिरं निस्सट्ठं ताडिऊण तो तंमि परिचत्ते ॥ १० ॥

पढु सालगाभिहाणे गामे तत्तो विणिक्खमेऊणं । सालिवणंमि जिणिंदो धम्मज्झाणं समारुहइ ॥ ११ ॥
 सालज्जानामेणं वंतरदेवी अकारणं कुविया । कुणइ विविहोवसग्गे तत्थेव ठियस्स जयगुरुणो ॥ १२ ॥
 सयमेव परिस्संता जाहे उवसग्गणेण सा पावा । ताहे पूयं काउं जहागयं पडिनियत्तत्ति ॥ १३ ॥
 उवसग्गकारगच्चिय परिस्सममुव्वहंति चोज्जमिणं । कीरंति जस्स सो पुण कत्थवि नो गणइ जयनाहो ॥ १४ ॥
 अह भुवणतिलयभूए सुविभत्तचउक्कचचरावसहे । लोहगलंमि नयरे सामी पत्तो विहरमाणो ॥ १५ ॥
 तत्थ य राया दरियारिस्सूरनिहलणदंतरासिसिहो । जियसत्तू नामेणं भुवणपसिद्धो समिद्धो य ॥ १६ ॥
 तइया तस्स विरोहो जाओ पच्चंतराइणा सद्धिं । ताहे अपुव्वपुरिसो पेहिज्जइ चारपुरिसेहिं ॥ १७ ॥
 दिट्ठो य तेहिं साभिय पुट्ठोऽवि न देइ जाव पडिवयणं । रिउहेरिउत्ति कलिऊण ताव गहिओ विमूढेहिं ॥ १८ ॥
 अत्थाणमंडवत्थस्स राइणो तक्खणं समुवणीओ । अह पुव्वविणिद्धिदो उण्णल्लो पेच्छिउं सामीं ॥ १९ ॥
 हरिसुक्करिससमुट्ठियरोमंचो वंदिऊण भत्तीए । भणइ नरिंदं एसो न होइ भो चारिओ किं तु ॥ २० ॥
 सो एस जेण तइया आवरिसं कणगवारिधारहिं । निव्ववियमत्थि जायगकुट्टुवमिच्छाइरित्ताहिं ॥ २१ ॥
 सिरिधम्मचक्कवट्ठी सिद्धत्थमहानरिंदकुलक्केऊ । पव्वज्जं पडिवन्नो सयमेव जिणो महावीरो ॥ २२ ॥
 किं वा सुरक्खयरनरिंदविंदविज्जमाणचरणस्स । एयस्स पुरा तुमए निसामिया नेव कित्तीवि ? ॥ २३ ॥

जइ मम वक्कं नो सद्देह ता उयह निउणदिट्ठीए । एयस्स चक्कगयकुलिसकलसकमलंकिए पाणी ॥ २४ ॥

इय लद्धनिच्छएणं जियसत्तुनराहिवेण सविसेसं । सक्कारिऊण सुक्को गोसालेणं सह जिणिंदो ॥ २५ ॥

तथो पुरिमतालंमि नयरे गओ भयवं, ठिओ काउस्सगणं, तत्थ य नयरे धणउव्व समिद्धिसंगओ तोणीरुव
मग्गणगणसाहारो मुणिव्व उभयलोगहियपवित्तिपरो पयइसरलो पयइपियंवओ पयइदक्खिन्नो निम्मलगुणहरिण-
वग्गुरासमो वग्गुरो नाम सेट्ठी, निरुवचरियेपमभायणं भद्दा नाम से भारिया, सा य वंझा, बहूण देवयाणं उवाइय-
सयाणि विविहोसहसयपाणाणि य पुत्तयनिमित्तेण काऊण परिस्संतत्ति । अन्नया सेट्ठिणा सह सिविगासमारूढा
सयणजणेण परियरिया विविहभक्खभोगणसमिद्धरसवइसणाहसूयारसमेया महया विच्छंहुणं निग्गया उज्जाणजत्ताए,
पत्ता नाणाविहविहगकुलकलरवमणहरं विचित्तत्तरसुराहिक्कुसुमपरिमलसुंदरं सगडमुहाभिहाणं उज्जाणं, तहिं च
सुचिरं सरोवरे जलकीलं काऊण पुष्पावचयं कुणमाणो वग्गुरो भद्दा य पेच्छंति जुण्णं खडहडियसिहरंदसं विह-
डियनिविडिसिलासंचयं विणट्टनट्टलट्टयंभसालानिवेसं देवकुलं, तं च पेच्छिऊण पविट्ठाइं कोऊहलेण अब्भंतरे,
दिट्ठा य तत्थ सरयससिसुत्तिव्व अंचंतपसंतसरीरा निराभरणावि भुवणमहग्गवरयणभूसियव्व सस्सिरीया चिंतामणिव्व
दंसणभेत्तमुणिज्जेत्तरसमाहप्पाइसया फल्लीदीलसामलच्छया सिमिद्धिजिणनाहपडिमा, तं च दट्ठूण वियंभियो
तेसिं भावाइसओ, जाओ य एस अभिष्णाओ-जहा नूणं इमीए पडिमाए जारिसा कलाणुगया रुवलच्छी तारि-

सीए ण हवइ एसा सामन्ना, ता फलियच्चभियाणिं अम्ह मणोरहपायवेणंति चिंतिऊण एवं थोउमारद्धाइं-
अज्जं विहडियनिबिडुहनिगड पविहाडिय [अज्ज परपवरसुगइ] मंदिरदुवाराइं ।

अज्जं चिय करकमलि लीण, सुहाइं संसारसाराइं ॥ १ ॥

अज्जं चिय तिहुयणसिरीहिं, अम्हि पलोइय नाह ! । जं तुह लोयणपहि गयउ, नासियदोसपवाह ॥ २ ॥

अहह अम्हेहिं तिवखुदुक्खोहसिहितत्तगत्तिहिं, कह नाह ! तुम्ह पयमंडवंतरि ।

नहनिवहनिम्मलरयणकिरणजालसंछाइयंवरि ॥ ३ ॥

संपइ लडु निवासु फुडुमरुपहिएहिं व देव ! । जं तुह दिहं मुहकमलु, खालियकम्मवलेव ॥ ४ ॥

एवं च भत्तिसाराहिं सुसिलिठ्ठाहिं मणाणंददायिणीहिं गिराहिं हरिसुफुल्लोयणाहिं थोऊण पुणो पुणो नि-
डालतडताडियधरणिवट्टाइं भणिउमाढत्ताइं-देव ! जइ एत्तो अम्ह दारगो वा दारिगा वा तुम्ह पसाएण होज्जा
ता इमं तुह भवणं कणयकलसकलियसिहरं थूरथंभाभिरामविसालसालापरिकिखत्तं कविसीसयसओवसोहियं पवर-
पागारसंपरिगहियं सुसिलिठ्ठावियसालभंजियासुंदरगोयराणुगयं कारवेमो, सयावि तुम्ह भत्तिपरायणाणि य
होमो, अणवरयं पूयामहिमं च विरएमोत्ति भणिऊण उज्जाणकीलं काऊण गयाणि सगिहं । अह तेसिं भत्तिपगरि-
सागरिसिथहिययाए अहासन्निहियवाणमंतरीए देवयाए अणुभावेण आहूओ भद्दाए सेट्ठिणीए गम्भो, ससुणपन्नो

सेष्टिस्स पच्चओ, तओ तहिणाओ आरब्ध समारंभियं जिणमंदिरे कम्मंतरं, कओ अकालखेवेण जिनुद्धारो, तिसंझं च सुरहिंपच्चन्नकुसुमेहिं निम्मवेइ पूयं, पयट्ठवेइ वरविणसिणीनट्ठविहिं, वायावेइ मंजुगुंजतसुरयसणाहं चउविहाउज्जं, एवं च कुणमाणस्स वच्चंति वासरा ।

अन्नया य जिणवंदणवड्डियाए अणिययविहारेण परियड्डमाणा समागया सूरसेणा नाम सूरिणो, ठिया य सूरिसमुचियपएसे, सुत्तपोरिसीपज्जंते य गया मल्लिजिणाययणं, वंदिया देवा, उवविट्ठा उचियट्ठणे, काउमारद्धा य भवसत्ताण धम्मदेसणा । एत्थंतरे पूयासामग्गिसणाहो समागओ वगुरसेट्ठी, जिणपूयं वंदणं च काऊण अल्लीणो सूरिसयासे, पणभियं चऽणेण से पायपंकयं, दिव्वासीसो य आसीणो महीयले, गुरुणावि तज्जोगयाणुसारेण पारद्धा धम्मदेसणा । कंहं चिय ?—

जिणनाहमुवणकरणं तण्डिमापूयणं तिसंझं च । दाणंमि य पडिबंधो तिन्निवि पुन्नहिं लब्भंति ॥ १ ॥

नीसेससोक्खतरुवीयमूलमुद्धामदुग्गइक्कवाडं । कारिति मंदिरं जिणवरस्स धन्ना सविभवेणं ॥ २ ॥

तुहिणगिरिसिंगारहारि जे निम्मवंति जिणभवणं । ते कह न लीलाएच्चिय चितियमत्थं पसाहिति? ॥ ३ ॥

सामन्नेणवि जिणेगेहकारणे को मिणिज्ज पुन्नभरं? । को पुण तंमिं विहिणा जिन्नंमि समुद्धरिज्जंते ॥ ४ ॥

ता भो महायस! तए नियमा सम्मं समायरियमेयं । समुयज्जियदव्वेणं जिनुद्धारो जमेस कओ ॥ ५ ॥

एयंमि अकीरंते तित्थुच्छेओ जिणे अभत्ती य । साहूणमणागमणं भव्वाणमवोहिलाभो य ॥ ६ ॥
 काराविए इमंभी भवजलनिहितरणजाणवत्तंमि । अच्चंतसंतकंता कारेअवा जिणप्पडिमा ॥ ७ ॥
 तीसे तिसंझमपमत्तमाणसेहिं परेण जत्तेणं । पूया य विरइयवा सा पुण अट्टपयोरवं ॥ ८ ॥
 वासकुसुमकखएणं धूवपइवेहिं वारिपत्तेहिं । फलभोयणभेएहि य जणनयणाणंदजणगेहिं ॥ ९ ॥
 इय अट्टविहा पूया कीरंती भत्तीए जिणिंदाणं । तं नत्थि नूण कछ्छाणमेत्थ जं नो पणाभेइ ॥ १० ॥
 तथाहि-हरियंदणघणसारुभवेहिं गंधेहिं सुरहिगंधेहिं । सवण्णुसिरे निहिएहिं होति भवा सुरहिदेहा ॥ ११ ॥
 नवमालइकमलकंधंमल्लियापमुहकुसुमदामाहिं । विरयंता जिणपूय धरंति भवा सिवसुहं च ॥ १२ ॥
 नहरइजलपडिहतथे जिणपयछेत्ते जमकखया खित्ता । पसवंति दिव्वसुहसस्ससंपयं तं किमच्छरियं ? ॥ १३ ॥
 घणसारगुरुधूवो जयगुरुपुरओ जणेण डज्झंतो । उच्छलियधूमपडलच्छलेण अवणेइ पावं च ॥ १४ ॥
 जे दीवं देति जिणिंदमंदिरे सुंदराय भत्तीए । ते तिहुयणभुवणब्भंतरेक्कीदीवत्तणसुर्वेति ॥ १५ ॥
 तिहुअणपहुणो पुरओ ठ्वेति जं वारिपुन्नपत्ताइ । तं नूणं पुवज्जियदुहाण सलिलं पयच्छंति ॥ १६ ॥
 परिपागवससमुग्गयविसिद्धगंधेहिं तरुवरफलेहिं । जिणपूयं कुणमाणा लहंति मणवंछियफलाइ ॥ १७ ॥
 बहुभकखवंजणाउलओयणचरुपागपमुहवत्थूहिं । धन्ना विरइंति बलिं सुहनिहिउक्खणणेहउत्ति ॥ १८ ॥

अहवा किमितिणं ? जं किंचिवि अत्थि वत्थु सुपसत्थं । तित्थेसराण तं तं विणिओगे निति कयपुट्ठा ॥ १९ ॥
 दाणमवि सुगइसंगमनियाणमनियाणमेव दिज्जंतं । पुन्नाणबंभिरूवं कळाणपरंपरं जणइ ॥ २० ॥
 तं पुण तित्तिहिं भणियं अभयपयाणं च नाणदाणं च । धम्मपवत्ताणं पुण तइयमुवट्ठभदाणं च ॥ २१ ॥
 तत्थाभयप्पयाणं लोइयलोगुत्तरेसुवि पसिद्धं । सत्थावत्थासुपिवि अनिसिद्धं सिद्धिरासियाणं ॥ २२ ॥
 करिसणमिव कणरहिंयं नरनाहंपिव विवेयपरिहीणं । एयविउत्तं धम्मं न कयाइ बुहा पसंसति ॥ २३ ॥
 जं पुण नाणपयाणं दीवोच्च पयासयं तमत्थाणं । भवजलहिपडियजंतूण तारणे द्ढतरंडसमं ॥ २४ ॥
 उम्मगगपयट्ठाणं व विसममिच्छत्तभीमरत्तमि । सम्मगगेदसयं सिवपुरीए वरसत्थवाहोच्च ॥ २५ ॥
 तइयं पुण भेसहवत्थपत्तकंबलगपमुहद्वेहिं । साहूण धम्मनिरयाण होइ उवट्ठंभकरणेण ॥ २६ ॥
 जं ते महाणुभावा कह दूरविसुक्कसच्चसावज्जा । सक्कति तवं काउं आहारार्इण विरहंमि ? ॥ २७ ॥
 एत्तियमेत्तेणं चिय गिहिणो लंघति गुरुभवसमुदं । उवयारे जं असणाइएहिं वट्ठति साहूणं ॥ २८ ॥
 धणसत्थाहिवसंथसमूलदेवाणो य जयपयडा । दिट्ठता निदिट्ठा इत्थं सिद्धंतसुपसिद्धा ॥ २९ ॥
 इय भो देवाणुपिया ! तिन्नि पयत्था मए तुह पसत्था । परिकहिया एणंसिं पढमो तुमए सयं विहिओ ॥ ३० ॥
 अन्ने पुण सावगधम्मकुसलबुद्धीहिं जंति काउं जे । सद्धाणनाणसारं ता गिहिधम्मं पवज्जेसु ॥ ३१ ॥

इय गुरुणा निंदसिए वत्थुपरमत्थे जायपवरविवेगो पणमिऊण गुरुणो पयपंकयं सेट्ठी वागरिउं पवत्तो-भयवं!
सुट्ठु बोहिओऽहं तुम्हेहिं, उवदंसेह मे सावगधम्मं, सिक्खवेह जुत्ताजुत्तं, तथो सूरिणा भेयप्पभेयसाहासहरस्सं-
कुलो सुहफलोहकलिओ कहिओ वित्थेण गिहिधम्मकण्हुमो, पडिवन्नो य भावसारमणेण । तप्पभिइं च अट्ठप्प-
यारजिणपूयारओ सुणिदाणसमुज्जयचित्तो सावगतं पालेइ । पसूए पुत्ते सविसेसं धम्मपरिवत्तो जाओत्ति ।

अन्नया सो पंडुरपरिहियपडो कुसुमाइसमग्गसामगीसणाहो सयलपरियणसमेओ पयट्ठो मल्लिजिणपडिमापूय-
णत्थं, इओ य तव्वेलं भयवंतं महावीरं नगरस्स सगडसुहुज्जाणस्स य अंतरा पडिमं पडिवन्नं ओहीए आभोइत्ता ईसाण-
सुरनाहो अणेगसुरकोडिपरिवुडो पंचरायरथणविणिम्मियविमाणारूढो आंगतूण तिवसुत्तो आयाहिणपयाहिणपुरस्सरं
सहरिसं वंदिऊण अन्नोन्नघडियपाणिसंपुडो भयवओ चरियं गायमाणो साभिणो वयणंमि दिन्नदिट्ठो पज्जवासभाणो
चिट्ठइ, वग्गुरसेट्ठीवि भयवंतमइक्कमित्ता चलिओ मल्लिजिणाययणाभिमुहं, तं च वच्चंतं ईसाणिंदो पासित्ता भणइ-
भो वग्गुर ! दूरयरदेवा सच्चोवाया हवंति(त्ति) सच्चो कओ तुमए लोयप्पवाओ, जं पच्चक्खं तित्थगरं भोसूण पडिपं
अच्चिउं वच्चसि, किं न सुणसि जं एस विसमभवावत्तनिवडंतं भुवणत्तयसमुद्धरणधीरो सिरियहावीरो सयमेव इह चिट्ठ-
इत्ति?, तथो सेट्ठी एवं निसामिऊण जायअतुच्छपच्छायाओ भिच्छाभिदुक्कडंति भणिऊण तिययाहिणादाणपुवं जिणं
वंदइ माहिमं च करेइ, सुचिरं च पज्जवासिऊण जहागयं पडिनियत्ते सुरिंदे मल्लिजिणसुवणंमि वचइ ।

जयगुरुवि तत्तो निक्खमिच्चा पट्ठिओ तुन्नागसन्निवेसाभिमुहं तस्स य अंतरा तक्कालपरिणियाणि चह्वराणि स-
पडिजुत्तमिति, ताणि पुण दोणिवि टप्परकन्नपुडाणि मज्जारणुरुवनयणाणि अइलंबमोट्ठपोट्ठाणि दीहरकंथराणि
कसिणकुसंठाणसरीराणि अहरसीमासमइकंतदीहरदंताणि, गोसालो पेच्छिऊण जायपरितोसो सहासं भणइ-अहो
भमिओऽब्धि पउरजणवएसु नियथम्मगुरुपसाएण, एत्तिथकालं परियडत्तेण एरिसो संजोगो न कत्थवि पलोइओ ।
ता नूणं—

तत्तिष्ठो विहिराया जणेऽइदूरेवि जो जहिं वसइ । जं जस्स होइ सरिसं तं तस्स दुइज्जयं देइ ॥ १ ॥
एवं च पुणो पुणो पुरा ठाऊण समुल्लवितो जाव न कहंपि विरमइ ताव तेहिं वाढं पिट्ठिऊण बद्धो पक्खित्तो
य वंसीकुडंगे, तत्थ य उत्ताणो निवडिओ अच्छइ, महया सदेण य वाहरइ, जहा-सामि ! कीस मं उवेक्खइ ? ,
एसोऽहं एत्थ वंसकुडंगे निवडिओ वट्ठमि, सब्बहा मोअह इमाओ वसणाओत्ति पुणो पुणो उल्लवंतं तं सो सि-
द्धत्थो पडिभणइ-भइ ! सयं कडं सयं चैव भुंजाहि, किं सुहा परितप्पसि ? , सामीवि अदूरेदंसं गंतूण करुणाए चिर-
समसुहदुक्खसहणपक्खवाएण तं पडिवाल्लिउमारद्धो, एत्थंतरे तेहिं नायं, जहा-एस कोइ दुट्ठसीलो एयस्स देवज-
गस्स पीडियावाहगो छत्तधारगो वा होही, तेण एस एयं पडिवालेमाणो निच्चलो अच्छइ, ता न जुत्तं एयस्स
धरणंति चिंतित्तण सुक्को गोसालो, मिलिए य तंमि गंतुं पवत्तो जयगुरु । कमेण य पत्तो गोभूमिमि, तत्थ य

सुलभचरणपाणियत्तणेण गावीओ चरंति, तेण सा गोभूमी वुच्चइ । तत्थ य कलहपियत्तणेण गोसालो गोवालए मणइ-अरे मिलिच्छा ! जुगुच्छणिज्जरूवा ! एस मगो कहिं वच्चइ?, गोवेहिं भणियं-अरे पासंडिया ! कीस अम्हे निक्कारणं अक्कोसेसि?, सो भणइ-दासीपुत्ता ! पसुयपुत्ता ! जइ न मरिसिहिह ता सुट्ठअरं अक्कोसिस्सामि, किं अलियमेयं?, मिच्छजाइया एरिसगा चेव तुब्भे, किं जहट्ठियं न भणिस्सामि?, को मे तुम्ह पडिभओत्ति, तओ तेहिं समुप्पन्नगाढकोवेहिं मिलित्ता पणिहसुट्ठिलेद्धूहिं विद्वित्ता बद्धो वंसीगहणे य पक्खित्तो, तत्थवि पुव्वनाएण करुणाए पहियजणेण विमोइयंमि गोसाले तिहुअणगुरू रायगिहे नयरे अट्टमवासारत्तं काउसुवसंपज्जइ, विचित्ताभि-
मगहसणाहं च चाउम्मासखमणं आरंभेइ । तस्स पज्जंते बहिया आहारगहणं कुणइ ।

तओ अणिज्जरियं अज्जवि बहुं कम्मं अच्छइत्ति चित्तिऊण पुणोऽवि सामी अत्थारियादिट्ठतं परिभाविंतो कम्मनिज्जरणिनिमित्तं अच्चंतपावजणसंगएसु लाढावज्जभूमिसुद्धभूमिनामेसु मिलिच्छदेसेसु गोसालेण समेओ विहरिओ । तत्थ य ते अणारिया कयाइ असुणियधम्मक्खरा निरणुकंपा लोहियपाणिणो परमाहम्मियासुरसरूवा भयवंतं विहरमाणं पासित्ता हीलंति निंदंति तहाविहप्पयारेहिं विद्वंति, साणादओ य दुट्ठसत्ते सामिस्स अभिमुहं मुयंति । अवि थ-
जह पविरेयणत्तणुतयतच्छणखारोचलेवपामोक्खं । किच्छविगिच्छं विज्जं कुणंतमभिणंदए रोगी ॥ १ ॥

तह जयनाहोवि समगसुगउवसगकारयं लोयं । उवयारिबंधुबुद्धीए बंधुरं पेहइ पहिद्धो ॥ २ ॥

जेण दंरुदुविकिट्टमेरुविस्संठुलं धरावट्ठं । हलहलियसत्तकुलसेलसायरं विरइयं सिसुणा ॥ ३ ॥
 सोवि कह अतुलबलसारविक्रमो निक्खिणेण कम्मेण । कीडप्पायकयावयमहह सहाविज्जइ जिणिंदो ? ॥ ४ ॥ जुम्मं ।
 किंच-जो हरिणा सिद्धत्थो आवयविणिवारणट्ठया सुक्को । गोसालगपच्चत्तरेलाए वियंभइ सोवि ॥ ५ ॥
 अन्नं च-जइ किर तिलेयरंगे अतुल्लमल्लोऽवि जिणवरो वीरो । एवंविहावयाओ विसहइ सुपसंतचित्तेण ॥ ६ ॥
 ता कीस थेवभित्तावयारकरणुज्जएऽवि लोयंमि । सुणियजहट्ठियभावा वहति रोसं महासुणिणो ? ॥ ७ ॥ जुम्मं ।
 अहवा चुन्निज्जइ थेववायमेत्तेवि सक्कारालेड्डु । निट्ठुरकालायसघड्डियदुवणघाण्हिं नवि वइरं ॥ ८ ॥
 अह तिहुयणेक्कनाहो अणज्जभूमीसु तासु हिंडतो । पत्ते वासारत्ते नवमेऽनवभासयविहाणे ॥ ९ ॥
 वसहिं च अलभमाणो सुन्नागारेसु रुक्खमूलेसु । धम्मज्झाणाभिरओ वरिसायालं अइक्कमइ ॥ १० ॥ जुम्मं ।
 वित्ते य तम्मि सामी सिद्धत्थपुरमागओ, तत्तोऽवि कुम्मारगामं संपट्ठिओ, तस्स य अंतरा तिललित्तसमीवेण
 बोलेमाणो पुच्छिओ गोसालेणेण सामी-एस तिलत्थंबो किं निप्फज्जिही नवत्ति ?, तओ तहाभविद्यवयावसेण
 समेव भणियं जिणेण-भइ ! निप्फज्जिही, परं सत्तवि पुप्फजीवा उदाएत्ता एयस्स चैव तिलत्थंबस्स एगाए तिल-
 संगलिगाए सत्त तिला समुवज्जिस्संति, एयं च असइहमाणेण अणज्जेण तेण अवक्कभित्ता मूलावणद्धभूमिलेड्डुसणाहो
 समुप्पाडिओ सो तिलत्थंबो, एगंते उज्जिओ य, एत्थंतरे अहांसंनिहियदेवहिं भयवओ वयणमवित्तं कुणमाणेहिं

विउधिया घणावली, जायं सलिलवरिसं, समासासिओ तिलथंबओ, तेण पएसेण वेगेण आगच्छमाणीए गावीए सुरेण चंपिय मूलविभागो पविट्टो जलसेयसुकुमारो धरणिवेट्टे, जाओ दढपइट्ठाणो, कमेण परूढाई मूलाई, उम्मीलियाई कंदलाई, पयट्टो फुल्लिउंति । भयचं पुण कुम्मारगामनगरं संपत्तो, तस्स बाहिं सूमंडलस्सुवरिं निहियदिट्ठो उद्धी-
कयभुयपरिहो दीहरजडाकड्ढो पयइविणीओ पयइपसमपरो पयइदयादक्खिणाणुगओ समारद्धसद्धमज्झाणि वि-
हाणो वेसियायणो नाम लोइयतवस्सी मज्झंदिणसमयंसि आयावेइ । तस्स य उप्पत्ती भन्नइ—

मगहाविसए धणघन्नसमिद्धलोयकलिए गोब्बरगामे आभीरलोयाणं अहिवाई गोसंखीनाम कुंडुविओ, बंधुभई
नाम से भज्जा, सा य अवियाउरी, ताणि य परोप्परं दढसिणेहाणुरायाणि विसयसुहमणुहवंताणि कालं वोळेंति, इओ
य तस्स गामस्स अदूरे खेडयं नाम संनिवेशो, तत्थ य अविगप्पिया सन्नद्धबद्धकवया पउरपहरणसणाहा मिलेच्छाण
घाडी पडिया, तीए य सो गामो निवाडियारक्खिगजणो लुंदिथधणधन्नकंसदूसो विणिहयपहरणहत्थसुहडसत्थो
कओ, तओ बंदिग्गेण लोगं गहिऊण पट्ठिया सट्ठाणं, एगा य गामइत्थिया तवेळं पसूया पंडमि मारिए करकं-
लियबालया सुरूयत्तिकाऊण चालिया चोरेहिं, सा य चेडवावडकरत्तेण न पारेइ सिग्घगईए समांगंतुं, तओ तेहिं
सरोसं भणिया—भदे ! परिचयसु सुयं जइ चिरजीवियत्थिणी, इमं च सुणिऊण अइगरुययाए मरणभयस्स परिचत्तो
तीए सुओ तरुच्छागाए, गया य चोरेहिं समं, सो य गोसंखिओ गोरूवाइ धेत्तूण पहायसमए समागओ तं पएसं,

दिदौ य सो रुक्खच्छायाए पडिपुन्नसंघोवंगो सस्सिरीओ अक्खयसरीरो बालओ, गहिओ य तेणं, पणामिओ नियभज्जाए, भणिया य एसा-पिए ! एस तुह अपुत्ताए पुत्तो होही, सम्मं रक्खिज्जाहि, गोसे य पगासियं जहा मम महिला गूढगब्भा आसि, सा य संपयं पसूया, दारगो से जाओ, एयस्स चैव अत्थस्स निच्छयनिमित्तं छगलकं वा-वाइत्ता लोहियंगंधो कओ, सा य सुइयनेवत्थेण ठाविया, वद्धावणयं च विहियं, सम्माणिओ सयणवग्गो, पसारिया लोयम्मि वत्ता, निवत्तिथाइं छट्ठीजागरणचंदसूरदंसणियमुहाइं किच्चाइं, समुचियसमए ठवियं वेसियायणोत्ति नामं, कालक्कमेण य पत्तो जुव्वणं, सावि से जणणी चंपाए नयरीए नेऊण चोरोहिं विक्रयनिमित्तं ओहििया रायमग्गो, सुर-वत्तिकऊण गहििया थेरीए वेसाए, सिक्खाविया गणियाण वेज्जं । अविय—

सुरविलयब्भहियविसिट्ठरुवसोहमपवरलायन्ना । सुरयप्पवंचकुसला वियक्खणा गेयनेट्ठसु ॥ १ ॥

उवयारभणियपरिचत्तबोहसमयाणुरुवचेट्ठासु । पत्तट्ठा सा जाया लद्धपसिद्धी य नयरीए ॥ २ ॥

दंसणमेत्तेणं चिय जणस्स पुवं जणेइ विक्खेवं । किं पुण उब्भडसिगारसारनेवत्थरुहरा सा ? ॥ ३ ॥

इओ य सो वेसियायणो अत्थोवज्जणनिमित्तं कोइ विविहवाणिज्जाइं, अन्नया य धयस्स सगाडिं भरिऊण वयं-साएहिं समेओ गओ चंपानयरिं, तम्मि य समए समारद्धो पुरे महूसवो, पवराभरणरुइरदेहा नियसियपहाणपट्ठणु-गयचीरंसुयाइवत्था जहिच्छं तियचउक्कचचेरसु रामाजणेण परिगया विलसंति नायरा, ते य दट्ठण चित्तियभणेण-

अहो एए एवं विलसति, अहंपि न कीस रमेमि !, ममावि अत्थि केत्तिमेत्तावि अत्थसंपया, किं वा इमीए रक्खि-
याए ? , धम्मट्ठाणदानभोगोवभोगफलं हि पसंसिज्जइ धणं । जेण भणियं—

दानं भोगो नाशस्तिन्नो गतयो भवन्ति वित्तस्य । यो न ददाति न भुङ्के तस्य तृतीया गतिर्भवति ॥ १ ॥

दैवात्कथमपि जाते सति विभवे यस्य नैव भोगेच्छा । दाने च न प्रवृत्तिः स भवति धनपालको मूर्खः ॥ २ ॥

इति परिभाषिऊण कओ अणेण सिंगारो, परिहियाइं पहाणवत्थाइं, गओ पेच्छणगे, दिट्ठा य वेसाजणमज्झ-
गया सच्चिय पुव्वमाया , जाओ तीए उवरिमणुरागो, विथंभिओ से पंचबाणोऽवि सहस्सवाणोच्च मयरद्धओ, सम्म-
प्पियं तंबोलदाणपुव्वगं से गहणगं, रयणिसमए घणसारुम्मिस्सचंदणरसविलित्तगतो केसपासविणिम्मियकुसुमदामो
गहियंतंबोलवीडओ पयट्ठो तीसे गिहाभिसुहं, एत्थंतरे तत्स कुलदेवया चित्तेइ—अहो असुणमाणो परमत्थं अकज्जमा-
यरिउं लग्गो एस वरागो, ता संबोहेमिति विभाविऊण अंतरा सबच्छगाविरूवं विउच्चित्ता ठिया, वेसियायणरस्सवि
सिग्घं गच्छमाणस्स लित्तो अमेज्जेण चलणो, जाया से आसंका जहा असुइत्ति, तओ अन्नं विसोहगं किंपि अपाव-
माणेण तेण तीसे चेव गावीए सन्निहमि निविट्ठस्स वच्छस्स पट्टीए पारद्धं चलणलूहणं,

तयणंतरं स वच्छो माणुसभासाए पडिभणइ गाविं । अम्मो ! पेच्छसु एयं विगयासंकं ममंगमि ॥ १ ॥

मिज्झविलित्तं चलणं लूहन्तं चत्तधम्मववहारं । किं कोइ कुणइ कइयावि सुरहिसुए एरिसं हीलं ? ॥२॥ जुम्मं ।

गावी वागरह तओ पुत्तय ! मा वहसु अद्धिहं किंपि । अइधम्मववहारा बाहिरो वट्टए एसो ॥ ३ ॥
वच्छेण भणियम्ममे ! कहमेवं ? , पुत्त ! कित्तिं कहिमो ? । नियजणीएवि समं जो वासं वंछइ अणजो ॥ ४ ॥
ता वच्छ ! सहसु सबं तं धन्नो एत्तिण जं मुक्को । उज्झियनियमज्जाया किमकज्जं जं न कुव्वति ? ॥ ५ ॥
तावच्चिय तत्तरुइ तावच्चिय धम्मकम्मपडिबंधो । लोयाववायभीरुत्तणं च तावेव विप्फुरइ ॥ ६ ॥
तावज्जिवि न विणस्सइ लज्जा जणणी गुणाण सयलाणं । अह सावि कहवि नट्टा ता नट्टा कुत्तलचेट्टावि ॥ ७ ॥ जुम्मं ।
इय सुराहिं साभिप्पायवयणसंदोहमुखेमाणिं वच्छस्स पुरो दट्ठु सो सहसा संकिओ हियए, चित्तिउमारद्धो य-
अहो पढमं ताव इमंपि महअच्छरियं जं तिरिच्छजोणिया होऊण माणुसियाए भासाए संलवइ, तत्तयवि नियमाया-
भिगमलक्खणं दूसणं मे दंसेइ, कहमेवं संभवइ ? , कत्थ मम माया ? कत्थ अहं ? कहं संवासो ? , सबं अचंतमघडंत-
मेयं, अहवा होयव्वमेत्थ कारणेणं, चित्तरूवाइं विहिणो विलसियाइं, संभवइ सबं, अओ पुच्छिस्सामि तं चेव
वेसाविलयं उट्ठाणवडियंतिभाविऊण गओ तीसे घरं, अब्भुट्ठिओ अणाए दावियं आसणं पक्खालिया चरणा ठियाइं
खणंतरं अवरोप्परुल्लोवेण, अह पत्थावमुवलब्भ पुच्छिया सा अणेण-भइ ! सोहेसु कत्थ तुमह उप्पत्ती ? , तीए
सहासं भणियं-जत्थ एत्तियजणस्स, तेण भणियं-अलाहि परिहासेण, अहं सकज्जं पुच्छामि, तीए भणियं-मुद्धो-
उसि तुमं, जेण-

नरह नरिंदह रिसिकुलह वरकामिणिकमलाहिं । अचुगमणु न पुच्छियइ कओ कुसलत्तणु ताह ? ॥ १ ॥

पंकात्तामरसं शशाङ्कसुदधेरिन्दीवरं गोमयात्, काष्ठादग्निरेहः फणादपि मणिर्गोपित्तो रोचना ।

कौशेयं कृमितः सुवर्णमुपलाहूयपि गोलोमतः, प्राकाश्यं स्वगुणोदयेन गुणिनो गच्छन्ति किं जन्मना ? ॥ २ ॥

अओ किं तुह एणंति भणिऊण हावभावरूवं महिलाविब्भं दंसिउमारद्धा, ताहे तेण भणियं-अन्नपि एत्तिय मोछं दलयिस्सामि साहेहि मे सब्भावं, अइगरुयसवहसावियाऽसि तं, मा अलियमुछविस्ससित्ति भणिए जहा-
वित्तं मूलाओ आरब्भ सवं सिट्ठमेयाए, तहावित्तंतनिसामणेण य जाया से आसंका, जइ पुण एयाए जो तरुछा-
याए छड्डिओ सो अहं चेव होजा, एवं च सुरहिवयणंपि घडेजा, इमं च परिभाविऊण दुगुणमत्थपयाणं काऊण
पडिनियत्तो जाव तत्थप्पएसे सवच्छं सुरभिं निज्झाएइ ताव न किंपि पेच्छइ, तओ नायमणेणं-नूणं अहं केणइ
देवयाविसेसेण इयवइयेण अकज्जमायरंतो नियत्तिओऽस्मि । अह सगडिं घेत्तूण गओ नियगामं, उचियपत्थावे
अम्मापियरो उट्ठाणपरियावणियं अत्तणो पुच्छिउमारद्धो, ताणि य कहंति-पुत्त ! अह कुच्छिसंभूओऽसि तुंगं,
मा अन्नहा विकप्पेसु, को परडिंभरूवाइं परिपालेइ ?, तओ सो गढनिब्बंघेण ताव अणसिओ ठिओ जाव से तेहिं
कहियं, जाओ तस्स जणणित्ति निच्छओ, गयो य चंपानयरिं, साहिओ तीसे गणियाए वुत्तंतो, जहाऽहं
सो तुह पुत्तो जो तरुमूले उज्झिओत्ति । तओ सा एवमायन्निऊण सुमरियपुव्वइयरा विरहदुक्खेण अकजपवित्ति-

पारंभसमुल्लवियसवियारवयणविलिएण बाढमब्बाहया समाणा उत्तरिजेण वयणकमलमवगुंठिऊण दीहरुम्मकुपपो-
क्कारं रोइऊण विलविउं पवत्ता । कइं चिय ?—

हा पाव दइव निग्घिण निळुज्जाणज्ज ! सुकमज्जाय ! किं अन्नो तुह नाही विडंवणाडंवरपयंचे ? ॥ १ ॥
जं कुलविलयामलिणत्तकारिणा उभयलोगदुट्टेण । वेसाभावे विणिम्मियड्ढिह सुकुलणसूयावि ॥ २ ॥
तत्थवि न ठिओ तं एत्तिएण घडिअम्हि नियसुएणावि । हा हा गरुयमकज्जं सत्थेसुवि सुम्मइ न एवं ॥ ३ ॥
जइ पुवं चिय पावेहिं तेहिं चोरेहिं विणिहया हुंता । ता किं असच्चमविगोवणिज्जिमियमज्ज पेच्छेज्जा ? ॥ ४ ॥
किं कूवयपक्खेवेण अहव उल्लवणेण सोहेमि । सासनिरोहेणं वा लहुं समुज्झामि अत्ताणं ॥ ५ ॥
एवं चिय मेरुगिरिंदविब्भमाओ इमाओ दुक्खाओ । पावाए मज्झ नूणं होही संपइ परित्ताणं ॥ ६ ॥
इय दुस्सहदुहकरवत्तगाढफालिज्जमाणहियया सा । अइसुचिरं विलवित्ता निमीलियच्छी गया मुच्छं ॥ ७ ॥
तारिसं च दट्ठुण वेसियायणेण सित्ता सीयलसलिलेण वीजिया दुगुलंचलेण संबाहिया पासवत्तिणा चेडीजणेण,
कह कहवि लद्धचेयणा संभासिया अणेण-अम्मो ! कीस तावसंभारसुव्वहसिं ? को एत्थ तुज्झावराहो ? एसो
चिय सच्छंदाणिबद्धघडणविहडणरसिगो दइवो एत्थावरज्झइ जो विविहसंविहाणगनेवत्थेहिं नडं व विवसं माणुसं
विनडेइ, अच्चंतविरुद्धमवि वत्थुं कारवेइ, अगममेणवि सह संगमं संपाडेइ, ता उज्झसु संतावं पडिवज्जसु धीरत्तणं

होसु निवडियसहा, तीए भणियं-पुत्त ! बाढं असहणिज्जमगोवणिज्जं च इममावडियं, इमं च संभरंती वज्जगंठिनि-
 दुरहियत्तणेण चैव जीवामि, न पुण अन्नं किंपि दुज्जम्मजायाए मज्झ जीवियकारणं, संपयं पुण वच्छ ! वंछामि
 अतुच्छवच्छसाहासमुलंबणाइणा सकुलकलंकभूयं जीवियं परिचइउं, अओ अणुमन्नेसु मं, तुमं चैव इयाणिं पुच्छणिज्जो,
 तेण भणियं-अम्मो ! अलं दूरज्झवसाएण, इओ मए वेसाहत्थाओ मोइया समाणी तवनियमेहिं अत्ताणं अत्ताणं
 साहेज्जासि, अपत्तकालजीवियववरोवणं हि दूसियं समयसत्थेसुत्ति संठविऊण बहुदवदाणपुव्वगं मोइया सा वेसासया-
 साओ, नीया सग्गामे दावियं जीवणं ठाविया धम्ममग्गमि, अन्नया इममेव वेरग्गसुव्वहंतो सो चित्तिउं पयत्तो, जहा-

तिवाववायजलवाहदुलंघणिज्जं, दोगच्चमच्चुमयरज्झसभीममज्झं ।

संसारसायरमिमं परियाणइत्ता, सत्ता सुहेण निवसंति कहं व गेहे ? ॥ १ ॥

जे इत्तिंयपि न सुणंति किमज्ज होही, सोक्खं व दुक्खमुच्चियं व तहेयरं वा ।

संसेवणिज्जमिमन्नयरं च मोहमाहण्णपियपहाणविधेयेनेत्ता ॥ २ ॥ जुम्मं ।

किंच-कालमि तंमि बहुला जइ नो कहेज्जा, संभोगदुच्चिलसियं जणणीयं मे ।

ता तारिसं ददमकज्जमहं करेत्ता, तिवाचलेणवि लभिज्ज न नूण सुद्धिं ॥ ३ ॥

एवंविहाण विविहाण विडंवणाणं, भोगाभिलासमहमेक्कमवेमि मूलं ।

ता होउ संपइ इमेण दुगुंछिएणं, सबोवहाविरहियं पकरेमि धम्मं ॥ ४ ॥

इति निच्छिऊण बहुप्पयोरहिं गोसंखियं जणणिं च पडिवज्जाविकुण पाणाभाए पव्वजाए पव्वइओ एसो, करेइ विविहे तवोविसेमे, अब्भसेइ निययधम्मसत्थाइं, रक्खेइ पाणिणो, पज्जुवासेइ गुरुणो, लद्धट्ठो य जाओ निययधम्ममग्गमि । अन्नया सो विहरंतो कुम्मारगामबाहिं ठिओ आयावेइ, एसा वेसियायणस्स उज्जत्ती ॥

तस्स य जडाज्जूडाओ दिणद्धदिणमणिकिरणपरितत्ता निवडंति धरणीअले जूयानियरा, सो य जीवाणुंरुपयाए निवडियमेत्ताओ करेण गिणिहऊण खिवइ जडामउडे, इओ य तेणंतेणं भगवया सभं गच्छंतो गोसालो तं दट्ठूण अणत्थसीलयाए ओसरित्ता महया सहेण वागेरेइ-भो भो किं भवं सुणी सुणिओ उयाहु जूयासेजायरो?, इत्थी पुरिसो वा?, न सुणिज्जसि सम्मं, अहो ते गंभीररूवत्तणं, एवं च भणिए खमासीलयाए जाव वेसियायणो न किंपि जंपेइ ताव दुव्विणयरसिगत्तणेण तिन्नि वाराओ पुणो पुणो पुच्छिओ गोसालणेण ।

अह तस्स पसमसीलत्तणुणोऽविहु दुट्ठवयणमहिदस्स । अइयदुचंदणस्सव विथंभिओ तिच्चकोहग्गी ॥ १ ॥

तो तेणुब्भडजालाकलावपसरप्परुद्धगयणयला । गोसालगदहणत्थं तेउल्लेसा विणिस्सिट्ठा ॥ २ ॥

एत्थंतरे जिणेणं तीसे विज्झवणपच्चला झत्ति । गोसालगरक्खक्खट्ठा सीयल्लेसा पडिविमुक्का ॥ ३ ॥

अह तीए तेउलेसा बाहिरओ वेढिया समतेण । सिग्धं चिय विज्झाया हिमबुद्धीएव जलणकणा ॥ ४ ॥

ताहे तिलोक्कपहुणो अण्णणुरुवं वियाणिउं रिद्धिं । सो खामिउं पवत्तो इमाहि वग्गूहिं विणयणओ ॥ ५ ॥

भयवं ! न नायमेवं जह सिस्सो तुम्ह एस दुस्सीलो । इण्हिं चिय सुणियमिमं ता इण्हिं खमह अवरहं ॥ ६ ॥

इमं च जंपमाणं वेसियायणं दट्ठूण गोसालगेण भणियं-भयवं ! किमेस जूयासेज्जायरो उम्मत्तोच्च पलवइ?, भय-
वया भणियं-भइ ! जया तुमए मम पासाओ ओसरित्ता एसो एवं भणियो, जहानकिं तुमं सुणिमुणियो इच्चाइ,
तया पढमेवलाए सहित्ता ठियो, पुणो पुणो तुमए भणियो समाणो तुज्झ दहणट्ठयाए उगं महापमाणं सल्लान-
इसिसिरवत्थुणावि अप्पडिहयसामत्थं तेउल्लेसं निसिरइ, सा य जावज्जवि तुह देहदेसं ईसि न पावइ ताव मए तप-
डिघायनिमित्तमंतरा ताराहिवाहिमसिसिरा सीधेल्सा पक्खित्ता, तप्पभावेण य तुह सरीरं तहट्ठियं दट्ठूण उवसंहं
यकोववियारो ममं पडुच्च एवं भणिउं पवत्तो-भयवं ! न सुणिओ तुज्झ एस सिस्सो, ता मरसियवो मम दुव्विण-
उत्ति । इमं च आयन्निज्जण गोसालओ भयसंभतो भयवंतं भत्तीए पणमिज्जण भणइ-कहं नं भंते ! तेउलेसालद्धी
हवेज्जा?, भयवया वुत्तं-जे णं गोसालया ! छट्ठछट्ठेणं निरंतरेणं तथोकम्मणेणं आयावेइ, पारणगदिवसे य सज्जहाए
लुक्खकुम्मासमुट्ठीए एगेण य सलिलचुलुगेणं जावेइ जाव छम्मासा, तस्स विउला तेउलेसा संपज्जइत्ति । इमं च
तद्विहाणं सम्ममवधारियं गोसालगेणं ।

अन्नया य सामी कुमारगामनयराओ सिद्धत्थपुरंमि संपट्टिओ, संपत्तो य पुच्चयणियतिलथंयपएसं, तओ पुच्छिओ गोसालगेण भयवं-सो तिलथंबो मन्ने न निफन्नो होजा?, भगवया भणियं-भहू! मा एवं उल्लेखेसु, निफन्नो चेव सो अमुगप्पएसे वट्ठइत्ति बुत्ते गोसालो भयवओ वयणमसहंतो गंतूण तस्स एगंते निहितस्स तिल-थंयस्स तिलसंगलियं हत्थेण फोडित्ता तिले पत्तेयं गणमाणो भणइ-नूणं सच्चजीवा एवं परिघट्टिऊण भुज्जो भुज्जो तत्थेव नियसरीगे उववज्जंतित्ति वाढं पउट्टपरिहारं नियइवायं च सम्मभवलंवेइ । अन्नया य सो तेउल्लेसासाहणत्थं भयवंतं विसुत्तूण गओ सावत्थि नयारिं, ठिओ कुंभकारसालाए, कयं छम्मासियसुगं तवक्कमं, सिद्धा तेउल्लेसा, विन्नासिया कूवतडट्टियाए दासीए सरीरदहणेणं, तओ जायनिच्छओ पसुइयमाणसो अणवरयकोऊल्लवलयणस-यण्हो गामागराईसु परिभमिउमारद्धो ।

अह अन्नया कयाई अट्टगनिमित्तसत्थपत्तट्ठा । पासजिणनाहसिस्सा सिट्ठिलियसद्धम्भवावारा ॥ १ ॥
कोऊहलेण गामागरेसु उस्सिखलं परिभमंता । गोसालगस्स मिलिया जाओ य परोणरुद्धावो ॥ २ ॥
सिट्ठं च तेहिं गोसालगस्स सनिमित्तसत्थलवमेत्तं । तेणावि सो वियंभइ जणस्स तीयाति साहित्तो ॥ ३ ॥
पयइइ चिय उड्डमसीलयं तस्स को तरइ कहिडं? पाउब्भूयाइसयस्स किं पुणो पावनिरयस्स? ॥ ४ ॥
भयवंपि तेण रहिओ हरिणको इव विडप्पपम्मुको । अब्भहियसस्सिरीओ विहरइ वसुहं विपयमोहो ॥ ५ ॥

इय निरुवमसंजमभूरिभारधरणेकधीरधवलस्स । वीरस्स भुवणगुरुणो चरिए तइलोकवित्थरिए ॥ ६ ॥
बहुउणत्थसत्थसालयगोसालयदुव्विणेयपडिवद्धो । वित्थरओ पत्थावो समत्थिओ छट्ठओ एस ॥ ७ ॥ जुम्मं ।

इति गोसालदुव्विणयपडिवद्धो छट्ठो पत्थावो सम्मत्तो ॥

॥ इति षष्ठः प्रस्तावः ॥

अथ सप्तमः प्रस्तावः

गोसालएण सहियस्स सामिणो संसिया उ उवसग्गा । एग्गणिणो उ एत्तो जह जाया ते तह कहेमि ॥ १ ॥
अह पलयपयंडानलाणुरुवधम्मज्झाणनिज्झोसियासुहसलोवेलो दाहोत्तिणजच्चकंचणच्छाएण पभापसरणे सधु-
ग्गमंतदिणयरनियराउलं दिसियक्कवालं कुणंतो सो महावीरजिणवरो कमेण विहरमाणो वेसालिं नयरिं संपत्तो,
तत्थ य अहिगयजिणभणियजीवाजीवाइनवपयत्थो विविहाभिग्गहग्गहणनिग्गहियाविरइभावो भवभयारद्धसुविशु-
द्धाणुव्वयाइसावग्गधम्मो सिद्धत्थनरवइवालमित्तो संखो नाम गणराया, सो य भयवंतं पच्चमिजाणिज्जण पराए
मत्तीए महया रिद्धिसमुदएण सक्कारेइ, अह कहवयदिणावसाणे सामी वाणियगामे पट्ठिओ, तस्स य अंतरा रंगं-
तंभंगुरतरंगा महाजलुप्पीलपूरियपुलिणा महिलाहियं व दुग्गेज्झमज्झा रणभूमिच्च कच्छवयमयरहिया गंडइया नाम

महानई, तं च सामी नावाए सयुत्तिन्नो समाणो वेलुयाणुल्लिणंसि सुल्लनिमित्तं धरिओ नाविगोहं, एत्थ य पत्थावे दिणद्धसमओ वट्ठइ, खरं तावति वेलुयं सूरस्स करपहकरा, तीए य संतप्पइ कमलक्कोमलं चलणतलं जिणस्स । इओ य तस्सेव संखस्स गणराइणो भाइणिज्जो चित्तो नाग दूयकज्जेण पंचतराइणो सगीवे गंतूण नावाकडएण पडिनियत्तो पेच्छइ य तहट्ठियं साभिं, तओ ते दुव्वयेणहिं बहु तज्जित्ता मोयावेइ, गहिगं च से करइ । अह—

सुसमाहियमणपसरो संरक्खंतो चराचरं लेयं । विविहपडिमाविससे पइदियहं चैव फासंतो ॥ १ ॥
कत्थइ निंदिज्जंतो उस्सिंखलखलजणेण कुविएणं । कत्थइ थुणिज्जमाणो नयंतसांमंततियसेहिं ॥ २ ॥
कत्थइ पागयजीवियविणासखमतिकखआवयकंतो । कत्थइ अणुकूलजणोहविहियपूथाभहागहिमो ॥ ३ ॥
उभयत्थवि धम्मतुलं व चित्तवित्तिं समं चिय धरंतो । विविहाउ भावणाओ भावित्तो भवइ वपुहाए ॥ ४ ॥

तस्स य भगवओ अणेगतवोविहाणनिरयस्स न मणांगं पि कं पिज्जइ मणो पढमुमिअभागसारसहयारमंजरी-
पुंजपरिमलमिलंतभमिरभमरभमरोलिरोलरमणीएण पल्लविछकंकिलिसरलसल्लईपसुहुदुमसंडेण कन्नाडचेडीनिडाल-
विलुलंतोलयचह्वरीचलणलंपडदाहिणानिलाडंबरिल्लेण पवरनेवत्थकुरंगनिज्जिज्जंतचचरीरवुदीरिउद्दामभयरद्धएण महु-
समएण १ न य पयंडमायंडमंडलुल्लसिपवलकिरणजालकरालियमुगंतरोलेण तणहमिभूयवप्पीहगजिवहघोरसर-
संछाइयावरसंहतरेण खरसमीरसमुद्धुदुहफरिससक्करुक्कमणदुग्गमण निदाहकालेण २ न य घोरघोसघणाघण-

गयघडाडोवडरियपथियसत्थेण विप्फुरंतविज्जुपुजुप्पिच्छपउत्थकामिणीहिययदारिणा पहिट्टनीलकंठकोलाहल्लेखेण पाउसकालेणं ३ न य विसट्टकंदोट्टकमलकल्हारपरागधूसरियरायहसेण परिपक्कसस्ससंपयाभिरामधरणीमंडलेण गहंद-
दाणगंधसरिच्छातुच्छसत्तच्छयपुप्फगुच्छुच्छलतामोयवासियदियंतरालेण सरयकालेण ४ न य फुल्लंतफलिणीमंजरीपुंज-
पिंजरियवणविभागेण पहिट्टपामारारद्धवणमलणुत्तालकंकेल्लिकलकलक्खिज्जमाणगामसंनिवसेण हेमंतरागेणे ५ न य
हिमतुसारसंभिलियसिसिरसभीरपकंपतपहियमुक्कसिक्कारकेउणा ठाणठाणपज्जालियग्गिट्टियपासपासुत्तपावासुयनिवहेण
परिफुट्टकुसुमट्टहासहसिरुज्जाणाभोगेण सिसिरसमएणंति ६ ।

इय धम्मज्झाणनिवेशगाढवक्खित्तचित्तपसरस्स । छप्पिवि उउणो पडुणो भीयच्च कुणंति न वियारं ॥ १ ॥

एवं च विहरमाणो वाणिज्यागमं नगरसुवागओ, ठिओ य तस्स वहियाविभागे काउसगणेणं । तत्थ य नयरे
आणंदो नाम सांवओ, सो य छट्ठेणं निरंतरेणं तवोविससेण आयावेह, तस्स य तवप्पभावेणं ओहिज्जाणं
समुप्पन्नं, तथणुभावेण य सो पडिमापडिवन्नं जयगुरुं दट्टूण अचंतभत्तिभरनिब्भरंगो गओ सायिसमीवं, जहा-
विहिं वंदित्ता भणिउमाढत्तो य-भयवं ! चिरमहियासिया दुस्सहपरीसहा तुमए, अहो तुम्ह वज्जसारसररत्तणं अहो
निप्पकंपत्तणं, पत्तं च इमस्स किलेसस्स तुम्हेहिं फलं, जओ कइययवरिसोहिं केवलणाणसुण्णजिहिति भणिऊण गओ
सगिहं । सामीवि तत्तो निक्खमिन्ता सावत्थीनयरीए विचित्तवक्कम्मसणाहं दसमवासारत्तं अइवाहिऊण नयरीय

वाहिमि कयपारणगो साणुलद्धियनाममि य गामे वच्चइ । तत्थ य भद्दं पडिमं ठाह, तहिं च अणसिओ पढमं पुद्वा-
भिमुहो एगपोगलणिसियदिट्ठी दिवसमसेसमच्छिज्जण रयणिमि दाहिणाभिमुहो ठाह, तओ अवरेण दिवसं उत्तरेण
रत्तिं, एवं छट्ठतवोकम्मेण इमं भद्दपडिमं सम्ममणुपालिज्जण सामी अपारिलं चेव महाभद्दं ठाह, तीए य पुद्वाए दिसाए,
अहोरत्तं, एवं चउसुवि दिसासु चत्तारि अहोरत्ताइं, पलंबियभुयपरिहो उस्सग्गेण ठाज्ज दसोणेण इमं समत्थेइ ।
पुणो अकयपारणगो सव्वओभद्दं पडिमसुवसंपज्जइ, एहिंएवि पुद्वाइयासु तमापज्जवसाणासु दससुवि दिसासु उस्सग्गेण
अच्छइ, नवरं उहुदिसाए जाइं उहुलोइयाणि दव्वाणि ताणि ज्ञायइ, अहोदिसाएवि हिट्ठिआणित्ति । एवं एयं वावीस-
इमेण पज्जंतमुवाणेइ । समत्थियासु य इमासु तिसुवि पडिमासु दढं परिसंतो भयवं, जाए य पारणगसमए पविट्ठो
आणंदगाहावइस्स गेहे, तवेलं च बहुलियाभिहाणाए दासीए भंडयाणि खणीकरंतीए दिट्ठो जयगुरू, अह तप्प-
एसं संपत्तस्स तइल्लोक्कादिवायरस्स वासियभत्तं पणामियमणाए, सामिणाऽवि असंभतेण जोग्गंति कलिज्जण पसा-
रियं सभावसोणिमासुभगं पाणिसंपुडं, परमसद्धाविसेससुद्धहंतीए दिन्नमेयाए, एत्थंतरे लुक्करतवचरणपज्जवसाणजाय-
जिणपारणयपहिट्ठहयहियएहिं सुरासुरकिन्नरनिवहेहिं पूरियंभवरतलं, सुक्का य पंचरायकुसुमसगूहसणाहा अद्धतेरस-
कोडिमेत्ता कणयवुट्ठी, ताडियाइं चउविहत्तूराइं, जाओ य जणान परितोसो, सा य बहुलिया दासी ज्हाविया
नरवइछत्तच्छायाए, अवणीयं से दासित्तणं ।

इय एत्थेव भवंमिवि विसिट्ठभत्तीए पत्तदाणेणं । पाविज्जइ धणरिद्धी समुदुरा किं पुणउणभववे ? ॥ १ ॥

एत्तोच्चिय रुंदोविहु भवन्नवो गोपयं व लीलाए । दुक्करतवविरहेणवि लंघिज्जइ पुन्नवंतेहिं ॥ २ ॥

लब्भइ तिलोयलच्छी लब्भइ सवंपि कामियं सोक्खं । एकं चिय नवि लब्भइ सुपत्तदाणं जयपहाणं ॥ ३ ॥

नाणपि तवोवि हवेज्ज निष्फलं कहवि दिव्वजोएणं । दिन्नं सुपत्तदाणं वभिचरइ न नूण कइयावि ॥ ४ ॥

इय जाणिऊण कल्लाणकोसकलणेक्कपच्चले दाणे । न करेज्जा नणु जत्तं को अत्तसुहं समीहंतो ? ॥ ५ ॥

अह जयगुरू तत्थ पारिएण बहिया विहरिउमारद्धो । अन्नया य गामाणुगामेण गओ बहुमेच्छजणसंकुलाए दढभूमीए, तत्थ य पेढालाभिहाणस्स गामस्स बहिया पेढालुज्जाणे पोलासचेइए अट्टयेणं तवोकम्मणेणं अपाणाएणं ईसिं ओणयकाओ अचित्तलुक्खपोगलनिवेशियानिमसन्नयणो गुत्तसव्विंदियगामो सुप्पनिहियगत्तो अहोपलंभिय-
मुयदंडो सुसिलिट्ठसंठवियनिचलचलणो दुरणुचरं कायरनरुद्धोसकरं एगराइयं महापडिममारभेइ । एत्थंतरे सोहम्माए सभाए नाणामणिरयणभासुरकिरणपज्जलंतमहंतसिंहासणमुहासीणो अणेगसुरसुरंगणाकोडाकोडिसंबुद्धो किरीडाइवराभरणपहाविच्छुरियदेहो पुरंदरो तथा पडिमापडिवन्नं जयनाहमोहिए पलोइऊण तक्खणविसुक्का-
सणो अचंतभत्तिभरनिब्भरंगो पुणरुत्तनिडालताडियमहीवद्धो पणमिऊण आणंदसंदोहसंदिरीए सम्भूयत्थगुणगणु-
ब्भासणसमत्थाए परमपवक्खवायंसुंदराए गिराए सुचिरं संशुणिऊण य निस्सामन्नं सामिणो असामन्नगुणपब्भारं हि-

ययमि धरिउमपारयंतोव शुणिउं पवत्तो-ओ मो तियसा ! एस भगवं महावीरो पंचसमिओ तिगुतो अऊहो अभाणो
अमाओ अलोओ अणासवो अममो अकिंचणो संखोव निरंगणो जच्चकंचणं व जावरुवो जीवोव अपणडिहयणमणो
गयणंपिव निरालंबणो समीरणोव अपणडिबद्धो सायरसलिलं व सुद्धहियओ पुक्खरपत्तं व निरुवलेवो कुम्भुव
सुगुत्तिदिओ खगविसाणं व एगो विहगोव विष्णुमुक्को भारुडपक्खिव अपमत्तो भंदरो इव निष्कंपो सागरो
इव गंभीरो चंदो इव सोमलेसो दिवायरोव दित्ततेओ कुंजरो इव सौंडिरो पंचाणणोव दुद्धरिसो वसभोव
जायथामो वसुंधरव सव्वासाविसहो घयमहुसित्तो हुयासणोव तेयसा जलंतोत्ति, तहा एयरुस भगवओ न कत्थइ
पडिबंधो समुप्पज्जइ, सो य चउव्विहो, तंजहा-दव्वओ खेत्तओ कालओ भावओ य, तत्थ दव्वओ गाया मे पिया मे
भाया मे सुहिसयणसंगंथसंथुया मे सच्चित्ताचित्तमीसाणि य दव्वणि मे, एवं न ममीकारो जाएजा, खेत्तओ य-
गामे वा नगरे वा रत्ने वा खेत्ते वा खेले वा घरे वा अन्नत्थ वा तहप्पगारे पडिबंधो न हविजा, कालओ य-
समए वा आवलियाए वा आणपाणए वा खणे वा सुहुत्ते वा दिवसाइए वा न ममत्तं जाएजा, भावओ य-कोहे
वा माणे वा मायाए वा लोभे वा पेजे वा दोसे वा कलहे वा अब्भक्खाणे वा पेसुवे वा परपरिवाए वा अरइ-
रइए वा मायामोसे वा मिच्छादंसणसल्ले वा न ममत्तं उप्पजेज्जत्ति । तहा एसो भगवं वासारत्तवज्जं अट्टगिम्ह-
मंतियमासेसु गामे एगराइए नगरे पंचराइए ववगयहाससोगभओ निरहंकारो निगंगओ वासीचंदणकप्पो समत-

णमणिलेहुंकंचणो समसुहदुवखो इहलोयपरलोयअण्डिवद्धो जीवियमरणेसु निरवकंखी पुवजियकस्मसंचनिग्घाय-
णट्ठाए अबुद्धिओ विहरइ । किं च—

एयं महाणुभावं नियधीरिमतुलियतिहुयणजणोहं । नो धम्मज्झाणाओ खमति संखोहिउं केइ ॥ १ ॥
देविंदा तियसा वा जक्खा रक्खा व खयरवग्गा वा । भूया महोरगा वा अणप्यमाहणजुत्तावि ॥ २ ॥
अवि चालिज्जइ मेरू पल्लत्थिज्जइ महीवि पायाले । ससिसूरविमाणानिवि बलिणा केणवि दलिज्जंति ॥ ३ ॥
अवि सोसिज्जंति महणणवावि बहुमीणमगरभीमावि । न य भगवं चालिज्जइ ज्ञाणाओ तिहुयणेणावि ॥ ४ ॥
इय सोचा जायपयंडकोवदट्ठोड्ढीमभिउड्डिमुहो । दोसाण संगमो इव संगमओ नाम गिवाणो ॥ ५ ॥
सुरवइसमाणविभवो तक्कालविसुक्कलज्जमज्जाओ । ववगयविवेयभावो सया अववो भणइ सकं ॥ ६ ॥
सामि ! किमेवं भण्ह निग्गुणमवि समणयं सुरसहाए । अहवा सच्छंदाविथ सोहंति प्हूण उल्लावा ॥ ७ ॥
सच्चं चिय सुविसुद्धा जइ होज्ज इमस्स कावि चंगिमया । गिहपालणं विमोचुं ता किं पासंड भंडेज्जा ? ॥ ८ ॥
गिहवासाओवि न धम्मकम्ममन्नं वयंति किर कुसला । कीवत्तेण चत्ते य तंमि किं संसणिज्जमिह ? ॥ ९ ॥
वागरियं जं च तए ज्ञाणाओ एस सुरवरोहिंवि । नो तीरइ चालेउं तंवि न वोचुं खमं तुज्झ ॥ १० ॥
जे लीलाए चिय पाणिपल्लवे संठवंति भूवीढं । गुरुसिहरभरकंतं गोलं व तुलंति मेरुंवि ॥ ११ ॥

वायामेत्तेणवि तिहुयणंपि कुविद्या खिंधति जमवयणे । निघडियगुणाण सुराण ताण कोवहउ समसीसिं ? ॥ १२ ॥
जइ सहहसि एयं ता अच्छउ खोभिएण किं इमिणा ? । अह नो ता पेच्छ जहा भग्गपइणणं नियत्तेमि ॥ १३ ॥
इय भणिए पुरंदरो विंचित्तेइ-अहो महापावपडलविलुत्तविवेओ सव्वहा एस, अओ जइ एत्थ पत्थावे निवा-
रिजइ ता निच्छियं इमं परिकप्पेज्जा-सुरवइसामत्थेण एस भगवं तवोकम्मभविचलचित्तो दुग्गइ, न उण सत्ति-
एत्ति परिभाविऊण ठिओ मोणेणं । संगययसुरोऽवि अत्तुच्छमच्छसुव्वहतो निवारिज्जमाणोऽवि नियपहाणपरियेण
केत्तियमेत्तो एस ? अज्जेव खोभेमि इमंति पइणणं काऊण नीहरिओ अत्थाणीमंडवाओ, गओ भगवओ समीयं, तओ
दंसणवसुप्पन्नगाढकोवेण विउविओ पलयकालोव पवलो धूलिनिवहो, तेण य चलणजुयलाओ आरब्भ जाव अ-
च्छीणि सवणा य ताव पच्छाइओ, सामी जाओ निरुस्सासो, नवरि तिलतुसत्तिभागमेचंपि न चलिओ झाणाओ,
अचलियचित्तं च नाऊण कओ अणेण कुलिसकढिणचंडतुंडभीसो पिवीलियासमूहो, सो य लद्धावयासो दुज्जणोव
जिणं विद्विउं पवत्तो, किंतु निब्भगजणमणोरहोव जाओ निफलो, तओ दुन्निवारो सूइतिसुसुहे उइसे पेसइ,
तेहिवि असोभिज्जमाणे भुयणवंधवे घइलाओ चंडमुहमंडलाओ निवत्तेइ, ताहिवि खज्जमाणसरीरे निणकं पे जयनाहे
निम्मिया पिंगलसरीरइणो अत्तुच्छपुच्छविसालिद्धकढिणकंदया विच्छुया, तेसुवि जहासत्तिकयणहारपडिहयसामत्थेसु
पसंरतमच्छरेणं विउविद्या दाढाकडप्पकराला नउला, तेहिंपि अभिभावियं भयवओ सरीरं, न उण ईसिंपि सत्तं,

अह सविसेसविद्यंभियकोवप्पसरेण तेण तियसेण । मुक्का फुरंतफणरयणभासुरा दुस्सहा भुयगा ॥ १ ॥
 चंदणतरुणोव तणू जिणस्स आवेढियं दढं तेहिं । अइतिकखदीहदंतगदसणतंडवियतुडेहिं ॥ २ ॥
 न मणागंपि विचलियं तिलोयनाहं पलोइउं तियसो । ताहे मूसगनिवहं निवत्तह दिव्वसत्तीए ॥ ३ ॥
 पुणरवि पयंडदोघट्टघट्टयं तक्खणं पयट्टइ । उल्लालियसुंडादंडभीसणं सेलुंगतणुं ॥ ४ ॥
 तेणवि विविहकयत्थणविसेससंपीडिएवि देहमि । धम्मज्झाणाउ जिणो न चालिओ वालभेत्तंपि ॥ ५ ॥
 एवं चिय करणीहिवि पिसायनिवहेहिं एवमेव जिणो । खोभेउं पारद्धो तेणं सुरकुलकलंकणं ॥ ६ ॥
 अचलंतंमि जिणिंदे करालदंतगविसिहभीमसुहो । सज्जिज्जइ सहूलो तेण लहुं जिणवरस्सुवरिं ॥ ७ ॥
 अइतिकखनक्खदाढाहिं पीडिउं सोवि जयगुरुं बाढं । विज्झाओ झत्ति पउससमयदुग्गयपइवोव्व ॥ ८ ॥
 इय खलियारणनिवहे पागयजणजीवियंतकरणखमे । पक्कएवि जिणं दट्ठुं सुनिचलं दूमिओ देवो ॥ ९ ॥
 तओ जहावट्ठियरूवं सिद्धत्थरायं तिसलादेविं च विउव्वइ, ताणि य कलुणाहं विलवंति, भणंति य-सुत्त ! किं
 तए दुक्करमिममारद्धं?, उज्झाहि पव्वज्जं आगंतूण परिपालेह अम्हे, तुह विरहे वच्छ ! असरणणि अत्ताणाणि य
 जायाणित्ति, एएणवि जा न सक्को खोभिउं ताव खंधावारं विउव्वइ, सो य परंतसु आवासिओ जिणस्स, तत्थ
 सूयारो पत्थरे अलभमाणो जिणचलणोवरि पिढरं ठविरुण हेट्ठा वज्जानलजालणेण रंधिउं पयत्तो, अह तक्कालसवि-

सेससमुच्छलियधम्मज्झाणजलुणीलकलोलविज्झाचिएव निष्फलत्तणं पाविए तंमि पक्कणं निम्मवेइ, सो य अणेगाइं सउणिपंजरगणि जयगुरुणो सवणे भुयदंडेसु खंधतलंमि जंघाजुयले य ओलंवेइ, तेहिंतो य नीहरिऊण पक्खिणो नहसिहाहिं तिकखग्गचंचुण्हारोहि य विद्वयंति जिणसरीरं, तहावि अबुभिए जयनाहे पइसययचट्टतकोवेणं उण्या-
इओ जुगखयसमएव सक्कसक्करकलुसो खरानिलो, तेणावि समहिंयं सामिस्स पज्जालिओ कम्मत्तणगहणम्मि ज्ञा-
णानलो, न उण चित्तसंखोभोत्ति, पच्छा कलंकलियावायं विरएइ, तेणवि चक्काविद्धोव सलिलवत्तनिवडिओव भा-
सिओ जिणो देहमेत्तेण, न उण चित्तासएणं ।

इय एवंविहतिवोवसग्गकरणेऽवि निच्चलं नाहं । अभोगिऊण चितइ संगमओ जायगुरुकोवो ॥ १ ॥
वज्जसरीरो एसो खलीकओऽविहु बहुप्पयोरहिं । नो तीरइ खोभेउं किं काउं जुज्जइ इयाणिं ? ॥ २ ॥
जइ एयमुज्झिऊणं सुरालयं जामि भग्गसपइन्नो । ता सुरवइपमुहेहिं आजीवमहं हसिज्जाभि ॥ ३ ॥
किंच-निययस्सवि हिययस्सा नत्थि एवं कयमि परितोसो । पारद्धवत्थुनिवाहणंमि पुरिसाण पुरिसययं ॥ ४ ॥
अहवा होउ विगोवण निहणं एयं नएमि कूडसुणिं । एयस्स विणासमी झाणंमि विणस्सिही नूणं ॥ ५ ॥
एवंपि य निव्वाहियगरुयपइण्णाभरो भविस्सामि । सुरवइपमुहाणमहं अहीलणिज्जो य तियसाणं ॥ ६ ॥
इय निच्छिऊण पज्जालियजलणजालाकलावसंचलियं । विज्जलयाउलयसमयमेहचंदं व दुणेच्छं ॥ ७ ॥

कालायस भारसहस्सकोडियडुब्भडं महाचकं । जंबुदीवरसुग्गयवयणपिहाणं व धेत्तूण ॥ ८ ॥
 उप्पइओ संगमओ दूरं गयणं गुणविमुक्को । थालकरो तइलोकं भोत्तुं छुहिओ कयंतोव ॥ ९ ॥
 तो तं सुमेरुत्तुन्नपणंयडमाहप्पपायडं चकं । सुक्कं सवससत्तीए तेण जयंबधुणो उवरिं ॥ १० ॥
 तेणावि जिणित्तणू तडत्ति संताडिया गुरुभेरेणं । आकरनहं निमग्गा महीए दढवज्जसंकुव ॥ ११ ॥
 तत्थवि छज्जीवहिं द्वायंतं जिणवरं सुणेऊणं । वेलक्खसुवगओ सो चित्तइ तियसाहओ एवं ॥ १२ ॥
 लल्लक्कवक्कपहओवि नेव पंचत्तमेइ जो एस । सो सत्थस्साविसओ ता संपइ किं करेमि अहं ? ॥ १३ ॥
 एवंविहोवसग्गा दिट्ठावि हरंति जीयमियराणं । किं पुण सरिरोयसुवागया दुस्सहा नूनं ? ॥ १४ ॥
 इइ विगणियऊण एग्गुणवीसइमोवसग्गपज्जेते जइ पुण अणुकूलाए खोभिज्जइत्ति जायविब्भमेण संगमएण
 विणिम्मियं नाणामणिकिरणं चिंचइयं पवरं विमाणं, तंमि समारूढो दिव्वाभरणपहाविच्छुरियसरीरो नियंसिय-
 विमलदुगुल्लो दिव्वं सामाणियदेविट्ठं दंसेमाणो महुरेहिं वयणेहिं भयवंतं भणिउं पवत्तो—भो महरिभि ! तुट्ठोहि
 तुह सत्तेण तवेण खमाए बलेणं पारद्धवत्थुनिवहणेणं जीवियनिरवेक्खत्तेणं पाणिगणरक्खणुज्जयभणेण य, ता अलाहि
 एत्तो तवकिलेसाणुभावणेणं, जइ भणसि ता पवरसुरमणीजणाभिरामं अगवरयपयट्ठविसट्ठनट्ठं विचित्तसत्तिजुत्ता-
 मरकीरमाणच्छरियं इमिणच्चिय सरिरेण तुमं नएमि तिवसालयं, अहवा उत्तरोत्तरभयपरंपरापरूढजराइदोस-

निवहरहिंयं एंगतियसुहसणाहं पणामेमि सिद्धिनिवासं, अहवा इहेव धरामंडले मंडलाहिवसहस्ससविणयाणुस-
रिज्जमाणसासणं पउरकरितुरयरहजोहकोससंभियमेगच्छत्तं संपाडेमि नरिंदत्तणं, वरेसु एएहिं किंपि जं भे रोयइ,
उज्झसु संखोहं परिच्चयसु कुवियणंति भणिएवि जाव भयवं पलंविद्यमुओ एगगचित्तो धम्मज्झाणपड्विन्नो न
किंचि जंपइ ताव संगमएण अलद्धपड्वियेण चिंतियं, जहा-दुविलंघं मयरद्धयरायसासणं, महासुणीणवि कुणइ
चित्तसंखोहं, ता तस्स सवस्सभूयाओ पेसेमि दिव्वाकामिणीओ, जइ पुण ताहिं हीरिज्जा एयरस मणंति कलिऊण
कओ समकालं सव्वेसिं उऊण समवाओ, तप्पभाविण य फुल्लिया सहयारा पल्लविया कंकिल्लिणो जायं दुहिणं
पयट्ठो मलयमारुओ उच्छलिओ परहूयारावो मउरिया नीवा पणच्चिया वरहिणो वियंभिओ य कयलपरिमलो
जायाइ कासकुसुमपंडुराइं दिसिसुहाइं, मुक्का भगवओ पेरेतेसु दसद्धवन्ना कुसुमवट्ठी, तयणंतरं च विसज्जि-
याओ विविहसरमंडलपहाणेयकुसलाओ करणप्पवंचमणहरद्विविहिवियक्खणाओ वीणावेणुप्पमुहाउज्जसंजुयाओ
पवरालंकारधारिणीओ तियसविलासिणीओ, संपत्ताओ य जयगुरुसमीवं, सविलासं वियंभिउं पवत्ताओ य,
कहं चिय ?—

उब्भडसिंगारसनादेहलायन्नजलपवाहेण । सरियव्व वणाभोगं लीलाए पूरयंतीओ ॥ १ ॥

पम्हलविसालदीहरतरलच्छिच्छोहचक्खालेणं । दिसिदिसिविसट्टकंदोट्टपयरसकं कुणंतीओ ॥ २ ॥

काओवि कुणति नमंतसीसनिवडंतकुसुमदामाओ । जिणसंगमसोकुक्खिरीउ बाढं पयावणइं ॥ ३ ॥
 काओऽविहु गलियंसुयसंजमणमिसेण पायडिंति पुरो । जयगुरुणो पीवरकणयकलसपरिरेहिणं सिहिणं ॥ ४ ॥
 मिच्छच्चिय कारुणियत्तणं तुमं उव्वेसि हे सुहय ! । मयणसरज्जरंगं पि जं न रक्खेसि जुवइज्जणं ॥ ५ ॥
 मुंच कढिणत्तणं देहि नाह ! पडिवयणमम्ह दुहियाणं । पेम्मपरायत्तमणं सप्पुरिसा नावहीरंति ॥ ६ ॥
 तुह दंसणमेत्तेणवि दसमदसं पाविउच्च एस जणो । एत्तोऽवि मा उव्वेहसु एवं तज्जति काओऽवि ॥ ७ ॥
 इय सविलासं सुरकामिणीहिं पायडियवहुवियाराहिं । न मणागं पि विचलियं चित्तं ज्ञाणाओ जगगुरुणो ॥ ८ ॥
 अह उगगंयमि मूरं अखुभियहियं पलोइउं नाहं । संगमओ हयसत्ती चित्तिउभेवं समाढत्तो ॥ ९ ॥
 अणुकुलुवसगेहिवि न चलइ एसो मुणी महासत्तो । ता किं एत्तो मोत्तुं एयं वच्चामि सुरलोए ? ॥ १० ॥
 अहवा न जुज्जइ इमं काउं मे दीहरेण कालेण । उवसग्गियस्स जइ पुण इमस्स चित्तं पकं पेज्जा ॥ ११ ॥
 इय कलुसासयगोयगएण तइलोककंधुणो धणियं । उवसगं गाभेविहू विहरं परिचत्तमत्तस्स ॥ १२ ॥
 बालुयपंथ सुभूमे सुछेत्त मलयंमि हत्थिसीसंमि । ओसलिमोसलितोसलिपमुहेसुं संनिवेसेसुं ॥ १३ ॥
 ते केवि तेण तियसाहेभेण विहरंतयस्स उवसग्गा । विहिया अइहुविसहा जे कहिउं पि हु न तीरंति ॥ १४ ॥
 एएणं चिय ते कारणेण चरिए न एत्थ वित्थरिया । सिद्धं ताओ कुसलेहिं किंतु सयमेव नायच्चा ॥ १५ ॥

एवं तदुवसगवग्नावि अविचलचित्तो गामार्दणं बहिया बहुकालं गमिऊण सामी छम्मासियं पारणयं काउ कामो
समागओ वयगागे गोउलंमि, तत्थ य तद्विसं ऊसवविसेसो, सवत्थ पायसं उवक्खडिज्जइ, तिहुयणेऊनाहोऽवि अण-
वरयमुवसगवग्गं कुणमाणस्स संगमयामरस्स जाया छम्मासा नेव उवसग्गेइ संपयं, जइ पुण परिसंसतो सट्ठणं
गओ होज्जा, इय विगण्णिऊण पविट्ठो भिक्खानिमित्तं, संगमएणवि तत्थ पत्थावे जहिं जहिं गिहे भयवं वच्चइ
तहिं तहिं तहिं समारंभिया अणेसणा, सामिणाऽवि पउत्तो ओही, सुणिओ य एसो, तयणंतरमद्धहिं डिओ चेव
नियत्तिऊण ठिओ पडिमाए, संगमएणावि आभोइओ भयवं,—किं भग्गपरिणामो नयत्ति?, जाव पेच्छइ ताव छजीव-
हियमेव परिचित्तित्तं जिणवरं, ताहे संखुद्धो चित्तेइ—जो छहिं मासेहिं भूरिपयारोवसग्गेहिं अणवरयं कीरमाणे-
हिवि न चलिओ सो दीहेणावि कालेण न सक्को चालिउं, निरत्थओ मज्झ उवक्कमो, दीहकालं चुक्कोऽहिं सुर-
विलासाणं, अहो नियसामत्थमचित्तिऊण कहं मए अण्णा विनडिओ? । इय बहुप्पयारोहिं नियचित्थियं दूभिऊण
निवडिओ भगवओ चलणेसु, भणिउमाढत्तो य—भयवं! भग्गपइन्नोऽहं, तुम्हे पुण समत्तपइन्ना, अवितहं भणियं
महाणुभावोण समागएण सुरवइणा, केवलं दुहु कयं मए जं न तइया सहहियं ।

अलमेत्तो भणिएणं खमेसु मे पुवदुक्कडं कम्मं । उवसंतोऽहं संपइ तुह उवसग्गं न काहामि ॥ १ ॥
ता वच्चसु निस्सकं गामागरपसुहविचिहटाणेसु । पविससु भिक्खनिमित्तं किलिस्ससे किं खुहाभिहओ? ॥ २ ॥

एत्थंतरंमि भणियं जिणेण संगमय ! सुंच मम तत्ति । पत्थावे चिय अम्हे सकज्जकरियासु वट्टेमो ॥ ३ ॥
 इय सोउं जिणनाहं पणमिय परमायेरेण संगमओ । अइपावभरंक्तोवि पट्ठिओ सुरपुराभिमुहं ॥ ४ ॥
 इओ य-सोहम्मे देवलोए तंकाळं सव्वे देवा देवीओ य उव्विग्गा निराणंदा निरुच्छाहा अञ्छंति, सकोऽविय
 मुक्कविलेवणालंकारो समुद्धियपेच्छणयाइविलासो परिचितेइ—अहो एत्तियमेत्तस्स भगवओ अणत्थसत्थस्स अहं
 मूलकारणं जाओ, जओ मम पंसंसाकुविण्ण इमिणा सुराहमेण इमं महापावं ववसियंति, एत्थंतरे सयलतइलोयजी-
 वरासिविणासजणियपावपंकविलित्तोच्च नीसेसावजसंपसुपडलविलुत्तगत्तोच्च अकछाणावलीकलिओच्च पणहुमुच्चंकिंति-
 पब्भारो पडिभग्गपइन्नाविसेसुम्मिलंतलज्जाभरसंकुचियलोयणो संपत्तो सोहम्मसभाए संगमयाहमो । तं च दट्ठेण
 पुरंदरो ठिओ परंमुहो, भणिउमारद्धो य—

भो भो सुरा ! निसामह मम वयणं एस संगमयदेवो । चंडालो इव तुम्हं दट्ठेपि न जुज्जइ कयावि ॥ १ ॥
 एएण पावमइणा चिरमवरद्धं निराणुक्पेण । जं अम्ह पूयणिज्जो कयत्थिओ तिहुयणेक्कपहू ॥ २ ॥
 जइ ताव इमस्स नत्थि पडिब्भयं भीसगुरुभवाहितो । ता किं ममवि न भीओ ववसंतो ददमकज्जमिभं ? ॥ ३ ॥
 जह जयगुरुणा निच्चलसाभाइयगुरुभरो समुक्खित्तो । तह किं मएवि जं एस मज्झ संकपि नो कुणइ ? ॥ ४ ॥
 एएण जिणिंदवमाणेण जणिओ पयंडपावभरो । तुम्हे पुण इत्थ डिया पाविहिह इमस्स संगेण ॥ ५ ॥

किमहमिमं निगहिउं सक्रो नवोवसग्गकालमि ? । किंतु मुणिस्सइ एसो हरिस्स निस्साए तवइ जिणो ॥ ६ ॥
पज्जत्तं एत्तो जंपिएण निविसयमाणवेह इमं । वरि सुन्न चिय साला मा भरिया चोरवग्गेण ॥ ७ ॥
इय सुरनाहेण सरोसभासिणा चलणकोडिणा विवसो । निच्छूढो संगमज्जो एवागी सुरपुरीहिंतो ॥ ८ ॥

एवंविहं च माणमलणं पेच्छिऊण चिंतियं संगमएण—अहो एयाइ ताइं असमिविस्वकयाइं पायडीहवन्ति संगइ
दुविलसियाइं, इय झूरिऊण सो जाणएण विमाणेण पट्टिओ गंदिराभिमुहं, तओ अक्कोसिज्जयाणो युरविलयाहिं
हीलिज्जमाणो नियपरिवारेण पेच्छिज्जमाणो सकमुहडेहिं उवेहिज्जमाणो सामाणियदेवेहिं नीहरिऊण सुरपुरीओ
ठिओ मंदरचूलियाए, तस्स य सागरोवमं सेसमाउयंति । इओ य—से अग्गमहिमीहिं विन्नविओ पुंदरो—जइ साणि !
तुम्ह आएसो हवइ ता अम्हे पियमणसरासो, तओ विसज्जियाओ य इंदेण, सेसो पुण परिवारो पडिसिद्धोति ।

इओ य—भयवं वद्धमाणसामी जायंमि निरुवसग्गे तत्थेव गामे वीयदिवसे पविट्ठो गोयरचरियाए, हिंडंतो य
समागज्जो वच्छवाल्थेरीगिहे, तओ तीए भत्तिभरनिस्सरतपयडपुलयपडलाए वासियपायसमेत्तेण पडिलमिओ
छमासस्स निरसनो भयवं । एत्थंतरे चिरकालजायजिणपारणगंदसणपरितुट्ठेहिं अहासच्चिहियसुरनिवहेहिं पइयाइं
तूराइं सुक्का कणगवुट्ठी परिखित्तो कुमुमनियरो वरिसियं गंधोदयं अहो दाणमहो दाणंति उग्घोसणा कया, तत्थेव
ताव जाया अदरिदा थेरी । अह सामी निववियसरीरो गजो आलभियाभिहाणं नयरीं, तत्थवि पडिमापडिवन्नस्स

भक्तिनिम्भरो हरीनाम विज्जुकुमारिंदो तिपयाहिणापुव्वगं निवडिऊण चळणेसु संथवं काउं पवत्तो । कहं ?—

जय निजियहुज्जयकुसुमबाण !, अविणस्सरपाविग्रहनिहाण ! ।

उवसग्गवेरसमरेक्कधीर !, तुह सच्चं नाउँ जिणिंद वीर ! ॥ १ ॥

संसारजलहिनिवडंतसत्त !, पइं एक्किं रक्खियवहुहुत्त ।

तुह सुमरणमित्तेवि पावरासि, नासइ तिमिरं पिव रविपयासि ॥ २ ॥

तुह दंसणमेत्तेऽवि जे न बुद्ध, ते तियखदुक्खलक्खेहिं रुद्ध ।

तुह चलणकमलमुद्दं कियस्स, भद्दाइं होंति धरणीयलस्स ॥ ३ ॥

स कयत्थ जाय हरिहरिणपसुह, भुवणेसर ! ते तेरिच्छनिवह ।

गिरिकंदरपडिमासंपवन्न, तुहं दिहु जेहिं जिण ! कणयवन्न ॥ ४ ॥

तावच्चिय घोरभवाडवीए, निवडंति जीवा दुहसंकडाए । जावऽज्जवि तुम्ह पयारविंद—सेवं कुणंति नो जिणवरिंद ! ॥ ५ ॥

हिमवंतपसुहकुलपव्वएसु, खीरोगहिवेइरसायलेसु । गायंति किंतिं तुह भुवणनाह !, किन्नरसमूह दइयासणाह ॥ ६ ॥

तुह एक्कह कह वित्थार पत्त, नीसेसकहंतर जणिहिं चत्त । उइयंमि अहव रविमंडलंमि, खज्जोय न सोहइं नहयलंमि ॥ ७ ॥

इय विज्जुकुमारिंदो थोउं कहिउं च केवलुपत्ती । पच्चासन्नं पच्छा नियमवणं अइगओ नमिउं ॥ ८ ॥

सामीवि सेधयियानयसुवगओ, तत्थवि हरिस्सहो नाम भवणाहिबई देवो एइ वंदइ य पियं च पुच्छइ, जहा-
भयं ! नित्थिन्ना बहूवसग्गा, थेधमियाणिं सोढवं, केवलनाणं च लहुं उण्णजिहिच्चि भणिज्जग जहागयं पडिनियत्तो ।
तिहुयणपहूवि तत्तो विहरिज्जण सावत्थीए नयरीए परिसरे पलंविमयुदंडो ठिओ काउस्सगणं, तस्मि य दिणे
लोगो सिंगारियसरीरो गहियसुरहिक्कुसुमदामो विविहविलेवणभरियकचौल्यसणाहो खंदपडिमाए पूयणत्थं भयवंतं
अइक्कमिज्जण गंतुं पयट्ठो । सा य खंदपडिमा तव्वेण्हविया विलित्ता य जावडज्जवि न समारोविज्जइ रहवरे ताव
कहं महावीरो विहरइत्ति परिज्ञाणनिमित्तं पउत्तो ओही सुराहिवेण, दिट्ठो सो पुरज्जणो भयवंतं मोत्तूण खंदप-
डिमाए पूयामहिमं कुणमाणो, तथगंतरं ओयरिओ सुरलोयओ, अणुपविट्ठो य खंदपडिमं, ताहे पुरंदराहिट्ठिया
चलिया भयवओडभिमुहं खंदपडिमा, तं च सयमेव चलंति दट्ठूण तुट्ठो लोगो-अहो देवो ! सयमेव रहं आरुहइत्ति,
खंदपडिमावि रहं मोत्तूण गया भगवओ समीवं, त्रिपयाहिणदाणपुच्चयं च पडिया पाएसु, भूमितलनिविट्ठा य
पज्जुवासिउमारद्धा, लोगाडवि तहाविहमच्छरियं पेच्छिज्जण विम्बिया चिंतंति-अहो वंदियवंदणिज्जो एस कोइ
महण्णा निप्पडिमण्यभावसंगओ य ता सव्वहा न जुत्तमायरियमहेहिं जं इममइक्कमिज्जण गयत्ति अत्ताणं निंदंतेहिं
सामिणो कया सव्वायेरेण महिमा, अह जाए पत्थावे जयगुरू तओ पएसओ निक्खमिज्जण गओ कोसंबिं नयरिं,
तत्थ य उस्सग्गमुवगयस्स जयगुरूणो जोइसच्चक्काहिबइणो सूरससहरा सविमाणा वंदणत्थं ओयरिया वसुंधरापीढं,

गाढविम्बधक्खित्तनरनियरपलोइज्जमाणा य त्तिपयाहिणापुव्वयं पणमिऊण तइलोकैक्कलमल्लं जयवंधवं, निसान्ना जहो-
 इयट्ठाणेसु, पुच्छिया सुहविहारवत्ता, खणभेकं च ते जिणरूवदंसणसुहसणुहविऊण जहागयं पडिनियत्ता ।
 अह जयनाहो गाभाणुगामयं विहरिऊण भूवीढं । वाणारसीए पत्तो तत्थ य महिओ सुरिंदेण ॥ १ ॥
 पुणरवि रायगिहंमि य फुरंतमणिरयणमंडियसिरेण । ईसाणतियसवइणा थुयमहिओ पुच्छिओ य पियं ॥ २ ॥
 महिलानथरीएवि हु पत्थिवजणेण परमभत्तीए । धरणिंदेण य नागाहिवेण हिट्टेण पणिवइओ ॥ ३ ॥
 गामागराइसु चिरं विहरिय पत्तंमि वरिसयालंमि । एक्कारसमे सामी वेसालीए पुरीए गओ ॥ ४ ॥
 तसपाणवीयरहिए धीपसुपंडगविवज्जिए ठाणे । चाउम्मासियखमणं पडिवज्जित्ता ठिओ पडिमं ॥ ५ ॥
 भूयाणंदो य तहिं मुयगवई भगवओ भवमएण । भत्तिभरनिम्भरंगो पूयामहिमं पयट्टेइ ॥ ६ ॥
 अह तत्थेव पुरीए सावगधम्मंमि बद्धपडिबंधो । दक्खिन्नदयापसमाइपवरगुणरयणरयणनिही ॥ ७ ॥
 नामेण जुन्नसेट्ठी सुसावगो वसइ विसुयजसोहो । अन्नो मिच्छादिट्ठी अहिणवसेट्ठित्ति नामेण ॥ ८ ॥
 एगम्मि वासरंमी कज्जवसा नयरि बाहि नीहरिओ । सो जुन्नसेट्ठी सहो परमवियट्ठो गुणट्ठो य ॥ ९ ॥
 पेच्छइ कंचणसच्छहसरीरकरपसरभरियनहविवरं । नीसेसलक्खणधरं उस्सग्गठियं महावीरं ॥ १० ॥
 तं पेच्छिऊण निच्छउमजायसव्वणुनिच्छओ सहसा । हरिसुच्छलंतरोमंचकंचुओ वंदिउं सामिं ॥ ११ ॥

सो चिंतितं पवत्तो भिक्खाकालेऽवि नीइ जन्न पहू । पडिमोवगओ चिट्ठइ तं अज्जुववासिओ गन्ने ॥ १२ ॥
जइ कळामि य कल्लाणवळिकंदो करिज्ज पारणयं । एसो भयवं मह मंदिरंमि ता सुंदरं होइ ॥ १३ ॥
इय चिंतितो पइवासरंमि सो पज्जुवासए सामि । ता जाव चउम्मासक्खमणं पजंतयणुपत्तं ॥ १४ ॥
तो बीयवासरे आगयंमि मुणिऊण पारणगसमयं । सामि निमतइत्ता लुरियं गेहं गओ सट्ठो ॥ १५ ॥
पगुणीकयाइं तेण य सनिमित्तं पुव्वालसिद्धाइं । फालुयएसणियाइं भत्तीए पवरमोजाइं ॥ १६ ॥
एयाइं अज्ज जयंबंधवस्स दाहामऽहंति कथबुद्धी । अणिमिसवियसियनयणो जयगुल्लगं पलेयंतो ॥ १७ ॥
यन्नो कथपुन्नोऽहं सुलद्धनरजम्मजीवियफलो य । होहामि अज्ज नूनं तिहुअणपहुणो पयाणेण ॥ १८ ॥
चिरभवपरंपरज्जियनिविडासुहकम्मनिगडजडिअस्स । संपज्जइ जइ परमजमेव भोक्खो धुवं मज्झ ॥ १९ ॥
इय चिंतितो सुविसुज्झमाणलेसो स जायए जाव । ताव पविट्ठो सामिय अहिणवसेट्ठिस्स गेहंमि ॥ २० ॥
अचंतविभववित्थरदप्पगवेण सेट्ठिणा तेण । भणिया दासी भइ ! समणं दाउं विसज्जेहि ॥ २१ ॥
तीएविहु तद्वयणाणुरोहओ चट्ठएण कुम्मासा । उवणीया दाणत्थं पहुणावि पसारिओ पाणी ॥ २२ ॥
खित्ता य तीए तयणंतरं च देवेहिं दुंदुही पहया । परिसुक्का वसुहारा चेलुक्खेवो कओ इत्ति ॥ २३ ॥
शुट्टं च अहोदाणं महया सहेण पंचवन्नाणं । बुद्धी विहिया लुसुमाण सुरहिगंधुडुराणं च ॥ २४ ॥

मिलिओ य नयरलोगो रायाविय विम्हिओ गिहं पत्तो । वित्तंतमिमं पुट्टो य तेहिं सेट्टी पहिट्ठेहिं ॥ २५ ॥
 तेणावि कवडसीलत्तणेण काउं बहुं फडाडोवं । सिट्ठं जहा महण्णा एसो परमन्नपाणेहिं ॥ २६ ॥
 सयमेव मए पाराविओत्ति अंचंतभत्तिज्जेत्तेण । एत्तो चिय तियसेहिं धुट्टमहो दाणमेयंति ॥ २७ ॥
 सोचा एवं लोगो रायाविय गाढहरिसपडिहत्थो । तग्गुणगहणं काउं जहागयं पडिनियत्तोत्ति ॥ २८ ॥
 सो पुण पुराणसेट्टी अंचंतविसुज्झमाणसुहभावो । दुंदुहिसहं सोचा झडत्ति सोगाउलसरीरो ॥ २९ ॥
 पडिचिंत्तिउं पवत्तो हाहाउहं मंदभग्गजणजणो । जणिओ विहिणा नूणं जस्स घरं लंघिउं नाहो ॥ ३० ॥
 अन्नत्थ पारिओ अज्ज सायरं उवनिमंतिओऽवि मए । अहवा निप्पुन्नाणं न घरे चिंतामणी एइ ॥ ३१ ॥ जुम्मं ।
 अह भयवं पारित्ता गामागरसुंदरं धरावीढं । विहरइ हरियतमभरो सूर्रो इव भव्वकमलाण ॥ ३२ ॥
 अन्नंमि य पत्थावे समोसढो तत्थ पासजिणसिस्सो । सूर्री केवलनाणप्पईवपायडियपरसत्थो ॥ ३३ ॥
 नाउं समोसढं तं नयरिजणो नरवई य हिट्ठमणो । वंदणवडियाएँ लहुं समागओ तस्स पासमि ॥ ३४ ॥
 वंदित्ता भत्तीए उचियट्ठाणंमि सन्निसन्नो य । सुचिरं धम्मं सोउं पुच्छिउमेवं समाढत्तो ॥ ३५ ॥
 भयवं ! एत्थ पुरीए अणेगजणसंकुलाए को धन्नो ? । लहुईकयंससारो य ? कहसु अइकोउगं मज्झ ॥ ३६ ॥
 तो केवल्लिणा भणियं अइधन्नो एत्थ जुन्नसेट्ठित्ति । रत्ता वुत्तं किं नणु सामी पाराविओ तेण ? ॥ ३७ ॥

किं वा अद्धत्तेरसुवन्नकोडिण्यमाणवसुहारा । तम्मंदिरंमि पडिया ? अद्धन्नो जेण सो जाओ ॥ ३८ ॥
तो केवल्लिणा भणियं भावेणं तेण तिहुयणेक्कपहू । पाराविओ चिय तथा दाणत्थं कययत्तेण ॥ ३९ ॥
वसुहाराविहु परमत्थओ परं तस्स मंदिरं पडिया । जं सग्गमोकखसोकखाण मायणं सो इह जाओ ॥ ४० ॥

किंच-जइ खणमेत्तं नो दुट्ठहीएँ सइं तथा सुणितो सो । खवगस्सेणिं आरुहिय केवलं ता लहु लहतो ॥ ४१ ॥
यत्तपहाणत्तणओ कणगं मोत्तण तेण उ न अन्नं । भाववियलत्तणेण फलमाहिणयसेट्ठिणा लद्धं ॥ ४२ ॥
इय भो देवाणुपिया ! चरणं दाणं च देवपूया य । कासकुसुमं व विहलं सवं चिय भावपरिहीणं ॥ ४३ ॥
एवं केवल्लिणा पन्नत्ते जहागयं गओ सभाजणोत्ति । अलं वित्थरेणं, पत्थुयं मन्नइ-सो महावीरजिणो कमेण
विहरमाणो गओ सुसुमारपुरं, तत्थ य असोगसंडंमि उज्जाणे असोगपावयस्स हेट्ठओ पुढविसिलपट्टए कयअट्टम-
भत्तस्स एगराइयं पडिमं पडिवन्नस्स एगपुग्गलनिवेशिया निमसनयणस्स ईसिपन्भारगयदेहस्स भयवओ चमरो
नाम असुरिंदो पुरंदरभयविहुरो संखसीणुण्णलोकसोहियं महागउव कसजुयलसरोवरतरुल्लीणो, अह को एस च-
मरो ? कइं पुरंदराहितो भयं ? को वा पुबभवे आसित्ति ?, निसामेह

अत्थि गइंदकुलकवल्लिज्जंतमहल्लसल्लईपल्लवो नियसिहरतुंगिमाखलियरिहरपयारो पवरकाणणाभोगभूसियदिसि-
निवहो विज्झो नाम गिरिवरो, तस्स पायमूलं विभेलो नाम संनिवेशो, तंमि य दयादक्खिन्नसव्वसोयाइगुणोवेवओ

अपरिमितद्वसंचओ पूरणो नाम गाहावई परिवसइ, सो य सम्मओ सयणवगस्स वल्लहो नरिंदस्स चक्खुभूओ पयइवगस्स हिययनिविसेसो धम्मियलयस्स उभयलयोयिरुद्धेणं ववहारेणं कालं वोलेइ । अन्नया य पंच्छिभरयणी- समयमि सुहसिजागयस्स निहाविगसुम्मिद्धमाणनयणनलिनस्स जाया से चिंता, जहा—

पुव्वभवे नूण मए दाणं दिन्नं तवं च आयरियं । तस्स पभावणेसा मणवंछियक्कज्जनिप्फत्ती ॥ १ ॥

तहाहि—नरवइसम्माणेणं धणेण कोसविभवेण । पुत्ताइपरियणेण य पइदियहमहं पवहुमि ॥ २ ॥

पडिक्खुलोचि हु लोगो दंसणमेत्तेऽवि होइ अणुकूलो । अनिवारियपसराविहु निवडंति न आवया मज्झ ॥ ३ ॥

ता जावऽज्जवि पुव्वज्जियस्स कम्मस्स कुसलरूपस्स । विज्जइ थेवोऽवि लवो जावऽज्जवि उज्जमो अत्थि ॥ ४ ॥

जाव जणे सम्माणो जाव य रोगादओ न दूमिति । जाव न विहडइ सरयब्भविब्भमा निच्छियं लच्छी ॥ ५ ॥

जाव न जज्जरइ जरा जाव न जायइ पिएण सह विरहो । आणानिंदसम्मि य जावज्जवि वट्टइ कुडुवं ॥ ६ ॥

ताव पुणोचि हु धम्मं परभवसुहसाहगं उवचिणेमि । नहु कारणविरहेणं कज्जं उप्पज्जति कयावि ॥ ७ ॥

धम्मपभावो एसो जं किर साहारणेऽवि मणुयत्ते । एगे करेति रज्जं अन्ने ते चेव सेवंति ॥ ८ ॥

तम्हा सूरम्मि ससुगयंमि भुंजाविउं सयणवगं । ठविउं च गिहे पुत्तं तावसदिकखं पवज्जामि ॥ ९ ॥

इय चिंतियंतस्स उगगओ दिवायरो, तओ निमंतिओ सयणवग्गो काराविओ परमविच्छुड्ढेणं भोग्यं संभणिओ

तंबोलाइदाणेण, जोडियकरसंपुडेण भणियमणेण-भो भो सयणा ! निमुणह मह वयणं, एसोऽहं विरत्तो विसयाणं पडिनियत्तो गेहवावाराणं पणट्टसिणेहो पियपणइणीपुत्तमित्तपमुहपरियणे, अओ अनुमन्नह मं दाणिं दाणाभाए पव्वजाए पज्जमणुगिणिहं, चिरं एत्थ दुत्थेण य मए जन्न भे सम्मं वट्ठियं तमियाणिं खमणिजं, जहा य ममोवरि पुवं पवख-वायमुव्वहंता एवं मम पुत्तस्स संपयं वहेज्जह, इह सप्पणयं भणिरुण ठविओ नियपए पुत्तो, समणियो से गेहपरियरो, साहियाइं निहाणाइं भलाविओ सयणजणो, अन्नपि कयं तक्कालोचियं कायव्वं । अह सोहणतिहिमुत्तरे निसव गेहवासं परिचइरुण चउप्पुडं दाकमयं भायणं गहाय दाणाभाए पव्वजाए पव्वइओ पूरणो । तं चैव दिवसवारज्जं छंडुल्लुणं अणि-विस्सेत्तणं तवोविसेसणं आयावणाभूमीगओ अत्ताणं सोसेइ । पारणवदिवसे य तं चउप्पुडं भायणं गहाय उच्चापए सु-गेहेसु मज्झादिणसमए भिक्खं परिभमित्ता जं पढमपुडए पडइ तं पहियाणं अणाहाणं च देइ, जं दोये तं कागसुणग-पमुहाणं, जं च तच्चे तं मच्छमगराईणं जलचरजीवाणं पणामेइ, जं च चउत्थपुडए पडइ तं अण्णणा अरत्तहुओ आहारइ ।

एवंविहुक्करतवविहाणनिरयस्स निच्चमवि तस्स । न तहा पावविणासो जायइ सन्नाणहीणस्स ॥ १ ॥

जह श्रैवतवेऽवि जिणिंदमगमणुलगयस्स साहुस्स । कालायसंपि अहवा रसाणुविद्धं हवइ हेमं ॥ २ ॥

अह तेण दुरणुचरेण बालतेवेण अब्भाहओ सो पूरणो लुक्खो अट्ठिचम्ममेत्तगतो चित्तेइ-धीणोऽहभियाणिं, ता-जावऽज्जवि अत्थि किंपि पुरिसक्कारपरक्कमविसेसो ताव सयमेव तहाविहभूविभागे गंतूण अणसणं करेमिति विथा-

विज्जण चउण्डयपमुहउवगरणमेगंते परिचइऊण विभेलगसन्निसेसस्य ईसाणदिसिविभागे गंतूण भत्तं पंचकख्वाइ ॥
 एत्थंतरे चमरंचचा रायहाणी अणिंदा यावि होत्था, सोऽवि पूरणो बालतवस्सी बहुपडिपुन्नाइं दुवालस वासाइं
 परियायं पाउणिता मासियाए संलेहणाए अप्पाणं झोसिऊणं मओ समानो तीए चमरंचचाए रायहाणीए चमरिंद-
 ताए उववन्नो, तयणंतरं पंचविहाए पज्जत्तीए पज्जत्तिभावं गओ समानो विविहमणिरयणनियराकिरणविच्छुरियाइं विध-
 सियसरसकुसुमपयरपरिरेहिराइं सविलासधावंतसुरकामिणीललियकरयलुत्तालचालियचामराइं नियमवणंतराइं इओ
 तओ आमोएमाणो वीससाए जाव उहुं पलोयइ ताव पेच्छइ सोहम्मदेवलोए सयलदेवरिद्धिसंभारसुंदरिल्ले गहमंहतध-
 णसारसंवलयक्कालागरुवहलधूमपडलिल्ले दुवारदेसनियेसियवियसियसहसपत्तिपिहाणपुन्नकलसे निम्मलमणिभित्तिओ-
 ण्हापणासियसंतमसे रणिरकणयकिंकिणीजालाउलउण्णंतधयवडाडोए ठाण्हाणपलंबंतमुक्कमुत्ताहलकलावे विधि-
 हमणिरयणविणिम्मवियवरवेइयावेढियेपरंतविभागे सोहम्मवडिसयविभागे सोहम्माए सभाए संक्कसि सीहासणंसि
 निसन्नं चउरासीए सामाणियसहस्सेहिं अन्नाहि य अणेगाहिं देवकोडाकोडीहिं पंजलिउडाहिं पज्जुवारिज्जमाणं
 पयपडुपडहमुखपमुहतूरनिनायसंवलयतंतीतलतालाणुगयसंगीयपमोयभरनचमाणविलासिणीपलोयणपरं असंभा-
 वणिज्जसुहसंभारमणुभवमाणं सयमेव वज्जपाणिं पुरंदरं, तं च दट्टण सामरिसं चितियमणेणं-अहो को एस अप-
 त्थियपत्थओ दुरंतपन्तलक्खणो लज्जामज्जायपरिवज्जिओ सुरकुलकलंकभूओ अपत्तकाले चिय कालययणं पविसिउ-

कामो? जो ममावि असुरराइणो सीसोवरि वट्टमाणो दिवाइं भोगाइं मुंजमाणो अणाउलं विलसइत्ति, एवं संपे-
हिता सामाणियपरिसोववन्नए देवे संसयसएसु आपुच्छणोचिए सहाविता भणिउं पवत्तो-भो भो देवाणुपिया !
को एस दुरप्पा मम सिरोवरि वट्टइत्ति? ते य सिरसावत्तं करणलपरिग्गहिंयं मत्थए अंजलिं कट्ठु विजएणं वट्ठा-
विऊण य सविणयं जण्डिमारद्धा-भो भो देवाणुपिया! एस सुरेदो सोहम्माहिर्वइं महग्ग्या महाजुइं अपरिभविग्ग-
सासणो सयमेव विहरइ । तथो तव्वयणसवणानंतरसमुत्थन्नामरिसविंयंभंतभिडडिक्कालवयणो भणिउं पवत्तो-
भो भो बुहा ! किमेवं अदिट्ठपरक्कमा मम पुरोवि । कइवयसुरपरियरियं एयं तुम्हे पसंसेह ? ॥ १ ॥
जइ उच्चट्ठाणठिओ किमेत्तिएणवि गुरुत्तणमिमस्स ? । न हु वरइ तरुसिरथो कवोडओ नीलकठसिरिं ॥ २ ॥
अहवा तोलिजंते तुलाए वत्थुमि जं हवइ सारं । तं हेट्ठच्चिय ठायइ इयरं पुण वट्टइ उयरिं ॥ ३ ॥
एत्तो य लहू एसो अरिट्ठवसएण पाविओ सग्गं । जह कोइ लहइ रज्जं मायंगकुलपसूखोऽवि ॥ ४ ॥
भो भो सुचिरं इमिणा सूरविहीणे रणेव्व सुरलोए । काउरिसेण व सुरसुंदरीहिं सद्धिं सुहं वुत्थं ॥ ५ ॥
संपइ पुण अवणिज्जइ इमस्स चिररुद्धपमाहणं । दुट्ठा उवेहियच्चा न हुंति रोगव्व कुसलाणं ॥ ६ ॥
तत्थ-जो ववसायं न कुणइ सकमायसाभिभावपरितुट्ठो । स सिरीएवि हु सुच्चइ सो काउरिसोत्ति कलिऊणं ॥ ७ ॥
इय होउ अज्ज सुरलोयसामिणो माणदलणमलिणत्तं । सहसच्चिय कीरंतं पयडं बलसालिणावि मए ॥ ८ ॥

एवं च चमरासुरदंस्स अपरिभाविथनियभुयबलमाहणदण्जंणियं परिभाविऊण पयंपियं सामाणियसुराहिं देव ! एसो हि परभवोवज्जियविसिट्ठुपणगरिससमासाइयपवरलोयरायलच्छिविच्छडो पुरंदरो, तुमं पुण उज्जमवसायबलाइ-गुणगणपरिगओऽवि भवणवासीण अम्हारिसाणं सामी, ता नाह ! सुयसु मच्छं, उवमुंजेसु तुमं सकमावजियं सामि-त्तणं, एसो पुण सुरपुरसंपयं, निरत्थओ एत्थ परोप्परं विरोहो, किं कज्जं संसयतुलवलंबिएण नियमाहण्णं ? , निउण-बुद्धीए परिचिंतउ सामी । अपरिभाविथकयाणं कजाणं उवमुंजंतविसतरुफलाणं व पज्जंतविरसत्तणं, नहु एक्कासिए माणखंडणासुम्भूओ अवजसंपसू सुकयसहस्सवारिधारावरिसणेणवि पसमिउं तीरइ, ता सामी ! सयमेव गुणइ जमेत्थ जुत्तं, को अम्ह तुमाहितो विवेयभावो ? ॥

इमं च निसामिऊण गरुयामरिसवसविसध्पंतभिउडिभीममालयलो चमरासुरंदो समुल्लविउमारद्धो-भो भो सामाणिथा ! सुरा निरत्थयं समुवहह परिथायपरिणयविवेयविरहियं थविरत्तणं, जेण एवंविहसपहुपराभवपिसुण-वयणनिवहमुल्लवंताण दूरमवक्कतं तुम्ह गरुत्तणं, गुणा हु गोरवमुवजणित्ति, एत्तो चिय लहुओऽवि परियाएणं गुणा-हियत्तेण गुरुव धेप्पइ जणेणं, कहमण्णाहा अणुमेत्तोऽवि सुचित्तमुदरयामहग्घाविओ सिरम्मि निहिप्पइ सरिसयो ? , अहवा किमेण ? , अदिट्ठमहपरक्कमाणं तुम्हाणं को दोसो ? , ता सोहेह किं हेलाकरयलतालुण्डुण्णयंतनिवडंतहि गंडुएहिं व कीलेमि कुलाचलेहिं उयाहु गयणंगणविसप्पमाणकखोलोपेळणुल्लूरियतारयविमाणमालं निरुंभेमि पवळ-पवणपक्खुभिथजलहिजलवेळं ? , अहवा पयंडमुयदंडचंडिमावसपरिथत्तिथ एगत्तीकरेमि सुवणत्तं, इइ बहुण्णारा-

मरिसभरचित्तवयणाडंबराऊरियभवणब्भंतरुच्छलंतपडिसहयच्छलेण अणुमन्निउव्व निगगओ सकेण सह जुल्लिअउं सो भयभीयाए सामाणियसभाए, अह ईसिजायविवेगेण पुणो चित्तियं चमरेण-एए मम सामाणियसभावत्तिणो असुरा बाढं भायंति पुरंदरस्स, ता सम्मं न मुणिज्जइ कज्जगई, जइ पुण तत्तो हवेज्ज गंजणा अओ तदभिहम्ममा-णेण को मए सरणं पवज्जणिज्जोत्ति परिभाविऊण पउत्तो ओही, दिट्ठो य भयवं महावीरो सुसुमारपुरणरिसरतरुसंडे पडिमापडिव्वो, तं च दट्ठूण समुट्ठिओ सयणिज्जाओ, निरंसियं देवदूसं, गओ नाणाविहवयरमयहरणपडिहत्थाए चोप्पालगनामाए पहरणसालाए, कयंतभुयदंडविब्भमं गहियं महप्पमाणं परिहरयणं, तयणंतरं साहिलासं नयणं जलीहिं पिज्जमाणो असुरतरुणीहिं किंकायवयावामूढेहिं निरिक्खिज्जमाणो अंगरक्खेहिं दुव्विणीओत्ति उवेहिज्जमाणो सामाणियासुरेहिं किंपि भविस्सइ इह इति संसइज्जमाणो भ्रुवणवइवग्गेण निगगओ चंमरवंचारायहाणीओ, वेगेण य गच्छंतो संपत्तो भयवओ महावीरस्स समीवं, तिपयाहिणीकाऊण वंदिओ परमभत्तीए, पवत्तो विन्नवेउं, जहा-नाह ! तुह पायंपकयाणुभावेण दुल्लहावि पुज्जंति मणोरहा, अओ इच्छामि तुह निस्साए पुरंदरं हयपरकमं परिसुक्कप-हुत्ताभिरामभियाणिं काउंति भणिऊण अवक्कंतो उत्तरपुरिच्छिमंमि दिसिविभागे, सभारद्धो वेउवियसमुग्घाओ, विउव्वियं चेगं महंतं घोरायारं जोयणलक्खप्पमाणमेत्तं सरीरं । तं च केरिसं ?-

उत्तुंगघोरीसीसगभागघोलंतकुंतलकलावं । अंजणगिरिसिहरं पिव नवमेहसमूहपरियरियं ॥ १ ॥

अइधोरवयणकंदरफुरंतदाढाकडण्डुणेच्छं । वयणुच्छलंतपज्जलियजलणजालाकलाविछं ॥ २ ॥

दिसिचक्कुमुक्कउब्भडमुयदंडकंततारयाचक्कं । उरपंजररुंदत्तणपच्छाइयसूरकरपसरं ॥ ३ ॥

गंभीरनाभिमंडलपसुत्तफणिमुक्कफारफुक्कारं । उद्दामदीहजंवाभरभज्जिरचलणतलदेसं ॥ ४ ॥

कवल्लिउमणं व ससुरासुरं पि तेलोक्कमेक्कहेलाए । भीमाणवि भयजणगं गयणयले पसरियं झत्ति ॥ ५ ॥

एवंविहेण य सरीरेण पहाविओ तुरियतुरियं सुराहिवइसमुहं, तओ वेगवसवियम्भमाणमुहसमीरपवलत्तणपहरिथं^१
यसवडंसुहावडंतसुरविमाणो लीलासमुल्लासियचलणकोडिताडियसमुत्तुंगसेलटालियगंडपाहाणपहयभूमिवट्टो अंजणपुं-
जमेहसंदोहकलयंठभमरनियरसरिसेण देहपहापसरेण लवणजलहिंवेलाजलुप्पीलेणेव पूरयंतो गयणंतरं सरीरगरुयत्तणेण
भरितोव तिरियलोयं अणवरयगलगज्जिरवकरणेण फोडयंतोव वंभंडमंडोदरं कत्थइ जलवुट्ठिं सुयमाणो कत्थइ रेणुं ऊरं^२
किरंतो कत्थइ तिमिरनियरं निसिरंतो कत्थइ विज्जुपुंजमुग्गिरंतो वाणमंतरदेवे भएण छिन्नधन्नं व कंययंतो जोइसिय-
तियसे वित्तासित्तो फल्लिहरयणमंवरतले वियट्ठमाणो निमसमेत्तेण विलंघियसूरसभिनक्खत्तमंडलो पत्तो सुरपुरं ।

अह तारिसविगरालरूवावलोयेण विम्भिथा सुरसमूहा, हा किमेयंति समुल्लवतीउ भयवसविंसंतुलगलियनीची^३
बंधणाओ(जाया)श्रंभियच्च विहाविथा सुहडसत्था जीवियनिरवेक्खावि संखुद्धा अंगरक्खा वालच्च विचलत्तणपुयगगा
लोयपाला, किंकायवयाविमूढा जाया सामाणियदेवा, अच्चंतं चमक्किथा तायत्तीसा विसरसमारसंतो य नट्टो एरावणो,

चमरिंदो पुण एगं चरणं पउमववेइयाए अवरं च सुहम्माए सभाए ठविज्जण फलिहरयेणं मइया संरंभेण तिवसुत्तो
इंदकीलं ताडिज्जण सरोसं एवं भणिउं पउत्तो-भो भो तियसाहम ! कहिं सो सपिहसच्छंदलीलविलासलालसो
असमिक्खिवत्थुसमत्थणवियक्खणो नियसौडीरिमावगन्नियसेससुहडलोगो अदिट्ठकुसलभत्तसंभावियसमग्गवेरिव-
ग्गविज्जओ पुरंदरो ? कहिं वा अलियविग्रहिमावगणियजुत्ताजुत्तसमाधारो सकज्जपसाहणोभेत्तपयाप्पियसामिसेवा-
पराओ ताओ चउरासीइं सामाणियसाहस्सीओ ? कत्थ वा निष्फलकलियविग्रहपयंडपहरणाडंवाओ चत्तारि ताओ
चउरासीओ आयरक्खेदवसाहस्सीओ ? कहिं वा उचुंगगिरिसिहरदलणहुल्लिग्रं तमियाणिं कुलिसं ? कत्थ वा ताओ
अप्पडिमरूवलायन्नमणहराओ अणेगाओ अच्छरकोडीओ ? अरेरे मा कज्जविणासंमि भणिस्सह जहा चमरंचवा-
राइणा अमुणियपयण्यप्यारेण छलेण विणिहया अम्हे, एसोऽहं संपयं तुब्भे अणाहे जरतंखं निम्भूलमुम्भूलमि सक्क-
रालेदुंव फलिहरयेण चूरेमि, किं बहुणा ? जुगवमेव सरणविरहिए कीणासवयणकुहरे पक्खिवाभि, कुणह जमिह
कायव्वं सरेह सरणिज्जं मग्गह सजीविग्रसंरक्खणोवायं, अहवा दूरुन्नामिथउत्तिंगगंदसियसब्भावसारा समणह
सुरलोयसिरिं, किं निरत्थयमुव्वहह पुरंदरपक्खवायं ? पयडोच्चिय एस ववहारो-जं चिरकालपरिपालियावि कुलंगणा
कालंतरेऽवि नूणमणुसरइ पाणनाहं । अन्नं च—

अववइणव्व पुरंदर ! मह विरहे जं तए इमा भुत्ता । विणयपणयस्स तं पुण तुह सव्वमहं खमिस्समि ॥ १ ॥

सुमिणेवि अदिट्ठभया नियनियभवणोदरेसु य निलुका । विलसंतु सुरसमूहा मम पयपणइप्पसाएण ॥ २ ॥
 अणुरुवपइसमागमपभोगभरानिस्सरंतपुलइह्हा । सुरपुरलच्छी वच्छत्थलंमि कीलउ जहिच्छं मे ॥ ३ ॥
 अहवा किमिच्छिएणं ?-मम बाहुपंजरंतरमल्लीणं तिहुअणंपि नीसेसं । आचंदकालियं वसउ मुक्कपरचक्कभयरंक्कं ॥ ४ ॥
 इय ताव कुण पणामं सुरिंद ! नो जाव उत्तिमंगंमि । मोडियमउडकडणं निवडइ निविडं फालिहरयणं ॥ ५ ॥
 असमिक्खियनियभुयविक्रमो तुमं जुज्झिउं मए सद्धिं । रंभातिलुत्तमाईण कीस वेहवमुवणेसि ? ॥ ६ ॥
 पढमं चिय कीरंते नयंमि नो दिंति दूसणं कुसला । कहविहु कज्जविणासे पच्छायावोऽवि नो होइ ॥ ७ ॥
 एवं च असमंजसपलाविणं चमरमसुरिंदं निसामिऊण हेलाए तिवकोवभरउक्कुट्ठभिउडिभंगुरियमुमयभीसणपलो-
 यणेण भणियं पुरंदरेण-रे रे दुरायारसिरसेहर दूरपरिमुक्कमेर चमरासुराहम दुट्ठचिट्ठिमाभित्तवित्तासियतियससत्थ !
 पत्थेसि नूणमियाणिमपत्थणिज्जं ? , कहमन्नहा तुहेहागमणविसओ संभविज्जा ? , ता रे वारणोव ससरीरसंभवेण दसणा-
 इणा सुरहिच्च केसकलावेण सारंगोव कत्थूरिगाए चंदणतरुव सोरब्भेण भुयंगमोव फणारयणेण एस तुमं निद्रदग्गेण
 पणामिज्जसि विणासगोअरंति भणिऊण सिंहासणगएणं चिय सुरिंदेण सुमरियं वज्जं, तं च सुमरणानंतसेव उक्का-
 सहस्साइं विणिम्भुयंतं जालाकलावं निसिरंतं जलणकणकोडीओ विक्खिरमाणं फुल्लिंगमालासहस्सेहिं चक्सुचि-
 क्खेवमुष्पाएमाणं असेसहुयवहनिवहनिम्भियं व सयलसूरकरनियरविरइयं व समग्गेयलच्छिविच्छहुसंपिण्डणुणाइयं

व ठियं करयले पुरंदरस्स, मुक्कं च तेण, तं च तहाविहमदिट्ठुच्चं वेगेणागच्छमाणं पेच्छिऊण संगगसमरमच्छच्छाहो
सुमारियसामाणियासुरसिक्खावयणो वयणविणिस्सरंतदीहनिस्सासो पुत्तेहिं जइ परं पावेमि रसायलंति कयसंकण्णो
संभसुण्णिच्छतरलतारयच्छिविच्छोहसंवलियनहंगाभोगो कहिंपि अत्ताणं गोविउमपारयंतो भयवसपंकपमाणपाणिंस-
पुण्डपडियं फलिहरयणंपि अविगणंतो अविमुणियतकालोचियकायवो अलाहि सेसावाएहिं, परं तिहुयणपहुणो पाय-
पंकयमियाणिं सरणंति सुमरिऊण उड्डुचरणो अहोसिरो वेगमणसमुण्णपन्नपरिस्समनिस्सरंतकक्खासेयसलिलोच्च उ-
क्किट्ठाए चवलाए [दीहाईए] गईए जिणाभिमुहं पलाइउं पवत्तो, अविय—

निहलियदप्पविभवत्तेणेण जायं न केवलं तस्स । लहुयत्तं देहेणवि वेगेण पलायमाणस्स ॥ १ ॥

एसो सो किं वच्चइ जेण तहा जंपियं हरिसमक्खं । पहसिजंतो इय दिन्नहत्थतालेहिं तियसेहिं ॥ २ ॥

तह कहवि देहपब्भारभरियमुवणोदरोऽवि चमरिंदो । तवेलं लहु जाओ जह न मुणिजइ पयंगोच्च ॥ ३ ॥

तं च कुलिसं सुरवइपयत्तपक्खित्तं जलणजालाकलावाउलियदिसामंडलं कयलयंतं व एक्केहलाए सयलमाखंडल-
पडिवक्खं जावऽज्जवि थेवमेत्तेण न पावइ सिरमंडलं ताव भयगगरसरो-भयवं ! तुममियाणिं सरणंति जंपमाणो
पविट्ठो जयगुल्लो उस्सग्गट्ठियस्स चरणकमलंतरे चमरो एत्थंतरे सहस्सनयणस्स जाओ चित्तसंकण्णो-अहो न खलु
दणुवइणो अप्पणो सामत्थेण सोहम्मकण्णं जाव संभवइ आगमणं, केवलं भगवंतं तित्थयरं अरिहंतचेइयं वा भावि-

अप्यं सुसमणं वा निस्साए काऊण इहागओ हविजा, ता वाढं अजुत्तं परभवदुहावहं एवमावडिहिच्चित्तिऊण पउत्तो ओही, दिट्ठो य भयवओ पायपंकयमणुसरमाणो कुंथुव सुहुमदेहो चमरासुरिदो, तं च दट्ठण सहसच्चिय जायचित्तचमक्कारो हाहा हओ म्हि मंदभगोत्ति वाहरमाणो अचंतसिग्घाए गर्इए वज्जमगेण पहाविओ पुरंदरो, जाव य जिणुत्तमंगमि चउरंगुलमपत्तं जायं वज्जं ताव तक्खणमेव पडिसंहरियमणेण, नवरं अइसिग्घगमणवसेण करयलसमीरेणेण तरलिया जयगुरुणो कुंचिरा अग्गकेसा, तओ पुणो पुणो सदुच्चरियं निंदमाणेण तिपयाहिणी-काऊण वंदिओ सामी परमभत्तीए, खाभिउमारद्धो य—

देव ! पसीयह न मए विद्याणियं तुम्ह चरणनिस्साए । जं एसो चमरिंदो समागओ मं पराभवित्तं ॥ १ ॥

इण्हिं चिय विन्नायं करयलपलहत्थियंमि कुलिसंमि । ता पणयवच्छल ! लहुं अवराहमिमं खमसु मज्झ ॥ २ ॥

न पुणोवि भुवणबंधव ! संसारपरंपरापरमवीयं । एवंविहं अकिच्चं कइयावि अहं करिस्सामि ॥ ३ ॥

इति सविणयं खामिऊण जयगुरुं सक्को उत्तरपुरच्छिमदिसिविभागंमि ठाऊण वामेण चरणेण तिवसुत्तो भूमि-तलमवदालिऊण दणुनाहं भणिउं पवत्तो—भो भो असुराहिव ! सुंदरं तुमए कयं जमसेसजयजंतुसंरक्खणेक्कदिविख-यस्स पडुणो पयपंकयंतरे त्तिरोहिओऽसि, एवं च कुणमाणेण तए दढमावज्जियं मम हिययं, अवणीओ पुव्वेरा-णुबंधो, जणिओ आमरणंतं अब्बभिचरियपणयभावो, ता विहरसु जहिच्छाए, भगवओ पहावेण नत्थि तुह ममा-

हितो भयंति आसासिऊण जहागयं पडिनियत्तो तियसाहिबो ।

चमरोऽवि हरिसुक्करिसवियसंतवयणकमलो भगवओ पायकप्पपायवण्णभायपरिगहिओ निरुवसगं नीहरिऊण जहाविहिं भयवंतं पणमिऊण थुणिलमाढत्तो—

सयलजयजीवबंधव ! झाणानलदड्ढुक्कम्मवणगहण ! । तिच्चपरीसहसहणेक्कधीर ! जय जय महाधीर ! ॥ १ ॥

सिद्धिवहुवद्धपडिबंध ! वुट्टसद्धम्मबंधुरनिहाण ! । चामीयरसरिससरीरकंतिविच्छुरियदिसिनिवह ! ॥ २ ॥

नाह ! तुह पायछायालीणं नो भवभयंपि अक्कमह ! किं पुण सहावसंगुरगिरिदलणुंदतुरं झलिसं ? ॥ ३ ॥

जत्थ तुह नाह ! सरणं उवेह ससुरासुरंपि तइलोकं । पायतले तत्थ ठियस्स कह णु यथणिज्जया मज्झ ? ॥ ४ ॥

पत्तच्चिय सुरपुरसंपयावि परमत्थओ मए देव ! । अब्भुदयमूलवीयं जं पत्तं तुम्ह पयकमलं ॥ ५ ॥

लब्भंति सामि ! जइ मग्गियाइं निरवगहाइं भत्तीए । पइजम्मं चिय ता तुम्ह चलणवासं लभेज्जमहं ॥ ६ ॥

इय चमरिंदो सन्भावसारवयणेहिं संशुणिय वीरं । नित्थरियगरुहहरिभयसहन्नवो अइगओ सणुरिं ॥ ७ ॥

जयगुरुवि पभायसमए एगराइयं महापडिमं पडिसंहरिऊण निक्खंतो सुंसुमारपुराओ, कमेण य पत्तो भोगपुरं नयरं, तत्थ य महिंदो नाम खत्तिओ अकारणसमुण्णन्नतिविकोवाणुबंधो भयवंतं दट्ठूण खज्जरितल्लट्ठिसुग्गीरिऊण धाविओ वेगेण हणणनिमित्तं, एत्थंतरे चिरंदंसणपाउब्भूयभत्तिपम्भारो समागओ तं पएसं सणकुमारसुराहिबो, दिट्ठो य

सो तहाविहवेगेण जिणाभिमुहं इतो, तओ तं निवारिऊण सुरिंदेण पणमिओ जयगुरू, पुच्छिया परीसहपरजय-
पहाणसरीरवत्ता, गओ य जहाभिमयं ।-भयवंपि वद्धमाणो पलीणमाणो सुरिंदक्यमाणो । तत्तो विनिक्खसिगित्ता
नंदिग्गसं समणुपत्तो ॥१॥ नंदीनामेण तहिं पिउमित्तेणं शुओ य महिओ य । तत्तो य नीहरित्ता समागओ मिठ्ठ-
ग्गामं ॥२॥ तत्थ य गोवो कोवेण धाविओ वालरज्जुयं धेत्तुं । जयगुरूणो हणणत्थं, सो य निसिद्धो सुरिंदेण ॥३॥

अह भयवं गामाणुगामगमणेण पत्तो निरंतरधवलहरमालालंकियं सुविभक्ततियचउक्कचचररेहिरं कोसंविणुरिं,
तत्थ य भूपालणगुणनाडीनिविडनिबद्धविपक्खरायलच्छिक्कंणुगो सयाणिओ नाम नराहिवो, तस्स य चेळगमहा-
नरिंददुहिया अहिगयधम्मपरमत्था तित्थयरपायपंकयपूयणपरायणा भिगावई नाम भारिया, सुणियनिसेसरायं-
तरचारो सुहुमबुद्धिबिभवपरिवालिरज्जुमारो सुगुत्तो य अमचो, तस्स य सयावि जिणधम्ममाणुरागसंभिन्नसत्तसरी-
रधाऊ नंदा नाम भज्जा, सा य सावियत्ति काऊण भिगावईए देवीए सद्धिं चयंसियाभावं दंसेइ, अन्नो य सयलदरिसमि-
प्पायपरूवणानिरओ नरिंदसम्मओ तच्चावई नाम धम्मपाढओ, तहा तत्थेव नयरीए विविणिजणचक्खुभूओ धणावहो
नाम सेट्ठी, मूला य से भारिया, एयाणि नियनियकुसलाणुट्ठाणसंगयाणि वसंति, तत्थ य भयवया पोसवहुलं-
पाडिवए एवंविहो दुरणुचरो अभिगहो पडिवन्नो, जहा-जइ कालायसनियलबद्धचलणा अवणीयसिरोरूहा सोम-
भरावरुद्धकंठगगरगिरं रयमाणी रायकन्नगावि होऊण परगिंहे पेसत्तणं पवन्ना तिन्नि दिणाइं अणसिया परंभत्तरं

निहितैकचलणा बीयचलणलंघियधदुवारदेसा पडिनियत्तेसु सयलभिक्षायरेसु सुण्येण कुम्मासे पणामेइ ता परमहं पारेमिति कयनिच्छओ पुरजणेण अणुवलक्खिज्जमाणाभिगहविसेसो बावीसपरीसहसहणट्ठाए असंपज्जंत- जहिट्ठियभोयणोऽवि पइदिवसं उचावएसु मंदिरेसु पयत्तो परिभमिउं जयगुरू । पुरजणोऽवि भयवंतं अगहियभि- वखं अणुदिणं गेहंगणाओ चैव नियत्तमाणं पेच्छिऊण अचंतसोगंसंभारतरलियमाणसो किंकायव्वयावामूढो चित्ति- उमारद्धो, कहं ?—

किं दुहनिबंधणेणं धणेण ? किं तेण मणुयभावेण ? । भोगोवभोगलीलाए ताए किं वा दुहफलाए ? ॥ १ ॥
जइ एवंविहसुणिपुंगवस्स गेहंगणं उवगयस्स । पाणन्नपयाणेणवि उवयारे नेव वट्ठामो ॥ २ ॥ जुम्मं ।
कह वा कम्मजलाउलमणेगदुहमयरभीसणावत्तं । संसारसायरमिमं दाणेण विणा तरिस्सामो ? ॥ ३ ॥
अहवा धन्नाण गिहे पविसइ एवंविहं सुमुणिरयणं । भिक्षवापरिग्गहेण य अइधन्नाणं जणइ हरिसं ॥ ४ ॥
जइ एक्कं चिय वेलं कहमवि पडिलाभिओ हवइ एसो । ता पाणिपल्लवे संवसंति सुरभोक्खसोक्खाइ ॥ ५ ॥
इय जह जह जिणनाहो भूरियारेहिं दिज्जमाणंपि । भिक्खं नो अभिक्खइ तह तह खिज्जइ पुरीलोगो ॥ ६ ॥
एवं च चत्तारि मासे कोसंबीए हिंडमाणो भयवं अन्नया पविट्ठो सुगुत्तमंतिणो भवणं, दूराओ चिय दिट्ठो सुनं- दाए, पच्चभिन्नाओ य जहा सो एस भयवं महावीरसामिति, तओ अणाइक्खणिज्जं पभोयपब्भारसुव्वहंती उट्ठिया

झडति आसणाओ, नीणिआ परमायेरेण भिक्खा, भयवंपि निगओ गेहाओ, सुनंदावि अद्धिं काउत्तारद्धा, ताहे दासीहिं भणियं-सामिणि ! एस देवज्जओ न सुणिज्जइ केणइ कारणेणं दिणे दिणे अगहियभिक्खो तकखणे पडि-
 नियत्तइ, एवं भणिए तीए नायं, जहा-नूणं कोइ अभिगहविससो, तेण तंमि असंपज्जमाणे अकयकज्जो चेष निज्जाइ जिणिंदो, इमं च से चिंतयंतीए जाओ बाढं चित्तसंतावो पम्हुट्ठा गेहवावारा विसुमरिओ सरीरसिंगारो पल्हत्थियं
 करकिसलए गंडयलं, एत्थंतरे समागओ सुगुत्तामचो, पलोइया य एसा तेण, तओ पुच्छया, जहा-कम्मलमुहि ! कीस निक्कारणं रणरणयसुव्वहंतिव लक्खिज्जसि ? , न ताव सुमरेसि मणागंपि अत्तणो अवरहं, मइ अविणयपरि-
 हारपरायणे परयणोऽवि न संभाविज्जइ तुह पडिक्कलकारिति, तीए भणियं-पाणनाह ! अलमलियंसंभावणाहिं, नत्थि थेवमेत्तोऽवि कस्सइ अवराहो, केवलं जस्सप्पभावेण लीलाए लंघिज्जइ दुग्गमोवि भवन्नवो मणोरहागोयोरपि
 पाविज्जइ अपुणागमं सिवपयं अइदूरुल्लसिओऽवि विद्विज्जइ अकल्लाणकोसो तस्स भयवओ सुवणनाहस्स वद्धमा-
 णसामिणो बहूइ वासराइ अणसियस्स, न सुणिज्जइ कोइ अभिगहविससो अणेण गहिओत्ति, अओ किं तुह बुद्धीविमवेण ? किं वा अमच्चत्तेणं ? जइ एवं अभिगहं न जाणहत्ति, अमचेण भणियं-पिए ! परिचयसु संतावं,
 कळे तहा केमि जहा एस अभिगहो सुणिज्जइ, इय एयाए कहाए वट्टमाणीए विजया नाम पडिहारी भिगावइए देवीए संतिआ, सा केणइ कारणेण आगया, तमुल्लावं सोऊण भिगावइए सवं परिकेहइ, इमं च सोचा भिगावइवि

महादुक्खेण अभिभूया, सोगाउरा जाया, राया य तं पएसमणुपत्तो पुच्छइ-देवी ! किं विमणदुम्मणा लक्खिज्जसि ?, तीए भणियं-देव ! किं परिक्खेमि ?, तुम्हे दुग्गदुग्गइमणमूलेण इमिणा रज्जभेरेण पच्छाइयविंश्या एत्तियं पि न सुणह, जहा कत्थ सामी विहरइ ?, कहं वा भिक्खं परिभइत्ति, वहं निब्बच्छिऊण साहिओ अभिगहवइयरो, राइणा भणियं-देवि ! वीसत्था होहि, कळे सवपयारोहिं जाणामि परमत्थंति भणिऊण उवविट्ठो अत्थाणमंडवंमि, वाहराविओ सुगुत्तामच्चो, समागओ एसो, तओ पणमिऊण राइणो पायपीठं उवविट्ठो जहोचियासणे, भणिओ राइणा-अहो अमच्च ! किं जुत्तमेयं तुज्झ जं भयवंतं इह विहरमाणं पि न जाणसि ?, अहो ते पमत्तया अहो ते सद्धम्मपरंमुहया, अज्ज किर सामिस्स चउत्थो मासो निरसणस्स अविन्नायाभिग्गहविसेस्स वट्ठइत्ति, सुगुत्तेण भणियं-देव ! अवरावरकज्जंतराजरियघरवासवासंगित्तेणेण न किं पि सुणियं, इयाणिं पुण जं देवो आणवेइ तं संपा-डेमिन्ति भणिए रत्ता सद्दाविओ तच्चावाइ धम्मसत्थपाढगो, पुच्छिओ य एसो-जहा भइ ! तुह धम्मसत्थेसु सव-पांसंडाणं आयारा निरुविज्जंति, ता साहेहि को भगवया अभिग्गहविसेसो पडिक्खोत्ति ?, तुमं पि अमच्च ! बुद्धि-बलिओ, अओ वीमंसेसु को एत्थ उवाओ ?, खणंतरं च वीमंसिऊण तेहिं भणियं-देव ! वहवे दव्वेत्तकालभावमे-यमिन्ना अभिग्गहविसेसा सत्त पिंडेसणाओ सत्त य पाणेसणाओ हवंति, अओ न नज्जइ कोऽवि अभिप्पाओत्ति । तओ रत्ता सवत्थ नयरीए काराविया उग्घोसणा, जहा-भयवओ भिक्खं भमंतस्स अणेगप्पगारोहिं भिक्खा नीणि-

यद्वत्ति, इमं च निसामिज्ज परलोयसुहकंखिणा विचित्तनेवत्थधारिणा अप्पमत्तचित्तेण नयरज्जेण पइण्णामंदरस्स गोयरचरियं पविट्ठस्स भयवओ पइदिणं पणामिज्जइ अणेगप्पयोरेहिं भिक्खवा, न य विप्पइ सामिणा, एवं चकहिंहिपि असंपज्जमाणजहासमीहियिंपिंडविमुद्धावि अमिलाणसररीरलायन्नो अदीणमणो य ठिओ तीए चेव पुरीए भयवं ।
 एयं ताव एवं ।

इओ य-सयाणियस्स रन्नो चारपुरिसेहिं आंगतूण कहियं जहा-देव ! तुम्ह पुव्वेरी दहिवाहणो राया संपयं थोवपरिवारो पमत्तो य वट्ठइ, अओ जइ पंचरत्तमेत्तेण देवो तत्थ वच्चइ ता निञ्चियं समीहियत्थसिद्धी जायइत्ति-
 पमणिए राइणा दवाविया सन्नाहभेरी, संवूढा सुहडा संखुद्धा सामंता, चलिओ राया महासामग्गीए, आरुद्धो य नावासु, तओ अणुकूल्याए पवणस्स दक्खत्तणेणं कन्नधारजणस्स एगरयणिमेत्तेण अचित्तियागमणो संपत्तो चंपा-
 पुरी, असंखुद्धा चेव वेढिया एसा, दहिवाहणोऽवि सामग्गिं विणा जुज्झउमपायंतो किमेत्थ पत्थावे कायधंति वाउलमणो भणिओ मंतिजणेण-सामि ! कीस मुज्झह, सब्बहा एत्थावसरे पलायणमेव जुत्तं ।

यतः-त्यजेदेकं कुलस्यार्थं, ग्रामस्यार्थं कुलं त्यजेत् । ग्रामं जनपदस्यार्थं, आत्मार्थं पृथिवीं त्यजेत् ॥ १ ॥

प्रस्तावसदृशं वाक्यं, सद्भावसदृशं प्रियम् । आत्मशक्तिसमं कोपं, यो जानाति स पण्डितः ॥ २ ॥

विक्रमावर्जिताः सब्बः, संपद्यन्ते पुनः श्रियः । जीवितव्यमवक्रान्तं, तेन देहेन दुर्लभम् ॥ ३ ॥

सर्वेषामेव वस्तूनां, जीवितव्यमनुत्तमम् । तदर्थं राज्यलक्ष्म्याद्यास्तचेत् नष्टं वृथा परम् ॥ ४ ॥
एवं तेहिं भणिओ सरीरमेत्तेण पलाणो दहिवाहणो, सयाणियरन्नावि घोसाविं नित्खंधावार, जहा-भो भो ! दंड-
नाहसुहडपमुहा चमूचरा ! गेणहेज्जह जहिच्छाए एत्थ नथरीए जं जस्स रोयइ, मा भगहिंतो भणागपि संकेज्जहत्ति,
एवं जग्गेहे खुट्टे पयट्ठो रायलोणो भगो पागारो विहाडियाइं गोपुरकवाडाइं दुट्टिउमारुद्धं असेसंपि नयरं, तहाविहे
य असमंजसे वट्टमाणे दहिवाहणस्स रत्तो अग्गमहिंसी धारिणी नाम देवी वसुमईए दुहियाए समं इओ तओ पलाय-
माणी पत्ता एगेण सेवगपुरिसेण, रायावि संपाइयसमीहियपओयणो पडिनियत्तो नियवयरिहुत्तं, सो य सेवगो
धारिणीदेवीए रूवेण लायन्नेण सोहग्गेण य अवहरियहियओ पहे वच्चंतो जणाणं पुरो भणइ-एसा भग पत्ती होही,
एयं च कन्नगं विक्किणिस्सति, एयं च से उल्लावं सुणिऊण भयभीया धारिणी चिंतिउं पवत्ता--

कह ससहरकरधवलं कुलंमि नीसेसमुवणपयंडंमि । जाया मह उप्पत्ती चेडयनरनाहगंहंमि ? ॥ १ ॥
कह वा नमंतसामंतमउल्लिढग्गपायवीढेण । दहिवाहणेण रत्ता ठवियाडुहं पणइणिपयंमि ? ॥ २ ॥
कह वा जिणिंदवयणारविंदसंभूयसमयसवणुत्था । मम सययं वसइ मणे अकज्जविवरंमुहा बुद्धी ? ॥ ३ ॥
कह एस हीणसत्तोवि सुक्कमंरं ममं समुद्दिस्स । वागरइ जहा महिलं अहमेयं किल करिस्सामि ? ॥ ४ ॥
ता पावजीव ! अज्जवि अस्सुयपुध्वं इमंमि सुणिऊण । किं निहरसि न निछज्ज ! गंजणं सहसि सीलस्स ॥ ५ ॥
हरहासहंसधवलं सीलं मयलंति नो सुकुलजाया । करिकन्नतालंचंचलजीवियकज्जेण कइयावि ॥ ६ ॥

कह वाविहु मम दुहिया एसा उच्छंगसंगसंभूया । परहत्थगया धरिही नियजीयं विरहसंतता ? ॥ ७ ॥

इय एवंविहसंकपपणुप्पन्नतिव्वदुक्खाए । निब्भच्छियं व जीयं नीहरियं से उरो भेचुं ॥ ८ ॥

तीसे य अपत्तकालमरणं अवलोइऊण चित्तिं तेण सेवगपुरिसेण, अहो दुट्ठ मए भणियं—महिला होहिति, एसा हि महाणुभावा कस्सइ पुरिसोत्तमस्स भज्जा संभावज्जइ, अओ चिय मम दुव्वथणायन्नणेण संखुहियहियथा मया, ता किमित्थ अइक्कतत्थसोयेणेण ? एयं कन्नगं इयाणिं न किंपि भणिस्सामि, मा एसावि मरिहिति । ताहे मधुरवय-
णेहिं अणुअत्तमाणा आणीया कोसंवीं नयरिं, विक्कयनिमित्तं च उड्डिया रायमगे, अह धम्मकम्मसंजोएण तण्णएस-
जाइणा दिट्ठा सा धणावहसेट्ठिणा, चित्तिं चउणेण-अहो एरिसाए आगिइए न होइ एसा सामन्नजणदुहिया, जओ
अणलंकियावि जलहिंवेल्ह वइइ किंपि अपुवं लावन्नं, किससरीरावि मयलंछणलेहव पायडइ कंतिपडलं, ता
जुज्जइ एसा मम बहुदददाणेण गिणिहत्तए, मा हीणजणहत्थगया पाविही वराइ अणत्थपरंपरं, एयसंगोवणेण य
जइ पुण इमीए सयणवग्गेण ममं समागमो होज्जत्ति कलिरूण जेत्तिं सो मोल्लं भणइ तत्तिं दाऊण गहिथा,
नीया सगिहे, पुच्छिया य-पुत्ति ! कस्स तं धूया ? को वा सयणवग्गो ? तओ उत्तमरायकुलपसूयत्तणेण सयं नियव-
इयरं कहिउमपारयंती ठिया एसा मोणेणं, पच्छा सेट्ठिणा धूयत्ति पडिवन्ना, समप्पिया मूलाभिहाणाए सेट्ठिणीए,
संलत्ता य एसा-जहा पिए ! धूया इमा तुह मए दिन्ना, ता गोरेवेण संरक्खेज्जासि, एवं च जहा निययघरे तहा

सा तत्थ सुहेण संवसइ, ताए य सो सेट्ठी सपरियणो लोणो य सीलेण वयणकोसलेण य वाढं रंजिय-
हियओ समानो चंदणसिसिरसहावत्तणओ पुद्वाभिहाणमवणेऊण चंदणत्ति बीयं नामं उवेइ, एवं सा चंदणत्ति परि-
यणेण वाहरिज्जंती वट्ठुउमारद्धा, गच्छंतेसु य दिणेषु वियंभियो से ईसि जुवणारंभो, तव्वेण य समुद्धयिओ
सविसेसं लायन्नपगरिसो, विजियकुवलयविब्भमं वित्थरियं नयणजुयलं, अलिकुलकज्जलकसिणो दीहत्तणं पत्तो केस-
पासो । अविय—

रूवपरिवज्जिओऽविहु जुवणसमयंमि हवइ सस्सिरीओ । किं पुण सभावओ चिय सुकुमार सा नरिंदसुया ? ॥ १ ॥

तीसे य पइदिणं बहुमाणि रूवसंपयं पलयंती मूला सेट्ठिणी बाढं मच्छरमावहइ, परिचितेइ य, जहा—को एयं
सहहिज्जा जन्न इमं सेट्ठी परिणेऊण घरसामिणी करेज्जा?, ता सब्बहा मम विणासाय होअवमेयाए, अओ जइ
किंचि छिद्दं पावेमि ता एयं ववरोएमि । अन्नया य सो धणावहसेट्ठी गिम्हुणहकिंलतदेहो विवणिपहाओ आगओ
नियमंदिदं, तम्मि य पत्थावे परियणाओ नत्थि कोऽवि जो चलणपक्खालणं करेइ, ताहे अइविणीयत्तेण चंदणा
समुट्ठिया पाणियं गहाय पायसोहणत्थं, निवारिज्जिमाणावि सेट्ठिणा जणगोत्ति कलिऊण पयट्ठा घोविउं, अह नीस-
हत्तणओ कुमारभावस्स सिट्ठिलियबंधणो होऊण निवडिओ भूमियले दीहो से कुंतलकलावो, मा चियखेछे पडि-
हिति करकलियलीलालट्ठीए समुक्खित्तो निवियारमणेण सेट्ठिणा, वट्ठो य । एत्थंतरे अणवरयछिद्देच्छणपराए

ओलोयणंतरगयाए दिट्टमिमं पावाए अणत्थमूलाए मूलाए, ताहे ईसाभरवित्थरतदढकोयपाडलच्छीए, इत्थीसभा-
 वओ चिय अचंतं तुच्छहिययाए चित्तियमेयाए इमं-जं पुच्चिं तत्किंयं मए आसि तभियाणिं पयडत्तणमणुभवइ विगण-
 परिहीणं, कहमन्नहा जणगत्तं वायामेत्तेण जंपिऊण पुरा सेट्ठी इमीए दइओव केसयांसंयि संजमइ, ता जावज्जिनि लज्जं
 समुज्झिऊणं न पणइणिपयंमि ठवेइ सेट्ठी एयं ताव उवायं करेमि अहं, इय सुविमुद्धंयि जणं विवरीयं गियमइए
 कलिऊण मूला मूलाउ चिय उद्धरिउं चंदणं महइ । अह पक्खालियचलणे खणं कयवीसामे बाहिं नीहरियंमि
 धणावहे ईसावसुप्पन्नमच्छराए सेट्ठिभज्जाए वाहराविऊण ण्हावियं मुंडावियं चंदणाए सीसं, बहुं ताडिऊण लोहसं-
 कलाए चरणे निगडिऊण य पक्खित्ता एसा दूरथरमंदिरंमि, दिन्नं निविडकयाडसंपुडं, भणिओ य परिग्रयो-ओ
 सेट्ठिणो इमं वइयरं साहिस्सइ तस्सवि एस चेव दंडो मए कायद्धो, अओ बाटमापुच्छमाणेऽवि सेट्ठिंमि न के-
 यवमेयंति पुणो पुणो पन्नविऊण गया सगिहं । विगालसमए य समागओ धणावहो, कहं चंदणत्ति पुच्छिओ
 परिग्रयो?, मूलाभएण न सिट्ठं केणावि, तेण नायं-पासायतले कीलंती भविस्सइ, एवं रयणीएवि पुच्छिगा, तत्थवि
 तेण नायं-जहा पसुत्तत्ति, नवरं बीयदिवसेऽवि न दिट्ठा, तइयदिणे य अचंतमाउलचित्तस्स आपुच्छमाणस्सवि पुणो
 पुणो जाव न कोइ साहेइ ताव जाया से आसंका-मा केणइ विणिहया होज्जत्ति, समुप्पन्नगाढकोवो भणिउं भवतो-
 अरे रे साहेइ अवितहं तीसे पउत्तिं, अहवा मे सहत्थेण मारइस्सं, जओ एरिसमुपउत्तंडभाडंवरणे न मुणिजइ तुप्पह

कुसलत्तणंति भणिए चितियेक्काए थेरदासीए, जहा जीवियम्हि बहुकालं सयेमेय, पचासन्नधियाणिं मरणं, एत्तो-
उवि किं करिस्सइ मे मूला?, ता साहेमि चंदणं, जीवउ मम जीविणवि सा वराई, परजीवरक्खणं हि महापुब्बं
बुचइ समयसत्थेसुत्ति चित्तिऊण सिद्धो सेट्ठिणो परमत्थो । दंसियं च तं गिहं जत्थ सा अयरुद्धा अच्छइत्ति, तओ
गंतूण उग्घाडियं तं गिहं सेट्ठिणा, पलोइया य सिरोउवणीयेकसपब्भारा छुहाकिलाभियसरीरा मत्तमायंगचलणमलिय-
कमलमालच्च विमिलाणदेहच्छवी चंदणा, तं च दट्ठूण गलंतवाहणवाहाउल्लोयणो-पुत्ति! वीसत्था होहत्ति समा-
सासिऊण गओ महाणससालाए, निरुवियाइं भोयणभंडाई, कूराइयं च विसिट्ठं भोयणमपेच्छमाणेण कुम्मासे चिय
मुण्णकोणे घेत्तूण समप्पिया चंदणाए, भणिया य-पुत्ति! जाव अहं तुह नियलभंजणनिमित्तं आणेमि लोहथारं ताव
मुंजसु तुमं एयंति भणिऊण गओ सेट्ठी, सावि सुप्पप्पणामिए दट्ठूण कुम्मासे करिणिच्च जूहपब्भट्ठा नियकुलं संभ-
रिऊण सोइउं पवत्ता । कहं?—

जइ ताव दइव! तुमए नरवइगेहे अहं विणिम्मविया । ता कीस एरिसावयमहणवे दुत्तरे खित्ता? ॥ १ ॥

सा रायसिरी सो जणणिजणगसम्भावनिम्भरो नेहो । कह सव्वंपि पणट्ठं गंधवपुरच्च वेगेण? ॥ २ ॥

खणसुछंसति उट्ठु खणेण निवडंति हेट्ठओ सहसा । खरपवणुद्धुयधयवडसमाइं ही विहिविलसियाइं ॥ ३ ॥

इय दुव्वहसोगभारारुद्धकंठक्खलंतवयणा सा । निवडंतसलिलवाहण्णवाहधोयाणणा बाला ॥ ४ ॥

तण्हाछुहाकिलाभियकबोलमह पाणिपल्लवे ठविउं । वयणं खणंतरं रोविऊण दीहं च नीससिउं ॥ ५ ॥

ते सुप्पकोणनिसिए कुम्मासे सुणिसणं व निन्नेहे । गिण्हइ भोगणहेउं किमभवखं छुहकिलंताणं ? ॥ ६ ॥

अह चित्तिभेयाए जइ एज्ज इमंमि कोइ पत्थावे । अतिही ता से दाउं जुज्जइ मह भोगणं काउं ॥ ७ ॥

इति परिभाविऊण पलोइयं दुवाराभिसुहं, एत्थंतरे चुन्निचचाभीयररेणुसुदरेण कायकंतिपडलेण पूरयंतोव गयण-
यलंगणं उवसंतकंतदिट्ठिप्पहापीऊसवरिसेण निववंतोव दुहसंतत्तपाणिगणं नगनगरसिरिवच्छमच्छसोवत्थियलंछिएण
चलणजुयेलेण विचिच्चित्तंकिंयं व कुणमाणो महीयलं सुहकम्मनिचओव पच्चक्खो अहाणुगुवीए विहरमाणो
समागओ तं पएसं भयवं महावीरजिणवरो, तयणंतरं अप्पडिमरूवं भयवंतं दट्ठूण अच्चंतमसारं कुम्मासभोधणं च
निरिक्खिऊण दूरमजुत्तमेयं इमस्स महासुणिस्सत्ति विभावमाणीए सोगभरगगरगिराए गलंतवाहप्पवाहाउल्लो-
यणाए भणियमणाए-भयवं ! जइवि अणुचियमेयं तहावि मम अधन्नाए अणुगहट्ठं गिण्हह कुम्मासभोधणंति,
भयवयावि धीरहियएण निरुविऊण समग्गाभिग्गहविसुद्धिं पसारियं पाणिपत्तं, तीएवि निविडनिगज्जडियं कहं-
कहवि दुवारस्स बाहिरुद्देसंमि काऊण चलणमेक्कमवरं च भवणब्भंतरंमि सुप्पेण पणाभिया कुम्मासा, अह जयगुरुण-
रूयाभिग्गहपूरणपरिटुट्ठा गयणयलमवयरिया चउव्विहा देवनिवहा पहया दुंदुही पडिया च पारियायमंजरीसगाहा
भणिरभमरोलिसंवलिया कुसुमवुट्ठी वरिसियं गंधोदयं निवडिया अद्धत्तेरसकोडिमेत्ता सुवणणरासी मंदंदोलियविलया

य वल्लरीकला पवाइओ सुरभिसमीरणो वियंभिओ भवणब्भंतरे जयजयारवो । अविय—

दिसिदिसिमिलंतहरिसियनायरजणजणियवहलहलबोलं । नचंततरुणिसत्थं वज्जेताउज्जसंवायं ॥ १ ॥

पइखणपहिट्टुसुरगणतिवइण्णोडणनिनायभरियनहं । मंगलमुहलसुरगणसमूहसंसोभियदियंतं ॥ २ ॥

इय जयपहुपारणगे न केवलं हरिसियं तमेव पुरं । सविसेसरंजियमणा जाया पायालसग्गावि ॥ ३ ॥

एवंविहे य परमपमोयसंभारे समुप्पन्ने मुणियजयगुरुपारणगवुत्ततो समागओ कोणुगाखंधाधिरूढो पहाणपुरजणा-
णुगओ अंतैउरसमेओ सयाणियनरनाहो, अमच्चोडवि भज्जासहिओ संपत्तो सेट्ठिमंदिरं, पॅखोलितारहाररेहंतवि-
च्छिन्नवच्छत्थलो माणिक्कमउडडिप्पंतउत्तिमंगो कडयतुडियथंभियवाहुपरिहो पुरंदरो य, तीसे य चंदणाए देवयाणु-
भावेण पुवंपिव नीहरिओ पवरचिहुरभारो नियलाणिवि जच्चकंचणमयाणि नेउराणि जायाणि, अन्नेहि य हारद्धहारक-
डिसुत्तयकडयकुंडलतिलयपमुहरयणाभरणेहिं अलंकियमसेसं सरीरं । एत्थंतरे संपुलो नाम दहिवाहणरत्नो कंचुइज्जो
सयाणियरत्ना पुवं वंधिऊण जो आणिओ आसि सो तक्खणं चिय वसुमइं दट्ठुण जायपच्चभिन्नाणो सुमारियपुव्वसुव-
रिओ तीसे पाएसु निवडिऊण सुक्कपोक्कारं रोविउमारद्धो, महुवरयणेहिं आसामिऊण कोऊहलेण पुच्छिओ राइणा-
भह ! केण कारणेण एयाए पायपकए निवडिऊण सहसच्चिय अचंतसोगनिब्भरं परुन्नोडसि ? तेण जंणियं—देव ! चंपा-
पुरीपरमेसरदहिवाहणरायगमहिसीए धारिणीदेवीए असेससीमंतिणीतिलयभूया धूया एसा, कहां तारिसविभवसमुदयं

पाविऊण इयाणिं नियजणणिजणगरहिया परणिहे वसइत्ति एएण कारणेण, राइणा भणियं-भइ ! मा सोएउ
 असोयणिज्जा हि एसा जीए तिहुयणेक्कादिवायरो भवगतपडतजणलगणक्खंभो भयवं सहत्थेण पडिलायिओ ।
 भिगवईए भणियं-जइ एसा धारिणीहुहिया ता मम भगिणीधूया हवइत्ति । एत्थ पत्थावे थुवमाणो थुरवइएपुहइ
 सामी पंचदिणोणछम्मासतवपज्जंतकयपारणणो नीहरिओ धणावहमंदिराओ, अह अञ्जुकइयाए लोगस्स जयवाम-
 निरेक्खत्तणओ पढुभावस्स सयाणियराया तं सुवण्णदुट्ठिं गहिउगारद्धो, तओ पुरंदरेण सुणिऊण से वित्तायिजे
 भणियं-भो भो महाराय ! न एत्थ सामिकोडुंबियभावो, किंतु ज्ञस्स कस्सइ सहत्थेण एसा कम्मणा इयं वियइ
 तस्सेव हवइ, एवं च भणिए पुच्छिया रत्ता चंदणा-भुत्ति ! कस्सेयं दिज्जइ ?, तीए भणियं-किमिह पुच्छणिज्जं ?,
 एयस्स चेव निक्कारणवच्छलस्स जीवियदाइणो मम पिउणो धणावहसेट्ठिणो पणावइत्ति, ताहे सेट्ठिणा संगोविमा
 वसुहारा, पुणोऽवि संक्खेण भणिओ राया-एसा चरिमसरीरा भोगोवभोगपिवासायसुही महाणुभावा भववजो वट्ठमा-
 णस्स समुण्णन्नेक्खलालोयस्स पढमा अज्जाणं संजमुज्जोगपवित्तिणी तिस्सिणी भविसइ, अओ सम्मं रक्खेज्जासि इति
 भणिऊण अहंसणमुवगओ तियसाहिओ । राइणावि कन्नतेउरे सबहुमाणं संगोविया चंदणा । तयणंतरं च असारथं
 संसारस्स तरलतरंगभंगुरत्तणं संजोगस्स कुसग्गयजललवंचलत्तणं जीवियवस्स पज्जंतविरसत्तणं वितथपडिंवधस्स
 परिभावयंती सा गमेइ कालं, इमे य मणोरेहे करइ, जहा-

भगवद् पुंदरदित्से ! जणिहिसि तं वासरं तुमं कइया ? । जत्थ सहत्थेण जिणो उत्तारेही भवाओ ममं ॥ १ ॥
कइया ससुरासुरजीवलोयमज्झट्टियस्स जयगुरुणो । वयणामयं पिबिस्सामि सवणपुण्डहिं अविरामं ॥ २ ॥
कइया निस्सेयससोकखमूलहेऊ खणो भविस्सइ सो । देहंमिवि निरेक्ख्वा निस्संगा जत्थ विहरिस्सं ॥ ३ ॥
कइया उग्गमउप्पायेणएसणादोसलेसपरिहीणं । पिंडं अन्नसंती भमिहं उच्चावयगिहेसु ॥ ४ ॥
इय पवरमणोरहकप्पणाहिं तीसे दिणाइं वोलेत्ति । भावेण सबविरइं फासंतीए ससत्तीए ॥ ५ ॥
मूलावि सेट्ठिणी सुणियवित्तंतेण बहुप्पयोरहिं निंदिया नयरीजणेण ।

जयगुरूवि पुरागराइसु परिब्भमतो गओ सुमंगलाभिहाणगामे, तत्थ सणंकुमारसुरिंदो भत्तीए तिप्पयाहिणी-
काऊण भगवंतं वंदइ पियं च पुच्छइ, अह खणमेक्कं पज्जवासिऊणं सट्ठणे पडिनियत्ते सुरिंदे सामी सुछेत्तसंनिवेसंमि
वच्चइ । तत्तोवि माहिंदक्कप्पाहिवइणा हरिसुक्करिसेणं वंदिओ समानो विनिक्खमिऊण पालयं नाम गामं पट्ठिओ,
तहिं च धाहिलो नाम वाणिओ देसजत्ताए पयट्ठो सामिं संसुहमितं दट्ठूण अमंगलंतिकाऊण रोसवसायंविरेच्छो
नीलपहापडलपल्लवियगयणमंडलं कावालमायट्ठिऊणं एयस्स चैव समणगस्स मत्थए अवसउणं निवाडेमित्ति पहाविओ
वहत्यं वेगेण, एत्थंतरे सुमारियसुरिंदाएसेण पुच्चमणियसिद्धत्थवंतरेण छिन्नमेयस्स सहत्थेण सीसं, तंमि य विणिहए
अहासुहं विहरमाणो जयगुरू पत्तो चंपानयरीए, ठिओ साइदिन्नामाहणस्स अग्गिहोत्तवसहीए एगदेसंमि, जाओ य

दुवालसमो वासारत्तो, अह चाउम्मासखमणपडिवन्नस्स सामिणो माणिभदुन्नभदनाभाणो वाणमंतरसुरिंदा भत्ति-
भरमुव्वहता रयणीए समांगंतूण चत्तारिवि मासे जाव पूयं करेति, ते य दट्ठण विम्बियमणो साइदत्तमांहणो विन्नि-
तेइ-किं एस देवज्जगो जाणइ किंपि? जं देवा एयमणवरथं पूयंति पज्जुवासिंति य, तओ परिक्खानिभित्तं
जंपियमणेण—

भयवं! एत्थ सरीरे करसिरपमुहंगसंगए अप्पा । को भणइत्ति? तत्तो भवोत्ति जिणेण से कहियं ॥ १ ॥

जो अहमेवं मन्नइ, केरिसओ सो? अईव सुहुमोत्ति । सुहुमंपि किं भणिज्जइ?, इंदियगेज्झं न जं होइ ॥ २ ॥

एत्तो चिय सद्धानिलंगंधाईया, लहंति न कयाइ । अत्तववएसमेए, जं गेज्झा गाहगो अप्पा ॥ ३ ॥

इय एवमाइपसिणप्पवंचपरमत्थवित्थरे कहिए । विण्णो उवसंतमणो जयगुरुणो कुणइ बहुमाणं ॥ ४ ॥

अह पज्जंतमुवगए वासारत्ते जिणेसरो वीरो । कम्ममहिमहणसीरो जंभियगामंमि संपत्तो ॥ ५ ॥

तत्थ सुरिंदो वंदित्तु सायरं दंसिऊण नट्टविहिं । कइवयवासरमज्झे नाणुण्णत्तिं परिकहेइ ॥ ६ ॥

तत्तो मिंढियगामे पुव्वुवयारं सरित्तु चमरिंदो । नमिऊण चलणजुयलं जहागयं पडिनियत्तोत्ति ॥ ७ ॥

इय अणवरयसुरविसरथुणिज्जमाणचरणो दुस्सहपरीसहमहोयहिदरतीरपत्तो आणुपुद्दीए परिब्भममाणो संपत्तो
छम्मासिगामं, ठिओ य तस्स बाहिभागंमि असेससत्तोवरोहरहियंमि पलंबियभुओ काउस्सगेणं । एत्थंतरे तिवि-

दुमवतत्ततउयसाउरियसवणवेयणाभिहयसेज्जावालपच्चइयं समुद्धिन्नं अचंतमसुहं भगवओ वेयणीयं कम्मं, सो य
सेज्जावालजीवो तत्थेव गामे गोवत्तणेण वट्टमाणो वसहे भगवओ उस्तगट्टियस्स समीवे गोचूण गोदोहणाइकजे
पविट्ठो गाममज्झे, ते य वसहा निरंकुसं संचरमाणा पविट्ठा अडविंमि, इओ य खणंतरेण समागओ गोवो, समाउल-
हियओ गोणे अपेच्छमाणो पुच्छइ-भो भो देवज्जग ! मम संतिथा एवंधिहूवा गोगगा तुमए दिट्ठपुवा न वत्ति,
पुणो पुणो सदायरएणवि भणिज्जमाणेणावि जाहे जयगुरुणा न किंपि जंपियं ताहे पलयक्कालाचलविंयमाणकोवदसण-
दट्ठोदुडडेण भणियमणेण-भो मम सवायरएण समुल्लवित्तस्स पत्थरघडियहियस्स व तुज्ज न यणागंपि पडिवयण-
दाणमेत्तेऽवि अणुरोहो समुण्यणो, अह वहिरोत्ति न निसामेसि मे वयणं, एवं ता किं निरत्थएण तुह कन्नाछिदुवह-
णेणंति भणिऊण अइक्कूरज्जवसाणसंगएण खित्ताओ सामिणो वामेयरसवणविवेसु फाससलागाओ, पत्थरेण दढं ताव
समाहयाओ जान परोप्परं मिलियाओ, ताहे मा कोइ उक्खणिहिति पंचंतभागे सोडिऊण अवकतो गोवाहयो, सामी-
वि पणट्टमायाभिच्छत्ताइसल्लोऽवि सवणविंवरंतरूळ्ळुगढसल्लो अचंतधिर्विवालिओऽवि दूसहवेयणावसकिसीभूयसरीरो
मणागंपि धम्मज्झाणाओ अविचलियमाणसो तत्तो निक्खयिऊण गओ मज्झिज्जपायासन्निवेजं, तत्थ य पारजपदि-
यहे पविट्ठो सिद्धत्थवणियस्स गेहं, तओ तेण हरिसुच्छलंतपुलयजालेण वंदिऊण पडिलाभिओ भयवं, एत्थावसंरंमि
य तहिं चेव पुद्वागएण जिणं दट्ठूण भणियं खरगाभिहाणेण वेज्जणे-अहो भयवओ सच्चलक्खणसंपुद्गं सरीरं, केवलं

पमिलाणलायन्नत्तणेण सुणिज्झइ ससल्लव, इमं च निमुणिऊण असमजिणपक्खवायकलिएण ससंभमं भणियं सिद्ध-
 त्थेण-भो विज्ज ! जइ एवं ता निउणं निरुवेहि, कहिं ससल्लो एस जयगुरू?, एवं वुत्ते वेजेण अइसुण्यणिहिएण
 सणियं सणियं पलोयमाणेण जिणतणुं दिट्ठं कन्नविवरंतरनिहितं काससलियाजुयलं, दंसियं च सिद्धवणिणो, तं च
 तारिसमवलोइऊण जंपियं सिद्धत्थेण-अहो कस्सइ पावकारिणो अच्चतनिकरुणं विलसियं, जं एवंविहं कम्ममायरं-
 तेण न गणिओ दोग्गइनिवडणतिकखासंखुदुक्खागमो न पेहियं आकालियभजसं न चित्तियं धम्मविरुद्धं, अहया
 किमेएण दुट्ठचेट्ठियविकत्थणेण?, भो वेज्ज ! साहेसु को संपयं उवाओ जेण एयं सल्लमवणिज्झइ? । अन्नं च—

सल्लेण जएक्कपहुस्स कन्नविवरंतरं उवगएण । अणवरयं मह हिययं भिज्झइ एत्तो महाभाग ! ॥ १ ॥

अलियं उल्लवइ जणो जस्स वणो वेयणा हवइ तस्स । जं सामिणा ससल्लेण दुक्खिओऽहं दढं जाओ ॥ २ ॥

परमत्थेण इमो चिय जीयं माया पिया य सयणो य । नाहो सरणं ताणं ता एत्तो किं परं परमं? ॥ ३ ॥

इय एयस्स निमित्ते धणं च धन्नं च दव्वनिचयं च । मम जीवियंपि चइऊण कुणसु भो सल्लउद्धरणं ॥ ४ ॥

उद्धरिए एयंमि तु तुमए भवभीमकूवगाहितो । उद्धरिओ परमत्थेण विज्ज ! निस्ससयं अण्णा ॥ ५ ॥

नीसेसगुणनिहाणे इमंमि उवजुंजिऊण नियविज्जं । आसंसारं सुंदर ! आसीसाभायणं होसु ॥ ६ ॥

इयरंमिव उवयारो कीरंतो जणइ निम्मलं कित्तिं । किं पुण तइलोक्कादिवायरंमि सिखियरागंमि ? ॥ ७ ॥

इय सब्भावुब्भडवयणसवणपरिवद्वमाणपरितोसो । सामिचिकिच्छाकरणमि उज्जुओ भणइ सो विजो ॥ ८ ॥
सिद्धत्थ ! अलमेत्थ पत्थणाए, तथा करोमि जहा लहुं अवहरामि भयवओ सल्लं, केवलं निष्पडिकम्मो एस नाभि-
लसइ चिगिच्छं न बहु मन्नइ सरीरसक्कारं नाभिनंदइ ओसहाइविहाणं, एवं च ठिए कंहं कायवो सल्लससुद्धरणोव-
क्कमो ?, सिद्धत्थेण भणियं-पज्जत्तं वाउलत्तणेणं, जहा तुमं भणिहिसि तथा करिस्सामिति अब्बोऽन्नं जंपिराणं
निगंओ भुवणगुरू, ठिओ बाहिरुज्जाणे, सिद्धत्थेणावि नियपुरिसेहिंतो सवत्थवि अब्बोसाविओ सामी, दिट्ठो य
गामबाहिरुज्जाणे, तओ विज्जेण समेओ तदुवदिट्ठुदिवोसहसामगिसणाहो तत्थेव गओ सिद्धत्थो, तयणंतरं च वेज्जेण
तेल्लदोणीए निवेसाविओ सामी, पच्छा कयकरणेहिं चउव्विहविस्सामणावियक्खणेहिं पुरिसेहिं महाविओ, तओ सिद्धि-
लीभूएसु संबिबंघणेसु बाढं निजंतिऊण संडासएण अइच्छेययाए लहुमाकड्डिउमारद्धो कन्नेहिंतो सरुहिरं सल्लजुयलं,
अह नीहरिज्जमाणे सल्ले सा कावि वेयणा जाया । जीए मंदरधीरोऽवि कंपिओ झत्ति जयनाहो ॥ १ ॥ सुक्को य
घोरघणघोसविब्भमो जिणवरेण आरावो । कुलिसाहय(सुर)गिरिसिगदलणजाओव्व अइभीमो ॥ २ ॥ जिणमाहप्पेण
परं तडत्ति फुट्ठा समंतओ न मही । अन्नह चलणगुलिचालियाचले केत्तियं एयं ?, ॥ ३ ॥

एवमुप्पाडियंमि सल्ले संरोहणोसहीरसनिसेगपक्खेवेण पगुणीकयंमि सवणजुयले सविणयं वंदिऊण य जयनाहं
वेज्जवणिणो परमसंतोसमुव्वहंता सग्गापवग्गसोक्खसिरिं भमारिं करकमलनिलीणं मन्नंता गया सगिहं । परमोवगा-

रिति पूहओ वत्थकणगाइदाणेण विज्जो सिद्धत्थेण । एवं ते दोन्निऽवि आसयविसुद्धीए तिव्वमवि वेयणं भयवओ उदीरयंता सुरलोयलच्छिभायणं जाया । गोवालो पुण अइसंक्किलिद्धयाए सत्तमनरयपुढविं दुहनिवहभायणं पत्तो । तं च उज्जाणं महाभेरवंति पसिद्धिं गयं, देवउलं च तत्थ लोणेण कयं ।

एवंविहावयाणं हवंति जयभायणं जिणिंदावि । ता थोवायंकेऽविहु कीस जणो वहइ संतावं ? ॥ १ ॥

जइ एक्कासिं पि कयदुक्कयस्स एवंविहो दुहविवागो । ता असमंजसकिच्चेसुं पइदिणं कह जणो रमइ ? ॥ २ ॥

अतुलियवल्लिएणवि जिणेण तिवावयं सहंतेण । सहणे च्चिय कम्मविणिज्जरत्ति पडिवज्जइ जणेण ॥ ३ ॥

एवं च भगवओ वद्धमाणसामिस्स परीसहाणं जहन्नगाणं मज्झे उवरि कडपूयणासीयं मज्झमगाण य काल-
चक्कं उक्कोसगाण य इमं चेव सलुद्धरणंति । एवं गोवालेण मूलाओ आरद्धा उवसग्गा गोवालेण चेव निद्धियत्ति ।
एवं ता उवसग्गाण संकलणा भणिया ।

इयाणिं सयलं पि तवोविहाणं जं जहा भगवया समायसियं तं तहा संकलिऊण भणिज्जइ—

त्तव किर चाउम्मासे छक्किर दोमासीए उवासी य । बारस य मासियाइं वावत्तरि अद्धमासाइं ॥ १ ॥

एगं किर छम्मासं दो किर तेमासिए उवासी य । अह्हाइज्जा य दुवे दो चेव दिवइमासाइं ॥ २ ॥

भइं च महाभइं पडिमं तत्तो य सव्वथोभइं । दो चत्तरि दसेव य दिवसे ठासीय अणुवद्धं ॥ ३ ॥

गोधरमभिगहजुयं खवणं छम्मासियं च कासी य । पंचदिवसेहिं ऊणं कोसंबीए वरपुरीए ॥ ४ ॥

दस दो य किर महत्था ठाह सुणी एगाराइयं पडिमं । अट्टमभत्तेण जई एक्केकं चरिमराइयं ॥ ५ ॥

दो चेव य छट्टसए अउणातीसे उवासिया भयवं । न कथाह निचभत्तं चउत्थभत्तं च से आसि ॥ ६ ॥

बारस वरिसे अहिए छट्टं भत्तं जहन्नयं आसि । सव्वं च तवोकम्मं अपाणियं आसि वीरस्स ॥ ७ ॥

तिन्नि सए दिवसाणं अउणापणे उ पारणाकालो । उक्कुडुयनिसज्जाणं ठियपडिमाणं सए वहुए ॥ ८ ॥

इय एत्तियमेत्तं पच्चजादिणाउ आरब्भ सव्वगणे छउमत्थकालियाए भगवया तवचरणमायरियंति ॥ संपयं पारद्धं भणिज्जह—अह मज्झिमपावासान्निवेसाओ दुस्सहपरीसहनिसासंतमसं हणिऊण जिणदिवायरो समुम्मिमलंतसमहि-
गाभिरामदेहप्पहापडलपयासियदिसासुहो नीहरिऊण अणिययविहारेण विहरंतो संपत्तो समुत्तुंगपायारपरिचुबियंवें
नाणाविहवणसंडमंडियदितरं जंभियगामं नाम नयरं, तस्स य वहिया विभागे वीयावत्तचेइयस्स अहूरे अणे-
यतरुवरसुरहिउसुमामोयमत्तमहुयइंकारमणहररिसराए उजुवालियानईए तीरंमि उत्तरिल्ले कूले सामागामिहाण-
गाहावइस्स छेत्तंमि समुम्मिलियपढमपल्लवपसाहियस्स सुपुरिसस्स व सउणगणसेवियस्स सुरपुरस्स व सुमणसाभि-
रामस्स महानरिंदस्स पत्तनियरपरियारियस्स व सालमहापायवस्स हिट्ठओ द्वियस्स भुवणवंधवस्स छट्टेणं भत्तेणं
अपाणएणं आयावेमाणस्स गोदोहियासणं निसन्नस्स अणुत्तरेहिं नाणदंसणचरित्तेहिं अणुत्तरेहिं आलयविहारमहवज्ज-

वेहिं अणुत्तरेहिं लाघवखंतिगुत्तिमुत्तिसच्चुरिएहिं अप्पाणं भावेमाणस्स सहुळम्माससमहिगेसु दुवालससंवच्छरेसु
समइक्केतेसु वइसाहसुद्धदसमीए सुवयाभिहाणंमि दिणंमि विजए सुहुत्ते हत्थुत्तरानकखत्तंमि चंदेण जोगमुवागयंमि
सुकज्झाणानलनिद्दुधणघायकम्मिधणस्स पुहत्तवियक्कं सवियारमेगत्तवियक्कमवियार च झाइऊण उवरयस्स सुहम-
किरियानिवहिं वोच्छिन्नकिरियमप्पडिवाइ च सुक्कज्झाणचरिसभयदुग्गमसंपत्तस्स अणंतमणुत्तरं निवाघायं निरावरणं
पडिपुन्नं सयल्लोयालोयपयासयं केवलवरनाणंदसणं समुप्पन्नंति ॥

तयणंतरं च दुक्करतवचरणफलंमि केवलालोए । जाए सूरें पिव पयडिज्जइ तिहुअणं पहुणा ॥ १ ॥

अह वत्तीस सुरिंदा तक्खणचलियासणा लहुं पत्ता । विरयंति समोसरणं पायारतिएण परियरियं ॥ २ ॥

सुविभत्तचारुगोउरपोक्खरिणीपबलधयवडाइन्नं । सिंहासणं च मणिकणयनियरनिम्मवियहरिचावं ॥ ३ ॥

ताहे तिलोयनाहो शुवंतो देवनरनरिंदेहिं । सिंहासणे निसीयइ तित्थपणामं पकाऊण ॥ ४ ॥

जइविहु एरिसनाणेण जिणवरो मुणइ जोगयारहिं । कण्णोत्ति तहवि साहइ खणभेत्तं धम्मपरमत्थं ॥ ५ ॥

इय निरुक्कमविक्रमनिरक्खिब्भंतरारिविसरस्स । वीरस्स भुवणपहुणो चरिए सूरें व विष्फुरिए ॥ ६ ॥

संगमयाइपरीसहसहणऽज्जियनाणलाभसंबद्धो । संखेवेण समत्तो सत्तमओ एत्थ पत्थावो ॥ ७ ॥

इइ सिरिमहावीरचरिए परीसहसहणकेवलुवज्जणो सत्तमो पत्थावो ॥

अथाष्टमः प्रस्तावः

एवं केवललाभो भणिओ भुवणिक्कभाणुणो एत्तो । एक्कारसवि गणहरा जह से जाया तहा सुणसु ॥ १ ॥
अह निम्महियनीससमोहमहिमो सो महावीरजिणवरो तहाविहोवयारविराहियं परिसं नाऊण परोवयारकर-
णिक्कतल्लिच्छो छिन्नपेम्मबंधणोऽवि धम्मदेसणाईहिं तित्थयरनामगोयं कम्मं वेइज्जइत्ति परिमवित्तो असंखेज्जाहिं
देवकोडीहिं परिवुडो सुरविरइएसु नवसु कणयकमलसु नवणीयसुहफरिससु चलणजुयलं निवेसमाणो दिसासुहवि-
सारिणा देवजणुजोएण पडिहयंधयारे निसासमएवि दिवसेव समुवलक्खिज्जमाणपयडपयत्थसत्थो तित्थनाहो
दुवालसजोयणंतरियाए मज्झिमानयरीए गंतुं पवत्तो, तओ जाव सामी न पावइ मज्झिमापुरीं ताव तीसे अदूरदेसे
संठियमि महासेणवणंमि उज्जाणे देवोहिं समोसरणविरयणा काउमारद्धा, कंह चिय?—

आजोयणपरिमंडलभूभागं विगयकयकरुघायं । हरियंदणसुराहिरसच्छड्डाहिं पडिहणिययनियरं ॥ १ ॥
पंचविहरयणनिधिवरविरइयातुच्छपीढियाबंधं । हरिसुलसंतरोमंचकंचुया निम्मवित्ति सुरा ॥ २ ॥
वेमाणियेदेवहिं विरइज्जइ पंचराययणमओ । सालो विसालगोउरकविसीसयसुंदरो झत्ति ॥ ३ ॥
तत्तो बाहिं पसरंतकिरणपब्भारभारियनहविवरो । जोइसिएहिं ठविज्जइ सुवणणपागारपरिवेढो ॥ ४ ॥
तयणंतरं च दगरयधवलपहाहसियसारयमयंको । भुवणवईहिं कीरइ निम्मलकलहोयपागारो ॥ ५ ॥

पवरमणिरयणरुहरं वंतरदेवेहिं सालमज्झमि । सिंहासणं ठविज्जइ सपावपीढं सुरमणिज्जं ॥ ६ ॥
 तस्सोवरिं विउव्वइ सक्को उम्मिल्लपल्लवसिरिहं । जिणदेहाउ दुवालसगुणिगं कंकेल्लिपवरतरुं ॥ ७ ॥
 ईसाणसुरिंदो निम्मवेइ लंबंतमोत्तियसरीयं । छणमयलंछणघवलं फलिहदंडं च छत्ततिगं ॥ ८ ॥
 हेट्ठामुहठियविंटा रुंदतुहाममहुयरसणाहा । आजणु कुसुमबुट्ठी निवडइ गयणाओ वरगंधा ॥ ९ ॥
 सव्वयणामयाइं विचित्तकरइयसक्कचायाइं । रेहंति तोरणां नववंदणमालकलियाइं ॥ १० ॥
 मंदरमहियमहोयहिरवगंभीराइं तियसनिवहेण । दिसि दिसि पहयाइं चउविहाइं तूराइं दिवाइं ॥ ११ ॥
 पवणुद्धुयलीरोयहिमहल्लकलोलविब्भमेहिं नहं । छाइज्जइ धयनिवहेहिं वेजयंतीसएहिं च ॥ १२ ॥
 मयरदुहामसहस्सपत्तकीलंतहंसमिहुणाओ । पडिगोउरं वराओ पोक्खरिणीओ य कीरंति ॥ १३ ॥
 मिच्छत्तसत्तुविकखोभदक्खमक्खंडभाणुबिंबसमं । जंतूण य कमलोवरि ठाविज्जइ धम्मवरचक्कं ॥ १४ ॥
 देवच्छंदयपसुहं अन्नपि जमेत्थ होइ कायवं । वंतरसुरेहिं कीरइ पहिदुहियएहिं तं सवं ॥ १५ ॥
 इय नियनियअहिगाराणुरुवओ विरइयंमि ओसरणे । जिणरविभीयच्च निसा निन्नट्ठा तक्खणं चेव ॥ १६ ॥

एत्थंतरे सायरसुरखयरनमंसिज्जमाणो माणाइरित्तगुणरयणावासो वासवनिंदंसिज्जमाणमगो मग्गणुल्लगभव-
 जणजणियपरितोसो तोसरोसपरिवज्जियगत्तो गत्तसमभवपडंतजणसमुद्धरणपरो परमकरुणरसनिच्चियजयजणदुहज-

लणो दुरियगिरिदलणो जयगुरुपुद्गुवोरण पविद्रो समोसरणभूमिं, तओ सीहासणं पयाहिणीकाऊण ममावि पूयणिज्जे
तित्थंति दंसंतो कयक्किओवि नमो तित्थस्सत्ति भणन्तो निसण्णो पुद्वाभिमुहो सीहासणे, तयणंतरं च सेसत्तिदिसि
सिंहासणेसु सुरेहिं रइयाइं जिणपडिरूवाइं, ताणिओवि भगवओ माहणेण तयणरूवाइं चैव सोहिउं पवत्ताइं, अह
एगरूवोओवि सयलजंतुसंताणनित्थारणत्थं व चउरूवधरो जाओ जयगुरु, तयणंतरं च सयलतरणिमंडलसारपरमा-
णुनियरविणिम्मियं व सरीरपरिक्खेवमणहरं समुगगं भामंडलं, ठिया य भगवओ उभयपासेसु पंचवणगरयणविणि-
म्मियदंडुब्भडाओ तुसारगोखीरधाराओव गोराओ चामराओ करकभलेण कलिऊण दाहिणुत्तरभगवणवइणो चमरव-
लिनामाणो असुराहिवा, अह—

गायंति केओवि नचंति केओवि फोडंति केओवि तिवइंपि । पकरंति संधवं केओवि भयवओ भत्तिण् तियसा ॥ १ ॥
मेळंति सुरहिमंदारकुलुममयरदंबिंदुसंवलियं । जिणपय पुरओ केओविहु पंचविहं जलरुहसमूहं ॥ २ ॥
भगवणवइवाणमंतरजोइसवेमाणिएहिं देवेहिं । पूरिज्जइ महविवरं विमाणमालासहस्सेहिं ॥ ३ ॥
पंचप्पयारमणिरयणघडियसुंदरविमाणपडिहत्थं । उव्वहइ गयणविवरं पण्डुल्लियकमलसंडलिरिं ॥ ४ ॥
हरिहरिणसप्पसिहिनिउलससणमज्जारमूसगाईया । अन्नोऽन्नमुक्केवरा ओसरणमहिं समल्लीणा ॥ ५ ॥
वहुपुव्वभवपरंपरसमुवज्जियकम्मसत्तुभीयाणं । ओसरणं सरणंपिव रेहइ नीसेससत्ताणं ॥ ६ ॥

एत्थंतरे तिपयाहिणीकाऊण नमंतसिरिमडमाणिक्किरणविच्छुरियपायपीढा सुरासुरिंदा पणमिऊण जिणं निय-
नियढाणेसु निसन्ना, अह सहस्सनयणेण निसिद्धंमि कोलाहले निम्मलदसणमज्जालपक्खालियाए इव निम्मलाए
एगाएवि अणेगजणसंसयवुच्छेयसमत्थाए सुरनरसवरतिरियसाहाराणाए सज्जलजहरनिग्घोसंगंभीराए आजोअणमि-
त्तखेत्तपडिप्फलणपच्चलाए अमयवुट्ठीए इव निव्विवियअसेसभवसत्तसंतावाए वाणीए पवत्तो जिणनाहो धम्मदेसणं
काउं । कहं ?—

जह पाणवहाइसमुत्थपाचनिवेहेण भारिया जीवा । अयगोलगव्व भवसायरंमि मज्जंति वेगेण ॥ १ ॥
जह नाणदंसणचरित्तसेवणाहिं लहुं विसुज्झंति । पावंति य सोक्खपरंपराउ सग्गापवग्गेसु ॥ २ ॥
जह मिच्छत्तच्छाइयविवेयनयणा सुणंति न कयावि । नीसेसदोसरहिंयं देवं सुगुरुं च धम्मपरं (यं) ॥ ३ ॥
जह गिहकज्जासत्ता अवितत्ता कामभोगसोक्खेहिं । मणुअत्तं लद्धुपि हु सुद्धा धोवेण हारंति ॥ ४ ॥
जह तण्यमाथपरयाए भूरिसो ताणसरणपरिहीणा । पावंति दहणभेयणपमुहाइं दुहाइं नरएसु ॥ ५ ॥
जह पंचमहव्वयकवयगूढदेहा दलंति लीलाए । अब्भितरारिवग्गं अजेयममरासुरेहिं ॥ ६ ॥
जह सत्तुमित्तमणिलेहुसोक्खदुक्खेसु तुल्लचित्ताण । अमराहिंतोऽवि सुहं पाउब्भूएइ बहुययरं ॥ ७ ॥
तह जयगुरुणा नरतिरियदेवजणसंकुलाए परिसाए । हरिसभरनिब्भराए धम्मो सिद्धो जयवरिद्धो ॥ ८ ॥

अह पत्थरटकुक्कीरियव दढवज्जलेवघडियव । जिणवयणामयपाणेण सा सहा निचला जाया ॥ ९ ॥

किंच-अनिमसच्छीहिं सुहं जिणस्स पेच्छंतया विरायति । देवतलच्छिवरिअव तक्खणं तिरियनरनिवहा ॥ १० ॥

इओ य-तीसे नयरीए अचंतधणकणसमिद्धो छक्कम्मकरणपरो नियदरिसणपरुवियधम्मनिचलचित्तो सोमिलिजो नाम माहणो, तेण सग्गत्थिणा समारद्धो नयरीए बाहिंमि जन्नो, समाहूया दूरदिसाहितो बहुधिसासवणरिवारा असे-सविजाठाणपारगा चउवेयसुत्तथविसारया नियनियपद्मावलेवोवहसियसुरगुरुणो इंदभूइपमुहा एकारत अज्जावगा, मीलियाइं धयमहुजवपमुहाइं जागोवगरणाइं, पगुणीकयाओ दक्खिणानिभित्तं पवरपट्टुगमभेककणगाहरासीओ, मत्तीए कोउगेण उवरोहेण य समागओ बहुजणवओ, समारद्धो हुयवहे अणवरयमंतुवारपुवयं जन्नोणरणपक्खेयो । एत्थंतरे गयणयलमइवयंताइं सुरवहूसणाहाइं देवविंदाइं अबलोइऊण परितुहुो पेच्छगजओ, जेणेह य-मुहु लुं जट्टे जन्निणहिं, जं सयमेव विगहवंतो तियसा परितुहा इहइं अवग्रंतित्ति, अह चंडालनिलयं व जप्पयाडयं परिहरिऊण समोसरणसमुहं गंतुं पयट्टेसु तेसु वियंभिओ लोयप्पवाओ, जहा-सवन्नू तीयाणागभत्तुजागओ लोगुत्तरि-स्सरियरुवसामत्थजसाइगुणावासो एत्थ समोसढो, तस्स पूयणत्थं एस नयरजणो विमयालुढा सियसा य गच्छंतित्ति, अह सवन्नुत्ति गिरं सोउं उण्णन्नाढपरिकोवो । नियलोथाणं पुरओ इंदभूइं इभं भणइ ॥ १ ॥

मोत्तूण ममं लोगा तस्स समीवंमि कीस वचंति ? । किं कोउवि ममावि पुरो सवन्नू अत्थि एत्थ जए ? ॥ २ ॥

गच्छंतु व सुकखजणा देवा कहऽणेण विम्वयं नीया ? । पूयंति संश्रुणंति य जेणं सव्वणुबुद्धीए ॥ ३ ॥
 अहवा जारिसओ सो सव्वणू तारिसा सुरा तेऽवि । अणुसरिसो संजोगो गामनडाणं व सुक्खाणं ॥ ४ ॥
 किं वा इमिणा बहुजंपिएण ? अज्जवि असिद्धकज्जमि । सयमेव तत्थ गंतूण हेउजुत्तीहिं तं लमणं ॥ ५ ॥
 काउं हयप्पयावं पुरओ देवाण दाणवाणं च । नासेमि अहमसेसं खणेज सव्वणुवायं से ॥ ६ ॥ जुम्भं ।
 इय साहंकारं जंपिऊण पंचहिं सएहिं सिस्साणं । परियरिओ सो पत्तो जयगुरुणो पायमूलमि ॥ ७ ॥
 तयणु-ससहरकासकुसुमोहहिमंपंडुरच्छतियनिहयतरणिकरभियरपसरह, पमिलंतसायरनएखयरसुरिंदतदोहयवह ।
 पेच्छिवि जयनाहह महिम इंदभूह मणंमि, किं एयंति यमक्खियओ तक्खणि ओत्तरणंवि ॥ ८ ॥
 एत्थंतरंमि भुवणेक्कभाणुणा जिणवरेण संलत्तो । भो इंदभूह ! गोमय सागयमिइ महुरवाणीए ॥ ९ ॥
 ताहे चित्तियमिमिणा नामंपिहु मे वियाणए एसो । भुवणेऽवि पायडजसं अहवा को मं न याणेइ ? ॥ १० ॥
 जइ हिययगोयरं मे संसय मणजेज्ज अहव छिंदेज्जा । ता होज्ज विम्वओ मे इय चितंतो पुणो भणिओ ॥ ११ ॥
 किं मण्णे अत्थि जीओ उयाहु नत्थित्ति संसओ तुज्झ । सुंदर ! परिचयसु इमं संदेहं माणपडिसिद्धं ॥ १२ ॥
 अत्थि जिओ निब्भंतं इमेहिं सो लक्खणेहिं सुणियवो । चित्तंचेयणसण्णाविण्णानाईहिं पयडेहिं ॥ १३ ॥
 जइ पुण न होज्ज जीवो अवट्ठिओ सुकयदुक्कयाहारो । ता जागदानानोवहाणपसुहं मुहा सव्वं ॥ १४ ॥

इय जयगुरुणो वयणं सोऽं परिभाविउं च महपुवं । मिच्छत्तेण समं चिय उज्झइ तं संसयं झत्ति ॥ १५ ॥
अह ववगयकुविगण्णो दण्णं सण्णं व उज्झिउं दूरे । संसारविरत्तमणो निवडइ चलोणेषु जगगुरुणो ॥ १६ ॥
भणइ य भयवं ! नियदिक्खदाणओ भज्झइणुगहं कुणसु । इय वुत्ते नियहत्येण दिक्खिओ एम जयगुरुणा ॥ १६ ॥ १ ॥
तं पव्वइयं सोऽं अग्निभूइवि चित्तइ एवं । वच्चांमि तमाणेमी पराजिणेऊण सघण्णुं ॥ १७ ॥
मण्णे छलाइणच्चिय छलिओ माइंदजालिण्णं व । समणेण तेण तम्हा उवेक्खणिज्जो न सो होइ ॥ १८ ॥
संसयमेगंमि ममं जइ पुण छिंदेज्ज होमि ता सिस्सो । तस्सत्ति जंपमाणो सोवि गओ जिणवरसमीवं ॥ १९ ॥
हे अग्निभूइ ! कम्मं अत्थी नत्थित्ति संसओ तुज्झ । बाढमजुत्तो एसो विज्झइ जं कम्ममिह पप्रडं ॥ २० ॥
कहमण्णहा समेऽवि दु करसिरपसुहंगदेहतवंदे । एक्के भवंति सुहिणो अण्णे पुण दुक्खिया निधं ॥ २१ ॥
धारियधवलयावत्ता विलासिणीविहुयचामरा एगे । भडचडगरपरियरिया वचंति करेणुगारूढा ॥ २२ ॥
अण्णेऽणुवाहण चिय पए पए भयवसेण कंपता । एगाणिओ वरागा कहकहवि पंहंमि गच्छंति ॥ २३ ॥
एगे लीलाए चिय पूरंति मणोरहे बहुज्जणाणं । नियउयरंमिऽवि अन्नं भंरति भिक्खाए भमणेण ॥ २४ ॥
ससहरसुहीहिं बिंवाहरीहिं पण्णुल्लकुवल्यच्छीहिं । एगे विलसंति विलासिणीहिं सिद्धिं समवणेसु ॥ २५ ॥
मक्कडसुहीहिं मिरियत्थणीहिं अइलंबमोदुपोट्टाहिं । पच्चक्खरक्खसीहिं व अन्ने गिहिणीहिं सह ठंति ॥ २६ ॥

तुल्यमिव संबंधे समेऽवि कालाहंमि एगस्स । संपज्जइ बहुलाभो मूलंपि पणस्सइ परस्स ॥ २७ ॥
इय एवंविहकज्जाण कारणं कम्ममेव नायद्वं । निक्कारणाइ जायंति जेण न विचित्तकजाइ ॥ २८ ॥
एवं बुत्ते निच्छिन्नसंसओ पंचसिस्ससयसहिओ । भववेरगगमुवगओ पडिवज्जइ सोऽवि पवज्जं ॥ २९ ॥ ३ ॥
अह वाउभूइनाभो सहोयरो तेसिमेव लहुययो । पम्मुकमच्छरो भत्तिनिब्भरुब्भिन्नरोसंचो ॥ ३० ॥
कह तेऽवि तेण विजियत्ति विम्हयं परममुद्वहतो य । एइ जिणसन्निगासं संसयवोच्छेयमिच्छंतो ॥ ३१ ॥
अह सो जएक्कगुरुणा पयंपिओ भइ ! कीस वहसि तुमं । तज्जीवं तस्सरीरंति संसयं जुत्तिपडिसिद्धं ॥ ३२ ॥
जेण सरीरजियाणं एगंतेणत्तकप्पणे जीवो । नो होज्ज देहनासे घडभगे तस्सरूवं व ॥ ३३ ॥
देहे य विज्जमाणे जीएण विवज्जिएवि जाएज्जा । चित्ताइया धम्मा न य ते तद्विरहओ दिट्ठा ॥ ३४ ॥
तम्हा भिन्नाभिन्नो विन्नाणघणो सरीरओ जीवो । अन्नोच्चिय सुणियद्वो एवं भणियंमि पडिबुद्धो ॥ ३५ ॥
पंचहिं सिस्ससएहिं सहिओ सोऽवि हु जिणस्स पासंमि । निच्छिन्नपेमबंधो मुंचइ घरवासवासंगं ॥ ३६ ॥ ३ ॥
अह इमे तिन्निवि गहियपवज्जे निसामिऊण दुरुम्मुकमच्छरो गच्छामि संसयं च पुच्छामि न सामन्नरूवो सो भय-
वंति बहुमाणमुद्वहतो वियत्तो नाम अज्झावगो गओ जिणसमीयं, वागरिओ य भयवया, जहा-भइ ! वियत्त ! तुह पंच-
भूयसत्ताविसओ संसओ, सो य न जुत्तो, जओ पच्चक्खदिस्समाणा(भू)जलणजलानिलाइणो भूया कंहं अवलविउं

तीरंति?, जं च वेए भणियं-‘सुविणोवमा सवे भावा’ इचाइ, तं पि खणविलाससीलयं सवभावाणं पटुच्च, न उण सवहा भूयाभावसाहगत्तेणंति वुत्ते विद्यत्तो संसाराणुबंधेण समं चइऊण कुविणपं पंचहिं लत्तसएहिं अणुगम्ममाणो पवन्नो संजमुज्जोयं ४॥ तंमि य पवजं पवन्ते सुहम्मो नाम अज्जावगो विरुद्धेयपयनिबंधणं संसयं पुच्छिउक्काओ संपत्तो जिणंतियं, सो य भयवंतं सिंहासणयं पुवपवयसिंसाधिरुद्धं दिचायरं व पलोइऊथ परं पणोपपडमारणु- भवंतो संलत्तो जिणेण-अहो सुहम्म! तुमं इमं संसयं वहसि-जो इह भवे पुरिसो पसू वा सो परयधेडवि पुरिसत्तं पसुत्तं वा लहइ, इमं च न जुत्तं, जओ जो इह जम्मे सभावेण मइवज्जाइगुणजुओ मणूओ सो मणुयाउयं कम्मं बंधिऊण भवंतरे पुरिसत्तणं पाउणइ, पसूडवि मायाइदोसजुत्तो पुणोडवि पसुत्तयं पडिबजइ, व उण निच्छएण, जेण कम्मसच्चपेक्खा जीवाण गरैरागइत्ति, न य कारणाणुरूवं कळंति सद्धत्थ वित्थारिउं पारीगइ, पिळक्खसणरूवाओ सिंगाइकारणाओडवि सराईणमुण्णत्तिदंसणाओ, एवं च निसामिऊण वोच्छिन्नसंसओ पंचसयविणेयपरिवुद्धो सुहम्मो भयवओ सिस्सो जाओत्ति ५॥ अह तंमि पवइए मंडियनाओ अज्जावगो पुवक्खेण पत्तो समोसरणं, नागरिओ य भगवया-हंत बंधमोक्खविसयं संदेहं तुमं कुणसि, नणु न जुत्तयं, जओ बंधमोक्खा पुपरिद्धा येव। कहं?—

मिच्छत्तपमायकसायदुट्टजोगाइकारणेहिं दढं। जीवस्स कम्मबंधो जायइ अइभीसणो तत्तो ॥ १ ॥

अणुहवइ रज्जनहुच्च सवया नयतिरियठाणेसु। किञ्चिसदेवनरेसु य दुक्खाइं परमत्तिक्खाइं ॥ २ ॥

मोक्षो पुण निम्मलनाणचरणसद्धानपरमहेऊहिं । कम्माण जो विओगो सो नेओ सिवसुहण्फलओ ॥ ३ ॥
 नणु कहमणाइनियकम्मजोगओ तेसि होज्ज उ पिहुत्तं । भणणइ जह जलणेणं कंचणउवलाण अन्नोऽं ॥ ४ ॥
 एवं जियकम्माणवि विसिट्टनाणाइकारणेहिंतो । होइ विवेगो तत्तो मोचखो सिद्धो सयं चेव ॥ ५ ॥
 एवं च पलीणंमि संसयतमंमि नमिऊण जयगुरुणो चलणुण्णलं अट्टुट्टिसिस्ससयपरिवारो भंळिओ अणगारसउवम-
 णुलगोत्ति ६ ॥ अह मोरिओऽवि अप्पडिममाहणं सामिं नाऊण समागओ सगोसरणं, भणिओ व गगववा--अह !
 तुमं देवाभावविसयं संदेहसुव्वहसि, तं च इयाणिं परिचयसु, जओ पच्चक्खदिससमाणंमि अत्थंवि किं अणुमाणस्से-
 ङ्गाहिं ? एए देवा विमलमणिकुंडलपहापडलपल्लवियंगडलेहा नियंभियदिवंसुया सरीरकंतिस्सुज्जोइयदिसिनिवहा
 महासोक्खा अपरिभूयसासणा सुणिणोव नभोगमणा इह चेव संपयं वट्ठति, अओ अणुचिया एयाण विसए अभा-
 वकप्पणा, जं च सेसकालं न दीसंति तत्थ लोयगंधस्स अचंतमसुभत्तणओ पेच्छगणावल्लोयणाइसु व निचमणिल-
 त्तचित्तत्तणेण न कंहपि आंगंतुसुच्छंहति, जिणमज्जणाइसु पुणो भत्तिगराय्हिया आगच्छंति व । एवं सुणिए वत्थुत्ते
 मोरिएण अट्टुट्टिसिस्ससयपरियरएण अब्भुवगया भावसारं जिणपव्वज्जत्ति ७ ॥ अह अकंपिओऽवि कोऊहलालिय-
 चित्तो संसयमवणेऽकामो संपत्तो भयवओ समीवं, सागयभणणपुव्वयं च संभासिओ जयगुरुणा--अहो अकंपिव ! तुयं
 एवं मन्नेसि, जहा--देवा चंदसूरतारयपमुहा ताव पच्चक्खदंसणेण नज्जंति, नारया पुण सुमिणेऽवि अदिससमाणा नूनं न

संतिति, अणुचियं इमं, जओ ते नारया कम्मपरतंतत्तणेण इहागंतुमसमत्था, तुम्हारिसावि तत्थ गंतूणमक्खमा, ता कहमुवलंभो जाएज्जा?, खाइगनाणोवेवेयाणं पुण वीयरगाण पच्चक्खा चेव, न य खाइगनाणोवेवेया असेसपयत्थसत्थ-वेइणो न संतिति वोत्तवं, मए विय वभिचारसंवाओत्ति, एवं छिन्नमि संसए तिहिं खंडियसएहिं समं अकंपिओ अणगारियं पडिवदोत्ति ८ ॥

एत्थावसरंमि अयलभाया नाम अज्झावगो सुणियजिणमाहप्पो मणोगयवियप्पनिब्भंजणत्थं गओ जयगुरुसमीवं, भणिओ य सामिणा, जहा-भो अयल! पुन्नपाचाइं अत्थि नत्थित्ति संसयं तुममुव्हसि, अजुत्तिसंगयं चेयं, सुहा-सुहफलजणगत्तणेण पुव्वभणियकम्मपक्खनाएण चेव पुन्नपावाणवि पसाहणाउत्ति भणिए जायजहावद्वियविवेओ तिहिं खंडियसएहिं समेओ चारंगव भववासं उज्झिऊण समणो जाओत्ति ९॥ तयणंतरं च तं पवइयं सोऊण जिण-तियं पाउब्भूओ मेअज्जो नाम अज्झावगो, सोऽवि संलत्तो तिहुयणेक्कक्खुणा महावीरेण, जहा-मुंदर! तुमंमि इमं विगप्पेसि-भूयसमुदायधम्मत्तणेण चेयणारूवस्स जीवस्स कहं भवंतरगमणं घडेज्जा?, भूयववगमे चेयणारूवजीवस्सवि विगमाउत्ति, नणु अवघडमाणमेयं, पुढवाइण भूयाण एगतथ मीलणेऽवि चेयणाणुवलंभाओ, तम्हा तव्वइरित्ता चेव चेयणा जीवधम्मरूवा अब्भुवगंतवा, तदब्भुवगमे य जीवस्स निरुवचरिओ परभवगमो सिद्धो चेव, जाइसरणाईहिं परभवसाहणाओ य, एवं कहिए निच्छिन्नसंसओ मेयज्जो तिसयसिस्सपरियरिओ भयवओ समीवे पवइओ १०॥

अह दससुवि तेसु पव्वजं पडिवन्नेसु पभासो सकोऊहलं तिहिं सएहिं खंडियाणं परिवुडो दूरमुक्कंपडिवाभिमाणो पंजलिउडो भुवणच्छेरयकारयविचित्तिसयसमेयं सामिं दट्ठण हरिसुफुल्लोयणो संसयं पुच्छिउकामोऽवि संखो-
भेण वोत्तुमपारयंतो भणिओ पारगएण—अहो पहास ! निव्वाणमत्थि नत्थित्ति संदेहदोलमालंबेसि तुमं, नणु उज्झ-
सु सव्वहा एयं, जओ अइसयनाणिपच्चक्खत्तेण सयलकम्मकलंकपमुक्कजीवावत्थाणट्ठणं निव्वाणं चउग्गइयसंसा-
रावासविलक्खणरूवं निरुवचरियं अत्थि, सुद्धपयकि(वच्च)तणाओ जीवोव्व, तं च बुहेहिं सइहियव्वं, जं पुण
अविज्जमाणं तं सुद्धपयवच्चंपि न होइ, जहा आगासकुसुमंति भणिए पणट्ठसंसओ जयगुरुं पणमिऊण सपरिवारो
पभासोऽवि समणो जाओत्ति ११ ॥ एवं च—

वोच्छिन्नपेम्मवंचणा पणट्ठकम्मसंधणा, विसिट्ठजाइसंभवा पसिट्ठगोत्तउब्भवा ।

पहाणरूवसालिणो विसुद्धकित्तिधारिणो, अचिन्तसत्तिसंजुया अलेससत्थपाया ॥ १ ॥

पयंडकामखंडणा पहीणदोसभंडणा, सुरासुरिंदवंदिया समग्गलद्धिनंदिया ।

जिणिंदधम्मसंगया विसुक्कसव्वसंगया, गुणावलीहिं सोहिया न कामिणीहिं मोहिया ॥ २ ॥

इय इंदभूइपमुहा सुणिणो एक्कारसावि तव्वेलं । दिसिंदतिणोव्व रेहंति सिस्सकरिकलहपरियरिया ॥ ३ ॥

किं वा वन्निज्जइ तेसि जेसि सयमेव भुवणनाहस्स । कप्पतरुक्सिलयसमो हत्थो सीसंभि संठाइ ॥ ४ ॥

इओ य-जा पुवभणिया दहियाहरायमुया चंदणाभिहाणा कज्जा पढमसिस्सिणी भयवओ भविस्सइत्ति सक्केण संगोवाविया आसि सा तक्कालं सयाणियरायमंदिरे निवसंती गयणंणे अणवरयं सुरविद्याणाइं इंताइं गच्छंताणि य पलोइऊण निच्छियजिणकेवलनाणसमुप्पाया पवज्जागहणुक्कसिरी अहासज्जिहियदेवयाण् करयेलेण कलिऊण तगो-सरणमुवणीया समाणी परमं पमोयसंभारमुवहंती तिपयाहिणादाणपुव्वगं वंदिऊण जिणमुवहिआ पथ रागहणत्थं ।

एत्थंतरे अन्नाओवि राईसरतलवरसेट्टिसेणावइभातिसाभंतकज्जाओ जियवइवनायत्तज्जापभयवरगजाओ सवचि-रइगहणत्थं तदंतियं पाउब्भूयाओ । तओ भगवया चंदणं पुरओ काऊण सहत्थेण दिविसयाओ, पाप्पासपुज्जम-उसमत्था य बहवे जणा ठाविया सावयधम्मं, एवं एत्थ समोसरणे जाओ भगवओ चउविही संघो ॥ जायंमि य गुणरयणरयणांगरमि संघे भगवया इंदभूइपमुहाणं पहासपज्जवसाणाणं एक्कारसणहंमि तेसिं सगलपुव्वणागत्यसत्थ-संगहधम्मयाइं 'उप्पन्नोइ वा विगएइ वा धुवेइ व'त्ति कहियाइं तिप्पि पयाइं, तेहि य पुव्वभवत्थसज्जत्थपरमत्थ-सत्थवित्थारवियक्खणत्तणेण तक्कालुप्पन्नपन्नाइसयमुवहंतेहिं तयणुसारेण विरइयाइं हुवालस अंगाइं, तहा विरयमा-णाणं च सत्तण्हं गणहराणं जायाओ विभिन्नाओ वायणाओ, मेअज्जपभासाणं अयलभाइअकंपिधाण य परोअरं समाओ चेव, एवं च निवत्तिए सुत्तविरयणे इंदभूइपमुहाणं गणहरयंमि ठावणनिमित्तमुवट्टिए सयसेव. सुवणवंधवे अवसरंति कलिऊण पवरगंधंधुरवासुम्मिस्सचुण्णभरियं रयणत्थालं गहिऊण सुरनियरयियरिओ सुरिंदो पाउ-

नमूओ जिणंतियं, ताहे सामी सीहासणाओ उट्टिता पडियुणं सुट्ठि चुण्णणं गिणहइ, तयणंतरं गोयमसामिप्पमुहा
 एक्कारसवि गणहरा ईसिओणया परिवाडीए ठायंति, निरुद्धाहिं तियसेहिं तूरवे जयगुरू गुणेहिं पज्जेविहि य मए
 तुह तित्थमणुणायंति भणमाणो पढमं चिय सहत्थेण गोयमसामिणो सीसेदंसमि चुण्णाणि पक्खिवइ, एवं चिय
 जहक्कमेण सेसगहराणंपि, देवावि गयणयलमोगाढा आणंदवियसियच्छा गंधधीकयमुद्धुयमुद्धुयमुद्धुवियमुहलं
 पुण्फवासं चुण्णवासं च निसिरंति, गणं पुण चिरजीवित्तिकल्लुण सुहम्मसामी पंचमगणहरं धुरे ठवेत्ताभयवं अणुजागइ।
 चंदणंपि अज्जाणं संजमुल्लोगघडणत्थं ठावेइ पवत्तिणीपए। एवं एक्कारसाहिं गणहरोहिं अणेगेहिं साहूहिं साहुणीहि
 य परियरिओ जंबुद्दीघोच्च दीवंतरेहिं सुमेरुच्च कुलाचलेहिं ससिच्च तारानिवहेहिं सामी सोहिउं पवत्तो। अवि य-
 एगागिणोवि भुवणेक्कबंधुणो को मिणेज्ज माहणं?। किं पुण गोयमपमुहेहिं गणहरोहिं परिगयस्स ॥ १ ॥

अह कइवय दिवसाइं भवसत्तज्जणं पडिबोहिज्ज तत्तो निक्खंतो जयगुरू। तो आगासगएणं लंबंतमोत्तियजाल-
 विराइएणं छत्तेणं आगासगयाइं कुमुयमयंकमऊहमणहराहिं चामराहिं गयणयलवलंविणा समणिपायपीढेण सीहा-
 सणेणं रणज्झणिरिक्किणीकुलकलकलमुहलेण अणेगकुडुभियाभिरामेण पुरोगामिणा माहिंदज्झएण य विरायंतो
 सायरं अणुगच्छंतीसु सुरासुरकोडीसु अणुकूलंतसु वायंतसु सुराहिसमीरणेसु भत्तीएच्च नमंतसु मगतरुवरेसु मुणिय-
 विचारेसु खलेसु व हेट्ठओमुहं ठायंतसु कंटगेसु मणोरमेसु सव्वेसु उउसु निययमाहण्णेण तिलोयरज्जसिरं एगत्य मि-

लियमुवदस्यतो दुब्भक्खमारिडमराइ उवसामितो ठाणठाणेसु समोसरणमहिं पडिच्छमाणो परप्पवाए सुन्नाकुण-
माणो निव्वाणमगं पयासयंतो विरइप्पयाणेण भवसत्तज्जणमणुगिण्हंतो पुरगामखेडकब्बडाइसु विहरमाणो कमेण
संपत्तो पुव्वभणियं माहणकुंडग्गामं नयरं ।

तहिं च नयरादूरवत्तिंमि नाणाविहतलयासंकुलंमि बहुसालयनामंमि चेइयंमि विरइयं परमविच्छित्तिसणाहं
सुरोहिं समोसरणं, रयणपागरब्भंतरे पइद्वियं पुव्वाभिमुहं समणिपायपीढं सीहासणं, निसन्नो तत्थ जएक्कचूडामणी
महावीरो, पायपीढपच्चासन्ने य निलीणो भयवं गोयमसामी, नियनियठाणेसु निविट्ठो देवनरतिरियनिवहो ।
एत्थंतरे वित्थरिया माहणकुंडग्गामे नयरे पसिद्धी, जहा-वहुसालगचेइयंमि भयवं महावीरो समोसढोत्ति, एयं
च निसामिऊण पुव्वभणिओ उसभदत्तमाहणो परमपमोयभरनिब्भरभरियमाणसो देवाणंदं माहणीं भणिउमाढत्तो,
जहा-तइलोक्कतिलयभूओ भूयत्थकहापरूवणसमत्थो । सुंदरि ! सिरिवीरजिणो सयमेव समोसढो वाहिं ॥ १ ॥

निरुवमकळाणकलावकारणं तस्स दंसणंपि पिए ! । किं पुण अभिगमवंदणपयसेवापमुहपडियत्ती ? ॥ २ ॥

ता वच्चाभो तहंसणेण कुणिसो सजीवियं सफलं । तीए वुत्तं पिययम ! किमजुत्तं ? एह वच्चाभो ॥ ३ ॥

सा किर जइवसंचिय गब्भाओ अवहडो जएक्कगुरू । तत्तो चिय अच्चत्थं समुव्वहित्था महासोगं ॥ ४ ॥

अह तदब्भुवगमं नाऊण उसभदत्तेण आहुया कोडुंविथपुरिसा, भणिथा य-भो ! सिग्घमेव वररयणमयक्किणी-

जालमंडियमञ्जभागेहिं कंचननत्थापगहिण्हिं नीलुण्णलविरइयसेहेरहिं उल्लिहियासिगेहिं लहुण्डुसरोरहिं पवरगो-
 णजुवाणएहिं संगयं संजत्तेह संदणं जेण गंतूण वंदांमो जयगुरुं, जं सामी आणवेइत्ति भणिऊण निगगथा कुंडुविया
 पुरिसा, पगुणीकओ रहवरो, समुवणीओ उसहदत्तस्स, तओ देवाणंदाए समेओ तमारुहिऊण पुरिसपरिचारपरिय-
 रिओ पयट्ठो जिणाभिमुहं, पत्तो कमेण बहुसालयसमीधं, छत्ताइच्छत्तपमुहाइसयदंसणेण य रहाओ पचोरुहिऊण
 पंचविहेणं अभिगमेणं पविट्ठो समोसरणे, तिपयाहिणादाणपुच्चयं च पणमिऊण जिणं पहिड्डमणो निविट्ठो भूमिपट्ठो ।
 देवाणंदाओ भगवंतं पणमिऊण सविणयं उसहदत्तं माहणं पुरओ काऊण उद्धट्ठाणट्ठिया चेव सुस्सूसमाणी
 मालतलारोवियपाणिंसंपुडा पज्जुवासिउमारद्धा, नवरं जंसमयं चेव तीसे भयवं चक्खुगोयरमुवगओ तंसमयं चिय
 वियसियवयणकमला हरिणुण्णुल्लोयणंसंदमाणणंदसलिला जलहरधारापहयकयवकुसुमपिव समूससियरोमकूवा
 थणमुहनिससरंतखीरधारा य जायत्ति, तं च तहाविहं पेच्छिऊण समुण्णन्नंसओ गोयमसामी जयगुरुं पणधियऊण
 पुच्छिउं पवत्तो-भयवं ! किं कारणं देवाणंदा अणिमिसाए दिट्ठीए तुम्ह वयणं पेहमाणा नियसुयंदसणाणुरूवा
 पेमपम्भारगम्भयमवत्थं पत्तत्ति ? भगवथा भणियं-भो गोयम ! देवाणंदा ममं जणणी, अहणणं देवाणंदाए कुच्छिं-
 भवो पुत्तो, जओ सुरभवचवणाओ आरब्भ वायासी दिणाइ इमीए गम्भंमि तुत्थो, अओ चिय पुवसिणेहाणुरागेण
 एसा असुणियपरमत्थावि एवंविहं संभममावन्ना ।

इय सोऊण जिणिंदस्स भासियं उच्छलंतरोमंचा । देवाणंदाए समं झडत्ति जाओ उसभदत्तो ॥ १ ॥
परिसाजणोऽवि सबो चिम्हयमंचंतमुवगओ सहसा । अस्सुयपुव्वे सुणिए को वा नो विम्हयं वहइ ? ॥ २ ॥
तओ उसभदत्तो देवाणंदा य समुप्पन्नगाढयरिसपगरिसाइ पुणोऽवि निवडियाइ जयगुरुणो चळणेसु, भयव-
यावि 'दुण्डियारा अम्मापियरो'त्ति सेसलोयस्स उवदंसणत्थं च पारद्धा देसणा । कइं चिय ?
भो भो देवाणुपिया ! अणाइरूवंमि एत्थ संसारे । को किर कस्स न जाओ मायापिइपुत्तभावोहिं ? ॥ १ ॥
कस्सवि न वा विओगे अणवरयगलंतनयणसल्लेण । पइसभयमुक्कपोक्कं हाहारवगब्भिणं रुन्नं ? ॥ २ ॥
चोइसरल्लुपमाणे लोणे नो कत्थ वावि वुत्थमहो ? । अणवरयमावयाणं काण व नो भायणं जाओ ? ॥ ३ ॥
कस्स व आणानिइसवत्तिणा दासनिविसेसेण । नो वट्ठियं दुहट्ठेण पाणिलोएण एएण ? ॥ ४ ॥
एवंविहदुहनिवहेक्ककारणे कह भवे महाभीमे । खणमेत्तिपि विजायइ निवासवुद्धी सुबुद्धीणं ? ॥ ५ ॥
एत्तो चिय सासयसोक्खकंखिणो लक्खिउं भवसरूवं । तणमिव रजाइ समुज्झिऊण पच्चजमल्लीणा ॥ ६ ॥
ता जाव पुन्नपब्भारपावणिज्जा इमा हु सामग्गी । तुब्भेवि ताव गिण्हह निस्सेयससाहंगं धम्मं ॥ ७ ॥
इय जगगुरुणा कहिए तेसिं आणंदसंदिरच्छीणं । केवलमणुभवगम्मो कोइ पमोओ समुपपन्नो ॥ ८ ॥
तओ उसभदत्तो देवाणंदाए समेओ हट्ठुट्ठो उट्ठिऊण साभिं तिवसुत्तो वंदिऊण करयलकमलकोससेहरं सिंर

दूरं उन्नामिऊण भणिउं पवत्तो-भयवं ! अवितहमेयं जं तुब्भे वयह, ता अणुगिणहह अहे सदिकखापयण्णेणं, विर-
त्तमिणिंह गेहवासाओ माणसं, भगवया भणियं-जुत्तमेयं भवारिसाणंपि, तओ कयकिच्चमप्पाणं मन्नताइं उत्तर-
पुरत्थिमदिसिसमुज्झियभूसणकुसुमदामाइं निव्वत्तियपंचमुट्ठियलोकम्माइं ताइं तिपयाहिणादाणपुरस्सरं परमेसरं
वंदित्ता भणिउं पवत्ताइं-भयवं ! जरामरणरोगसोगविप्पओगजलणजालाकलावकवलियाओ अहे एत्तो भवजरकुडी-
राओ नित्थारेसु सहत्थेण तुमं, तुह पयसरणमल्लीणो खु एसो जणो, इय भणिए भुवणगुरुणा सयमेव तोसिं दिन्ना
दिकखा, कहिओ साहुसमायारो परुविओ आवस्सयविही, एवं तक्कालोचियं सव्वं विहिं देसिऊण भयवं अज्जचंद-
णाए पव्वत्तिणीए देवाणंदं सिस्सिणिच्चाए पणांमेइ, उसभदत्तं च थेराणं समण्णेइ, अह ताइं निक्कलंकसमणधम्मपरि-
पालणवद्धलक्खाइं अपुच्चापुव्वतवचरणपरायणाइं अहिएक्कारसअंगाइं पज्जंतसमयसमाराहियसंलेहणाइं निवाणगगहा-
मंदिरारोहेहऊभूयं निस्सेणिंपिव खवगसेणिं आरुहिऊण पत्ताइं दोन्निवि सिवपयंमि ।

भयवंपि वद्धमाणो परिअरिओ गोयमाइसमणेहिं । हिययाहिंतोवि तमं अवणित्तो भव्वसत्ताणं ॥ १ ॥

गामागरनगराइसु विहरंतो सिवपयं पयासित्तो । खत्तियकुंडग्गामे नयरम्मि कमेण संपत्तो ॥ २ ॥

तत्थ य सुरेहिं रइयं चीतरुपायारगोयरसणाहं । ऊसियसियधयनिवहं जणसुहकरणं समोसरणं ॥ ३ ॥

वत्तीसंपि सुरिंदा जिणसुहकमलवल्लेयणसत्तणहा । विविहविमाणारूढा ओअरिया सुरपुरीहिंतो ॥ ४ ॥

अह पुष्पदुवारेणं पविसिन्ना सुरगणेण शुद्धतो । सिंहासणे निसन्नो पुद्वाभिमुहो जिणवारिदो ॥ ५ ॥
एक्कारसवि गणहरा केवलमणपज्जवोहिनानी य । चउदसदसपुद्दीविउद्धिइहूपत्ता य मुणिन्नसभा ॥ ६ ॥
उद्धट्टिया उ वेमाणियाण देवीओ तहय समणीओ । ठायंति जिणं नमिउं दाहिणपुब्बंमि दिसिभाए ॥ ७ ॥
अह दाहिणदारेणं पविसिन्ना विणयपणयदेहाओ । भवणवइवाणमंतरजोइसदेवाण देवीओ ॥ ८ ॥
काउं पयाहिणं भुवणवंधुणो धम्मसवणलोभेण । निसियंति पहिट्टाओ दाहिणपच्चत्थियविभागे ॥ ९ ॥
तत्तो पच्छिमदारेण पविसिउं पवरभूसणसणाहा । भवणवइवाणमंतरजोइसिया हरिसपणयसिरा ॥ १० ॥
विहिणा जिणं नमंसिय गणहरकेवलपमोक्खमुणिणो य । निविसंति जिणाभिमुहा उत्तरपच्चत्थिमदिसाए ॥ ११ ॥
उत्तरदिसिदारेणं तत्तो पविसिन्नु दिक्खरूवधरा । वेमाणियसुरवग्गा नरा य नारीजणा य तहा ॥ १२ ॥
पम्मुक्कपरोप्परवरमच्छरा धम्मसवणतल्लिच्छा । उत्तरपुरत्थिमंमि य ठायंति दिसाविभागंमि ॥ १३ ॥
न कुणंति हासखेड्डाहं नेव चक्खुं खिंयति अन्नत्थ । चित्तलिहियच्च सब्बे जिणंदवयणं पलोयंति ॥ १४ ॥
तयणंतरं च बीए पायारब्भंतरे तिरियवग्गो । हयमहिस्सीहपमुहो उज्झियेवरो सुहं वसइ ॥ १५ ॥ कंहं चिय ?-
दिणयरकरसंतत्तं भुयंगमं छायए सिंहेडेहिं । तंडविण्हिं सिंहडी करुणाए विमुक्ककुविण्ये ॥ १६ ॥
कंडूयइ दसणकोडिए कुंजरो केसरिस्स मुहभागं । धावाराइ सीही हरिणसावयं दढल्लुहाभिहयं ॥ १७ ॥

मञ्जारोऽवि हु ससिरंमि मूसगं ठवइ गाढपणएण । वणसेरिहोऽवि तुरयं रसणाए दढं परामुसइ ॥ १८ ॥
 इय जत्थ निव्विवेयावि पाणिणो तत्थ तियसनरनिवहा । उज्झंति मच्छरं जं परोप्परं तं किमच्छरिये ? ॥ १९ ॥
 तइए पायारब्भंतरंमि देवाण विविहरूवाइं । विजयपडायापयडाइं संनिसीयंति जाणाइं ॥ २० ॥
 एत्थंतरंमि भुवणेक्कभाणुणा कलियसयलभावेण । वयणकिरणेहिं मिच्छत्तिभिरमवहरिउमारद्धं ॥ २१ ॥

इओ य पुव्वमेव जिणविहारनिवेयणवावारियपुरिसेहिं सामिसमागमेण वद्धाविओ नंदिवद्धणनराहिवो, हरिसभर-
 निस्सरंतरोभंचेण य तेण दवावियं तेसिं चित्तियाइरित्तं पारिओसियं, भणिओ य संनिहियकिंकरवगो—अरे ! सिग्धं
 संजत्तेह जयकुंजरं पगुणीकरेह तुरंगवद्दाइं पयट्ठोवेह नयरसोहं उब्भवेह सव्वविजयचिंघाइं आइक्खह आघोसणा-
 पुव्वयं नयरीजणस्स जहा सिग्धं पाउब्भवह कयमज्जणविलेवणा नियविमवाणुरूवजाणजंपाणारूढा नरिंदसमीधं
 जेण वंदिज्जइ महावीरोत्ति भणिए जं देवो आणवेइत्ति पडिवज्जिऊण संपाडियं नरिंदसासणं, समुवणीओ जयकुं-
 जरो, समारूढो य नरिंदो, पुरजणेण परिथरिओ पयट्ठो भयवओ अभिसुहं, तओ छत्ताइच्छत्ते पेच्छिऊण पमुक्कराय-
 चिंधो परेणं विणएणं जयगुरुं विन्नवेउं पवत्तो । कहां ?—

गयणंगणं व ससहरविज्जियं नाह ! एत्तियं कालं । नयरमिमं तुह विरहे पणट्ठोसोभं दढं जायं ॥ १ ॥

अहमवि तुम्हऽणुवित्तीए नूण चत्तो न रायलच्छीए । अन्नह तुमए रहियस्स नाह ! का जोगगया मज्झ ! ॥ २ ॥

तुह सच्चरियाणं कित्तणेण पइदियहमेव पुणरुत्तं । साहारो मह जाओ जीयस्सवि निस्सरंतस्स ॥ ३ ॥
ता अज्जं चिय सुदिणं अज्जं चिय वंछियाइं जायाइं । चिरकालाओवि जएक्कनाह ! जसिहागओ तंसि ॥ ४ ॥
इय सन्भावुब्भडपेम्मगब्भवयणाइं जंपिउं राया । सट्ठाणंमि निविट्ठो ठविउं दिट्ठं जिणमुहंमि ॥ ५ ॥
इओ य तत्थेव नयरे भयवओ भाइणिज्जो रूवलायणसाली जमाली नाम कुमारो परिवसइ, सो य वद्धमाणंमि
पव्वज्जं पडिवन्ने नंदिवद्धणनरिंदेण भगवओ पुत्तिं पियंदसणाभिहाणं परिणाविओ समाणो केलाससेलसिहरसमुत्तुंग-
धवलहरमारूढो वज्जेतेहिं चउविहाउज्जेहिं वरतरुणीसंपउत्तेहिं बत्तीसइवद्धेहिं नाडएहिं उवगिज्जमाणो उवन-
चिज्जमाणो य पाउसवासारत्तसरथहेमंतवसंतगिम्हपज्जवसाणे छेचेव उउणो जहाविभवेणं माणयंतो पंचविहे पवरे
माणुस्सए कामभोगे पच्चणुब्भवमाणो सिंगाडगतिथचउक्कयच्चरेसु जिणगमणसवणहल्लुफ़लियं परिचत्तवावारंतरं हल-
बोलाउलियदियंतरं जणसमूहं एगमगगणुलग्गं अवलोइऊण सविम्भयं नियपरियणमापुच्छइ-अरे किमज्ज एत्थ
नयरे इंदमहो वा खंदमहो वा सुगुंदमहो वा नागमहो वा जक्खमहो वा चेइयमहो वा ? जं एस पुरज्जणो एवमे-
गाभिसुहो गच्छइ, परियणेण भणियं-कुमार ! नो अज्ज इंदखंदार्इणं ऊसवविससो, किंतु भयवं महावीरो तुम्ह
माउल्लो समणसंधपरिखुडो बाहिं समोसढो, तस्स वंदणवडियाए एस जणो वच्चइ, एवं च निसाभिऊण हरिसि-
वससमूससियरोमक्खवो कयमज्जणविलेवणालंकारपरिग्गहो सकोरिटमल्लुदाभेणं छत्तेणं धरिज्जमाणेणं नाणाविहपहरण-

करपुरिसपरिखित्तो पवररहनिसन्नो गओ समोसरणं, दूराओ चिय ओयरिओ रहाओ, परमायेण वंदिओ जिणो,
तओ अणिमिसाए दिट्ठीए सामिमुहमवल्लोयमाणो पज्जुवासिउमारद्धो । भगवयावि पयट्ठाविया धम्मदेसणा ।
कहं चिय ?—

करयलपरिगलियजलं व गलइ पइसमयमेव जीयमिमं । वाहिजरायंकाविय देहं दूमंति निचं पि ॥ १ ॥

अइबहुकिलेससमुवज्जियावि विज्जुव चंचला लच्छी । पियपुत्तसयणजोगोऽवि भंगुरो जलतरंगोच्च ॥ २ ॥

विसयपिवासा पिसाइयव दुन्निगहा तह कहं पि । वामोहइ जह थेवं पि नेव संभवइ वेरगं ॥ ३ ॥

अवरावरगिहवावारविरयणावाडलो सयावि जणो । कीणासमुहं वच्चइ अणुवज्जियधम्मपाहिज्जो ॥ ४ ॥

एसो चिय मुद्धजणस्स विब्भमो सव्वहाऽविय अजुत्तो । जं पज्जंते धम्मं भोचुं भोगे चरिस्सामो ॥ ५ ॥

जं थेरत्ते पत्ते हयंमि सव्विदियण्यारंमि । अच्छउ दूरे करणं दुलहं धम्मस्स सवणं पि ॥ ६ ॥

किं बहुणा भणिणं ? , जो बालत्तेऽवि नायरइ धम्मं । संगामसमयहयसिक्खगोच्च सो सोअइ विराभे ॥ ७ ॥

इय जयगुरुणा नीसेससत्तसाहारणाए वाणीए । मोक्खसुहमूलवीयं कहियं सद्धम्मसव्वस्सं ॥ ८ ॥

इमं च अवक्खित्तचित्तो सवणंजलीहिं पाऊण जमालिकुमारो हिययंतो समुल्लसंतवेरगवासणो भयवतं पणि-
वइऊण भालयलनिच्चलनिवेशियपाणिपंकथकोसं भणिउं पवत्तो—

भयं ! तुमए जह मज्झ देसिओ मोक्खसोक्खदाणखमो । धम्मो तह नो केणवि अन्नं निउणमइणावि ? ॥ १ ॥
मन्ने पुव्वभवेसुं बाढं समुवज्जियं मए पुन्नं । तेण जयनाह ! तुमए सद्धिं मह दंसणं जायं ॥ २ ॥

ता जाव अम्मापियरो पुच्छामि ताव तुब्भं समीये सफलीकरमि पव्वजापरिगहेण नियजीवियं, भयवयावि भणियं-बहुविग्धाइं धम्मकजाइं वा पडिवंधं कुणमुत्ति, तओ जमाली कुमारो जयगुरुं वंदिऊण रांदणारूढो गओ सगिहं, पत्थावेण य अम्मापिऊण पाए पणमिऊण भणिउमारद्धो-हंहो अम्मताया ! अज्ज मए ययवओ महावीरस्स अंतिए धम्मो निसामिओ, सो य अमयंपिव अभिरुओत्ति, अम्मापिऊहिं भणियं-यन्नो कवलन्खणो उवलद्ध-जम्मजीवियफलोऽसि तुमं, नहु अकयपुन्नाण कइयावि सवणगोयसुवगच्छइ जिणिंदवयणं, जगालिणा संलत्तं-अम्मताया ! तदायन्नणानंतरमेव संसारभउद्विगो भीओऽहं जम्मणमरणणं ता इच्छामि तुब्भेहिं समणुणाओ समाणो समणभावं पडिवज्जिउं । इमं च अस्सुयपुव्वं निसामिऊण जमालिस्स जणणी तक्खणुप्यन्नराताववमविस-प्यमाणसेयसलिला सोगमरेवेविरंगी पयंडमायंगकराहयकुमुयं व मिलाणलायन्नं वयणमुव्वहंती तक्खणकिसीभूय-बाहुवल्लीरंगलंतकणयवलया धरणिवट्टपब्भट्टउत्तरिछा विक्किण्णेकसहत्था सिट्ठिलसंधिवधणा सुच्छावसनट्टचेयणा धसत्ति कोट्टिमतलमि निवडिया, अह संसंभमपधाविएण परियेण निम्मलसलिलसीयरसंवलिएण तालियंटपव-णेण आसासिया समाणी सुचिरं विलविऊण विमुक्कदीहनीसासा जमालिं भणिउं पवत्ता-अहो वच्छ ! अम्हाणं तुमं

चेव एगो पुत्तो संमओ पिओ हियनंदणो रयणकरंडगसमाणो ओवइयसमुवलडो, ता नो खलु वळ्ळ ! अम्हे इच्छामो तुम्ह खणमेत्तमवि वियोगं, किमंग पवज्जाणुमन्नणं ? अओ अच्छलु ताव जाव अम्हे जीवासो, कालगएहि पुण परिणयवओ वड्हियकुलसंतई निव्विन्नकामभोगो पव्वेज्जासि, जमालिणा भणियं—अम्मा ! एत्थ खलु माणुसए भवे अणेगसारीरमाणसरोगसोगजरासरणपमुहोवह्वसंपगाढे असासए जलुबुब्बुयसमाणे सरयगिरिसिहरसरंतसरिया-तरंगभंगुरे को एवं जाणइ—के पुर्विं सरणधम्ममाणो के वा पच्छा सरणधम्मणोत्ति, किं च—

जइ नाम सुणिज्ज इमंपि कोइ ता किं न होज्ज पज्जत्तं ? किं तु अयंडेवि अखंडियागमो पडइ जमदंडो ॥ १ ॥
 किंतु—कस्स न हरंति हिययं विसया ? नो कस्स वल्लहा सुयणा ? किंतु खरपवणपहयं किसलयमिव भंगुरं जीयं ॥ २ ॥
 एत्तो चिय दुज्जणमाणसं व मोत्तूण रजरट्ठाइं । धीरा दुरणुचरंपि हु संजममगं समणुलग्गा ॥ ३ ॥
 ता मोहपसरमुच्छिदिज्ज गयमो (अणुमण्ण) धम्मकरणत्थं । किं वल्लहं निरुंभइ कोवि हु जलणाउले गेहे ? ॥ ४ ॥
 एवं च भणिए अम्मापिज्जहिं कहियं—पुत्त ! इमं तुह सरीरं विसिट्ठलक्खणवज्जणुणोवेवेयं उत्तमवलवीरियसत्त-
 जुत्तं उदगसोहगंसंगं समगरोगरहियं निरुहयलट्ठपंचिदियं पढमजोव्वगुणाणुगयं, अओ कंहं दुरणुचरं संजमं काउं पारिही ? जेण—

मत्तकरियायदढचलणचंपणं सहइ नेव कमलवणं । उवरमसु पुत्त ! दुक्करसंजमकरणाउ तेण तुमं ॥ १ ॥

जमालिणा भणियं—अम्मो ! माणुसगं सरीरं अणेगरेगसोगसंगं अट्टिसंचयसमुट्ठियं ण्हारुसिराजालसंपिणद्धं अकुट्टिमट्ठियाभायणं व थेवेणवि विद्धंसणसीलं असुइयं रुहिरमंसवसमेयसुक्काइकुसपडिगुन्नं सवोवद्वसज्झं अयस्समुज्झणिज्जंति । अविय—

निस्सारस्सवि एयस्स सारया एत्तिएण निव्वडिया । जं उवयारे वट्ठइ मोक्खत्थं उज्जमंताणं ॥ १ ॥

जइ ण्हणविलेवणभूसणेहिं कीरइ इमस्स नो चेट्ठा । ता वासरससहरमंडलय सोहं न उवहइ ॥ २ ॥

तओ पुणोऽवि भणियं जणणीए—पुत्त ! इमाओ समुन्नयरायकुलसंभवाओ सयलकलकुसलाओ ख्वलायन्नमण-
हरंगीओ जलहिवेलाओ व सकुलालंकरणाओ सुमुणिमालाओ इव मुत्ताहारपरिगहाओ भयगलावलीओ इव लीला-
लसगामिणीओ पीणघणथणविणमियमुट्ठिगेज्झमज्झाओ मणोणुकूलवत्तिणीओ सवंगसुंदरंगीओ गियदंसणापमुहाओ
अट्ठ पिययूमाओ अपत्तकालेच्चिय परिच्चइऊणमच्चंतमजुत्तं तुह तवोकम्ममारंभिउं, तस्सा एयाहिं सद्धिं ताव मुंजाहि
माणुस्सए कामभोए, परिणयवओ य एयाहिं चेव समं पव्वज्जं आयेरज्जासि ।

जमालिणा कहियं—अम्मो ! एए माणुस्सया कामभोगा उचारपासवणवंतपूयसुक्कसोणियसमुब्भवा भयकेलवर-
निस्सरंतविस्सगंधा असुहउस्सासुवेयजगगा बीभच्छा तुच्छकालिया बहुकिलेसमज्झा य अबुहजणजणियचित्तप-
रितोसा साहुगरहणिज्जा अणंतचाउरंतंसारवद्धणा करयलकलियद्धदहुकट्ठं व अमुच्चमाणा असंखतिकथं दुक्खानुव-

धिणो सुगङ्गमणविग्धकारिणो कहं कुसलाण खणमेत्तपि उवभोत्तुं जुत्ता हवन्ति ? । अविय—

को णाम जीवियत्थी तालउडविसं कयावि भुंजेज्जा ? । उग्गाढदाढकेसरिमुहकंदरमहव घट्टेज्जा ? ॥ १ ॥

जालाकलावभीसणवज्जानलमज्झमहव पविसेज्जा । निसियगखगधारासु वावि को वा परिभयेज्जा ? ॥ २ ॥

अहवा सव्वपि इमं करेज्ज कोऽवि डु सुराइसामत्था ।

विसए पुण परिभोत्तुं खेमेण न कोइ (खणमवि न सुहेण) निवसेज्जा ? ॥ ३ ॥

जइ कहवि अयाणंता मूढा विसएसु संपयट्ठति । ता किं सुणियजिणेसरवयणाणवि वट्ठिउं जुत्तं ? ॥ ४ ॥

इमं च निसामिऊण पुणोऽवि भणियं जणणीए—वच्छ ! इमं अज्जयपज्जयपिउपज्जायागयं बडुं हिरण्णं रययं कंसं दूंसं निहिनिवहं अलं सत्त पुरिसे जाव पकामं दाउं पकामं परिभोत्तुं ता जहेच्छं विलससु कइवय वासराइति, जमालिणा भणियं—अम्मो ! सुबहुं पि दविणजायं अग्गिसाहियं चोरसाहियं दाइयसाहियं अयुवं असासयं असेसाण-
त्थसत्थनिबंघणं, अओ को एत्थ पडिबंधो ?, एवं च अणेगप्पयारोहिं अणुकूलहिं वयणेहिं जाव पन्नविज्जमाणोऽपि जमाली न किंपि पडिवज्जइ ताव पुणोऽवि संजमभवकरेहिं वयणेहिं अम्मापिउणो पयंपति-वच्छ ! दुरणुचरं निमगंथं पावयणं, जओ एत्थ लोहमया जवा चावेयद्वा गंगामहानईए पडिसोएण गंतव्वं महासमुदो भुयाहिं तरियद्वो असि-
धारं वयं अणुचरियद्वं, न य वच्छ ! एत्थ समणाणं कप्पइ आहाकम्मियं वा उद्देसियं वा मिस्सजायं वा कीयगड-

श्रीगुणवंद
ह्यवीरच०
ऽ प्रस्तावः
॥ २६४ ॥

अर्थविराकः
संयममुक-
स्तादीश-
नुमतिः.

॥ २६४ ॥

पसुहं वा दुब्बिक्खभत्तं वा गिलाणभत्तं वा वहलियाभत्तं वा सेज्जायपिंडं वा कंदमूलफलवीथहरियभोगणं वा परिभोत्तुं, तुमं च वच्छ ! सुहलालिओ न समत्थो सीयवाथायवखुहापिवासापसुहदुस्सहवावीसापरीसहमहणं सुहुत्त-
मवि काउं, ता अलाहि पुणरुत्तवायावित्थरेणं, जमालिणा भणियं-अम्मताया ! इणं निगमंथं पावयणं कीवाणं कायराणं काउरिसाणं इहलोयपडिबद्धाणं परलोयपरसुहाणं विसयतिसियाणं दुरणुचरं, नो सण्णुरिसाणं पडिवन्नभरधरण-
धवलणं नियसरीरजीवियनिरवेक्खणंति, एवं च अणुकूलेहिं पडिकूलेहिं य वयणेहिं भणिओ सगाणो जाव
जमाली न परिच्चयइ पव्वज्जाभिलासं ताव अकामएहिं चैव अणुमन्निओ जणणिजणेगेहिं । तयणंतरं आहूया निययपु-
रिसा भणिया य, जहा-सिग्घमेव खत्तियकुडग्गामं नयरं सवाहिरब्भंतरं सम्मज्जिओचलितं अवणिजत्तणकयवरं
विसोहियरायमग्गं कारावेह, जमालिकुमारस्स य जोगं महरिहं निक्खमणभिसेयं निव्वत्तेह, ते य सविण्णं पडिसु-
णित्ता नीहरिया भवणाओ संपाडियं रायसासणं, तयणंतरं च पुरत्थाभिपुहुम्मि सीहासणे उववोसिऊण जमालि-
कुमारो मणिकणगरयपुढविमएहिं अट्ठोत्तरसयसंखेहिं अणेगेहिं कलसेहिं गंधुदुरपवरसल्लिभरिएहिं ण्हाविओ ।
अम्मपिऊहिं निव्वत्तियमि य अभिसेगे भणिओ-वच्छ ! किमियाणिं तुह बहुमंथं पियं पयच्छामो?, जमालिणा
भणियं-अम्मताया ! इच्छामि इयाणिं कुत्तियावणाओ रयहरणं पडिग्गहं च उवणिज्जमाणं तहा कामं च वाहरि-
ज्जमाणं, एवं च निसामिऊण जमालिपिऊणा भणिया पुरिसा-अरे सिरिवराओ तिन्नि दविणसयसहस्साइं वेचूण

कुत्तियावणाओ रयहरणं पडिगहं च एगमेगलक्खेण आणेह, एगलक्खण्णयोणेण कासवां च सदावेह, एवसाणत्ते
 निगया पुरिसा रयहरणं पडिगहं कासवगं च घेत्तण पडिनियत्ता, सो य कासवो जमालिपियं पणभिऊण एव
 भणिउं पवत्तो-देव ! संदिसह जं मए करणिज्जं, तेण जंपियं-भइ ! जमालिस्स कुमारस्स परेणं जत्तेणं चउरगुलवओ
 निक्खमणपाओगे अग्गकेसे कप्पेहि, तओ सो कासवओ सुरभिगंधोदएण करचलणे पक्खालिऊण अट्टगुणाए
 पोत्तीए वयणं संजमिऊण जहुत्तेण विहिणा केसे कप्पिउमारद्धो, जणणीवि से अणवरयं कज्जलमलिणाइं अंसु-
 याइं सुयंती भुयगनिम्मोयनिम्मलेण उत्तरिज्जेण केसकलावं पडिच्छइ, तयणंतरं च सुरभिवाणिणा पक्खालिऊण
 हरियंदसविलेवणपुण्फेहिं अचेइ, पंडुरवत्थंमि वंधिऊण रयणकरंडगंमि पक्खिवइ, सोगभरगगरिगरं च रुधमाणी
 एवं भणइ-एत्तो मए मंदपुण्णाए जण्णेसु ऊत्तवेसु य वहीसु य इमोहिं पुत्तो जमाली सुमरणिज्जोत्ति, एवं च अभि-
 क्खणं जंपमाणी तं रयणकरंडगं नियसयणिज्जस्स ऊसीसगमूले ठयेइ, अह निवत्तियमज्जनमहूसवो परिहियाभल-
 दुगुल्लो हेममयमउडमणिक्कणयकड्यकुंडलालंकियसरीरो वच्छत्थलारिखोलितविमलसुत्ताकलावसोहिद्धो विविहायरण-
 पहाभरविच्छुरियनहंगणाभोगो तक्कालिमिलियविलयासमूहकीरंतमगलायारो दाणाणंदियमगणगिज्जंतुहामगुणनि-
 व्हो खंभसयसंनिविट्ठं समीरंबुयधवलधयवडसणाहं सुविचित्चित्तरम्मं अणेगजणजणियपरितोसं सुइनेवत्थधराणं
 छेयाणं पवरनरज्जुवाणाणं सहस्सेणं उक्खित्तं झडत्ति सिबियं समारूढो, रयहरणपडिगहधारिणीए दाहिणदिसिं

निलीणाए धावीए परियरिओ, अन्नाहि य पवरमणीहिं धरियधवलायवत्तो चलंतससिंकतचामरावयवो दिट्ठिपह-
पइट्ठावियमणिमयअट्ठमंगलओ करितुरयरहवरारूढसयणयगगेण अणुगमिज्जंतो वज्जताएज्जसमुच्चलंतरवभरियनह-
विवरो पासायतलट्ठियपउरलोयनिवेहेण संथुणिज्जंतो झडत्ति जमालिकुमारो तयणु पयट्ठो जिणाधिसुहं ।

अह जमालिस्स भारिया पियदंसणा तहाविहवइयरमुवलब्भ जायभववरग्गा पवज्जं पडियज्जिउकामा तहेय
पट्ठिया, कमेण य पत्ताइं ताइं जिणंतिथं, तओ पंचरायसुयसयपरिवारो जमालिकुमारो पडियज्जो जिणिंदेसियं
समणधम्मं, पियदंसणावि नरिंदुहिया सहस्सेण परिवुडा पवहुमाणसंवेगा समणी जायत्ति ।

अह जमाली सामाइयमाइयाइं एक्कारस अंगाइं समुत्ताइं सअत्थाइं अहिज्जइ, बहूहिं चउत्थलट्ठुमपमुहहिं अण-
वरयं विचिच्चेहिं तवोक्कम्मेहिं अण्णाणं भावितो भगवया सद्धिं पुरागराइसु विहरइ, पियदंसणावि चंदणाए पव-
त्तिणीए समं परियडइ ।

अह अन्नया कयाइं जमाली भयवंतं महावीरजिणवरं वंदित्ता विन्नविउमारद्धो-भयवं! वंछाप्पि अहं तुब्भेहिं
अब्भणुन्नाओ समानो अनिययविहारोहिं पंचहिं समणसएहिं सद्धिं विहरिउत्ति, सामीवि विमलेकयलालोयावलो-
इयसयलजियलोयभूयभाविवट्ठमाणकालकलवलंविमुहासुहपरिणामविसेसो भाविरमणत्थं मुणिऊण जमालिस्स पुणो
पुणो भणमाणस्सवि मोणमवलंबिऊण जाविउं पवत्तो, जमालीऽवि अप्पडिसिद्धमणुमयंति कलिऊण पंचहिं समण-

सएहिं सहिओ तवस्सिणीसहस्सपरिवुडाए पियदंसणाए समणुगओ अपुव्वापुव्वगामनगरगराइधु भणित्तमारओ,
 अन्नया य गामाणुगामेण विहरमाणो समागओ सावत्थि नयरिं, ठिओ य कुट्टगाभिहाणम्मि उज्जाणे, तत्थ य
 ठियस्स विरसेहिं लुक्खेहिं सीयलेहिं तुच्छेहिं असुदरेहिं कालाइक्कतेहिं पाणभोयणेहिं दुरहियासो पयंडो सरीरंमि
 पित्तजरो पाउब्भूओ, तेण य अचंतं अभिहओ समाणो भणइ—अहो समणा ! मम निमित्तं संथारयं संथारेह, ते य
 तवयणमायन्निऊण तक्खणमेव संथारयं संथारित्तमारद्धा, जमालीवि अहिययरं वेयणाभिहओ निसन्नो ठाउअपा-
 रयंतो पुणो पुणो पुच्छइ—भो समणा ! संथारगो संथारिओ न वा ?, तेहिं भणियं—संथारिओ, एवं च सोचा उट्ठिओ
 जमाली गओ तदंतियं, संथारयं च संथारिजंतं पेच्छिऊण उप्पन्नमिच्छतो जंपिउं पवत्तो—भो भुणिणो ! इयानिं
 सुणियं मए तत्तं, निप्फन्नमेव निप्फन्नं भन्नइ, न उण निप्फज्जमाणंपि, अओ संथारिज्जमाणेऽवि संथारगे संथारिओत्ति
 तुब्भेहिं वुत्तं तमसच्चं, एवं च—

कडमाणं कडमुप्पज्जमाणमुप्पन्नमेवमाईवि । वागरइ जं जिणिंदो दिट्ठविरोहा न तं घडइ ॥ १ ॥

अवरावरसमथसमूहजोगनिप्फज्जमाणकज्जंमि । कह पारंभे चिय कडमिमंति वोत्तुं खमं होज्जा ? ॥ २ ॥

अत्थकिरियापसाहणखमं च वत्थुत्तणं समुव्वहइ । पढमसमण्णसूए य तथंपि नो विज्जइ पयत्थे ॥ ३ ॥

जइ पारंभे चिय तं कडंति एवं च सेससमण्सु । करणे कडस्स आवडइ उब्भडा नूणमणवत्था ॥ ४ ॥

ता जुत्तिसंगयमिमं कडमेव कडं पवुच्चए पयडं । किरियानिट्ठासमयाण होइ एवं च न विरोहो ॥ ५ ॥
इय पडिवज्जह समणा ! पक्खमिमं सयलदोसपरिहीणं । वुत्तंति नेय गिज्झइ कुसलोहिं किंतु जुत्तंति ॥ ६ ॥
नय सब्बुत्ति पसिद्धिपत्तकित्ती जिणो वयइ मिच्छा । किं तु वए चिय कइयावि जेण गळयायि बुज्झंति ॥ ७ ॥
इय समयसत्थसवणुब्भवंपि तं नियविवेयमवहाय । पित्तजरविहुरिओ इय पलवइ असमंजसं चट्ठसो ॥ ८ ॥

एवं च मुक्कमज्जायं अजुत्तजंपिरं च जमालिं वियाणिऊण थरेहिं भणियं—भो जमालि ! किमेवं विवरीयं परूवेसि ?, न हु विजियारागदोसमोहा अन्नहा जंपति तित्थयरा, न य तवयणं मणार्गणि पचइद्विचिरुदाइदोसलसमावहइ, तहाहि—जं तए भणियं—अणेगुत्तरोत्तरसमएहिं निष्फज्जमाणांमि कजे कहं पारंभसमएवि निष्फज्जंति बुचइ ?, तमजुत्तं, जओ—जइ पढमसमए निष्फणं न बुचइ ता समयाविससत्तणेण वीयांसु समएसु अनिष्फक्ती चेव हवेज्जा, जं च अत्थकिरियाए साहगतं वत्थुलक्खणं भणियं तंपि इह अद्वभिचरियं जुज्झइ, अभिहाणनाणोपयोगसंभयाओ, तहा-
हि—तहाविहं वत्थुविसंसं पप्प पढमसमएवि लोको किमेवं कुणसित्ति अद्वेण पुट्ठो वागरइ—पडं पडं वा करेमिति, जं च पढमसमयकडे उत्तरोत्तरसमएसु कडकरणलक्खणावत्थादूसणं तंपि अन्नन्नकजंतरपसाहणेण अलियमेव, किरियाकालनिट्ठाकालमेयदूसणपक्खोऽवि विहलो, जं च कहियंन वुत्तं गिज्झइ किं तु जुत्तं, तत्थवि छउम-
त्थस्स तुम्हारिसस्स कहं जुत्ताजुत्तविषेओ संभवेज्जा ?, भयवं चिय केवलालोयकलियलोयालोयभावो एत्थ पमाणं,

जं च भणियं गरुयावि कयावि सुज्झंति तंपि उम्मत्तपलवियं व न कुसलाण चित्तं रंजितं पारह, ता सुहु भणिगं भगवया-कडमाणं कडमुप्पज्जमाजमुप्पन्नमिच्चाह, किंच—

जइ तिहुयणेक्कचूडामणी जिणो वागरेज्ज वितहमहो । ता तद्वयेणेण तवोविहाणमेयं किमायरसि ? ॥ १ ॥

रज्जं रट्ठं च विवज्जिऊण आणाए तस्स निक्खमिउं । तद्वयणं दूसितो कह न तुमं लज्जे इण्हि ? ॥ १ ॥

अहवाडणाभोगसमुब्भवेण दोसेण दुहु भणिएवि । जायइ पुणो विसुद्धी आलोयणंनिंदणाइहिं ॥ ३ ॥

ता मोत्तुं कुवियण्णं वच्च समीवे जएक्कदीवस्स । पडिवज्जसु पच्छित्तं मा विफलं नेसु नियजम्भं ॥ ४ ॥

अक्खरमेत्तंपि न जो जिणिंदवयणस्स सहइइ मणुस्सो । सो पावइ मिच्छत्तं तत्तो संसारपरिवुट्ठिं ॥ ५ ॥

तत्तो चिय किब्बिसतियसतिरियवसहीसु मणुयजोणीसु । दुविसहदुहपरंपरमणंतमणिवारियं लहइ ॥ ६ ॥

गरुओऽवि पावरासी जिणिंदसमयत्थसहइइहणहणिओ । नावत्थाणं बंधइ घणोघ खरपवणपडिहणिओ ॥ ७ ॥

इय सो शेरोहिं बहुप्पयारहेऊहिं अत्थसारेहिं । तह गाढं पन्नविओ जह सहसा मोणमल्लीणो ॥ ८ ॥

अह विवरीयपरूवणापाउब्भूयपावपायच्छित्तमपडिवज्जमाणं जमालिं परिहरिऊण केऽवि थेरा भगवओ समीच-
मुवगया, अन्ने य तस्स चैव पासे ठिया, पिण्णंदसणावि अजियासहस्सपरिवारा महिलाभावउलभमिबिबेयथाए
पुव्वपडिंबधाणुवित्तीए य जमालिस्स पक्खमणुवत्तिउमारद्धा ।

एगया य जायनीरोगसरीरो जमाली तेण असगहेण अप्पाणं च परं च पइदिणं लुग्गाहेमाणो लुग्पाएमाणो जिणनाहवयणं दूसेमाणो अहमेव उप्पन्ननाणंदसणधरो सबच्चुत्ति अहंकारमुवहंतो समथ हिडिउं पवत्तो । अन्नया य चंपानयरीए पुण्णभदे चेइए समोसढस्स अणेगसिस्सगणपरिवुडस्स भयवओ महावीरस्स अदूरदेसंगि सो ठाऊण सगवमेवं भणिउमाढत्तो-भयवं ! जहा तुज्झ बहवे सिस्सा छउमत्था चेव भविता मरणधम्मयं पत्ता तहा न खलु अहं, जओ मम दिव्वमक्खयं केवलनाणंदसणं उप्पन्नंति, तवसेण य सत्वं जहद्वियं वत्थुत्तां अवगच्छामि, अओ एत्थ धरामंडले अहमेव अरहा सव्वन्नू सव्वदरिसिन्ति । इमं च निसामिऊण भणिओ गोअमसागिणा-भो जमाली ! जइ तुमं एवंविहो ता तुज्झ नाणं सेलेण वा धंमेण वा थूमेण वा न वारिज्जइ, अओ इसाइं देवि परिणाइं मम वागेरहि, किं सासओ लोगो असासओ ? किं सासओ जीवो असासओ वत्ति ? एवं च पुच्छिओ जमाली संसय-मावणो जाव पच्चुत्तरं दाउमसमत्थो विच्छायसुहच्छाओ तुमिणीए संचिट्ठइ ताव भुवणेत्थयाणुणा महावीरेण वाग-रिओ-भो जमाली ! बहवे मम अंतवासिणो जिणा इव समत्था इमं आयक्सिउं, किं तु तुमं व न एवं सगवमु-ल्लवंति, न य भइ ! एत्थ किं पि दुन्नेयं, जओ सासओऽवि लोगो असासओऽवि लोगो, कइं ? कालत्तएवि अवट्ठि-यसामन्नरुवत्तणेण सासओ, ओसप्पिणीपसुहपज्जायपरियत्तणेण य असासओ, एवं जीवोऽवि सवावत्थासु अणुगा-मित्तणेण सासओ, नरेरइयतिरियाइपज्जायंतरसंभा असासओत्ति । एवं च भगवओ आइक्खमाणस्स जमाली

कुवियप्पाउलहियत्तणेण असहहिऊण तेण पुव्वुगगाहिएण नियसमणसमणीसंघेण परिवुडो पुरजगराहसु निगदं-
सणाभिप्पायं परूवयंतो विहरइ, वित्थरिया सव्वत्थ एसा संकहा जहा जमाली भगवओ गिच्छं पडिवन्नोत्ति ।

अन्नया य सो विहरमाणो पुणो गओ सावत्थि नयरिं, ठिओ य एगत्थ उज्जाणे, पियदंसणाणि अज्जियासहरा-
परिवारा महिद्धियस्स ढंकाभिहाणस्स कुंभकारस्स आवणे आयुच्छित्ता ठिया, सो य ढंको जिणवयणभाविणणा
जाणइ जहा एयाणि मिच्छत्तमुवगयाणि, जिणवयणं न पत्तियंति, अओ जइ कहवि बोहिज्जंति तो सुट्टु लहुं हय-
इत्ति । अन्नया य भंडयाइ उच्चत्तंतेण पडिवोहणत्थं पियदंसणासाहुणीए वत्थंमि पविस्वत्तो एओ जलणकणो, तेण
य दज्झमाणं वत्थं पेच्छिऊण तीए भणियं-भो महाणुभाव ! किमेयं तए कथं?, पच्छ भम पडगो दहो, तेण
भणियं-अज्जिए ! मा सुसं वयाहि, सव्वंमि चेव वत्थे निह्देहु एवं भणिउं जुज्जइ, एसा किर तुम्ह संमयत्थो, अन्नहा
दज्झमाणं दंहुति जिणवरवीरवयणं चेव पडिवज्जिउं जुत्तं ।

एयं च तीए सोचा तक्कालुप्पन्नमुट्टुदीए । भणियं-सम्मं सावथ ! मूढाऽहं बोहिया तुगए ॥ १ ॥

तइलोयतिलयभूयस्स भगवओ वद्धमाणसाभिस्स । वयणं पावाए मए पडिक्खलियमेत्तियं कालं ॥ २ ॥

जस्स वयेणेण विहिओ घरचाओ संजमो य पडिवन्नो । सोवि जिणो न गणिज्जइ, अहो महं मोहभाहणं ॥ ३ ॥
ढंकेण तओ भणियं-भयवइ ! मा वहसु चित्तसंतावं । समणीजणपरियरिया वच्चसु सव्वद्वुपांसंघि ॥ ४ ॥

आणाए तस्स वट्टसु गरिहसु नियदुक्कडं समगंगि । उम्मगगं पडिवन्नं लोयं परिहरसु वरिं व ॥ ५ ॥
इच्छामो अणुसट्ठित्ति जंपिडं साहुणीसहस्सेण । परियरिया सा तत्तो तिहुयणपहुणो गया पासे ॥ ६ ॥
मोचुं जमालिमंगं ढंकेणऽन्नेवि बोहिया समणा । तं मोत्तूणं सध्वे तेऽवि गया जिणवरसमीयं ॥ ७ ॥
इय ताव इह भवे चिय जियवयणविकूलणाणुभावेण । गुक्को न केवलं सुणिवरहिं सुगुणेहिंवि जमाली ॥ ८ ॥
एवं च सो मिच्छत्ताभिणिवेसेणं अप्पाणं समीयवत्तिजणं च वोप्पायएत्तो बहुयाइं वाताइं सामन्नपरियागं पाउ-
णिता अद्धमासियं च पज्जंते संलेहणं काऊण तस्स ठाणस्स अणालोइयपडिक्कत्तो मओ समानो लंतए कणे तेरस-
सागरोवमट्ठिइएसु किब्बिसियसुरेसु देवत्ताए उववन्नो ।

इओ य भगवया गोयमेण जमालिं कालगयं जाणिता भयवंतं महावीरं परेणं विणएणं वंदिता भणिगं-भंते !
तुब्भं कुसीसो जमाली नामं अणगारो तहाविहं उगं तवविसेसं आसेविऊण कहिं उववन्नो ? तओ भगवया
कहिओ सवो किब्बिसयदेवत्तलाभपज्जवसाणो से तद्वइयरो ।

अह भणइ इंदभूई-भयवं तारिस तवपि काऊणं । किं कारणमुववन्नो किब्बिसियसुरेसु स जमाली ? ॥ १ ॥
ताहे भणिगं भुवणेक्कभाणुणा सुणियसयलभावेण । गोयम ! सुणेसु एत्थं कारणमेगगचिरेण ॥ २ ॥
धम्मायारयाणं आयरिआणं विपुद्धसीलाणं । सुत्तप्पवत्तयाणं उज्झायाणं गुणनिहीणं ॥ ३ ॥

कुलगणसंधाणंपिय पडिणीया जे हवंति इह जीवा । विउलंपि तवं काउं ते किन्निंसिएउ जायंति ॥ ४ ॥
 पुणरवि गोयमसामी पुच्छइ भयवं ! तओ सठाणाओ । चइउं कइहिं भवेहिं पाविस्सइ मोक्खपुएवासं ॥ ५ ॥
 जिणनाहेणं भणियं सुरतिरियनरेसु पंच वेलाओ । भमिऊण पत्तबोही लहिही निद्याणसोक्खाइं ॥ ६ ॥
 ता भो देवाणुपिया ! जमालिमुणिणो निसामिउं चरियं । धम्मगुरुणमुहाणं विणयपरा होज्जइ सयावि ॥ ७ ॥
 इय सिक्खविउं मुणिणो समत्थजियलोयवच्छलो वीरो । विहरइ पडिबोहिंतो भव्वजणं परमकरुणाए ॥ ८ ॥
 विहरंतस्स य पडुणो एत्तो ससिसूरवरविमाणणं । अवथारणअच्छरियं जह जायं तह निसामेह ॥ ९ ॥

साएए नयरे सन्निहियपाडिहेरो सुरणिओ नाम जक्खो, सो य पइवरिसं चित्तिज्जइ महूसवो य से परओ कीरइ, सो य चित्तिओ समाणो चित्तगरं वावाएइ, जइ न चित्तिज्जइ ता नयरे जणमारिं विउवइ, तन्मएण य सो चित्तगरसेणी पलाइउमारद्धा, णरवइणा विचिंतियं-जइ इमे सव्वे पलाइस्संति ता अवस्समेस जक्खो अचित्तिज्जंतो अम्ह वहाए भविस्सइत्ति परिभाविऊण ते चित्तकरा संकलियाबद्धा कया, सव्वेसिं नामाणि य पत्तए लिहिऊण थडए छूढाणि, तओ वरिसे वरिसे जस्स नामपत्तयं नीहरइ सो चित्तकम्मं जक्खस्स करेइ, एवं कालो वच्चइ । अन्नया थको संबीनयरीए वत्थवो एणो चित्तयरदारगो चित्तविज्जासिक्खणत्थं तत्थागओ ठिओ य चित्तयरथेरीए भंदिरे, जया थ तप्पुत्तेण सद्धिं तस्स मित्ती, एवं च तस्स अच्छंतस्स तंमि वरिसे समागओ थेरीसुयस्स वारगो, तओ थेरी बहुण्यथारं

उरसिराहं ताडन्ती रोहडमारद्धा, पुच्छिया य तेण कोसंवीचित्तगरदारगेण-अप्पो ! कीम रोयमि ? तीए भणियं-
पुत्त ! एणो चिय एस मे सुओ, संपयं जक्खं चित्तिज्ज जमसुहं पाण्डिकामोणित लज्जियज्जइ, तेण जंपियं-अस्समो !
मा रुयसु, अहं जक्खं चित्तिस्सामि, तीए भणियं-वच्छ ! तुमं मे पुत्तो किं न भवथि ? तेण कहियं-तहवि चित्ति-
स्सामि, अह जायंमि पत्थावे सो छट्ठभत्तं काऊण ग्हाओ चंदणरससमालभियइहो निवभिववत्थुगलो अट्ठगुणपो-
तीए सुहं संजमिऊण नवएहिं कुच्चगेहिं पसत्थेहिं वन्नगेहिं जक्खं चित्तिज्ज परेण विणएणं पायवडिओ भणइ-
देव ! सुरणिय ! को तुज्झ चित्तकम्मं विणिम्ममं तरइ ? । अत्तं निउणोऽविहु किं पुण अस्सारिसो मुद्धो ॥१॥
तहवि हु चवलत्तणओ न सुहु जं वडियं मए किंपि । तं खमियवं तुमए खमिय ! पणयंमि को कोवो ? ॥२॥
एवं थुणंतस्स तस्स परितुट्ठो जक्खो भणइ-अरे वरं वरसु, तेण भणियं-देव ! एसो चेव धरो-या एत्तो लोचं
मारिस्ससि, जक्खेण भणियं-तुज्झ अविणासणाओ चेव सिद्धमेयं, अन्नं मग्गेसु, तेण जंपियं-अइ एवं ता जस्स
दुपयस्स चउप्पयस्स अपयस्स वा एगदेसमवि पेच्छामि तस्साणुरूवं चित्तं निवत्तिज्जामि, जक्खेण भणियं-एवं
होहिति, तओ सो उवलद्ववरो रत्ता नगरजणेण सक्कारिओ संतो गओ कोसंवी नयरं, तत्थ य पुवभणिओ लया-
णिओ राया, सो अन्नया रत्तेणं रट्ठेणं चउरंगवलविच्छेडुणं अन्नेण य विभूहविसेसं गव्वुवहतो अत्थाणीमंडव
निविट्ठो दूयं पुच्छइ-अरे किं मम नत्थि ? जं अन्ननिर्दिणमत्थि, तेण जंपियं-देव ! तुमह चित्तसया नत्थि, एवं च

भणि ए आणत्ता राइणा सभामंडवचित्तणत्थं चित्तगरा, तेहिं च समा भूमी विभइऊण पारद्धा चित्तिउं, तस्स य वरदिन्नस्स जो अंतेउरकीलापचासन्नो पएसो सो समप्पिओ, तथा य तत्थ चित्तकम्मं कुणमाणेण एंगया नरिद-
ग्गमहिसीए मिगावइदेवीए जालकडंगंतरेण मणिमयमुद्धियाकिरणविच्छुरिओ चरणगुट्टओ दिट्ठो, उवसाणेण य नायमणेणं जहा मिगावइ एसत्ति, तओ तेण अंगुट्ठाणुसारेण जहावड्डियं रूवमालिहियं, तंमि य च कखुंमि उग्गी-
लिज्जंते एगो मसिबिंदू ऊरूअंते निवडिओ, तेणावणीओ, पुणोऽवि पडिओ, एवं तइयवेलाए तं निवडियं पेच्छि-
ऊण नूणमणेण एत्थ होयवंति जायनिच्छएण नावणीओ, अह समत्तमि चित्तकम्मे राया चित्तसभं पलोयंतो तं पएसं संपत्तो जत्थ तं मिगावइए रूवं, तं च अणिमसच्छिणा पेच्छमाणेण दिट्ठो सो बिंदू, तओ आबद्धभिउळी-
भीमो रोसवसायं बिरच्छिविच्छोहो तं च दट्ठूण नरिंदो चित्तिउमेवं समाढत्तो —

एएण पावमइणा मम पत्ती धरिसियत्ति निब्भंतं । कहमन्नहा निर्यसणमज्झणयंपिहु सुणेज्ज मसं ॥ १ ॥

इयरंमिवि परदारे परिभोगपरं वयं निगिणहामो । किं पुण सए कउत्ते एवं नार्यंपिहु खमामो ? ॥ २ ॥

एवं परिभाविऊण सो वरदिन्नचित्तगरो समप्पिओ दंडवासियाणं, आणत्तो य वज्झो, एवं च वइयरं निसासि-
ऊण उवट्ठिया चित्तगरसेणी, विन्नविओ राया, जहा-देव ! वरलद्धओ एसो, जस्स अवयवभंतं पि पासइ तस्स पडि-
पुवं रूवमालिहइ, अओ कीस निक्कारणं कोवमुवइ देवो ? , जइ एत्थ न पचओ ता विन्नासिज्जउ, एवं च भणि ए

राइणा दंसाविंयं खुज्जाए सुहमेत्तं, तेण य तदणुरुवं निव्वत्तिंयं चित्तं, तहावि रत्ता पुवागरिसवसेण तस्स संडासओ छिंदाविओ निव्विसओ य आणत्तो ।

तथो सो चित्तगरो पुणोऽवि गओ जक्खसमीवं, ठिओ उववासेण, भणिओ य जक्खेण-भद्द ! सुंच विसायं, ममाणुभावेण पुंवंपि वामहत्येण चित्तिहिंसि, एवं च लद्धे वरंमि एसो परिचित्तइ-अहो महा पायकारिणा कहे निरवराहो चेव अहं एयमवत्थं पाविओ ? , ता संपयं तस्स दुस्सिक्खियस्स दंसेमि दुत्तमफलंति परिभाविऊण चित्तवट्ठियाए मिगावईए सिंगारुम्भडं रूवमालिहिऊण इत्थीलालसं चंडपजोयं महानिदमुवट्ठिओ, दंसिया चित्त-वट्ठिगा, अवलोइया साहिलासं चंडपजोएण, अवलोयमाणस्स य तक्खणं चेव विसट्ठकंदोद्वीहरा वियसिया से दिट्ठी, पम्हुट्ठो कुलाभिमाणो परिगलिओ नयमगो वियंमिआ अरई समुल्लसिओ रणरणओ पज्जलिओ सवंगिओ मयणानलो, सविसेसं पलोयमाणो य थंमिओव कीलिओव निचलनिरुद्धनयणो ठिओ सुहुत्तमेत्तं, पुच्छिओ य चित्तयरो

सुरसुंदरीए रूवं वम्महदइयाए नागकन्नाए ? । दट्ठूण तए सुंदर ! पडिर्विवमिभं इहालिहिंयं ॥ १ ॥

जइ सुरविलया एसा ता सच्चं भुवणविस्सुया तियसा । अह वम्महस्स लीलाए जिणउ ता सो तिलोयंपि ॥ २ ॥

अहवा भुयगाण इमा ता सोहउ निच्चमेव पायालं । पडिहणियतिमिरपसरं एयाए सुहेदुकिरणेहिं ॥ ३ ॥

दुसिज्जइ पेच्छ इमीए कायकंतीए कंचणच्छाया । विच्छाइज्जइ नयणेहिं नीलनवनलिगलच्छीवि ॥ ४ ॥

अहरप्पहाएँ निहरइ विहुमकंकेल्लिपल्लवसिरीवि । रूवेऽणुरंजिएण व रंभाए वहइ समसीसिं ॥ ५ ॥
 किं बहुणा ?—एवंविहवरजुवईजणस्स विरहे विडंबणा कामा । मणुयत्तंपिहु विहलं दुहावहं भवइत्तंपि ॥ ६ ॥
 तं कहसु कस्स एसा सुयणू ! को वा इमीए लाभमि । कीरंतो य उवाओ अणुरूवो सिद्धिमावहइ ? ॥ ७ ॥
 एवं नराहिंवेण भणिए चित्तगेरं जंपियं—देव ! न हवइ एसा सुराईण रमणी, किंतु सयाणियरत्तो अगमहिंसी
 भिगावइनाम, मए सामन्नेण आलिहिया, विसेसओ जइ पुण परं पयावई से रूवमालिहउ, जइ एवं नाम महिला
 चेव सा अओ रे वज्जंजं ! वय सिग्घं, गंतूण भणसु मम वयणेण सयाणियनरवइ, जह सिग्घं पेसेसु भिगावइ, एवं-
 विह इत्थीरयणाण वरणे को तुज्झ अहिगारोत्ति ? ता सिग्घं पेसेसु, जुज्झसज्जो वा होज्जासित्ति वुत्ते जं देवो
 आणवेइत्ति भणिऊण गओ दूओ, निवेइयं सयाणियस्स नरिंदसासणं, तेण य तमायन्निऊण जायकोवेण भणियं-
 रे दूयाहम ! जइ कहवि सो कुलकमविमुक्कमज्जायं उस्सिखलं पयंपइ ता तुज्झवि किं खमं वोचुं ? किं भियो
 सोऽवि न जो ससामिणो उप्पहं पवत्तस्स नियबुद्धिवित्थरेणं अवजसंपंसुं परिसमेइ ? एवंविहदुन्नयवियारिणोऽवि
 जायइ कुले गुरुकलंको, किं पुण बहुजणपुरओ पयडगिरा पभणिज्जेते ? अन्नेसुवि रज्जंतरेसु दिट्ठं सुयं व रे तुमे एवंविहं
 अकज्जं कीरंतं केणइ निवेण, किंच—जत्थ संयं चिय राया दुन्नयमेवंविहं समायरइ ततो हया मूलाओ वराइणी

तत्थ नीईवि, किं बहुणा ? एवं जंपिरस्स तुह चेव इहयं जुज्झइ विणासो काउं, जंच न कीरइ तं न य तेउत्ति कलि-
ऊण, इय निम्भत्थिऊण दूओ निद्वमणेण कंठे धेचूण निच्छूढो, गओ य सो चंडपज्जोयसमीवे, साहिओ य चउग्गुणो
नियवइयरो, इमोवि तेण दूयवयेण वाढं रुढो सबबलेण परियरिओ पयदो कोसंबीए, अणवरयपयाणएहि य
आगच्छंतं निसामिऊण सयाणिओ अप्पबलो तहाविहसंखोहसमुण्णान्नाइसारो मओ, तओ मिगावइए चित्तिं-
राया ताव संखोभेण विणदो, पुत्तोऽवि असंजायबलो एयस्साणणुसरणे मा विवज्झिही, एयाणुस्सरणमि गरुओ कुल-
कलंको, तम्हा इमं पत्तकालं-इहट्ठिया अच्चंतमणुलोभवयणवित्थरेण चेव कालहारिं करमि पच्छा जसुवियं तमा-
चरिस्सामित्ति चित्तिऊण भणाविओ दूयवयेण चंडपज्जोयनरिंदो, जहा-राए सयाणिए परोक्खम्मि तं चेव मए
सरणं, केवलं मम पुत्तो असंपत्तबलो मए विमुक्को समानो पंचतनरिंदेहिं पेळेज्झिही, इमं च सोच्चा परमहरिसपगरि-
समुद्वहंतेण भणावियं रत्ता-पिए ! मम पयंडभुयदंडपरिगहिए तुह सुए को चिरजीविथत्थी पयं काउं समीहिज्जा ?,
तीए भणियं-अत्थि महाराय !, केवलं उस्सीसए सण्णो जोयणसए वेज्जो, विणट्ठम्मि कज्जे किं तुमं काहिसि ?,
अओ जइ निप्पच्चवायं मए सह संगममभिलससि ता उज्जेणिपुरीसमुब्भवाहिं निट्ठुराहिं इट्ठियाहिं इमीए नयरीए,
चउदिसिं कारवेसु समुत्तुंगपायारपरिक्खेवंति, इमं चायन्निऊण पडिवन्नं राइणा, तओ चउइसवि नियरायाणो
सबला धरिया मग्गम्मि, पुरिसपरंपराए य आणियाओ इट्ठगाओ, निम्मविओ पायारो, तओ तीए भण्णइ-इयाणिं

नगरि धन्नस्स वत्थस्स इंधणस्स य भरेहि, आसाविणडिण्ण य भरिया अणेण, जोहे नयरी रोहगसज्ज जाया ताहे सा विप्पडिवन्ना, दुवाराइं बंधिऊण जुञ्झिउं उवट्ठिया, चंडपज्जोयरायावि विलक्खो नगरिं वेढिऊण ठिओ, अन्न-दिवसे य वेरगमुवगयाए चित्तिं मिगावईए-धन्ना ते गामागरनगराइसन्निवेसा जत्थ भयवं महावीरसामी भवन् गिराए जणं पडिबोहंतो विहरइ, संपयं च जइ सो परमेसरो एत्थ एइ तो अहं पव्वयामि, इमं च तीसे संकण्णं केवल्लोएण कलिऊण गोयमपमुहमुणिजणपरिवुडो नवकणयकमलनिम्मियचलणो अणंतरमेव समागओ भयवं, कयं देवेहिं समोसरणं, उवविट्ठो सिंहासणे जयगुरू, तप्पभावेण य पसमियं वेरं, वट्ठाविद्या मिगावई चारपुरि-सेहिं, दिन्नमणाए चिन्ताइरित्तं तेसिं पारिओसियं, उग्घाडियाइं गोउरक्काडाइं, महया विभवेण निग्गया भिगान-वई, जहाविहिणा वंदिओ भयवं, ठिया य समुचियठाणे, चंडपज्जोयरायावि समागओ, एत्थंतेर भगवया पारद्धा धम्मकहा ।

अह एगो पुरिसो करगहियकोदंडवाणो एस सव्वणुत्ति लोथण्णवायं निसामिऊण भयवओ अदूरदेसट्ठिओ निय-संसयं मणसा पुच्छइ, ताहे सामिणा भणिओ-भो देवाणुप्पिया ! वायाए पुच्छ, वरमन्नेऽवि भव्वसत्ता पडिवुञ्जति, एवमवि सामिणा भणिए लोथलज्जाए तेण भणणइ-भगवं ! जा सा सा सा ? , तओ भगवया जंपियं-एवमेयंति, अह पायपीढपासट्ठिण्ण गोयमसामिणा सुयनाणमुणियपरमत्थेणवि भव्वजणपडिबोहणत्थं पुच्छियं-भयवं ! किं

एएण जा सा सा सत्ति संलत्तं?, भगवथा कहियं—महती कहा एसा, एगगचिच्चा निसामेह—

अत्थि इहेव जंबुदीवे दीवे चंपानाम नयरी, तत्थेवेगो सुवण्णगारो इत्थीलोलो जं जं पवररुववइं कन्नगं पेच्छइ तं तं पंच सुवण्णसयाणि दाऊण परिणेइ, एवं च तेण परिणयंतेण कालक्कमेण पंच सयाणि महिलियाणं पिंडियाणि, एक्केआए य तिलगहारहुहारनेउरपमुहाइं आभरणाइं दिन्नाइं, जद्विसं च जाए समं भोगे भुंजइ तद्विसं सा सवालं-कारपरिगहं ण्हाणविलेवणाइ सिंगारं च करेइ, सेसकालं पुण उवसंतवेसेण अच्छइ, अण्णहा सुवण्णगारो निब्भच्छइ, न य ईसालुगत्तणेण सो निमसमेत्तपि गेहुद्वारं भुंजइ, सयणाणवि नावगासं देइ, एवं वच्चंति वासरा, अन्नया य सो अणिच्छंतो महया किलेसेण नीओ भित्तेण भोगणदानत्थं नियमंदिरे, चिरलद्धावगासाहि य चित्तिय तस्स गेहिणीहि—

किं अम्ह जीविएणं? किं वा मणिकणगभूसणेहिंयि? । किं विभववित्थरेणवि बहुएण निरत्थएणिमिणा? ॥ १ ॥
जं न लभामो निच्चपि विलसिउं ननु कयंततुलस्स । एयस्स पावपइणो दढमंहे गोथरे पडिया ॥ २ ॥
बहुकालाओ गेहं जाव विमोचुं गओ स अन्नत्थ । मणवच्छियसोक्खेणं ताव वसामो खणं एकं ॥ ३ ॥
इय चित्तिऊण गहाया सुराहिविलेवणविलित्तसंबंगा । परिहियपवरदुगुल्ला आलिद्धासेसआभरणा ॥ ४ ॥
भालतलइयकुरुल्ला [तिलया] सिंदूराणिपवरसीमंता । गंधुब्भडमियनाहीपंकलिहियगल्लपत्तलय ॥ ५ ॥

तंबोलपाडलुट्टीय जाव चिट्टति दप्पणं धेत्तुं । समुहं पलोयमाणा ताव लहुं आगओ भत्ता ॥ ६ ॥

दट्ठूण तासि तारिस दुच्चिट्ठं तेण जायकोवेण । एगा महिला पहया तह जह सा पाविया मरणं ॥ ७ ॥

तयणंतरं च भयवसकंपिरेदेहाहिं सेसमहिलाहिं । चित्तियमिमं जहेसा तह अम्हेवि हु विवज्जामो ॥ ८ ॥

तम्हा आर्थसेहिं पहणामो रक्खिएण किं इमिणा ? । इइ चित्तिऊण समगं खित्ता तदभिमुहमायंसा ॥ ९ ॥

तओ एगूणपंचसयनारीसयपमुक्कदप्पणेहिं पहओ समाणो सो मओ तक्खणेण, पच्छा समुप्पणो तासिं पच्छा-
यावो-अहो का गई एत्तो पइमारियाणं भविस्सइ ? , उद्धूलिस्सइ लोओ दंडिस्सइ नराहिवो अवमन्निस्सइ सयण-
वग्गो गंजिस्सइ खलयणो, तम्हा मरणमेव संपयं पत्तकालंति परिभाविऊण पिहियाइं सव्वदाराइं, पक्खित्तं गेहब्भं-
तरे बहं तणकट्ठपलालं, पज्जालिओ सव्वओ जलणो, जालाउले य तंमि विमुक्को ताहिं अप्पा, अह पच्छायावेण
साणुक्कोसयाए ताए अकामनिज्जराए सव्वाओ मरिऊण मणस्सेसु उववन्ना, कम्मधम्मसंजोगेण य एगत्थ मिलिया
एगूणपंचवि सया ते चोरा जाया, एंगंमि य विसमंमि पच्चए परिवसंति ।

सो य सुवणणयारो मरिऊण तिरिच्छेसु उववन्नो, तत्थ जा सा अणेण पढमं चिय मारिया सा एगं भवं तिरिएसु
उववज्जिऊण पच्छा बंभणकुले पुत्तो जाओ, कमेण य पत्तो पंचवारिसियत्तणं, सो य सुवणणयारो तिरियभवओ
उव्वट्ठिऊण तंमि चेव बंभणकुले तब्भइणित्तेण दारिया जाया, सो य पंचवारिसिओ समाणो तीसे बालग्गहा

कओ, सा य अइदुत्तणेण निच्चमेव रोयइ, अन्नया य तेण बालगाहेण उदरेदसपरिघट्टणं कुणमाणेण तह कहवि
सा जोणिहारे छिक्का जह तक्खणं चैव नियट्ठा रोयणाओ, तओ तेण नायं-लद्धो मए उवाओत्ति, एवं सो तीसे
रोयमाणीए निच्चकालं करेइ, अन्नया य तहा कुणमाणो नाओ सो मायापिजहिं, ताहे हणिऊण निदूयाडिओ निय-
गिहाओ, पलायमाणो अ गओ तं चैव चोरपल्लिं जत्थ ताणि एगूणगाणि पंच चोरसयाणि परिवसंति, सा य दारिया
अण्डुप्पन्नजोवणा विणट्ठसीला जाया, सच्छंदं परियडंती य एगं गामं गया, सो य गामो तेहिं चोरोहिं आंगतूण
लुंठिओ, सा य तेहिं गहिया, तओ तेसिं सव्वेसिं पि भज्जा जाया । अन्नया य चोराणं चिता समुण्णमा-अहो इमा
वराई एत्तियाणं अम्हाणं पइदिणं सरीरचेट्ठं कुणमाणीं खिज्जिस्सइ, ता जइ अन्ना विइज्जिया संपज्जइ तो से
विस्सामो होज्जत्ति परिभाविऊण एगया तीसे विइज्जिया आणिया, जंचैव आणिया तंचैव चिरमहिळा ईसासल्लनि-
ब्भिज्जमाणमाणसा तीसे मारणत्थं छिद्दाइ मगइ, अन्नया य ते चोरा गामंतरमुसणत्थं पधाविया, तीए नायं-एस
पत्थावो वट्ठइ, ता विणासेमि एयंति परिभाविऊण नीया सा कूवतडे, भणिया य-भेइ ! पेच्छ कूवमज्जे किपि
दीसइ, सावि अविगप्पभावेण दट्ठमारट्ठा, तथणंतरं च ताए पक्खित्ता तत्थेव, चोरा य आणया पुच्छंति तीसे
बुत्तं, ताए भणइ-अप्पणो महिलं कीस न सारेह ? , किमहं जाणामि ? , तेहिं मुणियं-जहा एयाए मारिया,
तओ तस्स बंभणपुत्तस्स हियए ठियं, जहा-अवस्सं एसा सा मम पावकम्मा भगिणी एरिससीलेण संभावज्जइ,

सुद्वह य समीववत्ती भगवं महावीरो सवणू सव्वदरिसी, ता तं गंतूण पुच्छामित्ति, इहागओ लज्जाए मणसा पुच्छि-
उमारद्धो, तओ मए भणियं-देवाणुप्पिया ! वयणेण पुच्छ, तओ अणेण जा सा सा सत्ति कहियं, मएवि सच्चेव
सा तव भगिणीत्ति सिद्ध ।

इय गोयम ! एवंविहविडंबणाजालमूलगिहभूया । विसया विसं व विसमं दिति विवागं मणुस्साणं ॥ १ ॥
खणदावियसोकखाणं भवोहसंवट्टियासुहनिहीणं । भोगाण कए सुद्धा जुत्ताजुत्तं न पेच्छति ॥ २ ॥
चोज्जमिणं रागंधा पुरिसा अणवेक्खिऊण परमत्थं । जं अत्थि तं विमोत्तूण नत्थि जं तं विभाविति ॥ ३ ॥
तथाहि-मंसलवमेत्तनिच्चित्तिंयपि अहरं पवालखंडं व । जलबुब्बुयसच्छहमवि नयणजुयं नीलनलिणं वा ॥ ४ ॥
चम्मावणद्धअट्ठियमयंयपि वयणं मयंकविंबं व । मंसुच्चयमेत्तंपिपि थणजुयलं कणयकलसं व ॥ ५ ॥
वेल्लहलसुणालंपिव बाहुजुयं अट्ठिमंसमेत्तंपि । सोणियसुत्तविलीणं रमणंपिपि असयकूवं व ॥ ६ ॥
मन्नंति विसयमूढा अवियारियपारमत्थियसरूवा । अच्चंतनिदियाणिपि एवं अंगाणि जुवईणं ॥ ७ ॥
इय एवं करुणासायेरेण सिरिवद्धमाणनाहेण । कहिए वत्थुसरूवे समग्गभुवणप्पईवेण ॥

सो पुरिसो संवेगमावन्नो पव्वइओ । सा य ससुरासुरनरतिरियाउलावि परिसा पयणुरागसंजुत्ता जाया । एत्थंतरे
मिगावई देवी हरिसपगरिसवियसिथनयणकमला महावीरं वंदित्ता एवं वोत्तुं पवत्ता-भयवं ! जाव चंडपज्जोयराय-

मापुच्छामि ताव तुम्हं सयासे पद्मयामिति भणिऊण चंडपज्जोयमुवट्ठिया, एवं च कहिउमाढत्ता-महाराय ! जइ तुमं अणुमन्नसि ता अहं पद्मयामि, रायावि तीसे महतीए परिसाए लज्जाए वारिउमपारयंतो तं विसजेइ, तओ मिगावई नियपुत्तं उदयणकुमारं चंडपज्जोयस्स निकखेवगनिक्खित्तं काऊण पवइया, पज्जोयस्सउवि अट्ठ अंगारवइप्प-मुहाओ देवीओ पवइयाओ, ताणिवि एगूणपंचचोरसयाणि पुवं पडिवन्नपव्वजेण चोरेण गंतूण पडिबोहियाणि पव्वज्जं च पडिवन्नाणि, अन्नो य बहुजणो संबुद्धो, पज्जोयनरवइवि जयगुरुप्पभावपडिस्संतवेराणुबंधो उदयणं कुमारं रज्जे सहत्थेण संठाविऊण गओ सनयारिं, मिगावइवि भगवया अणुसासिऊण समणिया चंदणबालाए पव-त्तिणीए, तीसे य समीवट्ठिया जहट्ठियं साहुणीजणसमुच्चियं किरियाकलावमब्भसइ ।

भयवंपि विहरमाणो वाणियगामप्पमोक्खनयरेसुं । आणंदकामदेवाइसावगे दस विबोहेइ ॥ १ ॥

जेसिं धम्ममहाभरधरणुद्धुरकंधराण तियसावि । चालिंसु खोभकरणुज्जुयावि न मणो मणांगपि ॥ २ ॥

जे इस्सरिएण लहुं करिंसु वेसमणजक्खरायमवि । पडिवाल्लिंसु य सम्मं निच्चंपि दुवालस वयाइं ॥ ३ ॥

गेहसमीननिवेसियपोसहसालासु पोसहुज्जुत्ता । अट्ठमिचउद्दसीसुं समणा इव जे य निवसिंसु ॥ ४ ॥

जेसिं सरिरधाऊ सत्तवि सव्वद्वयणरसभिन्ना । कुप्पावयणियवयणाणि गोयरं नेव वच्चिंसु ॥ ५ ॥

इय तेसि गुणलवोविहु नो तीरइ मारिसेहिं परिकहिउं । विरइंसु नूण सयमेव गणहरा जेसि चरियाइं ॥ ६ ॥

अन्नेऽविदु नरवइदंडनाहसामंतमतिपमुहजणे । पडिवोहिऊण पुणरवि कोसंबि आगओ सामी ॥ ७ ॥
 तहियं समोसढस्सा चरिमाए पोरिसीए जयगुरुणो । विम्हइयजीवलोयाइं फालिआइं विमाणाइं ॥ ८ ॥
 साहावियाइं पच्चक्खदिस्समाणाणि आरुहेऊण । ओयरिया भत्तीए वंदणवड्डियाए ससिसूरा ॥ ९ ॥
 तेसिं विमाणनिम्मलमऊहनिवहप्पयासिए गयणे । जायं निसिंपि लो गो अवियाणंतो सुणइ धम्मं ॥ १० ॥
 नवरं नाउं समयं चंदणबाला पवत्तिणी नमिउं । सामिं समणीहिं समं निययावासं गया सहसा ॥ ११ ॥
 सा पुण मिगावइं जिणकहाए वक्खित्तमाणसा धणियं । एगागिणी चिय ठिया दिणंति काऊण ओसरणे ॥ १२ ॥
 बोलीणे खणमेत्ते साइं विमाणाइं आरुहित्ताणं । ससिसूरेसु गएसु वियंभिए रयणितिमिरभरे ॥ १३ ॥
 समणीओ समीवंमी अपेच्छमाणी य सा महासत्ता । पगया पडिस्सयंमी पवत्तिणीए य तो भणिया ॥ १४ ॥
 तुम्हारिसीण सुकुलुगयाण जुज्जइ किमेवमायरिउं ? । एगागिणीवि य तुमं जंसि ठिया एत्तियं रयणिं ॥ १५ ॥
 पडिवज्जिय तच्चयणं मुज्जो मुज्जो सदुच्चरीयाइं । निंदंतीए तीए उप्पन्नं केवलं नाणं ॥ १६ ॥
 अह-पयलायंतीए पवत्तिणीए सप्पं पलोइयं इंतं । संथारंगमि हत्थो ठविओ तीए धराहिंतो ॥ १७ ॥
 निदावगमे पुच्छा अहिकहणं नाणबुज्झणऽणुतावो । निहयघणघाइकम्मा पवत्तिणी केवलं पत्ता ॥ १८ ॥
 इओ य-उप्पन्नसंसओ पढमगणहरो पणमिउं जिणं भणइ । किमवड्डियावि भावा विवरीयत्तं पवज्जंति ? ॥ १९ ॥

जं ओइन्नाइं नहाओ नाह ! मायंडससिविमाणाइं । गुरुणा भणियं—गोयम ! दस अच्छरियाइं एयाइं ॥ २० ॥
उयसग्ग गब्भहरणं इत्थीतित्थं अभाविआ परिसा । कणहस्स अवरकंका ससिसूरविमाणओयरणं ॥ २१ ॥
हरिंसकुलुपत्ती चमरुप्पाओ य अट्टसय सिद्धा । अस्संजयाण पूया जायंति अणंतकालाओ ॥ २२ ॥
इय साहियमच्छरियं ससिसूरविमाणसंगयं एत्तो । गोसालयवुत्तं साहिज्जंतं निसामेह ॥ २३ ॥

सो पुद्बभणिओ गोसालो तेउलेसामाहप्पपडिहयपडिवक्खो अट्टगनिमित्तलवपरिन्नाणमुणियजणमणोगयसंरूपो
अजिणोऽवि जिणसहसत्तणो पगासेमाणो सद्धत्थ अणिवारियप्पसरं परिब्भमंतो सावत्थिं नयरिभागओ, ठिओ य
बुधुणधन्नपरिपुन्नाए हालाहलाभिहाणाए कुंभकारीए आवणंमि, तस्स य लोगो अमुणियपरमत्थो मणोगयसंरूप-
परिन्नाणमेत्तसमुप्पन्नकोऊहलो जिणोत्ति पसिद्धिं निसामिऊण अणवरयं पज्जुवासणं कुणइ, भयवंपि महावीरो सम-
णसंधपरिवुडो जहन्नेणऽवि कोडिसंखेहिं देवेहिं अणुगम्ममाणो भुवणच्छेरयभूयं विभूइसमुदयमुद्धंतो दिसिचक्खाल-
परिसरिएण पभामंडलेण समुग्गयाणेगमायंडपरंपरं व गयणमुवदंसयंतो पयपरिवाडिसुरविरइयकणयंबुरुहनिवहेण
थलकमलसोहं व माहियलस्स दावितो पइ सन्निवेसमसम्भूयभावणं जणाणं पणासयंतो पयंडपासंडदप्पखंडणं कुणमाणो
निद्वाणनगरसग्गं पव्वत्तयंतो कोसंबीओ निक्खमिच्चा तमेव सावत्थिं नगरिं संपाविओ, नाणाविहविहगविरायंततरुणत-
रुमणीयंमि य समोसढो कोट्टगचेइयंमि, मुणियजिणागमा य समागया परिसा, पज्जुवासिऊण य गया जहांगयं, पत्ते य

भिक्खुवाकाले छट्टपारणयं काउकामो भयवओ अणुण्णाए पविट्ठो भिक्खुदं गोयमो पुरीए, तहिं च तियचउक्कचचरेसु
 गोसालो जिणो सव्वन्नत्ति परोप्परं जंपंतं जणं निसामिऊण जायसंसओ भिक्खं घेत्तण पडिनियत्तो, जहाविहिं सुंजिऊण
 जायंमि पत्थावे समागए पुरीलोए सामिं पुच्छिउं पवत्तो-भयवं! एत्थ जणो गोसालं जिणं सव्वन्नं च परिकित्तेइ तं किं
 घडइ मिच्छा वा?, भगवया भणियं-भो देवाणुप्पिया! गोसालो मंखलिपुत्तो अजिणो जिणप्पलावी मए चेव पवाविओ
 सिक्खं च गाहिओ ममं चेव मिच्छं पडिवन्नो, अओ न सव्वन्नू न य जिणो हवइत्ति, एवं सोच्चा पुरीजणो सुणियपरमत्थो
 पडिनियत्ति नयरीए सिंघाडगतिगचउक्कचचरेसु अन्नमन्नस्स सविम्हयं परुविउमारद्धो-अहो भयवं! महावीरो
 समुप्पन्नदिव्वनाणदंसणो एवं भासइ-एसो गोसालो मंखलिपुत्तो अजिणो जिणप्पलावी, अहं जिणोत्ति मिच्छं संलव-
 इत्ति, इमं च कन्नपरंपराए सोच्चा गोसालगो अच्चंतकोववसफुरंतओट्टुडो आजीवियसंघपरिवुडो अमरिसमुव्वहतो
 अच्छइ। इओ य-भगवओ महावीरस्स अंतेवासी आणंदो नाम थेरो अणिविखत्तछट्टतवकम्मकरणपरो पारणगंमि
 पडिग्गहं गहाय निग्गओ गोयचरियाए, उच्चावएसु य गिहेसु भिक्खं परिब्भमतो तीसे हालाहलाए कुंभकारीए
 कुंभकारावणस्स अदूरेण गंतुं पवत्तो, तं च दट्ठण गोसालो भणइ-भो आणंद! इओ एहि, निसामेहि दिट्ठतमेगंति,
 इमं च एवमायन्निऊण समागओ आणंदसाहू, भणिओ य गोसालेण-भो आणंद! इओ चिरा समइक्कंताए अट्ठाए
 केइ अत्थत्थिणो वाणियगा नाणाविहभंडविच्छइभरिएणं सगडीसगडेणं सुवहुं भत्तपाणपत्थयणं गहाय एणं महंतं

जणसंचाररहियं छेत्तभूमिं व करिसयविराइयं भारहकहं व भीमअज्जणनउलसउणिसंकुलं दीहछिन्नावायं उब्भड्ढवि-
डविसंकडं महाडविमणुपविट्ठा, तीसे य कंचि देसमणुपत्ताणं तेसिं पुव्वगहियसुदयमणुदियहं पिज्जमाणं झीणं, तय-
णंतरं ते वणिथा झीणसलिला तण्हाए परब्भाहया समाणा एगत्य मिलिज्जण एवं भणिउमारद्धा—
भोयणविरहेवि जियं कइवि दिणे वसइ देहगेहंसि । सलिलाभावे पुण दीवओव पवणेण विज्झाइ ॥ १ ॥
ता जावज्जवि तण्हा कालयणिव अवहरइ जीयं । ताव परकज्जजायं मोनुं सलिलं पलोएह ॥ २ ॥
इयं च ते पयट्ठा सव्वासु दिसासु पाणियनिमित्तं । कत्थइ अपेच्छमाणा एगं वणसंडमल्लीणा ॥ ३ ॥
विच्छायसुहा दीणा अपत्तकालावि संपइ मरामो । एवं पयंपमाणा तण्हावससुसियसवंगगा ॥ ४ ॥
सिसिरतरुच्छायाए निमीलियच्छा य जाव चिट्ठति । तावेगनरजुवाणो समाणओ तेसि पासंभि ॥ ५ ॥
भणियं च तेण मुंचह विसायमहुणा मए जओ दिट्ठो । वणसंडमज्झयारे चउम्मुहो वम्मिओ गरुओ ॥ ६ ॥
ता एह तत्थ जामो पढमसुहं भिदिमो य तस्स लहुं । पच्छा अच्छं पत्थं जलखणं आपिबामोत्ति ॥ ७ ॥
एयं निसामिज्जणं ते वणिथा तक्खणेण गंतूण । भिंदती पढमसुहं तस्स तिसाविवससवंगगा ॥ ८ ॥
फालिदुज्जलं च सलिलं सारयससिणो मज्जहजालं व । हेलाए नीहरंतं पेच्छंति तओ पहिट्ठा ते ॥ ९ ॥
तयणंतरं च करचरणखालणं वयणसोहणं पियणं । वीसत्था वाणियगा निव्वत्तती जहिच्छाए ॥ १० ॥

पच्छा भेरति करवत्तयाइं दिइणो य कलसए चेव । दुलहं लद्धं वत्थुं कह वा नो वेप्पइ जणेण ? ॥ ११ ॥
 जाया पुणोवि चिंता तेसिं जह सलिलमित्थ लद्धमहो । तह बीयमुहे खणिए पाविज्जइ नूण तवणिज्जं ॥ १२ ॥
 ता भिंदह पुणरवि वम्मियस्स बीयं मुहं लहुं चेव । इय भणिए पुरिसेहिं तहत्ति सव्वं तओ विहियं ॥ १३ ॥
 ताहे सुजच्चकंचनिचयं तत्तो विणिगयं संतं । हरिसुल्लसियसरीरा गिण्हंति जहिच्छियं वणिया ॥ १४ ॥
 हिट्ठा भणंति वम्मियनिभेण चिंतामणी पयावइणा । अम्हारिसपहियहियट्ठयाए मन्ने कओ एत्थ ? ॥ १५ ॥
 ता अज्जवि तइयमुहं भेत्तव्वं होइ संपयम्मिमस्स । संभाविज्जंति इमंमि जेण रयणाणि मणिणो य ॥ १६ ॥
 एत्थंतरंमि पुरिसेहिं भिंदियं तंपि लोभनडिएहिं । अह नीहरियाइं तओ रयणाइं अणेगभेयाइं ॥ १७ ॥
 कणगं परिहरिऊणं महग्घरयणेहिं तेहिं सगडाइं । भरियाइं गाढपहरिससंभारं उव्वहेतेहिं ॥ १८ ॥
 नवरं चउत्थयंमि य मुहंमि भेतुं पयट्ठिया वंछा । तेसिं तु उत्तरोत्तरविसिद्धवत्थूण लाभेण ॥ १९ ॥
 अह जाव तं विहाडिंति नेव तावेगथेरपुरिसेण । तेसिं हियत्थिणा सुद्धबुद्धिणा जंपियं एयं ॥ २० ॥
 भो भो देवाणुपिया ! जलं च कणगं च रयणनिवहं च । लद्धूण मुयह वम्मियमहुणा वचह सगेहेसुं ॥ २१ ॥
 मा पविहाडह एयं कज्जाण गईओ हुंति कुडिलाओ । सिट्ठो सिद्धतेविहु लोभो मूलं विणासस्स ॥ २२ ॥
 लोगेऽवि पसिद्धमिमं जं किर निवसंति गाढदाढिळा । अचंततिव्वदण्णा सण्णा वम्मियनिवासेसु ॥ २३ ॥

जइ कहवि मणोवंचियजलाइलाभो इमंमि भे जाओ। तहवि न खणिउं जुजइ बिले बिले होइ किं गोहा ? ॥ २४ ॥
जओ-अनओ जणियगुणोऽविहु पयावविहवं न देइ गरुयाणं । विहिवसविसंघटतोऽवि गुणकरो नयसमारंभो ॥ २५ ॥
अह तवयणं अवगणिऊण ते लोभतरलिया वणिया । वम्मियचउत्थमुहमवि जवेण खणिउं ससाढत्ता ॥ २६ ॥
खणमाणेहिं तेहिं पयंडजमबाहुदंडसारिथ्यो । तस्संतो निवसंतो सुहेण परिघट्टिओ नागो ॥ २७ ॥
ताहे सो रोसारुणनयणपहापाडलीकयदियंतो । विरइयअकालसंज्ञोव निगओ वम्मियाहेतो ॥ २८ ॥
तहवि य फारफणफलगफुरियरयणुच्छलंतरुइपडलो । पुच्छच्छडताडियभूमिवट्ट गुंजंतवणसंडो ॥ २९ ॥
सिग्घं नीहरिऊणं वम्मियसिहरग्गभागमारुहइ । पेच्छइ य भाणुमंडलमह सवियासाहिं अच्छीहिं ॥ ३० ॥
अह खणमेक्कं सूरं पलोइउं अणिमिसाए दिट्ठीए । ते वणिया आलोयइ सो उग्गविसो महासण्णो ॥ ३१ ॥
तयणंतरं च ते तस्स चक्खुणा तिव्वजलणजडिलेण । निदुद्धा समगं चिय समग्गभंडोवगरणेहिं ॥ ३२ ॥
नवरं सो एगो चिय थरो नियभंडसगडियासहिओ । अणुकंपिगाए देवीए पाविओ वंचियं ठाणं ॥ ३३ ॥
तो भो आणंदमुणिंद ! ते जहा वाणिया अइविमूढा । अइलोभेणभिभूया सण्णायो विणासमावद्धा ॥ ३४ ॥
तह तुज्झ धम्मसूरी समणो वरनायकुलससुब्भूओ । लद्धपसिद्धी भुवणत्तएऽवि समणो महावीरो ॥ ३५ ॥
असुरसुरनागकिन्नरनरनरवइपूयणिज्जपयकमलो । एत्तियमेत्ताएविहु सिरीए संतोसमलहंतो ॥ ३६ ॥

जइ एत्तो मह संसुहमभत्तिपर वयणलेसमवि वइही । तमहं तवतेएणं भासरासिं करिस्सामि ॥ ३७ ॥
जह पुण सो थेरनरो ते वणिए सवहा निवारितो । न विणट्ठो तह आणंद ! तं पि नाहं विणासिस्सं ॥ ३८ ॥
ता गच्छ तुमं नियधम्मसूरिणो कहसु सवमवि एयं । बलिणा समं विरोहो न कथाइ सुहावहो होइ ॥ ३९ ॥
एवं निसामिऊण आणंदमहरिसी सच्छहियत्तणेण समुण्णभयसंकप्पो अपरिसमत्तभिक्षाकज्जोऽवि तओ
ठाणाओ सिग्धाए गईए समागओ जिणंतियं, तिकखुत्तो आयाहिणपयाहिणपुच्चं वंदिऊण गोसालगोवइड्डं वणि-
यदिट्ठंतं दिट्ठीविसमुयगदहणपज्जवसाणं सबं परिकहेइ, पुच्छइ य-भयवं ! किं गोसालो एवंविहस्सऽत्थस्स करणंमि
समत्थो न वा ? भगवया भणियं-आणंद ! समत्थो चेव, केवलं अरहंताणं भगवंताणं असमत्थो, परितावमेत्तं पुण
करेज्जा, ता गच्छ तुमं गोयमाईणं समणाणं एयमंठुं केहि, जहा-मा तुब्भं कोइ गोसालं मंखलिपुत्तं मंतिंयं
पाउब्भूयं समाणं धम्मियाएवि पडिचोयणाए पडिचोएज्जा, जओ एस ममं मिच्छं पडिवन्नोत्ति, एवं च विणएण
पडिसुणेत्ता गओ आणंदो गोयमाईण समीवं कहिउमारद्धो य तं वइयरं, एत्थंतरे गोसालो अत्तणो पराभवगस-
हंतो संपत्तो जिणसमीवं, अदूरे य ठाऊण भगवओ अभिमुहं एवं भणिउं पवत्तो-भो कासव ! तुमं मम हुत्तं एवं
वयसि-एस गोसालो मंखलिपुत्तो मम धम्मंतेवासी इच्चाइ, तन्नं मिच्छा, जो हि गोसालो तुमंतेवासी सो सुक्खाभि-
जाइओ भवित्ता कालमासे कालं काऊण अन्नयरेसु देवलोएसु देवत्ताए उववन्नो, अहं पुण उदाई नाम महासुणी

विचित्तवचरणसमर्थं नियदेहमुज्झिऊणं तस्स गोसालगस्स सरीरयं थिरं धुवं धारणिज्जं सीयसहं उण्हसहं खुहा-
पिवासासहं विविहदंसमसगाइपरीसहोवसग्गसहं थिरसंधयणंतिकाऊण तमणुपविट्ठो, ता भो कासवा ! साहु तुमं
अपरियाणिऊण मं गोसालं मंखलिपुत्तं वाहरसि, एवं च तेण भणिए भगवया महावीरेण जंपियं-भो गोसालग !
जहा कोइ चोरपुरिसो विविहपहरणहत्येहिं खंडरकुलपाभोक्खनरनियेहिं पारब्भमाणो णो कत्थइ गहं वा दरिं वा
दुग्गं वा वणगहणं वा अत्तणो गोवणत्थं अपावमाणो एयेण उन्नालोमेण वा सणलोमेण वा कप्पासपुंमेण वा तण-
सूएण वा तदंतरे दिन्नेण व अत्ताणमणावरियपि आवरियपिव मणमाणो निब्भओ निरुव्विगो अच्छइ, एवमेव
तुमंपि गोसाला ! अणणो संतो अणमप्पाणं वागरेसु, ता मा एवमलीयं वाहरसु, सुचेव तुह सरीरच्छाया, नो
अन्नत्ति, एवं च भगवया वुत्तो समाणो पज्जलियपयंडकोवानलो उच्चावएहिं वयणेहिं जयगुरू अक्कोसिऊण भणइ-भो
कासव ! नट्टोसि अज्ज, भट्टोसि अज्ज, अज्जेव न भवसि तुमंति, जो गिरिकंदरसुत्तं सीहं वोहेसि कीलाए, एत्थंतरे
भयवओ महावीरस्स अंतवासी सत्वाणुमूईनामो अणगारो धम्मायरियाणुरागेणं एयमहं सोहुमपायंतो समांगतूण एवं
भणिउमारद्धो-भो गोसालग ! तहारुवस्स समणस्स वा माहणस्स वा अंतिए जे एगमवि धम्मियं वयणं निसामिंति
तेऽवि तं वंदंति नमंसंति गुरुबुद्धीए पज्जुवासंति, किं णु तुमं जो मूलाओ चिय भयवया चेव पद्माविओ सिक्खाविओ
बहुस्सुतीकओ भगवओ चेव मिच्छं पडिवज्जंतो न लज्जसि ?, ता मा एवं कुणसु, अज्जावि सो चेव तुमं, सा चेव

तुह देहच्छाया, कीस अप्पाणं अवलवेसित्ति वुत्ते सद्वाणुभूइं मुणिं गोसालो समुच्छलियकोवानलो तं दिव्वं पयडं
अणहियासणिज्जं तेउलेसं पक्खिविऊण निदहइ तक्खणेण, सो य तेयनिदहो सुहज्झवसायाणुगओ मरिऊण सह-
स्सारे कप्पे अट्टारससागराऊ देवो जाओत्ति, गोसालगोऽवि पुणो भयवंतं अणेगप्पयारेहिं दुव्वयेणेहिं पहणिउं
पवत्तो, इओ य सुनक्खत्तनामो साहू तहा अवक्कोसिज्जमाणं भगवंतं निसामिऊण तणं व नियजीवियमवि गणंतो
सिग्घमांगंतूण गोसालं जहा सद्वाणुभूइं तहेव अणुसासइ, नवरं गोसालापक्खित्ततेउलेसापलीविओ समानो भय-
वंतं तिव्खुत्तो वंदिऊण सयमेव पंच महवयाइं उच्चारइ, समणा य समणीओ खामेइ, आलोइयपडिक्कंतो य कालं
काऊण अच्चुए कप्पे बावीससागरोवमाउयदेवेषु देवत्तेणं उव्वज्जइ, एवं च तम्मि पंचत्तं गए संते गोसालो दुव्विग-
हिओ बेयालोव लद्धावयासो विसेसओ परुसक्खराहिं गिराहिं तज्जणं कुणंतो वागरिओ सकारणं जयगुरुणा--भो
महाणुभाव ! गोसालग सिट्ठपहसमइक्कंतं तुह चरियं, जं मए पद्दाविओ मए सिक्खाविओ मए बहुत्सुइकओ
ममावि अवणवार्इ जाओ सि, एवं च जयगुरुणा सयमेव संलत्ते तेण अणाकलियकोवावेगेण सत्तट्ठ पयाइं पच्चोस-
क्किऊण पमुक्का महया संरंभेण भगवओ अभिसुहा तेउलेसा ।

अह मंदरगिरियां व निट्ठुरं जिणसरीरमक्कमिउं । असमत्था मारुयमंडलिच्च सा निहयमाहप्पा ॥ १ ॥

सयलदिसामुहपसरियपयंडतरतेयरइयपरिवेसा । आरत्तियदीवयमालियच्च सकखा विरायंती ॥ २ ॥

जच्चतवणिज्जणुंज्जलंगपहपडलविजियसोहस्स । भीयच्च तक्खणं चिय सामिस्स पयाहिणं कुणइ ॥ ३ ॥
तप्फरिसवसेण य भुवणबंधुणो अमयसीयतणुणोऽवि । जाओ मणागमेत्तं परितावो सव्वगत्तंमि ॥ ४ ॥
सा य तेउलेसा अहो अहं इमिणा महापावेण एरिसमकज्जं कारावियत्ति जायतिच्चकोवच्च उहुं उप्पइत्ता गोसा-
लगस्स सरीरं डहमाणी अंतो लहुमणुपविट्ठा, तओ गोसालो काउरिसोच्च समत्थेण नियतेएण विणिहओऽवि
धिट्ठिममवलंविऊण एवं पयंपेइ-अहो कासवा ! तुमं मम इमिणा तेएण अभिहओ संतो अंतो छण्हं मासाणं पित्त-
जरपरिगयसरीरो दाहवेयणोवक्कमियाउओ छउमत्थो चेव कालं करिस्ससि, भगवया भणियं-भो मंखलिपुत्त ! नो
खलु अहं तुह तेएण अहिहओ छण्हं मासाणं अंतो कालं करिस्सामि, किं तु अन्नाइं सोलस वासाइं पडिपुन्नाना-
दंसणघरो विहरिस्सामि, पच्छा खवियसयलकम्मसो सिवपयं गमिस्सामि, तुमं पुण अप्पणो तेएण निहइसरीरो
अंतो सत्तरत्तस्स पित्तमहाजरजलणपलित्तगतो छउमत्थो चेव कालं करिस्ससि ।

अह सव्वत्थवि नयरे सुद्धजणो जंणितं समाढत्तो । दोण्हं एत्थ जिणाणं परोप्परं वट्ठइ विवाओ ॥ १ ॥
तत्थेगो भणइ इमं पुर्विं कालं करिस्ससि तुमंति । इयरोविहु तदभिमुहं इममेव पयंपए वयणं ॥ २ ॥
न सुणिज्जइ परमत्थो को मिच्छा वयइ को य सच्चंति ? । कुसला भणंति वीरो सच्चं वागइ नो इयरो ॥ ३ ॥
इओ य जयगुरू नियसमणगणमामंतिऊण भणइ-भो समणा ! जह तणरासी तुसरासी पत्तरासी वुसरासी

वा जलणजालापलीविया समानी पणहुतेया जायइ, एवं गोसालो मम वहाय तेयं निसिरित्ता विणहुतेउलेसमा-
हण्यो जाओ, तम्हा छेदेण निब्भया तुब्भे एयं धम्मियाए चोयणाए पडिचोएह, हेऊदाहरणकारणेहिं निष्पिट्ट-
पसिणवागरणं करेहत्ति वुत्ते तहत्ति पडिसुणित्ता जयनाहं च सविणयं वंदिऊण समणा तं भणिउं पवत्ता ।
किं च-भो गोसालग ! किं तुज्झ दंसणे एस सत्थपरमत्थो । जं लोगमगगुक्कं तेसरिं कम्ममायरसि ? ॥ १ ॥

तहाहि-धम्मगुरुं अवमन्नसि नियमाहणं पवित्थरसि बहुसो । जुत्तीहिवि जं न घडइ तं भाससि सुक्कमजाय ॥ २ ॥
चायाए जीवरक्खं पयडसि तं लोयमज्झयारंसि । सद्धम्मगुणपहाणे सयं तु निहहसि साह्वि ॥ ३ ॥
एवविहं अकजं कुणंति न कयाइ किर चिलायावि । तुमए पुण अलियवियहमेव सव्वं समायरियं ॥ ४ ॥
न सरसि उवयारं एत्तिंयं पि जं रक्खिओ सि जयगुरुणा । तह वेसियायणुम्मुक्केतयनिहुज्झमाणंगो ॥ ५ ॥

इइ भगवओ समणेहिं धम्मियाए चोयणाए चोइजमाणो गोसालो आसुरुत्तो कोवेण मिसिमिसमाणो समाणो
जाव साहूणं सररीरस्स रोममेत्तं पि निहुहिउं न तरइ ताव पडिहयसामत्थं तं नाऊण केडवि आजीविथथेरा जयगुरुं
गुरुत्तणेण पडिवन्ना, अन्ने पुण विवेगविरहिया तहेव ठिया, गोसालगोडवि खणमेत्तं विगमिऊण रोसेण व माणेण य
दीहुणं नीससंतो दाढियलोमाइ लुंचमाणो हत्थे पकंपयंतो चलणेहिं भूमिं कुट्टमाणो अंतो विसण्णंतदुस्सहतेउल्ले-
सादाहवसेण य हा हओऽहमस्सीति पुणरुत्तं वाहरंतो अकयकज्जो चेव भगवओ समीवाओ नीहरिऊण गओ सट्ठाणं,

जयगुरुणाऽवि जंपियं-भो समणा ! जं इमं गोसालेण मम वहट्ठा तेयं निसिद्धं तं खलु अंगवंगमगहमलयमालवअ-
च्छवच्छकोच्छपाढलाढवज्जिमासिकोसलअवाहसुमुत्तराभिहाणाणं सोलसण्हं जणवयाणं उच्छायणाए भासरा-
सीकरणयाए समत्थंति वुत्ते विम्भियहियथा मुणिणो जायन्ति ।

सो य गोसालो कोडरनिहित्तहुयवहो तरुव निडुज्झमाणो कहिपि रं अलहतो तस्स दाहस्स पसमणत्थं कर-
कलिएणं भायेणं मज्जपाणं पियमाणो तवससंभूयमएण य अभिक्खणं गायमाणो अभिक्खणं नच्चमाणो अभि-
क्खणं हालाहलाए कुंभकारीए अंजलिपगगहपुव्वयं पणामं कुणमाणो अभिक्खणं भंडगनिमित्तकुट्टियमद्वियंतो-
निहित्तिसिरकलिलसल्लेण सरारं उयसिंचमाणो अडुवियडाइ पइक्खणं जंपमाणो परमसोगमुव्वहंतण सिससग-
णेण सिसिरोवयारकारिणा परिवुडो दिणे गमेइ ।

तत्थ य सावत्थीए नयरीए अयंपुलो नाम आजीविओवासओ परिवसइ, सो य पुव्वरत्तावरत्तसमर्थमि धम्मजाग-
रियं जागरमाणो जायसंसओ विंचितेइ-अहमेयं सम्मं न मुणामि-तणगोवालिया किं संठाणा हवइ ? ता गच्छामि
धम्ममायरियं धम्मोवएसगं समुप्पन्नादिद्वनाणदंसणं सव्वन्तुं गोसालं हालाहलाए कुंभकारीए आवणंमि वट्टमाणमापु-
च्छामिन्ति संपेहिता समुगयंमि दिणयेरे अण्णमहग्धाभरणालंकिवसरारो साओ गिहाओ पडिनिक्खमिन्ति पायवि-
हारचारेणं कइवयपुसिपरियरिओ गोसालयाभिमुहं गंतुं पयट्ठो, कमेण य कुंभारावणसमीवमणुपत्तो समानो तं

गोसालं करकलियभायणमभिवखणं महरापाणं कुणमाणं नच्चमाणं गायमाणं हालाहलाए कुंभकारीए अंजलिं
 विरयंतं मद्वियासलिलेणं सरीरं परिसिंचमाणं असंबद्धाई वयणाई पयंपमाणं पेच्छिऊण लज्जावसविभिलयंतलयणो
 सहसच्चिय सणियं सणियं पच्चोसकंतो झडत्ति समीवट्टिएहिं दिट्ठो गोसालयसिस्सेहिं, तओ वाहरिऊण भणिओ-
 तेहिं-भो अयंपुल ! तुमं पच्छिमरयणीए तणगोवालियासंठाणविसयं संसयं पकओसि, अयंपुलेण भणियं-भयवं !
 एवमेयं, पुणोऽवि गोसालगदुच्चिलिसियगोवणट्टया भणियं तेहिं-भो अयंपुल ! जं च तुह गुरू हत्थगयभायणे जाव
 अंजलिं विरयंतो विहरइ तत्थवि एस भगवं इमाई निव्वाणगमणसूयगाई पजंतलिगाई वागेरइ, तंजहा—

चरिमं गेयं चरिमं नट्टं चरिमं अंजलिकम्मं चरिमं पाणं अन्नं च मद्वियासीयलसलिलसरीराणुल्लिपणपमुहं
 वाचारं, ता अयंपुल ! भगवओ चउवीसमतित्थगरस्स गोसालगस्स पुव्वभणियल्लिगेहिं सूओ संपइ निव्वाणगमण-
 पत्थाओ वट्टइ, तम्हा गच्छ तुमं स एव तुह धम्मायरिओ इमं वागरणं वागरिही, एवं च सोच्चा सो दढहरिखुच्छ-
 लंतपुलयजालो तदभिमुहं गंतुं पयट्ठो, ते आजीवियथेरा सिग्घयरं गंतूण गोसालगस्स अयंपुलागमणं निवेपंति,
 तं च मज्जभायणाइ एगंते परिच्चयावेंति, आसणंमि य निवज्जाविति, एत्थंतरे पत्तो अयंपुलो तिवसुत्तो य पया-
 दिणीकाऊण परेणं विणएणं वंदित्ता गोसालयं निसण्णो समुच्चियासणे, तओ गोसालएण भणियं-भो अयंपुल !
 तुमं पच्छिमरयणीसमयंमि इमं संसयमुव्वहसि जहा तणगोवालिया किंसंठाणसंठियत्ति, नणु वंसीमूलसंठिया सा

पन्नत्ति, इमं च निसामिऊण पहिट्टहियओ पुणो तं वंदिऊण गओ सो सट्ठाणं । अन्नस्मि य वासरं ईसि समुवलद्ध-
चेयणो गोसालो नियमरणसमयमाभोइऊण अप्पणो सिस्से सदावेइ, तेसिं पुरओ य इमं वागेइ-भो देवाणुप्पिया !
मं कालगयं जाणिऊण मम सरिरं सुराहिगंधोदएण पक्खालिऊण सरसेण चंदणेण चचिऊण य महरिहं हंसल-
क्खणं पडयं नियंसावेज्जह, तयणंतरं सच्चालंकारविभूसियं सहस्सवाहिणीसिबिगासमारोवियं काऊण नीहरावेज्जह,
सावत्थीए पुरीए सिंघाडगतियचउक्कचचेसु इमं उग्घोसिज्जह, जहा-इमीए ओसप्पिणीए चलवीसाए तित्थयराणं
चरिमो एस गोसालगजिणो तित्थयरत्तं पालिऊण समुण्णक्केवल्लो संपयं सिद्धिं गओत्ति, इमं निसामिऊण ते सिस्सा
विणएणं सच्चं पडिसुणंति, अह सत्तमदिगंमि परिणममाणंमि समुवलद्धमुद्धुद्धिणा पुव्वदुच्चरियनिवहुसुमरणुण्णान्ना-
तुच्छपच्छायावेण चित्तियं गोसालेण—

अहह महापावोऽहं अजिणंपि जिणं भणामि अप्पाणं । सच्चं च सुसावयणंपि मुद्धलोयस्स साहेमि ॥ १ ॥

सिरियद्धमाण तित्थंकरो गुरु धम्मदेसगो परमो । आसाइओ मए तह तेयनिसग्गेण दुग्गेण ॥ २ ॥

दुद्धरंसजमभरधरणपच्चले मुणिवरे दहंतेण । निहहु चिय बोही मए हयासेण एमेव ॥ ३ ॥

सच्छंदं उम्मगं पयट्टमाणेण तह महीवेट्ठे । अप्पा न केवल्लो चिय लोगोऽवि भवन्नेवे खित्तो ॥ ४ ॥

अहवा समगमुवणत्तएऽवि तं नत्थि पावठाणमहो । जं कइवयदिगक्खे मए अणज्जेण नो विहियं ॥ ५ ॥

तं चोन्नं जं इमिणावि दुट्टदेहेण पावमरगुरुणा । जमवयणंपिव भीमं अज्जवि नासं न वच्चामि ॥ ६ ॥
मुद्धेण मए चिरजीवियत्थिणा कवलियं हि तालउडं । आगामियमसुहमतक्किऊण जं एवमायरियं ॥ ७ ॥

इय वेरगमुवगओ गोसालो तह न तेउलेसाए । संतण्णइ जह तेणं सपुव्वहुच्चरियवगेणे ॥ ८ ॥

एवं च सुचिरं परिच्छुरिऊण सो नियसिस्सगणं उच्चावयसवहसावियं काऊणं एवं भणिउं पवत्तो—भो महाणु-
भावा ! नो खलु अहं जिणो सव्वन्नू सव्वदरिसीवि, किंतु गोसालो मंखलिपुत्तो भगवओ वट्ठमाणतित्थंकरस्स
सिस्सोऽवि होऊण पच्चणीओ समणघायगो नियतेएण चेवाभिहओ छउमत्थो विणस्सिउकामो ङंभमेत्तपयट्ठिय-
पउट्ठपरिहाराइदुन्नओ एत्तियकालमप्पाणं परं च वुग्गाहतो विहरिओ, अओ एवंविहमहापावकारिणं कालगयं
जाणित्ता तुब्भे वामचलणंमि रज्जूए बंधित्ता इमाए सावत्थीए पुरीए सव्वत्थ सिंघाडगाइसु आकाहिक्किहं कुणमाणा
तिक्खुत्तो वयणंमि निट्ठीवणं पक्खिवंता एसो सो गोसालो मंखलिपुत्तो अजिणो गुरुपडिणीओ समणघायगो
असेसदोसकारी, भयवं पुण महावीरो जिणो तित्थयरो उप्पन्नदिव्वनाणदंसणो सच्चवाई कारुणिओ धम्मदेसगोत्ति
महया सहेण उग्घोसमाणा य मम सरीरस्स नीहरणं करेज्जहत्ति भणिऊण दारुणवेयणाभिहयसरीरो मओ गोसा-
लोत्ति । तं च कालगयं जाणित्ता ते आजीविथेरा नियगुरुपक्खवायमुव्वहंता कुंभकारावणस्स दुवारं पिहिऊण तस्स
मज्झयारे सावत्थि नयरिमालिहंति, तओ गोसालगस्स वामपायरज्जुबंधणपमुहं आघोसणापज्जवसाणं सव्वहपरिमो-

वखणं करोति, तथणंतरं च तं सरीरं सुरहिसलिलेहिं पहाविऊण तण्णखवायपडिवन्नजणथिरिकरणदुया महाया पूयासक्कारसमुदण्णं सिबियाए समारोविऊण नीहराविति, मयकिचाणि य कुणति ।

इओ य भगवं महावीरो सावत्थीओ नयरीओ निक्खमिऊण विहारक्केण गओ मिठियगमनयेर, समोसढो य मणिकोदुयाभिहाणचेइयंमि, धम्मनिसामणत्थं च परिसा समागया, खणमेणं च पज्जुवासिऊण जहागयं पडिगया, अह भगवओ महावीरस्स तेण तेउलेसापरितावसेण समुप्पन्नो पित्तजरो, तव्वसेण य पाउब्भूओ रुहिराइसरो, रविकरपडिवोहियकणयकमलसच्छहंपि मिलायलायन्नं जायं वयणकमलं सरयदिणथरसमुज्जलावि विच्छाईभूया देहच्छवी विथसियकुचलयदलदीहरंपि मउलाविं लोयणजुयलं महानगरगोउरपरिहाणुरुवंपि किसत्तणमुवगयं बाहुदंडजुयलंति, एवंविहं च भगवओ सरीरलंछि पिच्छमाणो मुद्धजणो वाहरिउमारद्धो—अहो भगवं महावीरो गोसालगतवतेयजणियपित्तज्जरविदुस्सिरीरो छण्हं मासाणमब्भंतरे परलोयं वच्चिस्सइत्ति, इमं च पवायं जणपरंपराओ निसामिऊण सीहो नाम भगवओ सिस्सो गुरुपेस्मानुरागेण एंगते गंतूण अहिययरमन्नम्भररुद्धकंठविवरो कहकहविगन्धिभणं रोविडं पयत्तो, इओ य केयलावलोएण अवलोइऊण भगवया वाहराविओ एसो, भणिओ य—

किं तं जणप्पवायं निसामिडं कुणसि चित्तसंतावं ? । नेवावयाए कइयवि विउक्कमंतीह तित्थयरा ॥ १ ॥

अन्नह संगमयविमुक्कचक्ककडूयणाइजणिएहिं । मरणं हविज्ज तइयावि मज्झं तिकखेहि दुक्खेहिं ॥ ३ ॥
 जो पुण तणुतणुयत्तणरुहरइसाराइओ विगारो मे । सो(निरु)वक्कमत्तणेणं सोऽवि न दोसं समावहइ ॥ ३ ॥
 सीहेण तओ भणियं जइवि हु एवं तहावि जयनाह ! । तुम्हावयाए तप्पइ सयलं ससुरासुरं भुवणं ॥ ४ ॥
 सिढिलियसज्झायज्झाणदाणपाभोक्खधम्मवावारो । चाउव्वन्नो संघोऽवि लहई नो निव्वुइं कहवि ॥ ५ ॥
 ता पसियसु जयबंधव ! अम्हारिसहिययदाहसमणत्थं । उवइससु भेसहं जेण होइ देहं निरोगं भे ॥ ६ ॥
 एवं कहिए तयणुकंपाए भगवया भणियं-जइ एवं ता इहेव भिंढयगामे नयरे रेवइए गाहावइणीए सधीव
 वच्चाहि, ताए य ममनिमित्तं जं पुवं ओसहं उवक्खडियं तं परिहरिऊण इयरं अप्पणो निमित्तं निष्फाइयं आणेहत्ति,
 इमं निसामिऊण हरिसवसपयट्ठुलयपडलाउरसरीरो सीहो अणगारो समुट्ठिऊण भयवंतं वंदइ नमंसइ, तयणंतरं
 पडिगगहं गहाय रेवइए गाहावइणीए गिहमुवागच्छइ, साऽवि रेवइ तं अणगारं ईरियासमिइप्पमुहचरणगुणसंपन्नं
 समणधम्मं व पच्चक्खं गिंहमि पविसमाणमवलोइऊण खिप्पामेव आसणाओ अब्भुट्ठइ, सत्तट्ठ पयाइं सम्मुहमवसप्पइ,
 सविणयं वंदिऊण य एवं जंपइ-संदिसह भंते ! किमागमणकारणं ?, सीहेण भणियं-जं तुमए वद्धमाणसामीं पशुच्च
 कयं तं मोत्तूण जं अत्तट्ठा निष्फाइयं ओसहं तं पणामेहत्ति, तीए भणियं-भयवं ! को एवंविहदिव्विणाणी जो रहसि-
 कयंपि एवंविहं वइयरं परिजाणइ, मुणिणा कहीयं-सयलभावाभावनिब्भासणसमत्थेकवलवलोयनिलयं भयवंतं वी-

रजिणं भोक्तॄणं को अन्नो एवंविहं साहिउं पारइ?, एवं सोच्चा-सा पहिट्टहियया सायरं तमोसहं सुणिणो पडिग्गहंमि पक्खिखइ, तओ सा तेण भावविमुद्धमेसहणयाणेण देवाउयं कम्मं निबंयइ, देवा य तीसे गिहंसि कणगरासिं नि-
सिरंति, महादाणं महादाणंति घोसंति, सीहोवि साहू तं गहाय भयवओ समण्यइ, तं च भयवं आहारेइ, आहा-
रिए य ताहिं ववगयपित्तजरसमुत्थविगारो अमयपुन्नसरीरोव समहिगसमुम्मिल्लियजच्चकणसच्छहच्छवी वीरो वि-
राइउं पवत्तो । अह पडिहयरोगे वद्धमाणे जिणिंदे हरिसवियसियच्छो सवसंघोऽवि जाओ । असुरसुरसभूहा वद्धि-
याणंदभरा सह नियरमणीहिं नच्चिउं संपयत्ता ।

गोयमसामीवि गणहरो महावीरं वंदिऊण पुच्छइ-भयवं! तुब्भं कुसिस्सो गोसालो कालं काऊण कहिं उववन्नो?,
भयवया भणियं-अच्चुर्यमि देवलोगे बावीससागरोवमाऊ देवो जाओत्ति, गोयमेण भणियं-भयवं! कहं तहाविहमहा-
पावकरणेऽवि एवंविहदिबदेविट्ठलाभो समुण्यण्णोत्ति?, तओ सिट्ठो सामिणा से सव्वोऽवि शरणसमयसमुप्यन्नातुच्छ-
पच्छायावाई वुत्ततो, पुणोऽवि गोयमेण भणियं-भयवं! तओ ठाणाओ सो आउक्खएण कहिं उववज्जिही?, कइया
वा सिद्धिं पाविहत्ति?, भगवया जंपियं-गोयम! निसामोहि-इहेव जंबुद्वीवे दीवे भारहे वासे विंशगिरिपायमूले
पुंडाभिहाणंमि जणवए सुमइस्स रन्नो भद्दाभिहाणाए देवीए गब्भे सो गोसालो तत्तो चचित्ता पुत्तत्ताए पाउब्भवि-
स्सइ, तओ नवणं मासाणं समहिगाणं समइक्कताणं पजाइही, तस्स य जम्मसमए तत्थ नयरं सभंभतरबाहिरे

भारगसो य कुंभगसो य परिमलायद्विधफुल्लधुयधूसरा पउमवुद्धी रयणवुद्धी य भविस्सइ, चंदसूरदंसणभणमुहजम्म-
 णमहूसवं काऊण य अम्मापियरो दुवालसमे दिवसे संपत्ते जम्मदिणाणुरूवं महापउमोत्ति से नामं करिस्संति, अह
 समुचियकाले अहिगयकलाकलवं तं सोहणंमि तिहिनक्खत्तमुहुत्तंमि महया रायाभिसेएणं अभिसिंचिहन्ति, तओ
 सो अक्खलियपरक्कमो पयंडपयावपडिहयपडिवक्खो अहमहमिगाए पणमंतनरिंदसंदोहमउलिमालालियचलणो
 महाराओ भविस्सइ, तस्स य महापउमस्स विजयजत्तमुवट्ठियस्स पुन्नभइमाणिभइनामाणो दो देवा महाड्डिया महापर-
 क्कमा सेणाकम्मं करिस्संति, ते य राईसरसेणावइमंतिसामंतपमुहा पहाणजणा एवंविहं वइयरमुवलब्भ पहरिसुस्स-
 सियरोमकूया महापउमस्स रणो गुणनिष्फणं देवसेणोत्ति दुइज्जं नामधेयं निम्मविस्संति, अणया य तस्स रणो
 सरयससहरधवलं चउदंतं सत्तंगपइट्ठियं लट्ठं हत्थिरयणमुप्पज्जिही, तम्मि य सो समारूढो एरावणपट्ठिओव
 पुरंदरो उवसोभमाणो इओ तओ परिभमिस्सइ, तयणंतरं पुणोऽवि ते राईसरादओ जणा नियपहुसिद्धिपलयणु-
 प्पन्नपमोयभरतरलिया तस्स राइणो विमलवाहणोत्ति तइयं नामधेयं पइट्ठिस्संति । अह अन्नया कयाइ तस्स
 रजभरमणुपालितस्स पुव्वभवब्भत्थतवस्सिजणविणासहीलणंणमुहाणत्थपचइयकम्मदोसेण समणसंधोवरि बाढं प-
 ओसो समुप्पज्जिही,

तो सो सधम्मकम्भुज्जाएऽवि एगे तवस्सिणो हणिही । अन्ने पुण बंधिस्सइ विविहपयोरेहिं बंधेहिं ॥ १ ॥

अक्रोसेही एगे उवहसिही तदपरे महापावो । अन्नसि निग्धिणगणो काराविस्सइ छविच्छेयं ॥ २ ॥
 एगेसिं हरिस्सइ वत्थपत्तकंबलपमोकखमुवगरणं । अन्नोसिं समणाणं वारिस्सइ भत्तपाणंपि ॥ ३ ॥
 अन्ने निव्वासिस्सइ नियनयरपुरागरासयाहितो । अन्ने पुण मारिस्सइ सत्थेहिं लहू सहत्थेण ॥ ४ ॥
 इय एवंविहमसमंजसं तओ पेच्छिऊण पउरजणा । भत्तिविणउत्तिमंगा तं एवं विन्नविस्संति ॥ ५ ॥
 देव ! न जुत्तं सोउंपि एयमच्चंतमजसंसंजणं । समणाण धम्मविग्घो जं एवं हवइ तुह रज्जे ॥ ६ ॥
 दुट्ठाण निग्गहो सिट्ठपालं नियकुलक्कमायरणं । रायाण एत्तियं चिय सलहिज्जइ किं थ सेसेहिं ? ॥ ७ ॥
 एकमकित्ती सबत्थ तिहुयणे उन्नमइ महापावं । अन्नं चिय रज्जखओ हीलिज्जंतेसु समणेसु ॥ ८ ॥
 अन्नं च-जइ देव ! कहव कुण्णंति तुम्ह समणा इमे समियपावा । ता सयलंपि वि रट्ठं दहंति हुंकारमेत्तेण ॥ ९ ॥
 एएसिं पभावेणं धरंति धराणिं सुहेण नरवइणो । एत्तो चिय मज्जायं जलनिहिणोऽवि हु न लंघंति ॥ १० ॥
 ता देव ! विरमसु धुवं तवस्सिजणपीडणाओ एयाओ । अकलंकचिय कित्ती जह वियरइ तिहुयणे तुम्ह ॥ ११ ॥
 इय पुरजणेहिं सुवहुप्पयारवयणेहिं वारिओ संतो । भावविरेहेऽवि सो तं पडिसुणिही तथणुवित्तीए ॥ १२ ॥
 अन्नया य सो रहवरारूढो निग्गच्छिही, इओ य सुभूमिभागे उज्जाणे तिनाणोवगओ विउलतेउलेसामाहप्प-
 दुद्धरिसो विविहतवचरणनिरओ सुमंगलो नाम तवस्सी आयाविस्सइ, सो य राया तेणप्पएसेण वच्चमाणो

तं ददूण निष्कारणुप्पन्नतिव्वकोवानलो सुमंगलं काउस्सग्गद्धियं रहग्गभागेण पणोछावेही, सो य तेण . पणोछिओ
समाणो धरणीयले निवडिओऽवि सणियं सणियं समुट्टिऊण पुणो काउस्सग्गेण पलंबियभुओ ठाही, सो य राया
तं उडुसंठाणसंठियं ददूण पुणोऽवि रहग्गेण पणोछावेही, सो य मंदं मंदमुट्टिऊण तेहव उस्सग्गेण ठाइस्सइ, नवरं
ओही पंउजिऊण तस्स पुव्वभवे आभोइस्सइ, तओ एवं भणिही—अरे नरिंदाहम ! न तुमं महापउमो न देवसेणो न य
विमलवाहनो, किं तु मंखलिपुत्तो गोसालगो तुमं, जेण निदह्हा महातवस्सिणो अचासाइओ निययधम्मगुरू, ता
जइ रे तथा सव्वाणुभूइणा सुणिवरिट्ठेण पहुणावि होऊण पडिविधायमकुणमाणेण निरुवमं पसममवलंबिऊण तुह
दुच्चिलसियं सम्ममहिंयासियं, सुनक्खत्तमहारिसिणा वा तित्तिक्खियं, असेसतिहुयणरंगानुछमहामहेण महावीरेण
वा खमियं तं, नो खलु अहं सहिस्सं, किं तु जइ एत्तो पणोछावेहिसि ता भवंतं सरहं सतुरयं ससारहिंयं नियतवते-
एणं छारुक्कुरुडं काहामि, सो य राया इमं निसामिऊण समुच्छलियपवलकोवानलो पुणोऽवि संदणग्गेण पणोछा-
वेही, अह तइयवेलंपि पणोछिओ सुमंगलसाहू विसुमारियपसमसव्वस्सो पणट्ठगुरूवएसो सत्तट्ठ पयाइं पचोसक्किऊण
तेउलेसं निसिरिही, ताए य सरहो ससारही सतुरंगमो सो निदज्झिही, सुमंगलसाहूवि तं निदहिऊण पुणरवि
पच्चागयसुहज्झवसाणो आलोइयनियदुच्चरिओ विचित्तेहिं तवोक्कम्मोहिं कम्मनिज्जरणं काऊण बहुयाइं वासाइं सा-
मणं परिपालिऊण य मासियाए संलेहणाए संलिहियसरीरो मरिऊण सव्वट्ठसिद्धे विमाणे तेत्तीयसागरोवगाऊ

देवो भविस्सइ । तओ नुओ समाणो महाविदेहे सिज्झिहिति । गोयमसामिणा भणियं-भयवं ! विमलवाहणो
कहिं उण्यज्झिही ? भयवया भणियं-गोयम ! विमलवाहणो तेण सुणिणा निहट्ठो सत्तमाए निरयपुढवीए अण्णइ-
ट्ठाने नरयावासे तेत्तीससागरोवमाऊ नेरइओ भविस्सइत्ति । तयणंतरं च—

सवत्तो पसरियतिकुवज्जसूलगवेहणसमत्थं । अणिसं सहिही विवसो तेत्तीसं सागराइं दुहं ॥ १ ॥
तत्तो उवट्ठित्ता मच्छभवं पाविऊण तिव्वेणं । पुव्वभवसाहुमारणजणिणं पावदोसेणं ॥ २ ॥
सो सत्थहओ संतो दाहजरवोरेवयणाभिहओ । मरिउं होही पुणरवि नेरइओ सत्तममहीए ॥ ३ ॥
तत्तो मच्छो छट्ठीए नारगो इत्थिया य नेरइओ । छट्ठीए पुढवीए इत्थी नेरइओ पंचमीए ॥ ४ ॥
उरगो नेरइओ पंचमीए उरगो पुणो चउत्थीए । नेरइओ सीहो तह चउत्थपुढवीए नेरइओ ॥ ५ ॥
सीहो तच्चाए नारगो य पक्खी य तइय नेरइओ । बिइज्जा पुढवीए नारगो सुयपरिस्सप्पो ॥ ६ ॥
बीयाए नेरइओ सुयपरिस्सप्पो य पढमपुढवीए । सण्णी तओ असण्णी नेरइओ पढमनरगंमि ॥ ७ ॥
तेण सुणिमारणज्जियपावेणं नरयवज्जठाणेषु । सत्थहओ दाहजरविट्ठो होही य मरिही य ॥ ८ ॥
तत्तो पक्खिसिरीसिवउरपरिस्सप्पो नेगमेएसु । जलथरजोणिसु तहा उववज्जिय भूरिवाराओ ॥ ९ ॥
चउरिंदिएसु तेइंदिएसु वेइंदिएसु य भवित्ता । सवत्थ सत्थनिहओ विवज्झिही नेगवाराओ ॥ १० ॥

वणसइपवणानलसलिलपुढविजाईसु विविहभेयासु । कालमसंखं वसिउं अकालमरणेण सो भरिही ॥ ११ ॥
इय उब्भडनियदुच्चरियजलणजालाकलावसंतत्तो । तं किंपि नत्थि दुक्खं जं पाविस्सइ न स वरागो ॥ १२ ॥

एवं च अणेगभवुम्मज्जणनिमज्जणाइं काऊण कहकहवि समासाइथेक्कम्मविवरो सो गोसालगजीवो रायगिहि
नयरे बाहिं वेसिथित्ताए उववज्जिही, तत्थवि चिरभवसाहुवहसमुत्थनिकाइयकम्माणुवत्तणवसेण रयणीए पसुत्ता
चेव एगेण विडपुरिसेण आभरणलिच्छुणा निसियखगधेणुनिह्यनिहारियउदरा भरिऊण पुणोऽवि रायगिहस्संतो
वेसिथियत्ताए उववज्जिऊण विवज्जिही । तओ जंबुदीवे दीवे भारहे वासे विंझगिरिपायमूले बिभेलए सन्निवेसे
माहणकुले दारियत्ताए पच्चायाही, तं च कालक्कमेण उम्मुक्कवालभावं अम्मापियरो समुच्चियस्स एगस्स माहणपुत्त-
स्स य भारियत्ताए पणामइस्सति, अन्नया य सा गुविणी समुरकुलाओ पियहरं निजमाणी अंतरा समुच्छलियपव-
लदावानलजालाकलावकवलिया कालं काऊण अगिगुमारेसु देवेसु देवत्ताए उववज्जिही, तत्तो य चविऊण माणु-
सत्तणेण समुप्पन्नो समानो तहाविविहसुगुरुदंसणसमुवलद्धसव्वधुधम्मबोहो भववेरगमुवहतो पव्वज्जं पडिवज्जिही,
कहिंवि पमायवसेण विराहियसामणो य असुरकुमारेसु देवेसु उववज्जिही, एवं कइवयभवगहणाइं पुणो पुणो
विराहियसामन्नो असइं भवणवासिदेवेसु जोइसिएसु य सुरसंपयं समणुभविऊण पुणो समुवलद्धमाणुसत्तो अइयार-
कलंकपरिहीणं पव्वज्जं समायरिऊण सोहम्मं देवलोए देवो होही, एवं सत्त भवे जाव निक्कलंकं सामणमणुपालिऊण

महाविदेहे वासे ददपइण्णाभिहाणो ईसरसुओ होऊण जायमवेरगो परिचत्तधणसयणो थैराण अंतिए सव्वविरइं गहाय छट्ठमाइतवोकम्मविसेसोहिं पुव्वभवपरंपरासमज्झियाइं पावकम्माइं खविऊण केवलनाणमुण्णाडेही, तओ सो ददपइण्णेकेवली सुणियगुरुजणावमाणसमुत्थमहापावविथंभियमवाडवीनिवडणकडुविवागो नियसमणसंधं सहाविऊण एवं भणिही—

हंहो देवाणुपिया ! जंबुद्वीवंमि भारहे वासे । मंखलिपुत्तो गोसालनामओऽहं पुरा आसि ॥ १ ॥
बहुकूडकवडनिरओ विवरीयरूवगो समणघाई । धम्मगुरुपच्चीओ समत्थदोसाण कुलभवणं ॥ २ ॥
नियतेएणं चिय दज्झमाणदेहो दढं बहुदुहत्तो । कलुणं विलयंतोऽहं पंचत्तं पाविओ तइया ॥ ३ ॥
तम्मूलं चउगइमुयगभीसणे दीहरे भवारण्णे । भमिओ सुचिरं कालं विसहंतो दारुणदुहाइं ॥ ४ ॥
ता भो देवाणुपिया ! इय सोच्चा मा कयावि सुगुरुणं । संधस्स पवयणस्स य पडिणीयत्तं करेज्जाह ॥ ५ ॥
बहुओऽवि पावनिवहो वच्चइ नासं सुदुत्तमेत्तेण । गुरुसाहुसंधसिद्धतधम्मवच्छलभावेण ॥ ६ ॥
एवमणुसासिऊणं नियसमणे सो तथा महासत्तो । पडिबोहिऊण भव्वे पाविस्सइ सासयं ठाणं ॥ ७ ॥
इय तइलोयदिवायरसिरिरीरजिणसरेण परिकहिंयं । गोसालयचरियमिमं गोयमसाभिस्स नीसेसं ॥ ८ ॥
एयं च तच्चरियं महादुहविवागमूलं निसामिऊण बह्वे समणा य समणीओ य सावयाओ य सावियाओ य गुरु-

प्पमुहाणं सविसेसं आसायणापरिहारपरायणा जायत्ति । अह भयवं महावीरो मिंढियगामनयराओ निक्खमिन्ता-
 समणसंघपरिवुडो गामाणुगामेण विहरमाणो संपत्तो रायगिहं नयरं, तस्स य अदूरविभागवत्तिमि गुणसिलयाभिहा-
 णचेइए विरइयं देवेहिं समोसरणं, पुव्वक्केमेण निसन्नो सिंघासणे जयगुरू साहिउं पवत्तो दयामूलं खमामहाखंधं
 मूलगुणसाहासमाउलं उत्तरगुणपत्तनिगरसंचन्नं अइसयकुसुमविराइयं जससोरभभरियभुवणंतरं विसमसरतरणिताव-
 पणासगं सग्गापवग्गसुहफलदाणदुल्ललियं पवरजणसउणणिसेवणिज्जं धम्ममहाकण्णतरुवरं । एत्थावसरंमि सेणियनरा-
 हिवो भयवंतं समवसरणट्ठियं सोऊण पट्ठिओ अभयकुमारमेहकुमारनंदिसेणपुत्तपरियरिओ वंदणवडियाए जयगुरूणो ।
 कहं चिय ?—

डिंडीरपिंडुडरियहरियखरकिरणविबकरपसरो । सहरिसहरिणिच्छिक्करयलुल्लसियचामरुग्घाओ ॥ १ ॥

गज्जंतमत्तकुंजरमयजलपडिहणियेरेणुपब्भारो । तरलतरतुरयपहकरसंखोहियमहियलाभोगो ॥ २ ॥

रणज्झणिरकणयकिंकिणिमालाउलरहसमूहपरियरिओ । दण्णुब्भडुहुडसहस्सरुद्धनीसेसदिसिनिवहो ॥ ३ ॥

इय सेणिओ नरिंदो हरिउक्करिसं परं पवहमाणो । करिणीखंधारूढो नीहरिओ नियपुराहिंतो ॥ ४ ॥

तयणंतरं च पत्तो समोसरणं । जहाविहिणा य पविट्ठो तयब्भंतरे, तिपयाहिणीकाऊण वंदिउं जयगुरू निविट्ठो
 समुचिए भूमिभागे, भगवथाऽवि पारद्धा तदुचिया धम्मकहा । कहं ?—

भो भो महाणुभावा निम्मलबुद्धीए चित्तह सयणहा । संसारं घोरमिमं महामसाणस्स सारिच्छं ॥ १ ॥
तथाहि-उब्भडवियंभियमुही विसयपिवासा महासिवा एत्थ । दढमणिवारियपसरा सव्वत्तो चिय परिब्भमइ ॥ २ ॥
ओहाभियसुरनरखयरविक्रमा तंतमंतदुग्गेज्झा । अनिवारियं पयट्ठइ भीमा जरडाइणी निच्चं ॥ ३ ॥
पयडियपयंडपक्खा निरेक्खक्कंतजीयमाहप्पा । सव्वत्तो पासठिया कसायगिद्धा विसण्णंति ॥ ४ ॥
दावियविविहवियारा जीवियहरणेऽवि पत्तसामत्था । दढमसुणियप्पयारा रोगभुयगा वियंभंति ॥ ५ ॥
लद्धुं छिदं थंवापि तक्खणुप्पन्नहरिसपब्भारो । सुवणत्तयसंचरणो मरणपिसाओ समुत्थरइ ॥ ६ ॥
इट्ठविओगाणिट्ठप्पओगपामोक्खदुक्खतरुनिवहो । सव्वत्तो विणिवारइ विवेयदिणनाहकरपसरं ॥ ७ ॥
इयं भो देवाणुपिया ! मसाणतुल्ले भवंमि भीमंमि । खणमवि न खमं वसिउं तुम्हाणं सोक्खकंखीणं ॥ ८ ॥
एवं भगवया वागरिए संसारसरूवे पडिबुद्धा बहवे पाणिणो, भावसारं च अणेगेहिं अंगीकया देसविरइसच्चवि-
रइपडिवत्ती, हरिससियसरीरो य सपरियणो राया गओ जहागयं, नवरं मेहकुमारारायपुत्तो अंतो वियंभंतहरिसपसरो
संसारविरागं परमसुव्वहतो सेणियनराहिंव जणणिं च पणमिऊण भणिउं पवत्तो—अंबताय ! अहमेत्तो वंछामि
तुंभेहिं अणुण्णाओ भगवओ समीवे पव्वलं पवज्जिउं, तेहिं भणियं-पुत्त ! विसमो जोव्वणारंभो दुरक्खणिज्जो मयर-
द्धयसरपहारो दुद्धरा विसयाभिमुहीभवता इदियतुरंगमा सम्मोहदायगा लडहमहिलजणविसाला बाढं दुरज्झवसा

पद्मजा, अर्चतं दुरहियासा परीसहा, ता पुत्त ! पडिवालेहि कहयवि वासराइं, मेहकुमारेण भणियं-अम्मताय ! तडि-
तरलमाञ्जअविलसियं सरयगिरिसरियावारिवेगचडुलं जोवणं मत्तकामिणीकडक्खभंगुरा रायलच्छी, जन्नारंभा इव
दीसंतबहुविण्णओगा इट्टजणसंजोगा, ता पज्जत्तमेत्तो गेहनिवासेण, सव्वहा मा कुणह धम्मविग्घंति भणिए अणु-
ण्णाओ कहकहवि जणणिजणगेहिं, तओ महाविभूइसमुदएणं गहिया अणेण भगवओ समीवे पद्मजा, अन्नेऽपि तं
पद्मज्जं अणुणिग्हंतं पासिऊण बहवे नरिंदसेट्टिसेणावइसुया जायभवविरागा पद्मइया ।

अह दुस्सहत्ताए परीसहाणं चलत्तणओ चित्तवित्तीए तस्स मेहकुमारसाहुस्स अणुकमेण पढमरयणीए चेन्न
पसुत्तस्स पविसंतनीहरंतमुणिचरणघट्टणुप्पन्ननिद्दाविगमस्स पद्मजापरिचायाभिमुहमाणसस्स कहकहवि अट्टहुह-
द्वियस्स दुक्खेण बोलीणा रयणी, समुग्गयंमि रविमंडले पमिलाणवयणकमलो समुट्टिऊण तओ ठाणाओ पद्मज्जं
परिमोत्तुकामो गओ भगवओ समीवे ॥

अह केवलावलोएण जिणवरो जाणिऊण भग्गमणं । मेहकुमारं साहुं मhurगिराए इमं भणइ ॥ १ ॥
किं भो देवाणुपिया ! संजमजोगंमि भंगमुव्वहसि । पुद्मभववइयरं नेव सरसि सयमवि समणुभविं ॥ २ ॥
एत्तो तइयभवंमिं रण्णे किर वारणो तुहं हुंतो । तत्थ य वणगिगणा पसरिएण संतत्तसव्वणो ॥ ३ ॥
बाढं पिवासिओ सरवरंमि पाउं जलं समोगाढो । तडपंकमि य खुत्तो तत्तो नीहरिउमचयंतो ॥ ४ ॥

पडिकरिणो दददसणगगताडणुपन्नतिव्वेयणओ । मरिउं विंझमि तुमं पुणरवि जाओ गयाहिवई ॥ ५ ॥
 वणदवपलोयेणेण य जाइं सरिऊण भयवसट्टेण । रुक्खे उक्खणिऊणं अवणित्ता तणपलालाई ॥ ६ ॥
 करयलसमाई तिन्नि उ महापमाणाइं थंडिलाईं तए । सरियातीरे पकयाइं निययगयजहूरक्खट्ठा ॥ ७ ॥ जुम्मं ।
 अह अन्नया कयाईं तरुवरसंधरिससंभवो जलणो । दहिउं वणं पयट्ठो पलयानलविब्भमो भीमो ॥ ८ ॥
 तं पेच्छिऊण भीओ तुमं पलणो संधंडिलाभिमुहं । हरिहरिणससगसूयरपडिहत्ये थंडिले दुन्नि ॥ ९ ॥
 लंघित्ता तइयमिं संपत्तो अच्छिउं समाढत्तो । चरणो य समुक्खित्तो कंडुयणकए तए तणुणो ॥ १० ॥
 एत्थंतरमि अन्नन्नसत्तसंपेच्छिओ ससो एगो । उक्खित्तचरणहेट्ठा ठिओ सजीयस्स रक्खट्ठा ॥ ११ ॥
 तं दट्ठणं तुमए पयहेट्ठियं पराए करुणाए । आकुंचिऊण धरिओ नियचलणो गयणदेसंमि ॥ १२ ॥
 अह वणदवोऽवि दहिउं सयलं अडविं महाविडविपुन्नं । उवसंतो ते य गया जहागयं ससगयमुहजिया ॥ १३ ॥
 तोहे छुहापिवासासंतत्तो तंपि सिग्घवेगेण । असुणियकुटियसचलणो पधाविओ पाणियाभिमुहं ॥ १४ ॥
 अह एगचलणवियलत्तणेण पडिओ तुमं गिरिवरोव्व । तणहाछुहाकिलंतो कालगओ बहुकिलेसेण ॥ १५ ॥
 तेण य ससगणुकंपणसमुवज्जियपुन्नपरिसवसेण । लहुइंकयसंसारो संपइ जाओसि रायसुओ ॥ १६ ॥
 इय भो देवाणुप्पिय ! तइया पसुणावि जइ तहा तुमए । ससगजियरक्खणेणं बाढं दुक्खाइं सहियाइं ॥ १७ ॥

ता कीस बंभारीण धम्मनिरयाण पवरसाहूणं । चलणाइघट्टणेणवि संपइ संतावमुव्वहसि ? ॥ १८ ॥
 सरयनिसायरधवले कुलंमि पडिवन्नमुज्झमाणस्स । किं सुंदर ! न कलंको होही आचंदकालंमि ? ॥ १९ ॥
 कइवयदिणसुहकज्जेण अज्जिऊणं पयंडपावभरं । किं कोइ भण सयन्नो अप्पाणं पाडइ भवोहे ? ॥ २० ॥
 इय एवविहवयणेहिं भुवणदीवेण वीरनाहेण । पडिवोहिओ महप्पा मेहकुमारो मुणिवरिद्धो ॥ २१ ॥
 जाओ सुनिचलमणो तहकहवि जिणंदमणियमग्गंमि । जह दुक्करतवनिरयाण साहूण णिंदसणं पत्तो ॥ २२ ॥
 तस्सणुसट्ठिं सोच्चा संवेगकारिं परेऽवि मुणिवसहा । सविसेसमण्यमत्ता पडिवन्ना संजमुज्जोगं ॥ २३ ॥
 अह अण्णांमि दिणंमी सोच्चा धम्मं जिणंदमूलंमि । भववेरग्गमुव्वगओ रायसुओ नंदिसेणोऽवि ॥ २४ ॥
 पवज्जापडिवत्तिं काउमणो सो य सेणियनरिंदं । जणणिं च बहुविहेहिं वयणेहिं पन्नवेऊण ॥ २५ ॥
 जाव भुवणेक्कपहुणो पासे चलिओ पवज्जिउं दिक्खं । ताव य सो भणिओ देवयाए गयणट्ठियाए इमं ॥ २६ ॥
 भो भो कुमार ! विरमसु पवज्जागहणओ जओ अत्थि । अज्जवि तुह भोगफलं चारित्तावारंगं कम्मं ॥ २७ ॥
 थेवं कालं निवससु सणिहे ता कीस ऊसुगो होसि ? । सलहिज्जतिं न कज्जाइं पुत्त ! अइरहसविहियाइं ॥ २८ ॥
 काले चिय कीरंतो ववसाओ कज्जसाहगो होइ । समयाभावो सस्सं न फलइ अचंतसित्तंमि ॥ २९ ॥
 तत्तो कुमरेण भणियं देवि ! कीस तुममियं पयंयेसि ? । सयमेवपपडिवन्नं कहमिव उज्जाभिं थिरइमं ॥ ३० ॥

किं वा काही तंपिचि चारित्तारागं ममं कम्मं । कु(दु)स्सीलसगरहियस्स गाढतवसोसियंगस्स ॥ ३१ ॥
इय तवयणं अवमणिकुण सिग्घं गओ समोसरणं । नवरं जयगुरुणाविहु पडिसिद्धो सो तहचैव ॥ ३२ ॥
तहविहु अहरमसवसा अभाविउं भाविरं विरइभंगं । भुवणगुरुणो समीवे निरवज्जं लेइ पवज्जं ॥ ३३ ॥
तो छट्ठमपसुहं कुणमाणो दुक्करं तवचरणं । जयगुरुणा सह विहरइ बहिया गामागराईसु ॥ ३४ ॥
पढइ विचि(वि)त्तं सुत्तं परिभावइ निच्चमेव य तदत्थं । गुरुणो मूले निवसइ परीसहे सहइ थिरचित्तो ॥ ३५ ॥
संजमनिसेवणपरो विसयविरागं परं परिवहंतो । आयावइ अणवरयं सुसाणसुन्नासमाईसु ॥ ३६ ॥
अह अन्नया कयाई एगल्लविहारपडिमपरिकम्मं । काउमणो स महण्या जाए छट्ठस्स पारणगे ॥ ३७ ॥
भिक्षलट्ठाए पविट्ठो एगोऽणाभोगदोसओ सहसा । वेसाए मंदिरमी पयंपए धम्मलाभोत्ति ॥ ३८ ॥
तो वेसाए सहासं सवियारं जंपियं अहो समण ! । मोत्तूण दम्मलाभं न धम्मलाभेण मे कज्जं ॥ ३९ ॥
अहह कहं हसइ ममपि बालिसा संपयंपि(त्ति) चित्तिता । तेण तवलद्धिणा नेवतणयमायडिऊण लहुं ॥ ४० ॥
अइपवररथणरासी निवाडिया एस दम्मलाभोत्ति । भणिकुण य नीहरिओ तीए भणिओ य साणंदं ॥ ४१ ॥
भयवं ! उज्झसु दुक्करतवचरणं कुणसु मज्झ सामित्तं । इहरा चएमि जीयं पुणरुत्तं तीए इय वुत्तं ॥ ४२ ॥
भावियमईवि तवसोसिओऽवि विन्नायविसयदोसोऽवि । कम्मवसा भग्गमणो पडिवज्जइ तीए सो वयणे ॥ ४३ ॥

नवरं दस अहिं गे वा जइ नो बोहेभि अणुदिणं भवे । तो परिचएमि विसए विसंव इइ गिणहइ पइन्नं ॥ ४४ ॥
 अह उज्झियमुणिवेसो चिंतितो देवयाए तं वयणं । जयगुरुणोऽवि निवसइ वेसाए गिहंमि स महप्पा ॥ ४५ ॥
 भुंजेइ विसयसोक्खं धम्मकहाए य बोहिउं भवे । पवज्जागहणत्थं पेसइ पासे जिणिंदस्स ॥ ४६ ॥
 अह अन्नया कयाइ खीणे भोगफलंमि कम्ममि । वेरगावडियमई चित्तेउमिमं समाढत्तो ॥ ४७ ॥
 पुच्छं सोक्खं तडितरलमाउयं भंगुरं च तारुन्नं । रोगविहुरं सरीरं दुल्लभा धम्मसाभग्गी ॥ ४८ ॥
 खंडियसीलाण निरंतरं च निवडंति दुस्सहदुहाइं । एवं ठिए न जुज्जइ संपइ मह निवसिउं एत्थ ॥ ४९ ॥
 तो गंतुं जयगुरुणो पुणो समीवमि लेइ पव्वज्जं । आलोइयदुच्चरिओ विहरइ य समं जिणिंदेण ॥ ५० ॥
 चिरपव्वजापज्जायपालणं भावसारमह काउं । सो नंदिसेणसाहू मरिउं देवत्तणं पत्तो ॥ ५१ ॥

इओ य सो सुदाढनागकुमारदेवो नावारूढस्स भगवओ पुवं उवसणं काऊण आउयखयचुओ समाणो समु-
 प्पन्नो एंगमि रोरकुले पुत्तत्तणेण, दुहिं गओ य संतो करिसगविचीए जीवइ, तंमि य पत्थावे सो जाव नियच्छेत्तं
 लंगलेण करिसिउमारद्धो ताव पत्तो तं गामं भुवणेक्कंवधवो जिणो, तओ भगवया तस्स अणुकंपाए पडिबोहणत्थं
 पेसिओ गोयमसामी, गओ य तदंतिथं, भणिओ य गोयमेण एसो-भइ ! किमेयं कीरइ ?, करिसगेण भणिंयं-जं
 कारेइ एस हयविही, को वा अन्नो अम्हारिसाण कलाकोसल्लवज्जियाण जीवणोवाओ ?, गोयमसाभिणा जंपियं-

एवंविहगाढकिलेससंविदत्ताए भोयणविहीए । दिणगमणियं कुणंतस्स सुद्ध ! का चंगिमा तुज्झ ? ॥ १ ॥
किं वा सरीरसोकखं संपज्जइ को य विसयवामोहो । किं वा सुचरियनिष्कायणं च संभवइ एवं च ? ॥ २ ॥
नो एयपरिच्चागो सुदुक्करो दिव्वसोकखंकलीणं । तुम्हारिसाण जायइ जेणऽज्जवि किर महासत्ता ॥ ३ ॥
पउरमणिकणगरयणुक्कराइ तरुणीओ सुंदरे गेहे । मोत्तूण पन्नगंपिव धन्ना लगंति धम्ममंमि ॥ ४ ॥
अन्ने पुण आकालियदुरंतदारिहिविहुयावि दढं । पावारंभपयट्ठा जम्मं सयलपि वोलेति ॥ ५ ॥
ते अण्णत्थवि जम्मे तहेव पुणरुत्तदुक्खसंतत्ता । तल्लोच्चिल्लिं पकुणंति थोवसलिलंमि मच्छोव्व ॥ ६ ॥
जइ पुण ते घरवाधारलक्खभागे व धम्मकज्जंमि । अब्भुज्जमंति रुंधंति नितुलं ता दुहदुवारं ॥ ७ ॥
किंच-एगत्तो संपज्जइ जहिच्छभोगोवभोगदुल्ललियं । धणमन्नत्तो सज्जणपंसंणिज्जा हि पव्वज्जा ॥ ८ ॥
एगत्तो छक्खंडाहिवस्स सेवा महानरिंदस्स । कीरइ अन्नत्तो पुण सुणिणो सद्धम्मनिरयस्स ॥ ९ ॥
सुंदर ! इमाओ दोन्नि उ गईउ लोयंमि सुप्पसिद्धाओ । एयाणं अन्नयारिं जे कुसला ते पव्वजंति ॥ १० ॥
ता वज्जसु कम्ममिमं धम्मं चिय सरसु तं महासत्त ! । दीणाण दुत्थियाण य एसो एक्को परं सरणं ॥ ११ ॥
इय गोयमेण भणिए सबइल्लं लंगलं च मोत्तण । नमिउं चलणे सो भत्तिनिब्भरो भणिउमाढत्तो ॥ १२ ॥
भयवं ! विन्नाणविवज्जियस्स जइ जोगयत्थि मे काऽवि । ता देहि निययदिकखं भववासाओ विरत्तस्स ॥ १३ ॥

इयं बुत्ते से परियट्ठिणोवि सिरिगोयेमेण पव्वज्जा । तक्खणमेव विदिन्ना बोहिब्बीयंतिकाऊण ॥ १४ ॥
 एवं तेण गहियदक्खेण समं पयट्ठो गोयमसामी भगवओ अभिसुहं, अह जयगुरुणो चक्खुगोयमुवागयस्स
 तस्स करिसगस्स तेण सीहभवावज्जियगाढेवरवेसण पम्हुट्ठा पव्वजापडिवत्ती जायपयंडकोवो य भणिउं पवत्तो-
 भयवं ! को एसो?, गोयमेण भणियं-अह धम्मगुरू, तेण भणियं-जइ तुह एस धम्मगुरू ता मम तुमएविन कज्ज,
 अलं पव्वजाएत्ति भणिऊण परिचत्तरयहरणो धाविऊण गओ खेत्तंमि, गहिया बलीवद्दा, उब्भीकयं लंगलं, पल्लगो
 पुव्वपवाहेण खेडेउंति । गोयमसामीवि विम्हियमणो भयवंतं पणमिऊण भणिउं पवत्तो—

मुवणन्मुयभूयमहप्पभावपडिहणियपाणिगणपीड ! । जयनाह ! मए असरिसमिममज्ज पलोइयं चोज्जं ॥ १ ॥
 जं सोक्खकरेवि हु तुज्झ दंसणे दूरओऽवि सो हलिओ । सूरस्स कोसिओ इव सोढुं तेयं अचाइतो ॥ २ ॥
 समयमेव य पडिवन्नं पव्वज्जं उज्झिऊण संभंतो । अइसिग्गमवक्कंतो सखेत्तहुत्तं परोट्टमणो ॥ ३ ॥
 किरि तुम्ह संकहावि हु जणइ अपुवं जणाण परितोसं । किं पुण चीतरुपमुहट्ठपाडिहरुम्भवं रूवं ? ॥ ४ ॥
 अह जयगुरुणा भणियं गोयम ! सो एस केसरिस्स जिओ । जो किरि तिबिहुकालेमए दुहा फालिओ होतो ॥ ५ ॥
 तुमए मह सारहिणा निज्जविओ कोवफुरुरुरंततणू । सीहे सीहेण हए इचाइमइरवयेण ॥ ६ ॥
 तप्पच्चइएणं मइ दोसेणज्जवि स वेरमुवहइ । तेणं चिय तप्पडिबोहणट्ठया पेसिओ तंसि ॥ ७ ॥

इय पुव्वकम्मवसवत्तिजंतुकीरंतविविहवावारे । संसारे परमत्थेण किंणि नो विज्जे चोज्जं ॥ ८ ॥
एवं गोयसं पच्चाइऊण सामी तामलित्तिदसन्नपुरवीभयंचपाउज्जेणिगयपुरकंणिल्लनदिपुरमहुरापमुहेसु महानगरेसु
भवसत्तज्जणं पडिबोहितो पसन्नचंदसन्नभइउदायणसालमहासालपमुहं रायनिवहं पद्दाविंतो चंडपज्जोयारिमहण-
जियसत्तुपामोक्खं नरिदवग्गं च सावगधम्मो उव्वंतो कइवयकालाणंतरे पुणो समागओ रायगिहं । तत्थ य—
कक्केयणीलयलोहियक्खपामोक्खरयणनिवेहेण । कुट्टिमत्तलं रइज्जइ सुरेहिं आजोयणमहीए ॥ १ ॥
मणिरयणजक्कंचणकलहोयमया सुगोउरसणाहा । तिन्नेव निम्मविज्जंति तक्खणं पवरपागारा ॥ २ ॥
अब्भंतरंमि तेसिं विचित्तरयणोहरस्सिजडिलाइं । ठाविज्जंती सीहासणाइं जोगाइं जयगुरुणो ॥ ३ ॥
पुव्वदिसिवज्जसीहासणेसु तइलोयविह्यकराइं । कीरंति तिन्नि रूवाइं भुवणनाहस्स सरिसाइं ॥ ४ ॥
डज्झंतंगुरुघणसारिसिहयाभोयसुरहिदयंता । धूवघडीण समूहो पसुच्चइं सव्वपासेसु ॥ ५ ॥
मंदंदोलियकंक्खिल्लपल्लवो विधुयधयवडाडोवो । वित्थरइ तित्थनाहाणुभावओ सीयलो पवणो ॥ ६ ॥
इय सुरगणेण सव्वायेण निव्वत्तिए समोसरणे । सिंहासणे निसण्णो पुव्वाभिमुहो जिणवरिंदो ॥ ७ ॥
जयगुरुपडत्तिविणिउत्तपुरिसपरिकहिदयजिणवरगमणो । अभयकुमाराइकुमारपरिवुडो सेणियनरिंदो ॥ ८ ॥
हरिसुस्ससियसरीरो वंदणवडियाए आगओ झत्ति । असुरसुराणमंततराहिवपमुहतिथसावि ॥ ९ ॥

तिपयाहिणिऊण परेण भत्तिभारेण वंदिउं नाहं । सट्ठाणेसु निसीयंति ते य सद्धम्मसवणत्थं ॥ १० ॥
 उप्पायपलयसत्तासमलंकियसयलवत्थुपरमत्थं । भव्वाणं भवभयहरं तत्तो वागरइ भुवणगुरू ॥ ११ ॥
 वागरमाणस्स य भुवणवंधुणो सुणियसयलभावोऽवि । भव्वजणवोहणत्थं गोयमसासी इमं भणइ ॥ १२ ॥
 भयवं ! भवस्स पुणरुत्तजम्मजरामरणसोगपउरस्स । किं मूलकारणं जमिह नेव जीवा विरज्जंति ? ॥ १३ ॥
 न य उज्जमंति तुह पायपउमपूयणपयोक्खवावारे । नो देससव्वविरइओ भावसारं च गिण्हंति ॥ १४ ॥
 भणियं जिणेण गोयम ! मिच्छत्तं अविरइ य मूलमिह । तदणुगया नो जीवा भवभमणाओ विरज्जंति ॥ १५ ॥
 नो बहु मन्नंति जिणाहिवां पि गिण्हंति नेव विरइं पि । मिच्छत्तमज्जमत्ता किं वा कुव्वंति नोऽकज्जं ? ॥ १६ ॥
 जइ तेवि कम्मगंठिं सुनिट्ठुरं भिदिऊण सम्मत्तं । पायंति कहवि ता भवसंयासाओ विरज्जंति ॥ १७ ॥
 अब्भुज्जमंति जिणसाहुपूयणाहम्मि धम्मकज्जंमि । नवरं तेऽवि न विरइं घेचुं पारंति कम्मवसा ॥ १८ ॥
 जं देसओवि सविसेसकम्मक्खयउवसमेण सा होइ । किं पुण पहाणसुणिजणकरणुचिया सव्वओ चेव ॥ १९ ॥
 ता गोयमेण भणियं भयवं ! सम्मत्तरयणलाभाओ । अब्भहिं गुणठाणं एवं सइ विरइभावोऽयं ॥ २० ॥
 ता साहेसु जयगुरू ! पउरगेहवात्रारवावडमणाणं । संभवइ देसओविहु विरइ कहमिव गिहत्थाण ? ॥ २१ ॥
 तो जयगुरूणा कहियं पंचणहं तिणह वा चउणहं वा । गहणे वयाण एगस्स वावि सा होइ निदोसा ॥ २२ ॥

गोयममुणिणा भणियं जइ एवं ता जिणिंद ! सवाइं । सोदाहरणाइं कहह ताइं भैएहिं जुत्ताइं ॥ २३ ॥
 न तुमाहितो अन्नो भयवं एयं निंदसिउं सक्को । जं सव्वं सूरौच्चिय पयासिउं पभवए गयणं ॥ २४ ॥
 इय वुत्ते सिरिवीरेण धम्मपासायमूलखंभेण । भणियं गोयम ! निमुणसु सव्वमिमं परिकहिज्जंतं ॥ २५ ॥
 पंच उ अणुव्रयाइं गुणव्रयाइं च होति तिन्नव । सिक्खावयाइं चउरो विरइए गिहत्यलोयस्स ॥ २६ ॥
 तत्थ य अणुव्रयाइं पढमं पाणाइवायवेरमणं । वयमवरययपहाणं पाणाइवाओ य सो दुविहो ॥ २७ ॥
 विन्नेओ बुद्धिमया सुहुमो थूलो य तत्थ पुण सुहुमो । एगिदियजियविसओ थूलो वेइदियाइगओ ॥ २८ ॥
 संकण्णारंभेहिं दुविहो थूलो य तत्थ संकण्णो । होइ हु उवेच्चकरणं आरंभो पयणकिसिपमुहे ॥ २९ ॥
 संकण्णोऽवि य दुविहो अवराहकरंमि निरवराहे य । जो हरइ देव(ह)दव्वं स सावराहोऽन्नहा इयरो ॥ ३० ॥
 एवं नाऊण इमं थूले अवराहविरहिए जीवे । संकण्णओ न घाएज्जं दुविहतिविहाइभेएण ॥ ३१ ॥
 इय गहियजीववहविरइसुंदरो सावगोऽणुकंपपरो । अच्चंतं कोवेऽवि हु गोमणुयाइण न करेज्जा ॥ ३२ ॥
 बंधवहं छविछेयं अइभारं भत्तपाणवोच्छेयं । एए पंचइयारा जम्हा दूंसति वहविरइं ॥ ३३ ॥
 एयाए दूंसियाए विहलो सव्वोऽवि धम्मवावारो । कट्ठाणुट्ठाणंपिवि निरत्थयं एत्थन्नव ॥ ३४ ॥
 जं पाणिवहासत्तो सत्तो तं किंपि पावमायरइ । जेण निमेसंपि सुहं न लहइ नरयाइसु गइसु ॥ ३५ ॥

सबतथवि सोवक्कममइलहुयं आउयं समज्जिणइ । पियपुत्तविओगं वा पात्रइ हरिवम्मराउव ॥ ३६ ॥”

गोयमसामिणा भणियं—भयवं ! को एस हरिवम्मरायाहिबो ? भगवथा जंपियं—गोयम ! निसामेसु, अत्थि इहव भारहे वासे कुरुज्जवए गयउरं नाम नयरं, तत्थ अंसखदविणसंगओ दत्तो नाम माहणो परिवसइ, रुवजोव्वणा-इगुणसंगथा य सिरी नाम भारिया, सब्बकज्जेसु पुच्छणिज्जो पाणाइगेवल्लहो सब्बपसमसुस्सीलयाइगुणसंगओ नंदो नाम से बालमित्तो, सो य अच्चंतं कलयंठकोमलकंठो तहाविहवावारपरिसमत्तीए निगगच्छिऊण निव्विजणंमि पएसे ठाऊण गंधव्वविणोयमायरइ, एवं च वंचंति वासरा । अन्नया य दत्तस्स दिथवरस्स बांठं पाउब्भूया सिरोवेयणा, तवसेण य पणट्ठा रई वियंभिओ परितावो जायाणि नीसहाणि अंगाणि खलमहिलव चक्खुगोयरमइक्कंता निहा निच्छिण्णा भोयणवंछा तुट्ठा जीवियासा, एवंविहं च विसमदसावडणं पेच्छिऊण तेणाहूओ नंदो, भणिओ य-अहो मित्त ! कुणसु किंपि उवायं, सब्बहा बलवई सिरोवेयणा खुड्डइव लोयणजुयलं, मणांगपि न पारेमि सुहसेज्जाग-ओवि चिट्ठिउं, जइ पुण कहवि मम निहामेत्तंपि होज्जा तो पच्चुज्जीवियं व अट्ठ्याणं मन्नेज्जा, इय दीणं से वयणं निसामिऊण नंदेण भणियं—पियमित्त ! धीरो भव, परिचय कायरत्तणं, तहा करेमि जहा अकालमखेवण पगुणसरीरो भवसित्ति संठविऊण रयणिसमयंमि समारद्धं कागलीगेयं, जओ—

जह जह गेयनिनाओ पविसइ दत्तस्स सब्बणविवरंमि । तह तह निहावि विलज्जियव आगच्छए सणियं ॥ १ ॥

एवं च आगयाए निहाए पसुत्तो सो निम्भरं, सा चेव भज्जा नंदस्स तेण सुइसुहकारिणा गेयवेण अवहरि-
यहियया तम्मणा जायत्ति, दत्तस्सवि परिगलंतीए रयणीए पणट्ठा सिरवेयणा, संपत्ता सरीरनिव्वुइ, अन्नया रहंमि
सिरीए सपणयं भणिओ नंदो—

सुहय ! जहा नियमित्तस्स देहपीडा तए समवहरिया । मज्झंमि तहा संपइ अवहरसु सरीरसंतावं ॥ १ ॥
उज्जुयभावत्तणओ अविथाणिय से मणोगयं भावं । नंदेण जंपियमिमं-कत्तो ते सुयणु ! संतावो ? ॥ २ ॥
तीए भणियं-सुंदर ! सयमवि काउं तुमं न याणासि ? । किं सच्चं पयडिज्जउ ? , सो भणइ-कहसु, को दोसो ? , ॥ ३ ॥
ताहे तीए सिट्ठो कलगेयायन्नणाओ आरब्भ । सव्वो नियवुत्ततो निम्भरअणुरागसंबद्धो ॥ ४ ॥
आयन्निऊण एयं सुणिऊण य से असुंदरं भावं । नंदेणं सा भणिवा कहंमि एयं सुयणु ! वयसि ? ॥ ५ ॥
दूसिज्जइ निययकुलं अजसो य दिसासु जेण वित्थरइ । मरणेऽवि हु तं धीरा कहमवि नो संपवज्जंति ॥ ६ ॥
सुधंति य नरएसुं परदारपसत्तयाण सत्ताणं । विविहाओ वेयणाओ मयच्छि ! ता उज्जसु कुवच्छं ॥ ७ ॥
इय पन्नविऊण बहुप्पयारवयणेहिं तं महाभागो । नंदो ठाणाओ तओ नीहरिओ सिग्घवेणेण ॥ ८ ॥

एसो य सयलवइयो कडभंतरिएण निसामिओ दत्तेण, तओ चित्तिमणेण-अहो विणट्ठं कज्जं, जं मम महिला
नंदेण सद्धिं एवमुल्लवइ, मन्ने नंदो मं उवलक्खिऊण चित्तरक्खट्ठा सुद्धसमायारं अप्पाणमुवदंसितो एवमुल्लविऊण

एत्तो ठाणाओ सिग्घमवक्कंतो, ता न जुत्ता उवेहा, जओ महिला पुरिसंतरखित्तिचित्ता कयाइ अत्तणो मणोरहविग्घं
संभाविकुण पइणो विसदाणाइणा विणासं करेज्जा, सयमसमत्था वा विडजणं विणासाय वावारेज्जा, अओ जाव-
ज्जवि न जायइ कोऽवि विणासो ताव वावाएभि एयं नंदं, न सबहा सुंदरो एस, कहमन्नहा एयाए सह रहसि
ठाएज्जा?, किं न याणइ एसो सण्णुरिसाण चक्खुक्खेवोऽवि न जुज्जइ काउं परकलत्ते?, किं पुण निब्भरपेमगब्भो
परोप्परमेगंतसंलावो?, एवं निच्छिऊण तस्स वावायणत्थं उवाए चित्तिउमारद्धो, सावि से भज्जा दुन्निगहयाए
मयणवियारस्स अवजसनिरेक्खत्तणओ इत्थीसहावस्स गाढाणुरागसब्भावाओ दुल्लहजणंमि जत्थ जत्थ नंदं पासति
तत्थ तत्थ लिहियच्च थंभियच्च विचेयणच्च निच्चला एतमेव अणिमिसाहिं दिट्ठीहिं पेच्छमाणा अच्छइ, तीसे य तहा-
विहावलोयणेण दत्तो बहुप्पयारं संतावमुवहइ, नंदोवि सुद्धसीलयाए पुव्वण्णवाहेण सुक्कसंको तस्स सगासंमि पइ-
दिणमुवेइ, अन्नया य अवगणिऊण पुव्वोवयारं, परिच्चइऊण चिरकालसंभवं सिणेहं, अविमंसिऊण जुत्ताजुत्तं, अणवे-
क्खिऊण परलोयभयं तेण दत्तमाहणेण वीसत्थहिियस्स नंदस्स तालउडविससणाहो पणामिओ तंबोलवीडओ,
अविगण्णभावेण य गहिओ नंदेण, परिभोत्तुमारद्धो य ।

अह तंमि भुज्जमाणे अच्चुक्कडयाए विसविगारस्स । निन्नदुचेयणो झत्ति निवडिओ सो महीवेडु ॥ १ ॥

दत्तेणवि मायासीलयाए पणयं पयासमाणेण । पम्मुक्कदीहपोक्कं हाहारवगब्भिणं रुन्नं ॥ २ ॥

मिलिओ य नयरलोगो कहिओ तेणावि तस्स वुत्तो । जह सहसच्चिय जीयं नीहरियमिमस्स अनिमित्तं ॥ ३ ॥
नयरजणेणं भणियं अलाहि सोणेण कुणसु कायवं । सच्छदविलसिएसुं किं वन्निजइ कयंतस्स ? ॥ ४ ॥
एसाइ जंपिऊणं नयरजणो पडिगओ संगहेसु । दत्तेणवि से विहिओ सरीरसक्कारपमुहविही ॥ ५ ॥
एवं च वावाइयंमि तंमि पणट्ठकुविगण्णो भज्जाए समं निप्पच्चवायं विसयसुहमणुहवमाणो कालं वोलेइ, अन्नया
य तीए समं वरिसयालंमि ओलोयणगओ जाव निवडंतजलधाराघोरणीमणहरं गयणयलमवलोएइ ताव सहसच्चिय
तडयरारावभीसणा निवडिथा तस्स सीसंमि कुलिंगमालापलीवियदिसामंडला विज्जू, तीए य तणपूलगो इव नि-
इड्ढो दत्तो, मरिऊण य तइयनरयपुढवीए सत्तसागरोवमाऊ नेरइओ उववन्नो, तहिं च अणवरयदहणकुंभीपागसाम-
लिसाहारोहणकरवत्तफालणवेयरणिनइप्पवाहणमोगरसंचुणणपमुहाइं तिकखदुक्खलक्खाइं निरंतरमणुभविऊण
आउयक्खंयमि तत्तो उव्वट्ठिऊण मच्छक्खपपक्खिसरीसियपमोक्खासु तिरिक्खजोणीसु उववन्नो, तासुवि बहुकालं
चरिऊण पुणो पुणो नरगाइसु य उववज्जिऊण कहवि कम्मलाधवेण एगंमि पंचंतकुले जाओ पुत्तचणेणं, कयं च से
मंगलउत्ति नामं, तत्थ य जइवसाओ आरब्ध सो पसूओ तद्विवासाओ चिय तंमि कुले पाउब्भूया विविहा
रोगायंका, ससुपन्ना विविहाणट्ठा, तओ तेहिं जणणिजणगेहिं चित्तिंयं-अहो दुट्ठलक्खणणुगओ एस अह पुत्तो ता
जात्र न देइ अकाले चिय मरणं ताव पच्छन्नो चिय अडवीए नेऊण छडिजइ, जीवमाणामन्ने पुत्ता भविस्संति,

किमणेण विसहरसंवहुणेणंति परिभाविऊण वरिसमेत्तवओ सुक्को एसो अडवीए, अह तेणप्पएसेण ससगओ सिवो
 नाम सत्थनाययो, दिट्ठो य तेण एसो, गहिओ अणुकंपाए, नीओ य बुद्धिं। अन्नया य तस्स कम्मपाणुभावेण सो
 सत्थवाहो सधणो ससयणोऽवि अकालखेवेण खयं गओ, सो य भिक्खाविचीए अप्पाणं पोसंतो कमेण जीवण-
 मणुप्पत्तो, अन्नया य वसंतमासंभि पवरनेवत्थमणहरं नयरजणं विलसंतं अवलोइऊण चित्तिमणेण-अहो नूनं महा-
 पावकारी अहं, कहमन्नहा समाणेवि मणुयत्ते इमे कयपुत्ता नायरया एवं विलसंति, अहं पुण पइदिणं लुक्खमि-
 क्खाक्खलक्खणेण निययउयरं पि(न) भराभि?, ता पज्जतं गिहयासेण, केरमि धम्मज्जणंति संचित्तिऊण गओ जल-
 णप्पभाभिहाणस्स तावसस्स समीचे, गहिया दिक्खा, काउमारद्धो य विविहं तवचरणं। एवं च अन्नाणतत्थेण
 उवज्जिया भोगा, अन्नदिवसे य पउरं कंदमूलफलभक्खणेण समुप्पन्नं से पोट्टुसुलं, तेण य अभिहओ मरिऊण
 वंसंतपुरे नयरं हरिचंदस्स रण्णो अणंगसेणाभिहाणाए अगमहिसीए कुञ्चिसि पाउम्भूओ पुत्तत्तेजंगं, पसूओ
 नियसमयंमि, कयं वद्धावणयं. पइट्ठियं च हरिवम्मोत्ति नामं, उम्मुक्कवालभावो य गहिओ कलाकोसलं परिणाविओ
 य अट्ठ रायकन्नगओ, अन्नया य जोगोत्ति कलिऊण हरिचंदराइणा महाविभूइए मंतिसामंतपउरजणसमक्खं उव-
 चेसिओ नियपए, जाओ सो महानरिंदो। हरिचंदरायाऽवि निव्विणकामभोगो गओ वणवांसं, गहिया दिसपो-
 क्खगतावसाणं दिक्खा, परिवालेइ जहाभिहितं तेसिं धम्मंति। हरिवम्मरायावि जहाविहिपरिपालिय पयइवग्गो

कालाणुरूपयद्विद्यनयमग्नो रजभरं समुद्वहइ, तस्स य विसयसुहमणुहवतस्स समुण्णो पुत्तो, कयं च से हरि-
दत्तोत्ति नामं, तस्स य राइणो सयलरज्जवाचारनिरुवणनिउणो असेसनीइसत्थविथक्खणो वेसमणो नाम अमच्चो,
सो य लद्धपसरत्तणेण एवं परिभावेइ-जइ किपि अंतरं पावेमि ता इमं रायं वावाइऊण सयमंगीकरेमि रज्जं,
किमणेण साहीणेऽवि सामंते दासत्तकरणेणं?, तहावि केणवि उवाएणं एयस्स राइणो पढमं ताव पुत्तं विणासेमि
पच्छा एस सुहविणासो चेव होहिन्ति परिभावेतो अवरेमि वासरे कइवयपहाणपुरिसपरियरिओ गओ उज्जाणं, उव-
विट्ठो तरुवरच्छायाए, अह खणंतरं अच्छिऊण कवडेण सहसत्ति उट्ठिओ तट्टाणाओ भासमाणं च परियणं निवारि-
ऊण उट्ठुमुहो निन्निमेसेण य चक्खुणा गयणमवलोइऊण परमविम्वहयमुव्वहतो नियपरियणं भणिउं पवत्तो—भो! भो!
किं निसामियं किपि तुब्भेहिं एत्थ?, तेहिं भणियं-सामि! किमिव?, अमच्चेण भणियं—आगासे वच्चंतीहिं देवीहिं
इमं जंपियं—जहा एस राया नियपुत्तदोसेण मरिहित्ति, एयं च निसामिऊण अणुकूलभासित्तणं सेवगस्स धम्मोत्ति-
कलिऊण तयणुवित्तीए भणियं परियणेण—सामि! बाढं निसामियं, केवलममंगलेत्ति काऊण पढमं चेव न कहियं,
जइ रे जणगणिद्विसेसस्स सामिसालस्सवि एवं होही ता पज्जत्तं मे जीविएणंति वागरिऊण अमच्चेण आयट्ठिया
कज्जलुंजसामलुम्मिमलंतकंतिपडला खगधेणू, समाढत्तं कवडेण नियपोट्टिवियारणं, तओ कहकहवि बला मोडिऊण
बाहुं परियणेण उड्ढालिया खगधेणू, नीओ मंदिरं, उब्भडक्कडसीलयाए य परिचत्तपाणभोग्यसरीरसङ्कारो जरसि-

कडमंचए निवडिऊण ठिओ एसो असंसेपि दिवसं, वासरंते य अत्थाणीगएण राइणा अमच्चं अपेच्छत्तेण पुच्छिओ पडिहारो-अरे ! किं निमित्तं न आगओ अज्ज अमच्चो ? तेण कहियं-देव ! न सुणेमि सम्मं, राइणा भणियं-सयंपि गेहं गंतूण अमच्चं पुच्छसु अणागमणकारणं, तओ जं देवो आणवेइत्ति भणिऊण गओ पडिहारो, दिट्ठो जरसि-क्कावडिओ सामवयणो अमच्चो, पुच्छिओ य अणेण-अमच्च ! किमकांडे च्चिय एवंविहमवत्थंतरसुवागओ सि ? साहेसु कारणं, तुह अणागमणेण परितम्मइ नराहिवोत्ति बुत्ते दीहं नीससिऊण भणियममच्चेण-भो पडिहार ! किं निरत्थएण पुव्ववुत्तंतविकत्थणेण ? एत्तिथमेत्तमेव संपइ जंपियव्वं

जस्स पसाएण समगलोगपुज्जत्तणं समणुपत्तं । लच्छी चिरमुवभुत्ता तस्सवि हरिवम्मदेवस्स ॥ १ ॥

सुणिऊण असवणिज्जं विणाससंसूयणं तहावयणं । किं अज्जवि निहज्जं जीवियमहमुव्वहिस्सामि ? ॥ २ ॥

इमं च गाहाजुयलमुल्लविऊण पडेण वयणं समोच्छाइऊण ठिओ मोणेणं अमच्चो, अह परमत्थं अविद्याणमाणेण पडिहारेण पुट्ठो परियणो-अहो किमेवममच्चो वाहरइ ? तेहिं भणियं-पडिहार ! अज्ज उज्जाणगएहिं अमच्चो य गयणवाणी निसुणिया जहा देवो पुत्तदोसेण मरिहित्ति, तदायन्नणाणंतरमेव अमच्चो अप्पणो विणासं कुण-माणो महया किलेसेण निसिद्धो मरणभुवगमेण य अज्जवि भोयणं न कुणइत्ति, इमं च सोचा पडिहारेण भणियं-अहो ! अकित्तिमा पडुभत्ती, अहो ! असरिसं कयन्नत्तणं, अहो ! ससरीरनिरिवेवखयत्ति, धुवं धन्नो एस हरिवम्मराया

जस्स एवंविहो अमच्चोत्ति वणिज्जण सो गओ नरिंदसमीवं, कहिओ य एणते सबो तवुत्ततो, इमं च आयन्निज्जण अंचंतवल्लहयाए नियजीवियस्स उदयाओ पुव्वकयदुच्चरियाणं संखुदो नराहिवो, वाहराविओ अमच्चो, पुच्छिओ सवं जहावट्टियवइयरं, कहिओ य अणेण, तओ राइणा भणियं-अमच्च ! किमियाणिं कालोचियं?, अमच्चेण कहियं-देव ! तुम्हे चिय जाणह जमेत्थ उचियं, अहं पुण सयमेव सुणिज्जण देवस्स भाविणिं विसमावत्थं न सवहा जीवियसुव्वहिस्सामि, जओ तुम्ह पायाण विरहे का अम्ह सोहा ? का वा पडुमत्ती ? किं वा सकज्जसाहणं ? ता अणुमन्नउ देवो, न एत्थ अन्नं वोत्तुं जुज्जइ अम्हाणंति, राइणा भणियं-अलं मरणेण, समायरसुजमिह जुत्तं, अमच्चेण कहियं-देव ! संकडमिमं, के तुब्भे ? को वा तुम्ह पुत्तो ?, अओ न किंपि काउं पारियइ, राइणा भणियं-जो देवीहिं विणासकारित्ति सिट्ठो सो पुत्तोऽवि परमत्थओ सत्तू चेव, ता ममाएसेण तयणुरूवं करेज्जासु, अमच्चेण भणियं-देव ! एवंविहदुट्ठण सासणे दंडवासियाण चेव अहिगारो, ता पसीयउ देवो तेसिमेव आएसदाणेणं, तओ निरुविओ राइणा कुमारविणासणत्थं दंडवासिओ, विणासिओ तेण, पहिट्ठो अमच्चो, कया भोगगाइया सरिरवेड्ढा, चितियं च तेण-निहओ एस एगो कंटयो, इयाणिं राया विणासणिज्जोत्ति ।

अह तंमि सुए वहिए नायरलोएण जंभियं एवं । हा हा अहो अकज्जं नरवइणा नूणमायरियं ॥ १ ॥
जं रज्जभरसमतथो पुत्तो अविभाविज्जण परमत्थं । कुस्सुयनिसामणुगयभयसओ मारिओ सहसा ॥ २ ॥

अच्छउ परेण कहिए तहाविहे दुन्निमित्तपमुहत्ये । सयमवि दिट्ठे कुसला जुत्ताजुत्तं वियारिंति ॥ ३॥ अन्नं च-
गहपीडामारीदुन्निमित्तदुस्सुमिणपमुहदोसगणा । देवाण पूयणाईहिं नूण सिग्घं उवसमंति ॥ ४ ॥
ता दढमणुच्चियमेयं कयं नरिंदेण धम्मपहयज्जं । गरुथाणं गरुउच्चिय उप्पज्जइ अहव सम्मोहो ॥ ५ ॥

इमं च सुयं कन्नपरंपराए राइणा, तओ पाउब्भूया अरइ, उप्पन्नो पच्छायावो, पवड्डिओ महासोगो, चत्ता रज्ज-
चिंता, इमं च परिभाविउं पवत्तो-अहो महापावोऽहं जेण मए एवंविहमकज्जमायरंतेण न गणिओ धम्मो, नावे-
विखओ अजसो, न अंगीकयं पोरुसं, नावलंबिया खंती, ता किमियाणि परिचयामि रज्जं?, पविसामि जलणं? पव-
ज्जामि वा वणवासं?, केण वा कएण इमाओ पावाओ सोक्खो होहिंति चिंतमाणस्स राइणो पडिहारेण गंतूण
विन्नत्तं-देव! दुवारं नंदणुज्जाणपालगा समागया, ते य देवदंसणमभिलसंति, राइणा भणियं-लुहु पवेसेह, एयं च
भणिए पवेसिया तेण, ते य निवडिया चलणेसु, विन्नविउमारद्धा-देव! तुम्ह उज्जाणे भयवं अरिट्ठनेमी समोसठो,
ता वद्धाविज्जह तुम्हे तयागमणेणंति, इमं च सोच्चा चिंतियं राइणा-होउ ताव सोगेणं, तं च भयवंतं केवलालो-
यमुणियतिलोयवावारं जहावित्तं पुत्तविणासेहउं दुन्निमित्तमापुच्छिऊण उचियं करिस्सामिति विभाविऊग पयट्ठो
जिणाभिमुहं । इओ य सो अमच्चो मुणियसव्वसुसमाणमो पयडीभविस्सइ संपयं मज्झ कयडविलसियंति निग्रहुच-
रियसंकाए जच्चतुरंगममारुहिऊण जीवियमएण पलाणो वेगेण । रायावि गओ भयवओ समीयं, तओ चित्तंभंतरुडं

संतहरिसपसरो बहलरोमंचचियसरीरो भयवंतं तिपयाहिणापुष्पगं पणमिऊण थुणिउमारद्धो । कहंचिय ?—

जय नवतमालदलसामदेह, तुहु निम्मलगुणरयणोहगेह ।

अइदुज्जयनिज्जियकुसुमनाण !, जिण भवियहं दंसियसिद्धिट्टाण ॥ १ ॥

उत्तुंगपओहरिणनयणनवजोवणपवणचंदवयण ।

पइ उग्गसेणसुय जेण चत्ता, तसु एक्कह तुह पर जयइ वत्त ॥ २ ॥

ओहामियसिंधुसमत्थरयणि, अवयरिए नाह ! जायवह भवणि ।

चित्तामणिमि पइं समुहविजओ, सच्चं चिय जाओ समुहविजओ ॥ ३ ॥

आपूरियनिब्भरसंखवोस—संखोहियजयजण गयदोस ।

भुयपरिहंदोलियलच्छिरमण !, सद्वायेरेण सुरपणयचलण ! ॥ ४ ॥

तइलोकभवणनिम्मलपईव !, परमायररक्खियसयलजीव ! ।

भवि भवि जिणिंद ! तुहुं रिद्धेनेमि !, अम्हारिस लीयह होज्ज सामि ॥ ५ ॥

एय एवं थोऊणं पराए भत्तीए जयगुरुं नेमिं । हरिसियमणो नरिंदो तयणु निविट्ठो महीवेट्ठु ॥ ६ ॥

भववयावि पयट्ठिया धम्मकहा, पड्डिबुद्धा बहवे पाणिणो, गहियनियनियसामत्थाणुरूवाभिगहविसेसा गया य

जहागयं । अह अवसरं सुणिऊण पुच्छियं राइणा-भयवं ! पुरा अमच्चेण जं अम्ह कहियं तं सच्चमलियं वारं ? भयवया भणियं-अलियं, राइणा भणियं-भयवं ! किमेवंविहं तेणाकज्जमायरियं ? भयवया जंपियं-भो महाराय ! भोगत्थिणो रज्जत्थिणो परिचारत्थिणो पाणिणो किं किं पावं न करेति ? किं वा मायामोसं न पयडेति ? अहवा को तस्स दोसो ? पुव्वकयकम्माण चेव विलसियमिमं, सो पुण निमित्तमेतं चेव वरागो, राइणा जंपियं-भयवं ! किं मए पुव्वभवे एवंविहं पावमायरियं जस्स अणुभावेण अच्चंतवल्लहस्स सुयस्स सहसच्चिय विणालं पडिवन्नो ?

ताहे जह पुव्वभवे महिलादोसेण दोसपरिहीणं । मित्तं विणासिऊणं समज्जियं पावमइगरुयं ॥ १ ॥

जह नारयत्तिरियभवेसु भूरिसो पाविऊण जरसरणे । कह कहवि माणुसत्ते लद्धे विहिए य बालत्तवे ॥ २ ॥

इह संपत्ते रज्जे जह मित्तविणासकम्मदोसेणं । जाओ पुत्तविणासो तह सबं भयवया कहियं ॥ ३ ॥

इमं च सोच्चा जायगाढभवभओ हरियम्मराया भणिउं पवत्तो-भयवं जइ पाणाइवायस्स एवंविहो असुहो सहावो ता पज्जत्तं मम रज्जेण, गिण्हामि तुह समीवे पवज्जं जाव अभिसिंचेमि कमवि अत्तणो पयमिस्ति वागरिऊण गओ नयारि, निवेसिओ निययरज्जंमि भाइणेज्जो, सो य अमच्चो नाओ जहा पलाणोत्ति । तओ मोत्तूण य रायसिरि हरिवम्मनराहिवो अणगारियं पडिवन्नोत्ति ॥

इय भो गोयम ! एसो पाणिवहाविरइमंतजंतूणं । पाउब्भवइ मंहतो अणत्थसत्थो जओ तम्हा ॥ १ ॥

सद्वपयत्तेणं चिय संकप्पियपाणिघायवेरमणं । सग्गापवग्गसोक्खाइं कंखमाणेहिं कायवं ॥ २ ॥ इह पढममणुच्चयं ।
अह अलियवयणविरईसरूवमेयं अणुच्चयं बीयं । भणिमो तं पुण अलियं दुविहं थूलं च सुहुमं च ॥ १ ॥
थूलं पंचवियप्यं कन्नागोभूमिनासहरणेसु । कूडगसक्खेज्जंमि य एसो इह नियमविसओत्ति ॥ २ ॥
कन्नागहणं दुपयाण सूयगं चउपयाण गोगहणं । अपयाणं दवाणं सवेसिं भूमिवयणं तु ॥ ३ ॥
इयरदुयग्गहणं पुण पाहन्ननिंदसणट्ठया भणियं । सुहुमं तु अलियवयणं परिहासाईसु नेयवं ॥ ४ ॥
थूलमुसावेरमणे एयंमि अणुवए पवत्तंमि । अइयारा पंच इमे परिहरणिज्जा सुसहेणं ॥ ५ ॥
सहसा अब्भक्खाणं रहसा य सदारमंतंभओ य । मोसोवएसणं कूडलेहकरणं च निच्चंपि ॥ ६ ॥
एयस्स पालणाऽपालणासु पयडा गुणा य दोसा य । दीसंति समक्खं चिय दिट्ठतो भायरो दोत्ति ॥ ७ ॥
ते य भायरो गोयम ! निसामेसु, एत्थेव भारहे वासे वडवहनयरे पमाकरो नाम राया, सवत्थ विक्खायजसो
दुवालसविहावयधम्मपरिपालणपरायणो जइजणपज्जुवासणवट्ठलक्खो परोवयारकरणाइगुणसहस्ससमलंकिओ
सच्चो नाम सेट्ठी, तस्स य इहलोयमित्तपडिबद्धो धम्माणुट्ठाणविरहिओ कणिट्ठो बलदेवो नाम भाया, सो य जाण-
वत्तेण परविसएसु गच्छइ, अन्नया य बहुलामो हवइत्ति णिसामिऊण गओ चोडविसए, चोडरायावि सच्चसेट्ठिणो
गुणनिवहं जणेण वन्निज्जमाणं सुणिऊणं तइंसणाणुरागरत्तो तब्भाउयं बलदेवं भणइ-सव्वहा मम दंसणत्थं सच्चसेट्ठिं

आणेज्जासित्ति, एवं च नरिंदायरं पेच्छिऊण पडियुयमणेण, कालकमेण नियमंदिमुयागओ सच्चस्स परिकहेइ, अनया य चवलत्तणओ लच्छीए उदयत्तणओ अंतराइयकम्मस्स अप्पदविणो जाओ सच्चसेट्ठी, तओ तेण चोडविसग्गमणाय पुट्ठो पभाकरनरिंदो, अणुन्नाओ य तेण, तयणंतरं च उचियाइं महत्थाइं महत्थाइं विविहभंडाइं गहिऊण भाउणा समं गओ चोडविसयं सच्चसेट्ठी, तदागमणं च निसामिऊण तुट्ठो चोडाराया, दयाविग्रं निवासमंदिं, पूइओ उचियपडिवत्तीए अत्तणो य समीवंमि धरिओ कइयथासराइं, अह विणिवट्ठिए भंडे गहिए सदेसपाउग्गे पडिभंडे चोडविसयाहिवइमणुजाणाविऊण समारूढो नावाए सच्चसेट्ठी,

अणुकूलपवणेपेळियमहल्लघवडविवट्ठियोगेगा । गंतुं जवा पयट्ठा नियपुहुत्तं तओ नावा ॥ १ ॥

तहियं आरूढा ते जाव पलयंति कोउहल्लेण । अनिलुल्लंतकल्लोभीसणं जलहिंपंतं ॥ २ ॥

ताव नियंतुंगिमाविहियविंझगिरिविन्भमो लहुं दिट्ठो । सल्लोवरिं वंहंतो अतुच्छेइहो महामच्छो ॥ ३ ॥

तं दट्ठुं बलदेवेण जंपियं एस पवओ एत्थ । इंतणं नासि जओ ता तुब्भे मग्गपब्भट्ठा ॥ ४ ॥

निज्जामगेहिं भणियं न पवओ एस किंतु मच्छोत्ति । सो चेव अयं मग्गो वामोहं कुगह मा सामि ! ॥ ५ ॥

बलदेवेण भणियं-अहं पुण इहं चेव विविहभंडपडिहत्थं जाणवत्तं हारेमि जइ मच्छो होजा, एवं च उभयपक्खेहिवि सच्चसेट्ठिं सक्खि काऊण विहिया होडा, ते य निज्जामगा पडिवेडएण गंतुण मच्छग्रपिट्ठिमि परिक्ख-

णत्थं तणपूलयपडलं पज्जालिउमारद्धा, सो य मच्छो तेण परितत्तसरीरो झडति निबुद्धो अच्छाहे जले, एवं हारियं जाणवत्तं बलदेवण, परितुट्ठा निज्जामगा, पत्ता य केमेण नियनगरं, तओ तेहिं पडिरुद्धं जाणवत्तं, समुत्तारिऊण तीरे मुक्को बलदेवो, पारद्धो अणेण झगडओ निज्जामगेहिं समं, जहा असच्चा इमे मच्छहारिणो चिलाया मए विजियत्ति काऊण आडंबरमुवदंसंतित्ति भणिऊण बला चैव भंडुत्तारिउमारद्धो, निज्जामगेहिं वाहिया नरवइणो आणा, न ठाइ बलदेवो, तओ रायाणं उवट्ठिया दोवि पक्खा, तेसिं च परोप्परं विवदंताणं परमत्थमविद्याणिऊण भणियं रत्ना-अरे ! एत्थ ववहारे को सक्खी ?, निज्जामगेहिं भणियं-देव ! अत्थि चैव सक्खी, परं नियसहोयरमुवेक्खिऊण किं अम्हाणं सक्खित्तणं करिस्सइ ?, राइणा भणियं-को पुण सो ?, तेहिं भणियं-सच्चसेट्ठी, एवं वुत्ते एगंते ठाऊण पुच्छिओ सो रत्ना कज्जपरमत्थं,

ताहे स सच्चसेट्ठी परिभावइ किं करेमि एव ठिए ? । जइ अवितहं न जंपेमि होइ ता मे वयकल्लो ॥ १ ॥
जइ पुण जहेव वित्तं तहेव सांहेमि ता लहू भाया । पावइ अणत्थमत्थो जाई हीरइ पसिद्धीवि ॥ २ ॥
ता दोन्निवि गरुयाइं आवडियाइं इसाइं कज्जाइं । एक्कपि परिच्चइउं न तरामि करेमि किं इण्हि ? ॥ ३ ॥
अहवा इहलोयकए कंहं च चिरकालपालियं नियमं । गुरुमूले पडिबन्नं जाणंतोऽहं विराहेमि ? ॥ ४ ॥
किं एत्तो अइपावं जं जाणंतावि भवअसारत्तं । पडिसिद्धेसुवि अत्थेसु मोहओ संपयदंति ॥ ५ ॥

किं बहुणा ?-जह पडइ सिरे वलं सयणोऽवि परंमुहो हवइ लच्छी । वच्चइ तहावि अलियं कहमवि नाहं वइस्सामि ॥ ६ ॥

इति निच्छयं काऊण भणिओ सो सेट्ठिणा नराहिवो-जं इमे वरागा निजामगा जंपति तं सच्चं, मम भाया पुण अलियवाइत्ति, इमं च सोच्चा तुट्ठो राया चित्तिउं पयट्ठो-अहो अज्जवि एरिसा सच्चवाइणो दीसति जे नियसहोयर-सिरीविणासेवि नियमज्जायं न चयंति, ता मंडिज्जइ एवंविहेहिं कलिकालेऽवि भूमिमंडलंति परिभाविऊण आहूया निजामगा, सरोसं तज्जिया य, जहाने दुरायारा ! जइ कहवि अमुणियपरमत्थेणं मम वणिएण तहाविहं जंपियं ता किं वयणछलमेत्तेणवि अणेगमंडभरियवोहिदत्थं घेत्तुं उवट्ठिया ? , एवमाइहिं वयणेहिं निब्भच्छिऊण किंचि दाऊण निद्धाडिया, दव्वसारंपि समप्पियं सच्चसेट्ठिस्स, बलदेवोऽवि भणिओ-मा पुण एवं कोरज्जासु,

इय अलियवयणपरिहारकारिणो इह भवेऽवि जणपुज्जा । हुंति नरा परलोए लीलाए जंति निव्वाणं ॥ १ ॥ इइ बीयमणुच्चयं२ भणियं बीयमणुच्चयमेत्तो तइयं अदत्तदाणवयं । साहिज्जइ सयलाणत्थसत्थनित्थारणसमत्थं ॥ २ ॥

तं पुण दुविहमदत्तं थूलं सुहुमं च तत्थ सुहुममिणं । तरुछायाठाणाई अणणुग्गायं भयंतस्स ॥ ३ ॥

अइसंकिलेसपमवं जं निवदंडारिहं च तं थूलं । सच्चित्ताइतिभयं थूले गिहिणो हवइ नियमो ॥ ४ ॥

एत्थ उ अप्पडिवन्ने जे दोसा ते जणेऽवि सुपसिद्धा । वहंबंधतरुलंबणसिरच्छेयाई चोराणं ॥ ५ ॥

पडिवन्नेऽविहु एत्थं भवभयभीरुत्तणं परिवहंतो । सुस्सहो अइयारे पंच इमे वज्जइ सयावि ॥ ६ ॥

चोरोवणीयगहनं तकरजोगं विरुद्धरज्जगमं । कूडतुलकूडमाणं तण्डिलरुवं च ववहारं ॥ ७ ॥

चोरिकाउ विरत्ता कहपि चोरोहिं संपउत्तावि । वसुदत्तोच्च न पायंति आवइ सुइसमायारा ॥ ८ ॥

गोयमसामिणा भणियं-भयवं । को एस वसुदत्तो ? , जयगुरुणा कहियं-अधक्खित्तचित्तो निसामेसु, वसंतपुरे नयरे वसुदेवो नाम इब्भो, तस्स य वसुमित्ता नाम भारिया, तीसे य अवच्चं न होइ, तओ सा चित्तेइ-जइ अवच्चस्स कारणे एस मम भत्ता अन्नं परिणिस्सइ ता अहं गेहस्स असाभिणी, अह अच्चतनिम्भराणुरागरंजियमणो अन्नं न परिणेइ, तत्थ य मरणपज्जवसाणयाए एयस्स नरवरदाइदाईहिं हीरंते गेहसारे सचिसेसं असाभिणी चेव, अओ जइ कहवि मम पुत्तो हवइ ता सोहणं संपज्जइ, इमेण य अभिष्णाएणं सा अणवरयं देवयाणं उववाइयसयाणि पयच्छइ मंततंतवाइज्जणं चापुच्छइ । इओ य सोहम्मे कप्पे अरुणाभविमाणे महिद्धिओ विज्जणभो नाम देवो, सो य पच्चा-सन्नचवणसमयत्तणेण अत्तणो पयइविवज्जासं पेच्छऊण वक्खित्तचित्तो भयसंभंतो परिचित्तेइ-

कह रयणनियरउग्गाढपीढियादढनिबद्धमूलोऽवि । निच्चावद्धियरूथोवि कण्णरुक्खो पकंणैइ ? ॥ १ ॥

सुंदरमंदारतरुप्पसूयमालाऽमिलानपुव्वावि । कारणविरहेऽवि कं पमिलायइ संपयं सहसा ? ॥ २ ॥

कह जच्चंरुचणुड्ढामरोऽवि देहस्स कंतिपब्भारो । ताक्खिच्छगुच्छसंछाइयव मालिन्नमुवहइ ॥ ३ ॥

कह वा भुयंगनिम्मोयनिम्मलाइपि देवदूसाइं । कज्जलजलधोयाणिव अइकसिणाइं विभाविति ? ॥ ४ ॥

कह वा मम नयणजुयं सभावओ च्चिय निमेसपरिहीणं । देवत्तविरुद्धेवि हु निमीलणुम्मीलणे कुणइ ? ॥ ५ ॥
 कह अंतरंतरा पेच्छणाइयक्खित्तचित्तमवि पावा । लद्धावसरच्चिय वेरिणिच्च विद्वइ मं निहं ? ॥ ६ ॥
 अच्चंतेपमपरवसचित्तोऽवि हु परिणणो कहमियाणिं । कइवयदिणदिट्ठो इय न वयणमभिन्दए मज्झ ? ॥ ७ ॥
 ता सबहा न कुसलं तेक्कमि अहं सजीवियवस्स । कछाणकारिणो जेण होति न कयाइ उप्पाया ॥ ८ ॥
 इय एवंविहचिंतासंताणुप्पन्नतिवपरितावो । कण्हुमोव वणदवपलीविओ भाइ सो तियसो ॥ ९ ॥
 एवं जाव सोगपमिलाणणो सिंघासणगओ अच्छइ ताव तस्स चेव पियमित्तो कणगप्पमो नाम देवो समागओ
 तं पएसं, तं च तहट्ठियं दट्ठूण चित्थियमणेण—कहं अज्ज पियमित्तो सुण्णचित्तलक्खोव लक्खीयइ ?, जओ अग्रेव-
 लासु दूराओ च्चिय मं आगच्छमाणं पलोइऊण सायरं सप्पणयं पढमालावासाणप्पणामाइणा अभिणंदन्तो, संपयं पुण
 समीवमुवगयंमि न पच्चभिजाणइ, ता नूणं कारणेण होयव्वंति विभाविऊण भणिओ अणेण—भो विज्जुप्पम ! किं चिं-
 तिज्जइ ?, उट्ठमवल्लोइऊण जंपियं विज्जुप्पमेण—भो वरमित्त ! कणगप्पम इओ एहि, इमं च आसणमलंकारेहित्ति वुत्ते
 उवविट्ठो एसो, पुच्छिओ य अणेण वेमणस्सयाकारणं, कहिओ य विज्जुप्पमेण स निययवुत्तंतो, तओ कणगप्पमेण
 भणियं—पियमित्त ! सबहा न सुंदरमेयं, ता एहि तित्थगरस्स पुच्छामो, कहिं एत्तो तुह चुयस्स उप्पत्ती भविस्स-
 इत्ति, विज्जुप्पमेण भणियं—एवं होउ, तओ गया विदेहखेत्ते, वंदिओ तित्थगरो, सविणयं पुच्छिओ य, जहा—भयवं !

कथ अहं उववज्जिस्सामि?, भयवया भणियं-वंसंतपुरे नयरे वसुदेवस्स वणिणो वसुमिच्चाए भारियाए गब्भंमि पुत्तो तुमे पाउब्भविस्ससि, एवं च निसामिऊण जहागयं पडिनियत्तो विज्जुणभो, अन्नंमि य दिवसे सिद्धपुत्तरूवं विउ-विऊण अवयरिओ वसुदेवगिहे, साइसओत्ति कलिऊण अब्भुट्ठिओ वसुमिच्चाए, पुट्ठो य-भो महाभाग ! जाणासि तुमं मम पुत्तो भविस्सइ न यत्ति?, देवेण भणियं-जइ तं पव्वयंतं न वारेसि अहं तहा करेमि जहां ते पुत्तो होइत्ति, पडिस्सुयमणाए, अहं कवडेण मंडलग्गपूयापुरस्सरं महया वित्थरेण देवयापूयं काऊण देवो भणइ-भहे ! अमुगंमि दिथहे विसिट्ठुमिणसइओ पुत्तो ते गब्भे आयाही, तीए भणियं-तुमह पसाएण एवं होउ, देवो अइंसणमुवगओ, अवरंमि य वासरे सो चविऊण उष्णणो तीसे गब्भे, जाओ कालक्कभेण, कयं वद्धावणयं, पइट्ठियं से वसुदत्तोत्ति नामं, उचियसमए य गाहिओ कलाकोसलं, नीओ य एगया साहूण सभवे, कहिओ य तेहिं दुवालसवयसणाहो सावगधम्मो, पुव्वभवजिणवयणाणुरागरत्तत्तेण य परिणओ एयस्स, तओ पडिवण्णो भावसारं तेण, गहियाणि य दुवालसवि वयाइं, परिपालेइ य निरइयाराइं, अन्नया य सविसेसजायधम्मवासणाविसेसेण तेण पुब्बिअया साहुणो मुणिधम्मं, कहिओ य तेहिं । कहां चिय ?—

पंच उ महवयाइं गुत्तीओ तिन्नि पंच समिइओ । सीलंगसहस्साइं अट्टारस निरइयाराइं ॥ १ ॥

छुहतण्हापमुह परीसहा य बावीस बाटदुविसहा । विणओ य चउब्भेओ अणियववासो य मुत्ती यं ॥ २ ॥

पिंडविसुद्धी सुत्तथचित्तणं गुरुकुले सया वासो । अणवरयं तवचरणंमि उज्जमो कोहचाओ य ॥ ३ ॥
 गामकुलाइसु पडिबंघवज्जणं उत्तरोत्तरगुणेषु । अब्भुज्जमो य निचं वाढं संसारनिव्वेओ ॥ ४ ॥
 जहठियजिणमगपरुवणा य सत्तेसु करुणभावो य । करणाण निग्गहो तह सतत्तपरिभावणं निचं ॥ ५ ॥
 इय आजम्मं सुंदर ! सुणिउं धम्मस्स (सुणिधम्मसमग्ग)साहणविहाणं । अच्चंतमपमत्तेहिं कीरमाणं सिवं देइ ॥ ६ ॥
 एवं सुणीहिं कहिए संबुद्धियगाढधम्मपरिणामो । वसुदत्तो भणइ लहुं भयवं ! सह देह पवज्जं ॥ ७ ॥
 ताहे सुणीहिं भणियं जणणीजणगणणुणवणपुव्वं । पव्वज्जापडिवत्तो जुज्जइ नेवऽण्णहा काउं ॥ ८ ॥
 ता सकुडुवं मोयाविऊण दिक्खं पवज्जसु ज्वेण । सण्णाणफ़लमिमं चिय जं चाओ सव्वसंगस्स ॥ ९ ॥
 एवं सुणीहिं वागरिए गओ सो अम्मापिऊण सगासे, कहिओ निघचित्तपरिणामो, तेहिं भणियं-पुत्त ! भुत्तभोगो
 पवज्जं गिणहेज्जासि, अणुव्वयाइणा सावगधम्मेण ताव अत्ताणं परिकम्मेषु, तओ सो तेसिं अप्पत्तियपरिहरणट्ठया
 साहूण समीवे पढतो गिहत्थवित्तीए चेव अच्छइ, पव्वजागहणनिच्छएण जोव्वणत्थोऽवि नेच्छइ परिणेउं, तं च
 तहाविहं पेच्छिऊण जणणीए भणिओ वसुदेवो-एस पुत्तो तवस्सिजणसंसंगीए वासियहिियओ नावेक्खइ विसयपडि-
 वत्तिं न मन्नइ दारपरिगहं नायरइ सरिरालंकरणं, ता पज्जत्तं धम्मियसेवाए, सव्वहा खिवसु एयं दुल्लियगोद्धीए,
 जइ पुण तहाविहसंसंगीए भावपरावत्ती जायइत्ति, पडिस्सुयमेयं सेट्ठिणा, तओ जे वाणियगा पुत्ता समणजाइ-

वयविभवा ताण मज्झे मेलिओ एसो, ते य अच्चतविसयगिद्धा दविणक्खयं कुणता पियरेहिं सिक्खविज्जतावि दुहं-
तिंदियत्तेणेण न तरंति नियत्तिउं, सगेहेसु य धणमलममाणा चोरियं करंति । अन्नया य सुसणनिमित्तेण पलोइयं
तेहिं बहुधणधणसमिद्धं समिद्धजज्जजत्तायतन्निवासिजणसमूहं विमुक्केत्थेरीरक्खणं महेसरदत्तस्स मंदिरं, तओ
विजणंति काऊण पयट्ठा रथणीए तं मुसिउं, सो य वसुदत्तो पुक्खरपत्तंपिव पंक्तकलंकेण सुसाहुव्व कुसीलसंसगेण
न मणांगपि छिन्नो तेसिं कुसमायारेण, केवलं जणजिज्जयाणुवित्तिमवलंबंतो रज्जुबद्धोव्व वसहो असुणियपरमत्थो
चेव पट्ठिओ तेसिमणुमग्गेणं, ते य सणियं सणियं तस्स महेसरदत्तस्स गिहे पविसमाणा वसुदत्तेण पुच्छिया-भो
किमेत्थ तुम्हे पविसह !, तेहिं भणियं-भह ! चोरियाए एत्थ पविसिस्सामो, सुसमाहियचरणवयणवावारो तुमं
एज्जाहि, तेण भणियं-नाहमिहमागमिस्सामि कुणह जं भे रोयह, इइ भणिऊण ठिओ सो बाहिं चेव, ते पविट्ठा
भवणब्भंतरे, सुणिया य थेरीए, तओ सा पायवडणच्छलेण ते सुसंते मा पुत्ता ! एवं करेहिंति भणंती भोरपि-
च्छत्तेण चलणेसु लंछेइ ।

वसुदत्तो पुण चित्तइ पेच्छह अम्मापिऊण मूढत्तं । जं एवंविहुस्सीलमज्झयोरं खिवंतेहिं ॥ १ ॥
नो तेहिं चित्तियमिमं जह पावजणस्स संगइवसेण । जायइ गुणपरिहाणी पडंति विविहावयाओवि ॥ २ ॥
सयमवि पावपओयणपसाहणब्भुज्जओ इमो जीवो । किं पुण कुमित्तसंजोगसंभवतासुहसहावो ॥ ३ ॥

ता परिचएमि एए वचामि समंदिरमि एत्ताहे । दुन्नयपरनरजोगे मरणपि हु आवडइ जेण ॥ ४ ॥

अहवा गुरुवयणं लंघिऊण गेहंमि वचमाणस्स । संपज्जइ दुव्विणओ तम्हा जं होइ तं होउ ॥ ५ ॥

इति परिभाषितस्स ते सयलं गेहसारं सुसिऊण नीहरिया मंदिराओ, गया उज्जाणे, विविहण्यारोहिं कीलि-
उमारद्धा, वसुदत्तोऽवि गुरुवयणरज्जुसंदाणिओ अचंतविरागमुच्चहंतो तेसिमेव समीवे चिट्ठइ, एत्थंतरे समुगयं मायं-
डमंडलं, विहडियं तमकंडं, सा य थेरी पाहुंडं गहाय गया नरवइसमीवे, कहिओ सयलो जहावित्तो रयणिवइयरो,
राइणा भणियं-अचंतगंभीरयाए नयरस्स को वा कहिं वा नज्जिही?, तीए भणियं-देव ! ते मए सवेऽवि मऊर-
पिच्छेण पाएसु अंकिया अच्छंतित्ति बुत्ते राइणा आणत्ता सबत्थ पुरिसा, सुनिऊणं गवेसंतहि य तेहिं उज्जाणसं-
ठिया दिट्ठा ते सवेऽवि, उवलक्खिया इंगियागोरेहिं, उवणीया य नराहिवस्स, तेणावि वाहराविया थेरी, तीएवि वसु-
दत्तं विमोत्तूण अन्ने परिकहिया चोरत्तणेणंति, रत्ता भणियं-कहमेसो चोरमंडलीमज्झगओऽवि न चोरो, थेरी भणइ-
न चलणेसु लंछिओत्ति, राइणा भणियं-जइ अट्ठो ता सुयह एयं, वसुदत्तो भणइ-देव ! कहमहं दुट्ठसंसग्गीएवि
न दुट्ठो जं ममावि न कुणह निग्गहं, रत्ता कहियं-भइ ! जइ एयंपि जाणसि ता कीस दुट्ठसंसग्गि मूलाओ चिय
न उज्जेसि?, तेण भणियं-देव ! दिव्वं पुच्छह, एत्थंतरे सुणियजहावट्ठियतवइथेण भणियमेगेण पुरिसेण-देव !
एस पवज्जं पडिवज्जिउकामो भावपरावत्तिनिमित्तं अम्मापियेरेहिं सिणेहाणुबंधकायरोहिं संपयं चेव दुल्ललियगोटीए

पवित्रतो, ता तदणुरोहो चैव एयस्स अवरज्झइ, एवं निसामिऊण नराहिवेण तंबोलाइदाणेण सम्मणिऊण पेसिओ सगिहं, इयरे पुण दुक्खमारेण मारियत्ति ।

इओ य मुणिसमुचियविहारेण भवियपडिबोहमायंता अप्पडिबद्धावि जिणाणाए पडिबद्धा दुरणुचरतवचरण-पज्जालियकम्मवणावि सवसत्तसुहकारया समोसढा विजयसिंहाभिहाणा सूरिणो, जाया य तियचउक्कचचरेसु हरि-समरनिभरस्स जणस्स अवरोग्गपरमुहावा अहो ! अगाहभवोहनिवडंतजन्तुगणजाणवत्ता सिवसुहपसाहणासत्ता भयवंतो सुग्गहियनामधेज्जा सूरिणो इह समोसरिया, तहाविहाणं नामसवणमेत्तं पि पावपब्भारपणासणसमत्थं, किं पुण वंदणनमंसणं ? अओ गच्छामो देवाणुप्पिया ! तेसिं वंदणत्थं, एवं च सोच्चा गंतुं पयत्ता सूरिसमीवे नायया । सो य वसुदत्तो राइणा पेसिओ समणो गओ निययेगेहे, कहिओ जणणिजणगाण पुव्वइयरो जहा तुम्ह कूडवच्छेण अहं अज्ज अकयधम्मो चैव विणासिओ होतो, ता कीस सिणेहवच्छेण अणत्थपत्थारीए संखिवह जं न सुयह धम्मकरणायत्ति वुत्ते अणुन्नाओ सो जणणिजणगेहिं, गओ सूरिणो पासे, गहिया पवज्जा, तओ एगं-तधम्मकम्मज्जओ जाओत्ति ।

इय इंदमूह गोयम ! विमुक्कचोरिक्कपावठाणाणं । मणुयाण उभयलोगेऽवि जीविंयं जायए सफलं ॥ १ ॥ इइ तइयमणुव्वयं । कहियं तइयमणुव्वयमेत्तो मेहुणनिवित्तिनिष्फणं । मण्णइ चउत्थमणुव्वयमवहियचित्तो निसामेसु ॥ १ ॥

तं मेहुन्नं दुविहं सुहुमं थूलं च तत्थ सुहुममिमं । कामोदण्ण ईसिं जमिदियाणं विगारोत्ति ॥ २ ॥
 थूलं पुण संभोगो मणाइचेट्ठा व भोगकामस्स । तं पुण दुविहं नेयं ओरालविउच्चभेएणं ॥ ३ ॥
 ओरालियं तु दुविहं माणुसतेरिच्छभेयओ होइ । वेउच्चं पुण दिव्वं माणुसयंपि य वयं तिविहं ॥ ४ ॥
 परदारवज्जणं वा सदारतोसो य वंभचेरं वा । तत्थ य दिव्वतिरिक्खं मेहुन्नं पारदारं च ॥ ५ ॥
 जो परिहरइ सुसट्ठो निच्चलचित्तो सुवम्मणडिवद्धो । सो तविरओ एसो निरईयारट्ठया सम्मं ॥ ६ ॥
 वज्जेइ इत्तरियपरिग्गहियागमणं अणंगकीडं च । परवीवाहक्करणं कामे तिच्चाभिलासं च ॥ ७ ॥
 किंच-असुइब्भूएसुं निदिएसु पज्जंतदुहविवोगेसु । कामेसु केऽवि धन्ना निसगओ चिय विरज्जंति ॥ ८ ॥
 अन्ने पुण उब्भडमयणबाणनिब्भज्जमाणसवंग्गा । अगणियजुत्ताजुत्ता अविभावियनियतणुविणासा ॥ ९ ॥
 पररमणीसु परिभोगलालसा मुक्कलज्जमज्जाया । तज्जम्भे चिय पावंति आवयं किं पुणऽन्नभवे ? ॥ १० ॥ जुम्मं ।
 अवेरे य तहाविहगुरूवएसओ जायनिम्मलविचेया । परजुवईणं संगं विवज्जमाणा पयत्तेण ॥ ११ ॥
 तविरइमेत्तच्चिय वट्ठंतविसुद्धधम्मपडिबंधा । होति सिक्खनयरनिलया सुरिंददत्तोच्च नरवसहा ॥ १२ ॥ जुम्मं ।
 गोयमेण जंपियं-तइलोकदिवायर ! को एस सुरिंददत्तो ? कंहं वा एयस्स गुरूवएसओ विवेयलाभो ? कंहं च पर-
 दारविरइमेत्तेणवि से निच्चाणसंपत्तिं ? , जयगुरुणा वागरियं-निसामेसु । इहेव भारहे वासे नीसेसवसुधराभोगभूसणं

रणंतमणिर्किंकिणीमणहरेवजयतीविराडयसुरमंदिरसमुत्तुंगसिंगं सिंगारुम्भडरुवरामाणोवसोहित्रं विजयपुरं नाम
नगरं, तर्हि च समग्ननरिंदवगपणयसासणो सिवभद्रो नाम नराहिवो, सयलंतैररुणवरा रायसिरी नाम से भारिया,
तेसिं च देवकुमारोवमरुवो धणुध्वेयपमुहकलाकोसल्लपडिहत्थो सुरिंददत्तो नाम पुत्तो, सो य पुव्वभववालगिलाण-
गुरुथैरतवसुसियसुणिजणवेयावच्चावज्जियपुन्नपम्भारवसविदत्तगाढसोहगोदएण पढमुम्मिलंतजोव्वणगुणत्तणेण य अच्चं-
ताभिरामसरीरो जत्थ जत्थ परिब्भमइ तत्थ तत्थ परिचत्तवावारंतराहिं अवगणियगुरुजणलज्जाहिं अणवेक्खियकु-
लाभिमाणहिं नयरनारीहिं अणमिसच्छीहिं पिच्छिज्जइ, वाढमम्भत्थिज्जमाणो य सेट्टिसत्थवाहणहाणजणजुवइहिं
सद्धिं सद्धम्मपरम्मुहो अभिरमइ य, लोगोवि एयमत्थं जाणमाणोऽवि जे चैव रक्खणा तेऽवि लुंणगत्ति चिं-
तंतो न किंपि जंपइ ।

अन्नया य नयरंमि जाओ अच्चंतचोरोवइवो, तथो पउरजणेण साहिंयं नरिंदस्स, तेणावि तज्जिओ आरक्खिगो,
कया य सव्वण्णएसेसु जामरक्खगपरिखेवा, रयणीए सुत्तपमत्तारक्खिगनिरिक्खणत्थं कयवेसपरावत्तो पाणिपरिग-
हियखगो एगागी सयमेव निगओ गेहाओ तिथचउक्कचच्चाइसु परिब्भमिउमारद्धो य, तहा भमंतस्स य रणो
विजणंति पडियमेणेण थेरपुरिसणं—

चोरेहिं गेहसारो, हीरइ कुमरेण नयरतरुणिजणो । एवंविहरक्खाए नरिंद सिवभद्र ! भइं ते' ॥ १ ॥

पट्टिट्टिओ य राया सोच्चं से गओ समीवंमि । अच्चंतविहियमणो सणियं भणिउं पवत्तो य ॥ २ ॥
 भो कहसु पढियगाहापरमत्थं तेण जंपियं सुहय ! । रायविरुद्धकहाए तीए किं मज्झ कहियाए ? ॥ ३ ॥
 रत्ना वुत्तं सच्चं एवमिमं किं तु एत्थ एगंते । साहिज्जंतीएवि हु न कोऽवि दोसो अओ कहसु ॥ ४ ॥
 तो तेण समगो नयरतरुणिविसओ कुमारवुत्ततो । चोरोवहवसहिओ कहिओ सिवभद्वनरवइणो ॥ ५ ॥
 अह तं निसामिऊणं पलयानलभीमकोवरत्तच्छो । आवडुब्भडभिउडी राया एवं विचिंतेइ ॥ ६ ॥
 अहह ! महंतमकज्जं पावेण सुएण मज्झ आयरियं । हरिणंकनिम्मलंपि हु कुलमेवं मइलियं जेण ॥ ७ ॥
 ता किं अहुणच्चिय कंधराए धरिऊण तं महापावं । निद्धाडेमि पुराओ ? किं दुव्वयेणहिं तज्जेमि ? ॥ ८ ॥
 अहवा मंतीहिं समं सम्मं वीमंसिऊण तस्सुच्चियं । पकरेमि जेण सहसा कयाइं दूमेति कजाइं ॥ ९ ॥

इय चिंतिऊण राया गओ निययभवणं, पसुत्तो सुहसेज्जाए, जाए य पभायसमए वाहराविया मंतिणो, सिट्ठो
 य तेसिं रयणिवुत्ततो, मंतीहिं भणियं-देव ! अम्हेहिं पुंघपि कुसमायावत्ता निसामिया आसि, परं न कोऽवि सो
 अवसरो जाओ जत्थ तुम्ह कहिज्जइ, रत्ना जंपियं-होउ ताव समइकंतत्थविकत्थणेण, संपयं सोहह, किमेयस्स
 दंडं निवत्तेमो ? , मंतीहिं वागरियं-देव ! अलं दंडेण, एत्तियमेत्तमेव जुत्तं तुम्ह काउं जमेसो निजइ सुसाहुसमीवे,
 सुणाविज्जइ धम्मसत्थाइं, पढाविज्जइ रायनीइं, उववेसाविज्जए विसिट्ठगोइीए, एवमवि होही एयस्स कुसमाया-

परिचायपरिणामो, पडिवन्नं रत्ना, वाहराविओ कुमारो, तेण य समेओ गओ धम्मसेणसूरिणो समीवे, तं च
वंदिऊण निसन्नो उचियट्ठाणंभि, सूरिणाऽवि पारद्धा धम्मकहा ॥ कहं?—
सो भो देवाणुपिया! जइ वंछह सिवमुहाइं उवलडुं । ता मोत्तूण पमायं जिणंदधम्ममंमि उज्जमह ॥ १ ॥
तं नो कुणंति अहिमरविसहरिणारिवेरियायाला । अच्चंतं कुवियाविहु जमिह पमाओ महापावो ॥ २ ॥
सो पुण पंचवियप्पो नेयवो निवुइपरिहरूवो । मइरा-कसाय-निद्दा-विगहा-विसयाण गहणेण ॥ ३ ॥
मइरापाणपरव्वसमणपसरो जुत्तमियरममुणंतो । तं नत्थि नूण पावं जं जीवो नो समायरइ ॥ ४ ॥
एत्तो चिय सुरकयकणयपवरपागारगोउरावि पुरी । बारवई जायवसंकुलावि मच्चुंमुहं पत्ता ॥ ५ ॥
पज्जंतकयविसाया महापिसाया व दिन्नअववाया । जणियदुरज्झवसाया न होति सुहया कसायावि ॥ ६ ॥
एएहिं निहयमइणो जं जीवा चरियदुक्करतवावि । करडुक्कुरुडुव सत्तमनरथपुढवीए निवडंति ॥ ७ ॥
निद्दापमत्तचित्तावि पाणिणो पाउणंति न कयावि । सुयनाणधणं पत्तंयि कहंवि हारंति धीरहिया ॥ ८ ॥
तेणं चिय चउदसपुव्विणोऽवि निन्नदुपवरसुयरयणा । मरिउं कालमणंतं अणंतकाएसुवि वसंति ॥ ९ ॥
मोत्तूण निययकिच्चं भोयणदेसिस्थिरायसंवद्धा । कीरंति जेहिं विकहा कह नो ते दुक्खिया होति ॥ १० ॥
कहवा न बालिसेणवि अच्चमगलंजंपिरत्ति गहिलत्ति । कित्तिज्जंती? मणुयत्तणेऽवि को वा गुणो तेसिं? ॥ ११ ॥

सेविज्जन्ता जमणिट्टकारिणो ते धुवं किमच्छरियं । सुमरणमेत्तेणपिवि दिति दुरंतं भवं विसया ॥ १२ ॥
 विसयाण कए पुरिसा सुदुक्करपिवि कुणंति ववसायं । आरोवेति य संसयतुलाए नियजीविचय्वंपि ॥ १३ ॥
 चिरकालपालियंपि हु कुलभज्जायं चयंति तव्वसगा । सव्वत्थ वित्थरंतं अवजसपंखुपि न गणंति ॥ १४ ॥
 वंचंति सयणवग्गं तणं व मन्नंति निययजणगंपि । धम्मोवएसदायगमवहीरंती गुरुजणंपि ॥ १५ ॥
 प्हसंति विरागिजणं विसिट्ठगोड्ढिं चयंति दूरेण । वंछंति नेव सोउं सणकुमाराइचरियाइं ॥ १६ ॥
 इय ते विसयमहाविसवामूढमणा मणागमेत्तंपि । नेवुइमपावमाणा पावेसु वहुं पसज्जंति ॥ १७ ॥
 बाहिरवित्तीए तहाविहेसु धम्मसु संपवत्तावि । पंचगिगपमुहुक्करतवसंतावियसरीरावि ॥ १८ ॥
 कम्मवसेणं अप्पुण्णविसयवंछा विणस्सिउं पावा । निवडंति दुग्गईए भागवयमुहंकरमुणिव्व ॥ १९ ॥
 इय पंचविहपमायं एवंविहदोसदूसियं नाउं । नरनाह ! तदेगमणो जिणंदधम्ममि उज्जमसु ॥ २० ॥
 एवं सूरिणा उवइहे पमायप्पवंचे सुरिंददत्तकुमारो जायनिम्मलचित्तपरिणामो भणिउं पवत्तो-भयवं ! को एसो
 पुव्वकहियसुहंकरमुणी ? कहं वा अपुण्णविसयवंछो सो मरिउं दुग्गइं गओत्ति साहेह ममं, सूरिणा भणियं-साहेमि ॥
 मालवविसए विक्खायजसा चक्कपुरी नाम नयरी, तहिं च अणेगवणिजणचक्खुभूओ पभूयदव्वसंभारो सोभ-
 दत्तो नाम सेट्ठी, तस्स सत्तण्हं पुत्ताणं कणिट्ठिया अणेगोवजाइयसयसंपसया देवसिरी नाम धूया, सा य अच्चंत-

रूपा संपत्तजोवृणावि तहाविहवराभावेण कालं बोलेइ, इओ य तीए नयरीए अदूर उच्छलतमहछकछोलिवदलिय-
कूलाए अणेगविहगकुलकलयलाउलदियंतराए जमुणामहानईए उत्तरपुरात्थिमदिसिबिभागे वेयपुराणभारहरामा-
यणवक्खानाणविन्नाणनिउणो नियदरिसणत्थविथारणपवणो सब्बत्थ विक्खायजसो नीसेसभागवयमुणिपहणो
सुहंकरो नाम लोइयतवस्सी परिवसइ, सो य तवेण य वयणसोहरणेण भविस्सजाणेण य जणसम्मयत्तेण य सयलस्सवि
नयरजणस्स बाढं पूयणिज्जो, अन्नया य तेण सोमदत्तसेट्ठिणा गुणगणावज्जियहियएण निमंतिओ सो भोयणक-
रणत्थं नियमंदिरे, गाढतवयणाणुरोहेण य कइवयसिस्सपरियरिओ संपत्तो भोयणसमयंमि, सपरियेण परमभत्तीए
नमंसिओ सोमदत्तेण, सम्मज्जिओवलत्तिमि भवणभागमि दवावियं से आसणं, तहिं च निसन्नो एसो, सेट्ठिसुएहिं
कयं परमायेरेण चलणपक्खालणं, अणेगकलहोयमयकचोलिसिप्पिसकुलं च पइट्ठियं पुरओ परिमलं, सेट्ठी य सयमेव
निब्भरभत्तिभतरलियचित्तो नाणाविहवंजणसणाहं पउरखंडखज्जयाइमणहरं रसवइं परिवेसिउं पवत्तो, सावि सेट्ठि-
धूया देवसिरी रणंतमणिनेउरारावमुहलियदिसावगासा हारद्धहारकुंडलकडयअंगयरसणापमुहाभरणभूसियसरीरा नि-
यंसियपवरपट्टुणुगयदिवचीणंसुया कणप्रदंडतालविटमादाय तस्स भोयणं कुणंतस्स वीजणत्थमुवट्ठिया, एत्थंतरे
साहिलासं तं पलोइऊण सुहंकरतवस्सी तक्कालवियंभमाणभयणहुयवहपलित्तहियओ विभाविउमारद्धो । कइं ?—

सुसहा पन्नगपमुक्कफारफौंकारजलणजालोली । उब्भडकोदंडविक्खित्ततिक्खनारायराईवि ॥ १ ॥

न उण इमीए एए कुवलयदलदीहरच्छिविच्छोहा । सोढुं सका निक्खिमयरद्धयभावसंवल्लिया ॥ २ ॥
 रइरंभाहरिदइयातिलोत्तमापमुहदिवनारीओ । मन्ने इमीए रूवेण लज्जियाओ न दीसंति ॥ ३ ॥
 विन्नाणं ज्ञाणं सत्थकोसलं देवथाण पूया य । विहलं सर्वपि इमं जइ एयमहं न पावेमि ॥ ४ ॥
 केवलमुवायओ संगमेऽवि एयाए कहवि दिववसा । सवत्थ वित्थरंतो अवन्नवाओ दुसरोहो ॥ ५ ॥

अहवा किमणेण ?-हरिहरहिरणगन्धा वसिष्ठजमदग्निवा(चा)सुदवासा ।

हरिणच्छवयणनिद्देसकारिणो जइ पुरा जाया ॥ ६ ॥

ता किं अम्हारिसमुणिजणस्स सुद्धुवि विसिद्धम्मस्स । लज्जा वयणिजं वा ? ता पज्जत्तं विगण्थेहिं ॥ ७ ॥ जुस्मं ।
 तहं कहवि केरेमि जहा इमीए सद्धिं समागमो होइ । इय निच्छिऊण गंभीरभावमब्भुवगओ एसो ॥ ८ ॥

आगारसंवरं च काऊण जहापउत्तनाएण भोचुं पवत्तो, अह तक्कालवियंभियमयणगुरूवएसवसओ इव जाया से
 बुद्धी, जहा विणयारेमि एयं सेद्धिं, जेण वयणिज्जिचिरिहो एयाए लाभो हवइत्ति, एवं संपेहिऊण सेट्ठिणो पलोय-
 माणस्स दुस्सहदुक्खावेगंससूयगो विमुक्को अणेण सिक्कारो, ससंभमेण निरुविओ सेट्ठिणा, खणंतरंमि य गए पुणोऽवि
 पुवक्कमेण पयडियलोमुद्धोसनिब्भरे सवयणभंगभासुरे दोचं तचं च विमुक्कंमि सिक्कारे अहो किंपि अचंतमणिट्टमावडि-
 हित्ति विभावितो जाव सेट्ठी अच्छइ ताव सो मुहसुद्धिं काऊण समुद्धिओ भोगणमंडवाओ, उवविट्ठो अन्नंय, सेट्ठीवि

कज्जसेसं काऊण समागओ तस्समीचं, निवडिओ तस्स चलणेसु, जोडिय करसंपुडं च भणिउमाढत्तो-भयवं ! पसायं काऊण साहेह, किं कारणं भोयणं कुणंतेहिं तुम्हेहिं तिमखुत्तो दुस्सहदुक्खावेगसूयगो इव सिक्कारो विसुक्कोत्ति?, सुहंकरेण भणियं-भो महाणुभाव ! किं साहिज्जइ?, एरिसा चेव हयपयावइणो रुई, जं सव्वं चिय रयणं सोवदवं निम्मवेइ, तहाहि-

सयलकलानिलयस्स य गयणसरोवरसहस्सपत्तस्स सुरलोयभयणमंगलसस्स पइयक्खं खओ निसायरस्स, नीसेसतिरियलोयपईवस्स कमलसंडजड्डखंडणेक्कपयंडकिरणस्स भयवओ मायंडस्स अणिवत्तयउगाढकुट्टदोसेण विणासिया चरणा, अणेगरयणसंभारभरियगंभीरकुच्छिभागस्स महाजलुणीलपवाहियविवरंमुहसरियासहस्सस्स सायरस्सवि अणवरयसलिलसंहारपच्चलो निवसिओ कुच्छिमि वज्जनलो, एवं च ठिए वत्थुपरमत्थे किमत्थि कहणिजं ? को वा वोढवो चित्तसंतापो ?, सेट्ठिणा भणियं-भयवं ! न मुणेमि किंपि गंभीरवयणेहिं, ता फुडक्खरं साहेह, किमिह कारणं ?, सुहंकरेण भणियं-कहेमि, अलाहि एत्तो जंपिएण, नियमजायाविधायपरिहारसमुज्जओ चेव जइजणो होइ, एवं भणिऊण डंभसील्याए समुट्ठिऊण गओ सो निययासमयं, सेट्ठिवि अयंडविडुरसूयगं से वयणं निसामिऊण सं-खुद्धो परिभाविउं पवत्तो-अहो तिकालगयत्थपरिघ्नाणनिउणेण महातवस्सिणा अणेण नूनं अम्ह किंपि गाढभावथाव-डणमवलोइऊणवि चित्तपीडापरिहरणट्ठया न य पयडक्खरोहिं समुल्लवियं कज्जतंतं, ता जावज्जवि न समुज्जइ कोऽवि अणत्थो ताव तं मुणिवरं गाढाणुरोहपुव्वमापुच्छिऊण जहोचियमायराभिमिच्चिंतिऊण गओ तस्स आसमं,

पडिओ से पाएसु, पणयगब्भपत्थणाहिं बहुण्यारं तथा तथा भणिओ जहा जाओ सो अणुकूलचित्तो, तथो भणिय-
मणेण-अहो सोमदत्त ! बाढमकहणिज्जेमेयं, केवलं तुह असरिसयस्सवाएण विहरियं मे हिययं, न एत्तो गोविउं पारेइ,
अओ आयन्नेहि-भो महायस ! जा एसा तुह दुहिया सा थेवदिणमज्झमि कुडुवस्सयमाणिस्सइत्ति लक्खणेहि
नाऊण मए भोयणे पारद्धे अकंडविणिवायतरलियचित्तेण तथाविहमणिट्ठं गोविउमसहंतेण पुणो पुणो सिक्कारो
कओ, ता भो महाणुभाव ! एयं तं कारणं, इमं च सेट्ठी निसुणिऊण वज्जासणिताडिओव्व मुच्छानिभीलियच्छो
इव खणं ठाऊण कहवि समवलंविथधीरभावो भणिउमाढत्तो—

भयवं ! एत्तियमेत्तं जह तुमए जाणियं सुबुद्धीए । तह उत्तरंपि किंची जाणिहिसि अओ तयं कहसु ॥ १ ॥
जं पयडमिमं लोगे जो विज्जो सुणइ रोगिणो रोगं । सो तदुचियमोसहमवि ता भंते ! कुणसु कारुणं ॥ २ ॥
तुम्हाणणुग्गहेणं जइ देवगुरूण पूयणं कुणिमो । अम्हे अदीणमणा ता किमजुत्तं हवेज्ज इह ? ॥ ३ ॥
निरुवमधम्माधाराण तुम्ह नोवेक्खणं खमं जेण । परहियकरणेक्कपरा चयंति नियजीवियवंपि ॥ ४ ॥
तम्हा उज्झसु संखोभमणुचियं कहह जमिह कायव्वं । पुव्वमुणिणोऽवि जेणं परोवयारं करिंसु सया ॥ ५ ॥
एवं सेट्ठिणा कहिए ईसिमउल्लियनयणेणं जंपियं तेण-भो सोमदत्त ! सुनिच्चलं जंतिउम्हि तुह दक्खिण-
रज्जूए, एत्तोचिय महाणुभावा गिहिसंगं मोत्तूण विजणवणविहारमब्भुयगया पुव्वमुणिणो, सेट्ठिणा भणियं-अच्छउ

अणुकूला मह कम्मपरिणई, केवलं एवंविहं रमणिरयणं एवं उज्झमाणे ग केणवि नूणमप्पणो असिवपसमणं संभा-
 वियं भविस्सइ, ता न जुत्ता रिक्ता चेव मंजूसा पवाहिउंति परिभाविऊण सन्निहियवणदुट्टमक्कडं तदम्भंतरे निक्खि-
 विऊण निविडं दुवारं च से वंधिऊण भगवइ जमुणे मा मे कुण्येज्जसित्ति भणिऊण पुव्वनाएण पवाहिया एसा,
 पावियसुरलोयसिरिसमुदयं व अप्पाणं मन्नतो तं कुवल्लयदलदीहरञ्छिं घेत्तूण गओ जहागयं, सावि मंजूसा जलेण
 बुज्झमाणी गया कोसमेत्तं, दिट्ठा य सुहंकरसीसेहिं, तओ नियगुरुणो विन्नाणाइसयं वन्नमाणेहिं नईमज्झे पवि-
 सिऊण आयद्धिया मंजूसा, उवणीया य गुरुणो, तेणवि असंभावणिज्जमाणंदसंदोहमुव्वहंतेण संगोविया गेहमज्झे,
 भणिया य नियसिस्सा-अरे अज्ज अहं देवयापूयं महया वित्थरेण भवणम्भंतरे ठिओ सव्वरयणिं करिस्साभि, ता
 तुभेहिं बाढं निविज्जणं कायच्चं, पडिबन्नं तेहिं, अह समागयंमि रयणिसमए मयरद्धयनिइयसरसहस्सपहारजजरिय-
 सरीरो पवरविलेवणकुसुमतंबोलप्पमुहोवगरणपरियरिओ पिहिऊण सयलगेहदुवाराहं तं मंजूसमुग्घाडित्ता एवं जं-
 पियं पवत्तो—

हे हरणिञ्छि! किसोअरि! पीणत्थणि! कमलवयणि! वरतरुणि!। पम्मुकुभयासंकं संपय मं भगसु दइयं व ॥१॥
 वच्चउ विगासमहुणा लोयणकमलं मणोरेहेहिं समं । सुयणु ! तुह संगमेणं मयणोऽवि मणागमुवसमउ ॥ २ ॥
 एत्थंतरंमि गाढावरोहसंजायतिववरकोवा । तणहाल्लुहाकिलंता अच्चंतं चावलोवेया ॥ ३ ॥

वणदुहुमक्कडी तडतडत्ति पुच्छच्छडाहिं ताडती । तत्तो विडंविद्यमुही नीहरिया घुरुहुंती सा ॥ ४ ॥ जुम्मं ।
आ कीस चंदवयणे ! करेसि रोसंति वाहरंतो सो । चुंवणवंछाए मुहं तदभिमुहं जाव संठवइ ॥ ५ ॥
पढमं चिय ताव तडत्ति तोडिओ तिकखदसणकोडीहिं । तीए नासावंसो मूलाओ चिय समग्गो सो ॥ ६ ॥
तयणंतरं च अइतियखनक्खनिवेहेण दारियं अंगं । आमूलाओ उम्मूलियावि सवणावि से ताए ॥ ७ ॥
अणिवारियपसराए एवं तीए हणिज्जमाषेण । तेण भयंकंपिरेणं वाहरियं गुरुसरेणेवं ॥ ८ ॥
रे रे धावह सिस्सा ! उग्घाडह मंदिरस्स दाराइं । एस पिसाईए अहं निज्जामि जमस्स गेहस्मि ॥ ९ ॥
इय एवं वाहरंतो भयवससंखुद्धमाणसो धणियं । तायारमलभमाणो नहदंसणुल्लिहियसव्वगो ॥ १० ॥
रोसुक्कडाए वणमक्कडीए पुणरुत्तघुरुहुंतीए । तह विणिहओ वरागो जह सो पंचत्तमणुपत्तो ॥ ११ ॥
अह उग्गयंमि दिणयेरे समागया तस्स सीसा, कया तेहिं सदा, न देइ सो य पडिवयणं, तओ विहाडियाइं
कवाडाइं, दिट्ठो विणट्ठजीओ सुहंकरो, सावि वणमक्कडी उग्घाडिएसु कवाडेसु पलाइज्जण गया जहागयं, सीसेहि-
वि असुणियपरमत्थेहिं कओ सुहंकरस्स सरीरसक्कारो ।

इय भो कुमार ! विसयाउराण अणुव्वल्लियट्ठणं । निवडंति आवयाओ पयडंचिय जेण भणियमिमं ॥ १ ॥
सहं कामा विसं कामा, कामा आसीविसोवमा । कामे पत्थेमाणा, अकामा जंति दुग्गइं ॥ २ ॥

मूलाओ साहेसु, तओ तेण सिद्धो नरिंदमंतिजणणुणुल्लवधुत्तंतो, तं च सोच्चा समुणन्नलज्जो कुमारो परिचितिउं पवत्तो-अहो अच्चंतमजुत्तमायरियं मए, जं तहाविहं कुलक्कमविरुद्धं कुणंतेण न गणिओ लोयण्णवाओ न वीमंसिओ धम्मविरोहो न य परिभाविंयं तायस्स लहुयत्तणं, एवं च ठिए कंहं विसिद्धपुरिसाण नियययणं दंसितो न लज्जामि, तम्हा न जुज्जइ इह निवसिउंति चित्तिऊण मज्झरत्तसमयंमि निब्भरपसुत्ते परियणे तोणीरं धणुदंडं च घेत्तूण पुव्व-देसाभिमुहं गंतुं पयट्ठो ।

इओ य-गयणवल्लहनयरे विज्जाहरन्ना महावेगनामेण पुट्ठो नाणसाराभिहाणो नेमिच्छिओ, जहा एयाए मह धूयाए वसंतसणाए को पई होहिति?, तेण? कहियं-जो सावत्थीनयरीनाहं कुसुमसेहरनारिंदं निय-भुयबलेण एगागी हयपरक्कमं काहिति, एवं सोच्चा विज्जाहरेण भणिया खेमंकराइणो विज्जाहरा-अरे गच्छह तुम्भे सावत्थि नयारिं, तहिं च ठिया जया एवंविहपरक्कमं पुरिसं पेच्छह तथा तं झत्ति घेत्तूण मम समण्णेह, जं देवो आणवेइत्ति सिरसा पडिच्छिऊण से सासणं गया ते तं पुरिं, सुरिंदत्तकुमारोऽवि एगागी नाणाविहदेसेसु परिम-मंतो पत्तो तामेव नयारिं, ठिओ य नयरीसमीववत्तिणो उज्जाणस्स एगंमि लयाहरे, तहिं च जाव पसुत्तो अच्छइ ताव कयवयचेडीयरिउडा कुसुमसेहरायमुया इओ तओ कीलंती कहवि कम्मविचित्तयाए एगागिणी पविट्ठा तमेव लयाहरं, दिट्ठो अण्णडिमरूवो पसुत्तो कुमारो, सा य तीए समुणन्नतिवाणुरागाए पडिबोहिऊण पारद्धो अणु-

कूलवयणेहिं उवसगिउं, नियमविगधकारिणित्ति कलिऊण निम्मत्थिया सा कुमारेण, कहं?—

पाविट्ठि दुठसीले! निक्कारणधम्मवेरिणि! तुमं मे। अवसर चक्खुपहाओ पज्जतं दंसणेण तुहं ॥ १ ॥

तुम्हारिणी संभासणेऽवि असणिव दारुणा पडइ। इहपरभवपडिक्कूला अच्चत्थमणत्थपत्थारी ॥ २ ॥

इय एवमाइवयणेहिं तज्जिया सा न जाव नीहरइ। ताव करे धेत्तूणं कुमारेण दढेण निच्छूढा ॥ ३ ॥

आ पाव! पावसि तुमं एत्तो पंचत्तमिति य जंपित्ता। कवडेण सयंचिय नहसिहाहिं उल्लिहियकायलया ॥ ४ ॥

सा दूरे ठाऊणं हलबोलं काउमेवमारद्धा। रे रे लयाहरगयं गेणहह पुरिसाहमं एयं ॥ ५ ॥

कुल्लुवइदूसिया जेण मज्झ एवंविहा कयावत्था। तमुवेहंता संपइ दंसिस्सह कह मुहं रत्तो? ॥ ६ ॥

एवं सोच्चा नरवइमुयाय वयणं परूढकोवेहिं। आरक्खियसुहडेहिं लयाहरं वेढियं झत्ति ॥ ७ ॥

कुमरोऽवि तीए हिययं व निट्ठरं पाणिणो धणुं धेजुं। तत्तो विणिव्खमित्ता तेसिं ठिओ चक्खुपसरंमि ॥ ८ ॥

ताहे तेहिं समगं पम्मुक्का चक्केसेल्लसरनियरा। छेयत्तणेण वंचाविद्या य सयला कुमारेण ॥ ९ ॥

तप्पहरणेहि य लहुं निहया गोमाउयव ते तेण। अह निमुणियवुत्तंतो रायावि समागओ तत्थ ॥ १० ॥

अंचंतजायकोवो जुज्झेणोवट्ठिओ सयं चेव। करितुरयरहारूढा विंथंमिया सुहडसत्थावि ॥ ११ ॥

तो चउदिसि पसरियउ सत्तुसिन्नु, पेक्खेवि अलुडु जिंव कुंभयन्नु।

आपीडियपरियरु सो कुमार, जुज्झणहं लगु सो दढणहार ॥ १२ ॥
 सरकाणियपक्खरुतुरयधट्ठ, सुसुमरियेवरियरुडमरट्ठ ।
 जसु संसुट्ठु किर जो खिवइ चक्खु, सो तक्खणि जायइ जमह भक्खु ॥ १३ ॥
 एगोऽविट्ठु भयवसकंपिमाण, सो णेरुव हूओ वेरियाण ।
 लक्खिज्जइ बाणसुयं तु केम्ब, जलधार सुयंतउ मेहु जेव ॥ १४ ॥
 उब्बद्धज्जूडभडभिउडिभीस, तिव्खंडिय सत्तहु सरहिं सीस ।
 तसुदारुणरणकम्मेण तुट्ठ, ओइन्ननहंणि तियसंवठ ॥ १५ ॥
 अवरोप्परुपेल्लिरि सुहडसत्थि, नासणह पयट्ठइ अइव हत्थ ।
 विवरंसुहि सावत्थीए नाहि, पवहंतइ नरुहिरप्पवाहि ॥ १६ ॥
 समरंगणि जोअइ जा कुमार, संचिट्ठइ रिउ अकयप्पहार ।
 ता पुव्व भणियविज्जाहरोहिं, अवहरिवि हरिसभरनिम्भरोहिं ॥ १७ ॥
 उवणीओ खयरनरनायगस्स, हरिस्ससंतसुहपंकयस्स ।
 अह आगयंमि सुदिणंमि तेण, परिणविओ कुमार वसंतसेण ॥ १८ ॥

सो तीए सहिउ पंचप्पयार, उवमुंजइ विसय अणन्नसार ।
अइनिच्चलु पालइ जिणह धम्म, दूरेण विवज्जइ पावकम्म ॥ १९ ॥
कालक्कमेण विसहय विरत्तु, पव्वज लेइ सुपसंतच्चित्तु ।

तवचरणेहिं झोसिउ पावकम्म, पच्चक्खु विरायइ नायधम्म ॥ २० ॥

अह ससहरनिम्मलु पाविवि केवलु, पडिबोहिवि चिरु भव्वजणु ।

सिवभइह नंदणु भवभयमइणु, वच्चइ निव्वइ वरभवणु ॥ २१ ॥

इय परदारनिवित्तीमित्तंपि अणुव्वयं पवन्नमिमं । एवंविहोत्तरोत्तरकल्लाणनिवंधणं होइ ॥ २२ ॥
भणियं चउत्थणुव्वयमेत्तो पंचमगमाणुपुवीए । सयलपरिग्गहपरिमाणकरणविसयं पयंपेमि ॥ १ ॥
दुविहो परिग्गहो सो थूलो सुहुमो उ तत्थ सुहुमो य । परकीएसुवि वत्थुसु ईसिं सुच्छाइपरिणामो ॥ ३ ॥

थूलो पुण नवमेओ धणे य धन्ने य खेत्तवत्थूसु । रुप्पसुवन्नचउप्पय दुप्पयकुविएसु सुणिअव्वो ॥ ३ ॥

इय नवमेयपरिग्गहपरिमाणं भावसारमादाय । पंचइयारविवज्जणपरायणो सावगो मइमं ॥ ४ ॥

खेत्ताइहिरन्नाईधणाइदुपयाइकुप्पमाणकमे । जोयणपथाणंबंधणकारणभावेहिं नो कुणइ ॥ ५ ॥

जो पुण अइलोभवसा भणिज्जमाणोवि गुरुजणेण वहुं । थेवंपि नो परिग्गहपरिमाणवयं पवज्जेइ ॥ ६ ॥

सो दविणाहनिमित्तं वचंतो दूरदेसनयरेसु । पविसंतोऽवि समुहे कुणमाणो विविहवसायं ॥ ७ ॥
 लामेऽविहु पइदिणवहुमाणधणवद्धणाभिलासो य । अचंतमहादुक्खं वासवदत्तोव पावेइ ॥ ८ ॥ विसेसयं तीहिं ।
 अह गोयमेण भणियं वासवदत्तो जिणिंद ! को एस ! जयगुरुणा संलत्तं सीसय ! सम्मं निसामेसु ॥ ९ ॥
 कणयखलंमि महानयरे सुवलयचंदो नाम सेट्ठी, तस्स धणा नाम गिहिणी, तेसिं अचंतवल्लभो सव्वकलाकलाव-
 निउणो वासवदत्तो नाम पुत्तो, सो य महारंभो महापरिगहो गरुडलभसंभवेऽवि महालोभसंगओ, अहोनिंसं दब्बो-
 वज्जणोवाए पयट्ठंतो कालं बोलेइ, तस्स य अम्मापिउणो अचंतसावगधम्मकरणसीलाणि जिणवयणायन्नणेण सुणि-
 यअविरइकडुविवागाणि तं नियपुत्तं अणवरयाणेणपावट्ठाणपसत्तं पलोइऊणं भणंति-वच्छ ! सुभिनोवमं जीवियं
 असारा विसया सकज्जाणुवत्तणमेत्ता सयणसंजोगा खणविपरिणामधम्मा रिद्धिसमुदया, अओ किंनिमित्तं न कुगसि
 धणधन्नखित्तवत्थुहिरन्नसुवन्नदुपयचउप्पयाइसु इच्छापरिमाणं, न वा परलोयसुहावहं समज्जिणेसि धम्मं, तहा
 वच्छ ! पिउपियामहपुरिसपरंपरागयं न माइ दब्बं, अओ निरत्थओ तदज्जणगाढपरिस्समो, अह अपुव्वं लंछिउ उवव-
 जिउमिच्छसि तहावि जहासत्तीए इच्छापरिणाममेव कल्लाणकारगमिच्चाइ बहुणपारवयणेहिं पन्नविज्जमाणोऽवि न
 पडिवज्जइ कम्मभारियत्तणेण एसो मणांगपि तद्वयणं, सच्छंदचारित्ति उवेहिओ अम्मापिऊहिं । अन्नया य देसंत-
 रागवणिया पुच्छया वासवदत्तेण-अहो किं तुमह देसे भंडमगवइ ? , तेहिं कहियं-अमुगंति, तओ तद्वयणनिसाम-

णचउगुणीभूयलोभाभिभूओ तद्देसोचियभंडनिवहभरियं सगडिसागडं गहिऊण पयट्ठो देसंतरं, निसिद्धो य वाढं जणणिजणगेहिं, तहावि न ठिओ, एवं च सो अणुदिणं वच्चतो गओ तामलित्तं नयरिं, विणिवट्ठियं भंडं, समासाइओ दसगुणो लाभो, वियंभिओ य अच्चंतलोभसागरो, जाया बहुयथरा तदज्जणवंछा, अन्नदिवसे य दुवारगएण तेण दिट्ठाइं दूरेदसागयाइं विविहसारवत्थुभरियाइं जाणवत्ताइं, ताणि य पेच्छिऊण पुच्छिओ तच्चाणियगो अणेणंभो महायस ! कत्तो आगयाइं एयाइंति ? तेण जंपियं—कलहदीवाओ, वासवदत्तेण कहियं—भइ ! इहच्चभंडेण तरथगएण केत्तिओ संपज्जइ लाभो ? तेण भणियं—वीसगुणो, वासवदत्तेण जंपियं—किं सच्चमेयं ? तेण कहियं—अज्ज ! किमसच्चभासणे फलं ? एवं च निसामिऊण वासवदत्तेण भाडियाइं जाणवत्ताइं भरियाइं विविहकंसदोसभंडस्स, पट्ठिओ कलहदीवाभिमुहं,

अह परियणेण भणियं—चिरं विमुक्काण जणणिजणगाणं । होही दढमणुतावो सामिय ! तुम्हं विओगंमि ॥ १ ॥

ता सारिज्जउ गेहं सम्माणिज्जंतु सयणवग्गावि । पुणरवि अत्थोवज्जणकरणे को वारिही तुम्हं ? ॥ २ ॥

इय भणिए सो रुद्धो निट्ठुरवयणेहिं भणिउमाढत्तो । रे तुम्ह कोऽहिगारो एवंविह भाणियव्वंमि ? ॥ ३ ॥

न तुमाहिंतोवि अहं जुत्ताजुत्तं मुणेमि किं पावा ! । लद्धावयासया अहव किं न भिच्चा पयंपति ? ॥ ४ ॥

एवं खरफरुसगिराहिं तज्जिया तेण तह अदोसावि । लज्जामिलंतनयणा जह ते भोणं समल्लीणा ॥ ५ ॥

तेणावि सायरे पवाहिथाई जाणवत्ताई, सिग्धवेगेण गंतुं पयत्ताणि, कयेण पत्ताई कलहदीवं, उत्तारियं तेहिंतो भंडं, विक्रिणिंयं च, जाओ नहुओ लाभो, ठिओ य कइयथासराई, गहिया मणिमोत्तिवसंखपट्टुत्तपमुहपहाणकया-
णगाई, तओ पयट्टो तामलित्तिसंमुहं, इतस्स य जलाहिमज्जे दंसिओ निजामगेहिं तस्स रयणदीवो, कोउहल्लेण पुच्छिया
अणेण-अरे किमिह उप्पज्जइ?, निजामगेहिं भणियं-कक्केयणपउमरागवज्जिंदनीलाइणो महारयणविलेसा ते इह
उप्पज्जंति, तेसिं समीवधरणमेत्तेण विहवइ संददारिहोवद्दो, न पासंमि परिसप्पइ दप्पुब्भडो सय्यो, न नियडम-
क्कमइ चंडावि डाइणी, खिल्लियमुहोव न कइयमुल्लवइ खलयणोवि, तओ अपरिकलियविणासेणं जायतगहणगाढा-
भिलासेण भणियं वासवदत्तेण-अहो निजामगा! जइ तत्तो हुत्तं नेह मह नावं तो चउग्गुणं देवि भे वित्तिं, तेहिं
भणियं-निजइ, केवलं उवलपडलाउला भूमी, जइ कहवि नावा भंगं पाविज्जा ता सव्वनासो जाएज्जा, तओ ईसि
विहसिज्जण वासवदत्तेण भणियं—

जइ गयणं निवडेज्जा पल्लहेज्जा रसायले पुढवी । कुलगिरिणो य सपक्खा होउं व महीए वजेज्जा ॥ १ ॥
जलनिहिणो वा वेलाए महियलं सव्वओवि बोलिज्जा । जणणी वा नियपुत्तं हणेज्ज पढमप्पसूयंपि ॥ २ ॥
ता रत्नंपिक्ख सुन्नं होज्ज जयं किं तुं हवइ नो एयं । नय सव्वहावि अघडंतमेरिसं वित्तिउं जुत्तं ॥ ३ ॥
जो पुण इय वित्ताए पयट्टए सो धुवं महासुद्धो । करकमलगोयगयं लब्धिं हारेज्ज किं चोजं ? ॥ ४ ॥

ता मेल्लह कुविगणं नावं पेलेह दीवयाभिमुहीं । उच्छिदह दारिद्रं आचंदं रयणगहणेण ॥ ५ ॥
 एवं च तेण कहिए पणट्टविणिवायभएहिं निज्जाभगेहिं पवाहिया तदभिमुही नावा, जाव य केत्तिथं पि विभाणं
 गया ताव समुट्ठिओ महामगरो, तेण य मंदरमंथेणव महियं जलहिजलं, उच्छालिया पयंडकल्लोला, तदभिघाएण
 भिन्ना सयसिक्करा नावा, निवुड्ढो अत्थसारो, खरपवणपहओ पलालपूलउव्व दिसो दिसि पलीणो परिणो, वासव-
 दत्तोऽवि कहकहवि समासाइयफलहखंडो वेलाजलेण वुज्झमाणो पाविओ सायरस्स पारं, कंठगगयजीविओ य
 दिट्ठो एमेण तावसेणं, तेणावि करुणाए नीओ निययासमे, काराविओ कंदमूलाइणा पाणवित्तिं, वीसंतो कइवय-
 वासराइं, समुवल्लद्धसरीरावट्ठंभो य पट्ठिओ नियनयराभिमुहं

इओ य तस्स अम्मापिउणो परलोयं गयाइं, जाया य नयरंमि वत्ता, जहा-वासवदत्तोवि समुहे वोहित्यभगेण
 विणासं पाविओ, ओच्छिन्नसामियंतिकाऊण गहियं धणकणसमिद्धं पि तम्मंदिरं नरिंदेण, वासवदत्तोऽवि संबलरहि-
 यत्तणेणं धणविणाससमुत्थसोगेण य किलंतदेहो महाकट्टकप्पणाए संवच्छरमेत्तकालेण संपत्तो कणगखलनयरं, पवि-
 सिउमारद्धो य नियमंदिरं, एत्थंतरे उग्गीरियदंडा पधाविथा नरवइनिरूविथा धरारक्खगपुरिसा, भणिउं पवत्ता-
 अरे कप्पडिय ! घरसामियच्च निब्भओ कीस इह पविससि?, किं न याणसि इमं रण्णो गिहं?, तेण भणियं-कि-
 मेयं कुवल्लयचंदसेट्ठिणो न भवइ?, तेहिं कहियं-हंत हुंतं पुव्वकाले, संपयं पुण असाभियंति रत्तो जायं, तेण भणियं-

अरे ! कहं मइ जीवते असाभियंति बुच्चइ ? , किमहं कुवल्यचंदसेट्ठिणो पुत्तो वासवदत्तो तुब्भेहिं नो सुणिओ न वा दिट्ठोत्ति वुत्ते किं रे ! मिच्छा पलवसित्ति निब्भच्छिऊण कंधराधरणपुव्वयं निद्धाडिओ सो तेहिं मंदिराओ, गओ य एसो सयणाणं समीवे, तेहिंवि मा पुव्वेदेयं दव्वं मग्गिस्सइत्ति कुविगप्पेण पच्चभिजाणेतैहिंवि न नयणमेत्ते, णावि संभाविओ, गहिलोत्ति कलिऊण रत्तावि उवेहिओ ।

अहं गेहसयणधणनासपमुहदुहजलणजालपजलिओ । सो चित्तिउं पवत्तो विवन्नलायन्नदीणसुहो ॥ १ ॥
कह अकलियपरिसंखं पुरिसपरंपरसमागयं दव्वं ? । कह वा समुयवलेण य विटत्तयं तं च अइवहुयं ॥ २ ॥
एक्कपयं चिय सव्वं निन्नट्ठं मज्झ मंदभग्गस्स ? । हा ! किं करोमि संपइ ? पुव्वं व हवेज्ज कह व धणं ? ॥ ३ ॥
एमाइविचित्तविकपकप्पणुपपन्नचित्तवामोहो । उम्मत्तयं उवगओ हिंदतो नयरत्थासु ॥ ४ ॥
चिरकालमाउयं पालिऊण बहुरोगसोगसंतत्तो । अट्टज्झाणोवगओ मरिउं तिरियत्तणं पत्तो ॥ ५ ॥
इय गोअम ! जीवाणं परिग्गहारंभवरइरहियाणं । निवडंति आवयाओ जं तेणमं गुणकरंति ॥ ६ ॥
पंचवि अनुव्वयाइं सोदाहरणाइं ताव कहियाइं । एत्तो गुणव्वयाइं तिन्निवि लेसेण साहेमि ॥ १ ॥
उट्ठाहोतिरियदिसिं चाउम्मासाइकालमाणेणं । गमणपरिमाणकरणं गुणव्वयं होइ पढममिह ॥ २ ॥
वज्जइ उट्ठाइक्कममाणयणप्पेसणोभयविसुद्धं । तह चेव खेत्तवुद्धिं कहिंवि सइअंतरद्धं च ॥ ३ ॥

एयंमि निरइयारं दिसिद्वए भावओ पवत्तंमि । होइ सिरी मोक्खोविय जिणपालियसावगस्सेव ॥ ४ ॥

गोयमसामिणा भणियं-जयनाह ! को एस जिणपालिओ ? , सामिणा कहियं-भो ! निसुणेसु पुंडवड्डुणनयरे विक्रम-
सेणो राया, मयणमंजूसा से पट्टमहादेवी, सुबुद्धी अमच्चो, तत्थ य नयरे जिणभावियमणो जिणदत्तसेट्ठिस्स सुलसाए
भारियाए पुत्तो जिणपालिओ नाम सावगो परिवसइ, तेण य गुरुसमीवे दिसागमणपरिमाणव्वयं गिणहंतोण
पन्नासं पन्नासं जोअणाइं चउसुवि दिसाए मुक्काइं, एवं सो उत्तरोत्तरगुणब्भासं कुणमाणो अच्छइ । इओ य विक्क-
मेसेणनराहिक्खस्स पंचतदेसवत्ती सीहसेणो नाम भिष्साहिक्खइ देसं विद्दविउमाढत्तो, तस्स य उयरि महया संभेण
हरिकरिरहजोहवूहपरिगओऽविकखेवण चलिओ विक्रमसेणो, भणिओ य सुबुद्धिणा अमच्चेण-देव ! किं तस्स गो-
माउयस्स उवरिं तुम्हे विजयजत्तं करेह ? , तुम्ह पयपयावपडिहयपरक्कमस्स का तस्स सत्ती ? , ता नियत्तह नयरी-
हुत्तं देह ममाएसं जेण तहा करेमि जहा पडिच्छइ सिरेण सो देवस्स सासणंति वुत्ते चउरंगिणीसेणासणाहो
पेसिओ अमच्चो, सीहसेणोऽवि तं सबलवाहणं इंतं चारपुरिसेहितो नाऊण विसमगिरिकडगं घेत्तूण ठिओ, अम-
चोऽवि तहाठियं पेच्छिऊण जुज्झिउमपारयंतो तमेव गिरिकडगं परिवेढिऊण तत्थेव आवासिओ, दुग्गममग्गत्त-
णओ य धन्नघयाइं महरघीहूयं सिबिरे, जणपरंपराए य निसुणियमेयं जिणपालिएण, तओ भूरिघयमारियदोद्वियाणं
करभेसु समारोविय वणियजणसेभओ चलिओ सो सिबिराभिमुहं, सो य सीहसेणो दुग्गे निरुद्धजवसाइपयारो

अच्छिउमचायंतो सारधणं करितुरयसाहणं च समादाय पलाणो रयणीए, मुणियवित्तंतो य अमच्चो लग्गो तस्स अनुमगेण, नासंतो य दस जोअणे गंतूण वेढिओ सव्वतो अमच्चसन्नेण, तओ सो सीहसेणो वहलतरुवरहणंमि गिरि-
निकुंजं निस्साए काज्ज ठिओ, इओ य जिणपालिओ पुवावासियसिबिरसंनिवसं पत्तो समाणो दिसिपरिमाणं चित्ति-
ऊण भणइ-अहो किमहमिणिह करेमि?, पन्नासं जोयणाई मे परिमाणं, तं च इत्तियमेत्तेणं चिय पडिपुन्नप्पायं, सेन्नं
च दसहिं जोयेणेहिं दूरीभूयमियाणिं, ता वलिस्साभि पच्छाहुत्तं, न कोसमेत्तपि एत्तो वच्चिस्साभि, सहाइणा वलिय-
लोणेण भणियं-अहो! मा मुहा अत्थहाणिं करेहि, तत्थ गयस्स तुह पभूयदविणलाभो जायइ, तेण भणियं-अलाहि
तेण देवेणं जं नियमखंडणाए संपज्जइ,

अह तस्स नियमनिच्चलचित्तपरिक्खट्टया सुरो एणो । कयउब्भडसिंमारो सव्वत्तो पुरिसपरिअरिओ ॥ १ ॥
सत्थाहिवरूवधरो सुरलोआओ समोअरेऊणं । पचासन्नो ठाउं पयंपिउं एवमाढत्तो ॥ २ ॥
हंहो सावय ! नो कीस एसि तं सप्पिविक्कयनिमित्तं ? । जिणपालिएण भणियं वयंभंगो हवइ जइ एसि ॥ ३ ॥
देवेण जंपियं सुट्ठु वंचिओ तंसि वुत्तलोएण । जो कुग्गेहेण हारसि करट्ठियंपि हु महालाभं ॥ ४ ॥
अहवा वयस्स भंगे पायं होइत्ति तुज्झ संकप्पो । ता तल्लामेणं चिय पायच्छित्तं चरेज्जासु ॥ ५ ॥
जिणपालिएण वुत्तं अहो किमेवं अणगगलं वयसि ? । वञ्चति धम्मगुरुणो कयाइ किं भवसत्तज्जणं ? ॥ ६ ॥

हंत ! जइ तेऽवि वंचति कहवि ता किं न चंदविबाओ । अमयमथाओ निवडइ पलित्तगयणानलकणोली ? ॥ ७ ॥
 किं वा न सूरविंवे विप्फुरमाणेऽवि तिमिरसंभारो । भरियमुवणंतरालो विथरइ रथणिं अकालेऽवि ? ॥ ८ ॥
 तां भइ ! नेव जुज्झइ गुरुहुत्तं तुज्झ जंपिउं एवं । अच्चंतपावजणगत्तणेण मज्झंमि नो सोउं ॥ ९ ॥
 जं च तए भणियमिमं वयलोवसमुत्थपावसमणत्थं । पायच्छित्तं पच्छा सेविज्जाहिति तमजुत्तं ॥ १० ॥
 जं पढमंपि न जुज्झइ तं काउं जत्थ होइ वयलोवो । लुत्ते य तत्थ विहलो पायच्छित्ताइवावारो ॥ ११ ॥
 सहसक्काराणाभोगओव वयमयलणंमि पच्छित्तं । पढमं चिय जाणंतो जो लोवइ तस्स तं विहलं ॥ १२ ॥
 इय भणिए सो देवो रंजियचित्तो विसिट्ठरूवधरो । चलियमणिंकुंडलामलमऊहविच्छुरियगंडयलो ॥ १३ ॥
 ससिणेहं जोडियपाणिसंपुडो भणिउमेवमाढत्तो । धन्नो सि तुमं सावय ! वयंमि जो निच्चलो एवं ॥ १४ ॥
 देवोऽहं तुह सत्तं परिकिखउं संपयं समणुपत्तो । परितुट्ठो य इयाणिं ता भण किं ते पयच्छामि ? ॥ १५ ॥
 जिणपालिएण भणियं जिणसुणिपयपूयणाणुभावेण । सच्चंचिय परिपुन्नं न मग्गियवं किमवि अत्थि ? ॥ १६ ॥
 ताहे सुरेण कहियं जस्सेरिस निच्चलत्तणं धम्मो । सो तं कयकिच्चो नणु तहावि ममणुगहट्ठाए ॥ १७ ॥
 विसदोसहरणदक्खं रयणमिमं गिणह तं महासत्त ! । एवं तमप्पिऊणं देवो अहंसणं पत्तो ॥ १८ ॥
 जिणपालिओऽवि गहिऊण तं गहिऊण घयाइभंडं च । इयरवणियाण दाऊण गओ सनयरं, तत्थ य जाव

कइवि दिवसाणि अच्छइ ताव अन्नदिवस सा नरिंदभज्जा मयणमंजूसा वासभवणांमि सुहपसुत्ता खइया विसहरेण,
तक्खणेण य निच्चिद्धा जाया, समाज्जलीहूओ विक्कमसेणो राया, वाहराविया गारुडिया, पउत्ता तेहिं मंतततोवयारा,
न य जाओ कोऽवि विसेसो, तओ पच्चक्खाया तेहिं, नरिंदेणवि गाढनेहमोहिण्ण नीणाविओ पडहणो, उग्घोसाविंयं
च, जहा-जो देविं उट्टावेइ तस्स अद्धं गामनगरसमिद्धस्स रज्जस्स देमिच्चि, इमं च पडहगताडणपुब्बयं उग्घोसिज्ज-
माणं सुणियं जिणपालिण्ण, तओ निवारिओ-अणेण पडहणो, देवसमप्पियरणं गहाय गओ नरिंदमंदिरं, रयणा-
भिसगसल्लिपणविहिणा विगयविसविगारा कया देवी, सुत्तपबुद्धं समुट्ठिया सयणीयाओ, तुट्ठो राया, दाउमारद्धो
य रज्जद्धं, जिणपालिण्ण जहोचियं घेत्तूण सेसं पडिसिद्धं, रायावि से निलोभयं दट्ठूण पडिबुद्धो देवीए समं सावणो
जाओ, जिणपालिओऽवि संपुन्नघणवित्थारो चेइयसाहुपूयारओ सम्मसुभयलोगसफलं जीवियं काज्जण भओ सममाणो
परंपराए मोक्खसोक्खभागी जाओत्ति ॥

इय गोयम ! दिसिवयपालणाए अइयारंपंकमुक्काए । हुंति विसिद्धसुहकरा गुणनिवहा इहपरभवसु ॥ १ ॥

भोगपरिभोगपरिमाणकरणमेत्तो गुणव्वयं बीयं । तं भोगणओ तह कम्मओ य दुविहं मुणेअव्वं ॥ १ ॥

भोगणओ पडिवेन्ने इमंमि वज्जेज्जणंतकायाई । पंचुवरि महुमेरयं च रयणीयभत्तं च ॥ २ ॥

सच्चित्तं पडिबद्धं अपउलदुण्णउल तुच्छभक्खणयं । भोगणओ अइयारा वज्जेयद्वा इमे पंच ॥ ३ ॥

कम्मयओ पुण एत्थं पडिवन्ने सव्वमेव खरकम्मं । वज्जेअध्वं निच्चं किं पुण इंगालकम्ममाइं ? ॥ ४ ॥
 इंगाली वणसाडी भाडी फोडी सुवज्जए कम्मं । वाणिज्जं चेव य दंतलक्खरसेकेसविसविसयं ॥ ५ ॥
 एवं खु जंतपील्लणकम्मं निल्लणं च दवदाणं । सरदहतलायसोसं असइपोसं च वज्जेज्जा ॥ ६ ॥
 दुविहपयारं च इमं जहभणियविहिए पालमाणाणं । धन्नाण भवभयं नेव होइ रविपालयाणं व ॥ ७ ॥
 इंदभूइणा वागरियं-भयवं ! के इमे रविपालया ? जयगुरुणा भणियं-कहेमि, एत्थेव जंबूदीवे दीवे भारहे खेत्ते
 कोसलविसयप्पहाणे दसपुरंमि नगरे नरिंदसम्मथा माहणकूलसंभूया चउहसविज्जाठाणपारगा दोन्नि भायरो रवी
 पालगो य परिक्खंसति, अन्नथा य गामाणुगामं विहरमाणा बहुसिस्सगणपरिवुडा विजयसेणाभिहाणा सूरिणो
 समागया, ते य तेसिं जाणसालाए अणुजाणाविज्जण ठिया वासारत्ते, ते य दोवि भायरो सूरिसमीवे धम्मवीसंसाए
 समांगंतूण भणंति-भयवं ! भणह नियधम्मं, सूरिणा भणियं-आयन्नह—

जीवदयापरिणामो सव्वन्नुनिवेइयऽत्थपडिवत्ती । परिगहपरिमाणं चिय एसो धम्मो समासेण ॥ १ ॥
 तेहिं कहियं-भयवं ! जीवदयापरिणामोत्ति जं तुम्हेहिं बुत्तं तं न घडेइ, जओ जन्नकज्जे पसुविणासोऽवि धम्म-
 त्तणेण निदिट्ठो, तहा सव्वन्नुनिवेइयत्थपडिवत्ती एयंपि न सुंदरं, सव्वन्नूणं वेदे अकहणाओ, जं च परिगहपरि-
 माणंति बुत्तं तंपि निरत्थयं, जेसिं वराडियामेत्तंपि नत्थि तेसिं विफलमेव परिगहपरिमाणकरणं, विज्जमाणपयत्थे

चेव तस्स गुणकारित्तणओ, गामसञ्भावे चिय सीमासफलत्तणओत्ति, तम्हा अन्नं किंपि धम्मं परिकहेसु, सूरिणा भणियं-आउसंतो ! न जुज्झइ तुम्ह एवं वोत्तुं, जओ इहलोयपडिबद्धुरिसवयणभयं जन्नकज्जे पसुविणासो धम्मोत्ति, कहमेयंति ? , बुच्चइ-‘आत्मवत् सर्वभूतानि, यः पश्यति स पश्यती’ति पारमार्थिकसुनिवचनात्, जइ पुण जीववि-णासे धम्मो ता मच्छब्धलुद्धयाइणो सगंमि वच्चेजा । जं च सव्वन्नणो वेदेसु न कहियत्ति वुत्तं तंपि वेयरहस्सा-निसामणाओ, यतस्तत्रैव शान्त्युद्घोषणाप्रस्तावे उक्तं—‘लोकप्रतिष्ठितान् चतुर्विंशतिं तीर्थकरान् ऋषभाद्यान् वर्धमानान्तान् सिद्धान् शरणं प्रपद्यामहे । ॐ पवित्रमग्निं उपस्पृशामहे, येषां जातं सुजातं येषां वीरं सुवीरं येषां नम्रं सुनम्रं ब्रह्म सब्रह्मचारिणो उचितेन मनसा अनुदितेन मनसा देवस्य महर्षिभिर्महर्षयो जुहोति, याज-कस्य जनस्य च एषा रक्षा भवतु शान्तिर्भवतु वृद्धिर्भवतु तुष्टिर्भवतु स्वाहा ” एवं च पसिद्धेसु सवत्थपइट्ठिएसु सव्वन्नसु अभावकप्पणं महासंमोहो । जं च कहियं विज्जमाणपयत्थे चेव परिमाणं जुज्झइ एयंपि अणुचियं, असंतेवि अत्थे आसवनिरोहभावाओ पच्चक्खाणं गुणकरं चेव, ता भो महाणुभावा ! असेसदोसगिसमणघणसरिसं सव्वन्नमयं अमयं व पियह अजरामरत्तकरं, सुंचह मिच्छत्तमोहसंपसूयं कदासयविसेसं, मज्झत्थत्तणभवलंविऊण चित्तेह पर-मत्थं, जच्चकणगं व कसल्लेयतावपमोक्खवहुपरिक्खाहिं सुपरिक्खऊण धम्मं सम्मकरं सम्ममायह । एवं च सूरिणा पन्नत्ते लहुकम्मयाए पडिबुद्धा ते महाणुभावा, पडिबुद्धो भावसारं जिणधम्मो, गहियाइं अणुवयाइं, ‘अंगीकयाइं,

तिन्निवि गुणद्वयाहं, पालिति य सबजत्तेण । अन्नया य रविमाहणस्स भोग्यं कुणमाणस्स उवरिद्धियवरकोइल्लगेण कओ
 उच्चारो, वविखत्तचित्तत्तणओ न सुणिओ अणेण, तम्मिसभोग्यकरणे य पवडियं से उयरं, खीणाहं भंससोणियाहं,
 तणुइहूयाओ बाहाओ, सुक्काओ जंघाओ, सुसियं वयणं, वड्डिया तणहा, जाओ सावसेसाउओ, दंसिओ य पालएण
 विज्जाणं, तेहि वि असज्झोत्तिकाऊण पच्चक्खाओ एसो, एवं च विसमदसावडियं तं पलोइऊण झूरइ परिणो,
 रौवइ भारिया, बहुप्पयाहं विलवइ पालो, सो य अदीणमाणसो सम्ममहिहयासेइ, अन्नवासरे य समागओ एगो
 देसंतरविज्जो, तस्स सयणवग्गेण दंसिओ रवी, तेणा वि संमं पलोइऊण भणियं-अहो कुडुधिरोलियापुरीससंभवो
 एस दोसो, ता पंचुवरिफलाहं समभागाहं चित्तगरोज्झमंसंभीसियाहं सुराए वट्टिऊण देह जेण सिग्घं पसमइ
 महोदरवाही, रविणा भणियं-भो भो वेज्जा ! भोग्यओ वीयगुणद्वयपरिमाणं कुणतेण पच्चक्खायं मए एयं, वेज्जो
 सयणवग्गो य भणइ-पगुणीभूयसरीरो सोहिं करेज्जासु, तेण कहियं-जराद्युणज्जरियविसरारुसरारपंजरासारयं
 जाणंतो नाहं मरणे वि एयमायरा मि, एवं च उज्झिओ वेज्जेण । अन्नमि य वासरे जाव सो निसन्नो एगंतदेसे अच्छइ
 ताव पेच्छइ वसहमुत्तमज्झे निवडियं घरकोइलगं, तक्खणं विय विणस्संतं च पेच्छिऊण चित्तियमणेण-अहो जहा
 एयं कोइलगविणाससमत्थं तथा तं दुट्ठं विसविगारमवि हणिउमलं, तम्हा जुज्झइ भज्झ एयं पाउंति परिभाविऊण
 सुमुहुत्ते णमोक्कारसुमरणपुरस्सरं वसहमुत्तं पीयमणेण, अह धम्मपभावेणं वेयणियखओवसमजोगा ओसह-

माहृण्येण य जलोदरं से पसंतंति, जाओ पुणन्नवंगो, जयइ जिणिंदस्स धम्मसामत्थं, इय सव्वत्थ पवाओ वित्था-
रिओ नयरलोएण

सो य पालगो तन्नयरसामिणा भणिओ जहा ममामच्चत्तणं पडिवज्जसु, पालगेण भणियं-देव ! मए खरकम्माणं
बलाहियत्तारक्खिगतपमुहाणं नियमो कओ, राइणा भणियं-किं कारणं ? तेण कहियं-देव ! न जुत्तमेयं सावगाणं,
जओ तत्थ निउत्तेहिं जणो पीडियवो, परच्छिद्वनिहालणं कायव्वं, नरेदचित्तावज्जणपरोहिं सव्वण्ययोरेण दव्वमुप्पाय-
णिज्जं, तं च न जुत्तं पडिवन्नवयाणंति, रत्ता भणियं-दुट्ठाण सिक्खणे साहूण पालणे किमजुत्तं ? पालयेण जंपियं-
देव ! को एवं मुणइ-एस दुट्ठो एसो साहुत्ति, जओ अवराहस्स कारीवि अत्तणो साहुत्तणमेव पगासेइ, न य अपडिवन्न-
दोसो विणासिउं पारियइ, कयाइ पिसुणोवणीओ साहूवि परिहम्मइ, तम्हा अइसयनाणसज्जं दुट्ठनिगहसिदुपालणं,
अणइसइणा कीरंतं विवज्जासंपि जाएज्जा, एवं च भणिए पयंडसासणत्तणओ रुट्ठो राया भणिउमाहत्तो य-अरे
बंभणाहम ! वेयपुराणपइट्ठियं बंभणत्तं परिहारिय धम्मंतरं कुणमाणो मूलाओ च्चिय निगहट्ठाणं तुमं विसेसओ
इयाणिं ममाऽऽणालोवपयट्ठो, ता न भवसि संपयंति भणिऊण आणत्तो वज्जो, नीओ मसाणभूमीए, समारोविउ-
मारद्धो सूलाए, एत्थंतरे तप्पएसोवगएण दिट्ठो वाणमंतरेण, दढधम्मोत्ति जायाणुकपेणं तेण सूलाठाणे कयं कण-
यसिंहासणं, तेहि य रायपुरिसेहिं पहाओ खगपहारोहिं, देवणभावेण य पहारट्ठाणेसु समुट्ठियाणि गेवेयपमुहाणि

आभरणाणि, निवेद्यं च रत्नो, अह भयसंभ्रमणो राया सयमेव परियणसमेओ तस्स सगासोवगओ कयंजली भणिउमाढत्तो-भो भो सद्धम्मपरैक्कचित्त ! जं निन्निमित्तमवि मोहा एवंविहं अवत्थं उवणीओ तं खमसु मज्झ, एवं च सुचिरं पसाइऊण करेणुगाखंधे समारोहिऊण य महाविभूइए पवेसिओ नधरे पालओ, जहोचियं तंबो-लाइणा संमाणिऊण पेसिओ सगिहं, परितुट्ठो जेट्टभाया, कयं वद्धावणयं । अवरवासरे य पालगेण भणियं-हे साय ! सब्बधुम्ममाहुणमेयं जं वसहसुत्तमेत्तेणवि तुह पसंतो जलोयरवाही, ममावि निक्कारणमेव कणयसिंहासणत्तेण परिणया सूलिगा, पहारावि जाया आभरणत्तेणं, ता सुच्चउ गेहवासवासंगो, अंगीकीरउ एत्तो सबविइ, को हि नाम सुणियामयपाणगुणो विससलिलं पाउमुच्छहेज्जा ? रविणा भणियं-एवं होउ, तओ ते दोवि थेराणं अंतिए पव्वजं गहाय समाराहिथसंपुन्नसमणधम्मा सुरसिक्खसुहभायणं जायत्ति ॥

इय इंदभूइसुणिवर ! वीथगुणव्वयमिमं विनिहिट्ठं । एत्तो तइयं वोच्चइ अणत्थदंडस्स विरइत्ति ॥ १ ॥

सो पुण अणत्थदंडो नेअव्वो चउव्विहो अवज्झाणो । पमयायरिए हिंसप्पयाण पावोवएसो य ॥ २ ॥

कंदप्पे कुक्कुइए मोहरियं संजुयाहिकरणं च । उवभोगपरीभोगाइरेगयं चेत्य वज्जेइ ॥ ३ ॥

जेऽणत्थदंडविरया न हुति तेऽणत्थगाइं जंपता । पावंति धुवं मरणं लोइयकोरिट्ठयमुणिव्व ॥ ४ ॥

जो पुण एसो कोरिट्ठो मुणी जह व मरणमणुपत्तो । तह संपय सीसंतं सबं गोयम ! निसांभसु ॥ ५ ॥

सालिसीसयंमि गामे भहिलो नाम माहणो, सोमदिना य से भारिया, तेसिं च कोरिटो गो नाम पुत्तो अंचतवि-
रुवो, कहं?—

सुहवाहिविणिग्गयदीहविरलदंतग्गभग्गउडुडो । करहसिसुपुच्छसत्थविण्णुट्टुमुहरोमदोपेच्छो ॥ १ ॥

मज्जारकक्कडच्छो अइटप्परकन्नघोरजुयलिवखो । अंचंतकविलदेहो पायडदीसंतनसजालो ॥ २ ॥

संपजंततहाविहभोयणजायंतउदरपुरोऽवि । कयमासुववासो इव अंचंतं किसियसवंगो ॥ ३ ॥

इय सो पुव्वक्कियकम्मदोसओ गाममज्झयारम्मि । दुइसणत्तणं हीलाठणं परं जाओ ॥ ४ ॥

एयारिसे य तम्मि जोव्वणपत्ते जणणिजणगेहिं चित्तिं—कहं एस कलत्तभोगी भविस्सइ?, जओ सव्वायरम-
गिययावि न सग्गामवासिणो दिति एयस्स कन्नयंति । अन्नया दूरयरगामवासिणो बंभणस्स बहुकुमारी बहुदविण-
दाणपुव्वयं वरिया अणेहिं से निमित्तं, जाए य लग्नसमए कोरिटं कयसिंगारचारुवेसं समादाय गयाइं तत्थ, तत्थ
पारद्धो विवाहोवक्कमो, रइया वेइगा, पज्जालिओ घयमहुसणाहो हुयासणो, पइविट्ठो वेइगामंडवंसि कोरिटो,
तक्खणं चिय दिट्ठो तीए बहुकुमारीए, तं च पलोइऊण सचमक्कारं भणियमणाए—

अहह किमेस पिसाओ इहागओ? अहव रक्खसो वावि? । किं वा कयंतपुरिसो? नहु नहु तत्तोऽवि भीमयो ॥ १ ॥
सहि! पेच्छ पेच्छ कीलेव्व विलइओ दिव्वसूणसमूहो । एयंमि पावरूवे कहमवि नेवावहइ सोहं ॥ २ ॥

पारद्धंमि विवाहे लक्खिज्जइ एस धूमकेउव्व । ता भायइ मज्झ मणो सहसा एयंमि दिट्ठमि ॥ ३ ॥ .

सहिंए भणियं-सुयणु ! मा एवमुल्लवसु, एसो तुज्झ पाणनाहो भविस्सइ, तीए भणियं-सहि ! सच्चमेयं ? , एस मे पाणनाहो भविस्सइ ? , तीए भणियं-सहि ! सच्चमेयं होही ? , सहिंए भणियं-को इत्थ विब्भमो ? , वड्डुकुमारीवि जइ परं पराभवित्ति भणिज्जण विसायवसविसप्पमाणतिवसंतावा सणियं सणियमवक्कमिज्जण जणमज्झयाओ पुरोहडा-वडंमि निवड्डिया वेगेण, तओ जाव इओ तओ समीवट्ठियजणविमुक्कहाहारवनिसामणेण धाविओ उत्तारणत्थं जणो ताव अइपरसलिलत्तणेण कूवस्स अवस्संभवियव्वयाए विणासस्स मया एसा, विगयजीविया य बाहिं पक्खित्ता कूवयाओ, कओ से सरीरस्स सक्कारो, ताणि य कोरिंणजणजणगाइणि जणेण हील्लिजमाणमणि गयाणि स-मामं, भणिओ य तेहिं एसो-वच्छ ! कोरिंण तुह परिणयणनिमित्तं न सो कोऽवि उवाओ जो न कओ; केवलं तुह कम्मपरिणइवसेण सव्वो विहलत्तणं पत्तो, ता मा सुणिहिंसि जहा अम्मापियरो ममं उवेहगाणित्ति, तेण भणियं-पुव्वकयकम्ममेव एत्थ अवरज्झइ, का तुम्ह उवेहा ? , जइ खुज्जओ दूरमूसवियवाहूवि फलं न पायइ ता किं कप्पतरुवरस्स वयणिज्जंति ? , एवं च तेसिं परोप्परोल्लावेण जाया रयणी, अह तेसु निब्भरपसुत्तेसु परमं चित्तपरितावमुव्वहंतो कोरिंणो नीहरिओ गेहाओ, पयट्ठो तित्थदंसणत्थं, कमेण य दट्ठण सयललोइयतित्थाइं ग-हिया अणेण कावालियतवस्सिदिक्खा, सुणिओ तहरिसणाभिप्पाओ, सिक्खियाइं भूमिलक्खणपमुहाइं विन्नाणाइं ।

इओ य कुसगपुरे नथरे अरिमइणो नाम राया, तस्स य पयईए चिय दयादाखिन्नविवेयसच्चविसिद्धुद्धिसंगओ सुमई नाम अमच्चो, तेण य राइणा कारावियं महंतं सरोवरं, आरोविओ पालीसु विचित्ततरुसमूहो, चउसुवि पोसेसु कयाओ अणाहसालाओ, निरुवियाइं अवारियसत्ताइं, तस्स य सरोवरस्स अचंतभरिअस्सवि विवरदोसेण कइवयदि-
णमेत्तेणवि सुसंतं सलिलमवलोइऊण विसंनेण जंपियं रत्ता-अहो निरत्थओ दव्वखओ जाओत्ति, परियेण भणियं-
देव ! मा संतप्पह, पूरिज्जउ एस सिलाइहिं विवरो, जइ पुण एवं कए न विप्पणस्सइ सलिलं, रायणा भणियं-
एवं कीरउ, तओ तक्खणं चैव कट्टसिलाइद्दगाहिं पूरिओ सो विवरो, जाए य वरिसयाले निवडंतुहाअसलिलधा-
राहिं भरियं सरोवरं, तं कहियं च नरेहिं नरवइणो ।

ताहे तुट्ठो राया पलोयणट्ठा गओ सयं तत्थ । जावउच्छइ खणमेगं उब्भिन्नो ताव सो विवरो ॥ १ ॥

पुणरवि पुव्वपवाहेण पाणियं तेण विवरमग्गेण । अणिवारियप्पयारं पायाले गंतुमारद्धं ॥ २ ॥

तं दट्ठूण नरिंदो सोगमहासल्लपीडिओ झत्ति । मंताइसत्थकुसलं पुरलोयं वाहरावेइ ॥ ३ ॥

भणइ य तुम्हे सत्थत्थपाया ता केहेह सलिलमिमं । पायाले वचंतं ठाइस्सइ केणुवाएणं ? ॥ ४ ॥

परिचित्तिज्ज सम्मं पयंपियं तेहिं देव ! विन्नाणं । नेवउत्थि एत्थ वत्थुमि अम्ह किं साहिमो तेण ? ॥ ५ ॥

अह नरवइणा भणियं तहावि साहह किमेत्थ कायव्वं ? । मा विफलं चिय वच्चउ सुचिरं वेद्वियं दव्वं ॥ ६ ॥

तेहिं भणियं-देव ! जइ एवं ता नगरस्स वाहिं विदेसियसालासु य पवामंडवेसु य देवमंदिरेसु य पयससमू-
हमीलगेसु य तवस्सिज्जणासमेसु य निरुवेह पुरिसे, पुच्छावेसु य तन्निवासिलोयं विवरपूरणोवायं, जइ पुण तेहिंतो
कोइ कं पि उवायं कहेज्जा, राइणा भणियं-साहु जंपियं, बहुयणा वसंधरा, किमिह न संभविज्जत्ति अणुमन्निऊण
तवयणं जहाभणियं सवट्ठाणेसु विसज्जिया पुरिसा, ते य जहामणियविहीए समारद्धा पुच्छउं ।

इओ य सो कोरिंदगकावाल्लो इओ तओ देसंतरेसु परिभमतो भंतंतोसहीसंगहं कुणंतो धाउवायखन्नवायप-
मुहदवोवज्जणोवायं परिचिंततो समागओ तमेव पुरं, ठिओ देसियसालाए, सवप्पयारेहिं अपुट्टत्तिकाऊण सवियं
पुच्छओ सरोवरविवरपूरणोवायं रायपुरिसेहिं,

एत्थंतरंमि तेणं नियविन्नाणावेलवनडिण्ण । भणियं साहंकारं किन्त्थिमेत्तं इमं मज्झ ? ॥ १ ॥

रायपुरिसेहिं-कहियं-जइ एवं एहि ता नरिंदपुरो । पयडसु नियविन्नाणं लहसु पसिद्धिं धरावलए ॥ २ ॥

एवं च सो वुत्तो समाणो अप्पणो विन्नाणेण तिहुयणं पि तणं व मज्जतो पट्ठिओ तेहिं समं रायउलं, कमेण य पत्तो
अत्थाणमंडवं, सुणित्तिकाऊण पणमिओ राइणा, दवावियं आसणं, निसन्नो एसो, पत्थावे य पुरिसेहिं निवेइओ
रन्नो तदब्भुवगमो, तओ हरिसवियसियच्छेण भणिओ रन्ना एसो-भो रिसिवर ! करेसु पसायं, पणासेसु सरोवरस्स
विवरं जेण तण्हापरिसुसियसरीरो चउव्विहोवि भूयगामो खुहेण सव्वकालं जहिच्छाए जलप्राणं कुणइत्ति, कोरि-

दगेण भणियं—महाराय ! केत्तिमेत्तं एयं ? दंसेह तं विवरं जेण तदुच्चियमुयायं सोहेमि, एवं वुत्ते दंसिओ सो एएसो, तेणवि तं संमतओ पलोइऊण भणियं—महाराय ! जइ एत्थ विवरे कसिणचउइसीए टण्णरकङ्गं भंक्कडवन्नं वोक्कडुऊचं तालसरूवं कक्कडयच्छं अइवीभच्छं बंभणगोत्तं संजमवंतं पुरिसं खिवेह दिसिदेवयाण बलिदाणपुच्चं नूणं ता मिलइ एस विवरो, न नीरसुवरमइ थेवपि, एवं तेण कहिए राइणा सव्वत्थ गामागराइसु पेसिया पुरिसा, निभालिउमारद्धा य जहोवइट्टुगुणविसिट्ठं बंभणं, कत्थवि अपेच्छमाणेहि य तेहिं पडिनियत्तिऊण निवेइयं नरिंदस्स, तओ संभत्तचित्तेण भणियं राइणा—भो सुमइअमच्च ! किमेवं अमह धम्मकज्जे निरुज्जभो तुमं ? न संपाडेसि जहोवइट्ठं बंभणंति, इमं च निसामिऊण चित्तिं मंतिणा—अहो धम्मच्छलेण पावज्जणं मुद्धलोयस्स, अहो अणत्थदंढपडियत्तणं पासडियाहमस्स, जं एवंविहं पावट्ठाणमुवइसंतेण न गणिओ पंचिदियविणासो न परिचितिओ बंभणहच्चाकलंको न परिकलिओ नियतवल्लोवो, अहवा किमणेणं ? , तहा करेमि जहा पावोवएससमुल्लावयंछा इयरलोयस्सवि न जायइत्ति परिभावि-ऊण भणियमणेण—देव ! जारिसो अणेण पुरिसो कावालयमुणिणा समाइट्ठो तारिसो एसो चेव जइ परं हवइ, ता देव ! धम्मट्ठाणे एत्थ जइ एसो च्चिय खिणिही ता किमजुत्तं जाएज्जा ? , इट्ठं धर्मे नियोजये’दिति लोकेऽपि कथ्यते, राइणा भणियं—एवं होउ। अह समागए चउइसीवासरे सो चिय कोरिटगो जहोवइट्ठविहिजा “हितं न वाच्यं अहितं न वाच्यं, हिताहितं नैव च भाषणीयम् । कोरिटकः साह महाव्रती यत्, स्ववाक्यदोषाद्विवरं विशामी” ॥१॥” ति

पुनरुत्तं विरसमारसंतो बला चेव पक्खित्तो विवरम्भि पाविओ य विणासंति ।

अह सच्चत्थवि नयरे वित्थरियं जहा कयालियतवस्सी । नियजीहादोसेणं पंचत्तं पाविओ विवसो ॥ १ ॥

ताहे सच्चोऽवि जणो भासागुणदोसचिंतणुज्जत्तो । सुमुणिच्च संपयत्तो किमसक्कं मरणभीयाण ? ॥ २ ॥

इय तुज्झ मए काहिओ गोअम ! उच्छिखलुल्लवणरूवो । जमंदडोच्च पयंडो अणत्थदंडो दुहोहकरो ॥ ३ ॥

तिन्निवि (एयाइं मए) भणियाइं गुणवयाइं एत्ताहे । चत्तारिवि सीसंती (सिक्खाइं) निमुणसु तं गोअमसगोत्त ! ॥ १ ॥

सावज्जेयरजोगाण वज्जणासेवणोभयसरूवं । सामाइयंति तेसिं पढमं सिक्खावयं होइ ॥ २ ॥

मणवयणकायदुप्पणिहाणं इह जं न उ विवज्जेइ । सयकरणयं अणवट्ठियस्स तह करणयं च गिही ॥ ३ ॥

सामाइए उज्जत्ता अविचलचित्ता सुरोवसग्गेऽवि । होति भवपागरामी सत्ता नणु कामदेवोच्च ॥ ४ ॥

जह कामदेवसद्धो संमत्तं पाविओ ममाहिंतो । सामाइए निक्कपो सुरोवसग्गेऽवि तह सुणसु ॥ ५ ॥

चंपानथरीए विजियमंडलो जियसत्तू नाम राया, कामदेवो सेट्ठी, नियनियकम्मसंपत्ता कालं वोलीति, अन्नया य गामाणुगामं विहरंतो अहं तत्थ समोसढो, तओ उज्जाणपालगेहिं विन्नत्तो राया, जहा-देव ! भवियकमलबो-हणदिवायरो चरिमत्तिथयरो सहसंववणुज्जाणे समोसढोत्ति, एवं सोचा रत्ता दिव्वं तेसिं महंतं पारिओसियं, दवाविओ नयरीए पडहगो-जहा नायकुलेकेउणो महावीरस्स भगवओ वंदणत्थं पत्थिवो निगगच्छइ, ता भो

लोगा ! आगच्छेह भगवंतं वंदितं भणिए तक्कालमिलियपुरजणसमेओ समागओ राया समंतियं । इओ य सो कामेदवो पासायतलासीणो एगाभिसुहं जणनिवहमवलोइय परियणमापुच्छेइ-किं नं देवाणुप्पिया ! एस पुरज-णसमुदओ एगदिसाए नीहरइ ? एयमहुसुवलभिय साहेह, तेहिं निच्छऊण निवेइयं, जहा-तिहुयणेक्कनाहो जिणो समोसदो तवंदणवडियाए पुरलोणो वच्चइ, तओ सो समुप्पन्नसद्दाइसओ णहाओ चंदणोवलित्तगत्तो चाउरद-दरहारूढो अप्पमहग्घाभरणभूसिओ सिक्कुसुमदामोवसोहिओ निग्गओ नयराओ, समोसरणासन्ने य ओइन्नो रहवराओ पमुक्कुसुमदामो परिहरियंतवोलो कयमुहसुद्धी एगसाडीएणं उत्तरासंगेणं चक्खुफासे अंजलि-पग्गहेणं मणसो एगत्तीभावेण य पविट्ठो समोसरणे, तिवसुत्तो आयाहिणपयाहिणं काऊण वंदिओ अहं, उवविट्ठो सट्ठाणे, निसामिए धम्मे संजायधम्मपरिणामो संमत्तमूलाइं पंचाणुद्ययाइं तिन्नि गुणव्याइं चत्तारि सिक्खावयाइं भावसारं पडिवज्जिय गिहसुवगओ, पालेइ निरइयारं सावगधम्मं । अन्नया य कुडुंबचित्ताए जेट्ठुत्तं ठवित्ता पोसह-सालाए पडिमापरिकम्मकरणट्ठा सामाइयं पडिवज्जिय ठिओ रयणीए काउसगणेणं, एत्थंतरंमि तब्भावनिच्चलत्तं परिकिखुत्तं एगो तस्स समीवे ठाउं सुरो सरोसं इमं भणइ-

रे रे वणियाहम ! धम्मकम्ममेवं समुज्झसु जवेणं । पाविट्ठ कोऽहिगारो तुह एरिससाधुचेट्ठासु ? ॥ १ ॥
मा पविसअकाले चिय कयंतमुहकुहरमुग्गदाढिळं । मम वयणं अवगन्नि युत्तकलत्ताइपरियरिओ ॥ २ ॥

एवं बुत्तोचि न जाव कंपिओ सो तया महासत्तो । ताव परुहो देवो गइरूवं विउवेइ ॥ ३ ॥
 तयणंतरमुल्लालियपथंडुडो घणोव्व गज्जतो । वेगेण धाविऊणं गेणइ तं सावयं झत्ति ॥ ४ ॥
 सव्वत्तो गत्तं विइवेइ चलणेहिं पक्खिवइ गयणे । तत्तो निवडंतं पुण पडियच्छइ दंतकोडीहिं ॥ ५ ॥
 एवं बहुप्पयारं तं पीडिय कुणइ भुयगरूवं सो । पच्छा तिवखाहिं दढं दाढाहिं तणुं विदारेइ ॥ ६ ॥
 तहविहु अलुब्भमाणे गिहिप्पहाणंमि कामदेवंमि । रक्खसरूवं काउं उवसगं काउमारद्धो ॥ ७ ॥
 अह खणमेगं घोरदुहासकरतालतालणं काउं । परिसंतो सो तियसो भत्तीए तयं इमं भणइ ॥ ८ ॥
 भो कामदेव ! सावय तियसोऽहं तुज्झ सत्तनाणट्ठा । एत्थागओ महायस ! ता पसिय वरेसु वरमेत्तो ॥ ९ ॥
 थेवोऽविहु उवयारो विहिओ तुम्हारिसे गुणनिहिंमि । अस्संखसोक्खखंधस्स कारणं होइ निब्भंतं ॥ १० ॥
 एवं भणिओऽवि सुरेण सायरं वरमुणिव्व थंयपि । जाव न स कामदेवो कहमवि पच्चुत्तरं देइ ॥ ११ ॥
 ताव नमंसिय चरणे उक्कित्तिय गुणगणं च से तियसो । परमच्छरियमुवगओ जहागयं पडिनियत्तो य ॥ १२ ॥
 इयरोऽवि धम्ममाराहिऊण तइए भवंमि निव्वानं । सायत्ताणंदसुहं पाविस्सइ निहयकम्मंसो ॥ १३ ॥
 इय जइ गिहिणोऽवि समुज्जमंति धम्मंमि निचला धणियं । ता उज्झियगिहवासा तवस्सिणो किं पमयंति ? ॥ १४ ॥
 एवं वीरेण जिणेसरेण जइणो पडुच्च वागरिए । सविसेससंजमुज्जयचित्तो जाओ समणसंघो ॥ १५ ॥

इय जह सामाइयनिच्चलत्तणं कामदेवसहेणं । भवभयभीएण कयं अन्नेणवि तह विहेयव्वं ॥ १६ ॥
दिसिवयगहियस्स दिसापरिमाणस्सेह पइदिणं जं तु । गमणपरिमाणकरणं बीयं सिक्खावयं एयं ॥ १ ॥
वज्जइ इह आणयणप्पओगेपेसप्पओगयं चैव । सइणुखवायं तह बहिया पोगलक्खेवं ॥ २ ॥
इहलोयंमिवि पइदिण दिसपरिमाणंमि कीरमाणंमि । उभएवि नो अणत्था सागरदत्तस्स व हवन्ति ॥ ३ ॥
गोयमसामिणा भणियं-जयगुरु ! को एस सागरदत्तो ? कहं वा तस्स दिसिवयपरिमाणसेवणे इहपारभविया-
णत्थप्पणासो जाओत्ति साहेसु, महंतमिह कोऊहलं, भगवथा जंपियं-परिकेहमि, पाडलिसंडे नयेर धणसारस्स
इब्भस्स सुओ सागरदत्तो नाम, सो य असेसवसणसयसंपरिगहिओ दुल्लियगोटीए परिगओ, तेहिं तेहिं पयोरहिं
दव्वविणासमायरइ, अन्नया य विणट्ठमि दव्वसारे गओ सो देसंतरेसु, पारद्धा य बहवे दविणोवज्जणोवाया, समासा-
इयाइं कइयवि दीणारसयाइं, तेहिंवि गहिऊण किंपि भंडं गओ सिंधुदेसं, विणिवट्ठियं तं च, उट्ठिओ बहुलाभो,
जाओ से परितोसो, चिंतिउमारद्धो य-अहो किं इमिणा अत्थेण ? जो नियसुहियसयणवग्गस्स न जाइ विणि-
ओगं ?, ता गच्छामि नियनयरं, पेच्छामि जणगं, समप्पेमि तस्स अत्थसंचयं, दुण्डियारो खु सो महाणुभावो,
विविहाणत्थसत्थेहिं मए संताविओ य इति परिभाविऊण गहियपवरजच्चतुरंगमो पयट्ठो पाडलिसंडपुराभिमुहं,
अविच्छिन्नपयाणएहिं इंतस्स अद्धपहेच्चिय जाओ वासारत्तो, अणिवारियपसरा निवडिया सलिलवुट्ठी, पवूढा गिरि-

नईओ, नवहरियसहूलं जायं धरणिमंडलं, नियनियगेहाइसु अछीणो पहियसत्थो, बहलचिक्खल्लोत्तणेण दुग्गमी-
हूया भूमिमग्गा, तओ सो गंतुमसमत्थो तत्थेव य छाइऊण ठिओ, अन्नदिवसे य चरमाणं तुरंगमाणं अणुमग्ग-
लग्गो जाव किच्चियं भूभागं वच्चइ ताव गिरिगुहागओ एगचलणोवरिनिहियसवंगभारो धम्मनिचओव मुत्तिमंतो
उवसंतपरोपरोहिं हरिहरिणसहूलसूयरपमुहतिरिएहिं परिचत्तचरणपाणिएहिं उवासिजमाणो चउमासतवोविसंसे
पडिवन्नो दिट्ठो अणेण अज्जसमिओ नाम चारणो सुणिवरो, तं च दट्ठूण परमविम्वहयमुव्वहंतेण चित्तिं सागरदत्तेण-
अहो अञ्जरियमच्छरियं जमच्चंतदुट्ठसत्तावि एवमेयं महासुणिं पज्जुवासंति, न सव्वहा हवइ एस सामन्नविक्रमो, ता
दंसणमवि एयस्स पवित्त्थाकारणं, किं पुण विसंसेसवंदणंति समुच्छलियनिब्भरभत्तिपभारनिस्सरंतरोमंचो समीवे
गंतूण पंचंगपणिवायपुरस्सरं निवडिओ से चलणेसु, सुणिणावि उस्सगं पाराविऊण भवोत्तिकाऊण धम्मलाभेण
पडिलाभिओ एसो, तओ हरिसवियसियच्छिणा भणियं सागरदत्तेण-भयवं ! किमेवं अइहुक्करं समायरह तुब्भे तवं ? किं
वा निवसह एवविहे एगंतवासे ?, को वा फलविसेसो एयस्स दुरणुचराणुट्ठाणस्स ?, सुणिणा भणियं-भो महाणुभाव !
एयस्स अवस्सविणस्सरस्स सरीरस्स एस चेव लाभो जमणुट्ठिज्जइ संजमो, एसो य मणसो एगत्तीकरणमंतरेण न सम्मं
तीरइ काउं, अओ एगंतवासो सुतवस्सीहिं सेविज्जइ, जं च तए भणियं-किमेअस्स फलं ?, तत्थ सुंदर ! निसामेसु ।

नरतिरियाइदुग्गइनिवायसंभवमुत्तिक्खदुक्खाइं । दोगच्चवाहिवेयणजरमरणपमोक्खवसणाइं ॥ १ ॥

लीलाए चिय उम्मूलिऊण सच्चरियसंजमा पुरिसा । वच्चंति सिवपयं जेण तेण (महयं) फलं तस्स ॥ २ ॥
 एत्तो चिय सप्पुरिसा रज्जं लच्छिं च भोगविच्छड्ढं । एक्कपए चिय मोत्तुं संजमजोगं पवज्जंति ॥ ३ ॥
 ते धन्ना कयपुन्ना ते चिय कल्लाणकोसभूया य । जे परलोयसुहावहेमं धम्मं उवचिणंति ॥ ४ ॥
 तत्तो सागरदत्तेण जंपियं जायपरमसद्धेण । भयवं ! भुवणच्छरियं एक्कं चरियं परं तुज्झ ॥ ५ ॥
 पढमवए चिय जेणं विणिज्जिओ दुज्जओ विसमवाणो । उम्मूलिओ य मोहो निगहिओ कोहजोहोडवि ॥ ६ ॥
 विद्धंसिओ य लोभो पणासिओ सवहाडभिमाणोडवि । नियडिडुङ्गीगहणं निहंहुं झाणजलणेण ॥ ७ ॥
 एवंविहेण तुमए पवित्तियं तिहुअणपि नीसेसं । भवकूवे निवडंतो जाओ लोगोडवि सालंबो ॥ ८ ॥
 एक्को अहं अयन्नो जो तुच्छेहियसुहस्स कज्जेणं । अज्जवि तुम्ह समीवे पवज्जं नो पवज्जामि ॥ ९ ॥
 चिंतामणिलाभमिवि अहवा जो जेत्तियस्स किर जोगो । सो लहइ तत्तियं चिय ता मम उचियं कहह धम्मं ॥ १० ॥
 एवं तेण भावसारं निवेइए निययाभिप्पाए पयडिओ साहुणा सम्मत्तमूलो दुवालसवयसणाहो सावगधम्मो,
 गहिओ अणेण, तओ कइवयवासराइं परिचत्तवावांतरो तमेव सावगधम्मं सप्पभेयं मुणिणो समीवे सम्मं वियाणिऊण
 समागए सरयसमए उवसंतासु गिरिसरियासु वहतंसु पहिएसु ते जच्चतुरए गहाय गओ नियनयरं, दिट्ठो जणगो,
 समप्पियं च से दविणजायं, जाओ य इमस्स परितोसो, सो य सामाइयाइधम्मनिरओ कालं बोलेइ । अवरंमि य वासरे

कओ सागरदत्तेण दिसिगमणसंखेवो, जहा अज्ज अहोरत्तंपि न गेहाओ चाहिं नीहरिस्सामित्ति, एत्थ य पत्थावे
 चरणट्ठया गया ते जच्चतुरगा, हरिया दोहिं चोरेहिं, तदवहरणं च निवेइयं रक्खगेहिं सागरदत्तस्स, तेणावि निशय-
 म्माणुट्ठानिच्चलचित्तत्तेण निसामिऊणवि न दिन्नं पच्चुत्तरं, सयणवग्गोवि लग्गो जंपिउं-अहो सागरदत्त ! किमेवं
 कट्टसमो मोणमवलंबिय चिट्ठसि ? न धावसि चोराणुमग्गओ, जओ गोसामिए उदासीणे तयणुचरा कह पयट्ठति ? ,
 सागरदत्तेण भणियं-होउ किंपि, न विराहेमि मणांगंपि नियवयं, तओ निच्छयमुवलब्भ रोसेण जहागयं पडिनिशत्तो
 सयणवग्गो, इओ य-ते दोउवि तक्करा पिट्ठओ कुडियमित्तमेपेच्छमाणा निब्भया निरुद्धिग्गा गंतुं पयत्ता, गच्छंताण
 य नीसेसतुरगहणलोभदोसेण समुप्पन्नो दोणहंपि परोप्परं वहपरिणामो, तओ भोयणसमए पविट्ठा एगंमि गामे,
 कारावियं रंधणीगिहेसु पुढो पुढो थालीसु भोयणं, पक्खित्तं च अणलक्खिज्जमाणेहिं तत्थ दोहिवि महाविसं, सिद्ध
 य भोयणे कयत्तक्कालोचियकायच्चा अमुणियावरोप्पराभिप्पाया उवविट्ठा भोयणं काउं, अह पढमकवल-
 कवलणेउवि अभिभूया ते विसविगारेण, निवडिया महीयले, कओ महाणसिणीए कलयलो, मिलिओ गामलोगो, क-
 हिओ अणाए वुत्तंतो, ते य विसाभिभूया गया तक्खणमेव पंचत्तं, तुरंगमावि निस्सामियत्तिकाऊण रक्खिया
 गामजणेण, इओ य-सागरदत्तो पडिपुन्नंमि देसावगासियनिशमे जिणविंबूयापडिवात्तिं काऊण कइवयपुरिस-
 पक्खित्तो चलिओ तुरयाणुमग्गेण, अच्चंतविसिट्ठसउणोवलंभे य जायलामनिच्छओ समुप्पन्नचित्तुच्छाहो अविलंबि-

यगईए संसुहमागच्छन्तं पहिथलोगं तुरयपउत्तिमापुच्छंतो कम्मधम्मसंजोएण पत्तो तं चेव गामं, पुट्ठो य तन्निवासि-
जणो, तेणावि समणिया तुरगा, कहिओ य चोरवुत्तंतो, सागरदत्तेणऽवि साहिओ गामलोगस्स नियमवइयरो, अओ
जिणिंदधम्मपससा ॥

अह सागरदत्तेणं चितियमुप्पन्नभवविरागेण । जह जिणधम्मपभावो पच्चक्खं चिय मए दिट्ठो ॥ १ ॥
ता किं अज्जवि वामूढमाणसो तिकखदुक्खदायारं । घरवासं पासंपिव सयखंडं नेव तोडेमि ? ॥ २ ॥
इय चित्तिज्ज चत्ताइं तेण सव्वाणि पावठाणाणि । गहिया जिणिंददिकखा सिवसुहभागी य जाओ य ॥ ३ ॥
इय इंदभूइ ! सिक्खावयस्स बीयस्स पालणे भणियं । फलमेत्तो तइयं पुण भणिमो सिक्खावयं ताव ॥ ४ ॥ १० ॥
आहारदेहसक्कारवंभवावारचागनिप्फणं । इह पोसहंति वुच्चइ तइयं सिक्खावयं पवरं ॥ १ ॥
दुविहं च इमं नेयं देसे सवे य तत्थ सव्वमि । सामाइयं पवज्जइ नियमा साहुच्च उवउत्तो ॥ २ ॥
अप्पडिप्पडिलेहियऽपमज्जेज्जाइ वज्जइ एत्थ । सम्मं च अण्णुपालणमाहारइसु सवेसु ॥ ३ ॥
पोसेइ कुसलधम्मे जं ताहाराइचागणुट्ठाणं । इह पोसहोत्ति भणइ विहिणा जिणभासिएणेव ॥ ४ ॥
पाणंतिगोवसग्गेऽवि पोसहं धेत्तु जे न खंडंति । जिणदासो इव ते सुरसुहाइं भोक्खं च पावंति ॥ ५ ॥
गोयमसाभिणा भणियं-भुवणेक्कदिवायर ! को एस जिणदासो ?, भयवया वागरियं-साहेमि, वसंत्तपुरे नयरे

अंचंतभवविरत्तचित्तो सच्चन्नवद्दुपरमत्थभावियमई जिणदासो नाम सावगो, नावद्ध पडिक्कलचारिणी मंगलमुत्तिच्च
तिव्वारागाणुगया मंगलां नाम से भारिया, सो य बहुसो सामाइयपोसहतवोविससनिसेवणाभिरओ पव्वज्जं पडि-
वज्जिउकामो बलतुलणं करेइ । सा य से भारिया अंचंतसंकलिट्ठयाए उक्कडवेयत्तणेण समणं व तं विजियमयण-
वियारमवलोइऊण फरुसगिराए निब्भच्छंती भणइ—

हे सुद्ध ! धुत्तलोएण वंचिओ तंसि विज्जमाणेवि । जो भोगे वज्जित्ता अविज्जमाणं महसि मोक्खं ॥ १ ॥
निछक्खण ! दुरणुचरं तवोविससं निसिचिउं कीस । सोसेसि नियसरीरं ? किं अप्पा वेरिओ तुज्झ ? ॥ २ ॥
जइ तं विसयविरत्तो पढसं चिय ता न कीस पव्वइओ । जाओ ? जमिणिह मं परिणिऊण एवं विडंबेसि ॥ ३ ॥
अह तं ममनिरवेक्खी जहाभिरुइयं करेसि एवं च । अहमवि तुह निरवेक्खा जं भावइ तं करिस्सामि ॥ ४ ॥
एवं तीए भज्जायवज्जिए जंपियंमि जिणदासो । उवसमभावियचित्तो मhurगिराए इमं भणइ ॥ ५ ॥
भेइ ! सद्धम्मपरम्महासि निम्भेरसुल्लवसि तेण । तुच्छेऽवि विसयसोक्खे कहऽन्नहा होज्ज पडिबंधो ! ॥ ६ ॥
थोयं जीयं जरमरणरोगसोगाऽणिवारियधप्पसरा । एवं ठिएवि कह सुयणु ! कुणसि तं विसयवामोहं ? ॥ ७ ॥
तीए(ता) भणियं होउ अलं तुज्झ सद्धम्मदेसणाए ममं । सयमवि नद्धो दुच्चेट्ठ ! धिट्ठ अन्नपि नासेसि ॥ ८ ॥
इय तीए दुट्ठनिट्ठरसुहीए दुविणयमूलभूमीए । निब्भच्छिओ समणो जिणदासो मोणमल्लीणो ॥ ९ ॥

अन्नया य चउद्दसिदिणंसि पडिवन्नो अणेण उववासो गहिउं चउव्विहंपि पोसहं, ठिओ य गिहेगंतभूयाए जाण-
सालाए निंसिमि काउस्सग्गेण, मंगलावि मयरद्धएण वाहिज्जमाणी उज्झियकुलाभिमाणा अगणियाववाया नीय-
गामिणीउ कामिणीउत्ति य पवायं सच्चवित्तिव वडिया सह विडेण, गेहजणलज्जाए पयडं चिय अकज्जमाथरिउ-
मपारयंती पुव्वदिन्नसिंगारेण विडेण सद्धिं रयणीए समागया तं चेव जाणसालं, अच्चंधयारत्तणेण काउस्सग्गद्धियं
जिणदासमपेच्छमाणीए तंसि चेव पएसे पक्खित्तो लोहकीलगतिकखपइट्ठानो पल्लको अणाए, तक्कीलेणेण य समी-
ववत्तिणो जिणदासस्स विद्धो सहावकोमलो चलणो, सा य विडेण सद्धिमकज्जमायरिउमारद्धा ।

जिणदासो पुण अइतिकखलोहकीलगनिभिन्नचलणतलो । उप्पन्नगाढवियणो चित्तिउभयं समाढत्तो ॥ १ ॥

मा ! जीव काहिसि तुमं मणागमेत्तपि चित्तसंतावं । समयमि दिट्ठे विलिए भज्जाए अकज्जसत्ताए ॥ २ ॥

जं परमत्थेण न एत्थ कोऽपि भज्जा व सयणवग्गो वा । किंतु सकज्जविणासे संधपि परंमुहं ठाइ ॥ ३ ॥

अविय-तावच्चिय दंसइ पणइभावमायरइ ताव अनुकूलं । निययत्थविसंवायं जाव न पेच्छइ पणइलोगो ॥ ४ ॥

ता एयाए धम्मत्थसुन्नचित्ताए एत्थ को दोसो ? । इत्थी सभावओ चिय दुग्गेज्झा वुच्चइ जेण ॥ ५ ॥

अहरक्खियावि अइपालियावि अइगाढरूढपणयावि । बाढं उवयरियाविहु देइ दुरंतं भयं महिला ॥ ६ ॥

एत्तो चिय सुणिवसभा सुबुद्धिमाहप्पमुणियपरमत्था । पच्चक्खरक्खसीहि व महिलाहिं समं न जंपंति ॥ ७ ॥

ता ते चिय इह धन्ना सुलद्धनियजम्मजीवियफला य । जे उज्झिऊण महिला संजमसेल समभिरूढा ॥ ८ ॥
 धन्नो सणकुमारो जो पुरमंतेउरं सिरिं रज्जं । उज्झित्ता निक्खंतो परमप्पा मोक्खसोक्खकए ॥ ९ ॥
 एक्को अहं अधन्नो जो कुलडाए अणत्थमूलाए । दुट्ठमहिलाए कजे एवं वुत्थोऽम्हि घरवासे ॥ १० ॥
 अहवा समइकंतत्थसोयेणं इमेण किं बहुणा ? । एत्तोवि सव्वविरइं भावेणाहं पवज्जामि ॥ ११ ॥
 इय चिंतिऊण तेणं तिविहंतिविहेण वोसिरिय संगं । पंचपरमेट्ठिमंतो पारद्धो सरिउमणवरयं ॥ १२ ॥
 अह पवलचलणपीडोवक्कमिथाऊ चइत्तु नियदेहं । भासुरसरीरधारी देवो वेमाणो जाओ ॥ १३ ॥
 आउक्खयंमि तत्तो सो चविऊणं विदेहवासंमि । निट्ठवियकम्मगंठी पाविस्सइ सासयं ठाणं ॥ १४ ॥
 इय गोयम ! निच्चलमाणसस्स जिणभणियधम्मकज्जंमि । जायइ जीवस्स धुवं अकालखेवेण सिवलामो ॥ १५ ॥ ११ ॥
 भणियं तइयं सिक्खावयं इमं संपयं पुण चउत्थं । एदंपज्जसमेयं जह होइ तहा निसामेह ॥ १ ॥
 अन्नाईणं सुद्धाण कप्पणिज्जाण देसकालजुयं । दाणं जईणमुचियं चउत्थ सिक्खावयं एयं ॥ २ ॥
 सच्चित्तनिक्खवणयं वज्जइ सच्चित्तपिहणयं चेव । कालाइक्कम परववएस मच्छरिय पंचेव ॥ ३ ॥
 अन्नाईण पयाणं निचंपिय होइ गिहिजणस्सुचियं । जइणो पडुच्च किं पुण पोसइववासपारणए ? ॥ ४ ॥
 अतिहीण संविभागं नूणमकाउं न जे पजीमंति । ते सादुरक्खिओ इव देयाणवि होंति महणिज्जा ॥ ५ ॥

गोयमेण जंपियं-मुवणत्तयसामिसाल ! साहेसु को एस साहुरक्खिओ?, कहं देवमहणिज्जोत्ति, भगवया वागरियं-
आयन्नसु—अत्थि सयलदिसावलयविकखाया वाणारसी नाम नयरी, तहिं वसू नाम राया, सव्वेतेउरपहाणा वसुमई
देवी, वणियलोयसम्मओ जिणपालिओ सेट्ठी, जिणमई से भारिया, एयाणि चत्तारिवि परमसावगाणि परोप्परं
परुढगाढेय्ममाणि य एक्कचित्तत्तणेणं जिणधम्मं पालेत्ति, अन्नया सेट्ठिणी नरिंदपत्ती य पंचवन्नसुराहिं कुसुमदहि-
यक्खयसुगंधिगंधधूववासपडिपुन्नपडलकरपरियरियाओ गयाओ जिणालयं, विरइया अणेगविच्छित्तिमणहरा सब-
नुबिबाण पूया, तओ विचिच्चथुइयुत्तदंडएहिं सुचिरं जिणं थुणिऊण पयाहिणं दाउं बाहिं नीहरिया, ताहिं एगत्य
पएसे अचंतदुइंसणो मच्छयाजालाभिणिभिणारावभीसणो वणसुहनिससरंतकिमिसंवलियपूयप्पवाहो सडियंगुलि-
नासोढो कुट्टवाहिविणदुहो दिट्ठो एगो पुरिसो, तं च दट्ठूण देवीए भणियं-भो महाणुभाव ! कीस सव्वन्नमासा-
यणं इहट्ठिओ करेसि?, तेण भणियं-नाहमेत्थ निवासत्थी समागओ, किंतु चेइयवंदणत्थं, सेट्ठिणीए भणियं-देवि !
जइ इत्तियमेत्तमेव पओयणं पडुच्च अच्छइ ता अच्छउ, को दोसो ?, जओ सुस्समणावि जाव चेइयाइ वंदंति
वक्खणं वा करिंति सिणानं वा पेच्छंति (सिस्साणं वायणं वा पयच्छंति पु.) ताव जिणभवणे निवसंति, देवीए
भणियं-तहावि विणट्ठुसारीरत्तेण न जुजइ एयस्स अच्छिउं, अहवा निट्ठिवणाइ अकरीतो सम्मसुवउत्तो निमेसमित्तं
जिणविवावलोयेण अप्पणो समाहिसुप्पाएउ, किमजुत्तं ?, सेट्ठिणीए भणियं-एवमेयं, को महाणुभावस्स एयस्स

अवराहो?, दुष्पडियाराणि पात्रकम्माणि एवंविहाहिं विडवणाहिं कयत्थिहिं निस्सरणं पाणिगणं, देवीए भणियं-
अलमुच्चावयभणियेव्वेणं, भो महाणुभाव ! साहम्मिओत्तिकाऊण पूयणिज्जोसि तुमंति ता साहेसु-किं ते पियं की-
रउ?, तेण जंपियं-किमेत्थ कायव्वं अत्थि?, पुर्विं दुच्चिन्नाणं कम्माणं फलविवागमणुहव्वंतस्स समाहिमरणं चिय मे
पत्थियव्वं, तंपि भागविवज्जएण दुल्लभं व लक्खिज्जइ, ताहिं भणियं-कहमेवं जाणिज्जइ?, कुट्टिणा भणियं-अहं
मंदभग्गो, अइसइणा भणियं-जहा तुमं मरणकाले सम्मत्तं वमिहिसि तेणेमं जाणामि, चित्तसंतावं च उव्वहामि,
ताहिं जंपियं-भइ ! तुह जइ एवं ता विससमावडियंति, एवं च खणमित्तं विगमिऊण विम्भियमणाओ गयाओ
ताओ सगिहं । अन्नमि य वासरे चउनाणोवगओ सूरतेओ नाम सूरी समोसरिओ, तओ सेट्ठिणी देवी य गया
तंवदणत्थं, सुया धम्मकहा, पत्थावे य पुच्छियं ताहिं-भयवं ! पुवं चेइए गयाहिं अहेहिं जो कुट्टी दिट्ठो सो कीस
संमत्तं मरणसमए वमिही?, सूरिणा भणियं-सो पज्जंतसमए माणुस्सेसु आउवंधं काऊण उप्पज्जिही, न य गहिय-
सम्मत्तो अणंतरभवे मणुअत्तं तिरियत्तं वा पावइ, जेण भणियं-

सम्मदिट्ठी जीवो विमाणवज्जं न बंधए आउं । जइ उ न संमत्तजडो अहव न बद्धाउओ पुर्विं ॥ १ ॥

रायपत्तीए भणियं-कहिं पुण सो उववज्जिही?, सूरिणा जंपियं-एयाए सेट्ठिणीए पुत्ताएत्ति, एवं सोच्चा वि-
म्भियाओ वंदिय सूरिं नियत्ताओ ताओ सगिहं, निरुत्ताविओ भाविपुत्तसिणेहेण सो कोट्टी सेट्ठिणीए, न य कहंचि

दिदो, अहंकेतु य कहयवासेरु सो मरिऊण पाउब्भओ तोए सेट्ठिणीए गब्भे, जाओ य पडिपुन्नदियहेहिं, कयं वद्धावणयं, समागओ राया सह वसुमईए देवीए, कयमुचियकायवं सेट्ठिणा, तं च देवकुमारोवमं दारयं पेच्छिऊण भणियं देवीए-भो जिणमइ ! पेच्छ अच्छरियरूवं कम्मपरिणहं,

नीणंतपुयपवहो भीसणवणनिस्सरंतकिमिजालो । मच्छीहिं भिणिभिणतो सडियंगुलि गलियनासोदो ॥ १ ॥

एवंविहो वराओ तुज्झ गिहे पवरविहवकलियम्मि । उववन्नो कयपुन्नो सो कोट्ठी कह विसिट्ठो ? ॥ २ ॥

सेट्ठिणीए भणियं-देवि ! एवंविहे संसारविलसिए परमत्थेण न किंपि अच्छरियमत्थि, जओ-कम्मवसवत्तिणो पाणिणो केण केण पयारेण न परिणमंति?, देवीए जंपियं-एवमेयं, अह अहंकेते वारसाहे कयं से नामं साहुराक्खियत्ति, कोलेण य पत्तो कुमारभावं, गाहिओ कलाओ, संपत्तजोवणो सोहणमि तिहिमुत्तंसि परिणाविओ इब्भकन्नंगं, विवाहपज्जेते य समाहूओ सेट्ठिणा देवीए समेओ राया, पूहओ पहाणरयणाभरणवत्थसमण्णेण, पाडिओ ताण चलणेसु नववहूसणाहो साहुराक्खिगो, सो य देवीए सहासं भणिओ-वच्छ ! पेच्छ तं तारिसं इमं च एरिसं, साहुराक्खिएण भणियं-अंब ! न याणामि इमस्स अत्थं, एवं च तेण कहिए हसियं सहत्थतालं परोपरं देविसेट्ठिणीहिं, तओ रत्ता जंपियं-सेट्ठि ! किमेयाओ हसंति?, सेट्ठिणा भणियं-देव ! अहंपि सम्मं न याणामि, अओ ममाप्ति कोउगं, पुच्छउ देवो, तओ पुच्छियं रत्ता-देवि ! किमेवं तए वागरियं?, सवहा साहेहत्तिं वुत्ते तीए

सिटो पुवुत्तो कुट्टिउत्ततो, तं च सोच्चा सुमरियपुव्वभवो साहुरक्खिओ परं निव्वेयभावन्नो संसारवासस्स । अन्नया य तप्पुन्नपन्नभारसमागरिसिओव्व समागओ विजयवोसो नाम सूरी, पउरलोणेण समं सो गओ तव्वंदणत्थं, सविणयं पणमिऊण निसन्नो गुरुचलणंतिए, सुया धम्मदेसणा, तहाविहकम्मक्खओव्वसमेण जाओ से देसविरइयरिणासो, पडिवन्नो य सूरिसमीवे दुवालसरूवो सावगधम्मो, अन्नया य अट्टमीए कओ अणेण पोसहोववासो, इओ य कप्पसमत्तीए विहरिया सूरिणो, सो य पारणगदिवसे पोसहं पाराविऊण उचियसमए अतिहिंसंविभागं काउमणो पडिओ य साहुसमीवे, गेहाओ नीहरंतो य भणिओ जणणीए—वच्च ! कहिं वच्चसि?, भुंजेसु ताव सिद्धं वट्ठइ, साहुरक्खिओ भणियं—अम्मो ! अतिहिंसंविभागवयं पडिवज्जिय कहं गुरुणो असंविभाइय सयं भुंजामि ?, ता वाहरामि ताव साहुणो, तीए भणियं—पुत्त ! विहरिया अन्नत्थ भयवंतो किं न याणसि तुमं ?, एवं तीए कहिए गहिओ सो रणरणएण समाहओ सोगेणं पारद्धो अरइए, नियत्तिऊण य पडिओ भंचिए, चिंतिउमाढत्तो य—

कह पोसहोववासो कओ मए ? कह व विहरिया गुरुणो ? । अन्नं चिंतियमन्नं च निवडियं मंदमगस्स ॥ १ ॥

अहवा मरुत्थलीए किं कप्पतरू कयावि उग्गमई । मायंगमंदिरे वा छज्जइ अइरावणो हत्थी ? ॥ २ ॥

आजम्मरोरगेहे विसट्ठकंदोदुदलविसालच्छी । लच्छी कयावि पविसइ करयलरेहंतसरसिइहा ? ॥ ३ ॥

अस्त्वारिसस्स किं वा पुन्नविहीणस्स एत्थ पत्थावे । अधश्चिंतामणिणो सुणिणो भिक्खट्ठया इति ? ॥ ४ ॥
सग्गापवग्गसंसग्गमूलेऋवि मज्झ पावस्स । एवं च निरण्वंधो मन्ने सम्मत्तलाभोऽवि ॥ ५ ॥

इय सो जाव अट्टुहट्ठो सोगससुदयरुद्धकंठो अब्बइ ताव जणणीए पुणो भणिओ—अहो पुत्त ! मा चिरावेहि,
केरुसु भोयणंति, सादुरक्खिएण भणियं—अम्मो ! अलाहि भोयणेण, जइ समणे एत्थ पत्थावे सहत्थेण न पडि-
लाभेमि ता निब्भंतं न भुंजामि, एत्थंतरे तेइसमागएण दिट्ठो सो देवेण, तओ चित्तियमणेण—अहो महाभागस्स
परिणइ अहो निययसरीरनिरेक्खया, ता तहा करेमि जहा पारेइत्तिविगण्णिऊण अणेण विउव्विओ साहुसंघाडो,
पविट्ठो तस्स गेहे, तं च पेच्छिऊण ससंभमं भणियं जणणीए—पुत्त ! तुह पुन्नोदएण आगया कत्तोऽवि साहुणो,
ता एहि सहत्थेण पडिलाभेसु संपयं, एवं सोच्चा अणणसरिसं हरिसुल्लासं वंहतो झत्ति परिचत्तसयणिज्जो वंदिऊण
तवस्सिणो परमभत्तीए पडिलाभिऊण य कयकिच्चमप्पणं मन्नंतो केत्तियंपि भूभागमणुगमिय नियत्तिओ सगिहं,
गिलाणाइचित्तं च काऊण जिमिओत्ति । एवं सो उभयलोगसाहो जाओ ।

इय गोथम ! संखेवेण तुज्झ कहियाइ बारस वयाइं । एत्तियमेत्तो य इमो सावधम्मस्स परमत्थो ॥ १ ॥
एयस्स सेवणेणं गंतूण भवन्नवस्स पज्जंतं । पत्ता अणंतजीवा सासयसोक्खंमि मोक्खंमि ॥ २ ॥
ते धन्ना सणुरिसा तेहिं सुलद्धं च माणुसं जम्मं । जे भावसारमतुलं एयं धम्मं पवज्जंति ॥ ३ ॥

ता गोअम ! जं तुमए पुवं पुट्टोसिंह कह भवम्मि जिया । पुणरुत्तमणंतदुहोहपीडिया परिभमंतित्ति ? ॥ ४ ॥
 तत्थेमं चिय नणु मूलकारणं जन्न सहरिसं विरइं । सम्मत्तगुणसणाहं भणियविहाणेण गिणहंति ॥ ५ ॥
 एवं कहिए तित्थंकरेण गिहिधम्मवित्थरे तुट्टो । पयवीढलीढसीसो पढमो सीसो जिणं थुणइ ॥ ६ ॥
 जय तियलोयपियामह ! वम्महमाहप्पनिहलणधीर ! । ललणासिंगारुम्भडकडखखेवडवि अक्खुम्भ ! ॥ १ ॥
 भवगत्तपडंतजणोहसरण रणरहिय महिय तियसेहिं । नायकुलंवरपुन्निममयंक ! जय जय निरायंक ! ॥ २ ॥
 एगेणवि जह तुमए पयत्थसत्था जए पवित्थरिया । तह अन्नतित्थिएहिं न समत्थेहिवि मणागंपि ॥ ३ ॥
 तुह अत्थसारलेसं मन्ने रोरव तित्थिया धेत्तुं । जाया अनन्नमाहप्पगच्चिया नाणविभवेण ॥ ४ ॥
 जं न हणिज्जइ दिणयरकरप्सरपईवजोइरयेणहिं । चित्तम्भंतरलीणं तंपि तमं पडु ! हयं तुमए ॥ ५ ॥
 असरिसं जयगुरुगुरुभत्तिपभावनिस्सरंतरोमंचो । इय थोऊण निविट्टो सट्टाणे गणहरवरिट्ठो ॥ ६ ॥
 एत्थंतरे दुवालसवयेदसणानिसामणसमुप्पन्नभववरगेहिं केहिवि पडिवन्ना देसविरइं, अन्नाहिं उज्झयाइं मिच्छत्त-
 कायच्चाइं, केहिवि गहिया सव्वविरइं । इओ य सेणियनरिंदो थोवमेत्तंपि विरइं काउमसमत्थो तित्थाहिंवं पणमिऊण
 भणिउमाढत्तो-भयवं ! जो अच्चंतमहारंभो महापरिगहो सव्वहा विरइरहिओ सो कंहं भवन्नवं नित्थरिस्सइ ? ,
 जयगुरुणा भणियं-भो नरिंद ! सेणिय ! देसविरइं वा सव्वविरइं वा काउमपारयंतो सम्मत्ते निच्चलो होज्जा, एवं

जयगुरणा उवइष्टे तहत्ति पडियज्जिऊण जहाणयं पडिगओ राया नमतमउलिमंडलो, देवलेगं पट्टिया आखंडला,
विइक्कता पढमा पोरसी । अह चारणगणेहिं थुव्वतो जयगुरू सिंघासणाओ समुट्टिऊण पुवं चिय सुरविरइयमि
देवच्छंदयमि सुहसेज्जाए निसन्नो । गोयमसामीउवि कणपोत्तिकाऊण भगवओ मणिपायपीढासीणो धम्मदेसणं
काउमारद्धो । सो य केत्तियं पुव्वभवाइं साहइ ? केरिसो वा लक्खिज्जइ ? तत्थ भन्नइ—

संखाइए उ भवे साहइ जं वा परो उ पुच्छेज्जा । न य णं अणाइसेसी वियाणइ एस छउमत्थो ॥ १ ॥

असुरसुरखयरकिन्नरतरिया मुक्कसेसवावारा । सवणंजलीहिं तद्देसणामयं परिपियंति दढं ॥ २ ॥

आइक्खइ गणनाहो धम्मं ता जाव पोरिसी बीया । पच्छा पइदिणकिच्चं सामायाहिं समायरइ ॥ ३ ॥

एवं च समइक्कंतेसु कइसुवि वासरसु एयमि वासरे सिंहासणे निसन्नस्स वद्धमाणस्स नियनियट्ठाणनिविट्ठे चउ-
विहेवि देवनिकाए पंजलिउडं पज्जुवासमाणे य सेणियमहानरिंद एगो सुरो मायासीलयाए कुट्टिरूवं विउवि-
ऊण सरसगोसीसचंदणरसच्छडाहिं सरिरविणिस्सरंतपूयसंकारिणीहिं भयवओ समीवमल्लीणो चलणकमलवि-
लेवणं काउमारद्धो, तं च तहाविहं दुगुंणिज्जरूवं पेच्छिऊण चित्तियं सेणिएण-अहो को एस दुरायारो गलंत-
गाढकोढसुडियसरीरदुगंगंधगयोहेण दूमितो सयलेपि परिसं भुवणेक्कगुरुणो समीवट्टिओ एवं अच्चासायणं
कुणइ ?, अहवा कुणउ किंपि ताव उट्टियाए पुण परिसाए अवस्सं मए निग्गहियव्वोत्ति विकणंपतेण छीयमाणेण

अह कोटियसुरेण भणियं-जीवसुत्ति, मुहुत्तरे य वोलीणे छिक्कियमभयकुमारेण, पुणो तेण भणियं-जीवाहि वा मराहि वा, कालसूयरिएण छीए भणियं-मा जीव मा मर, समइक्कते य खणंतरे भुवणेक्कगुरुणा छीयं, भणियं-मर-सुत्ति, तं च सोच्चा अच्चंतजिणनाहपक्खवाएण वियंभियपवलकोवानलेण राइणा भणिया समीववत्तिणो पुरिसा-अरे एयं दुरायारं गुरुपच्चणीयमुट्ठियाए परिसाए हत्थे धेत्तूण मे समप्पेज्जह जेण दंसेमिदुव्विणयफलं, तेहिं भणियं-जं देवो आणवेइत्ति, अह जायंमि पहरपज्जवसाणे सट्ठाणं पट्ठिएसु तियसेसु सो कुट्ठिसुरो जयगुरुं परमायेण पणसिऊण गंतुमारद्धो, ते य पुरिसा नरिंदाएसमणवत्तता तं धेत्तुमुवट्ठिया, तयणंतरं च एस गओ एस गओ सो कुट्ठा एवमु-ल्लवंताण रायपुरिसाण पुरओ देवो अहसणं पत्तो, [इय वाहरंतेहिं] तेहिं विलक्खीभूयमाणसेहिं निवेइयमेयं राइणो, अह वीयदिवसे परमकोऊहलमुव्वहंतेण रत्ता पत्थावे पुच्छिओ जयगुरू-भयवं! अइक्कंतवासरे तुम्हं समीववत्ती कुट्ठ-विलीणकाओ अविभावणिज्जसरूवो को पुरिसो आसि?, भयवया जंपियं-महाराय! देवो, सो संपयं ददुरंक्कविमाणे समुण्णन्नो, रत्ता भणियं-कहं चिय?, भगवया वागरियं-निसामेसु,

अत्थि वच्छाविसए कोसंबी नाम नयरी, तहिं च सयाणिओ नाम नरवई, साड्डयगो नाम माहणो, सो य ज-म्माणंतरमेव रुंददारिद्रोवद्दवपीडिओ कहकहवि कणवित्तीए कालं गमेइ, अन्नया य आवन्नसत्ताए खरमुहीनायाए भज्जाए भणिओ एसो-भो बंभण! आसन्नो पसवसमओ, न य घरे घयंतदुलाइं अत्थि, ता कीस निच्चितो चिट्ठसि?

तेण भणियं-भेइ ! पइदिणभिकखाभमणेण नट्ठा मे बुद्धी, ता तुमं चेव साहेसु को एत्थ पत्थावे दवज्जणोवाउत्ति ?
तीए भणियं-गच्छ, पत्थिवं ओलगेसु सवायेरण, न तं विणा अण्णिज्जइ दालिंदति वुत्ते सो पइदिणं कुसुमहत्थो
पत्थिवं ओलगिउमाढत्तो, अन्नया य अणुक्कलयाए विहिणो से विणयमवलोइऊण तुट्ठो राया, भणियं च तेण-भो
बंभण ! मग्गसु जहिच्छियंति, तेण भणियं-देव ! वंभणिं आयुच्छिऊण मग्गामि, अणुमन्निओ रन्ना गओ गेहंमि,
भणिया वंभणी-भेइ ! तुट्ठो राया, ता साहेसु किमहं पत्थेमि ? तीए भणियं-पइदिवसमग्गासणे भोयणं दीणारं
दक्खिणाए दिणमज्जे एगवारं ओसारं च पत्थेहि, एत्तियमेत्तेण चेव तुज्झ पओयणं, किमन्नेण किलेसायासनि-
बंधणेण आहिगाराइणत्ति ? पडिस्सुयमणेणं, निवेइयं च एयं रन्ना, पडिवन्नं च तेण, एवं च राइणो पुरो पइदिणं
सुंजमाणो जाओ सो महाधणो, रायाणुवित्तीए य पइदिणममंतिज्जइ भोयणकरणे य मंत्तिसामंतेहिं, दक्खिणालोभेण
य सो गले अंगुलीपक्खेवपुव्वयं पुव्वभुत्तभोयणं वमिऊण पुणो पुणो अवरावरगिहेसु सुंजमाणो गहिओ कुट्टवाहिणा,
संभिन्ना सेववि तस्स सरीरावयवा, दुइंस्सणोत्ति पडिसिद्धो राइणा, तट्टाणे से पइदिओ जेइपुत्तो, सो य रायउलमि
भोयणं लहइ, इयरो य वेलाए भोयणमेत्तमवि अपावमाणो पुत्तेहिं एगंतपरिचत्तो परिभूयमप्पाणं कलिऊण हिययंतो
अमरिसमुव्हंतो चित्तेइ-अहो अकयन्नओ खलसहावो य पुत्ताइपरियणो जेण मं एवं परिभन्नइ, ता तहा करेमि जहा
एयस्सवि एसा अवत्था हवइत्ति चित्तिऊण वाहराविओ तेण जेइपुत्तो, भणियो य-वच्छ ! वहरोगभरविदुरियस्स

तुम्हारिसमुहकमलपल्लयेणेऽपि असमत्थस्स मे न जुज्झइ खणंपि जीविउं, केवलं वच्छ ! अम्ह कुले एस समायारो-
 मंतेहिं पसुं चिरमभिमंतिऊण कुण्डुवस्स भक्खणत्थं पणामिज्झइ, पच्छा अप्पा उवसंहरिज्झइ, एवं कए पुत्ताइसंता-
 णस्स कल्लणं हवइ, ता संपाडिज्झउ मे एक्को पसू जेणऽहं तथा करेमि, परितुट्ठेण समप्पिओ पुत्तेण, तेणाच्चि वथा-
 इणा अप्पाणं अब्भंगिऊण उच्चलणियाओ पइदिथहं मुंजायंतेण कुट्टवाही संचारिओ तस्स, वाहिसंभिन्नगतं च तं
 मुणिऊण आहूओ तेण जेट्टपुत्तो, भणिओ य-पुत्त ! एस पसू मए अभिमंतिओ वट्ठइ, ता तुमं सपरियणो एयमंस-
 सुवमुंजसु जेण कल्लणभागी भवसि, अहंपि सरीरचायं करेमि, तथा कयं पुत्तेण, संकतो य तम्मंसभोयेण सपरि-
 यणस्स तस्स कुट्टवाही, तओ पहिट्ठहिथओ सो निग्गओ नयराओ, पइदिणं गच्छमाणो पत्तो महाडविं च, तत्थ य
 गिम्हुम्हकिलंतो तण्हासुसियकंठो सलिलन्नेसणत्थं इओ तओ परिब्भमंतो गओ एगं गिरिनिगुंजं, दिट्ठं च तत्थ विचि-
 त्तकसायतरुत्तपुप्फफलरसपागकलिलं सलिलं, तं च आकंठं पीयसणेण, तवसेण य जाओ से विरेगो, निवडियाइं कि-
 मिजालाइं सुज्झिउमारद्धं सरीरं, एवं च अणुदिणं तप्पाणेण पणट्ठुकुट्टवाही जायपुणन्नवसरीरो नियत्तिऊण गओ
 सगिहं, तहिं च गलंतकुट्टविणट्ठदेहं पुत्ताइपरियणं दट्ठूण सामरिसं जंपियं तेण-अरे पेच्छह निग्रदुच्चलिसियाणं
 कडुवियागं, तेहिं भणियं-कहं चिय ? एवं पुच्छिए तेण सिट्ठो पुव्वबुत्ततो । ताणि य एवमायन्निऊण रुट्ठाइं अक्को-
 सिउमारद्धाइं । कहं चिय ?—

रे पावकम्म ! निग्घण ! चिलायसमसील ! एरिसं काउं । अज्जवि अम्हाण पुरो कह निययणं पयासेसि ? ॥ १ ॥
 मायंगणवि अणुचियमेवंविहकम्ममायरेतेण । नरयंमि पाडियाओ कुलक्कोडीओ अंसखाओ ॥ २ ॥
 दुज्जम्मजाय ! तुमए लोयपयाओऽवि एस किन्न सुओ । जं सकरवाडिओ विसतरुत्ति नो छिदिउं जुत्तो ? ॥ ३ ॥
 इय गेहजणेण बहुप्पयारदुव्वयणदूमियसरीरो । तत्तो विणिक्खमित्ता संपत्तो एत्थ नयरम्मि ॥ ४ ॥
 खुहाभिहओ य अल्लीणो नयरदुवारपालस्स, तेणावि किंपि भोयणविसेसं दाऊण भणिओ-अरे इह दुवारदे-
 वयाए समीवडिओ चिट्ठेज्जासु जाव अहं भयवंतं महावीरं वंदिऊण आगच्छामिन्ति, पडिबन्नं च तेण, इयरोऽवि
 आगओ मम वंदणत्थं, तत्थ य पत्थावे ऊसवविसेसवसओ पुरनारीजणो बलिपूयलियाईहिं तीसे दुवारदेवयाए पूयं
 करेइ, सो य माहणो रोरव अच्छिन्नवंछो तं बलिं भक्खिऊण पकामाहारेण रयणीए समुप्पन्नतण्हो अइभरियपो-
 दत्तणेण अंतो अमायंते सलिलंमि अट्टज्झाणोवगओ मरिऊण इहेव नयरादूरवत्तिणीए पउरजलभरियाए वावीए
 ददुरो जाओ, तत्थ य जाव पज्जत्तीभावमुवागओ ताव निसामेइ जलवाहिविलयाणं परोप्परोल्लवं, जहा-हले ! हले
 सिसगं पयच्छसु मे मगं जेण कयकायवा झत्ति भयवंतं महावीरं वंदामिन्ति, एयं च सुणंतस्स कत्थवि मए एस
 सद्दो सुयपुव्वोत्ति ईहापोहमगणं कुणंतस्स समुप्पन्नं से जाईसरणं, सुणिओ पुव्वजम्मो, तओ अहंपि तं भयवंतं
 वंदामिन्ति चिंतिऊण भत्तीए नीहरिओ वावीओ, पयट्ठो आगंतुं रायमगण, तक्खणं च तुह तरलतुरयखरखुरप्प-

हारज्जरियसरीरो सुहज्जवसायवसेण मओ समानो दहुंके विमाणे देवत्तणेणमुप्पत्तो, अवहिमुणियपुव्वयइयरो य मम वंदणत्थं आगओ । ता देवाणुप्पिया ! न एस कुट्ठी, किंतु-सुरोत्ति ॥

सेणिएण भणियं-भयवं ! कीस पुण इमेण मया छीए भणियं-जीव, अभयकुमारेण छीए-जीव वा मर वत्ति, कालसूयरिएण छिक्खिए-मा जीव मा मर, तुब्भेहिं छीए भणियं-मरसुत्ति, जयगुरुणा जंपियं-सुणासु एत्थ कारणं-तुमं हि जीवमाणो रज्जसुहमुवमुंजसि, मरणे य नरयं गमिस्ससि, अओ अणेण महाणुभावेण भणियं-जीवसुत्ति । अभयकुमारोऽवि धम्मनिरत्तणेण सावज्जवज्जरई ता तस्स जीवमाणस्स रायलच्छिभोगो मयस्सवि सुरसोक्ख-लाभो, अओ जंपियं जीव वा मर वत्ति, कालसोयरिओऽवि जीवमाणो अणेगनिरवराहपाणिगणघायेणण बहुं पावम-ज्जिणइ, मओ पुण नियमा नरयगामी, तेण भणियं-मा जीव मा मरत्ति, अवि य—

अइहुहुक्कम्मवसओ अवस्स गंतव्व नरयठाणेण । नरनाहाईण परं जीवियमेक्कं हवइ सेयं ॥ १ ॥

तवनियमसुट्ठियाणं कल्लाणं जीवियंपि मरणंपि । जीयंतऽज्जंति गुणा मयावि पुण सोग्गं जंति ॥ २ ॥

अहियं मरणं अहियं च जीवियं पावक्कम्मकारीणं । तमसंमि पडंति मया वेरं वहुंति जीवंतां ॥ ३ ॥

जं च मए छीयंमि मरसुत्ति भणियं तत्थवि इमं निमित्तं-तुमं किमिह मच्चलोए विविहावयानिवासभूए वससि?, जं न माणुस्सं विग्गहमुज्झिऊण एयंतसुहं सिवं गच्छसिन्ति ।

अहं सेणियनरिंदो पुवुत्तनरयनिवडणाथन्नणजायगाढसोगावेगो भणिउं पवत्तो-भयत्तं ! समग्गभुवणत्तयरक्खाव-
बद्धलक्खे तुमंमि सामिसाले किं मए नरए गंतव्वं ? जेण—

तुह नाममेत्तसंकित्तणंपि नासइ दिणुब्भयं पावं । कमकमलप्लेयणमवि विणिवारइ दुरियरासिंपि ॥ १ ॥

एक्केणऽवि तुह चलणोवारिंमि खित्तेण नाह ! कुसुमेण । चोज्जमिणं रुंदाणिवि नरयदुवाराइं रुज्झंति ॥ २ ॥

एक्कोऽवि नमोक्कारो कीरंतो तुज्झ सामि ! भत्तीए । जायइ हेऊ सम्गापवग्गसंवाससोक्खाणं ॥ ३ ॥

ता वाहिरोगसोगुब्भवाइं दुक्खाइं नाह ! विलसंति । जाव न सवणपुडेहिं पविसइ वयणामयं तुज्झ ॥ ४ ॥

तां कह णु नाह ! तुह नाममंतसारक्खरेहिं चितंतो । सेलुवुक्किन्नेहिवि होज्जा मे नरयदुहलामो ? ॥ ५ ॥

दुग्गइगत्तभंतरपडंततल्लोक्कएक्कसाहार । नाहे तुमएवि ममं एवंविहवसणमावडियं ॥ ६ ॥

धी धी निरत्थयं मज्झ जीवियं मंदभगसिरमणिणो । जं एरिससामग्गीयवि जस्स इमा दुग्गइ जाया ॥ ७ ॥

इय एवंविहअइगाढसोगविगलंतनयणसलिलेण । नरवइणा जयगुरुणो विन्नत्तं नरयभीएण ॥ ८ ॥

एवं च ससोगजंपिरं पुहइवइं अवलोइऊण करुणाभरमंथरनयणेण भणियं जिणेण-भो देवानुप्पिय ! कीस संता-
वमुववहसि ? जइविय सम्मत्तलाभाओ पुवमेव निवद्धाऊत्ति नरए निवडिस्ससि तहावि लद्धं तुमए लहिअव्वं, जओ

खाइगसम्मदिट्ठी तुमं, आगमिस्साए य उस्सप्पिणीए तत्तो उवट्ठित्ता पउमनाभनामो पढमत्तिथयो भविस्ससि ।
एवं निसामिऊण पहिट्ठो राया भणिउमाढत्तो—

जइ तित्थयो होहामि नाह ! तुह पायपूयणपसाया । ता थेवकालिया नरयेयणा मज्झ किं काही ? ॥ १ ॥
किं चोजं जयबंधव ! जं तुह सरणेवि मारिसेहिं लहुं । भुवणब्भुयभूयाइं सामिय ! सोक्खाइं लब्भंति ? ॥ २ ॥
अहवा किं सोऽवि प्हू संविज्जइ जोगयंपि दट्ठण । जो अत्तणो न तुछं देइ पयं सेवगजणस्स ॥ ३ ॥
एवंविहवरकळाणदायगं जाणिउं पि जो न तुमं । सेवेइ जो न मणुओ सो नूणं अत्तणो सत्तू ॥ ४ ॥
एवं सुचिरं जयगुरुं अभिनेदिऊण नयरं पविट्ठेण सेणिएण वाहरिओ मंति सामंत अंतउरपमुहो जणो, भणिओ
य-जो जयगुरुणो समीवे पव्वजं पडिवज्जइ तमहं न वोरमि, एवं सोच्चा वहवे छुमारा मंतिणो सामंता अंतउरीजणो
नायरलोगो य निक्खंतो भयवओ समीवे, कइवयदिणावसाणे य अणेगाहिं देवकोडीहिं अणुगम्ममाणो भगवं वद्ध-
माणो बहिया विहरिउमारद्धो ।

एगया तदिणदिक्खियाणंपि थेवपव्वजापजायाणं मुणीणं केवलनाणमुपज्जमाणभवलोइऊण जायंससओ जयगु-
रुमापुच्छइ-भयवं ! किमहं केवलालोयभागी भविस्सामि न वा ?, सामिणा जंपियं-भो देवाणुप्पिय ! मा संतप्पसु,
अंते तुळा भविस्सामोत्ति, इमं सोच्ची तुट्ठो गोयमो । अह भयवं तेसु तेसु पुरागराइसु अइमुत्तयलोहज्झयअभय-

कुमारधन्वसालिभद्वंदयसिवपमुहं भवजगं पद्माविज्जणं चंपापुरिं वच्चतो विन्नविओ सालमहासालारिसीहिं-
सामि ! तुम्हाणुणाए अम्हे पिट्ठिचंपाए जामो, जइ पुण तहिं गयाणं सयणवग्गस्स सम्मत्ताइलामो जायइत्ति वुत्ते
गोअमसामीं नायगं तेसिं दाऊणं भुवणिक्कंधवो गओ चंपापुरिं, तहिं च पुव्वक्कमेण विरइयमिं समोसरणे निसन्नो
जयगुरू, आगओ चउच्चिहो देवनिकाओ नयरजणो य, पत्थुया तित्थाहिवइणा धम्मदेसणा, तत्थ केणइ पत्थावेण
सामिणा इमं वागरियं-जो नियसत्तीए अट्ठावयं विलग्गइ सो तेणेव भवेण सिज्झइ, इमं च सोचा विम्बियमणा देवा
अन्नमन्नस्स कहिउं पवत्ता । इओ य गोअमसामीं पिट्ठिचंपाए नयरीए सालमहासालाणं भगिणीसुयं गांगलिनरिंदं जण-
णीजणगसमेयं पद्माविज्जणं इयरजणं च धम्मे ठाविज्जणं चंपानयरीहुत्तं गंतुं पयट्ठो, तेसिं च सालमहासालाणं अम्मापि-
उसमेयस्स गांगलिसुणिणो य सुहज्झाणवसाओ समुण्णन्नं केवलं नाणं, एवं ताणि उण्णन्नानाणि अलंकिखयसरूवाणि
मग्गंमि इति । अह गोअमसामीं तं जयगुरूवइट्ठं अट्ठावयारोहसिद्धिंलामरूवं देवपवायं सुणेइ, तेण य विम्बियहियओ
पत्तो जिणंतिंयं, तओ तिपयाहिणापुव्वयं पणमिज्जणं जयगुरूं जाव मग्गओ पलोयइ ताव सालमहासालाइणो समीं
पयविखणेउं 'नमो तित्थस्स'ति भणित्ता केवलपेरिसाभिमुहं पट्ठिए दट्ठणं भणइ-भो भो कहिं वच्चह ?, एत्तो एह,
सामीं वंदहत्ति, सामिणा भणिंयं-गोअम ! मा केवली आसाएहि, ताहे सो खामेइ, संवेगमुग्गओ चित्तेइ य-अहो
इमेहिं महाणुभावोहिं थेवपव्वज्जापज्जाएणवि पाविंयं पावणिज्जं, अहं पुण सुचिराणुचरियसामन्नोऽवि न केवललो-

यमुवलमामि, ता किमिह कीरइ?, अहवा किमणेण चिंतिएण?, वच्चामि अट्ठावयं, जेण देवेहिं इमसाइहुं-जो किर
 ससत्तीए अट्ठावयमारोहइ सो तेणेव भवेण सिज्झइत्ति, एवं च चिंतयत्तस्सं तस्स अभिप्पायं अट्ठावयकडगवासि-
 तावसोत्तरारं च सुणिऊण भणियं जिणेण-भो गोयम! चेइयवंदणट्ठमट्ठावयसेलं वच्चसुत्ति, तओ भयवं गोअमो पहि-
 ट्ठहियओ पट्ठिओ अट्ठावयं, तहिं च अट्ठावए तमेव सुरप्पवायं निसामिऊण पत्तेयं पंचपंचतावससयपरि-
 वारा कुंडिन्नदिन्नसेवालथनामानो तिन्नि कुलवइणो जहक्कमचउत्थळट्ठुमपारणगदिणेसु सचिच्चकंदमूलाइपरिसडि-
 यंपडुपत्तसुक्केसेवालभोइणो पढमवीथतइयभेहलासु समारूढा समाणा तक्खणं चिय तरुणतरणिभासुरोदारसरीरं
 गोयमसामीं तं पएसमणुपत्तं दट्ठूण जंपंति-अहो किमेस पीवरसरीरो समणो आरुहिही जं अम्हे महातवस्सिणो
 तवकिसियसरीरा न तरामो आरुहिउं?, एवं च तेसिं जंपंताणं भयवं गोअमो जंवाचारणलद्धीए लूयातंतुराविकर-
 मेत्तंपि निस्साए काऊण अविलंबियगईए समारूढो अट्ठावयं, अह तंमि चक्खुगोयरमइक्कंतंमि ते तिन्निवि कुल-
 वइणो विम्बियमाणसा चिंतंति-जइ एस महप्पा इमिणा पहेण ओयरइ ता वयमेयरस्स सिस्सा भवामोत्ति, गोअ-
 मसामीवि उसमाइजिणिंदे वंदिऊण ईसाणदिसिविभागे असोगतरुतले मणिसिलापट्टए तं रयणीवासमुवगओ ।
 एत्थ य पत्थावे वेसमणो नाम सक्कदिसापालो चेइयपूयाए पज्जेते गोअमसामीं वंदित्ता समीवे निसीयइ, भयवंपि
 समणगुणे सवित्थरं कहइ, जहा-भयवंतो साहवो अंताहारा पंताहारा विचिच्चतवकिमियेदेहा हवंति इच्चाइ, वेस-

मणो चित्तेह-एस भयवं एरिसे साहुगुणे कहेह, अप्पणा उ तं सररिसरिसुवहइ जा तियसानवि नत्थि, इमं च तदभिप्पायं मुणिकुण गोयमसामी पुंडरीयज्झयणं परूवेइ । जहा—

पुंडरिगिणीपुरीए राथा नामेण आसि पुंडरिओ । कंडरिओ से भाया पव्वजं सो पव्वनो य ॥ १ ॥

अइदुकरयाए संजमस्स सो अन्नया पराभग्गो । पव्वजं मोत्तुमणो विसयपिवासाए पारद्धो ॥ २ ॥

गुरुकुलवासं चेच्चा समागओ भाउणो समीवंमि । तेणाविह सो नातो जहेस रज्जं समीहेइ ॥ ३ ॥

ताहे पुंडरिएणं निययं रज्जं समप्पियं तस्स । तवेसो पुण गहिओ चलिओ य गुरुस्स पासंमि ॥ ४ ॥

गच्छंतो स महप्पा अणुचियआहारदोसओ मरिउं । सुद्धज्झवसाणाओ उवचियेदेहोऽवि उववन्नो ॥ ५ ॥

सवट्ठविमाणंमि इयरो पुण गाढाकिसियगतोऽवि । सहज्झवसाणाओ सत्तममहिनारगो जाओ ॥ ६ ॥ जुम्मं ।

ता भो देवाणुप्पिय ! किसत्तमियरं च एत्थ नो हेऊ । किं तु सुहज्झवसाणं तं पुण जह होइ तह किच्चं ॥ ७ ॥

इय गोयमेण भणिए सो देवो मुणियमाणसविगण्णो । वंदित्ता भत्तीए जहागयं पडिनियत्तोत्ति ॥ ८ ॥

गोयमसामीऽवि निसावसाणे जिणंविवाइ नमसिऊण नागवराओ ओयरंतो हरिसुन्नामियकंधरोहिं सविणयं विन्नत्तो

तावसेहिं-भयवं ! अम्हे तुम्ह सिस्सा तुम्हे अम्ह धम्मगुरुणो, ता पसीयह दिक्खादाणेणं, गणहारिणा जंपियं-

भो महाभावा ! तुम्हं अम्हाण य तिलोयनाहो गुरु, तेहिं भणियं-तुम्हवि अन्नो गुरु?, तओ गोयमो जयगुरुणो

गुणसंथवं काउमारद्वो, ते य सुदुयरं वड्डियपरिणामा उवड्डिया पवइउं, पद्माविया य गणहारिणा, समप्पियाणि
 तेसिं देवयाए रयहरणाइं, अह तेहिं पन्नरसत्तावससएहिं परियरिओ गंतुं पयत्तो, जाए य भोयणसमए गोय-
 मसामिणा भणिया ते, जहा-भो देवाणुप्पिया ! किं तुमह पियं भोयणं पणामिज्जउ ? तेहिं भणियं-पायसोत्ति,
 तओ सबलद्धिसंपन्नो भयवं घयमहुसणाहस्स पायसस्स पडिगहं भरित्ता आगओ, अक्खीणमहाणसिलद्धिसामरथेण
 य सवे जहिच्छाए पजेमिया, तदुव्वरियसेसं च अप्पणा भुंजति, एवंविहं च अइसयं भगवओ पेच्छऊण ते सुदुयरं
 आणंदिया, नवरं सुक्कसवोलभक्खीणं पंचणहवि तावससयाणं सुहज्झवसाणाओ केवलनाणमुप्पन्नं, कमेण य तत्तो
 वचंता पत्ता चंपापुरिं, तेहिं च दिन्नस्स सपरिवारस्सवि भगवओ छत्ताइछत्तं पेच्छंतस्स, कौडिन्नस्सवि सामिणो
 रूयंदसेणेण केवलमुप्पन्नं, एवं जायकेवलेहिं तेहिं पन्नरसहिवि सएहिं समेओ गोयमो भयवंतं पयाहिणीकरइ, ते य
 पयाहिणावसाणे तित्थपणामं काऊण केवलपरिसं पडुच्च गच्छते पेच्छऊण भणइ-भो किमेवं वच्चह ? एह सामिं
 वंदह, जयगुरुणा कहियं-मा केवलियो आसाएहि, तओ सो मिच्छादुक्कंडंति काऊण अप्पणो नाणाणुप्पाएणं अद्धिइ
 कुणंतो वुत्तो सामिणा-भो देवाणुप्पिय ! किं देवाणं वयणं गेज्झं ? उयाहु जिणाणं ? गोअमो भणइ-जिणाणं,
 जयगुरुणा जंपियं-जइ एवं ता किं अद्धिइं पकरेसि ? जेण मए तं पुव्वंचिय भणिओ, जहा-अंते तुल्ला भविस्सामोत्ति,
 जं पुण संपयं चिय तुह नाणं न उप्पज्जइ तत्थ इमं कारणं—

चिरभवपरंपरापरिचिओ सि चिररूढगाढनेहोसि । तं मे गोयम ! जेणं तेण न ते जायई नाणं ॥ १ ॥

अइथेवसंथवुत्तोऽवि नेहभावो दुमिछओ होइ । किं पुण बहुकालद्वोन्नतुल्लसंवाससंजणिओ ? ॥ २ ॥

एत्तो चिय विणिहयनायगव सेणाहयंमि मोहम्मि । कम्मावली दलिज्जइ लीलायच्चिय समग्गावि ॥ ३ ॥

ता नेहपसरमुच्छिदिऊण मज्झत्थयं समायरसु । मोक्खभववाइसु किर परमसाहुणो निष्णिहा होति ॥ ४ ॥

इय भणिए जयगुरुणा सविणयपणओ तहत्ति भणिऊण । पडिवज्जइ तं वयणं गोयमसामी मुणिवरिंदो ॥ ५ ॥

एवं गोयमसामीं संबोहिऊण विहरिओ तत्तो जयगुरु । अह परिभमंतो गामागनगरसुंदरं वसुधराभोगं कमेण पत्तो मिहिलापुरिं, समोसढो य माणिमद्दाभिहाणंमि चेइए, समागया ससुरासुरावि परिसा, सिट्ठो य भगवया अभयप्पहाणमूलो अलियवयणविरइप्पहाणो परधणपरिवज्जणमणहरो सुरनरतिरियरमणीरमणपरंमुहो आकिंचणगुणरघविओ समणधम्मो, तहा पंचाणुव्वथपरिथरिओ गुणव्वयतियालंकिओ चउसिक्खावयसमेओ सावयधम्मो य । तं च सोऊण बुद्धा वहवे जंतुणो, केऽवि गहियसामन्ना अन्ने पडिवन्नदंसणा जायत्ति । एत्थंतरे गोयमसामी परेण विणएणं पणमिऊण जयगुरुं भणइ-भयवं ! महंतं मे कोऊहलं दूसमाए सरूवसवणविसए, कुणह अणुगहं, साहह जहाभाविरंति, भणियं जिणेण-गोयम ! भाविरमवि दूसमाए वुत्तंतं साहिज्जंतं एगगमणो निसामेगु— .

मइ निव्वाणसुवगए पंचमअरओ उ दूसमा होही । तीए वसा भवोऽवि हु न जणो धम्मज्जमं काही ॥ १ ॥
 मुणियोऽवि परोप्परकलहकारिणो बहुपरिगहासत्ता । वट्टिस्सति न सम्मं बाहुल्लेणं सधम्ममि ॥ २ ॥
 पासंडियोऽवि नियनियगंथपरंमुहा मयणमूढा । पम्मक्खधम्मकम्मा ओलग्गिस्सति राईणं ॥ ३ ॥
 पागयलोगो मोत्तुं कुलभरं तेसु तेसु कज्जेसु । अबंतगरहिणसुवि वट्टिस्सइ जीविगाहेउं ॥ ४ ॥
 अत्थप्पिया य अइदप्पिया य परच्छिदपेच्छणपरा य । पीडिस्सति जणोहं पयंदडेहिं नरयइणो ॥ ५ ॥
 एकजणणीपसूयावि भाइणो जणगदवल्लोभेण । अन्नोन्नजीवयायं काउं दढमभिलसिस्सति ॥ ६ ॥
 धम्मच्छलेण पावं विमूढमइणो समायरिस्सति । पसुमेहकूखणणाइसु कम्मसु वट्टता ॥ ७ ॥
 भूयभविस्सत्थेसु य विन्नाणं देवयावयारो वा । विज्जा सिद्धी य वरा बाहुल्लेणं न होहिंति ॥ ८ ॥
 उम्मग्गदेसणामगनासणावंचणाभिरयचित्ता । गुरुणोऽवि जहिच्छाए धम्मायारं चरिस्सति ॥ ९ ॥
 तविहिंति खरं रविणो नो वरिसिस्सति समुच्चियं मेहा । रोगायंका मारी य विद्विस्सति जणनिवहं ॥ १० ॥
 चस्सिखलखलजणहीलणाहिं अणिमित्तउणत्थघडणाहिं । पाविस्सइ खणमेत्तंपि नेव सोक्खं विसिद्धजणो ॥ ११ ॥
 वाससहस्सा इह एकवीसइ जाव दोसपरिहीणं । दुप्पसहंतं चरणं पवित्तिही भरहखेत्तमि ॥ १२ ॥
 इय एसो संखेवेण तुज्झ गोयस ! मए समणुसिद्धो । दूसमकालसमुत्थो वुत्ततो भवभयजणगो ॥ १३ ॥

एयं सोच्चा मुणिणो संजसकज्जमि तह पयट्ठह । तक्कालसमुत्थविडंबणाउ पावह जहा नेव ॥ १४ ॥

एवं जिणेण सिट्ठे सविसेसं संजमुज्जया जाया । समणजणा अह भयवं मिहिलानयरीउ निक्खंतो ॥ १५ ॥

पत्तो पोयणपुरं, तहिं च संखवीरसिवभट्टपमुहा नरिंदा दिक्खा गाहिया, एवं च जएक्कनाहो महावीरो गोयम-
सामिप्पमुहाणं चउट्टसण्हं समणसहस्साणं अज्जचंदणाईणं छत्तीसाइ अज्जियासहस्साणं आणंदसंखपमुहएगूणस-
ट्ठिसहस्ससमहियस्स सावयलक्खस्स सुलसारेवईपमुहाणं तिण्हं सावियलक्खाणं अट्टारससहस्सहिगाणं तिण्हं चउ-
ट्टसपुविसयाणं अट्टण्हं अणुत्तरोववाइयसयाणं मग्गदेसगत्तं गुरुत्तं सामित्तं उव्वहतो नाणकिरणेहिं तमनियरसवहरतो
चिरं विहरिओ वसुंधराए । अह अग्गिभूइवाउभूईवियत्तमंडियमोरियपुत्ताकंपियायलभाइमेयज्जपहासनोमेषु नवसु
गणहरेसु सिद्धिं गएसु केत्तियंपि कालं भवसत्तपडिवोहणं काऊण अप्पणो मोक्खगमणकालं पच्चासन्नमुवलक्खऊण
भयवं वट्ठमाणो गओ असेसदेसलद्धपसिद्धीए पावापुरीए, तहिं च नियमुयनिहलियपडिवक्खो हत्थिपालो नाम नरिंदो,
तस्स अणेगखंभसथसमहिट्ठियाए विसिट्ठिविचित्तचित्तकम्ममणहराए पवरसालमंजियाभिरामदुवारतोरणाए सव्वसत्तो-
वरोहरहियाए महइमहालियाए सुंकसालाए नरिंदाणुन्नापुरस्सरं ठिओ चरिभवासारत्तंमि जयगुरू । कमेण पत्तंमि जय-
गुरू कत्तियस्स अमावसादिणे अप्पणो उव्वरि केवलालोयविग्घकारयं सिणेहं कुणंतं गोयमं भणइ-ओ देवाणुण्णिय !
एत्थ पच्चासन्नगामे गंतूण देवसम्माभिहाणं माहाणं पडिवोहेसुत्ति, जं सामी आदिसइत्ति जंपिऊण गओ गोयमो,

कयं जहाइदं, तुत्यो य तत्थ । अह तस्स चैव दिणस्स पच्छिमनिसाए साइरिक्खंमि वट्टमाणंमि तीसइवरिससंखं
केवलपज्जायं परिपालिऊण कयलट्टतवोक्कम्मो पलियंकासणसंठिओ भयवं महावीरो सबसंवरूवं सेलेसिं जावज्जवि
न पवज्जइ ता असंभमुब्भंतनयणनलिणीविणेण तक्कालुगमंतभासरासिक्कूरगहविभावियजिणसासणोवपीडेण सबहु-
माणं विव्वत्तो सक्केण—

भयवं ! कुणह पसायं विगमह एवंपि ताव खणमेक्कं । जावेस भासरासिस्स नूणसुदओ अवक्कमइ ॥ १ ॥

जे एयस्सुदएण तुम्हं तित्थं कुत्तिथएहिं ददं । पीडिस्सइ सक्कारं न तहा पाविस्सइ जणाउ ॥ २ ॥

न य तुमहे असमत्था एवंविहकज्जसाहणे जेण । जो तोलइ तइलोकं बलेण का तस्स इह गणणा ? ॥ ३ ॥

तथा—कइउणंतसत्तिजुत्ता जिणा हवंतित्ति वयणमवि अमहे । पत्तिज्जिस्सामो पहु ! जइ न तुमं ठासि खणमेक्कं ॥ ४ ॥

अह जयगुरुणा भाणियं सुरिंद ! तीयाइत्तिविहकालेऽवि । नो भूयं न भविस्सइ न हवइ नूणं इमं कज्जं ॥ ५ ॥

जे आउक्कम्मविगमेऽवि कोवि अच्छेज्ज समयमेत्तमवि । अचंताणंतविसिट्टसत्तिपब्भारजुत्तोऽवि ॥ ६ ॥

अवि जोडिज्जइ सयखंडियंपि वयरागरूभवं रयणं । परिसडियमाउदलियं न उ तीरइ कहवि संघडिउं ॥ ७ ॥

ता जइ अचंतमभूयमत्थममहे न साहिमो एयं । किं एत्तिएण नाणंतसत्तिणो ? सुयसु ता मोहं ॥ ८ ॥

इय वोहिऊण सक्कं सेलेसिं जयगुरु समारुहिउं । समगं चिय वेयणिथाउनामगोत्ताइं खविऊण ॥ ९ ॥

जस्तसद्वाए क्रीरइ पुरमंदिररज्जलच्छिंसचागो । मुच्चइ सिणेहवंधुरवंधवज्जणाढपडिंबयो ॥ १० ॥
आयाविज्जइऽसइ गिम्हुम्हवणिहसंतत्तसक्करे । भूमीयलंमि हिमकणदुविसहे सीयकालेऽवि ॥ ११ ॥
भुंजिज्जइऽसइ सुंदुछतुच्छमरसं च भोयणं पाणं । निवसिज्जइ भीमसुसाणसुन्नगिहरन्नमार्हसु ॥ १२ ॥
सेविज्जंति पइदियहमेव वीरासणाइठाणाइं । छट्ठमाहुक्करतवचरणाइं पि कीरंति ॥ १३ ॥
अहियासिज्जइ नरतिरियदेवविहिओवसग्गवग्गोऽवि । न गणिज्जइ दुविसहो परीसहाणं पंबयोऽपि ॥ १४ ॥

तिहुयणपणमियचलणो भवभयमहणो जिणो महावीरो ।

उमउच्चिय एगाणी तं मोक्खपयं समणुपत्तो ॥ १५ ॥ सत्तहिं कुलयं ।
अह सव्वेऽवि सुरिंदा चउविहदेवेहिं परिवुडा झत्ति । चलियासणा विद्याणियजिणनिवाणा समोइत्ता ॥ १६ ॥
विगयाणंदा बाहण्णवाहवाउलियनयणपमंता । जगताहस्स सरीरं नमिउमदूरे निसीयंति ॥ १७ ॥
अह सोहम्माहिवई गोसीसागरुपमोक्खदारूहिं । नंदणवणाणिइहिं चियमेगंते स्या चित्ता ॥ १८ ॥
अह सुराहिखीरसायरजलेण ण्हविज्जण जिणवरसरीरं । हरिचंदणोवलित्तं नियंसियामलदुगूलं च ॥ १९ ॥
सद्वाणपिणद्वविचित्रयरणकिणुब्भडाभरणरुहरं । सिवियाए संठविच्चा नेह चियाए समीवंमि ॥ २० ॥
अह देविंदेसु जयजयारवं निब्भरं कुणंतेसु । कुसुमुक्करं मुयंतेसु सव्वओ खयरनिगरेसु ॥ २१ ॥

नच्चंतीसु सुरसुंदरीसु तूरेसु वज्रमाणेसु । अचंतसोगविहरे संघमि य संथुगंतमि ॥ २२ ॥
 अग्निकुमाराण जलणजालजालापलीविद्याए लहुं । आरोर्विति चियाए जिणबुद्धिं असुरसुरवइणो ॥ २३ ॥
 वाउकुमारा वायं कुगंति अघरे सुरा पुण खिवंति । गंधद्वधुमुट्ठिं घयमहुकुंभे य पुणरुत्तं ॥ २४ ॥
 मंसाइएसु देहसु तो चियं निव्विंति थणियसुरा । खीरोयवारिधाराहिं सिसिरंगंधाभिरामाहिं ॥ २५ ॥
 अह पहुणो उवरिल्लं मंगलकएण दाहिणं सकहं । गिणहइ सक्को हेट्ठिल्लयं च चमरो असुराया ॥ २६ ॥
 ईसाणिंदो वामं उवरिल्लं तस्स हिट्ठिमं च वली । इयरे सुरासुरिंदा जहारिहं अंगुवंगाइ ॥ २७ ॥
 तत्तो चियाय ठाणे विचित्तरयणेहिं विरइयं थूमं । निव्वाणगमणमहिमं जत्तेण कुगंति जयगुरुणो ॥ २८ ॥
 अह निव्वत्तियतक्कालजोगनीसेसनिग्रयकायच्चा । सोगभरमंथरगिरं एवं भणिउं समाढत्ता ॥ २९ ॥
 अज्जं चिये अत्थमिओ दिवायरो अज्ज भारहं खेत्तं । अन्नहरियसाररणं जायं नाहे सिवं पत्ते ॥ ३० ॥
 एत्तो पयंडभववेरिपीडियाणं पणहुबुद्धीण । अम्हारिसाण सरणं को होही नाह ! तुह विरहे ? ॥ ३१ ॥
 समुरासुरं पि भुवणं मन्ने निधुन्नयं समगं पि । अन्नह कुलसेलाऊ हुंतोसि तुमं जिणवरिंदा ! ॥ ३२ ॥
 अहवाऽवस्संभाविसु वत्थुसु संतावकप्पणा विहला । एक्कमियाणिं विजयउ सइ तित्थं तुज्झ जयनाह ! ॥ ३३ ॥
 इय जंपिऊण दुस्सहजयगुरुविरहगिद्धमिया सक्का । नंदीसरमि गंतुं काउं अट्ठाहियामहिमं ॥ ३४ ॥

वर्चंति देवलोगं वहरामयवदृवरसमुग्गेषु । जिणसंकहाओ ताओ खिवंति जत्तेण पृहत्ता ॥ ३५ ॥
अह सा जिणस्स निव्वाणजामिणीसुरतनूकउज्जोया । दीवूसवोत्ति अज्जवि पइवरिसं कीरइ जणेण ॥ ३६ ॥
गोअमसाभीवि नहोअंतसुरवरविमाणपेच्छणओ । नाउं जिणनिव्वाणं चित्तेउमिमं समाढत्तो ॥ ३७ ॥
एक्कादिणमेत्तकज्जेण कीस नाहेण पेसिओऽहमिहं ? । चिरसंथुएसु किं वा जुज्जइ एवंविहं काउं ? ॥ ३८ ॥
हा हा अहं अहन्नो जो सुचिरं सेविज्जण कमकमलं । पज्जंते जयगुरुणो संपइ विच्छोहिओ एवं ॥ ३९ ॥
अहवा जिणंमि वोच्छिन्नपेमदोसंमि कीस हे हियय ! । पढमं चिय पडिवंधं कुणसि ? जमेत्तो वहसि सोगं ॥ ४० ॥
संसारवल्लिजलसारणीसमो दुग्गदुग्गइदुवारं । सिवसोक्खकंखिराण मूलमणत्थाण पडिवंधो ॥ ४१ ॥
ते धन्ना सप्पूरिसा लीलाए च्चिय निसुंभिओ जेहिं । सुहहरिणक्खयकारी मोहमहाकसरिकिसोरो ॥ ४२ ॥
इय सुक्कज्झाणानलनिददुघणवाइकम्मदारुस्स । गोअमपहुस्स सहसा उप्पन्नं केवलं नाणं ॥ ४३ ॥
बारस वासाइं विवोहिज्जण भवे सिवं गए तंमि । भयवं सुहम्मसामी निव्वाणपहं पयासेइ ॥ ४४ ॥
तंमिवि चिरकालं विहरिज्जण सिरिज्जुसामिणो दाउं । गच्छगणामणुन्नं संपत्ते सिद्धिवासंमि ॥ ४५ ॥
एवं विज्जाहारसुरिदंसदोहवदणिज्जेसु । समइक्केतसु महापहूसु सेज्जंभवार्इसु ॥ ४६ ॥
अइसयगुणरणनिही मिच्छत्ततमंधलयदिणनाहो । दूरच्छारियवइरो वइरसामी समुप्पन्नो ॥ ४७ ॥

साहाइ तस्स चंदे कुलंमि निप्पडिमपसमकुलभवणं । आसि सिरिवद्धमाणो मुणिनाहो संजमनिहिच्च ॥ ४८ ॥
 बहलकलिकालतमपसरपूरियासेसविसमसमभागो । दीवेणं व मुणीणं पयासिओ जेण मुत्तिपहो ॥ ४९ ॥
 मुणिवइणो तस्स हरअट्टहाससियजसपसाहियासस्स । आसि दुवे वर सीसा जयपयडा सूरससिणोद्य ॥ ५० ॥
 भवजलहिवीइसंभंतभवियसंताणतारणसमत्थो । वोहित्थोच्च महत्थो सिरिसूरिजिणेसरो पढमो ॥ ५१ ॥
 गुरुसाराओ धवलाउ सुविहिया (निम्मला पु.) साहुसंतई जाया । हिमवंताओ गंगच्च निग्गया सयलजणपुज्जा ॥ ५२ ॥
 अन्नो य पुन्निमायंदसुंदरो बुद्धिसागरो सूरी । निम्भवियपघरवागरणल्लदसत्थो पसत्थमई ॥ ५३ ॥
 एगंतवायविलसिरपरवाइकुरंगभंगसीहाणं । तेसिं सीसो जिणचंदसूरिनामो समुप्पन्नो ॥ ५४ ॥
 संबेगंगसाला न केवलं कच्चविरयणा जेण । भवजणविम्हयकूरी विहिया संजमपवित्तीवि ॥ ५५ ॥
 ससमयपरसमयन्नू विसुद्धसिद्धंतदेसणाकुसलो । सयलमहिवलयवित्तो अन्नो ऽभयदेच्चसूरित्ति ॥ ५६ ॥
 जेणालंकारधरा सलक्खणा वरपया पसन्ना य । नवंग (सिद्धंत पु.) वित्तिरयणेण भारई कामिणिच्च कया ॥ ५७ ॥
 तेसिं अत्थि विणेओ समत्थसत्थत्थवोहकुसलमई । सूरी पसन्नचंदो चंदो इव जणमणाणंदो ॥ ५८ ॥
 तच्चयणेणं सिरिसुमइवायगाणं विणयेलेसेण । गणिणा गुणचंदेणं रइयं सिरिवीरचरियमिमं ॥ ५९ ॥
 एयस्स विरयणंमी निच्चंधो जेसि गाढमुप्पन्नो । ते पुण मूलाओ चिय साहिजंते निसामेह ॥ ६० ॥

सियजसजोणहाधवलियनायकुलनहयले मयंकुव । पुव्वमहेसि महेसीपणओ सिरिजीवदेवपहू ॥ ६१ ॥
 तस्स सुमिस्सो सिद्धंतसिद्धसुविसिद्धसंजमाभिरओ । गुणरणरोहणगिरी पयडो जिणदत्तसूरिति ॥ ६२ ॥
 गंभीरिमाए पसमेण बुद्धिविभवेण दक्खिणत्तेण । सुंदरनएण जेसिं कोऽवि न तुल्लो जए जाओ ॥ ६३ ॥
 तेहिंतो पडिबुद्धो वायडकुलभवणजयपडायनिभो । कण्णडवाणिज्जपुरे सेट्ठी गोवद्धणो आसि ॥ ६४ ॥
 नंदीसरावलोयणमणण भवाण दंसणत्थं च । कारावियं सुतुंगं बावन्नजिणालयं जेण ॥ ६५ ॥
 धम्मधरणीए गिहिणीए तस्स सोढित्ति नामधेयाए । अगणियगुणगणनिलया पुत्ता चत्तारि उप्पन्ना ॥ ६६ ॥
 पढमो अम्मयनामो वीओ सिद्धोत्ति जज्जणागो य । तइओ चउत्थओ पुण विक्खाओ नन्नओ नाम ॥ ६७ ॥
 नयविणयसच्चधम्मत्थसीलकलिहं जेहिं दिट्ठहिं । नूणं जुहिट्ठुल्लहंवि सद्धिज्जंति सण्णुरिसा ॥ ६८ ॥
 अह संथारयदिकखं पवज्जिउं भावसारसंतंभि । गोवद्धणंभि सगं गंथंमि तह पढमपुत्तदुगे ॥ ६९ ॥
 सो सेट्ठी जज्जणागो छत्तावल्लीए वासमकारिं सु । सब्बकणिट्ठो नन्नयसेट्ठी पुण मूलठाणेवि ॥ ७० ॥
 तेसिं च भइणिपुत्तो नियपुत्ताओवि गाढपडिबंधो । आसि जसणागनामो सेट्ठी सुविसिद्धगुणनिलओ ॥ ७१ ॥
 अह नन्नयस्स पुत्ता पयडा साविच्चिकुच्छिसंभूया । दोव्वि चिय उप्पन्ना गोवाइवो कवही य ॥ ७२ ॥
 सत्तुंजयपमुहसमत्थतित्थजत्ता पयट्ठिया जेण । पढमं चिय तस्स कवडिसेट्ठिणो को समो होज्ज ॥ ७३ ॥

पुरिसत्थकरणनिरयस्स जज्जणागस्स विस्सुयजसस्स । अत्थि जिणधम्मनिरया कलत्तमिह सुंदरी नाम ॥ ७४ ॥
 जाओ तीसे सुंदरविचित्तलक्खणविराइयसरीरो । जेद्धो सिद्धो पुत्तो बीओ पुण वीरनामोत्ति ॥ ७५ ॥
 को तेसि दाणविन्नाणबुद्धिसुविदुधधम्मगेहाण । निउणोऽवि गुणलवंपिहु होज समत्थो य वित्थरिउं ॥ ७६ ॥
 नागो इव पिंडिज्जइ वंभंडकरंडए अमायंतो । जस्स जसोहो सारयनिसिच्छणमयलंछणच्छाओ ॥ ७७ ॥
 जिणविंवसुपसत्थतित्थजत्ताइधम्मकरणेण । धम्मियजणाण मज्जे जेहि य पत्ता पढमरेहा ॥ ७८ ॥
 अन्नाणतण्हसमणी सुयनाणपवा पयट्ठिया जेहिं । सयलागमपोत्थयलेहणेण निच्चपि भव्वाण ॥ ७९ ॥
 तेहिं तित्थाहिन्नपरमभत्तिसव्वस्समुद्वहंतहिं । वीरजिणचरियमेयं कारवियं सुद्ववोहकरं ॥ ८० ॥
 जमजुत्तमेत्थ भणियं नियमइदुब्बलओ मए किंपि । तं साहंतु गुणट्ठा ओच्छाइयमच्छरा विउसा ॥ ८१ ॥
 छत्तावल्लिपुरीए मुणिअंबेसरगिंहमि रइयमिमं । लिहियं च लेहएणं माहवनाभेण गुणनिहिणा ॥ ८२ ॥
 नंदसिहिरुदंसखे(११३९)वोक्कते विक्कमाओ कालमि । जेट्ठस्स सुद्वतइयातिहिमि सोमे समत्तमिमं ॥ ८३ ॥

निहयसयलविग्घोऽणप्पमाहप्पजुत्तो जयइ जयपसिद्धो वद्धमाणो जिणिंदो ।
 तयणु जयइ तस्सासंखसोक्खेक्कमूलं, गरुयभवभयाणं नासणं सासणं च ॥ ८४ ॥

असिधसमणदक्खो पाणिणं कप्परक्खो, जयइ जयपासो पासनाहो जिणेसो ।
तयणु जयइ वाणी दिवपंकेरुहत्था, सुयरयणधरिन्ती पंकयालीणहत्था ॥ ८५ ॥
इय जिणवरवीरस्सड्डुमो ताव वुत्तो, परमपयपाणो नाम पत्थाव एसो ।
चरियमवि समत्तं एयसंकित्तणाओ, हवउ सुहकरं वो नूणमाचंदसूरं ॥ ८६ ॥
एयं वीरजिणेसरस्स चरियं जे भावसारं जणा, वक्खाणंति पढंति निचलमणा निच्चं निसामिंति य ।
तोसिं इड्ढविओगऽणिट्ठपडणादोगचरोगावया-पामोक्खं खयमेइ दुक्खमखिलं सोक्खाणि वद्धंति य ॥ ८७ ॥

॥ ग्रंथाग्रं. १२०२५ ॥ शुभं भवतु श्रीसंघस्य ॥

यावल्लवणसमुद्रो यावन्नक्षत्रमंडितो मेरुः ।
यावच्चन्द्रादित्यौ तावदिदं पुस्तकं जयतु ॥

इति श्रेष्ठि-देवचन्द्र लालभाई-जैनपुस्तकोद्धारे ग्रंथाङ्कः ७५ ॥

इइ सिरिचन्दकुलीणऽभयदेवसूरिपट्टपहुसिरिपसणचंदसूरिवियणेण सिरिसुमइ-

वायगविणयगणिसिरिगुणचन्दनिम्मियं कप्पडवाणिज्जभिजण-


गोवद्धणसुतजज्जणागपुत्तसिट्टवीरगहकारियं

सिरिवीरजिणचारियं सम्मत्तं.

इति श्रेष्ठि-देवचन्द लालभाई-जैनपुस्तकोद्धारे ग्रंथांकः ७५ ॥

16416

शेठ देवचंद लालभाई जैन पुस्तकोद्धार फण्ड,



जंढेरी बजार-मुंबई.

मंत्र १२८४

गोपीपुरा-मुमुत.

६०००-४-२८.

श्रीकृष्ण स्लोग प्रेस

मुम्बई मार्केट, धनर्ज स्ट्रीट मुंबई.